

არჩილ სულაკაური



საგმი  
ჩოგანა



ბავოვიძის ბავოვიძის „საგმოს საქართველო“  
თბილისი— 1988

84 Гр 7—4  
ს 923

შოთა რუსთაველის პრემიის ლაურეატის, არჩილ სულაიაურის შემოქმედებას კარგად იცნობს მკითხველი, იგი მრავალი შესანიშნავი პოეტური და პროზაული ნაწარმოების ავტორია.


გამომცემლობა მკითხველს სთავაზობს მწერლის ნაწარმოებების კრებულს, რომელშიც სამი რომანია შესული.

მეორე ბამოცემა

47021770201 — 224  
C ~~258~~—88  
M 601 (08) 88

ISBN 5-529-00155-6

# ლუკა



ლუკა სტვენამ გამოაღვიძა. საწოლზე წამოჯდა და ფვალები მოიფშენიდა. მერმე მიაყურა: სტვენა ქუჩიდან ისმოდა. სწრაფად მიიბრინა ფანჯარასთან და ქუჩაში გადაიხედა. მიტო, ლუკას სკოლის ამხანაგი, ზურგით მიყრდნობოდა ჭადარს ვეტერინალური კლინიკის წინ და გამწარებული ცას უბერავდა, იქაურობას სტვენით აყრუებდა.

— ეი, მიტო! — გადასძახა ლუკამ.

— რა გინდა? — აღმაცერად ამოხედა მიტომ ქვემოდან.

— რას უსტვენ-მეთქი? — ჰკითხა სკოლის მეგობარს. თან დიმილითა და ხელების მოძრაობით სცადა ენიშნებინა — თუ გინდა წაგეშველებიო. ლუკას ერთი სული ჰქონდა, თვითონაც დაესტვინა.

— ისე... ჩემთვის ვუსტვენ... რა აკრძალულია?! — ჭადარს მიყრდნობილმა ამრეზით აჰყარა მხრები და კვლავ თითებით გამოიტენა პირი.

ლუკას, რა თქმა უნდა, გული დაწყდა, არა მარტო დაწყდა გული, ეწყინა კიდევ, ამ დილაადრიანად სტვენის შესაძლებლობა რომ დაჰკარგა. მიტოს მიზეზი არ უთქვამს და უმიზეზოდ ხომ არ დაუსტვენდა? იდგეს ქუჩაში ახლა და სულელივით მარტომ უსტვენოსო, — ფეხშიშველი გამოტყაპუნდა შუშაბანდში, ტრუსისა და მაისურის ამარა.

შუშაბანდში ორივე დეიდა ტიროდა, ისინი ჰატარა მაგიდას მისხდომოდნენ და ჩუმად, უხმოდ ტიროდნენ.

ლუკა მათ თვალეზზე პირველად ხედავდა ცრემლს და, ცოტა არ იყოს, გაუკვირდა. ერთი კი გაიფიქრა, — ამათი სლუ-

კუნის თავი სადა მაქვს, მოდი, გავიძურწებითო, მაგრამ დედაბრებმა მაშინვე იგრძნეს ლუკას შემოსვლა და ახლა უკვე მამალა აქვითინდნენ:

— დავიღუპეთ, ლუკა!.. დავიღუპეთ!.. ომი დაიწყო!..

## თავი პირველი

კაცმა რომ თქვას, იმ დილით, როდესაც დედაბრებისაგან შეიტყო, ომი დაიწყო, ეს ამბავი მაინცდამაინც არა სწყენია. ომზე მისი წარმოდგენა კინოფილმებში ნანახი წითლებისა და თეთრების საბრძოლო ეპიზოდებით შემოიფარგლებოდა. იქ ყოველთვის წითლები იმარჯვებდნენ და სულაც არ შეჰპარვია ეჭვი, რომ ამჯერადაც ისევე იოლად გაიმარჯვებდნენ, როგორც ეკრანზე. განსაკუთრებით ბუდიონის იმედი ჰქონდა.

მაშინ გუნებაში გაელიმა, — ბებრებმა რა იციან ომის გემო, და აივანზე გამოვიდა. დედაბრების მიმართ ამ დამცინავ აზრს ისიც უმაგრებდა მხარს, რომ ლუკას მამა კავალერიის ოფიცერი გახლდათ.

მაგრამ აივანზე გამოსულს ანდუყაფარმა უთხრა ის, რაზეც მას ბუნდოვანი წარმოდგენაც კი არ ჰქონდა: ამ ომში ცხენები სამხედრო საქურელის გადასაზიდად ანდა დაჭრილებისა და ლტოლვილების გადასაყვან-გადმოსაყვანად თულა გამოდგებიან თორემ სხვა დანიშნულება მათ უკვე აღარა აქვთო.

უფრო თავზარდამცემი ამბავი შეიტყო ლუკამ ანდუყაფარისაგან და მხოლოდ მაშინ მიხვდა, თუ რატომ ტიროდნენ დედაბრები ასე გამწარებით. ლუკას დედა ომის დაწყებამდე ხუთი დღით ადრე გაემგზავრა მეუღლის მოსანახულებლად დასავლეთ უკრაინაში, სწორედ იქ, საზღვრის მახლობლად, სადაც პირველად დატრიალებულა ჯოჯოხეთის გამანადგურებელი ცეცხლი. ლუკას ტკივილისაგან გული კი შეიკუმშა, მაგრამ განსაცდელის სიახლოვე მძაფრად მაინც არ უგრძენია, რადგან ცხადად ვერ წარმოიდგინა, თუ რა უბედურება შეიძლებოდა დასტყდომოდა თავს მათ ოჯახს.

მერე გაახსენდა, როგორ გააცილეს დედა, გაახსენდა სად-

გურის ბაქანი, დედის ცრემლიანი ღიმილი, პირქუში, გაბორტებული დეიდები.

დედამ გამგზავრების თადარიგი ადრევე დაიჭირა, მაგრამ თავის გადაწყვეტილებას საიდუმლოდ ინახავდა, უფროს დებს უმაღლავდა. ლუკამ იცოდა რატომაც არ ამხელდა დედა ამ განსრახვას. დარწმუნებული იყო, დედაბრებს გამორჩეულად სძულდათ სიძე. მათი აზრით უმცროსი და, შვილივით რომ ჰყავდათ გაზრდილი, ცოლად გაჰყვა უღირს მამაკაცს. ეს კაცი თითო ცოლს ყველგან იძენდა, სადაც მისი სამხედრო ნაწილი დაბანაკდებოდა. ამ აზრს, რასაკვირველია, დედა-შვილი არ იხიარებდნენ.

იმ დღეს ანდუყაფარმა უთხრა: თუკი დედაშენმა ჩაასწრო და მამაშენს შეხვდა, აღარაფერი გაუჭირდებოა. ლუკასაც ასე ეგონა და ანდუყაფარის ნათქვამმა გული უფრო გაუმაგრა.

ანდუყაფარი ლუკას კარის მეზობელი იყო. სამიოდე წლისას პოლიომელიტმა წაართვა ფეხები, მწოლიარე გაიზარდა და დავაჟკაცდა. პატარაობისას ეზოში ჩაჰყავდათ და ასე იზრდებდნენ. შემდეგ ველოსიპედისთვლებიანი, მუშამბაგადაკრული სავარძელი შეუძინეს და იმით დასრიალებდა აივანზე. მამა ადრე დაეღუპა. დედა ხელმეორედ გათხოვდა და ახალ მეუღლესთან გადასახლდა საცხოვრებლად. თუმცა ხეიბარი ვაჟისთვის ზრუნვა არ დაუკლია, შვილს კვირაში სამჯერ მაინც აკითხავდა, ოთახს ულაგებდა, საჭმელს უმზადებდა, საცვლებს ურეცხავდა და უუთოვებდა.

სკოლაში არასოდეს უვლია. მიუხედავად ამისა, ლუკას მი-აჩნდა, რომ ანდუყაფარი ყველაზე ჭკვიანი და განათლებული ადამიანი იყო მთელს დედამიწის ზურგზე. გაკვეთილების მომზადებაში ხშირად ეხმარებოდა და ლუკა აშკარად ხედავდა, ანდუყაფარი ყველა საგანს ერთნაირი სიძლიერით ფლობდა, ასახსნელ მასალას სკოლის მასწავლებელზე უკეთ გადასცემდა. ყოველ შემთხვევაში, ასე ეჩვენებოდა ლუკას.

ანდუყაფარის ოთახში ყოფნაც უყვარდა. ოთახის ერთი კედელი წიგნების თაროებს ჰქონდა დაკავებული. დიდ სიამოვნებას განიცდიდა და ერთგვარად სიამაყითაც კი ივსებოდა, როცა ანდუყაფარი დაავალებდა, — ამა და ამ თაროდან ესა და ეს წიგნი გადმომიღო.

კიდევ კარგი, ანდუყათარი ჩემი მეზობელია, თორემ რა მეშველებოდაო. — ფიქრობდა ხშირად ლუკა.

ყველა სიავეს, ომის დაწყებასაც კი, დეიდები ლუკას მამას აბრალებდნენ, თითქოს ის ყოფილიყოს ამქვეყნად უკლებლად ბოროტების დასაბამი თუ სათავე. დღე და ღამე წყევლიდნენ, წყევლიდნენ ძირფესვიანად, სამარადისოდ. ამ წყევლაში ლუკასაც გამოიტანიებდნენ ხოლმე, ზოგჯერ სრულიად უმიზეზოდაც.

— პირწავარდნილი მამაშენი ხარ, შენგან კაცი არ გამოვა — ეუბნებოდნენ დედაბრები.

პირწავარდნილი მამამისი რომ იყო, ლუკას აღრევე ჰქონდა გაგონილი დეიდებისგან, მაგრამ წინათ ამ სიტყვების წიად ნაგულისხმევი აზრისათვის ყურადღება არ გაუმახვილებია, რადგან ეგონა, ეს სიტყვები მხოლოდ მის დასატუქსად მოეგონათ დედაბრებს, როგორც ყურის აწევა ან კუთხეში დგომა.

ლუკა თითქმის უმამოდ გაიზარდა. მხოლოდ ზაფხულობით არადადეგებზე ნახულობდა მამას. ორიოდ თვით ჩააკითხავდნენ ისა და დედა სამხედრო ნაწილში. იქ გატარებულ დღეებს ლუკა ყველაზე ბედნიერ დღეებად თვლიდა. მამამისის ჯარისკაცები ასწავლიდნენ ცხენზე ჯდომას, ცხენის ტარებას, ნამდვილი მხედარივით ისიც მიაქროლებდა თავის ცხენს და სმლით სხეპავდა გარდი-გარდმო დარქობილ წკნელებს. საღამოობით კი მიდიოდნენ მდინარეზე და ცხენებს არწყულებდნენ, აბანავებდნენ, წმენდდნენ, ასუფთავებდნენ... ვერასოდეს წარმოიდგენდა, თუ ცხენის მოვლას, ცხენთან სიახლოვეს ასეთი სიამოვნებისა და სიხარულის მინიჭება შეეძლო ადამიანისათვის.

ლუკა ხედავდა, სამხედრო ბანაკში რა პატივსა სცემდნენ და როგორ ეკრძალებოდნენ მამამისს. ყველანი ვაჟკაცად და უშიშარ მხედრად თვლიდნენ. მართალია, ორი თვის განმავლობაში იქაც იშვიათად უხდებოდათ ერთად ყოფნა, მაგრამ მეთაურთა და ჯარისკაცთა ამგვარი დამოკიდებულება მაინც გარკვეულ წარმოდგენას უქმნიდა მამაზე. გულის სიღრმეში ამაყობდა, ხოლო ამხანაგებთან და მეგობრებთან ტრაბახობდა კიდევ საკუთარ ი მამის ღირსებებით.

ახლა კი ხედებოდა, რასაც ნიშნავდა ეს სიტყვები. გაბოროტებული დედაბრები თავიანთ სიძეს კაცად არ თვლიდნენ

და გაუთავებლად ლანძღავდნენ. ლუკა ვერაფერს ეუბნებოდა და ბოლმას გულშივე იხშობდა.

— რა კარგია, რომ ქვეყანაზე ანდუყაფარი არსებობს.— ფიქრობდა მარტოდ დარჩენილი ლუკა.

ზაფხული ისე გავიდა, დედაზე თითქმის არ უფიქრია. უფრო სწორად, თავს აიძულებდა, არ ფიქროს, რადგან დედა გაახსენდებოდა თუ არა, გული ეწურებოდა და ტირილი უნდოდა. ამასთანავე მას შინაგანად სჯეროდა, დედას რაიმე საბედისწერო ხიფათი არ შეემთხვეოდა. მალე დაბრუნდებოდა, დაბრუნდებოდა ისეთივე ლამაზი, კეთილი და ბედნიერი, როგორც იმ დღეს ბაქანზე ნახა, გაცილებისას.

მაგრამ გადიოდა დღეები, გავიდა ერთი თვე, მეორე, დედა კი არ ჩანდა. ის მხარე, სადაც მამამისის ნაწილი იყო დაბანაკებული, გერმანელებმა აიღეს, არა თუ ის მხარე, თითქმის მთელი უკრაინა გადმოლახეს.

შინ დეიდები ადგილს ველარ პოულობდნენ და ერთმანეთს აწყდებოდნენ, ყოველდღე წერდნენ წერილებს და სადღაც გზავნიდნენ, თავიანთ უმცროს დას, ლუკას დედას დაეძებდნენ. მაგრამ ვერავინ მიაგნო მის კვალს, ქვეყანაზე არავინ არაფერი იცოდა.

დეიდები დისშვილისათვის ძველებურად ველარ იცლიდნენ და ლუკა ანდუყაფარს მიეკედლა და მიენდო, იგი ამხნევებდა და ანუგეშებდა, როგორც თავის ტოლს, ისე ეთამაშებოდა და აართობდა. ზოგჯერ კი, როცა ლუკა მოიწყენდა, საათობით უამბობდა ჯემს კუკისა და ლევენგსტონის ხიფათით სავსე ცხოვრებას, ანდა უყვებოდა განძისა და მარგალიტის მაძიებელთა ფათერაკიან თავგადასავლებს.

რალაცნაირად ეზოს ყოფაც უცებ შეიცვალა.

ომის დაწყებამდე მეზობლებს თითქოს არაფერი ჰქონდათ ერთმანეთთან დასამალი და გასაყოფი, ცხოვრების უმეტეს ნაწილს აღრიანი გაზაფხულიდან გვიან შემოდგომამდე ეზოსა და აივნებზე ატარებდნენ. სარეცხი ეზოში ირეცხებოდა და იფინებოდა, საჭმელი აივანზე მზადდებოდა. აივნებზევე შეექცეოდნენ საუზმეს, სადილსა და ვახშამს. აქვე იძინებდნენ, აქვე მართავდნენ სიტყვიერსა თუ ხელჩართულ ბრძოლებს, რაც ხელთ მოხვდებოდათ ან ენაზე მოადგენოდათ, დაურიღებლად ახლიდნენ ერთმანეთს. ეს კი იყო, დამღურება დიდ-

ხანს არ შეეძლოთ, გამარჯვებულები მეორე ან მესამე დღესვე უგზავნიდნენ დამარცხებულებს შუამავლებს, ოღონდ ელჩებს თავი ისე უნდა დაეჭირათ, ვითომ მიგზავნილები არ იყვნენ, ვითომ მხოლოდ და მხოლოდ კეთილმეზობლობისა თუ მეზობელთაშორის მშვიდობის აღდგენის სურვილი ამოძრავებდათ. დიდი თავპატიუისა და დავიდარაბის შემდეგ ორივე მხარე მორცხვად გაიღიმებდა და თავს ჩაჰკიდებდა. ამით გამოიხატებოდა გუშინდელი თუ გუშინწინდელი საქციელის გამო მწარე სინანული. მერმე კი ისევ გრძელდებოდა მეზობლების ტკბილი, მშვიდობიანი ურთიერთდამოკიდებულება.

ეს იყო ეზოს ყოფის განრიგი, ცხოვრების წესი, რომელსაც ყველა ერთნაირად ემორჩილებოდა.

ეზოს ყოფაც მოულოდნელად დაირღვა.

ხალხი ეზოებიდან და აივნებიდან ოთახებში შეიმალა და შეიხიზნა. აივნები დაცარიელდა, დაცარიელდა ეზო და მტკვრის ნაპირი. ყველაფერი დიდი ხნის მიტოვებულს დაემსგავსა. ყველა რაღაცას მალავდა. არ ამხელდნენ სიხარულს, მწუხარებასაც არ ამხელდნენ. მალავდნენ სიმდიდრეს, სიღარიბესაც ასევე მალავდნენ. კაცი იფიქრებდა, ამ ძველისძველ, მინგრეულ შენობაში სულ სხვა ხალხი შემოუსახლებიათო. მდგმურები თითქოს არ იცნობდნენ და ამიტომაც არ ენდობოდნენ ერთმანეთს.

მხოლოდ ანდუყაფარმა არ უღალატა ჩვეულ წესს, ძველებურად ცხოვრობდა, ძველებურად დაასრიალებდა თავის ველოსიპედისთვლიან სავარძელს, მოადგებოდა რიკულებიან აივნის კუთხეს, რომელიც ერთი მხრიდან ეზოს დაჰყურებდა, ხოლო მეორე მხრიდან მტკვარს, და საღამომდე კითხულობდა წიგნებს.

## თავი მეორე

მთელი ზაფხული მტკვრის პირას რიყეზე გაატარა ლუკამ. ხან მტკვარში ბანაობდა, ხან მზის გულზე იგდო, ხან თევზაობდა.

— ლუკა! — გაიგონა ერთხელ ნაცნობი ხმა.

ლუკამ ნაცნობი ხმის გაგონებისთანავე თავი მიაბრუნა და ეზოში ცაცხვის ქვეშ მდგარი ძია ლადო დაინახა.



— არ გესმის, ლუკა?!

— გავიგონე, ძია ლადო, მოვდივარ!

ფეხშიშველმა ლუკამ წვალეებით გაირბინა რიყე და რიყიდან აღმართულ აგურის კედელს მიადგა. ეს აგურის კედელი ეზოს კიდე იყო.

ძია ლადო ეზოს კიდესთან ჩაჯდა და, თითქოს დიდ საიღუმლოს ანდობსო, ხმადაბლა, თითქმის ჩურჩულით ჩამოსძახა ლუკას:

— წამო, ვითევაოთ, ცოტა გული გადავყოლოთ.

— წამოვალ, ძია ლადო! — მაშინვე დაეთანხმა ლუკა, ჩემი სათევზაოდ წაყვანა არ გადაიფიქროსო.

მანამდე ძია ლადოს ასეთი რამ არასოდეს შეუთავაზებია და ძველი მეთევზის მოულოდნელმა ნდობამ ააღელვა კიდეც ლუკა.

— მანდ დამიცადე, ახლავე მოვალ. — უთხრა ძია ლადომ და წავიდა.

ძია ლადო ძველი მეთევზე იყო, ოდესღაც თევზაობით ირჩენდა თავს. ახლა კი მენავედ მუშაობდა. ძველი ვორონცოვის ხილიდან მუხრანის ხილამდე საგუშაგო გახლდათ. ყოველთვის ცაცხვის ქვეშ, გრძელ მერხზე იჯდა და მტკვარს აღმა და დაღმა თვალს ადევნებდა, რაიმე უბედურება არ მომხდარიყო, ვერაგსა და დაუნდობელ მტკვარს ვინმე არ შეეტყუებინა და არ დაეხრჩო. კითილ საქმეს ემსახურებოდა ძია ლადო. ბევრი სიკეთეც ჰქონდა ამქვეყნად დათესილი. ვინ უწყის, რამდენი კაცი გამოუტაცია მტკვრის ტალღებისათვის, რამდენი სიცოცხლე გადაურჩენია დაღუპვისაგან.

— მოეცალე, ბიჭო! — გაიგონა ლუკამ ძია ლადოს ხმა.

ძია ლადომ ეზოს კიდიდან თოკით ჩამოუშვა დიდი ვედრო. ლუკამ ვედროს მაშინვე წაატანა ხელი.

— მოიცა, ბიჭო, ნუ ჩქარობ, შიგ ბადეა, მაგ ვედროს ასე ადვილად ვერ მოერევი.

ვედრო მართლა მძიმე აღმოჩნდა. ლუკა ორთავე ხელით დაეჭაჭურა და ძლივს უყო ძვრა.

ძია ლადო კედელ-კედელ მარჯვედ ჩამოცოცდა და რიყეზე ჩამოხტა. ვედროს დაავლო ხელი და მდინარისაკენ წავიდა. ლუკა უკან გაჰყვა. მენავეს ძველისძველი, გაცვეთილი ქვალის შარვალი ეცვა, წელზევით შიშველი იყო.

— გაიქეცი, ნავი ახსენი.

ლუკა გაიქცა.

ნავი ნაპირზე დარტობილ აზარმაცზე იყო ჯაჭვით გამობმული. ლუკამ ჟღარუნით შემოხსნა ჯაჭვი. ამასობაში ძია ლადოც მოვიდა. ჯერ ვედრო ჩადგა, მერე თვითონაც გადავიდა ნავში და რკინისკაპიანი ჭოკი მოიმარჯვა.

— ჩაჯექი!

ლუკამ იმ წამსვე ისკუბა და შეტორტმანებულ ნავის ფერდებს ორივე ხელით ჩააფრინდა და ჩაიკუზა.

— სულ ეგა ხარ?! რამ შეგაშინა?!

ლუკამ დამნაშავესავით მიხედა ძია ლადოს და გაიღიმა. მერე თანდათან გათამამდა. მობრუნდა და ნავის ცხვირზე ჩამოჯდა. მართლაც და რისი უნდა შინებოდა, როცა თვითონაც მშვენივრად ცურავდა. ესეც არ იყოს, ძია ლადოს გვერდით მტკვარში ვის გასჭირვებია, რომ ლუკას გასჭირვებოდა?!

ნავი ნაპირ-ნაპირ, დინების საწინააღმდეგოდ მიჰყავდა ძია ლადოს, ძალზე მოხერხებულად ხმარობდა რკინისკაპიან ჭოკს. კისრის ძარღვები ეკიმებოდა, შიშველ მხრებსა და მკლავებზე დაძაბული კუნთები ებურცებოდა და უხტოდა. ლუკა ნავის წინა ქიმზე მოკალათდა და იქიდან აღევნებდა თვალს მენავის ყოველ მოძრაობას.

— მაგ რგოლს ეგ თოკი გამოაბი!

— აბა თოკი?

— ვედროში გდია.

ლუკამ თოკის ერთი ბოლო ნავის ქიმზე შეხრახნილ ლითონის რგოლს გაუყარა და მაგრად განასკვა. მტკვრის ნაპირიდან თუ აივნიდან ხშირად უდევნებია თვალი, როგორ თევზაობდა ძია ლადო. ამიტომ უკვე იცოდა, რისთვისაც იყო საჭირო ეს გრძელი თოკი. ის, ვინც ძია ლადოს თევზაობაში ეხმარებოდა, თოკის მეორე ბოლოს მდინარეში შეჭრილ კედელზე ანდა ჯებირზე გამოაბამდა, მერე საჭიროების მიხედვით თოკს აგრძელებდა და ამოკლებდა, რომ მეთევზეს ბადე ერთიდაიგივე ადგილზე არ გაეშალა. თანაც ეს თოკი ნავს აკავებდა, უამთოკოდ მტკვრის ჩქარი დინება ნავსაც და მეთევზეებსაც გაიტაცებდა.

ძია ლადომ ლუკა გააფრთხილა: გამაგრდიო და ნავს მიმართულემა, შეუუცვალა. ჭოკს მთელი ძალით დააწვა. ნავი

თითქმის შუა მდინარემდე გაიყვანა. მერე ჭოკი დააგდო და ნიჩაბს დასწვდა. ახლა ნიჩაბი მოუსვა ღონივრად. პირველი ტალღა წინა ქიმს შეეჭახა, გააპო და ჰაერში ორად ამოტრიალებული მსხვილ წვეთებად გაიფანტა. ნავი ირწეოდა, ქანაობდა, ტალღებზე ადი ადიოდა. ლუკას მათრობელ ჟრუანტელივით დაუარა სხეულში ტალღებზე ნავის სრიალით გამოწვეულმა სიამოვნებამ. გაბრუებული თავისთვის იღიმებოდა მთვრალი კაცივით.

მენავემ შეუძახა და ნირვანიდან გამოიყვანა ლუკა.

სულ მალე გავიდნენ გაღმა. ძია ლადომ ისევ ჭოკი მოიმარჯვა, დაებჯინა და ნავი სანაპიროს კედელს ფრთხილად მიაყენა. ახლა კედელ-კედელ აჰყვნენ სანაპიროს, ასე იარეს ერთხანს, მერმე მენავემ ანიშნა და ლუკამ თოკის მეორე, მარჯუეთიანი ბოლო ბეტონის ჭებირიდან ამოჩრილ ერთ-ერთ მავთულზე ჩამოაცვა. მავთული ისე გადაგრიხა, რომ მარჯუეთი უკვე აღვილად აღარ ასხლტებოდა.

— კარგი ხარ! — შეაქო თუ გაამხნევა მენავემ ლუკა, — ვიცოდი, რომ ჭკვიანი და დაკვირვებული ბიჭი იყავი. შენგან კარგი მენავე დადგება. — ძია ლადო ნავის ბაგეზე ჩამოჭდა, ხელები ჭვალოს შარვალზე შეიწმინდა და თუნუქის კოლოფი ფრთხილად გახსნა.

ლუკამ ვერ დაინახა, როდის ამოიღო ეს კოლოფი შარვლის ჯიბიდან ძია ლადომ.

მენავეს თუნუქის კოლოფი მუხლებზე დაედო და დიდხანს გულმოდგინედ ახვევდა თამბაქოს გაზეთის ქალაღში.

გაღმა მოჩანდა ორსართულიანი, კრამიტით დახურული სახლი, სადაც ლუკა ცხოვრობდა. მოჩანდა რიკულებიანი აივნები, შუშაბანდები, ხის დაბრეცილი კიბეები. ასეთი სახლები მოსდგომოდნენ მტკვრის ნაპირს ერთი ხიდიდან მეორე ხიდამდე. ერთსართულიანები... ორსართულიანები... სამსართულიანები... ერთმანეთს მიჯრილები, ჩახლართულები... ზოგიერთი აივანი პირდაპირ მდინარეზე ეკიდა. კრამიტთან სახურავებს გაუქმებული ეკლესიის გუმბათი დაჰყურებდა ზემოდან...

აივანზე თავჩალუნული იჯდა ანდრუყაფარი და წიგნს კითხულობდა. ნეტავი თუ დამინახაო, — ფიქრობდა ლუკა და მალიძალ გაღმა აივნისკენ იხედებოდა. რა თქმა უნდა, საშინ-

ლად დაწყდებოდა გული მდინარეში მისი სათევზაოდ გას-  
ვლა სამყაროსთვის შეუმჩნეველი რომ დარჩენილიყო.

ძია ლადო თევზაობას აყოვნებდა. ნავის აშიაზე ჩამომჯ-  
დარი ხმაგაკმენდილი აბოლებდა თამბაქოს. მომწვანო, გამჭ-  
ვირვალე წყალი ნავის ქიმს ნაზად ეხებოდა და საამო, ურუან-  
ტელისმაგვარ ხმებს გამოსცემდა. ლუკამ მდინარის ნაპირზე  
მოტივტივე საზამთროს ქერქები დაინახა და ძია ლადოს წინათ  
ნათქვამი სიტყვა გაასენდა: „დაიმახსოვრე, თუ მტკვარს სა-  
ზამთროს ქერქები მოაქვს, ჭანრის დრო დგება“. ნავის ქიმზე  
წამოსკუბებულს ღრმად სჯეროდა, რომ ჭანრებით გავსებუ-  
ლი ნავით დაბრუნდებოდნენ. ლუკას მოთმინება ელეოდა, უნ-  
დოდა, რაც შეიძლება მალე დაეთრია თევზი, რომელსაც მის-  
თვის აგრე ნაცნობი, დაბინდული ვერცხლისფერი ზურგი ჰქონ-  
და, ხოლო მუცელი თეთრი. ეს ორი ფერი ბუნებას ისე ზუს-  
ტად გენაწილებინა, გეგონებოდა, თევზს წინა ფართლიდან  
ბოლომდე უხილავი სწორი ხაზი გასდევდა.

ძია ლადომ თამბაქოს ნამწვავი მდინარის შუაგულისკენ  
მოისროლა და წამოდგა. ბადის თოკი მარცხენა მაჯაზე შეიბა  
და დაიხვია. მერმე დაიხარა და ბადის ღონე აკეცა. ვიდრე წელს  
გამართავდა, თავისი ლურჯი თვალებით ლუკას მიაშტერდა.  
ლუკა დაიძაბა, მენავისაგან მორიგ ბრძანებას ელოდა.

მენავემ ერთხანს უყურა ლუკას, მერმე ბადეს ხელები  
შეუშვა და მაჯიდან თოკიც მოიხსნა. ისევ ჩამოჯდა ძველ ად-  
გილზე და მზერა გაღმა ნაპირისაკენ გააპარა. ლუკამ ახლად  
შეამჩნია, ძია ლადოს ძალზე დაღლილი სახე ჰქონდა, გამო-  
უძინებელი, როგორღაც უფრო დაბერებული მოეჩვენა. შუბ-  
ლზე ჩამოშლილი მეჩხერი, წითური თმა ღრმა ნაოკებს ვერ  
უმალავდა.

— რა უნდა ჰქნას კაცმა? — იკითხა ძია ლადომ და დიდი  
ხელები უმწეოდ გაშალა და გადაატრიალ-გადმოატრიალა.  
სულ არ უხდებოდა მის ღონიერ, დაკოჭრებულ ხელებს ასე  
უმწეოდ გაშლა. — რას იზამ, წავიდა... სხვებიც წავიდნენ...  
მარტო ეგ ხომ არ წასულა?

— ვინ წავიდა, ძია ლადო?

— ჩემი კოტიკო... გუშინ საღამოთი გავაცილე.

— სად გავაცილე?

— სად და სადაც მიდიან, — გაბრაზდა ძია ლადო, — ომ-

ში... ფრონტზე... საღ უნდა გამეცილებინა?! — ერთხანს ჩაფიქრდა, მერე ისევ განაგრძო: — მე გავზარდე, ეგ ოხერი. თანაც რა ბიჭი დადგა? გულუხვიცა და თვალუხვიც! ტყუილია ეგეთი ბიჭი! ლუკა, შენ ხომ იცი, ეგრე იოლად კაცში არ მოვტყუვდები.

— ვიცი, ძია ლადო.

— ჰოდა, კარგი ბიჭი წავიდა.

კოტიკო, ძია ლადოს გერი, ასოთამწყობად მუშაობდა რომელიღაც სტამბაში. ერთი აწოწილი ვინმე იყო, ახმახი, მხრებში მოხრილი. ფეხებს ისე უშნოდ დაათრევდა, თითქოს შემთხვევით სხვისი გამოებათ. ავადმყოფივით გაფითრებული სახე ჰქონდა, თანაც სულ შეწუხებული დადიოდა, თითქოს გამუდმებით რაღაც სტიკოდა და ამ ტკივილს ვერაფრით იყუჩებდა. „ნეტავი ომში რა უნდა გააკეთოს, — გაიფიქრა ლუკამ, — მაგისთანა სუსტმა და უღონო კაცმა. არა სჯობდა შინ დარჩენილიყო?“ ლუკას რატომღაც ეგონა, ომში წასვლა-არწასვლა კოტიკოს ნებასურვილზე იყო დამოკიდებული.

— მიტუშაც წავიდა, — თქვა ძია ლადომ, — აი ჩვენ წინ, დარაბაში რომ ცხოვრობდა. ისიც გავაცილეთ წუხელ.

ძია ლადომ ისევ ამოიღო თუნუქის კოლოფი ჯიბიდან.

— გოგიაც წავიდა, მექვაბიშვილი, პეტოც... ჩოლახას ჯიბოცა... ყველანი კარგი ბიჭები იყვნენ... ჰო, კიდევ ვინ წავიდა? კოკილა... ოზო... ბევრნი წავიდნენ... მერმე გამახსენდება, ნელ-ნელა.

აქ ჩამოთვლილთაგანს ლუკა ყველას იცნობდა. ისინი ჩუღურეთელები იყვნენ, მზესა და მტკვრის წყალში გამოყვანილები, ჯან-ღონით სავსენი, შაბათკვირაობით მდინარის ნაპირზე იყრიდნენ თავს, მათი ხუმრობა და ღრიანცელი მთელ სანაპიროს იკლებდა. ეს ბიჭები, რა თქმა უნდა, ომში უნდა წასულიყვნენ და წავიდნენ კიდევ, მაგრამ კოტიკო რისთვის წავიდა, ვერაფრით აეხსნა... „ეტყობა, ამათ აპყვა“, — დაასკვნა ბოლოს.

— ზიპოც გავაცილეთ... ცხენთავაც... ჯეკოც, — ძია ლადომ თამბაქო მოქაჩა და ბეტონის ჯებირს შეაბოლა, — კურკაც, პუპუზაც... კიდევ... აი მაშოს ბიჭს რა ერქვა?

— ეზეკია.

— ჰო, ეზეკიაც წავიდა. ეზეკიას წაყვანა კი ჯერ აღრე

იყო, სულ ბავშვია, გამოუცდელი... რუბენაც გამოვიდა ნავთ-  
ლულის სადგურში. გააცილა ბიჭები... როგორ ტიროდა ეგ  
საცოდავი. რა სხვანაირი გული ჰქონია მაგ ჭუჭასა. მე კი ქოსა  
კაცი არ მიყვარდა. „რუბენ, ნუ ტირი!“ — ვამშვიდებდი ჭუ-  
ჭას, ის კი ქალივით ტიროდა, დაპალუპით ღვრიდა ცრემლს,—  
ძია ლადომ ნიჩაბი აიღო და წამოდგა. ეს უკვე იმას ნიშნავ-  
და, რომ შინ აპირებდა დაბრუნებას, დღეს აღარ ითევზავებ-  
და.

ლუკამ თოკი მოქაჩა და ნავის ცხვირი ბეტონის კედელს  
მიახებთქა. ხელი სწრაფად წაავლო კედლიდან გამოჩრილ მავ-  
თულს.

— ვიფიქრე, გულს გადავყოლებ-მეთქი, — თქვა ძია ლა-  
დომ, — არაფერი არ გამოვიდა... ხელები დამიძაბუნდა, ძალა  
გამომეღია.

ხუთი წუთის შემდეგ უკვე თავიანთ ნაპირზე გავიდნენ.  
ლუკა სწრაფად გადმოხტა რიყეზე, ჯაჭვი მოქაჩა, მოზიდა და  
ნავი გააჩერა. ძია ლადო ნავიდან გადმოვიდა და შინისკენ გა-  
ეშურა.

— ძია ლადო, — დაუძახა ლუკამ, — ეს ბაღე ნავში დავ-  
ტოვოთ?

— დამავიწყდა ეგ ოხერი — მერმე ჩაფიქრდა და ლუკას  
ჰკითხა: — თქვენებისგან რა ისმის?

— არაფერი.

— ვერ მიაგენით?

— ვერა.

ძია ლადო უკანვე გამობრუნდა, ცალი ფეხით ნავში ჩადგა  
და ბაღე დაითრია, ვედროში ჩატენა. მერმე ვედროს დასწვდა  
და ნელი ნაბიჯით ეზოსკენ გაეშურა. ეზოსკენ მიმავალი ისევ  
მოუბრუნდა ლუკას, რომელიც ნავს ჯაჭვით აბამდა მდინარის  
პირას დარქობილ აზარმაცზე.

— კიდევ კარგი, შენ არ წაგიყვანა.

— მე კი არა, დედაჩემსაც უშლიდა—არ ჩამოხვიდეო.

— რათაო?

— რა ვიცი. — ლუკას დედის გახსენებამ გუნება აუმღვ-  
რია. გული ყელში მოებჯინა, ცრემლად აწვეებოდა თვალებზე.

— იქნებ იცოდა, გერმანელები ომის დაწყებას რომ აპი-  
რებდნენ? — დაეჭვდა ძველი მეთევზე.

ლუკამ მხრები აიჩეჩა. ხმის ამოღება ვერ გაბედა, შეეშინდა,—ტირილი არ დავიწყო.

ძია ლაღო დაფიქრებული გამოსცქეროდა ლუკას, წყლისა და მზისაგან დაღარულ სახეზე ღრმა დაეჭვება გამოხატვოდა.

— იქნებ იცოდა, ჰა?!

მზე უკვე კარგად ასცდენოდა სახურავეებს. ლუკამ ჯაჭვი შემოახვია აზარმაცს, განასკვა და ძია ლაღოსკენ გასწია. რიყის ქვები უკვე იმდენად გაეხურებინა მზეს, რომ ფეხშიშველი სიარული ჭირდა.

## თავი მესამე

ანდუყაფარმა კი უთხრა ლუკას, ტყუილად მიდიხარ სკოლაში, წელს სწავლა პირველი ოქტომბრიდან იწყებაო, მაგრამ შინაბერა დეიდებმა არ ჰქნეს. — მაგან რა იცის, თავის სიცოცხლეში შინიდან გარეთ არ გასულაო. ლუკას რვეული და ფანქარი მიაჩეჩეს ხელში და სკოლისაკენ გაისტუმრეს.

ლუკამ თავისი სკოლის შენობა ველარ იცნო. თეთრი, ქათქათა კედლები მუქ ნაცრისფრად გადაეღებათ. საღარბაზოსთან ჯარისკაცები იდგნენ და უსაშვოდ შიგ არავის უშვებდნენ.

ლუკას აქა-იქ ღია ფანჯრებიდან დაჭრილი ჯარისკაცები დასჩერებოდნენ, ალბათ იმიტომ, რომ ამ დილაადრიანად მთელს ქუჩაზე მის გარდა კაციშვილი არ ჰაქანებდა. რაღაც ნაირად ეჩოთირა თუ ეუხერხულა, თანაც მოეჩვენა, თითქოს მთელი ქვეყანა ზემოდან დასცქეროდა — ეს ტუტუცი ბიჭი ამ ღროს ნეტავი აქ რამ მოიყვანაო? მოწყენილი, სკოლის შენობის გასწვრივ გაჰყვა რკინის მესერს. მერმე ჭიშკართან შეყოვნდა, ცოტა ხნით შეჩერდა, რადგან დაინახა, ჭიშკარს დიდი ბოქლომი ედო.

ეზოს სიღრმეში შეიკვრიტა.

ეზოში რამდენიმე სამხედრო-სანიტარული მანქანა იდგა.

აშკარა იყო, მისი სკოლა, სადაც უკვე ამდენი წელი სწავლობდა, აღარ არსებობდა. ალბათ ასეა ომის ღროს,—ფიქრობდა ლუკა, — ახლა ალბათ სამხედრო ჰოსპიტლები უფრო სჭირდებათ, ვიდრე სკოლებიო. მაგრამ ისიც არ შეიძლებოდა მომხდარიყო, რომ ბავშვები სულ უსკოლოდ დაეტოვებინათ. ლუ-

კა უკანვე გატრიალდა, — ერთი, მივალ და იმ ჯარისკაცებს ვკითხავ. იქნებ ჩვენი სკოლა სადმე სხვა შენობაში გადაიტანეს და იმათ იციანო.

ჯარისკაცებმა კედელზე გაკრულ განცხადებაზე მიუთითეს. ლუკამ განცხადება ჩაიკითხა და მადლობა გადაუხადა ჯარისკაცებს. მერმე რვეული და ფანქარი შარვლის ჯიბეში ჩაიტენა და ფრიად კმაყოფილმა და დამშვიდებულმა შინისკენ გააბოტა. სკოლა სხვა შენობაში გადაეტანათ, თანაც, რაღა თქმა უნდა, ანდრუყაფარი მართალი გამოდგა — სწავლა პირველ ოქტომბერს იწყებოდა.

ქუჩის კუთხესთან მისულმა მხარი იცვალა. იმის ნაცვლად მარცხნივ წასულიყო და მერმე პროსპექტს შინისკენ ვაპყლოდა, მარჯვნივ ჩაუხვია და ვიწრო ოღრო-ჩოღრო ქუჩით მტკვრის ნაპირისკენ გასწია, იქნებ იქ სკოლის ამხანაგებს წავაწყდეთ, იმათ, ვინც ჩემსავით არ იცოდა, სწავლა რომ პირველ ოქტომბერს იწყებო.

ვიწრო ქუჩას გარდი-გარდმო დაბალი და ძველი სახლები გასდევდა. ერთადერთ გამონაკლისს მაღალ გალავანში მომწყვდეული ფსიქიატრიული საავადმყოფოს სამ-ოთხ სართულიანი შენობები წარმოადგენდა. ამ საავადმყოფოს (რომელსაც ყველანი უბრალოდ „საგიყეს“ უწოდებდნენ) რამდენიმე შენობა თავის გისოსებიანი ფანჯრებით პირდაპირ მტკვარს გადასცქეროდა.

რკინის ალაცაფის კარი ყოველთვის ჩაგმანული იყო და შიგ ბუზიკ ვერ შეფრინდებოდა. ბიჭები სულს ლევდნენ, რას არ გაიღებდნენ იმისათვის, ერთხელ მაინც საგიყის ეზოში რომ შეეხედათ და ენახათ, შიგ რა ხდებოდა, მაგრამ ამას ვერასოდეს ახერხებდნენ.

საგიყეს რომ ჩაუარა, თვალებს არ დაუჯერა, ალაცაფის კარი ღია დახვდა. უფრო სწორად, ოდნავ იყო შეღებული. გოცებულები ლუკა უნებურად შეჩერდა. წლების მანძილზე მის არსებაში დაგროვილმა, შემდეგ კი მინავლულმა ცნობისწადილმა კვლავ გაიღვიძა. ყოველგვარი დაბრკოლების გარეშე მას შეეძლო, ხელი ეკრა კარისთვის, გაედო და ენახა, რა ხდებოდა იქ, იმ უცნობ, იღუმალებით მოცულ ქვეყანაში.

კარი ფრთხილად შეაღო და თავი შეჰყო. ცნობისმოყვარეობით მიმოათვალიერა იქაურობა. საავადმყოფოს ეზო გაცი-



ლებით დიდი აღმოჩნდა, ვიდრე წარმოედგინა. უზარმაზარი ხეებით იყო დაბურული; შუა ეზოში მრგვალი, ცარიელი აუზი უაზროდ მისჩერებოდა ზეცას. ეზოში კაციშვილი არ ჰკანებდა. საოცარ სიჩუმესა და სიმშვიდეს მოეცვა იქაურობა. ხის ჩრდილში ავადმყოფებისათვის დადგმული მწვანე მერხები უიმედოდ, სამუდამოდ მიტოვებულებსა ჰგავდნენ.

ამით გამხნეებულმა ლუკამ უფრო ღრმად შეაღო კარი და შევიდა. ლუკას ისეთი შთაბეჭდილება დარჩა, ეზო შენობებით კი არა, თითქოს მალალი, ნაცრისფერი კედლებით შემოემოქმედებოდა და ამ კედელზე უამრავი ბნელი ფანჯარა გამოეჭრა. ზოგი ფანჯარა ღია ჩანდა, ზოგი—დაგმანული. მაგრამ ერთიცა და მეორეც, ყველა უკლებლად რკინის გისოსებით იყო ამოჭედვლილი.

— ბიჭო! — გაიგონა უცებ ქალის ჩურჩულის მაგვარი ხმა და შეკრთა. — ბიჭო!

ლუკა ვერ მიხვდა, საიდან ეძახდნენ. დაბნეული და შეშიზებული შებრუნდა. გაქცევაც კი დააპირა. — ნეტა ვიცოდეთ, რა მინდოდა, აქ რომ შემოვეთრეთო.

— ბიჭო, მოდი აქ, ცოტა ხანს მოდი! რაღაც მინდა დაგაბარო. — ისევ გაიგონა სულ ახლოდან ჩურჩული.

ლუკამ თავი მოაბრუნა და თავზარდაცემულს კინაღამ მუხლები მოეკვეთა, იქვე, მარცხნივ სრულიად შიშველი ქალიშვილი ღია ფანჯარას მოსდგომოდა, რკინის გისოსებისათვის თავზევით ხელები ჩაეველო და ლუკას მისჩერებოდა ნაღვლიანი, დიდი მომწვანო თვალებით. ლუკას სირცხვილისაგან სახე აელეწა და სცადა, შიშველი სხეულისათვის არ შეეხედა. თუ შეხედავდა, მხოლოდ თვალებში უშხერდა. მონუსხულივით იდგა და ადგილიდან არ იძვროდა. მაგრამ თვალები ლურსმანი არ არის, რომ ერთ წერტილს მიაჰკედო. ხედვის არე გაცილებით ფართოა, ვიდრე წერტილი, რომელსაც მიჰტერებიხარ. თმაგადაკრეკილი თავისა, საოცრად ნაზი, ფერმკრთალი და ლამაზი სახის გარდა ლუკა ხედავდა შიშველ მკლავებს, ორ თეთრ ბორცვსა და მალღააშვერილ დიდსა და ვარდისფერ ძუძუსთავეებს... ქალიშვილი წელამდე მოჩანდა ღია ფანჯრის რუხ ჩარჩოში გამოკვეთილი.

— რა გახდა, ბიჭო, შენი მოსვლა? მოდი, ბიჭო, მოდი! ცოტა ახლო მოიწი, რაღაც მინდა შინ დაგაბარო! — ქალიშვილმა

მოწყვეტით დაუშვა ხელები. ბუსუსებთან იღლიები გაქრა და ლუკამ დაინახა გლუვი, დაქანებული მხრები.

ფანჯარას რამდენიმე ნაბიჯით მიუახლოვდა და ქალიშვილი უფრო ლამაზი ეჩვენა თავისი პატარა, კოხტა თავითა და ლამაზი მომცრო ყურებით. ახალა შენიშნა, რომ ქალიშვილს ტუჩებიც ზუსტად ისეთივე ვარდისფერი ჰქონდა, როგორც ძუძუსთავები.

— მე მთვარისა ვარ. გაგიგონია ასეთი სახელი: მთვარისა? არა? თბილისში ვცხოვრობ. ვერჰარნის ქუჩაზე... აჰ, ჩემი სიკვდილი! ნომერი დამეიწყებია... არა უშავს, მომაგონდება... ახლა კი წადი, ჩემო კარგო ბიჭო, და ჩვენებს შეატყობინე, მთვარისა იქ არის-თქო. მათ იციან, რომ აქ ვარ, მაგრამ მაინც შეახსენე... ვაითუ დაავიწყდეთ... იცი, რა უთხარი? ის ადგილი მთვარისასთვის შეუფერებელია-თქო. უთხარი, რა უნდა-თქო იქ მთვარისას, ოთხ კედელში გამოიმწყვდეულს... ხვალვე წამიყვანონ...

ლუკამ გარკვევით გაიგონა სიტყვები, მაგრამ რას ეუბნებოდა მთვარისა, ანდა რას სთხოვდა, არ გაუცნობიერებია. ალტაცებული შესცქეროდა რკინის გისოსებში გამოიმწყვდეულ ქალიშვილის რძისფერ სხეულს. ისე თრთოდა, თითქოს დიდი და მნიშვნელოვანი საიდუმლო გაუმჟღავნეს და ანახვეს ის, რაც მისთვის მუდამ წყველიად იყო მოცულ და რასაც მუდამ უმაღვდნენ. ეს იყო პირველი ხილვა, პირველი აცხადება. პირველი გამოსვლა ძველი, ბორგნეული სიზმრიდან.

— ხო, ასე უთხარი, ასე უთხარი... — განაგრძობდა საუბარს მთვარისა, — უთხარი ტკივილებიც აწუხებს-თქო. ტკივილები მართლა მაწუხებს, ბიჭო... მთელი სხეული მტკივა... ოღონდ ღამღამობით. დღისით არა, დღისით ჩვეულებრივად ვარ. არაფერი არ მაწუხებს... მაგრამ ეს ტკივილები ჩემი ბრალი არ არის, მთვარის ბრალია...

ლუკამ უცებ როგორღაც იგრძნო, ქალიშვილი, რომელსაც მისთვის მიეპყრო მწვანე, ნაღვლიანი თვალები, მას არ უმზერდა. ღია ფანჯრიდან ნასროლი მზერა არ წვდებოდა ლუკას, ანდა, ვიდრე ლუკამდე მიაღწევდა, ჰაერშივე იფანტებოდა და იბნეოდა.

— საოცარი ტკივილები მაწუხებს, ბიჭო, ღამ-ღამობით, მთელი სხეული ერთბაშად ამტკივდება, ოღონდ სხვადასხვა-

ნაირად. თავიც მტკივა, თვალებიც, ხელებიც, მკერდიც, წელიც, ფეხები, მაგრამ რა ხდება, იცი, თავი სხვანაირად მტკივა და თვალები სხვანაირად. მკლავის ტკივილი არა ჰგავს თითის ანდა ფრჩხილის ტკივილს. მით უმეტეს მკერდი სულ სხვანაირად ამტკივდება ხოლმე. რა ხდება, ბიჭო, იცი? სხეული თოთხმეტ ნაწილად დამეშლება და ყოველი ნაწილი ცალ-ცალკე მტკივა. ჰო, ასე ხდება, სხეულის ყოველ ნაწილის თავისი განსხვავებული ტკივილი აქვს და, როგორც კი დაღამდება და მთვარე გამოჩნდება ცაზე, ტკივილი თავის ამორჩეულ ნაწილს მიაკითხავს. მაგრამ მე ვიცი, ეს რისი ბრალიც არის. ღამ-ღამობით მთვარეც ხომ იბზარება და ირღვევა ნაწილებად. აბა, კარგად დააკვირდი. დარღვეული მთვარის ყოველ ნაწილს ჩემი დარღვეული სხეულის ნაწილთან აქვს კავშირი. ჩვენ ერთნაირად ვირღვევით... ამიტომაც მტკივა სხეული და ეს ყველაფერი მთვარის ბრალია. ოღონდ შენ არავის არ უთხრა ეს ამბავი, არ მინდა ხმა დაირხეს. უხერხულია, მთვარემ რომ შეიტყოს.

მთვარისამ სევდიანად გაიღიმა, გატრიალდა და ოთახის სიბნელეში მშვიდი ღიღინით გაუჩინარდა.

ლუკა კარგახანს იდგა ბნელი ფანჯრის წინ გაოგნებული იმით, რაც ნახა და რაც მოისმინა. მთვარისა აღარ გამოჩენილა, აღარ მოსდგომია გისოსებაჭედელ ფანჯარას.

გულდამძიმებული, დათრგუნული ლუკა საავადმყოფოს ეზოდან გამოვიდა. მდინარის პირისკენ არ ჩაუხვევია, პირდაპირ შინისაკენ გაემართა.

ტროლეიბუსის გაჩერებასთან მიტო შეეფეთა და გამოელაპარაკა. გამოირკვა, რომ კინოში მიდიოდა დილის სენსზე. ლუკასაც შესთავაზა — შენც წამოდი, მე დაგვატიყებო, მაგრამ ლუკამ უარი უთხრა და, როცა მიტო გაშორდა, ერთგვარი უპირატესობის გრძნობით გააყოლა თვალი.

მერმე თვითონაც მოწყდა ადგილს და ერთხანს სწრაფად იარა, თითქოს გადაუღებელ საქმეზე აგვიანდებოდა ანდა ვიღაც მისდევდა უკან და გაურბოდა. ეს აჩქარება უნებური არ ყოფილა, იგი ნამდვილად ჩქარობდა, ოღონდ შინ კი არა, იქ სადაც ალაყაფის კარი ღია დატოვა და ახლაც ღია ეგულეობდა. თავის ყოფილ სკოლას სირბილით ჩაუქროლა და თვალის დახამხამებაში მიადგა ნაცნობ ალაყაფს. აქლოშინებული

ფრთხილად მიაწვა კარს. არ გაიღო. ახლა უკვე მთელი ძალით ჰკრა ხელი, მაგრამ კარი ამჯერადაც არ დაძრულა ადგილიდან, რადგან იგი ისევ მაგრად იყო ჩაკეტილი, როგორც ძველად, წლების მანძილზე, და არავითარ იმედს არ იძლეოდა, რომ ოდესმე გაიღებოდა.

ლუკამ კარის წინ დაიწყო ბოდიალი. ეზოში შექვერეტაც სცადა. სულ ამაოდ გაისარჯა.

უჩვეულოდ მოთენთილი თუ დაქანცული მტკვრისაკენ დაეშვა და ქუჩის კიდესთან, საიდანაც მწვანე ფერდობი და საცალფეხო ირიბი ბილიკი იწყებოდა, შეჩერდა და მოწყენილმა მზეზე აელვარებულ, უკაცრიელ ნაპირს გახედა.

მერმე ეს ყველაფერი ანდუყაფარს უამბო და ცოტათი შვებით ამოისუნთქა. თითქოს მძიმე ტვირთი მიჰქონდა და ახლა ნახევარი მანც იმ ტვირთისა მეგობარს გადაულაგა მხრებზე. ანდუყაფარი უხმოდ უსმენდა, ჩვეულებრივად სამი-ოთხი დღის გაუპარსავი სავარძლის საზურგეს მისვენებოდა და თავის უმწეო, ძალაწართმეულ ფეხებს დასცქეროდა დაფიქრებული.

არ ეგონა, ერთხელ უკვე განცდილი, თხრობისას თუ ისევ ააღელვებდა. მისი სულის სიმები უღარესად დაჭიმული და დაძაბული იყო, ხოლო დილანდელი შემთხვევის განსენება უხილავი თითებივით ეხებოდა ამ სიმებს და ათრთოლებდა. ამავე დროს სჯეროდა, რომ ანდუყაფარი აუხსნიდა და განუმარტავდა იმას, რაც მისთვის აუხსნელი, განუმარტავი და ბნელში მომწყვედელი დარჩა. მაგრამ ანდუყაფარი ხმას არ იღებდა. ჩაფიქრებული დაასრიალებდა თავის ველოსიპედის-თვლებიან სავარძელს აივანზე. ხის მოაჯირს ზურგით მიყრდნობილი ლუკა თვალს ადევნებდა ვიწრო და გრძელი ხელების მოძრაობას. ეს მოქნილი ხელები თითქოს იმიტომ იყვნენ შექმნილნი, რომ ველოსიპედის ბორბლები მთელი სიცოცხლის მანძილზე ებრუნებინათ და სავარძელში უღონოდ მიწოლილი კაცისათვის ფეხების მაგივრობა გაეწიათ.

დუმბილში გამოხდა ხანი. ანდუყაფარმა თავისი სავარძელი ონკანთან მიაგორა. გადაიხარა და წყალი მოუშვა. სავარძელი მოქექა, საიდანაც ფინჯანი დაადრო და წყალი დალია. მერმე ღრმად ჩამჯდარი შავი თვალეები ლუკას მიაპყრო და ისე ხმადაბლა ჰკითხა, კაცი იფიქრებდა, თავისთვის ჩაილაპარაკაო.

- შენ ამბობ, კარი ღია იყო?
- კი.
- მანამდე არასოდეს ყოფილა ღია?
- არასოდეს.
- ნამდვილად ღია იყო?.. დარწმუნებული ხარ?
- ხომ ვითხარი, შიგ შევედი-მეთქი.
- ეზოში სხვა არავინ გინახავს?
- არავინ.

ეტყობა, ანდრუყათარს ეჭვი შეეპარა, ლუკასაც აღარ უცდია თავისი სიმართლის დაცვა, შებრუნდა და ეზოს მხარეს გადაეყუდა მოაჯირს. ეზოში ჯუჯა რუბენა ფუსფუსებდა საკუთარ სამტრედესთან. ეს იყო მთელი მისი ავლადიდება, მტრედების მოშენებითა და ყიდვა-გაყიდვით ედგა სული. რუბენას განსაკუთრებით უყვარდა ერთი ქალაქი — სამტრედია. იგი არასოდეს ენახა და ისეთი წარმოდგენა ჰქონდა, თითქოს ეს პატარა და ლამაზი ქალაქი ძირითადად მტრედებით იყო დასახლებული.

— ასე თქვა, მთვარე იბზარება და ნაწილ-ნაწილ ირღვევაო? — გაიგონა ლუკამ ანდრუყათარის ხმა.

— კი, ირღვევაო. — უპასუხა და ანდრუყათარს მოხედა.

— ესეც თქვა, რომ ჩემი სხეულის ყოველი ნაწილი დარღვეული მთვარის ნაწილებთან არისო დაკავშირებული?

— ჰო, ეგრე თქვა.

— თოთხმეტ ნაწილად მერღვევაო სხეული?

— რატომ მეკითხები, არა გჯერა ჩემი?

— როგორ არა... ისე... ძალზე დამაინტერესა... — ანდრუყათარმა აივნის სიღრმეში გააგორა თავისი სავარძელი და ისევ მალე მობრუნდა. — ეს ვერპარნის ქუჩა რაღაა?.. თუმცა შესაძლებელია, მართლაც ამ ქუჩაზე ცხოვრობდეს. თუ არა ვცდები, თბილისში არის ასეთი ქუჩა, სადღაც დიდუბეში ანდა ნაძალადევში.

ლუკა სულგანაბული უსმენდა — ანდრუყათარი ლაპარაკის გუნებაზე მოდგა და აღბათ ბევრ რამეს მეტყვისო, მაგრამ ანდრუყათარმა სავარძელი თავის ოთახისაკენ წააჩოჩილა და ოთახში შესულმა ლუკას გამოსძახა:

— უცნაური კაცი ხარ, ლუკა, ყველაფერს შენ უნდა გადააწყდე ხოლმე!

ლუკამ რამდენიმე დღის შემდეგ დრო იხელთა და შინიდან გაიპარა. ამ დღეების მანძილზე ხშირად ფიქრობდა მთვარისაზე; ზოგჯერ ესიზმრებოდა კიდეც. ერთი-ორჯერ გადაწყვიტა, ანდრუყაფარისთვის გაენდო თავისი საწუნარი, მაგრამ თქმა რომ დააპირა, უცებ მიხვდა, სათქმელი არაფერი ჰქონდა, თვითონაც არ იცოდა, რა აწუნებდა, რატომ იყო ასე მოუსვენრად. არადა, რაღაც უცნობი ძალა ეზიდებოდა იმ ჩაბნელებული ფანჯრისაკენ, საიდანაც პირველად გამოანათა მისთვის მანამდე უნახავმა შუქმა.

ისევ მიაღმა ნაცნობ ალაყაფს, რკინის კარი დაკეტილი აღმოჩნდა. ხელი ჰკრა, მხრითაც მიაწვა, ამოდო რკინის კარი ისევე მაგრად იყო ჩამკანული, როგორც შარშან, როგორც შარშანწინ. გულდაწყვეტილმა და იმედგაცრუებულმა რამდენჯერმე აუარ-ჩაუარა აგურის მალალ გალავანს და თავქვე დაეშვა. ქუჩის ბოლოდან მდინარის ნაპირს გადახედა. ნაპირი უკაცრიელი მოეჩვენა, მაგრამ, როცა კარგად დააკვირდა, ვერის ხიდის ქვემოთ, რიყეზე მჭდარი ბიჭი შენიშნა. ვინმე ჩვენთან იქნებაო, — გადაწყვიტა გუნებაში და მწვანე ფერღობზე ხტუნევა-ხტუნვით დაეშვა.

ბიჭმა ალბათ იგრძნო, ვილაც მიახლოვდებოო და ლუკას მხარს უკან მოხედა.

ლუკა ამ ბიჭს არ იცნობდა, პირველად ხედავდა. ნაბიჯი შეანელა და გამობრუნება დააპირა, მაგრამ უცნობმა ბიჭმა ალაღად გაუღიმა, თან ხელები დაუქნია, — მოდი, აქვე ჩამოჯექიო.

უცნობს წითური, ხუჭუჭა თმა და ქორფლიანი სახე ჰქონდა. ცოცხალ, ჟღალ თვალებსაც წითური, საკვირველად მოკლე და ხშირი წარბები უჩრდილავდა. ძალზე გამხდარი იყო, მაგრამ სახე მზეს შეეერუჯა და ჩანსალი იერი დაჰკრავდა.

ქორფლიანმა რიყეზე გამხდარი ხელი დაატყაპუნა და ლუკას უთხრა, — დაჯექი, სად გეჩქარებოო.

ლუკა მორჩილად დაჯდა.

— ცურვა იცი? — მოულოდნელად ჰკითხა. ქორფლიანმა.

— ვიცი. — მიუგო ლუკამ.

— მე — არა. — უცბადვე თქვა ქორფლიანმა ისეთი კი-

ლოთი, თითქოს ტრაბახობდა, ანდა ნიშნს უგებდა, ცურვა რომ არ იცოდა.

— ცურვას რა უნდა, ისწავლე...

— ვა, როგორ ვისწავლო, ვიძირები.

— როცა ცურვა გეცოდინება, აღარ ჩაიძირები.

— ვა, ეს ვინ ყოფილა, — გაიცინა ჭორფლიანმა, — როგორ მეცოდინება, ვიძირები და...

ლუკას სათქმელი აღარაფერი ჰქონდა და გაჩუმდა, ჭორფლიანიც დუმდა. დუმილის შემდეგ დაასკვნა:

— ალბათ გამხდარი ვარ და იმიტომ.

ლუკას ხმა არ გაუღია.

— შენ ფიქრობ არა ვკამ? ვკამ და არ ვსუქდები, — და უცებ, — შენ სად ცხოვრობ?

— ჩუღურეთში. — ლუკამ მდინარის გაყოლებით ხიდისკენ გაიშვირა ზელი და განაპირა თაღს მიღმა ორსართულიან სახლზე მიუთითა. ჭორფლიანმა, რა თქმა უნდა, იმ დაბრეცილი კედლების, აივნების, ათასფრად შეღებილი შუშაბანდების და კრამიტის სახურავების ზედახორაში ლუკას სახლი ვერ გამოარჩია.

— იქ თუ ცხოვრობ, აქ რა გინდა? — ისევ მიახალა კითხვა ჭორფლიანმა.

— აქ დავდივარ სკოლაში. — ლუკას კიდევ უნდოდა ეთქვა, ჩემი სკოლა სხვაგან გადაიტანეს, ხოლო შენობაში ახლა სამხედრო ჰოსპიტალიაო, მაგრამ დაეზარა. უფრო სწორედ იმიტომ დაეზარა, რომ გაიფიქრა, ამისთვის ალბათ სულერთია ჩემი სკოლა სად გადაიტანესო.

— მაშ იქიდან აქ დადიხარ?

— კი.

— კარგია რა გქვია?

— ლუკა.

— ლუკა რა სახელია? — გულწრფელად გაეცინა ჭორფლიანს, — პირველად მესმის.

— რა ვიცი, დამარქვეს... — მერმე მორცხვად დაუმატა, — ბაპაჩემს რქმევია.

— მე ალბერტი მქვია.

— ალბერტი?

— კარგია, ირა?

— კი, — დაეთანხმა ლუკა.

— ჰო, კარგის რამისაა. — ალბერტმა ქვა აიღო და წყალში ისროლა. ლუკამაც ისროლა ქვა წყალში.

— მიდი, რა იცურავე. ერთი გნახო, როგორ ცურავ. — შეეხვეწა კორფლიანი.

ლუკა სრულებით არ იყო ცურვის გუნებაზე, თანაც ეზარებოდა დასველებული ტრუსის გაშრობა და უაზრო ლოდინი... ამიტომაც სიტყვიერად მოახსენა კორფლიანს, როგორი ცურვა იცოდა, რისთვისაც შემდეგ საკმაოდ დაისაჯა და რის გამოც სინანული გულში კარგა ხანს ჩარჩა.

— მე შემიძლია აქედან ჩემს სახლამდე ცურვით გავყვი მტკვარს.

— ვა? — გაოცდა ალბერტი. — მერე ტუფლები, შარვალი, ხალათი... ეგრევე მიცურავ?

— არა, — გაელიმა ლუკას, — გაკვეთილები რომ დაგვიმთავრდება, ბიჭები აქ ჩამოვდივართ ხოლმე საცურაოდ. როცა ცურვით გულს ვიჭერებთ, ჩემს ტანსაცმელს ამხანაგებს გავატან. მე ცოტახანს მოვუცდი და მერმე შევეცურდები, დინებას გავყვები.

— დინებას? — რატომღაც ეს სიტყვა ამოირჩია ალბერტმა, უფრო მეტი გაოცება რომ გამოეხატა.

— ჰო, დინებას.

— მიდი, რა, მიდი!

ლუკამ ღიმილით თავი გააქნია, — ახლა არა, სხვა დროსო.

— მაჩვენე რა, როგორ ცურავ. გინდა, შენი ხარახურა მე წავიღო? ოღონდ შენ იცურავე და სულ სირბილით წავალ... ჩემმა მზემი..

— ახლა არ შემიძლია, გუნებაზე არა ვარ, თანაც ჭერ ადრეა, ცოტა ცივა.

— წყალს გუნება რათ უნდა. ცურვა ვიცოდე, სულ წყალში ვიქნებოდი. მიდი, რა, გაიხადე... ერთი მაჩვენე, რა! კაცი არა ხარ!

ლუკა წამოდგა და ფეხსაცმელები წაიძრო, მერმე შარვალი და გაქათქათებული, დღეს დილით საგანგებოდ დაუთოვებული თეთრი პერანგი გაიხადა, პერანგს მაისურიც მიაყოლა. მერმე ეს ყველაფერი გულსისუფრით დაკეცა და ალბერტს გაუწოდა.



- იცი, სად უნდა მიიტანო?
- აბა, საიდან უნდა ვიცოდე?
- გაგიგონია რიყის ქუჩა?
- „პესკა“, არა?
- ჰო.

— მაგის მეტი რა ვიცი, შენ ნომერი მითხარი.

— ჩვიდმეტი. ეზოში შეხვალ და ცაცხვის ქვეშ დამელო-  
დები. ოღონდ სწრაფად უნდა იარო.

— ვა, სულაც ტროლეიბუსით წავალი — ალბერტმა ფერ-  
დობისაკენ ხელი გაიშვირა და უთხრა, — იქიდან შეგხედავ,  
მერმე გავიქცევი... თუ შენ მიმასწარი, ამ დანას გაჩუქებ,—  
ჯიბიდან რამდენიმეპირიანი ჯაყვა ამოიღო და ლუკას უჩვენ-  
ნა, — თუ მე უფრო მალე მოვედი, მაშინ შენ მაჩუქე რამე.

— კარგი. — დაეთანხმა ლუკა.

ალბერტმა სირბილით გაიარა რიყე და სირბილითვე აათა-  
ვა მწვანე ფერდობი. ფერდობზე ასულმა ლუკას შეუძახა:

— ჰა, ჩქარა, თორემ წავედი!

მომწვანო წყალი საამოდ თბილი და გამჭვირვალე იყო;  
ტყვესავით ხელებაწეული ლუკა ნელ-ნელა შედიოდა წყალში.  
უცებ ისკუბა და ჩაყურყუმელავდა. წყალქვეშ გასცურა რამ-  
დენიმე მეტრი და წყალქვეშვე ამოტრიალდა. მერე მშვიდად  
ამოჰყო თავი და მარცხენა ხელით თვალებიდან და სახიდან  
წყალი ჩამოიწურა.

ალბერტი ფერდობზე იდგა. გახარებული იცინოდა და  
ხტოდა, თან ხელს უქნევდა. ერთხანს მიადევნა თვალი ლუკას,  
ლუკაც არ აშორებდა თვალს, ილიმებოდა. — მაშ რა გეგონაო  
და ისიც ხელს უქნევდა.

ჭორფლიანს კიდევ ერთხელ აღმოხდა აღტაცების ყიყინის  
მაგვარი ხმები ყელიდან, მერმე შეხტა, შეკუნტრუშდა და ისე  
უცებ გაუჩინარდა, როგორც სიზმარში.

ლუკა არ ჩქარობდა. შუაგულ მდინარეში შეჭრილი ტალ-  
ლების დინებას მინდობოდა. რა სჭირდა ასაჩქარებელი? ჭორ-  
ფლიანი გინდაც სირბილით გამსკდარიყო, ლუკას მაინც ვერ  
მიასწრებდა. ორ წერტილს შორის უმოკლესი მანძილი რომ  
სწორი ხაზია, ლუკამ აქ, მტკვარზე დაამტკიცა.

რა სისულელეა, იმ დანას როგორ გამოვართმევო, — ფიქ-  
რობდა ლუკა და წყალქვეშ დინჯად და ზომიერად ამოძრავებ-

და ხელებსა და ფეხებს. კარგი დანა ჩანდა და სწორედ ამიტომაც არ უნდოდა გამოერთმია, გული დაწყდებოა. „ისე კი არ უნდა იყოს ცუდი ბიჭი. მხიარულია, ალბათ ცოტა წაიშტერებს კიდეც“.

მდინარის მარჯვენა მხარეს მუხრანის ხილამდე ბეტონის მაღალი ჭებირი აყუდებულყო. მარცხნივ ჭერ არ ჰქონდა სანაპიროს კედელი და ნაპირი მოღიაღებული იყო. როცა ლუკა შინისკენ მიცურავდა, ყოველთვის მარცხენა ნაპირს გასცქეროდა. უყვარდა ამ პატარა სახლებისა და სხვადასხვაფერად შეღებილ შუშაბანდებისა და აივნების ცქერა. ყველაფერი ეს მისთვის ნაცნობიც იყო და უცნობიც, ახლობელიც და შორეულიც. შუა მტკვრიდან თვალისმადევნებელი ყოველთვის აღმოაჩენდა ხოლმე ორ სახლს შორის ჩაჭედილ სახლს, რომელიც მანამდე არ ენახა ან არ ჰქონდა შემჩნეული. ზოგჯერ ლამაზ აივანს გამოარჩევდა. ამ ლამაზრიკულებიან აივანსაც, რა თქმა უნდა, პირველად ამჩნევდა. ზოგჯერ კი სრულიად უცხო ფანჯარას იპოვიდა. ფანჯარა მართლაც უცხოდ ელვარებდა მზეზე, ფერადმინებიანი.

ხიდის თაღს რომ გაივლიდა, გული უკვე საგულეში ჰქონდა, რადგან აქედან უკვე ჩულურეთი იწყებოდა. ეს კი უკვე ბევრ რამეს ნიშნავდა. ჩულურეთი მისი უბანი იყო, მისი სამფლობელო.

ხიდს გასცდებოდა თუ არა, მდინარეს ორად ჰყოფდა რიყით მოფენილი პატარა კუნძული. მარცხნივ პირდაპირ მდინარიდან აღიმართებოდა მაღალი შენობის თეთრად შეფეთილი კედელი. ეს კედელი შეღებილი არ გვგონოთ, ფქვილით იყო შეფიფქული. მისი ფანჯრებიდან ყოველთვის ბერტყავდნენ ფქვილიან ტომრებს ანდა უვარგის ქატოს ზემოდან უბოდიშოდ პირდაპირ მტკვარში გადმოუძახებდნენ ხოლმე.

მერე გაუქმებული ეკლესიის ყელი და გუმბათი გამოჩნდებოდა. ამ გაუქმებული ეკლესიის ეზოში მაიკო ცხოვრობდა, ლუკას კლასის ამხანაგი. ჩრდილში გაზრდილივით დაღეული, წრიბა გოგო. როდესაც ლუკას მაიკო გაახსენდებოდა, რატომღაც წარმოიდგენდა, თითქოს ეს გოგო სადმე ბნელ კუთხეში თავისთვის მიყუჩებულიყო, იჯდა და თხილს აკნატუნებდა.

ეკლესიის ქვემოთ ისევ რიყე იწყებოდა. რიყე მდინარეში იყო შეჭრილი და ავტოსკოლის გარაეიდან ბაბოს კედლამდე

რამდენიმე ეზოს გასდევდა. ლუკა კუნძულს ჩაუვლიდა, და სწორედ იქიდან, სადაც ეს ტოტი მდინარის მთავარ კალაპოტს უერთდებოდა, იწყებდა ნაპირზე გასვლისთვის ზრუნვას.

აქედან უკვე კარგად მოჩანდა ლუკას ეზო, ორსართულიანი სახლი და დიდი ცაცხვი. ლუკამ მაშინვე ცაცხვს გახედა, აბა თუ მიმასწრო კორფლიანმა ალბერტმა მოსვლაო. ეზო ცარიელი აღმოჩნდა. არც ცაცხვის ქვეშ მდგარა ვინმე.

ლუკამ ნაპირისკენ მოუსვა და ნავის ფერდს დაებლაუჭა. მხოლოდ ნაპირზე ამოსულმა იგრძნო დაღლილობა, სხეული თითქოს დამძიმებოდა. მაგრამ ეს სიმძიმე მისთვის უცხო არ იყო, ყოველთვის ასე ემართებოდა, როცა სკოლიდან ცურვით ბრუნდებოდა შინ.

მეორე სართულის აივანზე ანდუყაფარი დაასრიალებდა თავის მუშამბაგადაკრულ ველოსიპედის ბორბლიან სავარძელს. დეიდები, როგორც ყოველთვის, ოთახში იყვნენ შეკეტილნი.

ლუკა მზეზე იდგა და შრებოდა. ცოტათი შესცივდა კიდევ, სხეული გაულურჯდა და აეხორკლა. გაუხდელად ზედვე იწურავდა სველ ტრუსს. მერმე რიყე გადაჭრა და კედელს მოფარებულმა ტრუსი გაიხადა. — უკეთესია გაწურო, ტანზე როდის შემაშრებაო. გაწურა და ჩაიცვა კიდევ. ისევ მზეზე გამოვიდა. თუ ფეხით იარა, ჯერ ვერ მოაღწევდაო. — ფიქრობდა. თუმცა არც ტროლეიბუსით წამოსვლა იყო დიდი ბედენა, იშვიათად დადიოდა და ისიც ძლივს დაჩაქჩაქებდა, ყოველ ნაბიჯზე ჩერდებოდა.

მრავალპირიანი დანა უკვე მოგებული ჰქონდა და საკუთარ ჯიბეშიაც კი ეგულებოდა. საქმე ის იყო, რომ ლუკამ გზაში გადაიფიქრა. ჯერ ერთი კორფლიანი ისეთი ბიჭი ჩანდა, წაგებულს არ შეიჩჩინდა, მეორეც, რაც დრო გადიოდა, მით უფრო მოსწონდა სადაფისტარიანი პატარა, ლამაზი დანა.

ტანზე წყლის წინწკლებიც კი შეაშრა, სილურჯემ გაუარა. გათბა და კანი დაეწმინდა. მხოლოდ თმა და ტრუსი ჰქონდა სველი. თუმცა სველი არ ეთქმოდა, უფრო დანამულსა ჰგავდა.

ეზოს კიდეს ჯვალოს შარვალხალათიანი ძია ლადო მოადგა. ჯიბეებში ხელებჩაწყობილმა რიყეს გადახედა.

— ამოდი, მანდ რას უდგეხარ? — უთხრა ლუკას.

— ამხანაგს ველოდები.

— აქ დაელოდე. — ძია ლადო სკამზე დაჯდა და ზეთის ქაღალდში თამბაქოს გახვევა დაიწყო.

ლუკას ტრუსის ამარა დაცარიელებულ ეზოში დგომა და ლოდინი არ უნდოდა. ახლა რახან ძია ლადო გამოჩნდა, სწრაფად მიადგა კედელს და ზედ კატის სისწრაფით და სიფრთხილით აცოცდა. ეზოში ასულმა მტკრიანი ხელები დაიფერთხა და იმავე სკამზე, უფრო სწორედ, გრძელ მერხზე ძია ლადოს გვერდით ჩამოჯდა, მტკვრისაკენ ზურგმუქცევით. ასე იმიტომ დაჯდა, რომ ქუჩიდან ეზოში შემოსასვლელ ჭიშკრისათვის ეცქირა. ჭორფლიანი ეს-ესაა მოვაო, — ფიქრობდა.

ჭორფლიანი იგვიანებდა.

ძია ლადომ მყრალი თუთუნი გააბოლა, მერმე ჩაიჩოჩა და ცაცხვის მერქანს ზურგით მიეყრდნო. ეს მერხი, რომელზედაც ისხდნენ ახლა, ძია ლადოს ნახელავი იყო. მთელი ეზოს მამაკაცები ამ ცაცხვის ქვეშ იყრიდნენ ხოლმე საღამოობით თავს და დასაჯდომი კი არ ჰქონდათ. ძია ლადომ მტკვარში დაქვრილ მორს ბოლოები წაუმახვილა და შუაზე გადაჭრა. წამახვილებული მორის ორი ნაჭერი ერთმანეთის მოშორებით დაარქო, ზედ ფიცარი გასდო და დააქვდა. მერმე ამ მერხს ასევე დაუდგა მაგიდა. ერთი მერხი, რასაკვირველია, მეზობლებს არ იყოთ, ვინც მოსვლას დააგვიანებდა, ფეხზე იდგა. ამიტომ ძია ლადომ მაგიდის მეორე მხარესაც გამართა ისეთივე მერხი.

ჭორფლიანი აღბერტი ისევ არ ჩანდა.

— რას უტედი? — ჰკითხა ძია ლადომ. — რატომ შინ არ აღიხარ?

— რა ვიცი, ერთი ჭორფლიანი ბიჭია, იღბერტა ჰქვია, იმას ვუტედი.

— რა მინდაო?

— არაფერი. ტანსაცმელი უნდა მომიტანოს.

— საიდან?

— ვერის ხიდიდან ცურვით წამოვედი და ტანსაცმელი იმას გამოვატანე.

— იცნობ, ვინ არის?

— არა. დღეს გავიცანი.

— აბა, შენა ყოფილხარი! — ძია ლადო უცებ აღელდა და როგორც ლუკას მოეჩვენა, გაბრაზდა კიდევ. — უცნობ ბიჭს გამოატანე ტანსაცმელი?

— რა ვიცი.

— როგორ თუ, რა იცი?!

— კარგი ბიჭი ჩანდა.

— კარგი ბიჭი! — ძია ლადომ ეზოდან რიყეზე გადააპურ-  
ჭყა და აბოლებული ნამწვეავი მოისროლა. — როგორი ბიჭი  
იყო?

— ჭორფლიანი, გამხდარი... ცეცხლივით წითელი თმა  
ქონდა.

— აბა, შენა ყოფილხარ!.. წამოდი, ქუჩაში გავიდეთ.

— არა, ძია ლადო, ისეთი ბიჭი ჩანდა, არ მომატყუებდა. —  
ლუკა მაინც დარწმუნებული იყო, ჭორფლიანი მოვიდოდა და  
ტანსაცმელს მოუტანდა. ძია ლადო სულ ტყუილად დეღავდა.

— წამოდი-მეთქი, გეუბნები. — ძველმა მენავემ ხელი  
მკლავში წაავლო, მერხებს გადააღაჯა და ლუკაც გადაათრია.  
ქუჩაში გავიდნენ.

ლუკასთვის ძალზე მოულოდნელი აღმოჩნდა ძია ლადოს  
ამგვარი აღელვება და გაბრაზება. კაცი უცებ გამოიცვალა, სა-  
ხე დაეძაბა და დაეჭიმა. ვიწრო, ჩამქრალი თვალები აენტო და  
გაუფართოვდა. ალბათ თვითონ ვერცა გრძნობდა, რა მაგრად  
უჭერდა ლუკას მკლავზე ხელს. ლუკა ტკივილისაგან იმანჭე-  
ბოდა, — ოღონდ ხელი შემიშვას და ჯანდაბას ჩემი ტანსაცმე-  
ლიო.

— წამოდი, წამომყევი. იქნებ სადმე წავაწყდეთ! — ძია ლა-  
დომ ლუკას შეუშვა ხელი და ჩქარი ნაბიჯით გაჰყვა ქუჩას  
ეკლესიისაკენ.

— ძია ლადო, სირცხვილია, სულ ტიტველი ვარ! — რკი-  
ნის მარწუხებისაგან განთავისუფლებულმა ლუკამ შვებით ამო-  
ისუნთქა.

— სირცხვილი ის იყო, თავი რომ მოატყუებინე. ვერ ვით-  
მენ რა, როცა კაცს ატყუებენ!.. ერთი, თუ ხელში ჩამივარდა!..

ლუკამ ეკლესიის ეზოსთან დაინახა მაიკო. იგი ვიღაც სამ  
გოგოსთან ერთად იდგა. გოგოები საუბრობდნენ და თანაც  
მზესუმზირას შეექცეოდნენ.

გიყვივით გავარდა უკან. ძია ლადო არც გაუფრთხილებია,  
ისე მოჰკურცხლა შინისაკენ.

ლუკა დარცხვენილი, საკუთრად ჩადენილი შეცდომისა და  
დანაშაულის ამლიარებელი კაცის იერით წარსდგა დეიდების

წინაშე. შინაბერა დეიდებმა, რა თქმა უნდა, შეიცხადეს დის-  
შვილის ასე უსინდისოდ გაცურება და გაძარცვა. მაგრამ და-  
ნაშაულის მთელი სიმძიმე მაინც ლუკას მამას დააწვა. რო-  
გორც უკვე მოგახსენეთ, ის იყო ყოველგვარი ზოროტების სა-  
თავე, ასე მიაჩნდათ ტყუპ, შინაბერა დებს ლუკა დაუღვეარი  
და ბეყეირათია — იმიტომ, რომ პირწავარდნილი მამაა. ლუკამ  
იცრუა, მაინც მამაა დამნაშავე, რადგან ისიც მატყუარა და  
ცრუ კაცი. ლუკას შინ დაბრუნება შეაგვიანდა, მეგობრებთან  
საუბარმა შეაყოვნა, ან ბურთი ითამაშა, ან ლახტი, ან ოთურ-  
მა, ესეც მამის ბრალია. ის კაცი მთელი ცხოვრება ხომ მხო-  
ლოდ იმას ფიქრობს, როგორ გალადღეს, დრო როგორ გაატა-  
როს, როგორ გაინაგარდოს.

ლუკას ერჩია, ეს ქარიშხალი პირადად მას დასტყდომოდა  
და არა მამამისს. მამის აუგად ხსენება ამწარებდა და აბორო-  
ტებდა. ლმობიერი და მიმტევებელი გული წვეთწვეთობით  
შხამითა და ბოლმით ევსებოდა. ხმაგაკმენდილი თვალს აღევ-  
ნებდა ოთახებში დეიდების ამაო ფუსფუსს და ბავშვური აღ-  
ლოთი გრძნობდა, ეს ფუსფუსიც მისთვის იყო გამიზნული, აღ-  
მზრდელობითი მნიშვნელობა ჰქონდა მინიჭებული, ვითომ ნახე,  
ჩვენ რამდენს ვშრომობთ, შენ კი მამაშენივით უქნარობასა და  
უსაქმურობაში ამოგდის სულიო.

ზოგჯერ ფიქრობდა, განგებამ ამქვეყნად ეს ტყუპი, შინა-  
ბერა დეიდები ჩემს სატანჯველად მოავლინაო. ისინი წამდაწამ  
ეძებდნენ საბაბს ლუკას დასჯისა და დატუქსვისათვის. გარდა  
იმისა, რომ ზუსტად ერთნაირად იცვამდნენ, ერთნაირადვე  
ფიქრობდნენ და აზროვნებდნენ, ერთნაირი წარმოდგენა ჰქონ-  
დათ საგნებსა და მოვლენებზე და ამიტომაც ზედმიწევნით შე-  
თანხმებულად მოქმედებდნენ ლუკას წინააღმდეგ. ბოლო ხა-  
ნებში კი ლუკას დასჯის უმკაცრესი ხერხიც მოიგონეს: მამას  
ულანძღავდნენ.

ლუკა ოთახში ხმაგაკმენდილი იდგა, შურისძიებაზე, სამა-  
გიეროს მიზღვაზე ფიქრობდა. დედაბრები იმდენად ჰგავდნენ  
ერთმანეთს, რომ ლუკა შარშანდლამდე თითქმის ვერ ანსხვა-  
ვებდა, რომელი იყო დეიდა ნატო და რომელი დეიდა ნუცა.

ერთი სიმაღლისანი იყვნენ, მაღალნი, ხმელხმელნი. ორი-  
ვეს გრძელი და დამქვრივი ხელები, დიდი და შავი თვალები  
ჰქონდათ, საკმაოდ სწორი და პატარა ცხვირები. თმაში არც

ერთი თეთრი ღერი, თუ არ ჩათვლით იმ ჭაღარა ზოლს, რომელიც ყმაწვილქალობაშიც შავ თმაზე ისევე გასდევდათ, როგორც ახლა. ლუკას დედისგან და სხვებისგანაც გაგონილი ჰქონდა, რომ მისი დეიდები ამ ორმოცდაათიოდე წლის წინათ ულამაზეს ქალიშვილებად ითვლებოდნენ.

ლუკას კარგად ახსოვს, როგორ ბრაზდებოდნენ და როგორ ტუქსავდნენ, თუკი შეეშლებოდა და მათ სახელებს აურევდა. ეს ჭაღარა თმის ზოლი სხვადასხვა მხარეს მაინც გასდევდეთ, — უფიქრია ხშირად, — მაშინ მათი გამოცნობა ასე არ გამიჭირდებოდაო.

დაბოლმისმა გადაწყვიტა, არასოდეს აღარ მიემართა დეიდებისათვის თავიანთი ნამდვილი სახელებით. საკუთარი გულის მოსაოხებლად ამიერიდან დეიდა ნუცას დეიდა ნატოს დაუძახებდა, ხოლო დეიდა ნატოს დეიდა ნუცას. დარწმუნებული იყო, ეს სახელების არევ-დარევა სიგიჟემდე გააწიწმებდა და გააცოფებდა დეიდებს.

მაგრამ თავისი გადაწყვეტილება როცა ანდუყაფარს გაუმხილა, იმ წამსვე მიხვდა, რომ ანდუყაფარმა განზრახვა გუნებაში არ მოუწონა. ეს სახის ცივ გამომეტყველებაზე შეატყო, თანაც აივანზე თავისი ბორბლებიანი სავარძლით მოსეირნებ სიტყვა ბანზე აუგდო და ჰკითხა: — თქვენი სკოლა რომელ ქუჩაზე გადავიდაო?

ლუკამ შურისძიების გეგმა ჩაფუშულად ჩათვალა და აივნის მოაჯირს დაყრდნობილმა მტკვარს აღმა გახედა. ისევ გაახსენდა დილანდელი მარცხი.

შინაგანად მაინც არ იყო დარწმუნებული, რომ ჰორფლიანმა მოატყუა და ტანსაცმელი წაჰკლიჯა. ალბათ ჩვენს ეზოს ვერ მოაგნო — ფიქრობდა. ეგონა, ხვალ მათი გაცნობის ადგილზე მისულს ჰორფლიანი ალბერტი უსათუოდ დახვდებოდა და ლუკას ტანსაცმელი, ისევე სათუთად დაკეცილი, როგორც თვითონ დაუტოვა, იქვე იდებოდა პატრონის მოლოდინში.

ასეც მოიქცა.

მეორე დილას გაეშურა ვერის ხიდისაკენ. ახლანდელ მარჯანიშვილის მოედნამდე, სადაც მაშინ ჯერ კიდევ ძველი კირხე იდგა, ტროლეიბუსით იმგზავრა. მერმე უკან გამობრუნდა და ლენინგრადის ქუჩით თავისი ყოფილი სკოლისაკენ ზღაზ-

ვნით ვაემართა. ტანსაცმელი, რომლის გამო შინ ასეთი ამბავი დაათიეს, ამ ერთ დღეში შეჯავრებოდა. და მიუხედავად იმისა, რომ გაცვეთილი ფეხსაცმელებისა და ძველი შარავლის ამარა ღარჩა, მათ დაბრუნებაზე სიამოვნებით იტყოდა უარს.

ლენინგრადის ქუჩა გაიარა და მარცხნივ გაუხვია. მალე გამოჩნდა ლუკას სკოლაც — ახლა უკვე სამხედრო ჰოსპიტალი. სადარბაზო შესასვლელთან ისევ იდგნენ ჯარისკაცები. იქვე იყო გაკრული განცხადებაც. სადარბაზოს ჩაუარა და მესერის გასწვრივ ქუჩას გაჰყვა. წინ მუქი-მწვანე ფერის სამი სამხედრო — სანიტარული მანქანა დაინახა. ისინი ერთიმეორის მიყოლებით, ფრთხილად შედიოდნენ ჭიშკარში. როდესაც ლუკა ჭიშკართან მივიდა, დიდულვაშა ჯარისკაცი რკინის კარს ბოქლომს ადებდა. ეზოს სიღრმეში კი მწვანე სანიტარული მანქანები დინჯად მიზოზინებდნენ, როგორც ბარადზე.

ლუკამ ქუჩა გადაჭრა და ვიწრო ოღრო-ჩოღრო ქუჩით მტკვრისაკენ დაეშვა. როგორ არ უნდოდა ახლა იქ მისვლა. ნეტავი რიყეზე ჭორფლიანი არ დამხვდესო, — ნატრობდა გზადაგზა. მაგრამ, სხვამ თუ არა, მან ხომ დანამდვილებით იცოდა, რომ ცეცხლისფერთმიანი ალბერტი მტკვრის ბირას ელოდებოდა.

## თავი მესამე

სექტემბრის შუა რიცხვებში დეიდა ნუცა, რომელიც თავის ტყუპისცალზე ორმოცდაათი წუთით უფროსი იყო, მოულოდნელად გარდაიცვალა. გარდაიცვალა საკუთარ საწოლში მძინარე, უხმოდ და უდრტვინველად. როგორც ჩანს, შუალამისას, რადგან დეიდა ნატომ დააჩლოებით დილის ექვს საათზე შექმნარავი კვილი ასტეხა და მთელი ეზო შეჰყარა.

მეორე სართულის აივანი მეზობლებით გაიქედა. დაფეთებულები ამოარბოდნენ კიბეზე და შეძრწუნებულები კითხულობდნენ, — რა მოხდაო? მერმე, როცა შეიტყობდნენ, რაც მოხდა, სინანულით აქნევდნენ თავებს და იქვე კედლებთან აყუდებულები, მდუმარედ იდგნენ. ზოგნი დეიდა ნატოს ამშვიდებდნენ და ანუგეშებდნენ, უმეტესად ქალები.

მერმე ყველაფერი მიჩუმდა. ტირილისაგან თვალებდასიე-



ბული დეიდა ნატო მიცვალებულის წინ იჯდა გამტერებული და მეზობელი ქალების ხმადაბალ შეკითხვებზე ჩურჩულით. კეპასუხობდა, თითქოს ისინიცა და ესეც მიცვალებულს რაღაცას უმაღავდნენ. მეზობელმა ქალებმა ამ საუბრიდან გამოარკვიეს, რომ ქალბატონ ნუცას სამოცდაათი წლის მანძილზე, ფრჩხილი რა არის, ფრჩხილიც კი არ წამოსტკივებია. უმცროსი დის ჯავრმა გადაიყოლაო. — ერთსულოვნად დაასკვნა ყველამ.

ეს მართლაც ასე იყო. ტყუბებს უკვე დამთავრებული ჰქონდათ გიმნაზია, როდესაც მათმა დამ, მერმე უკვე ლუკას დედამ, დააპირა ამ ქვეყანას მოვლენოდა, სამწუხაროდ, ტყუბების დედა მშობიარობას გადაჰყვა და უფროსმა დებმა იკისრეს ბავშვის გაზრდა. გაზარდეს კიდევ. კარგად გაზარდეს. თბილისის უნივერსიტეტი დაამთავრებინეს, სწორედ ამიტომ გადმოსახლდნენ ქუთაისიდან თბილისში. განსაკუთრებული სიყვარულით უყვარდათ, თავს ევლებოდნენ, დაჰკანკალებდნენ და, როგორც იტყვიან, — ცივ ნიაესაც კი არ აკარებდნენ. პირველი თავზარი, რომელიც უმცროსმა დამ დასცა უფროს დებს, ის იყო, უნივერსიტეტის დამთავრებისთანავე რომ გამოუტხადა — ვთხოვდებით და წარუდგინა სამხედრო ფორმაში გამოწყობილი ახალგაზრდა ვაჟი — გოგი ჯორჯაძე. უფროსი დების შეცხადებამ არავითარი ნაყოფი არ გამოიღო. რასაკვირველია, მათ არ უნდოდათ უმცროსი დაც გაუთხოვარი და შინაბერა დარჩენილიყო, მაგრამ ცხოვრებამოუწყობელი, ქვეყნად აღოლიალებული სამხედრო ვაჟისათვის არ ემეტებოდათ აგრერივად ნალოლიაეები და.

ახლა კი საშინლად განიცდიდნენ უმცროსი დის ასე უაზროდ დაკარგვას. თითქმის სამი თვე გავიდა და მისი ასავალდასავლისა ვერაფერი შეიტყვეს. დილიდან დაღამებამდე ყოველ წამს, ყოველ წუთს შფოთავდნენ და წუხდნენ დები და არა მარტო დაღამებამდე, ლუკას გვიანობამდე ესმოდა დედაბრების ლაპარაკი. ზოგჯერ მათი ხმა აღვიძებდა კიდევ. მიაყურადებდა, თუმცა წინდაწინვე იცოდა, რაზე საუბრობდნენ და შფოთავდნენ.

ლუკა მოუსვენრად დაბოდილოდა მეზობლებით სვსეოთახებსა და შუშაბანდში. ხანდახან აივანზეც გადიოდა. მოაჯირს დაყრდნობილი ჩასცქეროდა მტკვრის დინებას. ეცოდე-

ბოდა საკუთარ საწოლში გაშეშებული დეიდა, რომელსაც სახე უფრო მეტად დასჭკნობოდა და ჩაყვითლებოდა. ოღონდ ეს კი იყო: ტანჯვისა და ტკივილის ნაცვლად მიცვალეზულის სახეს სრული სიმშვიდე აღებეჭდა.

როდესაც ნატო დეიდას მეზობლები ეკითხებოდნენ სიკვდილის მიზეზს, ლუკას შეეშინდა, — ვაითუ ესეც დეიდა ნატომ მამაჩემს დააბრალოსო. მაგრამ დეიდას ლუკას მამაზე სიტყვა არ დასცდენია. დაკარგულ დას ხშირად ახსენებდა, უხმობდა, ეძახდა. უხმობდა იმისათვის, რომ უკანასკნელად ერთხელ მაინც დაეხედა თავისი აღმზრდელი უფროსი დისათვის.

პირველმა ელდამ გაიარა. დაღუმებულმა მეზობლებმა ხმა ამოიღეს. იქვე შეუდგნენ დასაფლავების თადარიგს. მსჯელობდნენ, კამათობდნენ. ლუკა შორიდან უგდებდა ყურს და ძალიან რთულად ესახებოდა მიცვალეზულთა დაკრძალვის წესები, იმდენად რთულად, რომ შეშფოთდა კიდევ, თუ ყველა ამ წესის დაცვა აუცილებელია, დეიდა ნუცას ალბათ ვერასოდეს დავასაფლავებთო.

დათიკო ბერიშვილმა, რომელიც პირველ სართულზე ცხოვრობდა, სხვათაშორის თქვა: მართალი გითხრათ, მე ჯერაც ვერ გავრკვეულვარ, რომელი გარდაიცვალა — ნუცა თუ ნატო? ამ გაუგებრობის გამო ერთი ორმა ჩაიხითხითა კიდევ, მაგრამ მოხითხითენი მაშინვე ჩააჩუმეს, — სირცხვილიაო. დათიკო თავისას მაინც არ იშლიდა, — ნამდვილად არ ვიციო, — ამტკიცებდა. როგორ თუ არ იციო, — უთხრეს, — აქ რომ შემოვედით, ნატომ შემოგვტერა, — ნუცა, ნუცა მოკვდაო! ამაზე დათიკო ბერიშვილმა უპასუხა, — ალბათ იმიტომ, რომ შეეშინდა, ამ ხალხს მკვდარი მე არ ვეგონოო. აქ ისევ ატყდა ჩუმი ხითხით. მაგრამ მალევე შეწყდა, იტყობა ლუკა უფრო ადრე შენიშნეს, მანამდე, ვიდრე იგი თავს მოაბრუნებდა და ტრადიციების დამცველ მეზობლებს შეხედავდა თვალეზუში, რომლებშიც ახლა დაღვრემილი თანაგრძნობის მეტს ვერაფერს აღმოაჩენდა კაცი.

სალამო ხანს უკვე ნათესავები მოცვივდნენ. ამ ნათესავთაგან თითქმის არავის იცნობდა ლუკა. ისინი მოსვლისთანავე საქმიანად დატრიალდნენ, იმ წამსვე შეადგინეს ტექსტი ტელეგრამებისათვის და ფოსტაში კაცი აფრინეს, რათა თბილისს

გარეთ მცხოვრებ ნათესავებისა და მახლობლებისათვის შეე-  
ტყობინებინათ დეიდა ნუცას გარდაცვალების ამბავი.

სულ ტყუილად გაისარჩნენ, ხუთიოდე ნათესავი თუ ჩამო-  
ვიდა სოფლებიდან. ამ ხუთიდან მხოლოდ ერთი ანმახი იკ-  
ლავდა თავს, ვარდისფრად გადაჟღაყებული მელოტი კაცი.  
ეზოში შემოსვლისთანავე განწირული ხმით აბლავლდა, ვაიმე,  
დაო, ეს რა დაგვემართა, რა გვიქენი, რატომ დაგვღუპეო—  
თან ლაპალუპით ღვრიდა ცრემლს. ღამით კი, როცა კუბოზე  
დანთებული სანთლიდან პაპიროსს ცეცხლი მოუქიდა და შე-  
ნიშვნა მისცეს, — რას შვრები, პოლიკარპე, მაქედან ცეცხ-  
ლის მოკიდება ვის გაუგონიაო?! — პოლიკარპე აღუღდა და  
შენიშვნის მიმცემს მკაცრად გადაულაპარაკა:

— ნუ გადამაყოლებთ ახლა ამ გადაბეხრეკებულ დედა-  
ბერს! ნუცა კი არა, ვარსკვლავივით ბიჭები იხოცებიან ომ-  
ში უსაშველოდ!

— კი მარა, შენ არ იყავი, თავს რომ იკლავდი, რატომ დაგ-  
ვღუპეო? — დამცინავად ჰკითხა შენიშვნის მიმცემმა.

— თუ კაცი ხარ, მაცალე! ამ ხნის კაცს მოქცევა შენგან  
არ მესწავლება. ორმოცდაათი ნათესავი მაინც დამისაფლავე-  
ბია, თუ მეტი არაა — ისევ დუღდა ბატონი პოლიკარპე.

ანდუყაფარი ოთახიდან თითქმის არ გამოდიოდა. ლუკას  
შესთავაზა, — სანამ დეიდაშენს დაასაფლავებენ, ჩემთან ათიე  
ღამეო. სხვებმაც ასევე ურჩიეს და ლუკამ სამი ღამე გაათია  
ანდუყაფართან. უფრო სწორედ გაათენა, რადგან ძილი არ  
ეკარებოდა. თუკი წასთვლემდა, ხან მამის სამხედრო ბანაკი  
ესიზმრებოდა, ვითომ ცხენები მიჰყავდა მდინარეზე განსაბა-  
ნად, ხან მთვარისა. მთვარისა უფრო ხშირად ეცხადებოდა წათ-  
ვლემილს, უცნაურად მომღიმარე, რომლითაც სიხარულსაც და  
მწუხარებასაც ერთნაირად გამოხატავდა, თითქოს ტკივილი ნე-  
ტარებასაც ჰკვრიდა.

სკოლის ამხანაგთაგან მხოლოდ მიტო და მაიკო აკითხავ-  
დნენ, ეტყობა სხვებმა ვერ გაიგეს ეს ამბავი, ზოგი ამხანაგი  
ამ ღროს, შეიძლება, თბილისში არც იმყოფებოდა. მიტო და  
მაიკო ყოველ საღამოს მოდიოდნენ ლუკასთან და გვიან და-  
მემდეგ რჩებოდნენ. ამ უბედური დღისათვის საგანგებოდ გა-  
ჩახჩახებულ აივანზე ისხდნენ. აივნიდან ნახევარი თბილისი,  
როგორც ხელის გულზე, ისე მოჩანდა: მარცხნივ ძველი მუხ-

რანის ხიდი, მიღმა მეტეხი, ზემოთ კი ნარიყალა, მთაწმინდა ხომ ზედ თავზე წამოსხდომოდათ. მარჯვნივაც ძველი ხიდი — (ეს ხიდები ახლა უკვე აღარ არსებობენ, მათ ნაცვლად ახალი ხიდებია აგებული), უფრო ზემოთ — ფიქრის გორაზე შეფენილი სახლები, ხოლო შორს — თრიალეთის ქედის ფერდობები. აივნიდან გუმბათივ მოჩანდა გაუქმებული ეკლესიისა, რომლის ეზოშიც მაიკო ცხოვრობდა.

სალაპარაკო პირველსავე დღეს მოათავეს, შემდეგ დროის უმეტეს ნაწილს დუმილით ავსებდნენ, მაგრამ ლუკას მათთან მღუმარედ ჯდომაც შვებას გვრიდა, რადგან დაკრძალვის სამზადისი — ნერეული, გაუთავებელი ფაცი-ფუცი და ფუსფუსი მასაც აღიზიანებდა და თრგუნავდა. ამდენ ჰირისუფალთა შორის ორ კაცსაც ვერ იპოვიდი, დაკრძალვის წესებზე ერთნაირი აზრი რომ ჰქონოდა. ყველა თავისას იმბობდა და ამტკიცებდა. თანაც თავის აზრს ყველა ამ სიტყვებით ამაგრებდა: — ჩვენ, ქართველებმა ასე ვიცით, ბატონო, კაცის დამარხვა და თქვენ თუ ახალი წესი მოიგონეთ, ნუ გვიმალავთო. პასუხს, რა თქმა უნდა, არ უგვიანებდნენ: მეც ქართველი ვარ, ჩემო ბატონო, და თუ ღმერთი გწამს, ნუ მასწავლი, როგორ უნდა კაცის დამარხვაო! — ეს ბატონი პოლიკარპე გახლდათ, პაპიროსს კუბოზე დანთებულ სანთლიდან რომ მოუჟიდა ცეცხლი.

სკოლის ამხანაგების საუბრები სკოლითვე იყო მოზღუდული. დაბნეულებივით იყვნენ და არ იცოდნენ, როგორ შეგუებოდნენ სხვა შენობას, სხვა საკლასო ოთახებს. განსაკუთრებით მიტოს მოწოდებულმა ცნობამ შეაშფოთათ. მე დანამდვილებით ვიცი, — თქვა მიტომ, — ჩვენ ყველანი საცხოვრებელი ადგილის მიხედვით სულ სხვადასხვა სკოლებში დაგვანაწილესო. ამას ოც სექტემბერს შეგვატყობინებენო. მიტოს ცნობა სიმართლეს ჰგავდა და ლუკამაც და მაიკომაც მაშინვე დაიჩერეს. მეტად ეძნელებოდათ ახალსა და უცნობ გარემოში მოხვედრა, თუმცა ამ გარემოს მაინც ჰქონდა ერთგვარი მიმზიდველობა, სწორედ იმიტომ, რომ ახალი და უცნობი იყო.

მერმე მიტო და მაიკო წასასვლელად აიშლებოდნენ. სამივენი ერთად დაეშვებოდნენ კიბეზე, რადგან ლუკა მათ ჰიშკრამდე აცილებდა ხოლმე. დაკრძალვის წინა დამეს მიტო შედარებით ადრე წავიდა, — ხვალ დილით ჩემი უფროსი ძმა ფრონტზე მიდის და რაღაც ვერ ვისვენებო.

მაიკო დარჩა.

პანაშვილი დამთავრდა. მუსიკოსებმა თავიანთი საქმე მოათავეს. გასაოცარი სისწრაფით ჩაალაგეს საკრავები ბუდეებში და თითქმის სირბილით დაეშენენ კიბეზე. ეზოც სირბილითვე გაიარეს. ხალხი დაიშალა, აივნიდან თანდათან ჩაიწრიტა ქვედა სართულსა და ეზოში, საიდანაც მერმე თავიანთ გზას გაუდგნენ. ოთახში კი ჯერ კიდევ ისხდნენ კუბოს აქეთ და იქით, კედლების გასწვრივ ჩამწყკრივებულ სკამებზე ჭირისუფალნი. მახლობლები შუშაბანდშიც ირეოდნენ და ხვალინდელ გეგმებს აწყობდნენ.

მაიკოს აივნის მოაჯირთან მიედგა სკამი და თავისთვის მყუდროდ იჯდა. ლუკა, მანამდე რომ იდგა დაძაბული, სამგლოვიარო მუსიკისა, ქალების კივილის, შეცხადებისა თუ ზარის შემდეგ ოდნავ დამშვიდდა, მაგრამ ახლა უკვე ერთ ადგილზე ველარ ჩერდებოდა. აივანზე დადიოდა წინ და უკან, ხანდახან შუშაბანდს გაივლიდა, ოთახში შეიხედავდა და უკანვე გამობრუნდებოდა.

— ლუკა, — დაუძახა მაიკომ.

ლუკა მოაჯირთან მივიდა და სკამზე ჩამოჯდა.

— დაილაღე?

— არა.

— ისეთი დაღლილი სახე გაქვს...

— რა ვიცი, შეიძლება, დავილაღე კიდევ... მე ვერაფერს ვერა ვგრძნობ.

ფუნქკულიორი განათებული იყო. მთაწმინდის ფერდობზე ტრამვაის ორი ვაგონი ერთმანეთისაკენ მილოლავდა, ერთი ზევით — ქვევით, მეორე ქვევით — ზევით. მილოლავდნენ ერთ ხაზზე ნელა, შეუუმჩნევლად. ასევე შეუუმჩნევლად უახლოვდებოდნენ ერთმანეთს.

— აქედან თურმე ჩვენი ეკლესიის გუმბათიც მოჩანს. — თქვა მაიკომ.

— კი, მოჩანს, — მაშინვე დაეთანხმა ლუკა.

— იცი, რა არის ახლა იმ ეკლესიაში?

— არა.

— საწყობი.

— რისი?

— დეკორაციების.

— რა დეკორაციების?

— ოპერის დეკორაციებს ინახავენ. ჩვენმა მეზობელმა, ერთი მოხუცი კაცია, პენსიონერი, ოპერის ორკესტრში ქართულ ცეკვებს უკრავდა დოლზე, სულ ზეპირად იცის, რომელი რომლისაა. მანქანა რომ შემოხრივინდება, ყველას გასაგონად ამაყად იტყვის „აიდა“ მოვიდაო. ეს „კარმენიაო“, ეს „აბესალომ და ეთერიო“..

თითქოს დაუსრულებლად მილოლავენენ ვაგონები ერთმანეთისკენ, ერთი ზევიდან — ქვევით, ხოლო მეორე ქვევიდან — ზევით, ნელ-ნელა, შეუძმჩნევლად უახლოვდებიან ერთმანეთს.

— შენ დადიხარ, ლუკა, ოპერაში?

— იშვიათად.

— მე თითქმის ყოველ კვირას.

— ყოჩაღ!

— რა, დამცინი?

— არც მიფიქრია.

ლუკას მართლაც არ უფიქრია დაცინვა. ისე ანგარიშმიუცემლად წამოსცდა ეს სიტყვა. მაგრამ ამ სიტყვამ მაიკოს ლაბარაკის გუნება, როგორც ჩანს, წაუხდინა. აივნის კუთხეში, მოაჯირთან მიდგმულ სკამზე მიიკუნტა, ისედაც ერთი ციციქნა, სულ დაპატარავდა.

ვაგონები კი ისევ მილოლავენენ. თანდათან უახლოვდებოდნენ, მერმე მიახლოვებულებმა ერთმანეთს გვერდი აუქციეს. ასე გაიარეს მცირე მანძილი და ისევ ერთ ხაზზე დადგნენ. ერთი ზევით წავიდა, ხოლო მეორე — ქვევით. ვაგონები ახლა უკვე შორდებოდნენ ერთმანეთს, ნელ-ნელა შორდებოდნენ, ისევე შეუძმჩნევლად, როგორც წელან უახლოვდებოდნენ.

— მე წავალ.

— რა თქვი?

— არაფერი. წავალ-მეთქი. — მაიკო წამოდგა და კაბა გაისწორა.

— როგორც გინდა. მაგრამ ცოტახანს კიდევ შეგეძლო დარჩენა.

— არა, წავალ.

— კარგი.

მათ ორივემ ერთად გაიარეს აივანი და ხის კიბეზე დაეშვნენ. მაიკო სწრაფად ჩარბოდა და ლუკამ გააფრთხილა, — მო-

აჯირს არ მიეხეთქო, მორყეულიაო. კიბის საფეხურები თითქმის ზედ პირველი სართულის მოაჯირთან თავდებოდა და მერმე იქვე ხელმარცხნივ იწყებოდა ახალი კიბე, რომელიც პირველ სართულს ეზოსთან აკავშირებდა. მაგრამ პირველი სართულის მოაჯირი არც ისე იყო მორყეული, რომ ვისმე ერთი მიწოლით გადაენგრია მით უმეტეს მაიკოს. მაიკო მოაჯირს სულაც არ შეხებია, მარცხნივ ჩაუხვია და ის კიბეც სირბილით ჩაათავა.

რაღაც ეწყინაო, — ფიქრობდა გუნებაში ლუკა, — ალბათ შეამჩნია, გულისყურით რომ არ ვუსმენდიო. მაინც რას მიაცივდა ფუნჯულიორის ვაგონებს, თითქოს არასოდეს არ ენახა? მაგრამ საქმეც სწორედ ისაა, რომ მას შემდეგ, რაც პატარა ბავშვმა საგნების ერთმანეთისაგან გამორჩევა შესძლო, ამ ბიჭიდან მთაწმინდას შესტკეპროდა და იმდენად შეაჩვია თვალის, — ველარც ამჩნევდა. თუკი ზოგჯერ შეხედავდა, ეს იყო წამიერი თვალის გადავლება, თითქმის მთაწმინდის ფერღობებს ღრუბლის ჩრდილმა გადაურბინა.

მაიკომ და ლუკამ ხის ჭიშკარს გადააბიჯეს და ქუჩაში გავიდნენ. ფანჯრებში უკვე შუქი ენთო. ასიოდე ნაბიჯზე ტელეგრაფის ბოძიდანაც დასციმციმებდა ერთი ნათურა ქუჩას; მიუხედავად ამისა, ქუჩაში მაინც საკმაოდ ბნელოდა.

— ატყობ, ლუკა, როგორ დაცარიელდა ქუჩები?

— კი, ძალიან. — დაეთანხმა ლუკა და მერმე, როცა მაიკომ წასვლა დააპირა, უთხრა, — გაგაცილებ.

— მოსახვევამდე მიმყევი. მერმე აღარ მეშინია. იქიდან უკვე მოჩანს ჩვენი ეზო.

ისინი ნელა მიდიოდნენ, არც ერთი და არც მეორე არა ჩქარობდა. დარაბასთან, სადაც მოხუცი დაბალი ცხოვრობდა, მაიკომ მკლავი გაუყარა ლუკას. ლუკამ, ცოტა არ იყოს, უხერხულობა იგრძნო და როგორღაც შეიბორკასავით, თითქოს ბორკილები დაადეს ხელებზეც და ფეხებზეც. ეჩვენებოდა: კი არ მიდიოდა ჩვეულებრივად, არამედ მიყანყალვებდა. თანაც ცდილობდა, როგორმე ფეხი აეწყო მაიკოს ფეხისათვის და, რაც უფრო მეტად ცდილობდა, მით უფრო ვერ ახერხებდა.

მაგრამ ლუკამ ისიც იგრძნო, რომ ეს მშვენიერი ბორკილი იყო. მიუხედავად ასეთი უხერხულობისა, მაინც დაწყდებოდა გული, მაიკოს რომ ხელი გაეშვა. ეს პაწაწინა, მსუბუქი ხელი

მოულოდნელი, უხილავი ძაფებით აკავშირებდა ამ წრიბა გოგოსთან და უცნაურად კარგ, უფრო ზუსტად, აღსარების გუნებაზე აყენებდა.

ლუკას ეჩვენებოდა, რომ მაიკოსთან არასოდეს არ ჰქონია რაიმე დასამალი და გასაყოფი. ყველა საიდუმლოს უმხელდა, ყველა ფიქრსა თუ გულისნადებს უმქლავებდა. ახლა მდუმარედ მიმავალი ფიქრობდა, — დიდი ხანია მაიკოს აღარ შევხვედრივარ და ბევრი სათქმელი დამიგროვდაო. თქმით მაინც არაფერი უთქვამს. მას აღსარების სურვილი დაებადა, ამისათვის განეწყო კიდევ, მაგრამ ვერაფერი უთხრა, შეიძლება იმიტომაც, რომ არაფერი ჰქონდა სათქმელი.

ასე ხმისამოუღებლად მივიდნენ წყალსაწივის ქუჩამდე, საიდანაც უკვე მოჩანდა ოპერის გარდერობად ქცეული ეკლესიის გუმბათი. მაიკო შეჩერდა და ლუკას უთხრა:

— ახლა მე წავალ.

— ბარემ ეზომდე მიგაცილებ.

— არა, არა, აქედან უკვე აღარ მეშინია. — თქვა მაიკომ და დაუმშვიდობებლად გაიქცა. წყალსაწივის ქუჩა გადასჭრა და მერე სიბნელეში გაუჩინარდა.

ლუკა გამობრუნდა. ახლა უკვე ჩქარი ნაბიჯით ბრუნდებოდა შინ. მოხუცი დაბადის დარაბასთან შეყოვნდა და გაიფიქრა, — ნეტავი რას იტყოდნენ ანდუყაფარი ან მიტო, მაიკოსთან ასე მკლავგაყრილი ქუჩაში მოსეირნე რომ დავენახე. ანდუყაფარი არ იცოდა, რას იტყოდა, ხოლო მიტო ნამდვილად შეუყრიდა სკოლას, მთელს ქვეყანას მოსდებდა ამ ამბავს და მერმე რა გაუძლებდა ამხანაგების ორჭოფულ შეკითხვებსა და დაცინვას. ისე კი, კაცმა რომ თქვას, ცოტათი სასაცილო იყო, ამ ნახევრად ბნელ ქუჩაში დიდებივით მკლავგაყრილი სეირნობა.

როდესაც ეზოში შესასვლელი გვირაბი გაიარა და თავისი სახლისკენ გაუხვია, ძია ლადოს ხმა გაიგონა. ძია ლადო ცაახვის ქვეშ მერხზე იჯდა ცალი ხელით მაგიდას დაყრდნობილი.

ლუკამ მიმართულება იცვალა, ძია ლადოსთან მივიდა.

— დაჯექი. — უთხრა ძია ლადომ.

ლუკა მორჩილად დაჯდა.

— როგორა ხარ?



— არა მიშავს რა, ძია ლადო, გმადლობთ.

— ტანსაცმელი შეიტყაპუნა იმ ოხერმა.

— კი.

— ბევრი ოხერი დადის ამ ქვეყანაზე. ძნელი კია, მაგრამ კაცი მაშინა ხარ, როცა შეგიძლია ოხრების გამორჩევა... მეც ბევრი შემხვედრია ეგეთი.—ძია ლადო მცირე ხნით გაჩუმდა და მერე მოულოდნელად ჰკითხა ლუკას. — შეგიძლია ხვალ ექვს საათზე ადგე?

— შემიძლია, ძია ლადო.

— მართლა?

— კი, ძია ლადო, მე ახლა თითქმის არც მძინავს.

— უნდა დაიძინო... ბავშვისთვის უძილობა არ შეიძლება! ახლა წადი, გათენებისას აქ გელოდები, არ დამაღალატო, სათევზაოდ უნდა წავიდეთ, შენ არ გაგაღვიძებდი, მაგრამ, რას იზამ, დამხმარე კაცი ვერ ვიშოვნე, ყველა წასულია... ძალზე მურღალი ომია.

სხვა დროს ასეთი ნდობა ლუკას ალბათ ისევე გაუხარდებოდა, როგორც მაშინ გაუხარდა, მაგრამ ხვალ დეიდა ნუტას დაკრძალვის დღე იყო და სათევზაოდ წასვლაზე რალაცნაირად გული ეთანანდრებოდა.

— იცი, რა ლუკა? თევზი მაინც საჭიროა ქელეხზე. ერთ ორ საათში საკმაოდ დავიჭერთ. მოხარშვით კი მე მოვხარშავ.

## თავი მემკვსა

ლუკას მთელი დამე მართლა არ სძინებია. ბორგავდა, წვალლობდა, ხანდახან წასთვლემდა. წათვლემილს შიშველი მთვარისა ესიზმრებოდა. ოღონდ მთვარისა ახლა რკინის გისოსებში გამოსვლას როგორღაც ახერხებდა და ორივენი, მთვარისა და ლუკა, მკლავებგაყრილები დასეირნობდნენ სააედამყოფოს ეზოში. აუზი ლურჯი, გამჭვირვალე წყლით იყო სავსე და შიგოქროს თევზები დასრიალებდნენ.

უცნაური შინაგანი ბიძგი აღვიძებდა. მერმე ისევ თვლემამოერეოდა და ახლა უკვე ლურჯ კრიალა აუზში ოქროს თევზების ნაცვლად ლუკა და მთვარისა დაცურავდნენ.

სიზმრისეული აუზი, როგორც ჩანს, გაცილებით დიდი იყო,

ვიდრე ის, საავადმყოფოს ეზოში რომ ნახა — ამომშრალი და დანაგვიანებული. ანდა სიზმარში თვითონ პატარავდებოდნენ, რადგან აუზში მთვარისას ცურვით დასდევდა და ვერ იჭერდა. მაგრამ ეს დევნა, თუ ლტოლვა მთვარისასაკენ წარმოუდგენელ, ჯერ განუცდელ ნეტარებას ანიჭებდა. მთვარისა წყალში თევზივით დასრიალებდა, თან ამბობდა: რა ბედნიერებაა მთვარეში ბანაობა... ეს ხომ მთვარეა, ბიჭო, ჩვენ, მთვარეში დავსრიალებთო...

— რა მოგივიდა, ლუკა?! თუ გინდა, სინათლეს ავანთებ? — ეს ანდუყაფარის ხმაა.

— რა ვიცი. — ბუტბუტებდა ლუკა.

— ავანთო?

— როგორც გინდა.

— დაიძინე... დაიძინე...

— არა მძინავს და მაინც სიზმრებს ვხედავ.

— ალბათ წაგთვლიმა. სიზმარს რა უნდა, ერთი წამი. ორი-ოთხ წამში მთელი ეპოქის ნახვა შეიძლება.

არც უცდია ლუკას ამის დაჭერება, არც წინააღმდეგობა გაუწევია. უძილობითა და უძილო სიზმრებით გაბრუებულმა გაიფიქრა, — ალბათ ასეა, რადგან ამას ანდუყაფარი მეუბნებაო. იგი უკვე მესამე ღამე იყო, ანდუყაფარის ოთახში წვებოდა დასაძინებლად. ლოგინს ძველ, კრიალა ტახტზე იშლიდა, რომელიც ოთახის შორეულ კუთხეში იდგა მივიწყებული, წელიწადი ისე გაივლიდა, ზედ არავინ დაჯდებოდა.

— რა ნახე, რა დაგესიზმრა?

— რა ვიცი.

— ყველაფერზე „რა ვიციის“ როგორ ამბობ?

— მთვარისა დამესიზმრა, ვითომ აუზში ვბანაობდით... მე დასაჭერად დავდევი...

— ჰოო?! — თქვა ანდუყაფარმა და გაჩუმდა, დიდხანს არ ამოუღია ხმა. მერმე სიბნელეში ისევ გაიგონა ლუკამ ანდუყაფარის ხმა: — ხშირად ფიქრობ მთვარისაზე?

— არა... არც ისე...

— ლუკა, ნუ გინდა, მოეშვი მთვარისაზე ფიქრს.

— სულაც არ ვფიქრობ... ხანდახან გამახსენდება ხოლმე.

— ლუკა, მოდი, ნულარ იფიქრებ, საწყალი, სულით ავადმყოფია და ასეთ ავადმყოფზე ფიქრი, მკრეხელობაა. შენ იცი, რას ნიშნავს „მკრეხელობა“?

- ვიცი. — უპასუხა ლუკამ კარგა ხნის ყოყმანის შემდეგ.
- ამიტომაც აღარ იფიქრო მთვარისაზე.
- მე ცუდს არაფერს ვფიქრობ.
- დამიჯერე, ლუკა. მე ვიცი, რასაც ფიქრობ და როგორ

ფიქრობ.

ლუკას სახეზე ცეცხლი შემოენთო. კიდევ კარგი სიბნელეა და არა ვჩანვარო, — გაიფიქრა. მერმე გაიტრუნა და დიდხანს იწვა ლოგინში ასე გატრუნული. — ვითომ მძინავსო, — ანდუყაფარს ატყუებდა.

— ცოდვას სულით ავადმყოფზე ასე ფიქრი. გესმის ჩემი, ლუკა!

- კი, მესმის.
- მომეცი პირობა, რომ აღარ იფიქრებ.
- კარგი, აღარ ვიფიქრებ.
- ეცადე.
- გითხარი, აღარ ვიფიქრებ-მეთქი. — ჯიუტად გაუმეორა

ლუკამ.

— შენ თვითონ არ იცი, როგორი ბიჭი ხარ, ლუკა.

— რომელი საათი იქნება?

— ალბათ სამი. დაიძინე.

— ექვსზე უნდა ავდგე... კი არ უნდა ავდგე, უკვე ეზოში უნდა ვიყო.

— მით უმეტეს, გამოუძინებელი ხომ ვერ წაჰყვები სათევზაოდ.

— კარგი კაცია, არა, ძია ლადო?

— იშვიათი. ძალიან მძიმე ცხოვრება აქვს გადატანილი. სხვა მაგის ადგილზე გაბოროტდებოდა, დაიბოლმებოდა... საკვირველია, როგორ შეინარჩუნა მაინც ესეთი კეთილი გული.

დილის ექვს საათამდე ლუკამ თავი მოიკატუნა. ანდუყაფარს მოაჩვენა, ვითომ ტკბილად და უდრტვინველად ეძინა. სინამდვილეში თვალის არ მოუხუჭავს. იგი ამ საუბრის შემდეგ როგორღაც დამნაშავედ გრძნობდა მთვარისას მიმართ თავს, მიუხედავად იმისა, რომ ანდუყაფარის საყვედური სამართლიანად არ ეჩვენებოდა.

ექვს საათზე კი ლუკა უკვე ეზოში, ცაცხვის ქვეშ უცდიდა ძია ლადოს.

ჯერ ისევ ბნელოდა.

დიდხანს არ დასჭირვებია ლოდინი. ძია ლადო მაშინვე გადმოდგა პირველი სართულის აივანზე და ლუკას დაუძახა. ძია ლადომ რკინისკაპიანი ჭოკი და ნიჩაბი გადმოაწოდა, — შენ ესენი წაიღეო.

ლუკამ ჭოკი ეზოდან რიყეს მიუწვდინა და აგურის კედელზე მიაყუდა, ხოლო ხის ნიჩაბი, იმის შიშით არ გამიტყდესო, გაჭირვებით ჩაიტანა. აგურის კედელზე ჩაცოცება უნიჩბოდაც ეძინებოდა.

ეზოს კიდეს ცოტა ხანში ძია ლადოც მოადგა ვეებერთელა ვედროიანად. რაღას უცდი, ეგენი ნაეში ჩაყარეო, ჩაპოსძახა ზემოდან.

ძია ლადოს ღამით ნაპირზე ამოეთრია ნავი. ლუკამ ნიჩაბი და ჭოკი ნაეში მოისროლა, მერმე ნავის ქიმს დაეჯაჯგურა, მაგრამ ძვრა ვერ უყო. სანამ ძია ლადო მოვა, ამ ჯაჭვს მაინც შევხსნო, — გაიფიქრა და აზარმაცს ჯაჭვი შემოხსნა.

ძია ლადომ ჯერ ნავის უკანა ქიმი შეაცურა მდინარეში, შემდეგ ლუკას უთხრა: გამეცალეო და წინა ქიმს ჩაავლო ღონიერი ხელები. ნავი რიყის ქვებზე ხრიალ-ხრიალით გასრიალდა და მდინარეში შეცურებულმა ტორტმანი იწყო. ლუკა ძია ლადოს კი მოეცალა, მაგრამ ჯაჭვისთვის ხელი არ გაუშვია, ორივე ხელით ჩაებლაუჭა, ნავი მტკვრის დინებას რომ არ გაეტაცა.

ძველი მეთევზე ნავზე გადავიდა და ვედრო გადაიტანა. ლუკას ანიშნა, შენც გადმოდო და რკინისკაპიანი ჭოკი მოიმარჯვა. ლუკა წინა ქიმთან მოკალათდა და ნავი დაიძრა ნაპირ-ნაპირ, მტკვრის დინების საწინააღმდეგოდ.

ლუკამ მეორე სართულის აივანს ახედა, ელექტროშუქით გაჩახჩახებულ აივანზე არავინ ჩანდა. ჯერ ყველას ეძინა. როცა ოთახიდან გამოვიდა, ანდუყაფარი მშვიდად, უდრტვინველად მიძინებული დატოვა.

ძია ლადო მთელი ძალით აწვებოდა ჭოკს და ნავი მარჯვედ მიჰყავდა ზედ ნაპირის გასწვრივ. ავტოსკოლის გარაეის წინ ნავს სწრაფად და მკვეთრად უცვალა მიმართულება და შუა მდინარეში შეაცურა. ლუკამ ამასობაში თოკის ერთი ბოლო ნავის ქიმზე მიხრახნილ ლითონის რგოლში გაუყარა და განასკვა.

გაღმა გავიდნენ, ბაბოს კედლის პირდაპირ, სანაპიროს ჯე-

ბირთან ამოზიდულ პატარა ნაპირზე. ლუკამ არ იცოდა, რატომ ერქვა ან რატომ იყო ის კედელი მიინცდამაინც ბაბოსი. ის კი იცოდა, მდინარეში შეჭრილ ამ აგურის სქელ კედელსა და სხვა მის მსგავს კედლებზე უმსხვილესი ჯაჭვებით წყლის წისქვილები იყო ძველად გამობმული. ერთ-ერთი ლუკასაც კარგად ახსოვდა, არც ისე დიდი დრო გავიდა მას შემდეგ, რაც სტეფანეს წისქვილი წყალდიდობამ იმსხვერპლა.

— სიბნელეში ვერ შევამჩნიე, მტკვარი ცოტათი მოდიდებულა, — თქვა ძია ლადომ, — ცუდია, დაიმახსოვრე, მტკვარი რომ მოდიდდება, თევზი ძველი გზით აღარ მოდის, ერთსელ არჩეულ გზას ჰკარგავს, თუმცა ახლა არც ისე მოუმატებია, შინ ხელმოცარულნი რომ დავბრუნდეთ.

როდესაც ძია ლადომ პირველად ბადე გაშალა, ცამ ფერი იცვალა, გაბაცდა. უკვე თენდებოდა. პირველ ნასროლს სამი საჰანრე და ერთი მურწა ამოჰყვა. ბადის სროლისას ძველი მენავე ლუკას ასწავლიდა, როგორ მოქცეულიყო და ლუკაც დიდი მონდომებით ასრულებდა თავის მოვალეობას: თოკს მიუშვებდა, ნავი მტკერის დინებას დაჰყვებოდა და, როცა ძია ლადო ეტყოდა, — კმარაო, — ლუკა თოკს ლითონის რგოლში ამოუყრიდა და ორივე ხელით დაეჭიდებოდა. სანაპიროს ჯებირზე გამობმული თოკი დაიჭიმებოდა და ნავი ჩერდებოდა.

ძველი მეთევზე მარცხენა ხელში ისევ აკეცავდა ბადის ჰერს, ჯიბეებს ზემოთ გაყრილ ტყვიის ბურთულებიან თოკს კბილებით დაიჭერდა და ღონის მესამედს მარჯვენა ხელით აკრეფდა. მერმე ერთი წამით შეყოვნდებოდა, თვალით მოზომავდა მდინარის იმ მონაკვეთს, რომელზედაც ბადე უნდა დაეფარებინა. მარჯვენა მკლავს მოიქნევდა, გაშლილი ბადე გაიბრწყინებდა და შხუილით დაეფარებოდა მდინარეს.

მკრთალად განათებულ ცის კიდეზე თანდათან გამოიკვეთა ერთმანეთს მიჯრილი ძველი სახლების საკვამურებიანი სახურავები. სივრცეში აისვეტა გაუქმებული ეკლესიის მაღალი ყელი და გუმბათი. მდინარეც შეუმჩნევლად იცვლიდა ფერს, ნელ-ნელა უბრუნდებოდა ოდნავ შემღვრეული მომწვანო ფერი.

ნავში დროდადრო გროვდებოდა ბადეს ამოყოლილი წყალი. ლუკა ამ წყალს უკანვე უბრუნებდა მდინარეს. ნიჩბით

წყლის ამოხაზვა განსაკუთრებულ სიამოვნებას გვრიდა ლუკას.

თევზაობისას ხშირად გახედავდა ხოლმე თავის ეზოსა და აივანს. აივანზე, კარგა ხანს არავინ გამოჩენილა. მალე ანდლუყაფარი მოადგა თავისი სავარძლით მოაჯირს, თვალს ადევნებდა თევზაობას. ლუკას ხელითაც კი ანიშნა, — რა ჰქენითო?, ბლომად დავიჭირეთო — ღელის ქნევითვე დაამშვიდა ლუკამ. მერმე ანდლუყაფარი ისევ გაქრა. ახლა უკვე სხვები გამოჩნდნენ. ელექტრომუქით გაჩახჩახებულ აივანზე დაბორილობდნენ, დაფუსფუსებდნენ, ერთმანეთში ირეოდნენ, რალაც-რალაცები გაჰქონდ-გამოჰქონდათ. ერთი სიტყვით, აივანმა საქმიანად გაიღვიძა.

— კარგი ფეხისა ყოფილხარა — უთხრა ლუკას ძველმა მეთევზემ, როდესაც უკნვე გადმოსჭრეს მტკვარი და ნავი ძველ ადგილზე დააბეს. — მეც კარგ ხელზე გავშალე ბადე, რას იტყვი?

ლუკას რა ჰქონდა სათქმელი, თევზი მართლაც ბლომად დაიჭირეს და ახლა შინ ისე ბრუნდებოდა, როგორც ნაჯაფარი და დიდი მოვალეობის წინაშე ვალმობილი კაცი. თევზი ძია ლადომ შინ წაიღო მისახარშად. თავიდან შეხებამდე გაწუწული ლუკა კი სირბილით აუყვა კიბეს, ფეხსაცმელები წყლით გავსებოდა და ქყაპა-ქყუპი გაუდიოდა. აივანზე ასულს პირველად ბატონი პოლიკარპე შეეფეთა, თითებში პაპიროსგაჩრილი ასანთს დაეძებდა. ასე გაწუწული ლუკა რომ დაინახა, ჯერ შეიცხადა. — რას გავს ეს უპატრონოო მერე კი ლუკას მიუბრუნდა და დაყვავებით უთხრა — სად მოასწარი, ბიძია, ამ დილაადრიან... წადი, გამოიცვალე ტანსაცმელი, მალე ხალხი მოვა და სირცხვილიაო... საგარეო ჩაიცვიო — ესეც დასძინა.

ლუკამ ანდლუყაფართან შეაბოტა ქყაპა-ქყუპით. სველი ტანსაცმელი გაიხადა და „საგარეოდ“ გამოწყობას შეუდგა. ანდლუყაფარს ფანჯარასთან მიეგორებინა თავისი სავარძელი და წიგნს კითხულობდა. ლუკას შესვლისთანავე წიგნი ლოგინზე მოისროლა.

- შენი ადგომა ვერ გავიგე, ეტყობა, მაგრად მეძინა.
- კი, კარგად გეძინა.
- დაიჭირეთ რამე?

— ბევრი, ძია ლაღომ თქვა, მტკვარი ცოტათი რომ არ იყოს მოდიდებული, უფრო მეტს დავიჭერდითო.

— ძია ლაღომ თავისი საქმე იცის.

— ერთი ეგრე ვიცოდე ბაღის გაშლა და მეტი არაფერი მინდა.

— ხომ არ შეგცივდა?

— არა, სულ არ ციოდა. !

— ისე კი კარგად გაწუწულხარ.

— ამ ფეხსაცმელებს რა ვუყო, არ ვიცი.

— რა დაემართა?

— დამისველდა. როგორმე უნდა გავაშრო.

— სხვა არა გაქვს?

— არა.

— რაც გქონდა სხვას გაატანე და რა შეგრჩებოდა. — ანდუყაფარმა ხელების მოძრაობით მოაბრუნა სავარძელი და ტანსაცმლის კარადას მიადგა. მერმე ასევე სწრაფად გადაიხარა, გამოაღო ქვედა უჯრა, რომელიც ჩვრებითა თუ გაცვეთილი ტანსაცმლით იყო გამოტენილი. ანდუყაფარი დიდხანს უთავბოლოდ იქექებოდა. მერმე სიღრმიდან ცალი ფეხსაცმელი გამოაძვრინა და ლუკას ესროლა. — აბა, ნახე, იქნებ ჩაგეტიოს ფეხიო.

ლუკამ ფეხსაცმელი გადაატრიალ-გადმოატრიალა და ფეხზე მიიზომა. ანდუყაფარი მხარს უკან მისჩერებოდა.

— უნდა ჩამეტიოს. — თქვა ლუკამ.

ანდუყაფარმა მეორე ცალიც გამოაძვრინა უჯრის სიღრმიდან და თავის სავარძლიანად მისრიალდა ლუკასთან.

— ჩემი ბავშვობის ფეხსაცმელებია. მე უფრო გაცვეთილი მეგონა, თუმცა რა გაცვეთდა, მე ხომ მაგით არც მივიღია, უბრალოდ დამიპატარავდა.

ლუკა „საგარეოდ“ გამოეწყო. თუმცა რა „საგარეოდ“ ეთქმოდა, შარშან ზაფხულში ნაყიდ, უკვე საკმაოდ გაცვეთილს, დამოკლებულსა და დავიწროებულ შარვალსა და პერანგს. მიუხედავად ამისა, ეს ძონძები საგულდაგულოდ დაეუთოვებინათ (ემამ დაუუთოვა, ჯუჯა რუბენა ნალბანდიშვილის დამ),<sup>1</sup> ეტყობოდა, მთელი წლის მანძილზე ერთსაც და მეორესაც მრავალი მძიმე წუთი ჰქონდა გადატანილი, განსაკუთრებით შარვალს. ნაცრისფერი მაუღის შარვალი მუხლებსა და საჯ-

დომზე საკმაოდ შეცრეცილ-შელახულიყო და მელნის გარდა ბევრგან დამჩნეოდა გაურკვეველი წარმოშობის ლაქა. რას იზამდა. ახლები ჭორფლიან ალბერტს საკუთარი ხელით ჩააბარა — კოხტად და სათუთად დაკეცილი. ყველაზე უკეთ ანდუყაფარის ნახმარი ფეხსაცმელები გამოიყურებოდა. თუ არაფრად ჩავაგდებდით იმას, რომ ფეხსაცმელებიცა და ლუკაც ამქვეყნად ერთ წელს იყვნენ მოვლენილნი.

აივანზე უამრავი ხალხი ირეოდა. მაგრამ ყველასგან დაუცხრომელი საქმიანობით მაინც ბატონი პოლიკარპე გამოირჩეოდა. განკარგულებებსა და რჩევა-დარიგებებს უხვად იძლეოდა. გამწარებული არბოდა და ჩამორბოდა კიბეებზე. ეზოში უკვე ცეცხლი დაენთოთ. უზარმაზარ ქვაბებში ქორვაჭრებისაგან მამასისხლად ნაყიდი ლობიო და ბრინჯი იხარშებოდა. იქვე ონკანთან ირეცხებოდა და ხარისხდებოდა ათასნაირი მწვანილი.

ნათესავეების ერთმა ნაწილმა, აღმოსავლურმა შტომ, წინადადება შემოიტანა, ცხვარი დაეკლათო, მეორემ — დასავლურმა, ქვა ააგდო და თავი შეუშვირა, — რას პქვია, ცხვარი დაეკლათო! ორმოცამდე ხორცის ქამა ვის გაუგიაო. ამ უკანასკნელთ ბატონი პოლიკარპე სარდლობდა და ბრძოლა რა თქმა უნდა, დასავლეთ საქართველომ მოიგო, რადგან თავად დეიდა ნუცა იქაური გახლდათ. როგორც ჩანს, წარმომავლობას გადამწყვეტი მნიშვნელობა მიენიჭა.

ბატონი პოლიკარპე ხმამაღლა, აღმოსავლეთ საქართველოს გასაგონად წუხდა: აი მაგ თქვენი ცხვრის ფულით თევზი რომ გვაშოვნინა, სუფრას ის დახატავდაო. ლუკას უნდოდა ეთქვა, — თევზი იქნებაო, — მაგრამ თავი შეიკავა. ბატონი პოლიკარპე ისე იყო საქმით გართული, მაინც არ მოუსმენდა და გინდაც მოესმინა, ძალზე ექვიანი კაცი ჩანდა, არ დაუჯერებდა. ამ ფაცა-ფუცში გადიოდა დრო. ბოლოს ლუკას უთხრეს. პანაშვიდი იწყება და შენს ადგილზე დადექიო. ლუკამ, ვიღრე თავის ადგილზე დასადგომად წავიდოდა, ეზოში მომავალ მაიკოს მოჰკრა თვალი და რაღაცნაირად გუშინდელზე და გუშინწინდელზე უფრო მეტად გაუხარდა მისი დანახვა.

ლუკა კუბოს თავთან დააყენეს სხვა მახლობელ ჰირისუფალთა გვერდით. ბატონი პოლიკარპეც იქვე იდგა. გუშინ ანდუყაფარმა იკითხა: — ვინ არის ეგ პოლიკარპე, რა ამაზრზე-



ნი ტიპიანო. ლუკამ არ იცოდა, რა ნათესავად ერგებოდა და ვერაფერი უპასუხა. თვითონვე უკვირდა, — თუ ასეთი ახლო ნათესავი და ჭირისუფალი გვყავდა, ნეტავი აქამდე რატომ არ ჩანდაო?

ოთახში შეგუბებული, სულის შემხუთავი სუნი იდგა, ნელსაცხებლების, წამლებისა და მიცვალებულის ყვავილთა მოტკბო სურნელით გაზავებული.

პანაშვიდზე მხოლოდ დეიდა ნატო ტიროდა მიცვალებულსაც და ლუკას დედასაც, თითქოს ერთის ნაცვლად ორი კუბო მდგარიყო. ერთმწკრივად დაწყობილ მოსამძიმრეთა შორის მაიკოც გამოჩნდა. დაღვრემილი მოდიოდა, პატარა, ერთი ციკქნა. ლუკას ხელი ჩამოართვა, მერე თითის წვერებზე აიწია და ლოყაზე აკოცა. მაიკო წავიდა და გულისაწრევად შეხუთულ ოთახში მოულოდნელი სიგრილე და ახალდაბანილი, ჩვილი ბავშვის სუნი დატოვა.

ბოლოს და ბოლოს პანაშვიდი დამთავრდა და შინიდან ყველა გარეთ გამოისტუმრეს. ოთახში დარჩენილი მამაკაცები კუბოს სამჯერ შემოატრიალებდნენ და მერმე სამჯერ მიაჯახუნებდნენ დაგმანულ კარს. ეს წესი, როგორც ჩანს, მიცვალებულს იოლად აუგეს. მთავარი სიძნელე ჯერ გადაულახავი იყო და წინ ელოდებოდათ.

მართლაც კიბის სივიწროვის გამო ძალზე გაკვირდა კუბოს ჩატანა. ბატონი პოლიკარპეს მოხერხებულობა და სიმარჯვე რომ არა, ვინ იცის, როგორ დამთავრდებოდა ეს ყველაფერი. კუბოსა და მოაჯირს შორის რამდენიმე კაცი გაიკედა და კუბოს ძვრა ვერ უყვეს. ხალხი აყაყანდა და ატყდა ჩოჩქოლი. კიდევ კარგი, ეს ჩოჩქოლი და ყაყანი უცებ დაახშო ცაცხვის ჩრდილში შეყუყულმა სასულე ორკესტრმა, რომელმაც გაშმაგებით დასცხო შოპენის სამგლოვიარო მარში.

ბატონი პოლიკარპე გადაირია. ოფლად გახვითქულმა რამდენიმე კაცის დახმარებით კიბეზე გაქედნილთა მხრები მშვიდობიანად გადაიარა და კუბოს ქვემოდან მოექცა. ახლა იქიდან შეუტია, — რამსიმძიმეა ეს შობელძალიო, — და კუბო რაღაც მანქანებითა თუ სასწაულით დასძრა კიდევ.

ქუჩაში ბალდახინი იდგა. საწყალი დეიდა ნუცა ბალდახინზე დაასვენეს და პროცესია ფეხით გაუდგა გზას სასაფლაოსკენ. ჰაერი არ იძვროდა, ცხელოდა. წინ მიმავალი ბალდა-

ხინის ცხენები საშინელ მტერის ბულში ხვევდნენ ქუჩასაც და ჰირისუფლებსაც. ლუკა ჯერ მარტო მიდიოდა, მერმე მაიკო და მიტო ამოუდგნენ აქეთ-იქიდან. ამან თუ ახლა მკლავი გამიყარა, ხვალ მიტოს დაცინვას რა გაუძლებსო, — გაიფიქრა ლუკამ, მაგრამ მაიკოს, როგორც ჩანს, მკლავის გაყრა არც კი გაუვლია გუნებაში.

ლუკას ცუდი სიზმარივით ახსოვს ეს გაუთავებელი, ცხელი და მტერიანი გზა: სვანეთის უბანი, კუჯიის სასაფლაომდე მიმავალი, ვიწრო, მზით გახურებული ქუჩები. აივნებსა და ფანჯრებზე გადამდგარი ხალხის ცნობისმოყვარე სახეები და სასულე ორკესტრი, რომელიც გარშემო ყველაფერს აყრუებდა.

მიტო და მაიკო გვერდიდან არ მოშორებიან, უხმოდ მიჰყვებოდნენ. ასევე უხმოდ მიაცილეს იგი სასაფლაომდე. სასაფლაოზე ხალხი სწრაფად გაიშალა და გაიფანტა. დაღლილებმა და სიცხისგან გასაავათებულებმა კიპარისების ჩრდილებს შეაფარეს თავი. ლუკას ყოველთვის გული უღონდებოდა, როდესაც კუბოს მიწა ეყრებოდა ხოლმე, ამჯერად ამ ხმის გაგონებას მოერიდა, გაიპარა და უცხო საფლავებს შორის კარგა ხანს იარა. ბოლოს, როცა გადაწყვიტა, — ის ხმა აქამდე ვეღარ მოაღწევსო, — შეჩერდა და ბუჩქებს მოეფარა.

უძილო ღამისა, თევზაობისა, პანაშვიდისა და გაუთავებელი და ცხელი გზისაგან უკვე ისე იყო დაქანცული და დარეტიანებული, რომ ფეხზე დგომა აღარ შეეძლო, დაუმთავრებელი თუ მიტოვებული საფლავის ცოკოლზე ჩამოჯდა. ჰირისუფლებს ახლა უკვე ვეღარ ხედავდა, სასულე ორკესტრის ხმაც საკმაოდ შორიდან ისმოდა. ლუკა, ეტყობა, დიდხანს იჯდა განმარტოებული, რადგან აქ ჯდომა მოსწყინდა კიდევ. ადგომის თავი აღარ ჰქონდა, ახლა უკვე თვლებმა მოერიო...

ლუკამ წინდაწინვე იცოდა, რომ ალაყაფის კარი ღია დახვდებოდა და, როცა საავადმყოფოს მიუახლოვდა, კარი, მართლაც, ღია აღმოჩნდა. დაუბრკოლებლად შევიდა მთვარის შუქით განათებულ ეზოში. ნაცნობ ფანჯარას ჩაუარა და აუზთან შეჩერდა. აუზსაც ეღვრებოდა მთვარის ნათელი და ოქროსფრად ლივლივებდა. ლუკა უცებ შეკრთა. სხეულით იგრძნო, რომ გისოსებიან ფანჯარას მთვარისა მოადგა. სწრაფად მიბრუნდა და გარკვევით დაინახა წყვდიადიდან გამოსული ფიშველი, ოქროსფერი სხეული. მიძინებული ლუკა გრძნობდა

და არა მარტო გრძნობდა, დანამდვილებით იცოდა, რომ ეს ყველაფერი სიზმარი იყო, რომ ახლა მთვარისას სიზმარში ხედავდა და გაკვირვებული ფიქრობდა: ნეტავი, რატომ მესიზმრება ახლა მთვარისა, მე ხომ ანდლუყათარს პირობა მივეცი, არ ვიფიქრებდი მთვარისაზე და მთელი დღე ისე გავიდა, მართლაც, არ გამხსენებიაო. ვიდრე ძილში ამას ფიქრობდა, მთვარისა გისოსებიანი ფანჯრიდან გადმოვიდა და ლუკასკენ გამოეშურა. მშვიდი და ნეტარი ღიმილი ეფინა სახეზე. ამ ნეტარებას ალბათ ლუკას ხილვა ანიჭებდა. ლუკა აღელდა. ათრთოლებულ გულს უცნობი გრძნობის თბილი ტალღა მიეხეთქა და მთელ სხეულში ქრუანტელის მომგვრელ შხეფებად განიბანა. მთვარისა მივიდა, ორივე ხელი მოხვია ლუკას...

— ლუკა!

ლუკამ ძილშივე იცნო მაიკოს ხმა და ისეთ გუნებაზე გაედვიძა, თითქოს დანაშაულზე წაასწრეს.

— სად დაიკარგე, ლუკა!

— რა ვიცი, არ შემიძლო იქ დგომა.

— რამდენი გეძებე, დავიღალე.

— მოდი, ჩამოჯექი.

— რა დროს ჩამოჯდომაა, ნახევარზე მეტი ხალხი წავიდა.

— წავლენ, მაშ რას იზამენ, აქ ხომ არ დარჩებიან?.. მე არ მომიკითხეს?

— კი. განსაკუთრებით ერთი მელოტი გეძებდა. ძალიან გაბრაზდა: ეგეთი უზნეო და უხეირო ბავშვი ჩემს სიცოცხლეში არ მინახავსო. საკუთარ დეიდას არ უნდა დამშვიდობებოდაო, ხვალაც ნახავს, თუ რაო!

— პოლიკარპე იქნებოდა.

— ვინ არის ეს პოლიკარპე.

— რა ვიცი... პირველად ვხედავ. მოდი, დაჯექი. — ისევ შესთავაზა ლუკამ.

მაიკოც იქვე ჩამოჯდა ცოკოლზე. ლუკას გვერდით.

— სწავლა მაინც დაიწყოს მალე, მომწყინდა სულ სახლში ყოფნა. — თქვა მაიკომ.

— მეც მომწყინდა. — ლუკა ისე აკვირდებოდა ამ პატარა, შავგვრემან ვოგონას, თითქოს პირველად ხედავდა. ნეტავი გაიზრდება, თუ სულ ასეთი პატარა დარჩებაო. — ფიქრობდა თან.

მზე დასავლეთისკენ წასულიყო და საფლავებზე კიპაროსების წაგრძელებული ჩრდილები ესვენა. ლუკას ახლახან გაახსენდა, რომ წედან ისევ დაესიზმრა მთვარისა და გუნება შეეცვალა. ეჩვენებოდა, თითქოს ყველასაგან დაფარულად დანაშაულს ჩადიოდა. მის ცნობიერებაში ახლა ერთი სიტყვა ამოტივტივდა, რომლის მნიშვნელობა მან კარგად არ იცოდა, მაგრამ ალღომ და იმ ღამით ანდუყაფართან შექმნილმა მდგომარეობამ აგრძნობინა, თუ მიახვედრა, „მკრეხელობა“ ამას და ამას უნდა ნიშნავდესო. შესაძლოა, ამის გამოც მოატყუა ანდუყაფარი, როცა უთხრა, ვიცი, რასაც ნიშნავს ეგ სიტყვაო. ასე იყო, თუ ისე, მის არსს კარგად ვერ ჩაწვდა და ეს ბოლომდე ვერგაგებული სიტყვა შიშის ზარს სცემდა.

— ძალიან შემეცოდა დეიდაშენი, — დაარღვია ღუმილი მაიკომ, — სულ მარტო დარჩა...

— მეც ძალიან მეცოდება.

— ამბობენ, ტყუპებს განსაკუთრებით უყვართო ერთმანეთი.

— ეტყობა, ეგრეა.

— ძალიან შემეცოდა. — მაიკოს დიდ თვალებში ცრემლი დაუგუბდა და თავი გვერდზე მიაბრუნა, ალბათ ლუკამ არ დაინახოსო.

ლუკა ახლოს მიუჩოჩდა მაიკოს. ისე ახლოს, რომ მკლავზე მისი მხარის შეხება იგრძნო. გადაიხარა და ფრთხილად, თითქოს მტვერს სულს უბერავსო, ლოყაზე აკოცა. ლუკამ გარკვევით დაინახა, ჩითის კაბის საყელოდან როგორ ამოცურდა სიწითლე. ეს მუხთალი სიწითლე ჯერ ყელს მოეკიდა და მერმე მთელ სახეს უცებ შემოენთო. მაიკოს ხმა არ ამოუღია, არც განძრეულა, იჭდა გბუუსუნებულნი.

ლუკამ მეორედაც აკოცა მაიკოს. მაიკო ამჯერად წამოდგა და მკაცრად მოხედა ლუკას. თვალებში ისევ ცრემლი ჰქონდა დაგუბებული, ჯერ არ შეშრობოდა. ლუკაც წამოდგა, რალაც უნდოდა ეთქვა და ენა დაება. მაიკომ ამდენი არ აცალა. გატრიალდა და წავიდა. ნელი ნაბიჯით მიდიოდა საფლავებს შორის, თავდახრილი და დაფიქრებული ლუკა მორჩილად მისდევდა უკან.

შეთანხმებულებივით შეჩერდნენ დეიდა ნუცას საფლავთან. ახალ საფლავზე ცოცხალი და ხელოვნური ყვავილების

გვირგვინები ეწყო. გარშემო კაციშვილი არ ჩანდა. ეტყობა, დიდხნის წასულები იყვნენ. მერმე მაიკომ და ლუკამ ეს საფლავიც უსიტყვოდ დატოვეს და გასასვლელისაკენ გაემართნენ. მაგრამ სასაფლაოს ლაბირინთიდან თავის დაღწევა არც ისე იოლი აღმოჩნდა; მათ კარგახანს იბოდიალეს და ალბათ კიდევ დიდხანს მოუწევდათ იქ ბოდიალი, შემთხვევით სასაფლაოს დარაჯს რომ არ წასწყდომოდნენ.

იმავე ქუჩით დაეშვნენ, რომლითაც ამოვიდნენ კუკიაზე. რკინიგზის ლიანდაგი გადასჭრეს და სვანეთის უბანში გავიდნენ. არც ერთს და არც მეორეს ხმა არ ამოუღია. დამღურებულებივით მიდიოდნენ. „ტყუილად ვაწყენინე. — ფიქრობდა ლუკა. — ბოდიში უნდა მოვუხადო. თუ მაპატიო, ხომ კარგი, თუ არადა ხვალ ან ზეგ შევეცდები, შევირიგო“.

— მაიკო!

მაიკომ ისე უცებ ახედა ლუკას, თითქოს მთელი გზა მხოლოდდამხოლოდ იმას ელოდებოდა, როდის დამიძახებდნო, თანაც სულ სხვანაირი შუქი შეანათა სახეში. ეს მზერა სულაც არ ჰგავდა წელანდელ მკაცრსა და საყვედურიან გამოხედვას. მაიკო არც გაბრაზებული და არც ნაწყენი არ ჩანდა. პირიქით, ლუკას გამხიარულებულიც კი ეჩვენა. ლუკას უნდოდა ეთქვა, — ხომ არ გეწყინაო, მაგრამ ამის თქმას აზრი არ ჰქონდა, ეს მაშინვე იგრძნო, როცა მაიკოს მოლოდინით სავსე თვალებს ისევ წააწყდა. მიუხედავად ამისა, მაინც იგივე ჰკითხა:

— ხომ არ გეწყინა, მაიკო?

მაიკო ჯერ გაყუჩდა, მერმე ისევ მოიღუშა, თითქოს ყველაფერი დავიწყებული ჰქონდა და ამ გახსენებამ ისევ გული ატკინა.

— არ გეწყინოს, რა! — ლუკამ ხელი ხელზე წაავლო.

პატარა, ჟრუანტელის მომგვრელი ხელიც გაყუჩდა ლუკას ხელში მომწყვდეული. არავითარი წინააღმდეგობის გაწევა არ უცდია, თითქოს საკუთარი ნება-სურვილით ჩაბარდა ტყვედ. მაგრამ როგორც კი ტრამეის ხაზზე გავიდნენ, მაიკომ მოულოდნელად გამოსტაცა ხელი და გაიქცა. სწრაფად გაირბინა ქუჩა და მოსახვევში გაქრა.

მოსახვევიდან უკვე მოჩანდა ეკლესიის გუმბათი. მოჩანდა ისიც, როგორ გარბოდა მაიკო ფეხით მოსიარულეთა შორის, სწრაფად უვლიდა გამვლელებს გვერდს და უკან მოუხედავად

ისევე მიჰქროდა, როგორც იმ ღამეს. ლუკას ისეთი გრძნობა დაეუფლა, თითქოს ხელიდან ძვირფასი რაღაც გამოჰგლიჯეს, თანაც შეეძლო დასდევნებოდა, უკანვე წაერთმია ის, რაც ეს-ესაა გამოსტაცეს, მაგრამ რატომღაც თავს იკავებდა და არ მისდევდა.

თავისი ეზოს ჭიშკარს ბინდ-ბუნდში მიღწია. ცაცხვს რომ ჩაუარა, გარკვევით გაიგონა ბატონი პოლიკარპეს ხმა. მთვრალი პოლიკარპე ძია ლადოს ეხვეოდა და ჰკოცნიდა. მოზღვა-ვებულ მადლობის გრძნობას ვეღარ იოკებდა.

— კაცი ხარ ქვეყანაზე, ლადო! შენ წარმოიდგინე, თევზი ყველას იყო. მე პოლიკარპე გირკელიძე ვარ და ამას არასოდეს დაგივიწყებ, ჩემო ლადო!

## თავი მეშვიდე

დაკრძალვის შემდეგ ერთი თვეც არ იყო გასული, დათიკო ბერიშვილმა, იმ დღეს რომ ვერაფრით დააზუსტა, ტყუპი დებიდან რომელი გარდაიცვალა, დეიდა ნატოს კაცი მიუგზავნა და ბინების გაცვლა შესთავაზა. ბერიშვილის ოჯახი პირველ სართულზე ერთ ოთახში ცხოვრობდა. ოთახი საკმაოდ მოზრდილი იყო. ორი სული, დათიკო თავისი ცოლით თავისუფლად ეტეოდა, მაგრამ ოთახს, როგორც ამბობდნენ, სინათლე აკლდა და არც ნიავდებოდა. ერთადერთი ფანჯარაც და კარიც ეზოს მხარეს ჰქონდა მოქცეული.

ორ ოთახში ერთ ოთახს თავაზობდა. უფრო ზუსტად, მეორე ოთახისა და შუშაბანდის საფასურს იხდიდა. შუამავალმა ასე დაასრულა თავისი სიტყვა: მეტს ვერაფერს გეტყვით. ფულზე ალბათ თქვენ თვითონ მორიგდებითო.

უცებ აღელდა და გაბრაზდა დეიდა ნატო, ერთიანად ცახცახმა აიტანა, გაფითრდა და კარგა ხანს ხმის ამოღებაც კი ვერ მოახერხა. შუამავალი ძველი დაბალი გახლდათ, ჩუმი და წესიერი კაცი, რომელიც დარაბაში ცხოვრობდა. ლუკამაც კი შეიტყო, რომ დაბალი კარგად ვერ შეერჩია ბერიშვილს სა-შუამავლოდ, რადგან დეიდა ნატოს დასამშვიდებლად ასეთი რამ უთხრა:

— ნუ დელავთ, ქალბატონო, განა ღირს ამ უბრალო რამე-

ზე ასე აღელვება? მე ერთი პატარა კაცი ვარ, დამაბარეს და ამბავი მოგიტანეთ. თქვენი ნებაა, ნუ გაუცვლით. ჩემი რჩევაც ეგ იქნება... ეს ოხერი ომი ერთხელ ხომ უნდა გათავდეს. თქვენებიც დაბრუნდებიან, ეს ბიჭიც, ღმერთმა მიხედოს, თვალდათვალ იზრდება, მალე ოჯახსაც მოეკიდება. იმ ბნელ ოთახში ამდენი სული ვერ იცხოვრებთ. კაცი გაჭირვებისთვის არის დაბადებული და ცოტა უნდა გავიჭიროთ.

ძველი დაბალი დინჯად, აუღელვებლად ლაპარაკობდა, მის ხმაში სიმშვიდესთან ერთად რალაცნაირად ნალველმა, გულისტკივილმა გამოყოხა. მაგრამ ამას სულაც არ დაუმშვიდებია დეიდა ნატო, — როგორ, როგორ გამიბედდესო — ამბობდა და ნერვიულად იმტვრევდა თითებს. მერმე ძველ დაბალს მიუბრუნდა:

— მაგას უპატრონო ხომ არ ვგონივარი ჩემი სიძე ომშია, გერმანელ ფაშისტებს ებრძვის. ყოველ წუთს სიკვდილს უყურებს თვალებში, ეგ კი აქ თბილად მოკალათებულა და ჩემს ბინაზე ოცნებობს!

დეიდა ნატოს პოზიცია უკვე გარკვეული იყო და ძველი დაბალი წამოდგა, დამშვიდობებისას დიდი მოწიწებით გაუწოდა ხელი, კართან მისულმა მადლობაც კი გადაუხადა და წავიდა. ლუკას ბინების გაცვლა-გამოცვლის მნიშვნელობისა ბევრი არ გაეგებოდა. მისთვის თითქმის სულ ერთი იყო, სად იცხოვრებდნენ, რამდენი ოთახი ექნებოდა — ერთი თუ ხუთი. იგი სულ სხვა რამემ შესძრა. დეიდამისის ნათქვამიდან იგრძნო, რომ მათ ოჯახს ერთი მფარველი ჰყავდა, ძლიერი, შეუვალი. მისი სახელის ხსენებაც კი საკმარისი აღმოჩნდებოდა ბევრისთვის უკან დასახევად. ეს მფარველი მამამისი იყო და, რაც მთავარია, ამას თვით დეიდა ნატოც აღიარებდა.

ლუკას უცებ გული აუჩუყდა და ფეხაკრფით გავიდა მეორე ოთახში, აღელვებული დეიდა უფრო რომ არ გაეღიზიანებინა. ფანჯრის რაფაზე ქუჩისკენ ზურგით ჩამოჯდა. ღია კარიდან ხედავდა, დეიდა ნატო აკანკალებული ხელით პატარა ჭიქაში როგორ ისხამდა რაღაც წვეთებს. ლუკა ახლა ნანობდა გუშინდელ სიჯიუტეს. დეიდამ სამჯერ მაინც სთხოვა, — სასაფლაოზე წამყევით და არ წაპყვა. — გაკვეთილები მაქვს დასამზადებელიო. ლუკას კი სახელმძღვანელოებისაკენ არც მი-

უხედავს. კვირა დღე აივანსა და ეზოში, ცაცხვის ქვეშ მჯდარ-  
მა გაატარა უსაქმურად.

წინა საღამოს ანდრუყაფარისაგან შეიტყო ძია ლადოსთან  
ვილაც გაურკვეველი ეროვნების, ასაკისა და პროფესიის ქალი  
მისულა და თხუთმეტ-თექვსმეტი წლის გოგონა მოუყვანია.  
თქვენი შვილიშვილიაო, — უთქვამს ძია ლადოსთვის. — მე  
ამის რჩენა კი არა, თავი ძლივს გამაქვსო. დაუტოვებია და წა-  
სულა. — რა ვქნა, თქვენს შვილიშვილს როგორმე თქვენ მო-  
უარეთო. ძია ლადო საგონებელში ჩაეარდნილა, — რატომ აქა-  
მდე არ ვიცოდე, თუ კოტიკოს ცოლი და თანაც ამოდენა შვი-  
ლი ჰყავდაო. კოტიკო გერად ერგებოდა, მეორე ცოლს უკვე  
საკმაოდ მოზრდილი ჭაბუკი მოჰყვა, შესაძლებელია, ძია ლა-  
დოს მართლაც არაფერი სცოდნოდა, რადგან ის ვაჟი ერთი  
გულჩახვეული და პირქუში ვინმე იყო. უთქმელი, სიტყვაძუნ-  
წი. ძია ლადოს ქორწინების ქალადი მოუთხოვია, მაგრამ გა-  
ურკვეველი ეროვნების ქალს უთქვამს — რა ქალადი, რის  
ქალადი, მე კოტიკოს საყვარელი ვიყავი და ეს გოგო რომ  
ნამდვილად მისია, თუ გინდათ, წერილობით შეეკითხეთ და  
გეპასუხებთო.

ამ ამბავმა, როგორც ჩანს, მეზობლები ძალზე დააინტერე-  
სა, ასე ერთსულოვნად გამოფენილები ლუკას დიდი ხანია არ  
ენახა. არც თვითონ დარჩენილა გულგრილი. ჭუჭამ მემტრედეს-  
თან ერთად იჯდა ცაცხვის ქვეშ და ცალი თვალი ძია ლადოს  
აივნისაკენ ექირა. რუბენამ სხვაზე მეტი არაფერი იცოდა იმ  
გოგოს შესახებ და მაინცდამაინც არ ცდილობდა დამატებით  
რაიმე ახალი ამბავი გაეგო. იგი უფრო თავისი მტრედების  
გამო წუხდა: — რა მეშველება, საქმელს ვეღარ ვშოულობ და  
აღბათ ყველას გაყიდვა მომიწევსო.

მეზობლები და მათ შორის ლუკაც ამოოდ დაშვრნენ ლო-  
დინით. კოტიკოს ქალიშვილი გარეთ გამოსვლას, ეტყობა, არ  
აპირებდა. მხოლოდ ძია ლადო სახლის აივანს მოადგა და  
მტკვარს გადახედა, თან ზედიზედ მოქაჩა გაზეთის ქალაქში  
გახვეული თამბაქო.

მეორე დღით სკოლაში მიმავალი ლუკა ცაცხვის ქვეშ  
მჯდარ რუბენას მიესალმა. ძალზე გაუკვირდა და შეეკვდა თა-  
ნაც, თავაზიანმა ჭუჭამ სალამი რომ არ დაუბრუნა. დაეკვებუ-  
ლი ლუკა ერთი წუთით შეყოვნდა და ახლა უფრო მეტი გაო-



ცება გამოეხატა სახეზე. რუბენა ტიროდა, ქოსა, დამქვნარ სახეზე ცრემლი წურწურით ჩამოსდიოდა. ლუკა მიუახლოვდა და ჰკითხა:

— რა მოხდა, რუბენ, რა გატირებს?

— მტრედები მომპარეს! — როდის, როდის უპასუხა ჯუჯამ, თან მუქით მოიწმინდა ცრემლი.

მწვანე სამტრედეს კარი ღია იყო. წუხელ ღამით გამიტეხესო, — ამბობდა მემტრედე და ლუკასთან ერთად ამოწმებდა გატეხილ კარს, დაცარიელებული სამტრედე დამბალი და დაობებული პურითა და ნაედომით ყარდა.

ასეთ დროს ძნელია კაცი ანუგეშო. მით უმეტეს, ძნელი იყო ლუკასთვის, რომელმაც ძლივს მოახერხა ეთქვა, — გული დამწყდაო. ლუკას მართლა შეეცოდა რუბენა და გულიც ნამდვილად დაწყდა. ჯუჯა თუმცა თავზე დაჰკანკალებდა თავის მარჩენალ მტრედებს, მაგრამ სტადიონზე ასაფრენად მაინც ემეტებოდა. ლუკასაც არა ერთხელ წაუყვანია უბეში ჩამალული მტრედები და პირველი გოლის გატანისთანავე აუფრენია: მერმე უღელვია კიდევ, ვაითუ სახლს ვეღარ მიაგნონ და დაეკარგონო. ღელვა ამაო გამომდგარა, ეზოში შესვლისას ამაყად მომღიმარი რუბენას ქოსა სახე დაუნახავს და მიმხვდარა, რომ მტრედებს გზა არ შეშლიათ და თავისი სახლის კრამიტის სახურავზე უკლებლივ დაფრენილან.

— სულ რამდენი იყო? — ჰკითხა ლუკამ.

— ოცი წყვილი. — დაუფიქრებლად უპასუხა ჯუჯამ.

ლუკამ სინანულით გააქნია თავი და კიშკრისკენ გასწია ზღაზვნით, გულმოკლული მემტრედე ლაპარაკ-ლაპარაკით მიაცილებდა, ჯუჯას ბოლომდე არ ჰქონდა იმედი გადაწურული. — თუ თვეობით არ დაამწყვდიეს ან არ შემიჭამეს, ნახევარზე მეტი მაინც დამიბრუნდებაო. მართლაც, ოთხი მტრედი ერთი კვირის შემდეგ მოფრინდა. საწყლები ძალზე დაჭუჭყიანებულები და დამშეულ-დაღლილები იყვნენ. ეტყობოდათ, შორი და ძნელი გზა გამოეგლოთ, ვიდრე თავის ძველ ბუდეს მიაგნებდნენ. მერმე კიდევ სამი მტრედი დაბრუნდა, ესენიც აღრემოფრენილებს ჰგავდნენ. ჯუჯა სიხარულისგან ფეხზე აღარ იდგა, მაგრამ ზემი ნაადრევი აღმოჩნდა: ეს იყო და ეს, ორმოციდან მხოლოდ შვიდმა მოაგნო თავის ძველ სამყოფელს.

ლუკა იმ დღეს მემტრედე რუბენამ ლაპარაკით შეიყოლია

და პირველ გაკვეთილზე დააგვიანდა. იგი გზაშივე მიხვდა, პირველ ზარს, გინდაც სირბილით გამსკდარიყო, მაინც ველარ მიუსწრებდა და ამიტომ სულაც არ აჩქარებულა.

მათი სკოლა ხელგის ქუჩაზე გადაიტანეს. შენობა არც ისე ურიგო გამოდგა. მაგრამ თავისი ვიწრო დერეფნებითა და პატარ-პატარა საკლასო ოთახებით, ძველს მაინც ვერ შეედრებოდა. ერთი მტკაველი ეზოც შესვენებებზე უწყალოდ ზღუდავდა მოსწავლეთა ცელქობისა თუ გართობის შესაძლებლობებს. ამ სკოლას ერთი სიკეთე მაინც აღმოაჩნდა. იგი ძველ სკოლასთან შედარებით ახლოს იყო და ლუკა შინიდან უკვე ათი წუთით გვიან გამოდიოდა.

თუ აგვიანდებოდა, ერთი პატარა, სწორი ქუჩით მოჭრიდა გზას. ეს ქუჩა მეტად მოსახერხებელი იქნებოდა, ვიღაც დაბალ-დაბალი, შავტუხა ბიჭი რომ არ ყოფილიყო ქვეყანაზე. იგი საულვაშეზე წამოზრდილი შავი ღინღლით, მოსწრებულ ცხვირითა და დაფანჩული წარბებით შიშის ზარსა სცემდა ლუკას. ქუჩის თავშივე შეაჩერებდა და მაშინვე გაუჩითავდა ჩანთას. საშლელს, ფანქარს, კალმისტარს ან სუფთა რვეულს, ერთი სიტყვით, რაც მოეწონებოდა, წაართმევდა, მერმე ერთს გამრიგლად დააპანღურებდა და სკოლაში გაისტუმრებდა.

ლუკა არც ისე მხდალი და უძლური ბიჭი იყო, მაგრამ ამ შემთხვევაში, როგორც ჩანს, უბანს — გეოგრაფიულ გარემოს — ეძლეოდა განსაკუთრებული მნიშვნელობა. ფიქრებში ხშირად გაუტყუებია ეს წარბებდაფანჩული, მრისხანე ბიჭი თავის უბნისკენ და გვარიანდაც მიუბეგვავს, მაგრამ ეს მხოლოდ წარმოსახვა, შეურაცხყოფილი და დამცირებული კაცის ფიქრები და სურვილები იყო.

ლუკას, რა თქმა უნდა, ისიც შეეძლო მეგობრები მიეყვანა და საერთო ძალით გასწორებოდა შარავზის ყაჩაღსა თუ არამკითხე მებაქეს მისსავე უბანში. ასეთი რამ არ უკისრია, რადგან ერთზე რამდენიმე ბიჭის თავდასხმას არაკეთილსინდისიერ საქციელად თვლიდა. თანაც პირველსავე დღეს ნაჭამი შიშისა და სიმხდალის გამჟღავნების რცხვენოდა. რცხვენოდა იმდენად, რომ გახსენებისას წითლდებოდა კიდევც. ამ სირცხვილს არავის უმხელდა, თვით ანდუყაფარსაც კი. გულშივე იკლავდა და იბოლმებოდა. მეორე დღეს შურისძიებით აღჭურვილი გაემართებოდა საბედისწერო ქუჩისაკენ, რათა მარტოდმარტო

გასწორებოდა მოწინააღმდეგეს. მაგრამ დაინახავდა თუ არა მე-ბაჟეს, კარგად მოთქიკებული და ყოველმხრივ აწონ-დაწონილი შურისძიება თავისთავად გადაიდებოდა მეორე დღისათვის, ხოლო ლუკას კვლავ დაეუფლებოდა ამაზრზენი, დაუძლეველი სიმხდალე, რომლის გამოც მერმე საკუთარი თავი სძულდა.

ამ სამი დღის წინათ, ლუკამ ისევ მოჰკრა ქუჩის კუთხეში მდგარ შავტუხას თვალი და, — იქნებ ამჯერად მომეშვასო, — არც გაუხედავს მისკენ, ჩქარი, საქმიანი ნაბიჯითვე განაგრძო გზა სკოლისკენ. თავი გადარჩენილი რომ ეგონა, სწორედ იმ დროს დაუძახა მებაჟემ:

— ეი, ჩვენი ძმა!

ლუკას შიშისაგან გული გადაუქანდა და შეჩერდა.

— მოდი აქ! — უბრძანა ქუჩის გაღალმა კედელზე მიყუდებულმა, თან თითით ანიშნა, — გადმოდიო.

„არ გადავალ!“ — ჭიუტად გაივლო გუნებაში ლუკამ.

— მოდი აქ-მეთქი!

— რა გინდა?

— გადმოდი!

— არ გადმოვალ! — უპასუხა ლუკამ, მაგრამ ტროტუარიდან ქვაფენილზე მაინც გადავიდა.

მან ცალი თვალით დაინახა, რომ იქვე სადარბაზოდან გამოსული ბიჭი იღვა და ჭიბეებში ხელებჩაწყობილი მათ მისჩერებოდა. შესაძლოა, ამ ბიჭის გამოც გაჭიუტდა ასე; წინათ ლუკას დამცირებასა და დაცემას არავინ დასწრებია, ახლა კი ვილაც უფროსი ვაჟი უნებურად ხდებოდა მისი ლაჩრობისა და სიმხდალის მოწმე. საკუთარ ძალაში დარწმუნებულ მებაჟეს სახეზე გესლიანი ღიმილი გაუკრთა, კედელს მოშორდა და ზლაზვნით გადმოდგა სამიოდე ნაბიჯი.

— მაშ, არ მოდიხარ, არა?!

— არა!

უცნობი ვაჟი მათკენ გამოეშურა, ისიც ზლაზვნით წამოვიდა, მიახლოვებას არა ჩქარობდა, ალბათ აინტერესებდა მის ჩაურევლად როგორ განვითარდებოდა მოვლენები. შავტუხა ბიჭი ტროტუარის კიდესთან იღვა, წარბებდაფანჩულ სახეს წედანდელი ღიმილი გასცლოდა და ლუკასთვის მეტად ნაცნობი იერი დაბრუნებოდა. ეს ის მზერა იყო, რომელიც შიშის ზარსა სცემდა. ახლა უკვე ლუკას მტკიცედ ჰქონდა გადაწყვე-

ტილი არ დაეთმო, თუნდაც ეს წინააღმდეგობა სიკვდილის ფასად დასჯდომოდა.

ლუკამ უცებ აღმოაჩინა, ძველი შიში და სიმხდალე გაჰქრობოდა. საოცარი კია, მაგრამ ასე იყო, მას ახლა ამ ორი შეტოქისა უფრო არ ეშინოდა, ვიდრე იმ ერთისა, რომელიც თითქმის ყოველდღე ხვდებოდა ამ ქუჩაზე.

— გამარჯობა, ნაკეცა — მიესალმა შავტუხა უცნობ ვაჟს და ერთგვარი ღირსების გრძნობითაც კი გაუღიმა.

— რა შენი ნაკეცა ვარ, შე ლაწირაკო

— ჰო... — უცბად დაიბნა შავტუხა მებაჟე, — გამარჯობა, ირაკლი

ირაკლი ლუკას მიუბრუნდა:

— მოდი აქ, ნუ გეშინია!

— არ მეშინია! — უპასუხა ლუკამ და ქუჩა გადმოსჭრა.

— ამასთან რა ანგარიში გაქვს?

ლუკამ მხრები აიჩიჩა.

— საქმე რომ იყოს, გახვალ?

ლუკა შეყოვნდა.

— ქართველი ხარ?

— კი... — უპასუხა ლუკამ.

— რა გქვია?

— ლუკა.

— აბა, ცოტა ზევით წამოდი. — ორივეს მიმართა ირაკლიმ.

ორმოცდაათიოდე ნაბიჯი გაიარეს. ირაკლი ერთ ჭიშკართან შეჩერდა და შეიხედა. ლუკამაც თვალი გააპარა იქითკენ, ეზოში შესასვლელი გვირაბიც და ეზოც ცარიელი იყო, არავინ ჩანდა.

— შედით და დაარტყით... — უთხრა ირაკლიმ ერთსაც და მეორესაც, მერმე ლუკას მიუბრუნდა, — ეგ ჩანთა, მე მომეცი. დაგიჭერ.

— ვისა, ამას უნდა ვეჩხუბო?! — გაიცინა გაკვირვებულმა შავტუხა მებაჟემ, — ერთი რომ დავარტყა, მოვკლავ! — მერმე მარჯვენა მუშტი შეკრა და დაჭიმული მკლავი ნელ-ნელა მოდუნა, — შენ მუსკულები ნახე!

ლუკას გამალებით დაუწყო გულმა ცემა, ასეთი ძლიერი და გამალებული გულისცემა არასდროს ეგრძნო. გაფითრდა,

მკლავები მოუდუნდა და უღონოდ ჩამოუცვივდა. როცა მეტოქემ გამომწვევი გაბედულებით გადააბიჯა ჭიშკარს და გვირაბში შევიდა, ლუკამ უნდობლად გაუწოდა ირაკლის ჩანთა, მანამდე კი გაიფიქრა, — მოდი, ერთს აქედან მოვეუსვამ და მერმე ამ ქუჩაზე ჩემს სიცოცხლეში ფეხს აღარ დავდგამო, — მაგრამ არც ისეთი ლაჩარი იყო, რომ ეს დამამპირებელი ფიქრი განეხორციელებინა.

შეპყვა და მუშტაბიცი მოიმარჯვა, საჩხუბრად განეწყო როგორც კი შეხედა საბრძოლველად გამზადებულ მეტოქეს, გაიფიქრა, — ამ თავხედს, ეტყობა, ჯერ არავეისთან, არასდროს არ უჩხუბიაო. ისე სასაცილოდ იგრიხებოდა და ისე უშნოდ იტრიალებდა ცხვირწინ მუშტებს, ერთი წამით შეეცოდა კიდევ. ლუკას დიდხანს აღარ დაუყოვნებია, გაუქანა და სახეში ლეწა მუშტი. ვაი, მამაჩანო! — იღრიალა შევტუხა მებაქემ და ქუჩაში გავარდა, ლუკამ პანდურის ამოკვრა დააპირა და ფეხსაცმლის ჰვინტი ძლივს მიაწვდინა გაქცეულს.

დღეს კი სკოლაში დაგვიანებით მისულმა, ირაკლი, იგივე ნაკეცა, თავის კლასში აღმოაჩინა, უკანა მერხზე მორცხვად მჯდარი. საკლასო ოთახიდან თითქმის არც ერთი არ გასულიყო გარეთ, რადგან ახალი მოსწავლე აინტერესებდათ და ყველანი ჩუმ-ჩუმად უთვალთვალებდნენ და ამოწმებდნენ.

როგორც კი ლუკა დაინახა, წამოდგა, სახეგაბადრული გამოემართა და ხელი ჩამოართვა.

— გამარჯობა, ლუკა.

— გაგიმარჯოს.

— როგორა ხარ?

— რა ვიცი, არა მიშავს.

— ის ხომ აღარ დაგხვედრია?

— არა.

— რას დაგხვედებოდა. ეგეთი მშიშარა მეორე არ ცხოვრობს ჩვენს უბანში.

თანაკლასელები სულ დაიბნენ და ტყემლად გადაიქცნენ, ასეთი მეგობარი რომ აღმოაჩნდა მოულოდნელად ლუკას. ლუკაც და ირაკლიც უმაღლე მიხვდნენ ამას და თავიანთი ძველი ურთიერთობა წინასწარ შეუთანხმებლად, უფრო მეტად გაუმკვირვალე ნისლით შებურღის.

— შენ ხომ არ გინახავს? — ახლა თავის მხრით ჰკითხა ლუკამ.

— არა, არ მინახავს. — გაელიმა ორაზროვნად ირაკლის.

— ძალიან კი მინდა შემხვდეს.

— ყურებზე ხახვი არ დაგაჰკრას.

მთელი კლასი გაყუჩებული და გაბრუებული მისჩერებოდა მოსაუბრეებს.

— წამო, თითო გავაბოლოთ ეზოში. — შესთავაზა ირაკლიმ.

— მე არ ვეწივი.

— არა?

— არა.

— ხო, მართლა, არ ეწივი. მერმე რა, მაინც წამომყევია.

— სიამოვნებით, მაგრამ ვერ მოვასწრებთ, საცაა ზარი დაირეკება.

— მართლა?

— კი.

— მაშინ დიდ დასვენებაზე იყოს. — ირაკლიმ ჯიბისკენ წაღებულ ხელს მიმართულემა შეუტყვალა და მხარზე დაუტყაპუნა ლუკას.

მაღე ზარი დაირეკა და საკლასო ოთახში ქართული ენისა და ლიტერატურის მასწავლებელი ზაქარია ინწყირველი შემოვიდა, დაბალი, ჭაღარა ბერიკაცი, რომელსაც დიდსა და კეხიან ცხვირზე ოქროს პენსნე ეკეთა. ზაქარია ინწყირველი ძველი პედაგოგი იყო, თბილისის ერთ-ერთ გიმნაზიაში კლასიკურ ენებს — ბერძნულსა და ლათინურს ასწავლიდა, მაგრამ სკოლებში ამ ენების გაუქმების შემდეგ მშობლიური ენისა და ლიტერატურის სწავლებას შეუდგა. წელს ბავშვებს დამრიგებლად მოევლინა და ცდილობდა ყოველთვის მკაცრი და სამართლიანი ყოფილიყო. კლასის დამრიგებელი სამართლიანი აღმოჩნდა, ოღონდ, რაც შეეხება, სიმკაცრეს, მაშინვე აუღეს ალღო და გაუგეს, რომ ეს სიმკაცრე მოჩვენებითია და ერთგვარად გაუთამამდნენ კიდევ. თუმცა სამართლიანობის გამო მისი პატივისცემა არ დაუქარგავთ.

ზაქარია ინწყირველმა სიის ამოკითხვამდე შენიშნა ახალი მოსწავლე. — რა გვარი ხარო, — ჰკითხა და თავის მაგიდას მიუჯდა. ირაკლი მაშინვე წამოდგა და თავაზიანად მიუგო:

— დევდარიანი, პატივცემულო მასწავლებლო.

— რა გქვია.

— ირაკლი.

— შალვა დევდარიანის რა ხართ?

— არაფერი.

— კარგი კაცი იყო შალვა... რომელ სკოლიდან გადმოხვედი?

— მეოცდახუთედან.

— მეოცდახუთედან კი არა ოცდამეხუთედან. — შეუწყონ რა ინწყირველმა.

— დიახ, ოცდამეხუთედან.

მთელი კლასი სულგანაბული უსმენდა მასწავლებლისა და მოსწავლის საუბარს, ყველას ერთნაირად აინტერესებდა ახალი თანაკლასელის ბიოგრაფია.

— გეტყობა, ჩარჩენილი ხარ კლასში.

— დიახ, პატივცემულო მასწავლებლო. — დაუყოვნებლივ უპასუხა ირაკლიმ.

— თანაც, თუ არ ვცდები, ორჯერ უნდა იყო ჩარჩენილი.

— დიახ, პატივცემულო მასწავლებლო!

კლასის ცნობისმოყვარეობა დაიძაბა, რადგან ბავშვებს ერთხელ დარჩენილი მოსწავლე რამდენიც გნებაეთ, იმდენი ენახათ, ხოლო ორჯერ დარჩენილს პირველად ხედავდნენ.

— ისე, ზრდილობიანი ბიჭი ჩანხარ... მაგრამ, როგორც ჩანს, კლასიდან კლასში გადასელისათვის მხოლოდ ზრდილობა არ კმარა. — ჩაილაპარაკა თავისთვის ინწყირველმა.

ირაკლი გაწითლდა. ეტყობა, გაბრაზდა კიდევც, რადგან გესლიანად გაიღიმა.

— დაჯექი.

ირაკლი დაჯდა.

დამრიგებელმა საკლასო ჟურნალი გადაშალა, სიას გადახედა და ვილაცას თვალით დაუწყყო ძებნა, მალე მზერა ლუკაზე შეაჩერა.

— რატომ გააცდინე პირველი გაკვეთილი?

— დამაგვიანდა, მასწ. — წამოდგა ლუკა.

— ხვალვე მოვიდეს დედაშენი.

— დედაჩემი ვერ მოვა.

— რატომ?

ლუკამ არაფერი უპასუხა.

— რატომ ვერ მოვა, გეკითხები

— პატივცემულო მასწავლებლო, — მეზობელი მერხიდან მაიკო წამოდგა.

— ლუკას დედა ომის დაწყებამდე ხუთი დღით იდრე გამგზავრა უკრაინაში თავისი მეუღლის სანახავად და დღემდე არ დაბრუნებულა, წერილიც კი არ მიუღიათ... უგზო-უკვლოდ დაიკარგა.

— ეს რა უბედურებაა!.. აქამდე რატომ არ მითხარი ბიჭო?!

— რა ვიცი... რატომ უნდა მეთქვა,

— კარგი, დაჯექი.

— დედა კი ამ ერთი თვის წინ დაასაფლავეს. — ეს ცნობაც მაიკომ მიაწოდა ზაქარია ინწყირველს.

— დასხედით. დასხედით.

მაიკო და ლუკა დასხდნენ.

ლუკას გუნება შეეცვალა, თითქოს პირველად ახლა შეიტყო, რომ დედა უგზო-უკვლოდ დაჰკარგოდა. უცებ როგორღაც თავბრუ დაესხა და სახეზე ოფლმა გამოჟონა, მოეჩვენა თითქოს შიმშილისაგან გული ერეოდა. გაფითრებული იდაყვით მერხს დაეყრდნო და თვალები დახუჭა.

— რა მოგივიდა, ლუკა? ცუდად ხომ არა ხარ? — წასჩურჩულა გვერდით მჯდარმა მიტომ.

— არაფერი. არაფერი... ცოტა დამაცადე... — უპასუხა ლუკამ.

## თავი მერვე

ბოლო გაკვეთილი რომ დამთავრდა, ზაქარია ინწყირველი დერეფანში დახვდა ლუკას და სამასწავლებლოში შეიყვანა. იქ დაწერილებით გამოჰკითხა დედის ამბავი, მერმე კიბემდე მიაცილა და გაამხნევა კიდევც, — ნუ გეშინია, უსათუოდ დაბრუნდებო.

გარეთ გამოსულს მაიკო დახვდა სკოლის ეზოსთან ატუზული. სხვა ამხანაგები შინ წასულიყვნენ. ირაკლი, რომელმაც ლუკას შესთავაზა, დიდ დასვენებაზე გავაბოლოთო, უკვე ზა-



ქარია ინწკირველის გაკვეთილის შემდეგ გაიპარა და სკოლაში ბარე ხუთი დღე აღარ გამოჩენილა.

მაიკო და ლუკა ერთად წამოვიდნენ, ლუკა ატყობდა, მაიკოს ერთი სული ჰქონდა გაეგო, გაკვეთილების შემდეგ რატომ დატოვა კლასის დამრიგებელმა, მაგრამ თავს იკავებდა და შეკითხვას ვერ უბედავდა. ლუკაც არ იყო ლაპარაკის გუნებაზე და ისე უსიტყვოდ მიდიოდნენ ერთხანს. ქუჩა თითქმის ცარიელი იყო. ორჯერ სამხედრო პატრულები შეხვდნენ. პატრულები ქუჩა-ქუჩა აუჩქარებლად დადიოდნენ, ზოგჯერ მოქალაქეებს აჩერებდნენ და საბუთებს უსინჯავდნენ.

ასე ხმისამოუღებლად გამოიარეს რამდენიმე ქუჩა და საპარკმახეროსთან მივიდნენ. ეს საპარკმახერო იქვე, მაიკოს ეზოსთან იყო მიდგმული, მაიკო თითქოს მიუხვდა, ლუკას შინ მისვლა რომ არ უნდოდა და შესთავაზა — ცოტა ხანს ჩვენთან შევიდეთო. ლუკამ ჯერ იუარა, მაგრამ მალევე დაეთანხმა—კარგი, ცოტა ხანს შემოვალო.

ეკლესიას ირგვლივ ერთსართულიანი და ორსართულიანი პატარ-პატარა ხის აივნებიანი სახლები შემორტყმოდა. რიყის ქვით მოკირწყლული ეზო სუფთად იყო დაგვილი. ლუკამ და მაიკომ ეზო გადასჭრეს და ეკლესიის უკან ცისფერად შეღებილ შუშაბანდს მიადგნენ. მაიკომ ჩანთიდან გასაღები ამოიღო. შუშაბანდის კარი გააღო და ლუკას შეუძღვა.

როგორც კი შევიდა ნახევრადბნელ შუშაბანდში, საიდანაც უფრო ბნელი ოთახი მოჩანდა, ლუკას უსიამოვნო გრძნობა დაეუფლა და მაშინვე ინანა, აქ შესვლას რომ დაეთანხმა. თვითონაც არ იცოდა, რატომ დაეუფლა ასეთი გრძნობა, ფეხი ძლივს ჰქონდა შემოდგმული და უკვე შინ გაბრუნებაზე ფიქრობდა. გაახსენდა, ანდუყაფარს რომ შეჰპირდა, სკოლიდან მალე დაებრუნდებო. ჯერ ერთი, პური უნდა მიეტანა და ეზოში შემოსვლამდე შენიშნა, რამხელა რიგი იდგა პურის მაღაზიასთან. მეორეც, პარკების კეთებაში უნდა მოხმარებოდა. ეს საქმე დათიკო ბერიშვილმა გაუჩინა, მასვე მოჰქონდა ანდუყაფარისათვის დაჭრილი ქაღალდი და ყოველ დამზადებულ პარკში რვა თუ ათ კაპიკს აძლევდა.

მაიკომ ჩანთა ფარდაგადაფარებულ ტახტზე მიაგდო. მერმე ლურჯი ქაქეტი გაიხადა და კედელზე მიჭედელ ხის საკიდ-

ზე ჩამოჰკიდა. ლუკასაც გამოართვა ჩანთა და ისიც ტახტზე მოისროლა.

— იცი რა, მაიკო, მოდი, მე წავალ.

— მოიცადე, რა.

— არა. ანდრუყაფარს შევპირდი, პურს მოგიტან-მეთქი.

— დიდხანს არც მე გაგაჩერებ.

— არა... არა...

— ანდრუყაფარი ცოტა ხანს მოიცდის, არაფერი უშავს.

მუშაბანდში ტახტი, კარადა და მუშაბაგადაფარებული მაგიდა იდგა. მაგიდაზე გაურეცხავი ჭურჭელი იყო დახევებული.

— არც გუშინ და არც დღეს დილით წყალი არ მოდიოდა.— მოუბოდიშა მაიკომ ლუკას, მერმე ოთახში შევიდა და სინათლე აანთო.

განათებული ოთახი გაცილებით დიდი აღმოჩნდა, ვიდრე მუშაბანდიდან ჩანდა. აქაც იდგა მაგიდა და ერთი ტახტი. ამას გარდა ოთახს ავსებდა ორი ნიკელის საწოლი, ტანსაცმლისა და ჭურჭლის კარადები, ვენური სკამები. ჭერიდან კედელზე ჩამოშვებული იყო ჭრელი, სპარსული ნოხი, რომელიც ტახტს მთლიანად ეფინებოდა. ნოხზე შავ ჩარჩოში ჩასმული ქალისა და მამაკაცის ძველი, გახუნებული სურათი ეკიდა.

— ეს ჩემი საყვარელი ტახტია. — თქვა მაიკომ, სწრაფად შემოუარა მაგიდას და ტახტზე მუთაქებსა და ყურთბალიშებს შორის რბილად დასკუბდა. მერმე ერთ-ერთი მუთაქა გაისწორა, მკლავსა და ზურგს მოარგო. ფეხები ზევით აიტანა და ნებიერად მიწვა.

ლუკა შუა ოთახში შტერივით იდგა და არ იცოდა, როგორ მოქცეულიყო, დამჭდარიყო თუ ასევე ფეხზე მდგარს ეცქირა მაიკოს ნებიერობისათვის. მაიკო აღტაცებული შეჰყურებდა ლუკას. იგი კმაყოფილი ჩანდა. ეტყობა, ძალზე მოსწონდა თავისი ტახტი, რომელიც მყუდროების ელფერს ანიჭებდა ოთახს და მართლაც მოსახერხებელი უნდა ყოფილიყო წამოსაწოლად.

— მე აქ წამოვწვები და ვოცნებობ ხოლმე. — თქვა მაიკომ,—ჩვენები სალამომდე არ ბრუნდებიან შინ და მე სულ მარტო ვარ ხოლმე. მე ისე მიყვარს მარტო ყოფნა. — ახლა

ტახტის მარცხენა მხარეს გადაინაცვლა. იქაც მოირგო მუთაქები და მიწვა, თითქოს ლუკას უმტკიცებდა: ეს ტახტი მხოლოდ და მხოლოდ იმისთვის არის შექმნილი, რომ ზედ ჩემისთანა ციქნა არსებას, როგორც მოესურვება, ისე წამოწვეს და იოცნებოსო.

— კარგი ტახტია.— როგორც იქნა, აღიარა ტახტის ღირსება ლუკამ.

— მოდი, დაჯექი.

— მე აქ დავჯდები. — ლუკამ სკამი გამოაჩოჩა და დაჯდა.

— იცი რა, ლუკა, ამ ერთ წელიწადში ძალიან გაიზარდე.

— რა ვიცი, მე ვერ ვატყობ.

— კი, ძალიან... მე სულ არ გავზრდილვარ... დედაჩემი მეუბნება — ტანს უცებ აიყრიო... ბავშვობაში მეც შენსავით ვიყავიო...

— რა თქმა უნდა, აიყრი.

— გინდა, კარტი ვითამაშოთ!

— მე არ ვიცი კარტის თამაში.

— არც ერთი!

— არც ერთი.

— რა სასაცილოა!

მერმე დუმილი ჩამოვარდა. ეს დუმილი კარგა ხანს ვაგრძელდა. ყოველ შემთხვევაში ლუკას მოეჩვენა, რომ ორივენი ძალიან დიდხანს დუმდნენ. ლუკა წამოდგა და კედელზე გაკრულ სხვადასხვა ზომისა და ფორმის ჩარჩოში ჩასმულ სურათებს დაუწყო თვალიერება. თითქმის ყველა სურათზე მაიკო იყო აღბეჭდილი. ყველა ასაკის მაიკო — აკვნიდან დღემდე. მშობლებთან ერთად გადაღებული, ხან — ცალკე. „ლამაზი გოგოა, — გაიფიქრა, — ანდა ეტყობა, სურათში გამოდის ლამაზად“. ლუკა უცებ მობრუნდა, თითქოს თავისი ფიქრის შემოწმება უნდოდა, მართლა ლამაზი იყო მაიკო, თუ ფოტოსურათზე აღბეჭდილი ჩანდა ლამაზად.

მაიკო ახლა გულადმა იწვა ტახტზე. დიდრონი შავი თვალები ჭერისათვის მიეპყრო, ლუკამ საკუთარი გულისცემა გაიგონა და გაინაბა. მერმე, თითქოს გამაბრუებელი სურნელებით გაქდენთილი ჰაერი შეისუნთქა, ძარღვები სასიამოვნოდ მოუღუნდა და შეუძმჩნევლად აიტანა თრთოლვამ. ნელ-

ნელა მიუახლოვდა მაიკოს და სახეზე დახედა. მაიკოს თვალები ცრემლით ჰქონდა სავსე.

— რა გატირებს, მაიკო?

— წადი!

— კარგი, წავალ.

— არა. ჯერ ნუ წახვალ! ცოტახანს მოიცადე!

— კარგი, მოვიცდი.

თვალებში დაგუბებულმა ცრემლმა ჯებირი გადალახა, უცებ გაიღვრა და ნოხზე დაცემისთანავე ჩაქრა, სახეზე სველი ზოლები დატოვა.

— რა გატირებს?

მაიკო ტახტზე წამოჯდა და საყვედურით შეაშტერდა ლუკას, მერმე დამშვიდებული ხმით უთხრა:

— ახლა წადი!

— წავიდე?

— ხო, წადი!

— არ მეტყვი, რატომ იტირე?

— არა!

— როგორც გინდა!

ლუკა გატრიალდა, შუშაბანდში ტახტზე მიგდებულ ჩანთას დაავლო ხელი, კარი გააღო და ეზოში გავიდა. ეზოში ისევ, როგორც შემოსვლისას, არავინ შეხვედრია. ჩქარი ნაბიჯით გაიარა ქვაფენილი და ქუჩაში გასულმა უკან მოიხედა. თუმცა წინდაწინვე იცოდა, რომ მაიკოს პატარა სახლს ეკლესია ეფარებოდა და ვერ დაინახავდა.

შინისკენ მიმავალმა ნაბიჯი შეანელა. გრძნობდა, რალაც ძალა თანდათან როგორ ექაჩებოდა უკან, სადაც დიდი აბაჟური იასამნისფერ შუქში ხვევდა ოთახს, სადაც სპარსულ ნოხზე მაიკო იჯდა და ტიროდა. ოღონდ ასე ფენმორთხმულად მჯდარის ნახვა აღარ ეწადა. მას უნდოდა, კიდევ ერთხელ ენახა გულადმა მწოლი, დიდრონი თვალებით ჰერს მიშტერებული მაიკო.

ლუკა ფეხს ითრევდა. მაგრამ, როგორც არ უნდა აეთრია ფეხი, გზა მაინც დაილია და იგი თავის ჭიშკართან აღმოჩნდა. ეზოდან გამომავალი ძველი დაბალი ძლივს მობაჯბაჯებდა. ლუკასთან ისე შეჩერდა, თითქოს შეისვენაო, და ჰკითხა:

— როგორ ხარ, ლუკა?

— გმადლობთ. თქვენ თვითონ როგორ ბრძანდებით, ძია გრიგოლ?

— ღმერთი რომ კაცს დაივიწყებს, ისე ვარ... იმ დღეს დე-  
ილაშენს ვაწყენინე, არა?

— სულაც არ სწყენია, ძია გრიგოლ.

— ეგეთ მურდალ საქმეზე შუაკაცობა არ უნდა იკისრო  
ხოლმე... მაგრამ რა მექნა, არ მომეშვა ის მამაცხონებული.—  
ძველი დაბალი უცნაურად შეიბრა, თითქოს იჭდა და წამოდგო-  
მა სცადაო. მერმე მძიმედ წააჩოჩილა დახუთული ფეხები თა-  
ვის დარაბისაკენ.

ლუკამ ეზოდანვე დაინახა მეორე სართულის აივანზე მო-  
სეირნე ანდუყაფარი და გაიფიქრა: მე მელოდება, ეტყობა ძა-  
ლიან დავაგვიანეო. ორივე სართულის კიბეები აირბინა, ჩანთა  
შუშაბანდის წინ მდგარ მაგიდაზე დატოვა და ანდუყაფარს  
დარცხვენილი მიეახლა.

— დავიკარგე, არა?

— არც ისე.

— წიგნაკი მომე, პურს მოგიტან.

— დედაჩემმა მომიტანა... ეს-ესაა წავიდა.

— ხომ არ იცი, შინ არის დეიდაჩემი?

— მგონი, არ უნდა იყოს. გშია?

— არა.

— თუ გშია, წამოდი ცოტას გაჭმევ.

— არა, სულ არ მშია. გინდაც მშიოდეს, შევალ და ჩვენ-  
თან შევქამ. დეიდა ნატო საჭმელს დატოვებდა.

— კი.

— გაიგე მტრედების ამბავი?

— მტრედების მოპარვა აღარ გამიგია.

— შარშანაც ხომ მოპარეს?

— ის სხვა იყო, შარშან ერთი წაიყვანეს... რომ იცოდე იმ  
მტრედს მთელი თბილისის მემტრედები ემტერებოდნენ. ეხ-  
ლა კი მთლიანად გაძარცვეს. საწყალი ჩემთან ამოვიდა და  
იტირა.

— დილითაც ტიროდა.

— ისეთი ღრო დაღვა, მტრედებით თავს მაინც ვერ გაი-  
ტანდა. პარკების კეთება უნდა დავიწყოო. — მოვიდა და სამი  
ოთხი საათი მეხმარებოდა. ბერიშვილი მაგასაც შეჰპირებია:

თანაც უთქვამს, შენი სარდაფი მომაქირავე, ქალაღის საწყობად მჭირდებოა.

ქვევით ეზოში ქერათმიანი ქალიშვილი გამოჩნდა. ანდუყაფარმა ლუკას გადახედა და უთხრა:

— ეგ არის.

ლუკა უცებ ვერ მიხვდა, ვინ იყო და ანდუყაფარმა დაუხუსტა:

— კოტიკოს ქალიშვილია, გუშინ რომ მოუყვანეს ძია ლადოს.

— მართლა?

— კარგი გოგოა!

ქერათმიანი ქალიშვილი ცაცხვის ქვეშ მერხზე დაჯდა და მიუხედავად იმისა, რომ ცაცხვს ფოთლები შემპკნარი და სანახევროდ დაცვენილი ჰქონდა, მეორე სართულზე მოსაუბრენი მაინც ვერ ხედავდნენ.

— თურმე იზა ჰქვია.

— იზა?

— რა გაგიკვირდა!

— რა ვიცი...

— გაიგე, კოტიკო რომ დაღუპულა?

— როგორ თუ დაღუპულა?

— ცნობა მიუღია ძია ლადოს, ფოსტალიონს ასე უთქვამს რუბენასთვის. გუშინ იმ ქალს გოგო რომ მოუყვანია, ძია ლადოს უკვე სკოდნია დაღუპვის ამბავი, მაგრამ არ გაუშხელია, კოტიკოს დედას უმაღავს თურმე.

ლუკას უცებ აეწეწა და აემღვრა გუნება, ის ბედნიერი წინაგრძობა, რომელიც აქამდე ასულდგმულებდა, მოულოდნელად ჩაეღველფა. ნელ-ნელა ინავლებოდა იმედი, რომ ოდესმე მაინც იხილავდა უგზო-უკვლოდ დაკარგულ მშობლებს. კოტიკო ომის დაწყებიდან რამდენიმე თვის შემდეგ წავიდა, ლუკას მშობლები კი პირველივე დღიდან იქ იყვნენ. მათ თავზე გადაიარა პირველმა ქარიშხალმა. ახლაც ისევე გაფითრდა, როგორც სკოლაში და სახეზე ცივმა ოფლმა გამოჟონა. ისევე დაეხვა თავბრუ და გული აერია.

— უკვე მოვიდნენი — თქვა ანდუყაფარმა.

ლუკამ გაიგონა ანდუყაფარის სიტყვები, მაგრამ მისი მნიშვნელობით არ დაინტერესებულა, მისთვის სულერთი იყო

ახლა, ვინ მოვიდა ან რატომ მოვიდა. თავბრუ ეხვეოდა და მისი გონება ამღვრეული ბურუსით იყო მოცული... ლუკას რაღაც გაურკვეველის, უსახოსი და უფორმოს დანახვა თვალნათლივ, გარკვეულად უნდოდა, მაგრამ ვერ ახერხებდა, რადგან თვითონ არ იცოდა, რისი წარმოსახვა სურდა.

— რუბენას სარდაფს ათვალეირებენ, — თქვა ანდრეაფარმა. — ეტყობა, ბერიშვილს საქმის გადადება არ უყვარს.

ლუკა უჩუმრად გაეცალა იქაურობას, თითქოს ვიღაცას გაეპარა, ფეხაკრფით წავიდა შუშაბანდისკენ. კარი დაკეტილი აღმოჩნდა. მაგიდაზე ხელი მოაფათურა და გასაღები მონახა, მერმე მუშაბანდის ქვეშ ხელი შეჰყო და გასაღები გამოიღო.

— ლუკა! — გაიგონა ანდრეაფარის ხმა, — ლუკა, მოდი აქ.

— რა იყო?

— შენი მეგობარი გოგონა მოდის.

ლუკა სირბილით მიიჭრა მოაჯირთან და ეზოში გადაიხედა. პირველი სართულის კიბეზე მაიკო ამორბოდა. ლუკა გატრიალდა და მაიკოს კიბისთავთან დაელოდა. მაიკომ პირველი სართულის კიბე ამოირბინა და ზედა სართულს ამოხედა, ლუკა დაინახა, გაუღიმა. ლუკამ ახლახან შენიშნა, რომ მაიკოს ჩანთა მოჰქონდა და უნებურად შუშაბანდთან მიდგმულ მაგიდას გადახედა.

— ჩემი ჩანთა წამოვიღია! — ამოსძახა მაიკომ შუა კიბიდან.

— ახლავა მივხვდი, — უთხრა ლუკამ, — შენს ჩანთას რომ შეეხებდე.

ლუკამ აივნიდან კიბეზე ამომავალ მაიკოს რომ მოჰკრა პირველად თვალი, რატომღაც ეგონა, გაღიზიანდებოდა, ამისათვის შეამზადა კიდევაც საკუთარი თავი. მოიღუშა და სახე შეჰკმუხნა. მერმე კიბისთავთან მისულმა უეცრად იგრძნო, რომ სრულებითაც არ იყო გაღიზიანებული, პირიქით, მოულოდნელი ნეტარი სიმშვიდე დაუფლებოდა. ეს გარეგნულადაც გამოეხატა სახეზე. ღიმილს ვეღარ იკავებდა. ამასობაში მაიკოც ამოვიდა. ეტყობოდა, სულ სირბილით გამოეველო მანძილი თავისი სახლიდან აქამდე, გული ამომჭდარი ჰქონდა.

— როგორ შეგეშალა, ლუკა. — თქვა და სული მოიბრუნა.

— რა ვიცი, შეგეშალა. — ლუკამ დამნაშავესავით გაიღიმა.

მაიკომ ანდლუყაფარი დაინახა და თავაზიანად მიესალმა:

— გამარჯობათ, ბატონო ანდლუყაფარი

— გაგიმარჯოს, მაიკო.. ჩანთები აგერიათ?

— ლუკას შეშლია, ბატონო ანდლუყაფარ.

— როგორ შემეშალა ჩემი შავია, შენი — კი ყავისფერი ლუკამ შავი ჩანთა გამოართვა მაიკოს და ყავისფერი დაუბრუნა.

— წავედი, — თქვა მაიკომ.

— რას მორბოდი. ბოლოს და ბოლოს შევემჩნევიდი, ჩემი რომ არ იყო და მოგიტანდი.

— მაგას შენ კარგა ხანს ვერ შეამჩნევიდი, ჩემო ლუკა. — უთხრა ანდლუყაფარმა.

— ნახვამდის, ბატონო ანდლუყაფარი

— ნახვამდის.

მაიკო კიბეზე დაეშვა. ლუკა ჩაჰყვა და ორივემ ერთად ჩაათავეს კიბეები. ეზოში ჯუჯა რუბენა, დათიკო ბერიშვილი და ვილაც მსუქანი კაცი იდგნენ მწვანე სამტრედესთან. იზა თავისთვის იჭდა ცაცხვის ქვეშ მოწყენილი და დაფიქრებული.

— ღმერთო, რა ლამაზი გოგოა, ვინ არის? — იკითხა მაიკომ ეზოდან გასვლისთანავე.

ლუკამ უთხრა, ვინც იყო.

— ეგეთი ლამაზი გოგო ჯერ არ მინახავს — გაოცებასა და აღტაცებას ვერ ფარავდა მაიკო.

— მართლა ეგეთი ლამაზია?!

— ვითომ არ იცი?!

— საიდან მეცოდინება, წესიერად არც კი მინახავს. — ლუკას გაახსენდა, კვირას მთელი დღე რომ ელოდა უცნობი გოგონას გამოჩენას, მისი გულისთვის სასაფლაოზეც კი არ წაჰყვა დეიდამისს. ახლა კი როგორღაც სრულებით დაჰკარგვოდა მაშინდელი ცნობისწადილი, გვერდით ისე ჩაუარა, რომ კარგად არც კი შეუხედავს ცაცხვის ქვეშ მარტოღმარტო მჯდარი ქალიშვილისათვის.

— ჩემი ჩანთა ხომ არ გაგინხნია? — ჰკითხა მაიკომ მლუთმენლად.

— არა.. რა იყო?!

— არაფერი.

— რატომ გავხსნიდი? შენს ჩანთაში რა მესაქმებოდა?



— ისე გითხარი, არ გეწყინოს!

ქუჩაში ლაპარაკ-ლაპარაკით გამოვიდნენ ის მსუქანი კაცი და ბერიშვილი. მსუქანმა ცარიელი ეტლი გააჩერა, ჩაჯდა და წავიდა, ბერიშვილი უკანვე შებრუნდა ეზოში.

— კარგი, წავედი, — თქვა მაიკომ.

— გინდა, შენთან წამოვიდე?

— არა. დარჩენა რომ გდომოდა, დარჩებოდი და აქ არ მომარბენინებდი.

— რა ვიცი... შენ არ მითხარი წადიო... თუმცა ახლა მაინც ვერ წამოვალ. სახლის გასაღები წამომყოლია.

— ნახვამდის.

— ნახვამდის. ხვალ ხომ მოხვალ სკოლაში?

— რა თქმა უხდა.

ლუკამ თვითონაც კარგად იცოდა, მაიკო უსათუოდ მოვიდოდა ხვალ სკოლაში და მხოლოდ იმიტომ ჰკითხა, რომ ცოტახნით მაინც შეეყოვნებინა. მაგრამ მაიკომ არ მოიცადა და წავიდა. პატარა, ერთი ციციქნა სწრაფი ნაბიჯით მიდიოდა, ოდნავ მარჯვნივ გადახრილი, როგორც ჩანს ჩანთა ამძიმებდა. ძია გრიგოლს — ძველ დაბადს სკამი ქუჩაში გამოეტანა, თავისი დარაბის წინ იჯდა და ქარვის კრიალოსანს მარცვლავდა. მაიკომ ჩაუქროლა და უკან მოუხედავად განაგრძო გზა. ლუკას გაუკვირდა, რომ ბერიკაცმა თვალი არ გააყოლა, იგი ხომ იმისთვის იჯდა ქუჩაში, ყველაფრისათვის თვალი ედევნებინა. ახლა კი რატომღაც გამორჩა მაიკო, ვერ შეამჩნია. წინ წახრილი ორივე მკლავით მუხლებს დაყრდნობოდა, ფილაქანს ჩახერებოდა და დინჯად მარცვლავდა ქარვის კრიალოსანს. რატომღაც გული დაწყდა ლუკას, მაიკო რომ ვერ შენიშნა ძველმა დაბადმა.

ეზოში შემობრუნებულმა დაინახა, ჯუჯა რუბენა და იზა ცაცხვის ქვეშ ერთმანეთის პირისპირ ისხდნენ და საუბრობდნენ. გაჩერებას არ აპირებდა, მაგრამ რუბენამ დაუძახა, — ცოტახანს აქ მოდიო. ლუკა მოვიდა.

— გაიცანი, — უთხრა ჯუჯამ, — ეს იზაა, ჩვენი კოტიკოს შვილი.

იზამ ხელი ჩამოართვა, თბილი და რბილი ხელი. ვიდრე ლუკა სახეში შეხედავდა, გაიფიქრა, — ნეტავი მართლა თუ ისეთი ლამაზია, როგორც მაიკოს მოეჩვენაო. ყველაზე მეტად

მხრებზე ჩამოშლილმა თმამ გააოცა. არასოდეს ენახა ასე ოქროსფრად ღოვლვარე, მბზინავი თმა. ისე ბრწყინავდა, თითქოს საიდანღაც მზის სხივი ეცემოდა.

იზა ცნობისმოყვარეობით შეჰყურებდა ლუკას სახეში. დიდი, ლურჯი თვალები ჰქონდა, პაწაწინა ცხვირი და წითელი, თითქმის სისხლისფერი ტუჩები, ლუკა უცებ გაწითლდა, მოეჩვენა, თითქოს იზა მიუხვდა, ასე გულსისყურით რომ ამოწმებდა მის გარეგნობას. წასვლა დააპირა.

— დაჯექი. — შესთავაზა ჯუჯა რუბენამ, რომელიც სულ ერთთავად იღიმებოდა და მაგიდაზე დამპყვნარი თითებით რატომღაც „ბაღდადურს“ უკაეუნებდა.

— გაკვეთილები უნდა დავამზადო — თქვა ლუკამ.

— დაჯექი რა! — ისევ სთხოვა ჯუჯამ.

„ნეტავი თვითონ თუ იცის, ასეთი ლამაზი რომ არის?“ — ფიქრობდა კიბისკენ მიმავალი ლუკა. კიბეები სირბილით აიარა, კიბისთავთან ანდუყაფარი დახვდა უცნაურად აღელვებულად.

— რას გელაპარაკებოდა? — შეაგება ლუკას ასვლისთანავე შეკითხვა.

— რა ვიცი, არაფერს...

— ღვთაებრივი გოგოა! — ანდუყაფარმა უცებ მოაბრუნა სავარძელი და თავის ოთახში გაუჩინარდა.

## თავი მეცხრე

— თბილად ჩაიცვი! — გამოსძახა შუშაბანდიდან დეიდა ნატომ.

— მეტი რა ვქნა, რაც მაქვს ზედ მაცვია, — უბასუხა ლუკამ და ძველ, საკმაოდ დამოკლებულსა და დავეწროებულ პალტოში გამოკრული შუშაბანდში გამოვიდა.

დეიდა ნატომ ორი ძველებური თითბრის შანდალი ჩააწყობ ხელჩანთაში, მერმე სკამზე გადაფარებული კაბა აიღო, შეატრიალ-შემოატრიალა, ფრთხილად დაკეცა და შანდლებს დააფარა. მერმე ოთახში გავიდა და ზეწარი გამოიტანა, შეამოწმა ყოველი მხრიდან, სინათლეზეც კი გახედა და დაკეცილი, ისიც ჩანთაში ჩადო.

დევებრის უკანასკნელი კვირა დილა იყო, ნოტიო, სუსხიანი, სუსხი ძვალსა და რბილში ატანდა. დეიდა და დისშვილი საბურთალოს ბაზრისკენ გაემართნენ.

ლუკას ბევრი რამ ჰქონდა საბურთალოს ბაზრის შესახებ გაგონილი. ბევრჯერაც უნატრია იქ მოხვედრა, მაგრამ ახლა, როცა ამ მძიმე ხელჩანთას მიათრევდა, როცა ორი შანდალი, დეიდამისის კაბა და ზეწარი მიჰქონდა გასაყიდად, ფეხები უკან რჩებოდა. ვერც კი წარმოედგინა, როგორ უნდა დაეკავებინა ხელში შანდლები და მუშტარს დალოდებოდა. თანაც გულუბრყვილოდ უკვირდა: ის, რაც მათ აღარ სჭირდებოდათ და გასაყიდადაც კი ემეტებოდათ, სხვა რად შეიძენსო? ამიტომ საბურთალოს ბაზარი მისი წარმოდგენით, ერთი დიდი მოედანი იყო, სადაც უამრავი ხალხი მხოლოდ იმიტომ მიდიოდა, რომ ყველა მათგანს უნდოდა რაღაც გაეყიდა.

ლუკამ არც ის იცოდა, როდის გადაწყვიტა დეიდა ნატომ ამ ნივთების გაყიდვა დღეს დილით, გუშინ, თუ გუშინ წინ. დღეს ადრე ადგა და ლუკაც ადრიანად გააღვიძა. — პურის ფული არა გვაქვს და რალაც-რალაცები უნდა გავყიდოთო. რა თქმა უნდა, უარი ვერ უთხრა, ანდა როგორ ეტყოდა უარს. ეს ოხერი, პურის ფული დეიდა ნატოს მართო თავისთვის ხომ არ უნდოდა? იმ პურს, რასაც წიგნაკებით იღებდნენ, გროშები სჭირდებოდა, ეს გროშები დეიდას არასოდეს შემოეღეოდა, მაგრამ ხანდახან, ლუკა არ დამემშესო, სანოვაგისათვის ბაზარშიც დადიოდა, სადაც ყველაფერი ოცმაგად ძვირი ღირდა.

დეიდა ნატომ წერილების წერა შეწყვიტა. ალბათ იმათ, ვისაც ამ წერილებს წერდა, თავი მოაბეზრა და პასუხებს აღარ უგზავნიდნენ. ეტყობა, ბედს დამორჩილდა. არც ლუკას დედას, არც ლუკას მამას აღარ ახსენებდა, თითქოს ამქვეყნად არასოდეს არ ყოფილიყვნენ. აღარც სასაფლაოზე დადიოდა, სრულიად მიივიწყა დის საფლავი. ორმოციც აღარ გადაუხდიათ, როგორც დასაფლავების შემდეგ შეთანხმდნენ ნათესავები და დღეც კი დათქვეს, როდის უნდა გადაეხადათ.

ყველა ძველი საზრუნავი დაივიწყა დეიდა ნატომ და დარჩა მხოლოდ ერთი: ლუკა! ლუკა ყველაფერს ამას გრძნობდა და ზოგჯერ ასეთი გადაგებული ზრუნვის გამო უსიამოვნო გრძნობაც კი ეუფლებოდა, ოღონდ არა იმიტომ, რომ უმადური

იყო, ანდა ძველი ბოდმა ჰქონდა გულში შემორჩენილი. არა, ჯერ ერთი, მას არასოდეს არ ანებივრებდნენ და ამგვარ ზრუნვას ვერ ეგუებოდა, მეორეც, დედაბერი ძალზე ეცოდებოდა. სულ დაილია და დადნა. მხრებში მოიხარა და დაუძლურდა. მიუხედავად ამისა, მაინც არ ისვენებდა, უთენია დგებოდა და გვიან ღამით იძინებდა. ცდილობდა, როგორც ქარში ანთებულ სანთელს, ლუკას ყოველი მხრიდან მოფარებოდა.

ერთხელ, როცა ზრუნვით თავგაბეზრებულმა ლუკამ დეიდა ნატოს სრულიად გაუაზრებლად უთხრა: დეიდა, შენს თავზეც იზრუნე, შენ რომ რაიმე დაგემართოს, მე რა მეშველება, სულ მარტო ვრჩები ამ ქვეყანაზეო, დედაბერს მუნღები მოეკვითა, ტახტზე დაემხო და თითქმის მთელი დღე ტიროდა გულაჩუყებული.

— ღმერთო, მაპატიე, ღმერთო, ისე ნუ წამიყვან, ეს ბავშვი ფეხზე დამდგარი არ მაჩვენო!

საბურთალოს ბაზარში (იქ, სადაც ახლა სპორტის სასახლეა) შესვლისთანავე ვიღაც წვერგაუპარსავმა კაცი დეიდა ნატოს ქვეთარების შეძენა მოსთხოვა. დეიდა ნატო ცოტა არ იყოს დაიბნა და ძლივს მოახერხა ეთქვა: ჯერჯერობით ფული არა მაქვს, თუ რამე გავყიდე ქვეთარს მაშინვე შევიძენო. წვერგაუპარსავი კაცი გაბრაზდა, — ყველა იგარე მეუბნებით, — გადააპურჭყა და წავიდა.

ბაზარი უკვე ხალხით იყო გაჭედილი. ასავალ-დასავალს ვერ გაუგებდი, ისე ირეოდნენ ერთმანეთში. დეიდამ ხელი მოჰკიდა ლუკას, — არ დამეკარგოო, და ბაზრის სიღრმისკენ წაიყვანა, ძლივს მიიკვლევდა გზას და ამ ჩუმად მოფუსფუსე ხალხში, მერმე გაჭირვებით მიაღწიეს ფარდულების რიგს და ერთ-ერთი ფარდულის უკან შეჩერდნენ.

დეიდა ნატომ ხელჩანტიდან კაბა და ზეწარი ამოიღო, ჩანთა უკან დაუბრუნა, ხოლო გასაყიდი საქონელი მკლავებზე გადაიკიდა.

— მე რა ექნა? — ჰკითხა ლუკამ და ჩანთას ჩახედა, რადგან ღარწმუნებული იყო, შანდლების გაყიდვა მას ევალებოდა.

— რა უნდა ჰქნა, არაფერი.

მართლაც, რა უნდა ექნა, იდგა პალტოს ჯიბეებში ხელებჩაწყობილი თავისი საკვოიაცით. ერთხანს არ სციოდა, რადგან ქუჩაში სიარულით საკმაოდ იყო შეხურებული. მერმე ამ

სითბოს მარაგი შემოელია. გაყინული ყურები პალტოს საყელოში ჩამალა და ადგილზეც კი დაიწყო ხტუნვა. ერთი საათის შემდეგ ყოველგვარი იმედი გადაეწურა, — ჩვენ აქ ვერაფერს გავყიდითო; თითქოს წელანდელი ფიქრები გაუმართლდა: არავინ არაფერს ყიდულობდა, ყველა რაღაცას ყიდდა. რაღაცას კი არა, ყიდდნენ ყველაფერს: ნახმარ, დაქანგულ ლურსმნებს, ეტლის გატეხილ ბორბლებს, მანქანის საბურავებს, მანქანის საბურავებისაგან შეკერილ ფეხსაცმელებს. ცალ-ცალ წინდას, სამხედრო გიმნასტურებს, მეზღვაურის ბუშლატებს, ჩექმებს, კარაკულის ქურქებს, ქოლგის ტარს, წიგნებს, საჯდომსა და მუხლისთავებზე დაკერებულ მამაკაცის ნიფხვებს, აგრეთვე ქალებისასაც, ძველ სურათებს ანდა ჩარჩოებს, საათებს, აღვირებს, ყანწებს, ნავთქურებს, ქვაბებს, ტომრებს, დანა-ჩანგალს, ბოთლებს... ქალებს... ამას ყველაფერს ყიდდნენ. მყიდველი კი არ ჩანდა. ყოველ შემთხვევაში, ლუკა მათ ვერ ხედავდა. ხედავდა მხოლოდ დაღლილ, პირქუშ სახეებს, ყველა ასაკის ქალებსა და მამაკაცებს. უმეტესად კი მათ ზურგებს, მხრებს, კისრებს. და მათ შემხედვარეს ზოგჯერ უცნაური გრძნობა ეუფლებოდა, ეჩვენებოდა, თითქოს მთელმა ქვეყანამ შეაქცია მათ ზურგი და აღარავის არ აინტერესებდა, რისთვის დგანან აქ ამ ფიცრებისაგან შეკოწიწებულ ფარდულის უკან ატუზულები. ხანდახან თვალს გააპარებდა დედაბრისკენ და გული ტკივილისაგან ეკუმშებოდა, როცა ხედავდა სიცივისაგან გალურჯებულ საცოდავ არსებას, რომელსაც უმწეოდ გაშვერილ ხელებზე გადაფენილი ჰქონდა გასაყიდად გამოტანილი ზეწარი და კაბა.

მერმე თავისთვის მოხტუნავემ უამრავ ზურგს შორის ერთი გამოარჩია, ძალზე ნაცნობი ზურგი, ამ ზურგებში ძნელი კი იყო მისი გამორჩევა, მაგრამ მაინც გამოარჩია და, როცა ეს ზურგი მობრუნდა, იგი ზაქარია ინწკირველი აღმოჩნდა — ლუკას კლასის დამრიგებელი. ზურგი მობრუნდა და მათი გაოცებული თვალები ერთმანეთს შეეფეთა. ეტყობა, არც ერთი და არც მეორე არ მოელოდა ასეთ უადგილო ადგილზე შეხვედრას.

— შენ აქ რას აკეთებ, ლუკა? — ჰკითხა გაოცებულმა ზაქარიამ მასწავლებელმა.

— რა ვიცი... ვდგავარ. — აიწურა ლუკა და გაწითლდა.

ზაქარია ინწყირველი, რომელსაც მკლავზე ჰქონდა გადაკიდებული საზაფხულო შარვალ-ხალათი, ლუკასთან მივიდა.

— მარტო ხარ?

ლუკამ პასუხის გაცემა ვერ მოასწრო, ინწყირველმა დეიდა ნატო დაინახა და დიდი მოწიწებითაც მიესალმა.

— გამარჯობათ, ქალბატონო ნატო.

— ოჰ, ბატონო ზაქარია! — ვითომ ახლალა შენიშნა დეიდა ნატომ, ეტყობა, წელან, იმის იმედით, იქნებ ვერ დამინახოსო, თვალი აარიდა, — როგორ ბრძანდებით, ბატონო ზაქარია?

— ყველანი ერთ დღეში ვბრძანდებით, ქალბატონო! — ამოიოხრა ზაქარია მასწავლებელმა, — ხედავთ? — დასძინა მერმე და მკლავზე გადაკიდებული თავისი საზაფხულო შარვალ-ხალათი უჩვენა.

— ვხედავ... ვხედავ, ჩემო ბატონო!

— ისე გამოვიტანე გასაყიდად, თითქოს ზაფხული აღარ დადგება.

— გაჰირდა ცხოვრება.

— ნამეტანი, ქალბატონო, ნამეტანი. გამეყიდა მაინც, რომ ვერცა ვყიდი.

— როგორც ჩანს, ვაჭრობა ჩვენი საქმე არ არის.

— ნამდვილად ეგრება, ქალბატონო!

— ცოტა ხანს კიდევ მოვიცდი და თუ არ გაიყიდა, წავალ შინ... ბავშვი გამეყინა.

— ნამეტანი სიცივეა, ქალბატონო. მაგრამ სიცივეს ვინ დაექებს?!

— არც ისაა კარგი, ბავშვი რომ ამ სისაძაგლეს მისჩერებია.

— მაგის ნუ გეშინიათ, ქალბატონო, ბავშვმა ყველაფერი უნდა გამოსცადოს. კარგია, ნახოს, როგორც ცხოვრობს ხალხი... გაიგებს, მარტო თვითონ რომ არ არის ამ შავ დღეში ჩავარდნილი.

უცებ ბრბოდან, როგორც სცენის ფარდიდან ტაკი-მასხარამ, თავი გამოჰყო ჭორ-ფლიანმა ალბერტმა. ლუკამ მაშინვე იცნო ჭორფლიანი ალბერტი და მისი დანახვა ისე გაუხარდა, თითქოს დიდი ხნის უნახავი მეგობარი ყოფილიყო.

— ალბერტი! — დაუძახა ლუკამ.

ალბერტმა ვერ იცნო ლუკა და დაეკვებით შეხედა. მერმე რამდენიმე ნაბიჯით მიუახლოვდა და კარგად დააკვირდა. მაინც ვერ იცნო.

— ვერ მიცანი?

— ვერა.

— მე ლუკა ვარ!

— აბა, ლუკა?

— არ გახსოვს მტკვრის პირას რომ გავიცანიით?! ლუკა!

— ვახ, გამარჯობა, ლუკა ისა ხარ, არა, კარგად რომ ბანაობ?

— კი, ისა ვარ.

— მერმე სად დაიკარგე, ბიჭო, განა ეგრე იქნება?!

— მე დავიკარგე?

— შენ არაფერი არ იფიქრო, ლუკაჯან, შენი ხარახურა ეგრევე შენახული მაქვს. მთელი დღე ვიარე „პესკაზე“ და ვერ გიპოვნე.

— ბევრი მეძებე?

— ძალიან ბევრი, მაში

— ვერ მომაგენი?

— ეს ვინა ყოფილა, ვა!

— არ გაბრაზდეს, ალბერტ, ვიცი, რომ მეძებდი.

— გეძებდი და ეგრე?! შენი ხარახურა ჩემთან არის. ნუ გეშინია გინდა, ხვალ მოდი, დილით, ცხრა საათზე, ყველაფერს მოგიტან.

— სად მოვიდეს?

— იქ, რა, საგიჟესთან.

— დილით გაკვეთილზე მივდივარ.

— ერთი გაკვეთილი შატალო დაარტყის..

— ჩუმადი — გააფრთხილა ლუკამ ჭორფლიანი ალბერტი. მერმე კი ჩურჩულით აცნობა, — ეს ჩემი კლასის დამრიგებელია!

გაკვირვებულმა თანაც შეშინებულმა ჭორფლიანმა ალბერტმა ირიბად გახედა ზაქარია ინწყირველს და დეიდა ნატოს. იგი ერთხანს აკვირდებოდა გულისყურით ორივეს, თითქოს სწავლობდა, ანდა იმახსოვრებდა მათ გარეგნობასა თუ ჩაცმულობას, მერმე ლუკას მოუბრუნდა და ჰკითხა:

— ის ქალი ვინ არის?

— დეიდაჩემია.

— გაყიდეთ რამე?

— ვერა.

— რა მაზალო ხალხია! ეგრე როგორ გაყიდით, ეხლა მუშტარი თვითონ უნდა ეძებოთ.

— მე რა ვიცი, სად უნდა ვეძებოთ?

— აქ იყავით მუშტარს მოვიყვან. — თქვა საქმიანად ჭორფლიანმა ალბერტმა და მაშინვე გაუჩინარდა. სადღაც გაძვრა და დაიკარგა.

ლუკა ძალზე კმაყოფილი ჩანდა ალბერტთან შეხვედრით მას თავისი დაკარგული ტანსაცმლის დაბრუნება არ ახარებდა იმდენად, რამდენადაც ის, რომ მოტყუებული და მოლორეხული არ აღმოჩნდა. უცებ შეუყვარდა ეს ბიჭი და უკვე ნანობდა, სინდისის ქენჯნასაც კი განიცდიდა იმის გამო, რომ ოდესღაც გუნებაში თაღლითი და გარეწარი უწოდა.

დეიდა ნატო და ზაქარია ინწყირველი იქვე იდგნენ და საუბრობდნენ. ზაქარია მასწავლებელმა საქმის ცოდნით დაახასიათა ფრონტზე შექმნილი მდგომარეობა და დაასკვნა, — ცხოვრება უფრო გაძნელებდა და გაძვირდებოდა. ასე იყო, თუ ისე, ამ ხნის განმავლობაში არავინ გაჰკარებია, არავინ დაინტერესებულა, ეგ კი არადა, ფასიც არ უკითხავთ ყასიდად, რა ღირს თქვენი საქონელიო. შემცივნებულები და მოწყენილები უიმედოდ იდგნენ. ალბათ ასევე იდგებოდნენ ბოლომდე, ხსნასავეით რომ არ გამოჩენილიყო ჭორფლიანი ალბერტი.

ალბერტი მობრუნდა და ვიღაც ჭილყვაგვივით კაცი მოიყვანა. ჭილყვავე რატომღაც დიდგულზე ჩანდა, გრძელსა და გალურჯებულ ცხვირამდე ჩამოფხატულ კეპის ქვემოდან ათვალისწუნებით შეხედა ერთსაც და მეორესაც.

— სულ ეს არის? — იკითხა ბოლოს და, მგონი, წასვლაც კი დააპირა.

— არა, ბატონო. — შეაჩერა დეიდა ნატომ, — კიდევ შანდლები გვაქვს. ლუკა, აჩვენე შანდლები.

ლუკამ საკვოიაჟიდან შანდლები ამოიღო.

— ახ, რა მშვენიერი შანდლებია! — აღტაცება ვერ დაფარა ზაქარია ინწყირველმა.

— მშვენიერი — თქვა ზიზლით ჭილყვაგვმა.



— ბებიაჩემის მზითევია! — მიაწოდა ცნობა დეიდა ნატომ.

— ჩემთვის სულერთია! — თქვა ჭილყვავმა. — შანდლები, ზეწარი, კაბა — სამასი მანეთი.

— ეგ სამი კილოგრამი პურის ფულიც არ არის! — შეევაკრა ზაქარია ინწყირველი.

— შე დალოცვილო, ცოტაა სამი კილო პური — გაბრაზდა ჭილყვავი.

— არა, ბატონო, მე არაფერს ვამბობ. — უთხრა შეშინებულმა დეიდა ნატომ.

— საკვოიაჟისაც ხომ არ ჰყიდი?

— არა.

— ალბერტ, გამოართვი! — გასცა ბრძანება ჭილყვავმა. ჭორფლიანმა ჯერ ლუკას გამოართვა შანდლები, მერმე დეიდა ნატოს — ზეწარი და კაბა.

— ამ შარვალ-ხალათსაც ხომ არ ინებებთ? — მოწიწებით შეკბედა ზაქარია მასწავლებელმა ჭილყვავს.

— ორასი მანეთი.

— კი, ბატონო, თანახმა ვარ!

— ალბერტ, გამოართვი!

ალბერტმა ზაქარია მასწავლებელსაც გამოართვა შარვალ-ხალათი, ხოლო ჭილყვავმა პალტოს ერთი, ზედა ლილი შეიხსნა და უბიდან ფული დააძრო. ერთსაც და მეორესაც თავისი მიუთვალა და უსიტყვოდ, დაუმშვიდობებლად წავიდა. ჭორფლიანი ალბერტი უკან გაჰყვა მორჩილად.

— ალბერტი! — დაუძახა ლუკამ.

— ჰო, როგორცა ვთქვით, რა! — გაეპასუხა ჭორფლიანი.

დეიდა ნატო და ზაქარია ინწყირველი იქვე დაემშვიდობნენ ერთმანეთს და გამორდნენ. თითქოს ყველაფერი ისე დასრულდა, როგორც საჭირო იყო. მაგრამ ლუკამ განშორებისას მანინც შენიშნა, როგორ შეეცვალა მასწავლებელს სახე. იგი რაღაც ნაირად დარცხვენილი და შეშფოთებული ჩანდა; თითქოს დანაშაულზე წაასწრესო, უცებ დაპატარავდა და მოიკუნტა. მერმე თითქოს ამ დანაშაულის აღიარება და ბოდიშის მოხდაც კი დააპირა, მაგრამ ვერ მოახერხა, სახე დაემანჭა და თავისი სულიერი დაძაბულობის შესანიღბად საწყალობლად გაიღიმა. ცხვირის კეხზე ჩამოცმული რქის სათვალე საჩვენებელი თი-

თით შუბლს მიაჰყლიტა და ბრბოში გაერია. ამ სათვალეს უკვე ორი თვეა, რაც ატარებს ზაქარია მასწავლებელი, ოქროს პენს-  
ნე, როგორც ჩანს, გაყიდა.

გათოშილი და ხელფეხდამზრალი ლუკა შინ დაბრუნების-  
თანავე ჩააწვინა და ჩაათბუნა ლოგინში დეიდა ნატომ. ლო-  
გინშივე დააღვიძა ცხელი, უშაქრო ჩაი, რომელსაც სასურ-  
სათო წიგნაკებით ნაყიდი ჯემი და პურის ნაჭერი მიატანა.  
დადლილს მალე ჩაეძინა.

მერმე მთელი საღამო ანდუყაფართან გაატარა. ჯერ გაკვე-  
თილები დაამზადეს, შემდეგ კი პარკების კეთებას შეუდგნენ.  
ანდუყაფარმა საუბრის დროს ეჭვი კი გამოთქვა, — არა მგო-  
ნია იმ შენმა ჰორფლიანმა ხვალ ტანსაცმელი მოგიტანოსო, მაგ-  
რამ რჩევით მაინც ურჩია — წადი, ვინ იცის, იქნებ მართლაც  
კარგი ბიჭია და მე ვცდებიო.

დილით, რაც უფრო უახლოვდებოდა დათქმულ ადგილს,  
მით უფრო რწმუნდებოდა, რომ ჰორფლიანი ალბერტი არ  
მოვიდოდა. მთელი არსებით უნდოდა ასე არ ეფიქრა, მაგრამ  
სუსხიანი ქარი, ძვალსა და რბილში გამჭოლავი სიცივე სულ  
სხვანაირ გუნებაზე აყენებდა. ვინ დაიჯერებდა, რომ ასეთ ყინ-  
ვაში, ამ დილაადრიანად გარეთ გამოვიდოდა, რათა კარგა  
ხნის წინათ დაკარგული და თითქმის დავიწყებული ნივთები  
დაებრუნებინა? ლუკა შინაგანად ამართლებდა ჰორფლიანი  
ალბერტის არმოსვლას და წინდაწინვე ემზადებოდა მოსალოდ-  
ნელი იმედგაცრუებისათვის. მაგრამ ლუკამ დათქმულ ადგილს  
ვერ მიაღწია, ნაცნობი ქუჩის ჩავლისას უცებ მოეჩვენა: საა-  
ვადმყოფოს ალაყაფის კარი ღია იყო. კარის წინ ერთი წამით  
შეყოვნდა. იმიტომ კი არა, რომ გადაეწყვიტა, — რა ვქნა,  
შევიდე ეზოში თუ არ შევიდეო? ასეთი რამ არც გაუვლია გუ-  
ნებაში, იგი ეჭვმა შეაჩერა, ეს კარი ნამდვილად ღიაა, თუ  
თვალი მატყუებსო?

კარი ნამდვილად ღია აღმოჩნდა.

ლუკა კარს მხრით მიაწვა და ეზო ფრთხილად მოათვალი-  
ერა. მერმე ასევე ფრთხილად გააპარა მზერა იმ ფანჯრისაკენ,  
სადაც მთვარისა ეგულდებოდა. არა მარტო მთვარისასი, ყველა  
ფანჯარა დახურული აღმოჩნდა.

ეზოში არავინ ჩანდა და გათამამებულმა ლუკამ შენობებს  
ჩამოუარა, პირველი სართულის ფანჯრები შეათვალიერა. ყვე-

ლა ფანჯრიდან მხოლოდ ცარიელი სიბნელე იხედებოდა...

ლუკამ უცებ ფრთხილი ნაბიჯების ხმა გაიგონა, შეშინებული შემობრუნდა და მისკენ მომავალი ორი თმაგადახოტრილი მამაკაცი დაინახა; ნელი ნაბიჯით მოსეირნებებმა სულ ახლოს ჩაუარეს, მაგრამ, ეტყობა, საუბრით იყვნენ გართულნი და ლუკა ვერ შეამჩნიეს. ორთავეს ნაცრისფერი, ფართხუნა ხალათები ეცვათ. ხალათებს ქვემოთ თეთრი ნიფხვები მოუჩანდათ.

ალბათ სიცივეს ვერ გრძნობდნენ, რადგან წინდები არ ეცვათ, შიშველი ფეხები ფლოსტებში ჰქონდათ წაყოფილი. ერთი, ოდნავ დაბალი, წინ მიდიოდა გულხედაკრეფილი. ლუკას ჯერ ეგონა, ეს კაცი იმიტომ დადიოდა გულხედაკრეფილი, რომ ხელებს ილლიებში ითბობდა, მაგრამ მერმე, როცა ხალათზე დაკერებული დიდი ჯიბეები შენიშნა, გაიფიქრა — როგორც ჩანს, ასეა შეჩვეული სიარულსო. მეორე მამაკაცი — მაღალ-მაღალი ნახევარი ნაბიჯით უკან მისდევდა და გამომეტყველებითა და მთელი არსებით უდიდეს მოკრძალებასა და მოწიწებას გამოხატავდა დაბლის მიმართ.

ისინი შორს არსად წასულან, იქვე ტრიალებდნენ უზარმაზარ ხეებს შორის. ლუკასაც აუარ-ჩაუარეს რამდენჯერმე, მაგრამ იგი ამჯერადაც არ შეუმჩნევიათ, თითქოს ამქვეყანად არ არსებობდა. ისე, კაცმა რომ თქვას, არც ლუკას უცდია თვალეებში შეჩხირებოდა, მაინც შეშინებული იყო და ერიდებოდა, შეძლებისდაგვარად ხეებს ეფარებოდა.

ლუკა მიხვდა, გიჟები რომ იყვნენ. თუმცა გიჟებზე მას სხენაირი წარმოდგენა ჰქონდა და ძალზე უკვირდა, როცა ეზოში ასე თავისუფლად მოსეირნებებს ხედავდა, თანაც ასე სერიოზულად დაფიქრებულებს. თუ გიჟები არიან, გარეთ რა უნდათ, თუ გარეთ არიან რატომ არ ყვირიან, ან ერთმანეთს რატომ არ ურტყამენო, — ფიქრობდა ლუკა, — ყოველ შემთხვევაში ქვას მაინც უნდა ისროდნენო.

ლუკას მათი საუბარიც ესმოდა. ამ საუბარმა ხომ სულ მთლად შეუცვალა გიჟებზე წარმოდგენა, მიუხედავად იმისა, რომ მათი ნალაპარაკევიდან ბევრი რამ ვერ გაიგო.

— თუ შეიძლება, ერთი შეკითხვა მოგცეთ? — მიმართა მაღალმა დაბალს და მოწიწებით გაუღიმა. — რა არის ბედნიერება?

— ჩვენის აზრით, თქვენ არასწორად დასვით საკითხი, — უპასუხა ცოტა ხნის ფიქრის შემდეგ დაბალმა. — ჯერ უნდა გავარკვიოთ, არსებობს თუ არ არსებობს ბედნიერება და მერმე უნდა ვიკითხოთ, რაში მდგომარეობს მისი არსი.

— სრული ჭეშმარიტებაა! მაგრამ მე ვერასოდეს წარმოვიდგენდი, თუ თქვენ მის არსებობაში ოდნავ მაინც შეგეპარებოდათ ეჭვი, ნუთუ თქვენ არასოდეს ყოფილხართ ბედნიერი, ნუთუ თქვენ არასოდეს არ განგიცდიათ ბედნიერება?

— არასოდეს!

— არც იტალიაში ყოფნისას?

— არა!

— არც ეგვიპტეში?

— არა!

— თვრამეტი ბრიუმერი?

— არა!

— ნუთუ აუსტერლიცის მზემაც არ გაგათბოთ ბედნიერებით?

— არა და არა!

— იქნებ... — აქ ცოტათი შეყოყმანდა მაღალი და ბოლოს შეპბედა, — იქნებ ვატერლოვ?.. თუმცა... მაპატიეთ, თქვენო უდიდებულესობავ!..

— ვატერლოვს ნუ გამახსენებთ! თუმცა რატომ?.. — ისევ ჩაფიქრდა დაბალი და ფიქრის შემდეგ უპასუხა. — მე მაშინ მივხვდი, რომ შესაძლებელია, მართლაც არსებობდეს ბედნიერება!

— მაშინ მიხვდით პირველად?

— დიახ, ჩემო კეთილო! ახლა კი სრულ ბედნიერებას განვიცდი, მე ჭეშმარიტად ბედნიერი ვარ!

— მაღლობა ღმერთს!

— მე ხშირად მიფიქრია, რატომ ვარ-მეთქი ასე ბედნიერი და ამიხსნია კიდევ. რატომ? იმიტომ, რომ ცოცხალი აღარა ვარ! იმიტომ, რომ გარდაცვლილი ვარ!

— როგორ? განა თქვენ ცოცხალი აღარა ხართ?

— რა თქმა უნდა! არც მე და არც თქვენს ჩვენ უკვე დიდი ხნის გარდაცვლილები ვართ!

— გმადლობთ, თქვენო უდიდებულესობავ!

— ნუთუ თქვენ ისურვებდით სხვა გარსში ყოფნას? — ან-  
ლა თავის მხრივ ჰკითხა დაბალმა.

— რასაკვირველია, არა!

— ჩვენ ღმერთმა დაგვიფარა წარმავალი უმადურებისაგან. ჩვენ უკვე აღარ შეგვცხება ქვეშევრდომთა და მეგობართა ღალატი, რომელსაც იქ... — დაბალმა იღლიიდან მარჯვენა ხელი დაიძრო და საჩვენებელი თითი ალაყაფისკენ გაიშვირა, — კიდევ დიდხანს ექნება აფარებული ნიღბად მოჩვენებითი ერთგულება.

— ოჰ! რა საშინელებაა უმადურება!

— არ არსებობს უფრო შემზარავი გრძობა! განა უმადურების მსახვრალი ხელით არ განიგმირა დიდი კეისარი? განა უმადურების ძლიერმა ყბებმა არ გამოხრეს სამშობლოდან გადახვეწილი სახელოვანი სციპიონის ძვლები, ეს მე დავაწერე მის საფლავს ეპიტაფიად: „უმადურო სამშობლოვ, შენ ვერ ეღირსები ჩემს ძვლებს“.

— დიახ, თქვენო უდიდებულესობავ!

დაბალმა დამცინავად ჩაიღიმა და თავისთვის ჩაილაპარაკა:

— მე შევაჩვიე ისინი დიდ გამარჯვებებს და მათ ერთი პა-  
ტარა მარცხი აღარ მაპატიეს!..

მაღალს უცებ აღელვება დაეტყო:

— თქვენო აღმატებულებავ, უკან ხომ არ შევბრუნდეთ?

— უკან?

— დიახ! შინ შევბრუნდეთ, თორემ ცერბერი გვიახლოვ-  
დება.

— აჰა! რა თქმა უნდა!

ისინი ფაცხაფუცხით გაიჭრნენ შენობისაკენ, წინ დაბალი მიაფრატუნებდა ფლოსტებს, უკან — მაღალი. მერმე ქვის ხუთიოდე საფეხური აირბინეს, კარი შეაღეს და უკან მოუხე-  
დავად შეეცივდნენ შენობაში.

ლუკასკენ ხელცოცხიანი მეეზოვე მოდიოდა. ლუკას ახ-  
ლაც შიშისაგან გული გადაუქანდა, დაიბნა, აღარ იცოდა, სა-  
ით გაქცეულიყო. დაბნეულმა სწრაფად გაირბინა მანძილი  
ქვის კიბეებამდე. ანგარიშმიუცემლად აათავა საფეხურები და  
შენობას შეაფარა თავი. შიშით გახედა გრძელ დერეფანს. ნა-  
ხევრად დაბნელებულ დერეფანში წელანდელი მოსაუბრენი  
ისე დინჯად დასეირნობდნენ, როგორც მასწავლებლები დიდ  
შესვენებაზე.

შესვლისთანავე გაყუჩდა და კარს მიაყურა: გარედან ჩამიჩუმი არ ისმოდა, ასე გაყუჩებული იდგა კარგახანს. მერმე კარი გააღო და ეზოში გამოიხედა. ეზოში არავინ ჩანდა. გამოვიდა და იქაურობას ისევე შიშით მოაგლო თვალი.

— მოდი აქ, მოდი! დაგიჭირე თუ არა, შე ყურუმსალო, შენა!

ლუკამ ჭერ ცოცხი დაინახა, მერმე — ფარაჯიანი მეეზოვე. როგორც ჩანს, ლუკას ხის უკან ჩაუსაფრდა და ელოდებოდა, შენობიდან როდის გამოვიდოდა.

ლუკამ გაქცევა სცადა, მაგრამ უცებ იგრძნო, რომ გაქცევის ვერ შესძლებდა, შიშისგან მუხლებში ძალა გამოსცლოდა და ძლივს იდგა ფეხზე. ბედს დამორჩილდა. მოხუცმა მეეზოვემ მხარში მიძიმე ხელი ჩაავლო და ეზოს სიღრმისკენ წაიყვანა.

— მაპატიე, ძია! — უთხრა ლუკამ მთრთოლვარე ხმით. — მაპატიე, მეტს აღარ ვიზამ!

ფარაჯიან მოხუცს ლუკას ვედრებისათვის ყური არ უთხოვებია, არც ხელი შეუშლია, ასე დაჭერილი მიჰყავდა სადღაც.

— გამიშვი რა, ძია, — ისევე სთხოვა ლუკამ, — სკოლაში მაგვიანდებია!

— აქ რომ შემოდრიოდი, მაშინ არ გაგვიანდებოდა სკოლაში?!

— მე ხომ არაფერი დამიშავებია!

მოხუცმა მეეზოვემ ლუკა ერთ მერხთან მიიყვანა და უთხრა: აქ დაჯექი, ცოტა წავისაუბროთო. ლუკა დაჯდა. მოხუცი მეეზოვე გვერდით მიუჯდა, ცოცხი მერხზე მიაყუდა. ლუკას, რა თქმა უნდა, წარმოდგენილი არ ჰქონდა, როგორ წარიმართებოდა მათი საუბარი და არც აინტერესებდა. ერთთავად იმაზე ფიქრობდა, იქნებ რაღაც მანქანებით დავუსხლტე ამ შემზარავ მოხუცს და აქაურობას გავეცალოო.

— ამ დილაადრიან რა გინდოდა, რისთვის შემოეხეტე? — ჰკითხა მოხუცმა.

— რა ვიცი... კარი ღია იყო და შემოვედი.

— ბიჭოს! სადაც ღია კარს ნახავ, ყველგან კი არ უნდა შეხვიდე!

— მაპატიეთ, არ ვიცოდი...

— რა არ იცოდი?

— თუ არ შეიძლებოდა აქ შემოსვლა.

— იმათთან რა საქმე გქონდა?

— ვისთან?

— აქ რომ დაეთრეოდნენ.

— არაფერი. პირველად ვნახე. არც კი შეუხედავთ ჩემთვის, ხმაც კი არ გაუციათ.

— არც გაცემდნენ. ის დაბალი მაინც ძალზე ამპარტავანი ვინმეა, დიდი რაღაც ჰგონია თავისი თავი. მაგრამ სადაც წავასწრებ ერთ ლაზათიანად გავცოცხამ და, იცოცხლე, კუდს ამოიძუებს ხოლმე. არ მიყვარს ამპარტავანი ხალხი, თუ კაცი ხარ, კაცი იყავი, რას იბერები, შე ოხერო! — მოხუცმა მრისხანედ გახედა შენობის კარს, სადაც წელან ის ორნი შეიძურწნენ.

ლუკა ამ საუბარმა ცოტათი დაამშვიდა. — არც ისე ცუდი მოხუცი ყოფილაო. მაგრამ მაინც წუხდა, დრო გადიოდა, ეს კი აქ უაზროდ იჯდა და მეეზოვეს ელაპარაკებოდა. ალბათ მეორე გაკვეთილიც საცაა დამთავრდებაო, — გაიფიქრა.

ამასობაში მოხუცმა მეეზოვემ ფარაჯის უბიდან ფანდური დააძრო. ხმა გაუსინჯა, გამართა და თითებიც ჩამოჰკრა. ჯერ „ახ, ტრაქტორო...“ იმღერა, მერმე — „შირაქში ერთმა მეცხვარემ“. „აუ, ამ სიმღერას როდის გაათავებს!“ — შეწუხდა ლუკა, მაგრამ სხვა რა გზა ჰქონდა, ბოლომდე უნდა ესმინა. იჯდა თავისთვის და ქუჩაში გასასვლელ კარს მოწყენილი გასცქეროდა. უცებ სასაცილო ფიქრმა გაუელვა თავში: ნეტავი, რას იფიქრებს ანდუყაფარი, შემთხვევით აქ რომ შემოიხედოს და ასე მჯდარი დამინახოსაო. ამ ფიქრმა, ცოტა არ იყოს, გაამხიარულა ლუკა და გუნება შეუცვალა.

მოხუცმა მეეზოვემ „შირაქში ერთმა მეცხვარემ“ ბოლომდე იმღერა, მერმე წამოდგა და ლუკას უთხრა: ახლა წავიდეთ, შენთვის არა მცალიაო!

ორივენი ქუჩაში გასასვლელი კარისკენ გაემართნენ საქმიანი ნაბიჯით. მთვარისას ფანჯარას რომ გაუსწორდნენ, ლუკამ უცებ ჰკითხა:

— ძია, აქ რომ ქალი ცხოვრობდა, ახლა სად არის?

— სადა?

— აი აქ, — თითი გაიშვირა ლუკამ ნაცნობი ფანჯარისკენ.

— მანდ არავინ არ ცხოვრობდა, ეგ სამრეცხაოა.

— როგორ არა, ძია, მე ვიცნობდი... მთვარისა ჰქვია. — არ მოეშვა ლუკა.

— შენ მე აქაურობას ნუ მასწავლი, ოცდაათი წელია აქ ვმუშაობ და ყველას ვიცნობ. რა მთვარისა, რის მთვარისა? ეგ ფანჯარა სამრეცხაოსია — მოხუცმა მეგზოვემ ლუკა ქუჩაში გამოისტუმრა და დამშვიდობებისას უთხრა, — თუ დრო გექნეს, გამოიარეო, — მერმე კარი შიგნიდან ჩაქეტა.

ლუკა ერთხანს გაოგნებული იდგა. ფიქრში სცადა, ცხადად წარმოედგინა ის დღე, როცა პირველად აქ შემოვიდა და ფანჯარას მომდგარი მთვარისა ნახა. ლუკას ყველაფერი ზედმიწევნით კარგად ახსოვდა. მთვარისას ხმაც კი გაიგონა. მაინც დაეჭვდა: „იქნებ მომეჩვენა, იქნებ მართლაც არ არსებობს ქვეყანაზე მთვარისა?“

როცა გამოტრიალდა, გაახსენდა, რისთვისაც იყო მოსული. ქუჩას ქვევით, მტკვრისკენ დაჰყვა, კიდემდე მივიდა და ნაპირს გახედა. ნაპირზე ჭორფლიანი ალბერტი არ დახვედრია, გინდაც მოსულიყო, ამდენ ხანს ალბათ არ მოიცილიდა.

ცივი დღე იყო, ნაცრისფერი, მტკვრიდან მსუსხავი ქარი უბერავდა.

## თავი მხათი

დათიკო ბერიშვილმა კიდევ ერთხელ შესთავაზა დეიდა ნატოს ბინის გაცელა. ამჯერად ემა გამოუგზავნა შუამავლად, ჯუჯა რუბენას და. ემა შავგვრემანი, ეშხიანი ქალი იყო, პირმრგვალი და ტანსრული. თავის დროზე უბნის ბიჭებს თვალი ზედ რჩებოდათ, მიუხედავად ასეთი დაქინებული ყურადღებისა, მაინც გაუთხოვარი დარჩა და ახლა თავის ჯუჯა ძმასთან ერთად ცხოვრობდა, დათიკო ბერიშვილის ოთახის გვერდით, პირველ სართულზე.

დეიდა ნატომ, რა თქმა უნდა, ემაც უარით გაისტუმრა, თან დააბარა: სანამ პირში სული მიდგას, ამ ბინას არ დავტოვებ და ეგ უსინდისო მეტს ნულარ შემაწუხებსო. ემა, ძველი დაბალისაგან განსხვავებით, მაინც ცდილობდა დედაბრის დაყოლიებას, მაგრამ არაფერი გამოუვიდა და პირში ჩალაგამოვლებული გაბრუნდა უკან. ემას წასვლის შემდეგ დეიდა ნატოს



ნერგები დაეწეწა. მთელი ღღე ჰირვეულობდა, წყევლიდა დათიკო ბერიშვილსა და იმათ, ვინც ქვეყნად ომი მოიგონა და ასეთი უსაშველო ტანჯვა-წამება მოუტანა ადამიანებს.

— ფრთხილად უნდა ვიყოთ, ლუკა, ფრთხილად! იმის ნაცვლად, გაჰირვებულებს ხელი გამოგვიწოდონ, ხედავ, რა ღღეში გვაგდებენ?! — მიმართა დეიდა ნატომ დისშვილს, თვალები ჰერს მიაპყრო და პირჯვარი გადაიწერა, — ღმერთო, მშვიდობით დააბრუნე ჩემი და და სიძე, მერმე მე ვიცი, არავის არ ვაპატიებთ ჩვენი ოჯახის აბუჩად აგდებას!

ლუკა მეორე ოთახში გაიპარა, დედაბრის ხმა რომ აღარ გაეგონა და გულაჩუყებულმა ფარულად მოიწმინდა ცრემლი. მარტოდ დარჩენილი დიდხანს ფიქრობდა და ოცნებობდა მშობლების დაბრუნებაზე. ცხადადაც კი წარმოიდგინა ის ღღე, როცა ფრონტიდან დაბრუნებული მამა სამაგიეროს ღირსეულად მიუზღავდა დათიკო ბერიშვილს, თუმცა ბოლომდე ვერ გაეგო, რაში გამთიხატებოდა მათი ოჯახური ღირსების აბუჩად აგდება.

იმავე საღამოს, ანდუყაფარმა ლუკასგან რომ შეიტყო, დათიკო ბერიშვილმა ბინების გაცვლის თაობაზე ისევ მოგვიგზავნა კაციო, ნაღვლიანად გაიღიმა და პარკების კეთება განაგრძო. ლუკა ორივე მკლავით დაყრდნობოდა მაგიდას და თვალს ადევნებდა ანდუყაფარის თხელი თითების მოძრაობას. თითები გასაოცარი სისწრაფით და სიმარჯვით კეცავდნენ და აწებებდნენ ქალაღლის კიდევებს, ასეთივე სისწრაფით იზრდებოდა ანდუყაფარის ხელმარჯვნივ მაგიღის კუთხეში დაწყობილი პარკების დასტა.

მაგიდაზე ნავთის პატარა ლამპა ბეუტავდა.

— ადამიანები საჭიროების მძიმე ბორკილებითა ვართ ერთმანეთს გადაბმულნი, — თქვა ანდუყაფარმა, — საჭიროების მძიმე ბორკილებით... სამწუხაროდ ასეა... ადამიანთა დამოკიდებულებებისა და ურთიერთობის ხარისხი იმით განისაზღვრება, თუ რამდენად ვჭირდებით ერთმანეთს. ხედავ, რა ხდება? მე შენ მეგობრად მიმაჩნისარ და ამავე დროს კეთილი ურთიერთდამოკიდებულება მაქვს იმ კაცთან, ვისაც თქვენი ოჯახისათვის ცუდი რამ განუზრახავს. წესით, მე უნდა მივაფურთხო და ეს ქალაღლებიც სახეში უნდა მივაყარო დათიკო ბერიშვილს. ეა კი არადა, ახლა აქ რომ შემოვიღეს, გავუ-

ღიმებ კიდევ და ხელსაც ჩამოვართმევ. თანაც კმაყოფილი დავრჩები, რადგან კეთილინება და მესტუმრა. რატომ? იმიტომ რომ ჩემი არსებობა იმ კაცზეა დამოკიდებული. ასეა... დათიკო ბერიშვილიც ვილაცაზეა დამოკიდებული და მიჯაჭვული, ის ვილაცა კიდევ სხვა ვილაცაზე და ასე გრძელდება ეს მძიმე ბორკილები.

ანდრუყაფარი ცოტა ხანს გაჩუმდა, ხელები დაასვენა. მერმე თქვა:

— თუმცა ასეთ ურთიერთდამოკიდებულებას არავითარი ღირებულება არა აქვს: ჭრება საჭიროება, უმტკივნეულოდ წყდება ურთიერთობის ჯაჭვიც. ფასეულია მხოლოდ ნაღდი სიყვარული და მეგობრობა, ნაღდი, უანგარო, აი ისეთი, როგორი სიყვარულითაც მე შენ მიყვარხარ, ანდა როგორი მეგობრობითაც შენ მე მმეგობრობ. შენ ხომ ჩემგან არაფერს გამოელი? ანდა რას უნდა ელოდე ჩემგან — ნახევარი კაციისაგან?!

ლუკას ახლაც აუჩუყდა გული და წასვლა დააპირა. მაგრამ როგორღაც შეიკავა თავი და არ აცრემლდა. ძალზე შეეცოდა მეგობარი, ამაზე არასოდეს არ უფიქრია, მხოლოდ ახლა უთხრეს და მიახვედრეს, რომ ანდრუყაფარი ნახევარი კაცია. რატომღაც დარცხვენილი შესცქეროდა ველოსიპედის ბორბლებიან სავარძელში უღონოდ მიწოლილს, რომელიც თავის მხრივ ნაღვლიანი ღიმილით დაჰყურებდა საპარკე ქალაღლებზე უმოძრაოდ. დაფენილ საკუთარ ხელებს.

— გაიგე, რაც გითხარი?

— რა ვიცი...

— თუ გინდა, უფრო გასაგებად გეტყვი.

— არა, არ მინდა, გავიგე. — რა თქმა უნდა, ლუკამ კარგად ვერ გაიგო, რაც ანდრუყაფარმა უთხრა.

— საჭიროება მძიმე ბორკილებით აკავშირებს ადამიანებს, მეგობრობა — უხილავი ძაფებით. მაგრამ ერთი ნაკლი მაინც აქვს ამ უხილავ ძაფებს: ეს უხილავი ძაფი შეიძლება, ისე გაწყდეს, რომ მთელი სიცოცხლის მანძილზე ვერ შენიშნო. — ანდრუყაფარი ერთხანს გაჩუმდა, მერმე თქვა: — ოო, ეს შემზარავია!

ისევ ჩამოვარდა ღუმილი. ღუმილი ახლა ლუკამ დაარღვია:

— ანდრუყაფარ, არსებობს თუ არ არსებობს ბედნიერება?!

— რატომ შეკითხები?.. საიდან დაგებადა ასეთი აზრი? —  
გაიცინა ანდრუყაფარმა.

— რა ვიცი...

— მაინც?

— ისე, მაინტერესებს.

— ეგ შეკითხვა ისე ძველია, ცოტა არ იყოს, ბანალურობის  
სუნიც ასდის. ამ შეკითხვას ყოველთვის შეკითხვით პასუხობენ:  
ჯერ უნდა გავარკვიოთ, — რა არის ბედნიერებაო? ის რაც  
შენთვის ბედნიერებაა, შეიძლება სხვისთვის უბედურება აღ-  
მოჩნდესო. ბედნიერება სხვანაირი ცნებაა და ამიტომ გვაწვა-  
ლებს საუკუნეების მანძილზეო...

ამ დროს ვილაცამ ფრთხილად დააკაკუნა კარზე და ანდრუ-  
ყაფარს ლაპარაკი შეაწყვეტინა.

— შემოდი! — დაუძახა ანდრუყაფარმა.

კარი გაიღო და ოთახში ჯუჯა რუბენა შემოვიდა, ქოსა,  
დამჰკნარი სახე სიცივისაგან მთლად გალურჯებოდა.

— გამარჯობათ!.. — მიესალმა ოთახში მყოფთ, უზარმაზარ-  
ი კეპი მოიხადა და ისევ დაიხურა. — უნდა წავილო... იმუ-  
შავე?

— კი. — უპასუხა ანდრუყაფარმა.

— სულ ეს არის? — იკითხა ჯუჯამ და მაგიდაზე დაწყობილ  
პარკების დასტას შეხედა.

— არა, მაგიდის ქვეშაა.

ლუჯა მაგიდის ქვეშ შეძვრა და პარკების ორი დიდი შეკ-  
რულა გამოათრია.

— კარგად გიმუშავია! — შეაქო ჯუჯამ.

— ისე, რა.

— რამდენია?

— არ ვიცი, არ დამითვლია.

— მე დავთვლი, ხომ მენდობი?

ანდრუყაფარმა გაიღიმა და ხელეები გაშალა, ვითომ ეგ რა  
სათქმელიაო.

— გაიგეთ ახალი ამბავი? — ცბიერი დიმილით იკითხა ჯუ-  
ჯამ.

— არა. რა მოხდა? — უცბად დაინტერესდა ანდრუყაფარი.

— იზა დაიკარგა.

— იზა?

— ჰო! წუხელ არ მოსულა და დღესაც არ გამოჩენილა.

ანდუყაფარმა რატომღაც ლუკას შეხედა და მერმე ისევ ჭუჭა რუბენას მიაშტერდა.

— ძია ლადო გაგიჟებულია. წუხელ არ სძინებია, დღესაც მთელი დღე ქუჩაში დაძრწის. — განაგრძო ჭუჭამ.

— იქნებ დედასთან წავიდა? — ეჭვი გამოთქვა ანდუყაფარმა.

— ეგ ძია ლადომაც თქვა. მაგრამ არავინ არ იცის, სად ცხოვრობს დედამისი.

— მილიციისათვის უნდა შეეტყობინებინა.

— შეატყობინა. ისინიც ეძებენ.

— რამე ხიფათი არ შეემთხვეს. ცოდვაა. კარგი გოგოა.

— კარგია, მაგრამ... ძნელი მოსაველეია.

— რატომ?

— იმიტომ, რომ თვალი სულ გაქცევაზე უჭირავს.

— სად გარბის ეგ დალოცვილი?

— ლუკა აქ არ იყოს, გეტყვოდი...

— ლუკა შენ პატარა ხომ არ გგონია, მაგან ჩვენზე მეტი იცის.

— ეგ გოგო, გინდაც დააბა, არ გაჩერდება, — თქვა გამოცდილი კაცივით ჭუჭამ, — მე რას მომატყუებ, ტანზე ცეცხლი ეკიდება.

— ეგ მართალია! — დაუდასტურა ანდუყაფარმა.

— ვიცი და იმიტომ ვამბობ. მაგას ჩვენი ბიჭები მოუვლიდნენ, მაგრამ სად არიან? — ცოტახნით შეყოვნდა ჭუჭა და მერმე თქვა, — პეტოს დალუპვის ამბავი მოვიდა.

— რას მეუბნები!

— პეტოც დალუპულა და ჩოლახას ჯიბოც.

— პეტოცა და ჯიბოც?! —

— ჰო!

— ამის დედა ვატირე! ნახე, რა ბიჭები წავიდნენ?!

— ეჰ! — ამოიოხრა ჭუჭამ. ორივე შეკრულას დაავლო ხელები და კარისკენ წაათრია.

— მოგეხმარები, — უთხრა ლუკამ.

— არ მინდა, მარტოც მოვერევი.

ჭუჭა წავიდა. ლუკამ კარი მიიხურა და ისევ მაგიდასთან დაბრუნდა. ანდუყაფარი თავის საუარძელში მისვენებულყო,

თვალეზდახუქული, გამზდარი და ფერმკრთალი ლამპის შუქზე მიცვალეზულს ჰგავდა. ლუკამ ველარ გაუძლო სიჩუმეს და ფეხაკრეფით გავიდა გარეთ.

აივანზე ბნელოდა და ციოდა. სწრაფად შევარდა შუშაბანდში.

— რომელი ხარ? — იკითხა ოთახიდან დეიდა ნატომ.

— მე ვარ, ლუკა!

შუშაბანდშიც და ოთახშიც ისევე ბნელოდა და ციოდა, როგორც გარეთ. დეიდა ნატო უკვე ლოგინში იწვა, თუმცა ჯერ რვა საათიც კი არ იყო.

— ცივა, არა?

— კი, ძალიან.

— შენც დაწეკი და ჩათბები.

— ლოგინში რა გამაჩერებს.

— გაიყინები.

— ანდუყაფართან უფრო თბილა.

— ყოფილიყავი იქ, რა გეჩქარებოდა?

— რა ვიცი. — ლუკამ ხელის ფათურით მიაგნო საკიდს და პალტო ჩამოიღო.

— რას ბუჯურობ?

— არაფერს. ისეე გავალ ანდუყაფართან.

— კარგი. ოღონდ ნუ დაიგვიანებ.

ლუკამ პალტოში გაუყარა ხელები და აივანზე გავიდა. ანდუყაფართან დაბრუნება არც უფიქრია, მოაჯირთან მისულმა ეზოს გადახედა. ეზო, ისევე, როგორც მთელი ქალაქი, ცივსა და მდუმარე წყვილიადს მოეცვა. ეს სიბნელე ძალიან ახლო იყო ლუკასთანაც, იმდენად ახლოს, რომ სხეულზე ცივი ბეწვითაც ეხებოდა და თვალეზზე თავის ფაფუკ, მაგრამ გაყინულ თათებს აფარებდა. ლუკას მოუსკვნრობის გაურკვეველი გრძნობა აფორიაქებდა, აწრიალებული ადგილს ვერ პოულობდა. ხელის ფათურით ჩაათავა კიბეები და ეზოში ჩავიდა. სიბნელე და უკაცრიელი სიჩუმე აშინებდა და აშავე დროს თავისკენ ექაჩებოდა და იზიდავდა, როგორც ჭაობი. სიბნელე თითქოს რაღაცას ჰპირდებოდა, გაურკვეველის გარკვევას, შეუცნობელის შეცნობას. მაგრამ გული მაინც შიშით უფართხალებდა და სიბნელეში ნაცრისფერხალათიანი მამაკაცები ელანდებოდა. ისინი წყვილ-წყვილად დადიოდნენ ეზოში. დინჯად

საუბრობდნენ და საოცრად ჰგვანდნენ ერთმანეთს სიარულითაც, ხელების ქნევითაც და ნიფხვების თეთრი ტოტები-თაც, რომლებიც ხალათის კალთებს ქვემოთ მოუჩანდათ.

ხელის ფათურით მიაღწია რუბენას სამტრედიემდე. სამტრედესთვის ხელი არ გაუშვია, ისე გახედა ძია ლადოს შუშაბანდს. ფანჯრები ძალზე მკრთალად იყო განათებული, ეტყობა ოთახში ლამპა ბუქტავდა და მისი სუსტი შუქი შუშაბანდშიც ჟონავდა. დაძაბული ცნობისმოყვარეობისაგან გული გამალებით უცემდა. ერთი სული ჰქონდა, გაეგო რა ხდებოდა იქ, ძია ლადოს ოთახში. თუმცა ამ გაყინული, მკრთალი შუქის მიხედვით, ეტყობა, მნიშვნელოვანი არაფერი ხდებოდა. ალბათ იზა ვერ მონახეს, ანდა ძია ლადო ჯერ არ იყო დაბრუნებული.

— პატარა ბიჭო, ერთი წუთით მოდი აქ. — დაუძახა ვიდაცამ სულ ახლოდან ლუკას.

მიუხედავად იმისა, რომ ეს სიტყვები წყნარად, თითქმის ჩურჩულით იყო ნათქვამი, ლუკას შიშისგან გული გადაუქანდა და მუხლები მოეკვეთა. უცებ ცახცახმა აიტანა და ძლივ-ძლივობით შეიკავა თავი, კინალამ იქვე ჩაიკეცა. მართალია, ლუკას ამქამად რუსულად მიმართა ვიდაც ქალმა, მაგრამ რატომღაც მოეჩვენა, თითქოს მთვარისა ეძახდა.

— ნუ გეშინია, პატარა ბიჭო...

— ვინა ხარ? — ჰკითხა. შეშინებულმა ლუკამ, თან გაიფიქრა: ამ სიბნელეში რას ხედავს, რა იცის ახლა ამან, პატარა ვარ თუ დიდო.

— გეტყვი ვინცა ვარ... ოღონდ ნუ ყვირი. — როგორც ჩანს, უცნობი ქალი ცაცხვის ქვეშ, სკამზე იჯდა, ანდა შესაძლებელია იდგა კიდეც. ხმამაღლა ლაპარაკს აშკარად ერიდებოდა, ჩურჩულით მიმართავდა ლუკას.

სიბნელეში ფოსფორისფრად ორი წერტილი აინთო კატის თვალებივით და მაშინვე ჩაქრა. ლუკას ეგონა, რომ იქვე მაგიდაზე კატაც მოკალათებულყო და ლუკას მისჩერებოდა თავის მრგვალი თვალებით.

— კარგი, — თქვა ქალმა. — თუ გეშინია ნუ მოხვალ. ჩემთვის სულერთია, მანდ იდგები, თუ აქ მოხვალ, ეს ერთი სიკეთე მომანიჭა ღმერთმა, მე დღეცა და ღამეც ერთნაირად ვხედავ, ერთნაირად ვარჩევ საგნებს. მე ახლა ვხედავ, რა შეში-

ნებული შემომცქერი. შენ გეშინია ჩემი, მაგრამ მე გეუბნები, ნუ გეშინია-მეთქი. მე კეთილი ადამიანი ვარ, შეიძლება ყველაზე კეთილიც მთელს ქვეყანაზე, ჩემს გულში ნამცეციც არ არის სიავისა და ბოროტებისა. მე ეს-ესაა მოვიყვანე თქვენი მეზობელი იზა, რომელსაც ორი მთვრალი მამაკაცი ჯანდაბაში მიათრევდა. თვითონაც მთვრალი იყო და არაფრის თავი აღარა ჰქონდა. მთვრალ კაცებს გამოვგლიჯე ხელიდან იზა და შინ მივიყვანე. იმდენად იყო გონებადაკარგული, ძლივს მიაგნო საკუთარ სახლს. მაგრამ სიკეთე ვის დაუფასეს, ჩემთვის რომ დაეფასებინათ. მათ ქალიშვილს მოვუარე და შინ ხელუხლებელი მოვგვარე. მაგრამ მადლობის ნაცვლად მოხუცებმა გამომაძევეს, როგორც ქუჩის მაწანწალა, ისე გამომაგდეს. სიტყვა არ მათქმევინეს. ალბათ იზას მეგობრად მიმიღეს და ეგონათ ეს დღეები მასთან ერთად გავატარე. მე სულაც არ ვიცნობ იზას, დღეს სრულიად შემთხვევით წავაწყდი... — ქალი გაჩუმდა და სიბნელეში კიდევ ერთხელ გაიელვა კატის თვალებმა.

ლუკა ოდნავ დაამშვიდა ქალის საუბარმა, მაგრამ ახლოს მისვლას მაინც ვერ ბედავდა.

— ერთი რამ უნდა გთხოვო, პატარა ბიჭო. მე ღამის გასათევი არა მაქვს და იქნებ ვინმემ გამათევინოს ერთი ღამე. ძალიან ცივა და გარეთ რომ დავრჩე, გავიყინები. ხვალ დილით კი ჩემს გზას მოვნახავ და წავალ. მეგონა, ისინი მადლობის სანაცვლოდ ერთი ღამით შემიფარებდნენ მაინც, მაგრამ ცხვირწინ მომიხურეს კარი. არც ვამტყუნებ, იმდენად იყვნენ აღელვებულები და გაბრაზებულები, ზედაც არ შემომხედეს... ნუთუ ამხელა სახლში ჩემთვის არავის არ ექნება პატარა კუთხე? მე ლტოლვილი ვარ, მთელი უკრაინა თითქმის ფეხით გამოვიარე... — ქალი ისე გაჩუმდა, თითქოს უცებ ხმა დაკარგა.

— კარგი. — უთხრა ლუკამ, — ახლავე წავალ და ვეტყვი დეიდაჩემს, თუ დამთანხმდა, დაგიძახებ. ცოტახანს მომიცადე.

— მოგიცილი, აბა, რას ვიზამ?! მე აქედან ფეხის გამდგმელი არა ვარ. ქუჩაში გასვლა უკვე აღარ შეიძლება.

— თუმცა, თუ დეიდამ არა ქნა, ჩემს მეგობარს ვეტყვი. წამომყვები?

— რატომაც არა?! სხვა რა გზა მაქვს?!

— წამოდი.

ლუკამ ფეხის ხმით იგრძნო ქალის მოახლოვება.

— მომეცი ხელი, — უთხრა ქალმა, — შენ ალბათ სიბნელეში სიარული გიჭირს.

ლუკამ პალტოს ჯიბიდან ხელი ამოიღო და გაუწოდა.

— აქეთ წავიდეთ.

— საით, კიბისკენ?

— ხო, კიბისკენ.

ლუკას რატომღაც ეგონა ქალს ცივი, გაყინული ხელი ექნებოდა. იგი ბრმასავით მიენდო ქალის დიდსა და თბილ ხელს. კიბესთან მისულმა ხელი გაითავისუფლა და სირბილით აპყვა კიბეს. პირველ სართულზე ოდნავ შეეყოვნდა. უკან მიხედა სიბნელეს და მეორე სართულის კიბეც აირბინა. ანდუყაფარის ოთახში ისევ ბუტბუტავდა ლამპა. კარის წინ შეჩერდა და უცნობ ქალს დაელოდა. ლოდინი დიდხანს არ დასჭირვებია, სულ მალე კიბიდან აივანზე ამოიზარდა ქალის მაღალი სილუეტით. ლუკა გაოცდა, ვერც კი წარმოედგინა, თუ ის ქალი ამსიმაღლე იყო, ანდა ამსიმაღლე ქალს თუ ასეთი წყნარი და დამშვიდებული ხმა ექნებოდა.

ქალი კიბესთან გაჩერდა და სვეტს მიეყუდა.

— ახლავე გამოვალ. — უთხრა ლუკამ და ოთახის კარი ფრთხილად შეაღო.

ანდუყაფარმა ირიბად გამოხედა და გაუღიმა. მაგიდა მიეღაგებინა, ლამპის შუქზე წიგნს კითხულობდა.

— შენა ხარ, ლუკა, მე მეგონა, დასაძინებლად წახვედი.

— არა. ეზოში ვიყავი.

— ეზოში? რა გინდოდა ეზოში?

— რა ვიცი...

— ო, რა ტურა ხარი რას დაეხეტები ამ ღამით?

— ანდუყაფარ, გარეთ ერთი ქალია, ღამისგათევას ითხოვს.

— ქალი? — გაუკვირდა ანდუყაფარს. მარჯვენა ბორბალს ხელი წაავლო და სავარძელი კარისკენ შეაბრუნა.

— რა ვიცი, იზა მოუყვანია თურმე, შემთხვევით შეხვედრია ქუჩაში. ვილაც კაცებს მთვრალი მიჰყავდათ თურმე და არ გაუყოლებია.

— ეს კაცი გამაგიჟებს! ეგეც მთვრალია?!

— არა. თუ შენ არ შეგიძლია, დეიდა ნატოს გავადვიებ.



— აბა, შემოიყვანე, ერთი ვნახო ვინ არის?

ლუკამ კარი გამოაღო, ქალი იქვე იდგა მოაჯირის სვეტს მიყრდნობილი.

— შემოდით! — დაუძახა ლუკამ და თვითონ განზე გადგა. უცნობი ქალი შემოვიდა.

— გამარჯობათ! — შემოსვლისთანავე მიესალმა ანდრეუჟა ფარს და კარი მიიხურა.

მას ძველი, გაცვეთილი ჩექმები ეცვა და ასევე ძველი, დაბამული ხაკის მოკლე ქურთუკი, თეთრი ხილაბანდით თავი ისე ჰქონდა წაქრული, კაცს თმაგადაკრეჭილი ეგონებოდა. ახლადშემოსულმა ოთახი მიმოათვალიერა, მერმე ლუკას გადახედა და გაიღიმა.

— სამწუხაროდ მამაკაცების საზოგადოებაში მოვხვდი. ალბათ უხერხული იქნება თქვენთვისაც და ჩემთვისაც, აქ რომ გავათიო ღამე.

— დაბრძანდით. თუ თქვენ მართლა არა გაქვთ ღამის გასათევი, რაღაცას მოვიფიქრებთ.

— გმადლობთ.

— ქურთუკი გაიხადეთ. მე მგონი ამ ოთახში არც ისე ცივა.

— რა თქმა უნდა... ოღონდ...

— ნუ გერიდებათ, გაიხადეთ... მოშინაურდით...

— გმადლობთ.

— ლუკა, გამოართვი.

ლუკამ ქურთუკი გამოართვა და იქვე კართან, ლითონის საკიდზე დაკიდა. როდესაც მობრუნდა, დაინახა: უცნობი ქალი ოთახის კუთხეში მარმარილოს პირსაბანის ოვალურ სარკეში იხედებოდა. თეთრი ხილაბანდი თავიდან გადაიძრო და ხშირი, კუპრივით შავი თმა მხრებზე ჩამოაწვა. მერმე მაგიდისაკენ უხერხულად გაემართა, სკამი გამოაჩოჩა და დაჯდა. ხილაბანდი მუხლებზე დაიფინა და ზედ ხელები დააწყო. ლუკამ ისიც შენიშნა, ანდრეუჟადარი გაოცებულ მზერას არ აშორებდა, ერთთავად სტუმარს მისჩერებოდა და ვნაჩავარდნილივით ხმას ვეღარ იღებდა.

— მე წავალ. — თქვა ლუკამ.

— სად წახვალ? — მიუბრუნდა ანდრეუჟადარი. — ნავთქუ-

რაზე ჩაიდანი დადგი. რაღაცით ხომ უნდა გავუმასპინძლდეთ სტუმარს? შენც გაიხადე პალტო!

ლუკამ პალტო გაიხადა და დაფაცურდა. ნავთქურა აანთო და ზედ ჩაიდანი შედგა.

ანდუყაფარმა, როგორც იქნა, თვალი მოსწყვიტა სტუმარს: ჩაფიქრდა, მერმე თავისი სავარძლით რატომღაც გაისეირნ-გამოისეირნა ოთახში და ისევ მაგიდასთან მოაგორა.

— მართლა, უხერხული ხომ არ არის, ჩემი აქ ყოფნა? — იკითხა სტუმარმა.

— არა... არა... — უპასუხა ანდუყაფარმა.

— იცით, რა... თუ...

— მე მგონია, დროა, გავიცნოთ ერთმანეთი. ეს ლუკაა, მე — ანდუყაფარი. თქვენ რა გქვიათ?

— ბოგდანა... ბოგდანა. ვაიდა.

— სახელისა და გვარის მიხედვით უკრაინელი უნდა იყოთ?

— დიახ! ბორისლავში დავიბადე და გავიზარდე.

— ლტოლვილი ხართ, ალბათ?

— დიახ!

— თბილისში დასახლდით?

— არა, მცხეთაში.

— ალბათ მცხეთაშივე მუშაობთ სადმე?

— როგორ გითხრათ... ჩვენს დროში ამის თქმა ცოტა უხერხულად მოეჩვენება კაცს... რას იზამ... მე მოლოზანი ვარ.

— მოლოზანი?

— დიახ.

— განა მცხეთაში არსებობს მოქმედი მონასტერი?

— რა თქმა უნდა.

— ეგ კი არ ვიცოდი. სად არის, რომელ ადგილას?

— ზედ სადგურის თავზე. რკინიგზის გადაღმა. აქედან რომ მიდიხართ, ხელმარცხნივ. მთების უბეშია მიმალული და ქვემო-დან არა ჩანს.

— ბორისლავშიც მოლოზანი იყავით?

— არა. ტექნიკუმი დავამთავრე და მოანგარიშედ ვმუშაობდი, საფეიქრო არტელში.

— მერე აქ რამ გაიძულათ მოლოზანი გამხდარიყავით?

— იცით რა, მამიდაჩემს წამოვყევი ზურგში, მამიდაჩემსა და მის მეგობრებს... ისინი ყველანი მოლოზნები არიან. ტან-

ჯვითა და წვალეებით მოვალწიეთ საქართველოს... საშინელი დღეები გადავიტანეთ. დავრდომილები ჩამოვედით. ცოტა რომ მოვჯობინდი, მაშინვე მოლოზნად აღმკვეცეს.

— რატომ დათანხმდით?

— იმიტომ, რომ ქვეყნად სხვა საშველს ვერ ვხედავდი. თქვენ ვერასოდეს ვერ გაიგებთ, მე რა გადავიტანე.

ერთადერთ გზად სულის ხსნისთვის ღმერთი მიმაჩნდა...

— რა თქმა უნდა, ვერ გავიგებ, მაგრამ წარმოდგენით მაინც შემიძლია წარმოვიდგინო.

— ძნელია.

— ძნელია, ვიცი.

— ხვალ დილაშდღე რომ არ დაბრუნდებით, თქვენები ალბათ იღარდებენ?

— ალბათ... მაგრამ საქმე ისაა, რომ მე არც ხვალ და არც ზეგ არ ვაპირებ დაბრუნებას.

— მაშ როდის დაბრუნდებით?

— არასოდეს!

— არასოდეს?

— არასოდეს!

— რატომ?

— აღარ შემიძლია იქ ცხოვრება...

— აქი სულის ერთადერთ ხსნად ღმერთი მიგაჩნდათ?

— ახლაც მიმაჩნია, მაგრამ ამისათვის სრულებით არ არის საჭირო მონასტერში გაატარო შენი დღე და მოსწრება. გარდა ამისა, მე ვერ ვეგუები ზოგიერთ ქრისტიანულ დოგმას. მე ისინი არ შემიძლო შეგებია ცხოვრებაში, შეუმოწმებლად ვცადე მათი მიღება, მაგრამ ყოველთვის ვგრძნობდი და ახლაც ვგრძნობ მათდამი შინაგან წინააღმდეგობას, რაც სულს მიბზარავს.

— მაშ, რას აპირებთ?

— ალბათ ვიშოვი სადმე სამუშაოს. ოღონდ მცხეთაში არა. იქ ჩვენები მომნახვენი და უკან დამაბრუნებენ.

— წყალი აღუღდა! — განაცხადა ხმადაბლა ლუკამ.

— აბა, კარგად ყოფილა საქმე! გავაწყოთ სუფრა და დავბატიქოთ ღვთით მოვლენილი ჩვენი სტუმარი. — გაიღიმა ანდრუყაფარმა და თავის სავარძელი სწრაფად მიაგორა კარადსთან.

— მეც მოგეხმარებით. — წამოდგა ბოგდანა.

— იმდენი არაფერი გვაქვს, თქვენი დახმარება რომ დაგვჭირდეს.

— მაშინ ხელებს მაინც დავიბან, დილიდან არ დამიბანია.

— ლუკა, არის წყალი პირსაბანში?

— კი, წელან ჩავასხი.

ბოგდანა მარმარილოს პირსაბანისკენ გაემართა. ვიდრე ხელებს დაიბანდა, სარკეში ჩაიხედა და თმა შეისწორა. მერმე ნალევი სარეცხი საპონი აიღო და ხელების ბანას შეუდგა. ანდუყაფარმა და ლუკამ ამასობაში სუფრა გააწყვეს, მაგიდაზე სამი თეფში, სამი ფინჯანი, სამი კოვზი და ერთი საშაქრე დაალაგეს. ბოგდანამ ხელები პირსახოცზე შეიმშრალა და მაგიდას დაუბრუნდა.

— ჩაი დაგვიწყებია. — თქვა ანდუყაფარმა, როცა მაგიდას გადახედა.

ლუკამ ფაიფურის ჩაიდანნი მოიტანა და ჩაის ნაყენი ჩამოასხა ფინჯნებში.

— აბა, საშაქრეში ჩაიხედე, ლუკა, დაგვრჩა რამე.

ლუკამ საშაქრეს ხუფი მოხადა და ჩაიხედა:

— სამი „ბალიშილა“.

— ხედავ რა სამართლიანია ღმერთი. — გაიღიმა ანდუყაფარმა და ბოგდანას გადახედა, მერმე ლუკას მოუბრუნდა, — მე და შენ ხომ ვერაფრით ვერ გავიყოფდით სამ „ბალიშს“. შეიძლება, ჩხუბიც მოგვსვლოდა. ახლა კი უმტკივნეულოდ შეგვიძლია გავინაწილოთ.

ლუკამ ჩაიდანნი გადმოდგა და ნავთქურას სული შეუბერა, ჩააქრო. ნავთქურიდან კვამლი ამოვარდა და ოთახი იმ წამსვე გაიჟლინთა ნავთის მძაფრი სუნით.

— რა საზიზღარი ნავთია! — თქვა ანდუყაფარმა.

სამივენი ჩაის სმას შეუდგნენ. სამივენი ფრთხილად კვნეტდნენ კანფეტს და ცხელ, სურნელოვან სითხეს აყოლებდნენ.

## თავი მეთერთმეტი

ის ღამე ანდუყაფარმა ლუკასთან გაათია.

როდესაც ანდუყაფარი ლუკას ოთახში შესრიალდა თავისი სავარძლიანად, დეიდა ნატოს გაეღვიძა და დაფეთებულმა წამოიძახა: რა ამბავია, რა ხდებაო?! ლუკამ და ანდუყაფარ-

მა დაამშვიდეს. — ისეთი არაფერიო და უთხრეს, რაც მოხდა. დედაბერი სწრაფად წამოიჭრა ლოგინიდან და ლამპის ანთება მოითხოვა.

ლამპა ლუკამ აანთო.

— იცით, რა ჩაიდინეთ ახლა, თქვე სულელებო? — მიმართა დეიდა ნატომ ორივეს. — როგორ შეიძლება უცხო ადამიანის ოჯახში მარტო დატოვება? ვითომ არ იცით, რა უკუღმართი დროა, არათუ უცხოსი, ძმა ძმას აღარ ენდობა ახლა...

დეიდა ნატომ დიდხანს ილაპარაკა უკუღმართ დროსა და გულუბრყვილო ადამიანთა ნდობაზე. რამდენიმე დამაჯერებელი მაგალითიც გაიხსენა, თუ რა ბოროტად გამოიყენეს ვიღაც გარეწრებმა კეთილი და გულუბრყვილო ადამიანთა ნდობა, მაგრამ ანდუყაფარს მაინც ვერ ააღებინა განზრახვაზე ხელი. მირჩევნია გამქურდოს, ვიდრე ახლა სახლიდან გავაძევო, თქვა ანდუყაფარმა. აღდგომა და ხვალეო! — მიუგო დეიდა ნატომ.

ლუკას ეგონა, ანდუყაფარი შუშაბანდში დაწვებოდა ტახტზე, მაგრამ ანდუყაფარმა თავის სავარძლიდან გადმოსვლა არ მოინდომა. — ასევე დავიძინებ, ოღონდ ჩემი საბანი დამაფარე და კარგად შემომიკეცეო.

ლამპა კამოდის თავზე შემოდგა ლუკამ. წინა ოთახში დეიდა ნატო ისევ ბუზლუნებდა უკმაყოფილოდ. ბუზლუნი კარის მიხურვისთანავე შეწყვიტა, ყოველ შემთხვევაში არც ლუკას და არც ანდუყაფარს აღარ გაუგონიათ.

— დავიძინოთ. — თქვა ანდუყაფარმა.

— ახლავე ჩაეაქრობ ლამპას. — ლუკა კარადისკენ წავიდა ლამპის ჩასაქრობად.

— ჯერ საბანი შემომიკეცე. აი აქ, ბეჭებთან ცოტას მიბერავს.

ლუკამ საბანში კარგად შეფუთნა ანდუყაფარი და ლამპა ჩააქრო. სიბნელეში თავის საწოლს მიაგნო და ტანსაცმლის გახდა დაიწყო. მერმე შეწვა გაყინულ ლოგინში და კარგა ხანს იწრიალა, სანამ ბალიში და საბანი მოირგო. იგი გახარებული და აღვზნებული იყო. თავდაპირველად თვითონაც არ იცოდა, რატომ იყო ასერიგად გახარებული და ავზნებული. შემდეგ კი ფიქრებში თანდათან გამოიკვეთა ამ სიხარულისა და ავზნების მიზეზი. ძილი არ ეკარებოდა, თანაც ერთი სული

ჰქონდა ანდრუყაფარს გამოლაპარაკებოდა, მაგრამ სავარძლიდან ჩამი-ჩუმბი არ ისმოდა და ახლადმიძინებულს გაღვიძება ვერ გაუბედა.

ლუკას უკვე იმედის ნაპერწკალი უღვივოდა გულში. თუკი ბოგდანამ მთელი უკრაინა გამოიარა და გადარჩა, რატომ არ შეიძლებოდა დედამისიც ასევე გადარჩენილიყო? მას ანდრუყაფარისაგან გაგონილი ჰქონდა, რომ ლტოლვილთა უმრავლესობა ყველა სახის ტრანსპორტით სხვადასხვა მხარეს დაიძრა ეშელონებად წინა ხაზიდან ზურგისაკენ. ამ იმედიანი აზრის შემოწმება უნდოდა ანდრუყაფართან საუბრით, მაგრამ ანდრუყაფარს, სამწუხაროდ, ეძინა.

კარგა ხანს იწრიალა და იბორგა ლოგინში, ეტყობა, რამდენიმე სიტყვაც წამოსცდა ხმამაღლა, რადგან ანდრუყაფარი შეიშმუშნა და გამოელაპარაკა:

— რა მოგივიდა, ლუკა, რატომ არ გძინავს?

— რა ვიცი, არ მეძინება, ხომ არ გაგაღვიძე?

— არა, არც მე მეძინება. ამ ბოლო დროს რაღაც მემართება. ლუკა, შენს წინაშე დამნაშავესავით ვგრძნობ თავს. მაშინ ხომ გახსოვს, მთვარისაზე ფიქრი რომ აგიკრძალე? მერმე მე თვითონ ვფიქრობდი ჩუმ-ჩუმად. ახლა ისე მეჩვენება, თითქოს შენს სამყაროში შემოვიჭერი დაუკითხავად და რაღაც წაგართვი.

ლუკამ არაფერი უპასუხა. რადგან ვერ გაიგო, რას ნიშნავდა „შენს სამყაროში შემოვიჭერი დაუკითხავად და რაღაც წაგართვი“.

— ასე გითხრა, არა, სხეული თოთხმეტ ნაწილად მერღვევა და თვითეული ნაწილი განსხვავებული ტკივილით მტკივაო? ლუკა ჭერ ვერ მიხვდა, რას ეკითხებოდა ანდრუყაფარი. მერმე უცებ მთვარისა გაახსენდა.

— კი, ასე მითხრა;

— ეს ტკივილები მერმე მთვარეს დაუქავშირა — მთვარეც თოთხმეტ ნაწილად ირღვევაო?

— კი, ეგრე თქვა. თუმცა ეგ არ მახსოვს, თქვა თუ არა.

— რა საოცარია? შენ იცი, რომ ეს მართლაც არის დაკავშირებული მთვარის კლება-მატებასთან. მთვარე ხომ ზუსტად თოთხმეტ დღეს ანდომებს დამკლევებას და თოთხმეტ დღეს გავსებას?!

ანდუყაფარი გაჩუმდა. კარგახანს სდუმდა, თითქოს მოელოდა, რას ეტყოდა ლუკა, როგორი შთაბეჭდილება მოახდინა ამ ნათქვამმაო. მეგრამ ლუკას ხმა არ გაუღია, რადგან შინაგანად არ დაუჭერა ანდუყაფარს. მისმა გონებამ ვერ გააზრა, ადამიანის ტკივილები როგორ შეიძლებოდა ყოფილიყო დაკავშირებული მთვარესთან.

— ხშირად ვფიქრობდი მთვარისაზე, ისე ხშირად, რომ... ზოგჯერ ცოცხლადაც კი წარმოვიდგენდი ხოლმე... დარწმუნებული ვარ, მთვარისა მისი ნამდვილი სახელი არ არის. ეგ სახელი თვითონვე დაირქვა. იცი...

— არ არსებობს მთვარისა! — შეაწყვეტინა ლუკამ თითქოსდა ხმამაღალი ფიქრი ანდუყაფარს. იგი მოულოდნელად გაღიზიანდა.

— როგორ თუ არ არსებობს?! — გაოცდა ანდუყაფარი.

— ამასწინათაც ვიყავი იქ.

— სად?

— სადა და საგიჟეში.

— მერმე?

— არ არსებობს მთვარისა!

— იქნებ იმ დღეს ვერ ნახე?..

— არა! მოხუცმა დარაჯმა მითხრა, — აქ არავითარი მთვარისა არ ცხოვრობსო.

— იქნებ შეცდა? აჩვენე ის ფანჯარა?

— კი. ეს სამრეცხაო ფანჯარააო, ასე თქვა.

— ალბათ დაგიმალა?

— ასე მითხრა: აქ ყველას ვიცნობო, აქ ოცდაათი წელი გმუშაობ და არავითარი მთვარისა არ გამიგონიაო.

— შენ ხომ ნამდვილად ნახე მთვარისა?

— რა ვიცი.

— ეს ბიჭი გამაგიჟებს! შენ ხომ მთვარისას ვერ მოიგონებდი? ნამდვილად ვერ მოიგონებდი!

— რა ვიცი.

— რას ჰქვია, რა ვიცი! შენ ხომ ნამდვილად ნახე მთვარისა?!

— მე მგონია, ვნახე.

— ლუკა, იქნებ ფანჯარა შეგეშალა?

— შეიძლება, შემეშალა.

— აბა, კარგად დაფიქრდი!

— არა, არ შეეშლია.

— კარგად დაფიქრდი-მეთქი!

ლუკა დაფიქრდა, მაგრამ მთვარისას ნაცვლად თვალწინ ის ორი ნაცრისფერხალათიანი შამაკაცი დაუდგა, ნახევრადბნელ დერეფანში დინჯად რომ დასეირნობდნენ. მოდი, ამათ შესახებ ვუამბობ ანდუყაფარსო, — გადაწყვიტა, მაგრამ მაშინვე გადაიფიქრა, — არ ღირსო. ლუკა არ მოელოდა, თუ ანდუყაფარს ეს ახალი ცნობა მთვარისაზე ასეთნაირად შეამფოთებდა. ანდუყაფარის შეშფოთება მისთვის აუხსნელი რჩებოდა და გრძნობდა, ამის გამო უფრო მეტად ღიზიანდებოდა.

— არ არსებობს მთვარისა!

ანდუყაფარი ხმას აღარ იღებდა. შესაძლებელია, ძილს თავი ვეღარ წაართვა და ჩასთვლიმა.

ლუკა დარწმუნებული იყო, მთელი ღამე ბოგდანაზე ილაპარაკებდნენ, რადგან მისმა გამოჩენამ ძალზე უცნაური შთაბეჭდილება დატოვა. მაშინ ყურადღება არ მიუქცევია, მხოლოდ ახლად აღნუსხა მეხსიერებაში, ბოგდანას გამოჩენისთანავე როგორ გადასხვაფერდა ანდუყაფარი, შეეცვალა ხმაც, სახეც, ღიმილიც. ხელები უთრთოდა, რამდენჯერმე ჩაიც კი დაღვარა. ცდილობდა, მხიარული ყოფილიყო და როგორღაც არ გამოუდიოდა...

მერმე უცებ სინდისის ქენჯნაც იგრძნო: მაიკო უკვე მეორე კვირაა, ავად არის და ერთხელაც არ მივედი სანახავადო. ისიც კი არ იცოდა, რა სჭირდა, რითი იყო ავად. ხვალვე წავალ და ვინახულებო, — გაიღიმა კმაყოფილმა იმით, მაიკო რომ მოაგონდა. მერმე გაიხსენა, როგორ აკოცა სასაფლაოზე და როგორ მოდიოდნენ სვანეთის უბანში ხელიხელჩაკიდებულეები. როცა გავიზრდები, უსათუოდ ცოლად მოვიყვანო, ამ მოულოდნელმა გადაწყვეტილებამ იმდენად გააოცა, რომ კინაღამ დაუსტვინა კიდეც. მერმა თვალნათლივ დაინახა: მაიკო თავის საყვარელ ტახტზე გულადმა იწვა ჭერს მიშტერებული. ამ ხილვამ ისევ ნეტარი ღიმილი მოჰგვარა და სასიამოვნო ქრუანტილად დაუარა მთელს სხეულს. ის დღე ხშირად აგონდებოდა ლუკას და ყოველთვის სხვადასხვა გუნებაზე აყენებდა, ზოგჯერ აღელვებდა, ზოგჯერ ამშვიდებდა, ზოგჯერ თრგუნავდა. ამჯერად გამაბრუებელი ნეტარება იგრძნო.



დილით დეიდა ნატოს კივილმა გამოადვიდა. დაფეთებულმა გაახილა თვალები და ირგვლივ მიმოიხედა: ანდრუყაფარი ოთახში აღარ დახვდა, უჩუმრად წასულიყო. დეიდა ნატო გულშემზარავად კიოდა. ვაითუ, ბოგდანამ გაძარცვა ანდრუყაფარიო. — გაიფიქრა ლუკამ და მაშინვე წამოხტა, საბანი მოიხურა და ოთახში გამოვარდა.

დეიდა ნატო ტახტზე იჯდა, ხელებს თავში იცემდა და სახეს იკაწრავდა: ანდრუყაფარი და ბოგდანა თავზე აღგნენ, ლუკა უცებ მიხვდა, ბოგდანა არაფერ შუაში იყო. რალაც ახალი უბედურება დასტყდომოდათ თავს.

ანდრუყაფარი და ბოგდანა დეიდა ნატოს ამოდ ამშვიდებდნენ. დეიდა ნატო ტახტზე დაემხო. ხმაძალა ტიროდა და სუსტი, გამხდარი მხრები საცოდავად უცანცარებდა.

— რა მოხდა?! — იკითხა შეძრწუნებულმა ლუკამ.

ლუკას არც ერთმა არ მიაქცია ყურადღება. არც ანდრუყაფარმა, არც ბოგდანამ, ისინი დეიდა ნატოს დამშვიდებას ცდილობდნენ და, შესაძლოა, ლუკას ხმა არც გაუგონიათ. მაგრამ ლუკა ისეთი ბიჭი არ გახლდათ, რომ მათი წაყრუება დაეჭერებინა. აშკარა იყო, ერთმაც და მეორემაც პასუხს თავი აარიდა. ლუკას გულში წელან შეპარულმა პატარა ეჭვმა ახლა უკვე მთელი ძალით იფეთქა და სულითხორცამდე შეარყია, ერთხანს სმენაც, ხმაცა და მხედველობაც დაუკარგა. მერმე გონს მოეგო, თავის ოთახში შებრუნდა და ასევე საბანმოხურული საკუთარ საწოლზე ჩამოჯდა. „ეტყობა, ცუდი ამბავი გაიგო. — ფიქრობდა ლუკა, — ალბათ დედა... დეიდა ნატო მამაზე ასე არ მოიკლავდა თავს... თუმცა არა... დეიდა ნატო ახლა“.. ფიქრის დასრულება არ დასცალდა, ოთახში ბოგდანა შემოვიდა. იგი ლუკას მიუახლოვდა, თავზე ხელი გადაუსვა და მის წინ ცალ მუხლზე ჩაიჩოქა.

— ლუკა, ცუდი ამბავი მოვიდა... ძალზე სამწუხარო... ჯერ ვიფიქრეთ, არ გავუძხილოთ-თქო, მაგრამ შენ უკვე დიდი ბიჭი ხარ... — დაიწყო ბოგდანამ.

— დედა? — შეაწყვეტინა ლუკამ.

— არა! — მოკლე შეკითხვას მოკლედვე უპასუხა ბოგდანამ და გაჩუმდა. მერმე, წამოდგა, გულხელდაკრეფილი ერთხანს ბოლთას სცემდა.

წინა ოთახში მიწყდა დეიდა ნატოს ხმა, ჩამი-ჩუმი აღარ ისმოდა.

— ლუკა, ძალზე ცუდი ცნობაა, მაგრამ გონიერმა კაცმა ასეთ ქალღმერთს ბოლომდე არ უნდა დაუჭეროს... იცი, რას გეტყვი ლუკა, მე ჩემი თვალთ ვნახე, რაც იქ ხდება და ბირ-ლაპირ გეტყვი: არ არსებობს ქვეყანაზე ძალა თუ საშუალება, რომელსაც ჯერჯერობით ზუსტად შეეძლოს იმ ჯოჯოხეთში დატრიალებულ უბედურებათა აღნუსხვა. მიდი და გაიგე, ვინ გადარჩა, ვინ დაიღუპა და ვინ ტყვედ ჩავარდა...

კარი შეშფოთებულმა ანდუყაფარმა შემოაღო.

— ბოგდანა, მოდი, მომეხმარეთ! ლუკა, სარაფანა ჩაიცვი და მეზობლებს დაუძახე, დეიდაშენი ცუდად გახდა.

ბოგდანა სწრაფად გავიდა. ლუკამ ხელდახელ ჩაიცივა და ისიც სირბილით გაიქრა წინა ოთახში. დეიდა ნატო ტახტზე გულალმა იწვა, მძიმედ სუნთქავდა, სახეზე აღარ ედო სააქაო ფერი.

ლუკამ ორიოდ წუთში შეჰყარა მეზობლები. ტახტზე უღონოდ მისვენებულს ნიშადურის სპირტი აყნოსეს, საფეთქლები დაუზილეს. ემა, ჯუჯა რუბენას და, მალი-მალ უცვლიდა ცივ ტილოს და შუბლზე აფენდა.

„რა მეშველება?“ ფიქრობდა თავგზადაბნეული ლუკა. იგი მეორე ოთახში გამოსულიყო და მარტო დაბოდიხლობდა.

ფანჯარას მიადგა და ქუჩაში გაიხედა.

ვეტერინარული კლინიკის რკინის ჭიშკართან ფორანში შებმული ჯაგლაგა ცხენი მოწყენილი იდგა. გამოიარა მოხუცმა კაცმა. ცხენს მოხედა, ერთხანს უყურა და წავიდა. ფორანზე ორი ბელურა დაფრინდა. ბელურებმა რალაც აკენკეს და ისევ აფრინდნენ, იქვე ორსართულიანი სახლის პარაპეტზე შემოსხდნენ. მეორე სართულის ფანჯრები შიგნიდან დარაბებით იყო დაგმანული. ჯაგლაგა ცხენთან ახლა ორი სამხედრო პატრული შეჩერდა, ორივემ კარგახანს ათვალიერა ცხენი, ერთმა გაეაზრებო და დაჰკრა ხელი. ცხენი არ განძრეულა. მერმე პატრულებიც წავიდნენ. ვეტერინარული კლინიკის ეზოდან გამოვიდა ქალი, წყლით სავსე ვედრო გამოიტანა. ქალი ორსართულიანი სახლის ხის ჭიშკარში შეიმალა. ხმაურით ჩაიქროლეს ტრამვაის ცარიელმა ვაგონებმა...

„რა მეშველება?!“

ორსართულიანი სახლის ეზოდან პატარა გოგონა გამოვიდა. გოგონას ხელში ბოთლი ეჭირა. გოგონაც შეჩერდა ცხენ-

თან და დააკვირდა. მერმე ისევ გაიქცა. რალაცას წამოჰკრა ფეხი, შეტორტმანდა, ბოთლი ხელიდან გაუვარდა და ნამსხვრევები ქვაფენილზე გაიფანტა. ბოთლი ცარიელი იყო. გოგონა უკანვე გაბრუნდა და ორსართულიანი სახლის ჰიშკარში გაუჩინარდა. დაბალ-დაბალმა, მსუქანმა ქალმა ბოთლის ნამსხვრევები ტროტუარიდან ქვაფენილზე ფეხით გადაყარა. ფორანთან ახლა სასწრაფო დახმარება გაჩერდა. შოფერმა რალაც ჰკითხა მსუქანსა და დაბალ ქალს. ქალმა მხრები აიჩეჩა და თავისი გზა განაგრძო...

„რა შეშველება?!“ — გაიფიქრა ისევ ლუკამ და ფანჯარას მოშორდა. მერმე უცებ გაახსენდა, წელან მეზობლებმა სასწრაფო დახმარება რომ გამოიძახეს. იქნებ ეს ის მანქანაა, რომელსაც ელოდებიან? ლუკა ისევ მიიჭრა ფანჯარასთან და ქუჩაში გადაიხედა. მანქანა უკვე იქ აღარ იდგა.

ლუკამ თითქმის სირბილით გაიარა წინა ოთახი. შუშაბანდში ემამ შეაჩერა და ჰკითხა:

— სად მიდიხარ?

— სასწრაფო დახმარება მოვიდა! — მიუგო ლუკამ.

ქუჩაში გასულს სასწრაფო დახმარება ჰიშკართან დახვდა. მანქანის ფანჯრიდან შოფერმა გადმოჰკყო თავი.

— ავადმყოფი აქ ცხოვრობს? — იკითხა.

— დიახ! — უბასუხა ლუკამ და მანქანას მიაჩერდა, როგორც მხსნელს. მანქანიდან ორი თეთრხალათიანი ქალი გადმოვიდა. მეორემ მანქანის კარში ძლივს გამოატია ხის მძიმე ყუთი.

— სად ცხოვრობს? — იკითხა პირველმა თეთრხალათიანმა.

— იქ... მესამე სართულზე... მარჯვნივ უნდა წახვიდეთ.

თეთრხალათიანები ეზოში შევიდნენ. შოფერი მაშინვე მიწვა გვერდზე და თვალები მილულა, დასაძინებლად მოემხადა. ლუკამ ერთი კი გაიფიქრა, ექიმებს შევეყვებო, მაგრამ ფეხები არ დაემორჩილა. არ დაემორჩილა მის ფიქრებს, რალაც შინაგანი ძალა უწევდა წინააღმდეგობას.

ხელები და ყურები გაეყინა. ხელები ჩაიწყო ჯიბეში, ყურებს კი ვერაფერი მოუხერხა. სიცივისაგან აბუზული ქუჩას გაჰყვა. ვეტერინარული კლინიკის წინ ფორანი აღარ იდგა. ჯაგლაგა ცხენი ან სამკურნალო აღრიცხვაზე იყვანეს ანდა ხელი ჩაიქნის, — არაფერი ეშველებაო.

ქვაფენილი გადმოჭრა ძველმა დაბალმა, თან აქეთ-იქით იხედებოდა შეშინებული, რამე არ დამეჯახოსო. მაგრამ ქუჩაზე არც აღმა და არც დაღმა არაფერი ჩანდა ისეთი, რაც შეიძლებოდა ძველ დაბალს დასჯახებოდა. მოხუცს თავისი წილი ოთხასი გრამი პური მოჰქონდა. ტროტუარზე ამოსული ისე ათვალიერებდა პურს თითქოს ძვირფასი ნივთი ეჭირა ხელში და საბოლოოდ ვერ გადაიწყვიტა, — ვიყიდო თუ არ ვიყიდო.

ქუჩის გადაღმა პურის მაღაზიასთან უზარმაზარი რიგი იდგა, ვიღაც-ვიღაცეებს უროგოდ უნდოდათ მაღაზიაში შესვლა და იყო ერთი ყაყანი და აურზაური. სხვა დროს ლუკა სიამოვნებით შეჩერდებოდა სერიის საცქერლად, მაგრამ ამჯერად სულაც არ დაინტერესებულა პურის რიგით, თანაც უპალტოოდ და უქედოდ გამოსულს ძალზე სციოდა.

წყალსაწევის ქუჩის კუთხიდან გაუქმებული ეკლესიის გუმბათი გამოჩნდა, მოშავო-მონაცრისფრო, დაძენძილ ღრუბელს ცა დაედაბლებინა და ეს ცივი და ნოტიო სიმძიმე ქალაქს დამთრგუნველად დასწოლოდა ზემოდან. ლუკამ წყალსაწევის ქუჩა გადაიარბინა, პატარ-პატარა ფარდულების რიგი გაიარა და ეკლესიის ეზოსთან შეჩერდა. რიყის ქვით მოკირწყლული ეზო ახლად დაგვილსა ჰგავდა.

ლუკა ქიშკარში შევიდა. ეკლესიას შემოუარა და ნაცნობი შუშაბანდის წინ შეჩერდა. ფრთხილად დააკაკუნა ფანჯრის მინაზე. ხმა არავის გაუცია. კიდევ ერთხელ დააკაკუნა, ახლა უფრო გაბედულად.

— ვინ არის? — ეს მაიკოს ხმაა.

— მე ვარ, ლუკა!

— ვინა?

— ლუკა!

— შემოდი, შემოდი კარი ღიაა! — შეიპატიეა მაიკომ.

ლუკა კარს მიაწვა. შეაღო და შევიდა.

შუშაბანდი გაიარა და შინდისფერი ფარდა გადასწია, ნახევრადბნელ ოთახში შეიხედა. მაიკოს საყვარელ ტახტზე ლოგინი იყო გაშლილი. რბილ ლოგინსა და ბალიშებში ჩაფლული მაიკო ძლივს ჩანდა.

ლუკამ ოთახში შეაბიჯა და შეჩერდა.

— გამარჯობა, მაიკო.. როგორა ხარ?

— ახლა არა მიშავს.

- გაცივდი?
- ხო, გავცივდი. გრიპი დამემართა.
- ლუკამ კიდევ ორიოდ ნაბიჯი გადადგა.
- ახლოს არ მოხვდი, — უთხრა მაიკომ, — ჯერ მთლად არ ვარ მორჩენილი.
- სიცხე გაქვს?
- კი. დაჯექი.
- მართო ხარ?
- კი, დედაჩემი პურზე წავიდა. დაჯექი.
- რა თბილა თქვენთან.
- კი, თბილია, რატომ არ ჯდები?
- რა ვიცი... უნდა წავიდე.
- დღეს არ ყოფილხარ სკოლაში?
- არა.
- რატომ?
- ისე... არ მინდოდა.
- მე კი მომენატრა... თითქმის ორი კვირაა ასე ვწევარ.
- ათი დღეა!
- ხო, ათი დღეა.
- რა ვიცი... მე ოცი დღეც რომ არ მივიდე სკოლაში, არ მომენატრება.
- დაჯექი, რა!
- ძლივს გავთბი... ყურები გამიხურდა.
- ქუდი არ გახურავს?
- არა.
- გაცივდები.
- გავცივდე, თუ გავცივდები!
- ცუდ გუნებაზე ხარ?
- ლუკამ მხრები აიჩეჩა.
- გაწყენინა ვინმემ?
- ლუკამ ისევ აიჩეჩა მხრები.
- აბა, რატომ მოხვედი, თუ არ დაჯდები?
- იცი, რა, მაიკო?
- რა?
- ოთახში დუმილი ჩამოდგა. როდის-როდის ლუკამ თქვა:
- მამაჩემი დაიღუპა!
- დაიღუპა?! — მაიკო ლოგინზე წამოჯდა.

— ღღეს მივიღეთ ცნობა... — ლუკას კიდევ რაღაც უნდოდა ეთქვა, მაგრამ ხმა ჩაუწყდა და თვალები ცრემლით აევსო. სივრცე აიმღვრა, კედელზე ჩამოკიდებულმა ჭრელმა სპარსულმა ნოხმა ფერები დაჰკარგა და ნაცრისფერ სივრცეში განზავდა.

ლუკამ გაქირვებით გადაყლაპა ნერწყვი და მუქით თვალები მოიწმინდა. ლოგინზე წამომჯდარ მაიკოს დაპა-დუბით ცვიოდა ცრემლი. შეძრწუნებული გამოსცქეროდა ლუკას.

— წავალო — თქვა ლუკამ.

— გინდა, ავდგები? — მტირალა ხმით ჰკითხა მაიკომ.

— არა, არა!

— შენ შუშაბანდში გადი, მე ახლავე ჩავიცვამი — მაიკომაც მუქით მოიწმინდა ცრემლი.

— იცი, რა, მაიკო?

— რა?

— კიდევ რაღაც უნდა მეთქვა... სხვა დროს გეტყვი, კარგი? — ლუკა შუშაბანდში გავიდა, — ნახვამდის!

— ლუკა!

— რა გინდა? — შუშაბანდიდან გამოსძახა ლუკამ.

— ახლა მითხარი, რა!

— სხვა დროს გეტყვი.

— არა, ახლა მითხარი, გეხვეწები!

— იცი, რა, მაიკო?... მე შენს მეტი მეგობარი არა მყავს! — ლუკამ შუშაბანდის კარის სახელურს ხელი მოჰკიდა და, ვიდრე გამოაღებდა, ერთი წუთით ჩაფიქრდა. მერმე ხმამაღლა, მაიკოს გასაგონად თქვა, — ანდუყაფარი და შენი..

რაღაცნაირად უფრო მეტად გულდამძიმებული გამოვიდა მაიკოსაგან. რა დროს მაიკოსთან მისვლა იყო, — ფიქრობდა გზადაგზა, თან ისეთი გრძნობა ჰქონდა, თითქოს ვიღაც მოატყუა, მოატყუა არა მარტო ვიღაც სხვა, საკუთარი თავიც...

გარეთ გამოსულს ისევ შესცივდა და ხელები შარვლის ჯიბეებისკენ გააქანა. ცუდ გუნებაზე აყენებდა ისიც, მაიკოსთან თავი რომ ვერ შეიკავა და იტირა. „მივედი, ვიტირე და წამოვივდი“.. წყალსაწევის ქუჩაზე ჩაუხვია, სამღებრო ფარდულეებს წინ ჩაუარა და მდინარის კბოდედსთან გავიდა. იქ დიდხანს არ გაჩერებულა, რადგან მტკვარმა სუსხიანი ქარი შეაგება და ნოტიო სიცივემ ძვალსა და რბილში გაატანა.

რიყის ქუჩაზე ამოსულმა ავტოსკოლის გარაჟის გასწვრივ ქვაფენილს გახედა, — სასწრაფო დახმარება იქვე თუ დგასო. სასწრაფო დახმარება მისი სახლის წინ აღარ იდგა. „წავალ, — თქვა გუნებაში, — დეიდა ნატო ალბათ გამოკეთდა და გაგიჟდება, შინ რომ ვერ დამინახავს“.

პურის მაღაზიასთან ისევ გრძელი რიგი იდგა, ოღონდ რიგი ახლა უკვე დამშვიდებულიყო და წყნარად მიდიოდა. ლუკამ თბილი ხელებით ყურები დაისრისა და შინისკენ გასწია. გვერდით ვილაყამ ჩაუქროლა სტვენა-სტვენით. მაშინვე იცნო ჭორფლიანი ალბერტი.

— ეი, ალბერტი!

ბიჭი შეჩერდა და ლუკას მოხედა. ჭორფლიანმა ალბერტმაც, ეტყობა, იცნო ლუკა, უნებურად სახე დაემანჭა, ალბათ გაღიშება უნდოდა.

— მოდი აქ! — უთხრა ლუკამ.

— რა გინდა? — ჭორფლიანის მზერას ოდნავი შიში შეეპარა.

— გეუბნები, მოდი აქ-მეთქი!

— რა გინდა, ვა?!

— რაც მინდა!

— აჰა, მოვედი!

— უფრო ახლოს!

— შენ გგონია, მე არ ვიყავი?! მე ისეთი ბიჭი არა ვარ, ლუკაჯან, სხვისი ხარახურა წავიღო.

— მე არაფერი არა მგონია! — ლუკამ უცბად ხელი წაავლო პალტოს საყელოში, ჭორფლიანი ალბერტი კედელზე მიაცუდა, ჯერ ერთი მუშტი მოუქნია, მერე — მეორე.

ალბერტმა ორივე ხელი სახეზე აიფარა და ჩაიჩოქა. ლუკამ მთელი ძალით ჰკრა ხელი და ჭორფლიანი ფილაქანზე გაიშლართა. არც ახლა მოეშვა ლუკა, ზემოდან დააჭდა და გამეტებით დასცხო სახეში მუშტები.

ჭორფლიანი ალბერტი ყვიროდა და მშველელს უხმობდა. ლუკა არ ცხრებოდა.

— დახოცეს ერთმანეთი!

— მოკლა მაგ საძაგელმა!

— გააშველეთ!..

ესმოდა ლუკას შეიანხილები. მერმე ვილაყამ ლონიერი ხე-

ლი წაველო ქეჩოში და კორფლიან ალბერტს ააგლიჯა. როდესაც აიხედა, თავზე ორი მამაკაცი ადგა. ერთ-ერთმა ლაზათიანად წამოჰკრა კისერში.

— მოერიე, არა, შე მაიმუნო?

ლუკას კიდევე ერთხელ უთავაზეს.

— დაიკარგე აქედან, შე ხულიგანო, შენა! — ეს კაცი მერმე დაიხარა და ფილაქანზე გაშლართული კორფლიანი ალბერტი წამოაყენა, — ადექი, ადექი, ნუ გეშინია!

ქუჩის გადაღმა პურის რიგი აღელდა, აყაყანდა. ლუკამ შიშით გახედა განრისხებულ ხალხს, ისინი მუშტებს იქნეგდნენ, ყვიროდნენ, იმუქრებოდნენ... პურის რიგის დაკარგვისა რომ არ შინებოდათ, ალბათ ქუჩაზეც გადმოცვივდებოდნენ და, ვინ იცის, რა დღეს დააყენებდნენ ლუკას.

— ერთი ამას უყურეთ, რომ არც მიდის?! — თქვა იმან, ვინც კორფლიანი ალბერტი წამოაყენა და დაუყვავა, თან პურის რიგს გახედა აღშფოთებულმა.

პურის რიგი სულ გადაირია:

— დაიჭირეთ, არ გაუშვათ!

— მილიციას დაუძახეთ,

— სად არის მილიცია?

— აქ არ იყო ახლა ის ახმანი?

ლუკა გატრიალდა და შინისაკენ გაემართა, მიდიოდა ნაცემი და დათრგუნული, დამცილებული და შეურაცხყოფილი. მიმავალმა ერთხელ კიდევე გახედა მალვით პურის რიგს, გულში ამოუჯდა, გაბოროტებული ბრბო რომ დაინახა, იქვე ავტოსკოლის კედელს მიეყუდა, სახეზე ხელები აიფარა და ატირდა.

## თავი მეთორმეტი

დღედა ნატოს იმავე საღამოს მარცხენა მხარის დამბლა დაცვა და ლოგინად ჩავარდა. „ვინ მოუვლის ახლა ამ დედაბერსო“, — თავი სინანულით გაიქნიეს მეზობლებმა, ერთი ამოიოხრეს და წავიდ-წამოვიდნენ. სასწრაფო დახმარებამ კიდევე ერთხელ მოაკითხა ავადმყოფს. ანდუყაფარმა ექიმს ფრთხილად უთხრა, — აქ მომვლელი არავინა ჰყავს და იქნებ სჯობდეს საავადმყოფოში გადავიყვანოთ. ექიმმა უარის ნიშნად



საწყალობლად გაიღიმა. — ჩვენ საერთოდ ვგეთი ავადმყოფები არ მიგვყავს, მით უმეტეს ახლა, როცა თითქმის ყველა საავადმყოფო ჰოსპიტლად არის გადაკეთებული და გასამხედროებულიაო.

— მაშ, რა ვქნათ? — იკითხა ანდრუყაფარმა.

— არ ვიცი. — უპასუხა ექიმმა, ბოდიში მოიხადა და ოთახიდან გავიდა.

ანდრუყაფარმა და ლუკამ კიბემდე მიაცილეს.

— თქვენ უნდა გაგვიგოთ, ქალბატონო, — ანდრუყაფარმა ლუკას მკლავზე შეავლო ხელი, — მოხუცს ამ ბავშვის მეტი არავინ არა ჰყავს. განა ეს ბავშვი შესძლებს ასეთი მძიმე ავადმყოფის მოვლას?

— როგორ არ გესმით, ბატონო! რა აზრი აქვს ახლა მაგ ქალის საავადმყოფოში გადაყვანას? გინდაც ჰქონდეს აზრი, დამიჯერეთ, უკანვე დაგვაბრუნებენ. დასაწოლი ადგილი არა გვაქვს. — ექიმი წავიდა.

ანდრუყაფარი და ლუკა ოთახში შებრუნდნენ. ბოგდანა დეიდა ნატოს ადგა თავზე. დეიდა ნატო საცოდავად იწვა თავის საწოლში სახემოქცეული, ყბაჩამოვარდნილი, თვალები ფართოდ ჰქონდა გახელილი და ერთთავად ლუკას უმზერდა, თითქოს რაღაცის თქმაც უნდოდა, მაგრამ ვერ ახერხებდა. დროდადრო თვალები ცრემლით ევსებოდა და ისევ ეშრიტებოდა. დამჭკნარ, სველ ლოყებს ბოგდანა უმშრალებდა ცხვირსახოცით.

— ახლა ხომ ცოტა უკეთა ხართ, დეიდა ნატო? — ჰკითხა ანდრუყაფარმა.

დეიდა ნატო ხმას არ იღებდა. ფართოდ გახელილი თვალები, რომელშიც შიში და ძრწოლა ჩასდგომოდა, მხოლოდ ლუკასთვის მიეპყრო. თვალები დროდადრო ცრემლებით ევსებოდა და ეშრიტებოდა.

ლუკამ დეიდა ნატოს დაეინებულ მზერას ვეღარ გაუძლო და საწოლს მოშორდა.

— დეიდა ნატო, დამიგდეთ ყური, — ეუბნებოდა ანდრუყაფარი, — ნუ გეშინიათ, დეიდა ნატო... ბოგდანა ამბობს, ლუკასაც და დეიდა ნატოსაც მე მოვუვლიო... აჲ, შუშუბანდში დაწვება და იცხოვრებს, რა თქმა უნდა, თუ თქვენ თანახმა იქ-

ნებით. თუმცა სხვა რა გზა გაქვთ, ვინ მოუვლის ლუკას, თქვენც ხომ გჭირდებათ მოვლა...

ლუკა ისევ მივიდა საწოლთან და ავადმყოფ დეიდას დახედა, აინტერესებდა, რას იტყოდა, ბოგდანას დარჩენაზე და თანხმდებოდა თუ არა. დეიდა ნატოს არც ახლა ამოუღია ხმა. გაშტერებული მისჩერებოდა ლუკას.

უკვე მნიშვნელობა აღარ ჰქონდა დეიდა ნატოს თანხმობას და იმავე საღამოს გადაწყდა, ბოგდანა ლუკასთან რჩებოდა.

დარჩა კიდევ.

ერთი კვირაც არ იყო გასული, ბოგდანა სამკერვალო ფაბრიკაში მიიყვანა მეზობლის ქალმა. იქ ერთ-ერთ საამქროში მოეწყო ოსტატის შეგირდად და პურისა და სურსათის ბარათებიც მიიღო. კერვა სულ მალე ისწავლა და საკერავი — ჯარისკაცული გიმნასტურები და შარვლები — შინაც მოჰქონდა. შინაურ საქმეს რომ მოათავებდა, შუშაბანდში დეიდა ნატოს საკერავ მანქანას მიუჯდებოდა და გვიან ღამემდე მუშაობდა.

ძალიან ძნელი იყო ავადმყოფი დედაბრისა და ლუკას მოვლა, თანაც ფაბრიკაში სიარული, მაგრამ ბოგდანა ყველაფერს ასწრებდა და ახერხებდა. ეს კი არა და თავისუფალი დროც კი რჩებოდა. ამ თავისუფალ დროს ერთად ატარებდნენ ლუკა, ბოგდანა და ანდუყაფარი. შეიყრებოდნენ და საუბრობდნენ ან ლოტოს თამაშობდნენ.

მაგრამ ლუკა ზოგჯერ ალღოთი გრძნობდა, ზოგჯერ კი ატყობდა კიდევ, რომ ანდუყაფარსა და ბოგდანას მარტო უნდოდათ ყოფნა. ასეთ დროს ტოვებდა მათ და ან სამეცადინოდ მიდიოდა ანდა სკოლის ამხანაგებთან — გასართობად.

ერთ კვირა დილას ანდუყაფარმა უთხრა — თუ ძმა ხარ, ბოგდანას წააყვევი საბურთალოს ბაზარში თავისთვის რაღაც რაღაცეები უნდა იყიდოსო. დეიდაშენს თუ რამე დასჭირდა, მე მივხედავო. ლუკა სიამოვნებით წააყვა ბოგდანას ბაზარში.

ბოგდანამ პალტო, კაბა და ფეხსაცმელები იყიდა.

ბოლოს და ბოლოს გაიხადა თავისი დაბამებული ქურთუკი და ძველი ჩექმები და ახლადნაყიდი ტანსაცმელით გამოეწყო. ლუკამ თვალებს არ დაუჯერა, არაფრით არ ეგონა, თუ ტანსაცმელს ასე შეეძლო ადამიანის გამოცვლა. ანდუყაფარი და ლუკა მაგიდას უსხდნენ და აღტაცებულები შესცქეროდნენ ბოგდანას. იგი ეს-ეს არის შემოვიდა ოთახში, ახლადნაყიდი, თუმ-

ცა საკმაოდ ნახმარი მაუდის პალტო აცვია, საყელოზე კურდ-  
ლის ბეწემოვლებული, და კმაყოფილი წინ და უკან დადის,  
ბიჭებს თავს აწონებს, ცოტას იპრანჭება კიდევ. მერმე პალ-  
ტოს იხდის და ფრთხილად ჰკიდებს საკიდზე. ბოგდანა ახლა  
უკვე უხეში შალის სადად შეკერილი ნაცრისფერი კაბით წარ-  
სდგა ბიჭების წინაშე. სახეგაბადრული, ბედნიერი, ხელებგაშ-  
ლილი დგას და უღიმის, — შემომხედეთ, როგორი გოგო ვა-  
რო...

ანდუყაფარმა და ლუკამ ტაში დასცხეს, ბოგდანამ მოწი-  
წებით დაუკრა თავი ორივეს, მერმე ისევ გაიარ-გამოიარა,  
მალალ თეძოებს განგებ გაზვიადებულად მიარხევედა, თან უკ-  
ან იხედებოდა — კაბა როგორ მადგასო...

შაბათ სალამოს მმაჩის ბიუროს წარმომადგენელი მოვიდა  
თავისი დავთრით და ანდუყაფარისა და ბოგდანას ქორწინე-  
ბა გააფორმა. მოწმეებად ჯუჯა რუბენა და იზა დაისწრეს. ლუ-  
კაც, რა თქმა უნდა, იქვე იყო, მაგრამ მოწმედ არ გადიოდა.

ქორწილი იმავე სალამოს „გადაიხადეს“. მაგიდას ხუთნი  
ქსხდნენ: ბოგდანა, ანდუყაფარი, რუბენა, იზა და ლუკა. პირ-  
ველი სადღეგრძელო რუბენ ნალბანდიშვილმა შესვა. ახლად-  
დაქორწინებულები ადღეგრძელა. უსურვა ჯანმრთელობა, ხან-  
გრძლივი სიცოცხლე და ბედნიერება. მერმე, არ დამჯდარა,  
ზოდში მოიხადა, — არა მცალიაო, — თავისი უზარმაზარი  
კეპი დაიხურა და ყველას დაემშვიდობა. ბოგდანამ და ანდუ-  
ყაფარმა დიდი მადლობა გადაუხადეს — მმაჩის ბიუროს წარ-  
მომადგენლის შინ მოყვანა ჯუჯა რუბენას შნო და მარიფათი  
იყო.

ბოგდანა და ანდუყაფარი სუფრის თავში ისხდნენ. ერთიცა  
და მეორეც ძალზე კმაყოფილნი და გახარებულნი ჩანდნენ. ან-  
დუყაფარს თეთრი გაქათქათებული პერანგი და თავისი ძველი  
კოსტიუმი ეცვა. პირი გაეპარსა, თმა კოხტად გადაევიარცხნა.  
ბოგდანა ისევ ლამაზი იყო. ოღონდ იზას გვერდით მისი სი-  
ლამაზე ცოტათი მკრთალდებოდა და ხუნდებოდა. ლუკა იზას  
პირისპირ იჯდა და პირდაღებული მისჩერებოდა, თვალს ვერ  
აშორებდა, როგორც ბუხარში დანთებულ ცეცხლს. იზა გა-  
მუდმებით მოძრაობდა, ერთ ადგილზე ვერ ისვენებდა, თანაც  
ბეცრს ლაპარაკობდა და ერთთავად ისწორებდა ჩამოშლილ  
ოქროს თმას, რომელიც თითქმის ნახევარ სახეს უფარავდა.

„შეღებილი აქვს, — ფიქრობდა ლუკა, — ასეთი ფერის თმა არ არსებობს“. მაგრამ იზას ნამდვილად ჰქონდა ასეთი ფერის თმა, მზინავი ჰაეროვანი და ამავე დროს მძიმე, როგორც თვით ოქრო. წაბლისფერ წამწამებიდან მიზნედილ იისფერ შუქს ღვრიდა.

— თამადად ლუკას ვნიშნავ! — თქვა ანდრეაფარმა და ეს წინადადება ბოგდანამაც და იზამაც სიხარულით აიტაცეს.

ლუკა უხერხულად აიწურა. იუარა.

— ასეც უნდა ყოფილიყო, ჩემო ლუკა, ჩემს ქორწილში სხვა ვინ იქნება თამადა, თუ არა შენ. შენა ხარ ჩემი ერთადერთი მეგობარი და, თუ ძმა ხარ, უარს ნუ მეტყვი. — უთხრა სიცილით ანდრეაფარმა.

— მე არ ვიცი თამადობა!

— როგორც იცი, როგორც გინახავს, როგორც გაგიგონია, ისე ითამადე!

მაგიდაზე ორი ბოთლი ღვინო იდგა. სალდათის ბაზარში გლახისაგან ნაყიდი. სუფრას თუშური ყველი, კარტოფილისა და ჭარხლის ვინეგრეტი და ანდრეაფარის შეკმაზული ლობიო ამშვენებდა. ვინეგრეტი ბოგდანას ნახელავი იყო.

— ბოგდანას გაუმარჯოს! — თქვა ლუკამ და ჭიქა ასწია.

— ოო! — წამოიძახა იზამ და ჭიქა იმწამსვე დაცალა.

— გახსოვს, ლუკა, — უთხრა ანდრეაფარმა, — შენ მკითხე, არსებობს თუ არ არსებობს ბედნიერებაო? მაშინ ვერაფერი გიპასუხე და ახლა გეუბნები: ღმერთმა ჩემთვისაც გაიმეტა ბედნიერება და ამ ბედნიერებას სახელად ბოგდანა ჰქვია!

ანდრეაფარი საკუთარ თავს არ ჰგავდა. ეს ეხლალა შენიშნა ლუკამ, მაგრამ ამაზე ყურადღება ვერ გაამახვილა, რადგან ანდრეაფარის ნათქვამმა უცებ გაახსენა ორი ნაცრისფერხალათიანი კაცი, საგიჟის ეზოში რომ დასცირობდნენ და საუბრობდნენ.

იზამ ჭიქაში დაისხა ღვინო და უსიტყვოდ დალია. მერმე თეფშზე ლობიო გადმოიღო და პურს მისწვდა.

ბოგდანამ ჭიქა ასწია და სუფრას მიმართა.

— მე რა უნდა ვქნა?

— შენ სამადლობელო უნდა შესგა! — უთხრა ანდრეაფარმა.

— გმადლობთ! — გაიღიმა ბოგდანამ და ჭიქა ბოლომდე გამოცალა.

— მე არ დამიმთავრებია სადღეგრძელო! — თქვა ლუკამ, — ბოგდანასთან ერთად ანდრუყაფარსაც გაუშარჯოს!

— ოო! — კიდევ წამოიძახა იზამ, გაივსო ჭიქა და ისიც გამოწრუბა.

ლუკამაც შესვა, უსიამოვნოდ დაიმანჯა და ანდრუყაფარს შეხედა. — მეგობრის გულისათვის, თორემ ამას რა დამალევინებდაო. ანდრუყაფარი ალტაცებით უმზერდა ბოგდანას. ახლაც და მთელი ეს დღე მისთვის არ არსებობდა სხვა ვინმე ბოგდანას გარდა. დილიდან მთელი არსებით ბოგდანათი იყო დაკავებული. ყოველთვის გულისხმიერი, გულისყურიანი დღეს შენს ლაპარაკს აღარ უსმენდა; არ აინტერესებდი. ზოგჯერ გაყუჩდებოდა, თითქოს ყური მოგიგდოო, მაგრამ უაზრო, ან გულსგარე პასუხიდან ჩანდა, რომ მისი ფიქრი და გონება სულ სხვაგან ქროდა.

— ახლა სიამოვნებით ვიცეკვებდი! — თქვა იზამ, — არც მუსიკა... არც კავალერი...

ლუკას სასიამოვნო სიტბომ დაურბინა სხეულში ჟრუანტელივით და ძარღვები მოუდუნა. ოდნავ თავბრუც დაესხა. სულელივით უმიზნზოდ გაიღიმა და კეფა მოიფხანა. მერმე ბოთლი აიღო და ყველას შეუვსო ჭიქა.

— რუბენა რომ არ წასულიყო, იმას ვეცეკვებოდი... უმუსიკოდ... სულაც არ სჭირდება მუსიკა ცეკვას. არა, რა თქმა უნდა, სჯობია, თუ მუსიკაც უკრავს... გინდა, ლუკა, ვიცეკვოთ?

— მე არ ვიცი ცეკვა.

— სკოლა რომ დავამთავრეთ, ერთი ჩემი მეგობრის ოჯახში ვიქეიფეთ. გამოსაშვები საღამო იყო. მთელი ღამე ვიცეკვეთ... იმდენი, იმდენი, იმდენი... ფეხზე ვეღარ ვდგებოდი... თანაც დავთვერი... — იზამ გაიცინა... — შემდეგ გამომაგდეს.

— რატომ? — შეშფოთდა ბოგდანა.

— ჩემი მეგობრის მამა არ მომეშვა. ჯერ ერთი-ორჯერ მაცეკვა, მერმე გვერდით მომიჯდა და ხელებს მიფათურებდა. ბოლოს შემეხვეწა, აივანზე გამოდიო, — აქ იზამ ისევ გაიცინა, ოღონდ ახლა უფრო ხმამაღლა, — მე ავიღე და მთელი

ქიქა ღვინო დავასხი. თავზე. ძალიან გაბრაზდა მისი მსუქანი მეუღლე და მიბრძანა, — ახლავე დასტოვე აქაურობაო მე, რა თქმა უნდა, დავტოვე იქაურობა, მაგრამ ქეიფიც ჩაიშალა. ისე კი ლამაზი მამაკაცი იყო საწყალი... ამბობენ, ომში დაი-  
ლუპაო.

— ომში დალუპულთა ხსოვნა იყოს! — თქვა ანდუყაფარ-  
მა. — ლუკა, იცოდე, მამაშენს დალუპულთა შორის არ ვგუ-  
ლისხმობ. გოგი ცოცხალია დაიმახსოვრე ჩემი სიტყვები და-  
ლუპულთა ხსოვნისა იყოს!

— ოო! — ეს ისევე იზაა.

სხვებთან ერთად ლუკამაც გამოცალა ქიქა. მან კარგად იცოდა, რომ ანდუყაფარი ახლა ნუგეშსა სცემდა. იმიტომ უთხ-  
რა, — მამაშენს არა ვგულისხმობო და ცოტა არ იყოს, ეწყი-  
ხა, — რატომ ცდილობს მანუგეშოსო, როცა მამაჩემი ნამდ-  
ვილად ცოცხალიაო. საქმე ისაა, რომ ლუკამ შინაგანად არ და-  
იჯერა მამის სიკვდილი, გულთან არ გაიკარა. შესაძლოა, ეს  
რწმენა ბოგდანამაც გამოუმუშავა. ისინი ხშირად ღამ-ღამო-  
ბით მარტო რჩებოდნენ შუშაბანდში, საკერავ მანქანასთან და  
ბოგდანა უყვებოდა ათასნაირ ამბებს იმ მეომრებზე, რომლე-  
ბიც თურმე დალუპული ეგონათ, მაგრამ მერმე ქვეყანასაც და  
ოჯახსაც მკვდრეთით აღმდგრებივით მოევლინენ.

— ცეკვა მინდა, ცეკვა! — წამოიძახა იზამ.

— ერთი რუსული ანდაზაა: „ჩამოხრჩობილის ოჯახში  
თოქს არ ახსენებენო“, — უთხრა ანდუყაფარმა ღიმილით, —  
მაგრამ შენ ისეთი ჩამოხრჩობილის ოჯახში ხარ, სადაც თოქზე  
ლაპარაკი არ სწყინთ.

— რა ვქნა, თუკი მინდა?!

— ეგ უკვე აღარ ვიცი ისე კი ვწუხვარ, რუბენა რომ წა-  
ვიდა.

— მეც! — იზამ ისე დაისხა ღვინო, — ეტყობა, ამ ეზოში  
ერთადერთი მამაკაცი ეგ არის, ვისთანაც შეიძლება ცეკვა!

— იზა! — ხელი მოჰკიდა მკლავზე ბოგდანამ, — როგორ  
არა გრცხვენია, იზა!

იზამ არავითარი ყურადღება არ მიაქცია ბოგდანას.

— ვისაც ცეკვა შეეძლო, ახლა ფრონტზეა, სამშობლოსათ-  
ვის იბრძვის!

— ეგ რა სათქმელია, იზა?!

— მე არ მინდა ომი! მე ცხოვრება მინდა! მე ცხოვრებისათვის ვარ გაჩენილი, ფუფუნებისა და ნებივრობისათვის. შენა გგონია, ბოგდანა, მე არ ვიცი ჩემი ფასი. ვისა აქვს ასეთი თმა, ასეთი თვალები, ასეთი ტუჩები, — იზა წამოდგა, — ანდა ასეთი მკერდი, ასეთი წელი, ასეთი ფეხები, — მარჯვენა ფეხი გვერდზე გადგა და კაბის კალთა თქმომდე აიწია.

— დამშვიდდი, — უთხრა ბოგდანამ, — იშვიათი ფეხები გაქვს.

— ვიცი.. მერმე რად მინდა?

— ყველაფერი იქნება... ყველაფერს მოესწრებით...

— როდის?

— მალე.

იზას სახეზე უკვე ღვინისმიერი ცეცხლი წაჰკიდებოდა, ერთთავად გაწითლებულიყო.

— მოდი, ლუკა, ვიცეკვოთ!

ლუკამ რატომღაც გაიცინა.

— რას იცინი?

— რა ვიცი, მეცინება. — ლუკა ღვინომ გააბრუა და მისთვის ყველაფერი სულერთი იყო.

— მართლა.. — რალაც გაახსენდა იზას და ჩაფიქრდა, მერმე იკითხა, — რა კაცია დათიკო ბერიშვილი?

— ვინა? — ანდუყაფარმა, რომელიც ბოგდანას ხელზე ჰკოცნიდა, უცებ თავი წამოსწია.

— დათიკო ბერიშვილი.

— რატომ იკითხე?

— ისე.

— მაინც?

სუფრა დაიძაბა.

— ბედნიერ ცხოვრებას მპირდება.

— იმას ხომ ცოლი ჰყავს?

— მიუხედავად ამისა, მპირდება!

— შენ თვითონ რას ფიქრობ, როგორი კაცი უნდა იყოს ეგ დათიკო ბერიშვილი?

— მე არაფერს არ ვფიქრობ.

— იზა! — ბოგდანაც წამოდგა და მხარზე მოხვია ხელი, ოთახის სიღრმეში წაიყვანა. — ბავშვს მაინც მოერიდე, სირცხვილია!

— მე განა ბავშვი არ ვიყავი?! ვინ მომერიდა?!

— მერმე კარგია, ეგრე რომ მოხდა?!

— თავი დამანებე, მე უნდა ვიცეკვო — იზა გაუსხლტა ბოგდანას და შუა ოთახში დაიწყო ცეკვა. — გაუმარჯოს მხიარულებას!.. მცხელა კაბა უნდა გავიხადო!

— იზა!

კარზე ვილაცამ ფრთხილად დააკაკუნა.

— ვინ არის?

— მე ვარ, ძია ლალო!

— შემობრძანდით, ძია ლალო — შემოიპატიჟა ანდუყაფარმა.

— ბაბუაშენი მოვიდა, — შეაჩერა თავისთვის მოცეკვავე იზა ბოგდანამ.

კარი გაიღო და ოთახში ძია ლალო შემოვიდა, გაიღიმა და ქუდი მოიხადა. მოუხეშავ, დიდ ხელში კორჩოტების რამდენიმე კონა ეჭირა. მძიმე, ცოტა უხერხული ნაბიჯით გაემართა ბოგდანასაკენ და ყვავილები მიართვა. აკოცა. ანდუყაფარსაც გადაეხვია.

— მოგილოცავთ, შვილებო, გაბედნიერებას, — თქვა ძია ლალომ, — აი გაზაფხულის ყვავილებიც მოგიტანეთ!

— ლუკა, ღვინო დაუსხი ძია ლალოს!

ლუკა უკვე ფეხზე იდგა. კარადიდან ჩაის ჭიქა გადმოიღო და შიგ ბოთლი ჩაწრიტა. ძია ლალოს, ის იყო, ჭიქისთვის ხელი უნდა წაეელო, მაგრამ იზა ყველასათვის მოულოდნელად მივარდა, მოეხვია და ხვეწნა დაუწყო:

— წავიდეთ რა, პაპა, წავიდეთ!.. აღარ შემიძლია!

— დამაცა, შვილო... ეს ბედნიერი ხალხი დამალოცვინე!

— არა, წავიდეთ! ახლავე!.. — იზამ უცნაური მოუთმენლობა გაამჟღავნა. ტიროდა, იატაკზე ფეხებს აბაკუნებდა, ძია ლალოს აჩქარებდა, თითქოს ყოველ წამს გადამწყვეტი მნიშვნელობა ჰქონდა.

— კარგი, — მიუგო მშვიდად ძია ლალომ, — რახან ეგრეა, წავიდეთ.

წავიდნენ კიდევ.

ოთახში დარჩენილებმა ერთმანეთს უსიტყვოდ გადახედეს. მერმე ანდუყაფარმა ბოგდანას გაუღიმა და ანიშნა, — მოდი, ჩემს გვერდით დაჯექიო. ოთახში სხვანაირი ღუმილი ჩამოდ-



გა—დამორგუნველი, გამთიშველი და ლუკა მიხვდა, რომ მისი წასვლის უამიჯ დამდგარიყო.

— მე წავალ. — თქვა ლუკამ.

— ჯერ ვისხდეთ... ხვალ ხომ კვირაა. — ბოგდანამ მხარზე მოხვია ხელი, რომელშიც ისევ ძია ლადოს კორჩიოტები ეჭირა.

— არა, წავალ, დავიძინებ.

შუშაბანდს წინა ოთახიდან გამონაქონი მკრთალი შუქი ანათებდა. მაგიდაზე დეიდა ნატოს საყერავი მანქანა იდგა. იქვე უწესრიგოდ ეყარა ჯარისკაცური გიმნასტურები. ჯერ კიდევ წუხელ ბოგდანა აქ იჯდა და შუალამემდე კერავდა. ლუკა გულისტკივილით მიხვდა: ხვალ ამ მანქანასაც ისევე გაიტანდა ბოგდანა ანდუყაფარის ოთახში, როგორც დღეს ლოგინი გაიტანა.

სიცარიელის სევდა შემოაწვა. ფრთხილად გავიდა წინა ოთახში, სადაც დეიდა ნატოს ეძინა. მერმე ლამპა აიღო და თავისი ოთახის კარი შეაღო. თავბრუ ეხვეოდა და გული ერეოდა. ლამპა კომოდზე შემოდგა და თვითონ იქვე სკამზე ჩამოჯდა.

ბოგდანა იმედივით ცხოვრობდა შუშაბანდში და ლუკას მოეჩვენა, რომ ეს იმედი ისევე დაკარგა, როგორც იმ დღეს მტკვრის ნაპირზე უკანასკნელი ხელი ტანსაცმელი. გაძარცულივით იჯდა თავის ოთახში, შიშით შეპყრობილი. ეს შიში მარტოობისა იყო, სიცარიელისა და უკაცრიელობისა... უღაბურებისაც.

ლუკა ტანსაცმელს არ იხდიდა და არ წვებოდა დასაძინებლად, რადგან ეშინოდა... რისი? თვითონაც არ იცოდა.

## თავი მცამეტი

— ვერ მიდეპეშე, ბიჭო?! გამიგია, კაცის ასე აბუჩად აგდება, — ეს ბატონი პოლიკარპე გახლავთ. საიდანღაც შეუტყვია დეიდა ნატოს ავადმყოფობის ამბავი და სასწრაფოდ ჩამობრძანებულა, რათა მახლობელ ნათესავს გაჭირვების უამს მხარში ამოუდგეს, ხელი გაუმართოს. — მამიდაჩემი თუ ამ დღეში იყო, ვერ გამაგებინე, შე თავგასიებულო?

დატუქსული ლუკა კუთხეში აიტუზა. არაფერი ქვეყანაზე ისე არ სწყენია, როგორც ბატონი პოლიკარპეს დამტუქსველი სიტყვები. ლუკას მთელი დღე ეჩვენებოდა, რომ მართლაც უზარმაზარი, გასიებული თავი ჰქონდა და ვერ იმაგრებდა, მხარზე უფარდებოდა. ყველა გამვლელი და გამომვლელი გაოცებული ამტერდებოდა, — ამას რას ვხედავო!

ლუკას ბატონი პოლიკარპე არ გახსენებია, არ დასჭირვებია მისი თავი. გინდაც გახსენებოდა, სად უნდა გაეგზავნა დეპეშა, ვისთან? მისი არც ასავალი იცოდა და არც დასავალი. დეიდა ნატოს, რომელიც ერთმანეთზე ორ სიტყვას ველარ აბამდა, ხომ ვერ შეეკითხებოდა, — როგორ მოვიძიო ბატონი პოლიკარპეო..

ბატონმა პოლიკარპემ ორ დღეში აიწყო და მოიგვარა საქმეები: ლუკა შუშაბანდში გამოისტუმრა და თვითონ მეორე ოთახში ჩასახლდა. როგორც ჩანს, სამუდამოდ. იმ ოთახში დაუკითხავად შესვლა ახლა უკვე აღარავის შეეძლო.

დეიდა ნატო თავის საწოლზე გაუნძრევლად იწვა. მეტყველებაწართმეული უაზროდ მისჩერებოდა სივრცეში ამოჩემებულ წერტილს. დრო და დრო თვალები ცრემლით ევსებოდა და მერმე ისევ ეშრიტებოდა დიდი ხნით.

ბოგდანა ჩვეულებისამებრ უვლიდა, არც ერთი წუთით არ დაუკლია ზრუნვა.

— ვინაა ეს ქალი? — იკითხა ბატონმა პოლიკარპემ, როდესაც ბოგდანა დაინახა პირველად.

— ანდრუყაფარის ცოლია, — უპასუხა ლუკამ.

— აჰჰ, რა ღონიერ ფეხებზე დგას. — აღტაცება ვერ დამალა ბატონმა პოლიკარპემ. თან შემაზრზენი, გულისამრევი დიმილი გაუკრთა ტუჩებზე, — ბიჭო, ანდრუყაფარი მოუვლის მაგ ქალს? აჰჰ! აჰჰ!

კვირაობით რაღაც-რაღაცეები გაჰქონდა სახლიდან საბურთალოს ბაზარში გასაყიდად, ლუკა ვერაფერს ეუბნებოდა, თქმას ვერ უბედავდა. ისე კი ანდრუყაფარსა და ბოგდანას გაუმხილა, ბატონი პოლიკარპე ასე იქცევაო, მაგრამ იმათ რა შეეძლოთ? ბატონი პოლიკარპე მახლობელი ნათესავი და ჰირისუფალი იყო ამ ოჯახისა და ახლაც მფარველად და შემწედ მოვლენოდა. ვინ შეჰბედავდა სიტყვას?

ჩამოსვლისთანავე დაუკავშირდა დათიკო ბერიშვილს და

ყოველდღე ჯუჯა რუბენას სამტრედიესთან ჩალიჩობდა, იქ იყო ქალაქის პარკების საწყობი.

ერთ დღეს ლუკას უთხრა.

— სხვა გზა არა გვაქვს, უნდა გავუტყვალოთ დათიკო ბერიშვილს ბინა, დიდ ფულს იძლევა.

— დეიდა ნატო არ იზამს მაგას.

— ვინ კითხავს დეიდა ნატოს? რა იცის დეიდა ნატომ? დღეს თუ არა, ხვალ წაიღებს წერილს ნუცასთან... იცი, რა ჯდება ახლა კაცის დამარხვა? ნამეტანი ძვირია, ჩემო ლუკა, და დაუმარხავი არ დაგვრჩის დეიდაშენი.

— ჯერ ხომ ცოცხალია?

— ეგ სიცოცხლეა, ჩემო ლუკა? ოთხმოცდაათი პროცენტით სამარეში აქვს ფეხი ჩადგმული, თუ მეტი არა! კარგი, ვთქვათ, ცოცხალია, პირში სული უდგას. რომ მოკვდება, რას შვრები მერე? სად შოულობ ფულს?

— რა ვიცი?

— ოო! არც მე ვიცი! ამიტომ ახლავე უნდა დავიჭიროთ თადარიგი.

— ეგ საქმე არ გამოვა.

— უყურე ახლა ამას!

— დეიდა ნატო არ იზამს.

— ბიჭოს! არ ვეკითხები დეიდაშენს.

— მე არ გადავალ.

— არ გადახვალ?!

— არა!

— აბა, წავალ მე ჩემი გზით და შენ დამარხე ეს მიხრწნილი დედაბერი!

— ჯერ ცოცხალია და არ უნდა დამარხვა.

— ვაი, შენს პატრონს!

ლუკა მოშხამული წავიდა სკოლაში. ნეტავი რა უნდა ჩვენგან, რას გადაგვეკიდა ეს კაციო, — ფიქრობდა გზადაგზა. — ასეთი ნათესაობაც არ გამიგიაო! გუნებაში მკაცრად გადაწყვიტა, არაფერი არ დაეთმო ბატონი პოლიკარპესთვის. თანაც წარმოდგენილი არ ჰქონდა, როგორ უნდა გადაბარებულევნენ დათიკო ბერიშვილის ბინაში, როგორ უნდა გადაეყვანათ დეიდა ნატო. დარწმუნებული იყო, პირველ სართულამდე ვერც ჩაადწევდა ავადმყოფი, სული არ ჩაჰყვებოდა.

სკოლასთან ირაკლი დახვდა, შენობის კედელს ზურგით მიჰყუდებოდა და პაპიროსს აბოლებდა. დღეს სკოლის გუნებაზე არა ვარ, წამო, გავიაროთო, თუ ხეტიალი მოგვწყინდა, მეორე ან მესამე გაკვეთილზე მოვბრუნდეთო. ეტყობა, არც ლუკა იყოს სკოლის გუნებაზე, მაშინვე დათანხმდა და ტაატიო დაჰყვენენ ქუჩას და პროსპექტზე გავიდნენ. ერთხანს უმიზნოდ იხეტიალეს, კინოს შესასვლელთანაც იწრიალეს, მაგრამ არც ერთსა და არც მეორეს ჯიბეში ფული არ აღმოაჩნდათ და უკანვე დაბრუნდნენ.

სკოლაში დიდ დასვენებაზე მივიდნენ.

დერეფანში ლუკა ზაქარია ინწყირველმა შეაჩერა, კლასის დამრიგებელმა.

- დღესაც დაიგვიანე, არა?
- დიახ, პატივცემულო მასწავლებლო.
- როგორ არის დეიდაშენი?
- ცუდად.
- ერთი ვერ მოვიცალე, ვერ მოვინახულე.
- ძალიან ცუდადაა.
- არ ღირს ნახვა?
- რა ვიცი.

— ლუკა, მოდი აქ, ბიჭო, ერთი ეს მითხარი... — ზაქარია ინწყირველმა მკლავში ხელი მოჰკიდა და დერეფნის კუთხეში მიაშვევდია ლუკა, — გავიგე, თითქოს რამდენიმე ბიჭი მთელი კლასის პურს იყოფთ თურმე... რა, დანარჩენებმა უარი თქვეს, არ უნდათ პური, თუ როგორ ხდება?

- არ ვიცი, პატივცემულო მასწავლებლო.
- არა, შენ ნურაფრის გერიდება, მითხარი.
- დიახ, პატივცემულო მასწავლებლო.
- რამდენი იყოფთ?
- სამნი. ირაკლი დევდარიანი, მე და მიტო ჩანტლაძე.
- სამნი?
- დიახ!
- ერთ პურს?
- დიახ, პატივცემულო მასწავლებლო.
- მერე მთელი კლასი რას ამბობს?
- არაფერს... რა ვიცი... მე ირაკლი დევდარიანმა მითხრა,

ასე და ასეო. ჩვენ გავიყოთო... მთელი კლასი თანახმააო.

— იქნებ დააშინა?

— არ ვიცი, პატივცემულო მასწავლებლო.

— არა, იქნებ შეაშინა კლასი?.. გამიგე, თუ ღმერთი გწამს.

— რა ვიცი...

— მე, რა თქმა უნდა, მორალური უფლება არა მაქვს, მაგრამ ახლა ისეთი ცუდი დროა... თუ კლასი წინააღმდეგი არ არის, თუ ეს ყველას თანხმობით ხდება. მაშინ იქნებ... პა? ოთხად გავყოთ... მაგრამ თუ კლასი წინააღმდეგია, იმ შემთხვევაში ჩვენ უსინდისო, სამარცხვინო საქმეს ჩავიდნეთ.

— იცით რა, პატივცემულო მასწავლებლო, მე ის პური სულაც არ მჭირდება. — ლუკას უცებ გაახსენდა, რომ შინ მიტანილ პურს მთლიანად ბატონი პოლიკარპე ნთქავდა.—ჩემ წილს თქვენ დაგიტოვებთ.

— არა, არა, როგორ გეკადრება! რას ჰქვია, პური არ გჭირდება. შენ მხოლოდ ის დამიზუსტე, კლასი რას ამბობს, უკმაყოფილოა, თუ არა, ამ ვითარებით.

ლუკამ გაკვეთილების დამთავრების შემდეგ თავისი წილი პური მიუტანა ზაქარია ინწყირველს. ზაქარია ინწყირველმა პური გამოართვა და დიდი მადლობაც გადაუხადა, მერმე ჩუმად ჩატენა თავის უზარმაზარ ჩანთაში და შინისაკენ კმაყოფილმა გასწია.

ლუკაც გახარებული და კმაყოფილი გამობრუნდა. ჯერ ერთი დიდად ასიამოვნა კლასის დამრიგებელს, რომელსაც ოჯახში ოთხი დამშეული შვილიშვილი ელოდებოდა და მეორეც — ამ პურს დღეს ვეღარ მიირთმევდა ბატონი პოლიკარპე.

სკოლის სადარბაზოდან გამოსულს მაიკო დახვდა და უთხრა, შენობის კუთხესთან ირაკლი და მიტო გელოდებიანო. ირაკლი და მიტო მართლაც ელოდებოდნენ ლუკას. ირაკლი პაპიროსს ქაჩავდა ზედიზედ. ეტყობოდა, გაბრაზებული იყო. მიტო ოდნავ განზე იდგა, დამნაშავესავით აცეცებდა თვალებს.

— სად არის შენი პური, რა უყავი? — მისვლისთანავე ჰკითხა ირაკლიმ.

ლუკა ასეთ შეკითხვას არ ელოდა და უცებ ვერაფერი უპასუხა დაბნეულმა.

— რა უყავი-მეთქი, გეკითხები?

— ზაქარია მასწავლებელს მივეცი.

— რატომ?

— რა ვიცი... მთხოვა და...

— გთხოვა, არა? საიდან გაიგო, რომ ჩვენ სამნი ვიყოფდით პურს?

— რა ვიცი.

— არ იცი, არა? ახლავე გაგაგებინებ ყველაფერს! ირაკლიმ მთელი ძალით მოუქნია ხელი და სახეში სილა გააწნა.

ლუკას თვალები დაუბნელდა, დაბარბაცდა, ჩანთა ხელიდან გაუვარდა. როდესაც მეორეჯერ მოხვდა ძლიერი ხელი, მიწაზე გულაღმა დაეცა და უცებ თავის ტკივილი იგრძნო... ალბათ ძლიერად დაჰკრა კეფა გაყინულ მიწას, თვალები გაახილა. თავზე განრისხებული ირაკლი დასდგომოდა, უშვერად აგინებდა. მერმე ირაკლი დაიხარა, პალტოს საყელოში წაავლო ხელი და წამოდგომა დაუპირა. ლუკამ უნებურად გაუაზრებლად მოხარა მარჯვენა ფეხი და ფეხსაცმლის ჰვინტი ნიკაპში ამოჰკრა. ირაკლიმ ერთი შეპყვირა და იქვე ჩაიკეცა. ვიდრე ლუკა წამოდგებოდა, მაიკო გიჟივით მივარდა ირაკლის და ჩანთა დასცხო თავში.

ლუკამ იგრძნო, რომ მეტიც გაკეთება აღარ შეეძლო, ისე იყო დამტვრეული და დაღეწილი, ფეხზე ძლივს იდგა. ამასობაში ირაკლი წამოიმართა, მაიკოს წაატანა ხელი, მოიქნია და ლუკას მიახეთქა. ორივენი უშბლით მიასკდნენ ერთმანეთს და იქვე ჩაიკეცნენ. ირაკლიმ ეს არ აკმარა არც მაიკოსა და არც ლუკას, ორივენი წამოაყენა და ლაზათიანად მიბეგვა. მერმე გინებ-გინებით გაჰყვა, ქუჩას, უფრო სწორად გაიქცა.

ნაცემები შენობის კუთხესთან მიყუყულიყვნენ და ტიროდნენ. როდესაც ტირილით გული იჯერეს, ერთმანეთს ტანსაცმლიდან მტვერი ჩამოაბერტყეს და ნელი, დაღლილი ნაბიჯით გაეშურნენ შინისაკენ. ლუკას ეგონა, მიტო იქვე დახვდებოდა ატუზული, მაგრამ მიტო არსად არ ჩანდა. ეტყობოდა, გაპარულიყო, ანდა ირაკლის გაჰყოლოდა.

ლუკა ხედავდა, მაიკოს უშბლზე კოპი აჯდა და მარჯვენა თვალის უპეც ჩალურჯებოდა. ალბათ მე უარესი დღე მადგასო. — გაიფიქრა, მაგრამ ახლა თვითონ რომ ნაცემი იყო, სულაც არ აწუხებდა, — ამაზე მეტიც მომხვედრიაო. მართალია, მაიკომ ჩანთა დასცხო ირაკლის, მაგრამ მაინც არაფრით არ ეგონა, თუ ირაკლი ასეთ უმწეო გოგონზე ხელს აღმართავდა და გაარტყამდა. გარ ტყმა იქით იყოს, ლაზათიანად მიბეგვა კი-

დღეც. ლუკას ისევე მოაწვა თვალებზე ცრემლი და ნებისყოფა რომ არ დაეძაბა, ალბათ ერთხელაც ატირდებოდა.

ისინი ჩუმად, უსიტყვოდ მიდიოდნენ, მოწყენილები და ჩაფიქრებულები. ლუკას მიტო გაახსენდა და, — ეგეც კარგი ვინმე ყოფილაო, — გაივლო გუნებაში, — ეგ რომ წამოგვეშველებოდა, იქნებ სამივე როგორმე მოვრეოდითო.

ლუკა სამაგიეროს მიზღვაზე, შურისძიებაზე არა ფიქრობდა, რადგან იცოდა, ვერასოდეს ვერ გადაუხდიდა სამაგიეროს, უნდა, თუ ოდესმე დადგებოდა ისეთი დღე, როცა შესძლებდა შურისძიებას, დარწმუნებული იყო, ამას უკვე ფასი აღარ ექნებოდა, მანამდე ბევრი წყალი ჩაივლიდა. ამიტომ ასკდებოდა საკუთარ გულს, დაბოლმილი, გულგასიებული მიდიოდა, კი არ მიდიოდა, ჩვარივით მიათრევდა უღონო ფეხებს.

მაიკო და ლუკა თავიანთ ქუჩაზე გავიდნენ. იქ, სადაც ომამდე საკონდიტრო მაღაზია იყო, მაიკო შეჩერდა და ლუკას უთხრა:

— იცი, რა, ლუკა?.. მიკადო მომენატრა.

— მიკადო?

— გახსოვს, აქ რომ ერთი ქალი მიკადოს ჰყიდა?

— კი.

— გემრიელი იყო, არა?

— კი.

— შენც გიყვარდა?

— ძალიან.

— მე ყოველთვის ვინახავდი ფულს, სკოლიდან დაბრუნებისას ერთი ცალი მიკადო მაინც რომ მეყიდა. ყველა ნამცხვარზე უფრო მიყვარდა... გახსოვს, ისეთი მსუბუქი იყო... სამკუთხედი...

— კი, მახსოვს.

— ომი რომ დამთავრდება, ალბათ ისევ გაჰყიდიან?

— არა... თუმცა, როგორ არა... ნუგაც ძალიან მენატრება.

მაიკო.

— ნუგა?

— არა... თუმცა, როგორ არა... ნუგაც ძალიან მენატრება.

— მაშ, რა? ნაყინი?

— ნაყინიც... მაგრამ ყველაზე უფრო ფეხბურთი მომენატრა... იცი, ყველაზე მეტად ახლა რა მახსენდება? შარშან მა-მაჩემმა ჩამოგვაკითხა უკრაინაში ჩვენს წასაყვანად და ერთ

დღეს ფეხბურთზე წავედით. რუბენამ მტრედიც კი გამატანა. პაიჭაძემ ბურთი შეაგდო და მთელი სტადიონი ფეხზე ადგა. მე მტრედი გავაფრინე... ისეთი კარგი იყო მერმე მამაჩემმა მიკალოც მიყიდა, ნუგაც, ნაყინიც...

მაიკო და ლუკა ეკლესიის ეზოსთან შეჩერდნენ, დიღხანს იდგნენ ხმისამოუღებლად.

— რას ეტყვი სახლში?

მაიკო ჩაფიქრდა. მერმე თქვა.

— რაღაცას მოვიგონებ.

— ეჰ, რაც იყო, იყო — ლუკამ ხელი ჩაიქნია, უცებ გატრიალდა და გაიქცა.

ქიშკარში შესვლამდე ეზოში შეიხედა და იქაურობა გულისყურით მიმოათვალიერა, მერმე ქურდივით შეიპარა, — არავინ დამინახოსო და კიბე სირბილით აიარა. ჩანთა შუშაბანდში მიაგდო და თვითონ ტახტზე ჩამოჯდა. წელან, როგორც კი მაიკოს გაშორდა, ჭერგანუცდელმა სინდისის ქენჯნამ შეაწუხა. პატარა მაიკო, ეს ერთი ციციქნა გოგო ჩემი გულისთვის როგორ სცემო. ლუკა ბევრჯერ უცემიათ და თვითონაც ბევრი გაულახავს. ასე ვთქვათ, ბრძოლა ზოგჯერ წაუგია და ზოგჯერ მოუგია კიდევ, მაგრამ ასეთი უსამართლობა პირველად ნახა საკუთარი თვალით: ეს აყლაყულა დაუზოგავად ურტყამდა პატარასა და სუსტ გოგონას, რომლისთვის სულის შებერვაც კი საკმარისი აღმოჩნდებოდა, რომ წაქცეულიყო.

„არა, ამის პატიება არ შეიძლება, უსათუოდ სამაგიერო უნდა გადავუხადო“, — ფიქრობდა ლუკა, მაგრამ საქმეც ეს იყო, როგორ უნდა გადაეხადა სამაგიერო? ათასნაირი გეგმა მოიფიქრა და დააწყო; ეს კი არადა, მოკვლაც კი გადაწყვიტა, მაგრამ ფიქრში წასულს შემზარავი გადაწყვეტილებანი ბოგდანამ არ დაასრულებინა. შუშაბანდის კარი შემოაღო და თავზარდაცემულმა სახეზე შემოირტყა ხელი:

— რას ჰგავხარ, ლუკა, რა დაგემართა?! — შეიცხადა.

— რა ვიცი. მცემეს.

— ვინა?

— სკოლის ამხანაგმა.

— რატომ?

— არ ვიცი.

— წამოდი ახლავე, პირი მოგბანო. დეიდაშენმა ასე და-



სისხლიანებული რომ დაგინახოს, მაშინვე ამოხდება სული.—  
ბოგდანამ ხელი მოჰკიდა ლუკას, ნაცეში და ნაბეგვი ანდუ-  
ყაფარს წარუდგინა.

ლუკამ დაწერილებით უამბო ანდუყაფარს, რაც მოხდა.  
ანდუყაფარმა თავისი ველოსიპედისთვლებიანი სავარძელი ოთ-  
ახში უხმოდ გაატარ-გამოატარა. მერმე მოაგორა პირსაბან-  
თან, სადაც ბოგდანა ლუკას პირსა ბანდა.

— ვინ არის ეგ ირაკლი დევდარიანი, რატომ აქამდე არ  
გამიგია?

— წელს გადმოიყვანეს ჩვენს კლასში, ორჯერ არის, თუ  
სამჯერ დარჩენილი.

— დიდი მატრახაზი ყოფილა!

ლუკამ პირველად გაიგონა ანდუყაფარისაგან უხამსი სი-  
ტყუა და ცოტა არ იყოს, გაუკვირდა, მაგრამ იმასაც მიხვდა,  
რამ ათქმევინა. ანდუყაფარი იმდენად იყო გაბრაზებული, რომ  
გაფითრებულს ხელები უკანკალებდა.

ყველასთვის მოულოდნელად ოთახის კარი ბატონმა პო-  
ლიკარპემ შემოაღო. უაზრო ღიმილით მიმოათვალიერა იქაუ-  
რობა და დამხვდურებს ისე მიესალმა, თითქოს ამ ოთახში სრუ-  
ლიად შემთხვევით წააწყდა მათ.

— პო, გამარჯობა თქვენნი!

ბატონ პოლიკარპეს არავინ მისალმებია, მიუხედავად ამისა,  
ოთახში მაინც შემოვიდა და კარი ზურგსუკან ხელის ფათურით  
მიხურა. შეეჩინედილებულ სახესა და დაეღმებულ თვალებზე  
ეტყობოდა, კარგად იყო შეზარხოშებული, თუმცა ცდილობ-  
და საკუთარი ღირსების გრძნობა თავდაპირილობით შეენარ-  
ჩუნებინა—არ ებარბაცა.

— როგორ ხართ, მეზობლებო! ესაა, ბიჭო, მეზობლობა?!  
იმდენი ხანია, ერთად ვცხოვრობთ და ერთმანეთს წესიერად  
არ მივსალმებივართ... ბატონმა პოლიკარპემ ისევ გაიღიმა და  
აუუუუნებული თვალებით ბოგდანას მიაჩერდა. — ამ მშვე-  
ნიერი ქალბატონისათვის მაინც სულ არ ვარსებობ ქვეყანაზე,  
გინდაც მე ვყოფილვარ და გინდაც... ვილაც... ვიგინდარა.

— რა გნებავთ, ბატონო პოლიკარპე? — მშვიდად ჰკითხა  
ანდუყაფარმა.

— თქვენი სიკეთე, ბატონო! — ბატონმა პოლიკარპემ უცებ  
ლუკას მიაქცია ყურადღება და შეიცხადა, — აუჰ! დედა! დე-

და! დედა! გაზიარეს, ბიჭო? რას გავხარ, შე უპატრონო? ცოცხლად მარხავ ხომ დეიდაშენს? შემობრძანდი სახლში და, რაც იმათ დაგაკლეს, მე მოგიტავებ ახლავე. წამოეთრიე სახლში, შე უბედურო!

ბატონმა პოლიკარპემ ისევე გაუღიმა ბოგდანას და თვალე-ბი აუუუუუნდა.

ლუკამ უცებ შენიშნა, როგორ წამოენთო სახე ანდუყაფარს, მთლად აიღეწა. ბატონი პოლიკარპე კი არავის არ აქცევდა ყურადღებას, მხოლოდ ბოგდანას მისჩერებოდა მთვრალის უაზრო ღიმილით. ბოგდანა უხერხულად შეიშმუშნა, შებრუნდა პირსაბანისკენ და რატომღაც ხელები დაიბანა.

— ბატონო პოლიკარპე, თქვენ შეგიძლიათ ახლავე მიბრძანდეთ და გამოიძინოთ! — უთხრა ანდუყაფარმა ოდნავ შეცვლილი, ათრთოლებული ხმით.

— რა მიჭირს ახლა მე გამოსაძინებელი? — გაოცდა ბატონი პოლიკარპე.

— ის გჭირთ, რომ გაღეწილი მთვრალი ხართ!

— მე ვარ მთვრალი? — აღშფოთდა ბატონი პოლიკარპე.

— კი.

— უყურე ამას შენი ბიჭო, სტუმარს ვინ ხვდება ასე საქართველოში? მტერიც რომ ვიყო, ასე არ უნდა მომმართო მე — პოლიკარპე გირკელიძეს! — დააწვა პატრიოტულ გრძნობას ბატონი პოლიკარპე.

ანდუყაფარმა ოთახის სიღრმისკენ გააგორა თავისი სავარძელი.

— წამოეთრიე, ბიჭო, სახლში! — ახლა ლუკას მიუბრუნდა ბატონი პოლიკარპე, — შენი ფეხი არ ვნახო აქ!

— მაგას თქვენ არავინ გეკითხებათ, ბატონო, ლუკა შემოადგამს, თუ არ შემოადგამს ფეხს ჩემს ოჯახში.

— რას ჰქვია, არავინ გეკითხება?

— კიდევ ერთხელ გთხოვთ, მიბრძანდით აქედან!

— პოლიკარპე გირკელიძეს ეუბნები მაგას, ბიჭო?

— არა, ბატონო, უინსტონ ჩერჩილს!

— უყურე ახლა! ხედავ, ვის შემადარა? ამას კი ვერ გაპატიებ! — გადაიღია პოლიკარპე გირკელიძე.

თავისი სავარძლით ანდუყაფარი ელვის უსწრაფესად გამოქანდა ბატონი პოლიკარპესკენ, უცებ წაავლო მაჯაზე ხელი

და თავისკენ მოქაჩა. როგორც ჩანს, საშინელი ძალით მოუჭირა, რადგან ბატონ პოლიკარპეს სახე მოედრიცა, დაემანჭა, გამწარებული ჭერ ცალ ფეხზე აიწია, უკან გადაიხარა, თითქოს გულადმა ვარდებო, მერმე დაიგრიხა და სავარძლის წინ მუხლებზე დაეცა, თან გამწარებული ბლავილი აღმოხდა ყელიდან:

— მკლავ, შე უღმერთო!

— გაეთრევი, თუ არა, აქედან?!

— მივდივარ, ბატონო... ვინ ოხერი!.. ოღონდ გამიშვი ხელი!

ანდუყათარი შეეშვა. სწრაფად მოატრიალა თავისი სავარძელი და ფანჯარას მიაყენა. ბატონი პოლიკარპე ერთხანს იდგა ასე მუხლებზე დაცემული. გამწარებული იმანჭებოდა და ნატკენ მაჯას ნეორე ხელით ისრესდა. მერმე ზღაზვნით წამოიშართა და კარისკენ გალასლასდა. კარი გამოაღო. არ მობრუნებულა, ისე ჩაილაპარაკა. — ასეთ მასპინძლობას პირველად ვხედავო — და გაიძურწა.

— არც მე მინახავს ასეთი აბუჩი, უხამსი კაცო! — თქვა ანდუყათარმა.

ბოგდანა ანდუყათართან მივიდა, თავზე ხელი გადაუსვა, დაიხარა და აკოცა.

— განა ღირდა ამ ვიგინდარას გამო ასე აღელვება? — ბოგდანა დაიხარა, ორივე ხელი შემოხვია ანდუყათარს, ლოყით სახეზე მიეკრო. ორივენი გაყუჩდნენ და გაიტრუნენ.

ლუკა აივანზე გამოვიდა.

გამოვიდა კმაყოფილი და ბედნიერი, აივნის მოაჯირს ორივე მკლავით დაეყრდნო და მარტის მზით აელვარებულ მტკვარს დახედა. რიყეზე ორი თეთრი ლეკვი ებღღარძუნებოდა ერთმანეთს, ერთმანეთს ახტებოდნენ, უწვევოდნენ, ყურებზე კბენდნენ. ნაპირზე დაბმული ბრტყელძირიანი ცარიელი ნავი ტორტმანებდა. ნავის აშიაზე ბოლოქანქარა იჯდა და ცქმუტავდა.

ლუკას უხაროდა, ლუკას არ ეგონა, თუ ანდუყათარი ასეთი ღონიერი იყო, თუ ანდუყათარს ამდენი ძალა ჰქონდა ხელებში. სულ მუდამ ახსენდებოდა პოლიკარპე გირკელიძის სიტყვები: „ბიჭო, ანდუყათარი მოუვლის მაგ ქალს?! აუჰ! აუჰ!“ მას ბოლომდე არ ჰქონდა გააზრებული ამ სიტყვების მნიშვნელობა, მაგრამ მაინც აწვალებდა და არ ასვენებდა ბა-

ტონი პოლიკარპეს ნათქვამი. განსაკუთრებით კი მისი სახის შემაზრზენი გამომეტყველება, როცა ამ სიტყვებს წარმოსთქვამდა.

ახლა კი საკუთარი თვალთ ნახა, როგორ დააჩოქა ანდრუყაფარმა პოლიკარპე გირკელიძე, ეს აბუჩი, უხამსი კაცი, რომელიც ალბათ იმისთვის შემოვიდა ანდრუყაფარის ოჯახში, რომ დაენახა, ანდა დარწმუნებულიყო, უვლიდა, თუ ვერ უვლიდა ხეიბარი ღონიერ ფეხებზე შემდგარ თავის მეუღლეს.

ლუკას უცებ თვითონაც მოუწია ასეთივე ხეიბარი ყოფილიყო, ოღონდ მაიკო ზურგიდან მოსდგომოდა, ბოგდანასავით დახრილიყო, ხელები ყელზე შემოეკვდო და ლოყით სახეზე მოჰკრობოდა...

### თავი მეთოთხმეტი

მაიკო მხოლოდ მესამე დღეს მოვიდა სკოლაში. ჩალურჯებული თვალი დასცხრომოდა. თვალის უპეზე ოდნავ ემჩნეოდა სიყვითლეში განზავებული იისფერი ზოლი.

მიტო გაურბოდა, თვალს არიდებდა ლუკას. ირაკლი დევდარიანს აეტორღიალა, შესვენებაზე ერთად დაძრწოდნენ დერეფნებში. ლუკამ თავისი წილი პური დაჰკარგა. აღარ იცოდა, უკვე ორად ჰყოფდნენ პურს, თუ სამად. შესაძლებელია სამადაც ჰყოფდნენ. მესამედს თვითონვე აძლევდნენ ზაქარია ინწკირველს.

ლუკას ჩალურჯებულმა თვალებმა დიდად დააინტერესა მთელი კლასი, მაგრამ მათი ცნობისმოყვარეობა გულგრილად დააცხრო ლუკამ, ცივად უთხრა, — მცემესო, — და თავიდან მოიშორა აბეზარი თანაკლასელები.

მაიკოს გამოჩენა გაუხარდა, მაგრამ მისვლა ვერ გაბედა, რატომღაც თავს დამნაშავედ თვლიდა, მით უმეტეს მას შემდეგ, როცა საკუთარი თვალთ იხილა, როგორ გაუსწორდა ავადმყოფი კაცი ჯან-ღონით სავსე მამაკაცს.

მაგრამ გაკვეთილების დამთავრების შემდეგ მაიკო და ლუკა მაინც შეხვდნენ ერთმანეთს დერეფანში. მხარდამხარ, უსიტყვოდ გაჰყვნენ დერეფანს და კიბეზე დაეშვნენ. გარეთ გამოსულეებმა სადარბაზოსთან მდგარი ბოგდანა დაინახეს. ლუკამ

გაუკვირდა და შეშფოთდა კიდევ, — რამე ცუდი ამბავი ხომ არ შეგვემთხვაო. მაგრამ ბოგდანამ კეთილად გაუღიმა, სახეზე ხელი მოუსვა და მკერდზე მიიკრა. მერმე ჰკითხა:

— ერთი მაჩვენე, რომელია ის ირაკლი დევდარიანი?

ირაკლი და მიტო სკოლის შენობის კუთხესთან იდგნენ. ირაკლი კედელს მიპყრდნობდა და პაპიროსს აბოლებდა.

ლუკას გული შეეკუმშა, ტანმა ცუდი უაზრა. ამიტომაც დააყოვნა პასუხი, მაგრამ მაიკომ დაასწრო:

— აი ეგ არის, პაპიროსს რომ აბოლებს.

ბოგდანა მაშინვე გაემართა ირაკლი დევდარიანისკენ. მიუახლოვდა, მხარზე ხელი დაარტყა და ანიშნა წამომყევით. ირაკლი კედელს მოსცილდა და ოდნავ დაბნეული გაჰყვა ბოგდანს. ისინი თითქმის ერთი სიმაღლისანი იყვნენ. ჩიხის სიღრმეში შეჩერდნენ. მიტო ადგილზევე დარჩა, ხოლო მაიკომ და ლუკამ რამდენიმე გაუბედავი ნაბიჯი წადგეს.

ირაკლი დევდარიანი, ეტყობა, უცებ მოეგო გონს, უკვე გამომწვევად იდგა ბოგდანას წინ, პაპიროსის ბოლიც კი შეაფუტა სახეში.

— შენ სცემე ამათ? — ჰკითხა ირაკლის ბოგდანამ და მაიკოსა და ლუკას მოხედა!

— რა შენი საქმეა, მე ვცემე თუ სხვამ?! თუ დამჭირდა, კიდევ ვაქოთაქებ ერთსაც და მეორესაც!

ლუკამ თვალი ვერ მოჰკრა, როდის მოუქნია ხელი ბოგდანამ. მხოლოდ ლაწანი გაიგონა და მიწაზე გაშხლართული ირაკლი დაინახა. ირაკლი გიჟივით წამოხტა და ისევ ბოგდანასაკენ გამოქანდა. ლუკამ მეორედაც გაიგონა ლაწანი, ირაკლი ახლა შენობის კედელს მიაწყდა, თავი ველარ შეიმავრა და იქვე ჩაიკეცა.

— მეორედ არ ახლო ამ ბავშვებს ხელი, თორემ უარეს დღეს დაგაყრი! — ბოგდანა ჩქარი ნაბიჯით წამოვიდა, მაიკოსა და ლუკას შუაში ჩაუდგა, ორივეს მხრებზე მოხვია ხელები და წამოიყვანა.

ყველაფერი ისე უცებ დატრიალდა, რომ ლუკამ ვერც კი გაიაზრა, რა მოხდა. ეს კი იყო, გულში თანდათან ეონავდა შიში, ეშინოდა, ირაკლი ჩუმად არ წამოჰპარვოდა უკნიდან და ბოგდანასთვის რამე არ დაერტყა, ქვა ან ჯოხი, ირაკლისაგან ახლა უკვე ყველაფერს მოელოდა. თან უკან მიხედვასაც ვე-

ღარ ბედავდა, რაღაც საშინელის მოლოდინით შეპყრობილი, დაძაბული მიჰყვებოდა ბოგდანას.

— სანამ მე თქვენთან ვარ, ნურაფრის ნუ შეგეშინდებათ. ხვალ მშვიდად მიდით სკოლაში, დარწმუნებული ვარ, თითსაც ვერ დაგაკარებთ.

სამივენი პროსპექტზე გავიდნენ და მარცხნივ გაუხვიეს. ვიდრე გაუხვევდნენ, ლუკამ მოასწრო და თვალი გააპარა სკოლის შენობისაკენ, სადაც ირაკლი და მიტო ეგულეებოდა. არც ირაკლი და არც მიტო იქ აღარ იდგნენ, ქუჩა ცარიელი იყო. ბოგდანამ ეტლი გააჩერა. ჯერ ლუკა და მაიკო ჩასხა, მერმე თვითონ ავიდა და მათ შორის მოთავსდა.

— საით? — იკითხა მეეტლემ.

— ჩულურეთში. — უპასუხა ბოგდანამ.

ეტლი დაიძრა.

ასეთ ფუფუნებას ლუკა არ ელოდა. იმ შიშისა და დაძაბულობის შემდეგ, უეცარმა სიამოვნებამ მოთენთა და მოადუნა. სიამოვნებას გვრიდა ეტლის ნელი რწევა, ცხენების ფლოქვთა თანაბრადზომიერი თქარათქური, მეეტლის ვეებერთელა ტანი, წელზე მოჭერილი წითელი ნაჭრის ქამარი...

სახლები სწრაფად გარბოდნენ უკან, სახლები და ტროტუარზე მოსიარულე აღამიანები.

— ეი, ლუკა! — დაუძახა უცებ ვილაცამ.

ლუკა გადაიხარა და თანაკლასელი დაინახა, უჩა შავდია. უჩა გამწარებული მოსდევდა ეტლს, თან ჩანთას მოიქნევდა. საოცრად გახარებული იყო, ლუკას ეძახდა, ხელს უქნევდა. ლუკამაც დაუქნია ხელი...

ეტლი კიდევ ერთ ლუკას თანაკლასელს დაეწია, მერმე — მეორეს. ახლა უკვე სამნი მოსდევდნენ ეტლს — გახარებულები, სახეგაბრწყინებულები... გზაზე მათ კიდევ რამდენიმე შინ მიმავალი ბიჭი შეუერთდა, ისინიც ლუკას ამხანაგები იყვნენ. ეტლს ადევნებულთა ჯგუფი გაიზარდა. ყიფინით მორბოდნენ, ეხეთქებოდნენ ერთმანეთსაც და გამვლელებსაც, მაინც მოიწევდნენ წინ, ცდილობდნენ ეტლთან ახლოს ერბინათ. რაღაც გაურკვეველს ეუბნებოდნენ ლუკას, თვალებანთებულები და აგზნებულები შესცქეროდნენ სახეში. ლუკასაც უხაროდა... რა უხაროდა? უცებ მოეჩვენა, რომ ეს ასეც უნდა მომხდარიყო. გამარჯვებული ბრუნდებოდა შინ და სხვა რითი უნდა დაბრუნებულიყო, თუ არა ეტლით?!

ბავშვებმა მოედანამდე სდიეს. მერმე ეტლმა მოედანს შემო-  
უარა და ვიწრო ქუჩაზე გავიდა. აქედან ქვაფენილი იწყებოდა  
და მეეტლემ აღვირი მოზიდა, ოღნავ შეანელა სვლა. ლუკას  
ახლალა გაახსენდა მაიკო, — ნეტავი რა გუნებაზეაო.

მაიკოს ორივე ხელი შემოეხვია ბოგდანას მკლავისათვის და  
ზედ მთელი ტანით მიჰკვროდა ტკიპასავით. მკლავზე მისვე-  
ნებულს თვალეზი დაეხუჭა — ვითომ მძინავსო, თითქოს ყუ-  
რადღება იგრძნო, მაიკომ ცოტა ხნის შემდეგ თვალეზი გაახი-  
ლა და ბოგდანას ისე ახედა, როგორც იმედს. მერმე ჰკითხა:  
— ხომ არ გაწუხებთ, ქალბატონო?

ბოგდანამ გაიღიმა, სახეზე მოუთათუნა და თმა გაუსწორა.  
მაიკო ნებივრად შეიშმუშნა, ისევე მიასვენა თავი ბოგდანას  
მკლავზე და თვალეზი მილულა. კაცი იფიქრებდა — საცაა კა-  
ტასავით კრუტუნს დაიწყებდო.

ლუკას მთელი გზა ეგონა ან უფრო ზუსტად, შინაგანად შე-  
უმოწმებლად დარწმუნებული იყო, რომ მაიკო იმასვე განიც-  
დიდა, რასაც თვითონ, რატომღაც უსიამოვნოდ გაუკვირდა,  
როდესაც ასე საეჭვოდ ვალურსული დაინახა. მისთვის უცხო  
აღამიანს რომ მიტმასნოდა. იგი ალლოთი მიხვდა რაღაცას, მაგ-  
რამ ეს რაღაც ბოლომდე არ იყო მკაფიოდ გამოკვეთილი. გა-  
ახსენდა, იმ დღეს რა უწყალოდ სცემა ერთიცა და მეორეც  
ირაკლი დევდარიანმა. რა თავგანწირვით ეკვეთა ლუკას გუ-  
ლისთვის მაიკო იმ ახმახს, თვითონ კი თითიც არ გაუნძრევია,  
როცა ირაკლი მაიკოს ურტყამდა. შეშინებული იდგა და უკა-  
ნასკნელი ლაჩარავით უყურებდა, როგორ სცემდა გოგოს...  
რაღაც ეტკინა, რაღაც გაეზზარა გულის სიღრმეში ლუ-  
კას...

რა თქმა უნდა, მაიკო დღეს დარწმუნდა, ლუკამ ის არ  
გააკეთა, რისი გაკეთებაც შეეძლო, მით უმეტეს არც ისეთი  
ვაჟკაცი ყოფილა ის შენი ირაკლი დევდარიანი, არა, ირაკლის  
რომ ვერ მოერევა ეს ნაღვია, მაგრამ მორევაც არის და მო-  
რევაც... შეიძლება, კაცი ღირსეულად დამარცხდეს...

ეტლი ეკლესიის ეზოს წინ გაჩერდა. მაიკომ ბოგდანას აკო-  
ცა, დაემშვიდობა და ფრთხილად ჩავიდა. მერმე ფეხარეული  
ნაბიჯით გაემართა ჰიშკრისკენ. ლუკამ თვალი გააყოლა ეზოს  
სიღრმეში მიმავალს, დარწმუნებული იყო, მაიკო, ვიდრე ეკ-  
ლესიას მიეფარებოდა, ერთხელ მაინც მოიხედავდა. მაგრამ

შეცდა, მაიკოს არ მოუხედავს, უხერხული ნაბიჯებით მიდიოდა ეკლესიის გასწვრივ.

მეეტლემ ცხენებს შეუძახა და ეტლი ისე დაიძრა...

როდესაც ბოგდანა და ლუკა ანდუყაფარს გამოეცხადნენ, ბოგდანამ თავის მეუღლეს როგორღაც დამნაშავესავით გაუღიმა:

— აკი ერთხელ გითხარი, ვერ ვეგუებები-მეთქი ზოგიერთ ქრისტიანულ დოგმას. დღეს შევამოწმე ჩემი თავი და მართალი აღმოვჩნდი.

— რა ჩაიღინე, ბოგდანა? — დაიბნა ანდუყაფარი.

— ისეთი არაფერი... ის ბიჭი შემომელახა.

— რას ჰქვია, შემოგელახა?

— კი, ნამდვილად.

— მაგას ვერ დავიჯერებ.

— ეგეთი თავხედი ბავშვი მეორე არ შემხვედრია.

— ხელი გაართყი?

— ორჯერ.

— ბოგდანა!

— რას იზამ, ხლება ხოლმე... ნუ გეშინია, მე ვილოცებ ჩვენი სულის ხსნისათვის!

მეორე დღეს ლუკა გულის ფანქვალით მიდიოდა სკოლისაკენ. ჯერ ერთი ირაკლი დევდარიანისა მაინც ეშინოდა. ღრმად სჯეროდა, რომ ირაკლი ასე ადვილად არ დაშოშმინდებოდა და ამ შეურაცხყოფას არც ლუკას და არც მაიკოს არ აპატიებდა. თანაც უკვე თვითონვე რცხვენოდა, დამცველად ქალი რომ მოიყვანა. ბოგდანა ვაჟი ყოფილიყო, მაშინ სხვა იქნებოდა. ახლა კი რა გამოვიდა, შეიძლებოდა, მთელ კლასს მასხარადაც აეგდო. ლუკას მაიკოსთან შეხვედრაც აფიქრებდა. მისთვის გაუგებარი იყო მაიკოს გუშინდელი უეცარი გადასხვაფერება, მოულოდნელი ცვლილება, რომელიც ეტლში ჯდომისას შენიშნა.

მაგრამ მაიკოს ქუჩაშივე შეეფეთა სკოლისაკენ მიმავალი. მაიკო ძალზე კმაყოფილი ჩანდა გუშინდელი დღის გამო. განსაკუთრებული სიამოვნებით იგონებდა ეტლით გამოსეირნებას.

— კარგი იყო, არა?

— კი, ძალიან.



— კარგი ქალი ყოფილა ბოგდანა.

— კი, ძალიან... შენ კიდევ არ იცი. მაიკო, როგორ უვლის დეიდაჩემს. ბოგდანა რომ არ გამოჩენილიყო, ალბათ დავი-  
ლუპებოდით.

— ანდუყაფარს უყვარს?

— კი, ძალიან...

— მე პირველად ვიჩქეი ეტლში.

— მართლა? — გაუკვირდა ლუკას.

— დაინახე, როგორ მოგვედენენ ბავშვები!

— როგორ არა! მე კი მეგონა, მაიკო ვერ ხედავს-მეთქი...  
მთელი გზა გეძინა.

— მე მეძინა?! ისე მსიამოვნებდა ეტლში ჯდომა, თანაც  
ისეთი თბილი იყო ბოგდანა...

— დღეს ნახე, როგორ შეგხვდებიან ბავშვები!

— ვიცი რომ იცოდე, ცოტას გავიპრანჭები კიდევ, მაგ-  
რამ...

— რა მაგრამ? — ჰკითხა ლუკამ.

— ცოტათი ირაკლის მეშინია.

— ნუ გეშინია! — დაამშვიდა ლუკამ. — ბოლოს და ბოლოს  
თავს შევაკლავ!

— თუ კიდევ გაგვლაზა?

— ნუ გეშინია, მაიკო!

ირაკლი დევდარიანი მეორე დღეს სკოლაში არ გამოცხა-  
დებულა. არათუ მეორე დღეს, საერთოდ, აღარ გამოჩე-  
ნილა.

რაც შეეხება თანაკლასელებს, რომლებიც წინა დღეს ყი-  
ვინითა და აურზაურით მისდევდნენ ეტლს, არავითარი განსა-  
კუთრებული ყურადღება არ მიუქცევიათ გუშინდელი ტრიუმ-  
ფატორებისათვის. პირიქით, არც კი უკითხავთ, რა მიზეზის გა-  
მო ისხდნენ ეტლში.

ეს კი იყო, პური იმ დღეს მთელმა კლასმა თანაბრად გა-  
ინაწილა.

გაზაფხული მეტად ავბედითი აღმოჩნდა ანდრეაფარისათვის, მოულოდნელად, უცებ დაიწყო გასუქება, უფრო სწორედ, იგი თვალდათვალ სივდებოდა. ექიმებმა ვერაფერი თქვეს სწაწნუგეშო. მედიცინა უძლური აღმოჩნდა, თუნდაც რამდენიმე ხნით შეეჩერებინა ეს თავზარდამცემი პროცესი.

ბოგდანა შეძრწუნებული იყო.

აი, რა ილაპარაკეს მან და ლუკამ ერთ მაისის დილას, ნავთის რიგში:

ლ უ კ ა — როგორ ეძინა წუხელ?

ბ ო გ დ ა ნ ა — ცუდად.

ლ უ კ ა — არაფერი ეშველება?

ბ ო გ დ ა ნ ა — ეგ მხოლოდ ღმერთმა იცის.

ლ უ კ ა — ექიმმა რა თქვა? გუშინ ხომ იყო ექიმი?

ბ ო გ დ ა ნ ა — არც კი გაუსინჯავს, მხოლოდ დახედა და მხრები აიჩეჩა. მე ვკითხე მიზეზი, — რატომ სივდება-მეთქი? ეგ რომ ვიცოდეთ, ქალბატონო, მაშინ ხომ მოვარჩენდით კიდევცო, — მიპასუხა.

ლ უ კ ა — იქნებ გაუაროს.

ბ ო გ დ ა ნ ა — სხვათაშორის, ეგეც ვკითხე — იქნებ გაუაროს-მეთქი? იქნებ გაზაფხულის ბრალია-მეთქი. შეიძლება გაუაროსო, — თქვა, — თუმცა ამის გარანტიას ვერავინ მოგცემთო. მაგრამ, იცი, რა ლუკა, მე არ მგონია, რომ ეს დროებითი მოვლენა იყოს. ცუდად არის საქმე, ძალიან ცუდადი.. ანდრეაფარს რომ რაიმე შეემთხვეს, ალბათ თავს მოვიკლავ... შენ ხომ იცი, რა კაციც არის ანდრეაფარი?!

ლ უ კ ა — ვიცი.

ბ ო გ დ ა ნ ა — გუშინ ქაშუეთში წავედი და ვილოცე:

ლ უ კ ა — არაფერი ეშველება?

ბ ო გ დ ა ნ ა — ძალიან დაუძლურდა, ლუკა, სულმთლად გამოეცალა ღონე, შენ ხომ გახსოვს, ლუკა, რა ღონიერი იყო, როგორი ძალა ჰქონდა? ახლა კი ფინჯანის აწევაც უჭირს, ჩაის ძლივსა სვამს. მაინც რა უცებ მოხდა, ღმერთო, ყველაფერი... თვენახევარში... ლამის გული გამისკდეს.

ლ უ კ ა — (ბოგდანას თვალს არიდებს, გული ყელში ებჯინება, ცოტაც და იტირებს).

ბოგდანა — ანდუყათარს რას გამოაპარებ, ანდუყათარს სხვაზე უკეთ ესმის, რაც სჭირს. იცის, ჯანმრთელობა საბოლოოდ შეერყა და, რაც დაჰკარგა, იმის აღდგენა უკვე შეუძლებელია. (ღუმილის შემდეგ). შენ ძალიან უყვარხარ, ლუკა, შენ ერთადერთი მეგობარი ხარ ანდუყათარისა. ამასწინათ თქვა: ღმერთო, ისე მომკალი, ღმერთო, ისე წამიყვანე ამქვეყნიდან, ლუკას ჩემს სიკვდილს ნუ დაანახებო.

ლუკა — (ბოგდანასკენ ზურგშექცევითა დგას. ფრთხილად გააპარებს ხელს შარვლის ჯიბისაკენ და ცხვირსახოცს ამოიღებს. ვითომ ცხვირის მოხოცვა უნდა. ჩუმად, ბოგდანასაგან დამალულად იწმენდს ცრემლს).

ბოგდანა — რა უსამართლოა ცხოვრება! რატომ უნდა დაიღუპოს ეს სიკეთით სავსე კაცი, როცა ამდენი ბოროტი დათარეშობს ქვეყანაზე?! მას ხომ არაფერი დაუშავებია გარდა იმისა, რომ გარშემო შადრევანივით აფრქვევდა სიყვარულს, ნდომას, კეთილშობილებას! შენ არ გაგიგონია, ლუკა, როგორ დამტუქსა იმ დღეს, შენთან სკოლაში რომ მოვედი იმ ბიჭის საცემად. მართალი გითხრა, ახლა მეც ვნანობ, ასე რომ მოვიქეცი... მით უმეტეს იმ ბიჭს სწავლისთვის სულაც მიუწებებია თავი... (ისევ ღუმილი. ღუმილის შემდეგ) ლუკა, გეთაყვა, თუ ღმერთი გწამს, მითხარი, ვინაა მთვარისა?

ლუკა — (დაიბნა) მთვარისა?

ბოგდანა — შენ ხომ იცი, ვინ არის მთვარისა?

ლუკა — რატომ მეკითხები?

ბოგდანა — იცი, თუ არა? :

ლუკა — ვიცი.

ბოგდანა — მერე?

ლუკა — რატომ მეკითხები?

ბოგდანა — ცუდად არ გამიგო, ლუკა. ამ ბოლო დროს ხშირად ახსენებს ხოლმე მთვარისას და მე ანდუყათარის ნაღაპარაკევიდან მივხვდი, იგი რალაციით შენ გიკავშირდება.

ლუკა — მე ერთხელ ვნახე მთვარისა საგიეში, მაგრამ მეორედ რომ მივედი იქ, მითხრეს, არავითარი მთვარისა არ არსებობსო.

ბოგდანა — ვინ გითხრა?

ლუკა — დარაჟმა... ამიტომ ნამდვილად არ ვიცი, არსებობს თუ არ არსებობს...

ბოგდანა — მართლაც, ხომ არ შეიძლება, შენ თვითონ მოგეგონა მთვარისა ანდა მოგჩვენებოდა... ანდა... იქნებ სიზმარში ნახე და მერმე ისე ნათლად წარმოიდგინე, რომ ცხადი გეგონა.

ლუკა — არა, არა.. მე ნამდვილად ვნახე... მერმე მეგრებმრებოდა კიდევ...

ბოგდანა — მაშ რატომ ამბობ, მთვარისა არ არსებობსო?

ლუკა! — რა ვიცი... ასე მითხრეს, აქ არავითარი მთვარისა არ ცხოვრობსო, არც არასოდეს უცხოვრიაო! ეს საავადმყოფოს სამრეცხაოა და სხვა არაფერიო!

ბოგდანა — იქნებ შეცდა დარაჯი?

ლუკა — (მხრებს იჩეჩავს).

ბოგდანა — გინდა ერთად წავიდეთ?

ლუკა — ჩემთვის სულერთია. თუ ასეა, ახლავე წავალ, ნავთი მაინც არ მოაქვთ.

ბოგდანა — მეც მინდა, მთვარისა არსებობდეს, რადგან ასე სურს ანდუყაფარს.

ლუკა — კარგი, წავალ!

ლუკა წავიდა.

იგი მიხვდა, რომ ბოგდანამ უფრო მეტი იცოდა მთვარისას შესახებ, ვიდრე აქ გაამქლავნა. როგორც ჩანს, ანდუყაფარმა მას ყველაფერი უთხრა, უთხრა ისიც, თუ რატომ წუხდა ანდა რატომ აწუხებდა ასე რიგად მთვარისა. მაგრამ ლუკასთვის გაუგებარი და გაურკვეველი რჩებოდა მიზეზი ამ წუხილისა, რატომ უნდა მიეყენებინა ანდუყაფარისათვის მთვარისას არსებობა-არარსებობას ასეთნაირი ტკივილი?

ლუკას გაახსენდა ის ღამე, როდესაც პირველად უთხრა, — მთვარისა არ არსებობსო. მაშინ საშინლად აღელდა ანდუყაფარი, ხოლო ლუკა გაოცებული და გაოგნებული დარჩა ამ აღელვების გამო. მას შემდეგ, მართლაც, იღარ უფიქრია მთვარისაზე, არც დასიზმრებია. ახლა კი უკვე ნანობდა, ოდესღაც რომ ნახა გალიაში გამომწყვდეული შიშველი ქალიშვილი, რომელმაც თავისი ტკივილები გაუმხილა; ნანობდა იმასაც, — ნახი და განცდილი ანდუყაფარს რად გავანდეთ.

მექოთნეთა ქუჩით რიყის ქუჩაზე დაეშვა და მერმე მოედინიდან ტროლეიბუსს გაჰყვა ძველ კირხემდე. ლუკას იმედი არ

ჰქონდა, რომ საგიჟის კარი ღია იქნებოდა. ასეც მოხდა, ალ-ყაფის რკინის კარი უნუგეშოდ ჩაკეტილი დახვდა. ამოდ იბო-ღიალა წინ და უკან გალავნის გასწვრივ, მერმე იმედგაცრუე-ბული და გულგატეხილი უკან დაბრუნდა, ღრმად დარწმუნე-ბული, რომ ვერასოდეს, ვერავინ ვერ დაადგენდა; არსებობდა, თუ არ არსებობდა მთავარისა.

მექოთნეთა ქუჩა აათავა და დაინახა: ნავთის წერტთან არავითარი რიგი აღარ იდგა. ნავთის წერტიც დაკეტილი იყო. შინ მისულს ანდუყაფარი და ბოგდანა აივანზე დახვდნენ. ბოგ-დანას ბორბლებიანი სავარძლის საზურგესთვის ორივე ხელი ჩაეველო და ანდუყაფარს სუფთა ჰაერზე დაასეირნებდა. ლუკა დაინახა თუ არა, თვალთ ანიშნა, — ახლა არაფერი მითხრაო. სახედასიებული, ფერგამკრთალი ანდუყაფარი უღონოდ ესვენა სავარძელში. უმწეო, დაბერილი ხელები მუცელზე დაეკრი-ფა. ლუკას ძლივს შესამჩნევად გაულიმა. მერმე თვალეები და-ხუჭა და მის ფერფლისფერ სახეს ისევ ცივი სიმშვიდე დაეუფ-ლა.

— ნავთი არ მოუტანიათ. — თქვა ბოგდანამ.

— მივხვდი.

— ხვალ იქნებაო.

— ხვალ რომ სკოლაში მივდივარ?

— თქვენსასაც და ჩვენსასაც მე მოვიტან. ხვალ სალამოს ცვლაში ვმუშაობ.

ლუკა მოაჯირს გადაყუდა და მტკვარს ჩახედა. მტკვარი უკვე იმდენად მოდიდებულიყო, რიყე გადმოელახა და ეზოს კიდეს მოსდგომოდა. მიდიოდა გახელებული, ამღვრეული, აქა-ფებული, მდინარეში შეჭრილ აგურის კედელს აწყდებოდა და ხმაურით აბრუნებდა წყალს, ტალღას ტალღაში აწნავდა, უზ-არმაზარ ძაბრულებს აჩენდა ურჩხულის ხახასავით.

ლუკამ ბოგდანას მოხედა და ანიშნა, — კარი დაკეტილი დამხვდაო. ბოგდანამ თავი დაუქნია, — მივხვდიო. მერმე უთხრა:

— დეიდა ნატოს ჩაი დავალევიწე. წადი, შენც დალიე სა-ნამ ცხელია.

— ჯერ არ მინდა.

— მერმე ვერ გააცხელებ, ნავთი აღარ არის.

— სულაც არ დავლევ, არ მინდა.

ანდრეაფარმა თვალები გაახილა და ლუკას მიაჩერდა. ლუკა მიხედა, რასაც ნიშნავდა ეს გამოხედვა, მაგრამ ადგილიდან არ დაძრულა.

— წადი, ისაუბმე... ბოგდანას დაუჯერე ხოლმე, ლუკა.

ლუკა უსიტყვოდ მოშორდა ხის მოაჯირს, აივანი გაიარა და შუშაბანდის კარი შეაღო. დეიდა ნატომ, ეტყობა, კარის ხმაური გაიგონა, ოთახიდან გამოხედა ლუკას შუშაბანდში და ჯანსაღი ხელით, რომელიც საბანზე ესვენა, ანიშნა, — მომიახლოვდიო.

ლუკა საწოლთან მივიდა, დაიჩოქა.

— როგორ ხარ, დეიდა ნატო?

დეიდა ნატომ ტუჩები შეარხია და სახეზე საწყალობელი ღიმილი გამოეხატა. მერმე ჯანსაღი ხელი ლუკას ხელს დააფარა და მოესიყვარულა.

— ჩაი დალიე? — ჰკითხა ლუკამ.

დეიდა ნატოს ორივე ლოყაზე ცრემლი დაუგორდა, ლუკამ საბნიდან ცხვირსახოცი აიღო და შეუშრალა.

უცებ მეორე ოთახის კარი ხმაურით გაიღო და პოლიკარპე გირკელიძე გამობრძანდა. კარი ისევ ჩაკეტა გასაღებით და ავადმყოფს მიესალმა:

— გამარჯობა, დეიდაჩემო! დღეს რაღაც უკეთესად გამოიყურები! — არც დაუხედავს დეიდა ნატოსთვის, ისე გაიარა ოთახი; არც ლუკას მისალმებია.

— ჩაის მეც დაველე. — უთხრა ლუკამ დეიდა ნატოს და წამოდგა.

ჩაიდანში წყალი, რა თქმა უნდა, უკვე საკმაოდ შეგრილებულიყო. ამიტომ მხოლოდ თავისი წილი ხმელა პური შეჭამა და ისევ აივანზე გამოვიდა.

— ლუკა, მოდი აქ! — დაუძახა ბოგდანამ, — ბერიშვილებთან რაღაცა ხდება...

ლუკამ მოაჯირთან მიირბინა და ეზოს გადახედა. პირველ სართულზე მართლაც რაღაც ხდებოდა, უამრავი ხალხი ირეოდა. მაგრამ ყველაზე მნიშვნელოვანი მაინც ის იყო, რომ ამ ხალხში ბატონი პოლიკარპეც ერია. ბერიშვილების კარი ღია იყო, ვიღაცეებს ოთახიდან ბარგი აივანზე გამოჰქონდა და რასაკვირველია, ამ მოძრაობას პოლიკარპე გირკელიძე სარდლობდა. თვითონ ლათიკო ბერიშვილი არსად ჩანდა

— ეტყობა, ლუკა, გასახლებენ. — თქვა ანდრეუყაფარმა.

— გვასახლებენ?! — გაოცდა ლუკა.

— კი, ეგ უკვე ცაშია გადაწყვეტილი.

— ვინ გადაწყვიტა?

— პოლიკარპე გირკელიძემ, შენმა საყვარელმა ნათესაე-  
მა. ვიცოდი, ასე მოხდებოდა... ვაი, რომ დავუძღლურდი და ჯანი  
ალარა მაქვს, თორემ მაგ შენს ნათესავს კუდით ქვას ვას-  
როლინებდი.

— მე არ დავუშვებ ასეთ უსამართლობას — აღშფოთდა  
ბოგდანა.

— შენ არავინ არაფერს დაგეკითხება, ჩემო ბოგდანა... ვი-  
ნა ხარ შენ, ბოგდანა ვაიდა, ჩემო ცოლო, ჩემო კეთილო მე-  
გობარო?! შენც ისეთივე უძლური ხარ, როგორც მე, როგორც  
ლუკა, როგორც დეიდა ნატო! ამ ბოროტებას ახლა კეთილი  
გულით ვერ შეაჩერებ, იგი გაგთელავს, გაგათახსირებს, მი-  
წასთან გაგასწორებს! ამ ბოროტებას ახლა მხოლოდ ძალა თუ  
უშველის, დიდი, დამთრგუნველი ძალა, რომელიც ჩვენ არ  
გაგვაჩნია.

— შენ მეუბნები მაგას, ანდრეუყაფარ?! შენ?! მაშ სიკეთე  
რისთვისაა გაჩენილი, თუ ბოროტებას წინ არ აღუდგება?!  
— ამჭერად სხვანაირად არის საქმე.

— ანა კვეყნად არ არსებობს სამართალი, კანონი?! კანო-  
ნი ხომ სიკეთის ერთგვარი გამოხატულებაა?!  
— ბოგდანა, ეგენი ახლა კანონის სახელით მოქმედებენ,  
უფრო ზუსტად, მოქმედებენ ვითომცდა კანონიერების ფარ-  
გლებში. დათიკო ბერიშვილმა ყველა საკითხი, დარწმუნებუ-  
ლი ვარ, უკვე შეათანხმა სადაც ჯერ არს. ამასთანავე მას ხელ-  
ზე აქვს ყველა საბუთი, რომელიც ბინების გაცვლის უფლებას  
ანიჭებს. შენ იცი, რას ნიშნავს, როცა ბოროტება კანონის სა-  
ხელით მოქმედებს?!  
ფუსფუსი და ორომტრიალი პირველ სართულზე არ შენე-  
ლებულა. ვილაც მამაკაცები ოთახიდან ეზიდებოდნენ ავეჯს,  
ქურტლეულს; ლეიბები და საბნები აივნის მოაჯირზე იყო უხ-  
ვად გადმოფენილი. ლუკა დაბნეული დასჩერებოდა პირველ  
სართულს, ღონიერ მამაკაცებს, ჯანლონის დაუზოგავად აი-  
განზე რომ მოათრევდნენ მძიმე კარადებს. აივნებზე სხვა მე-  
ზობლებიც გამოსულიყვნენ, ოღონდ ისინი არავითარ მონა-

წილებას არ იღებდნენ ამ ფუსფუსში. გულხელდაკრეფილინი მკაცრი მღუმარებით გამოხატავდნენ გულის წყრომასა, თუ აღშფოთებას, ხანდახან ლუკას გამოხედავდნენ ხოლმე და თავს სინანულით გააქნევდნენ: ეს რა ხდება, რა უსამართლობას შევესწარიითო. ერთი-ორჯერ ძია ლადომაც ამოხედა ლუკასებს მკერდზე მუშტი დაიბაგუნა. იგი იზასთან ერთად ახლად შეფოთლილ ცაცხვის ქვეშ იდგა.

ბატონმა პოლიკარპემ ოთხი კაცი შეარჩია და წინ გამოუძღვა. ხუთივენი სწრაფი ნაბიჯით მოდიოდნენ პირველი სარსართულის აივანზე.

— ახლა ეგენი აქ ამოვლენ და დეიდაშენს წაიყვანენ... თავის საწოლიანად, — თქვა ანდუყაფარმა.

ლუკა უცებ მოსწყდა მოაჯირს და შუშაბანდში შევარდა, კარი შიგნიდან ჩაკეტა. იგი ფანჯრიდან ხედავდა კიბისთავს და რაღაც გაურკვეველისა და შემაძრწუნებელი ამბის მოლოდინში გული გასკდომამდე უცემდა. არაფერზე არ ფიქრობდა. ერთადერთი მიზნით იყო აღჭურვილი, არავისთვის არ გაეღო კარი, თუნდაც ეს სიკვდილის ფასად დასჯდომოდა. შიშით გააპარა თვალი დეიდა ნატოსკენ. დეიდა ნატოს თავის საწოლში მშვიდად ეძინა.

მალე კიბიდან ამოიზარდა ბატონი პოლიკარპეს მელოტი თავი. კბე ამოათავა და საქმიანი ნაბიჯით გამოეშურა შუშაბანდისკენ. უკან ოთხი ახმახი მოსდევდა.

ბატონი პოლიკარპე შუშაბანდს მოადგა, კარის სახელურს გადასწია და კარს მოაწვა. ფრიად გაოცდა, კარი რომ არ დაემორჩილა. კიდევ ერთხელ მოაწვა. და გაოცებულმა ფანჯარაში შემოიხედა. შუშაბანდში ლუკას თვალებს წააწყდა; მაშინ კი აღშფოთდა ბატონი პოლიკარპე, — რას ჰგავსო ეს! მერმე თავი დაიცხრო, აივანს მშვიდად გადახედა და თითქოს ვიღაცას მიმართავდა, ისე თქვა:

— უყურე ამ ცივანს. — გაიცინა ნაძალადევად, — შიგნიდან არ ჩაუტეცია კარი? გააღე, ბიჭო, ეს ოხერი კარის

— არ გავაღებ!

— რას ჰქვია, არ გააღებ?

— იმას ჰქვია, რომ არ გავაღებ!

ბატონმა პოლიკარპემ ისევ გაიცინა და კარის სახელურს დაეჭაჭგურა.



— როდემდე იქნები მანდ ჩაკეტილი, იმასაც ვნახავ!

ლუკა შუშაბანდის ფანჯრიდან ხელავე ბატონი პოლიკარპეს სიმწრისაგან აღეწილ სახეს. დანარჩენები მშვიდად იდგნენ მის ზურგს უკან და მოთმინებით ელოდნენ მოვლენების შემდგომ განვითარებას. მერმე აივნის იმ მონაკვეთში, რომელსაც ლუკას თვალი წვდებოდა, ნელა შემოსრიალდა ანდრეუყაფარის სავარძელი, იქვე გამოჩნდა ბოგდანაც, ორივე ხელით სავარძლის საზურგეს დაყრდნობილი.

— ცოტა ნაადრევად ხომ არ მოგივიდათ, ბატონო პოლიკარპე, ბინების გაცვლა? — ჰკითხა ანდრეუყაფარმა.

— მაგას არავინ არ გეკითხება შენ, ჩემო ანდრეუყაფარი — უპასუხა ბატონმა პოლიკარპემ, მერმე ვითომ თავისთვის ჩაილაპარაკა, — მაინც რა უზნეობაა ეს სხვის საქმეში ჩარევა!

— მე მგონი, თქვენს მეტი აქ არავინ ერევა სხვის საქმეში ისე კი, რაც შეეხება უზნეობას, თქვენზე უზნეო და უხამსი კაცი ჯერ არ შემხვედრია.

ბატონ პოლიკარპეს არაერთარი ყურადღება არ მიუქცევია ანდრეუყაფარის ნათქვამისათვის, თითქოს არც გაუგონია. ცოტა ხნის შემდეგ მოულოდნელად ადულდა, კარს დაეჯაჯგურა და ლუკას უღრიალა:

— კარი გააღე, შე უპატრონო, თორემ ახლავე შემოვამტვრევი!

— არ გავადებ! — მშვიდად უპასუხა ლუკამ. იგი მართლაც დამშვიდდა ცოტათი, ანდრეუყაფარი და ბოგდანა რომ დაინახა.

— მილიციას გამოვუძახოთ! — თქვა ბოგდანამ.

— მილიცია კი არა, პოლიცია მომთხოვე ახლა აგერ მაქვს ქალბატონ ნატოს მიერ ხელმოწერილი საბუთი — შეუღრინა ბატონმა პოლიკარპემ ბოგდანას და ისევ ლუკას მიუბრუნდა. — მე შენ გეუბნები, ახლავე გამიღე კარი!

ლუკამ, რა თქმა უნდა, კარი არ გაუღო. მაშინ პოლიკარპე გირკელიძემ ანიშნა იქვე მოწმეებივით მდგარ მამაკაცებს, — მომეშველეთო. ისინიც მიეშველნენ და ახლა უკვე ხუთივე ერთად დაეჯაჯგურა კარს. მოაწვნენ მთელი ძალით, კარი შუშაბანდში შემოიზნიქა. ლუკა იქაურობას გაეცალა, რადგან ხელავე დაედა, რომ ხუთი მამაკაცის ძალა. დიდად აღემატებოდა კარის მდგომარეობას.

კარი ხმაურით შემოანგრის და ხუთივენი კისრისტეხით შემოცვივდნენ შუშაბანდში.

მერმე ხუთივე ერთად დეიდა ნატოს საწოლს მიადგნენ.

— ფრთხილად! ახლა კი ფრთხილად! — თქვა ბატონმა პოლიკარპემ.

მათ დიდი სიფრთხილით გამოაჩოჩეს საწოლი, მერმე ასევე სიფრთხილით ასწიეს მაღლა. ლუკას უცებ გაახსენდა, როგორ გამოასვენეს ამ ოთახიდან დეიდა ნუცა და ერთი წუთით თვალთ დაუბნელდა. გონს მოსულმა საწოლის ფეხს ხელი ჩაავლო და იყვირა, — არ გაგატანთო, — მაგრამ ვერაფერს გახდა.

დეიდა ნატოც გაასვენეს შუშაბანდიდან, ოღონდ დეიდა ნუცასავით კუბოთი კი არა, თავისი რკინის საწოლით. ლუკა უკან გაჰყვა. კიბისთავთან მისულებმა საწოლი უცებ დაუშვეს დაბლა, იატაკზე დადგეს. ბატონი პოლიკარპე აიღეწა, აწრიალდა, მოულოდნელი მოუთმენლობა და შიში დაეუფლა, გეგონებოდა გაქცევა უნდოდა და ვერ ახერხებდა. ლუკას ისეთი შთაბეჭდილება დარჩა, თითქოს ვიღაც ამოდიოდა კიბეზე, ვიღაც შიშისმგვრელი, თუ თავზარდამცემი.

სიჩუმე ჩამოვარდა და ლუკამ გაიგონა მძიმე ნაბიჯების ხმა.

მალე აივანზე შემოჩნდა ხელჯოხიანი მაღალი მამაკაცი, მან ოფიცრის ფორმა ეცვა და მეორე ხელში პატარა ჩემოდანი ეჭირა.

— გამაგებინეთ რა ხდება?! სად მიგყავს ეს ქალი?! — იკითხა ოფიცერმა.

ეს იყო გოგი ჯორჯაძე — ლუკას მამა.

ლუკას ხმა არ გაუღია, გონება დაჰკარგა და იქვე ჩაიკეცა.

## თავი მეთექვსმეტი

ლუკა ორიოდ წუთში გონს მოიყვანეს, მამას პატარა ბავშვივით ატატებული დაჰყავდა აივანზე.

მღელვარება და დაძაბულობა ჩაინავლა, ეზო დაშოშმინდა. მეზობლები, რომლებიც ფეხდაფეხ ამოჰყვნენ გოგი ჯორჯაძეს მეორე სართულის აივანზე, აღშფოთებასა და გულისწყრომას

ველარ იოკებდნენ, ფრიად კმაყოფილნი გაბრუნდნენ უკან. იმ ალიაქოთში ბატონი პოლიკარპე გირკელიძე უცებ აორთქლდა, სადღაც გაძვრა თვალსა და ხელს შუა, მის ასავალ-დასავალს მერმეც ველარავინ მიაკვლია.

დღედა ნატო თავის საწოლიანად ისევ შეაბრუნეს საკუთარ ოთახში. მეორე ოთახი, საიდანაც ლუკა ამ რამდენიმე თვის წინათ გამოასახლა პოლიკარპე გირკელიძემ, დიდი წვალეების შემდეგ გააღეს. მაგიდაზე, გარდა ერთი მთლიანი ძეხვისა და პურისა, გოგი ჯორჯაძის მიერ ჰოსპიტლიდან გამოგზავნილი ოთხი წერილი აღმოჩნდა. ფოსტალიონი ამ წერილებს პირადად პოლიკარპე გირკელიძეს აბარებდა. თურმე სამაგიეროდ ბატონი პოლიკარპე ყოველი წერილის მიღებისას ხუთი მანეთით ასაჩუქრებდა ფოსტალიონს. ფოსტალიონს ეს ამბავი არც დაუმალავს, გულწრფელად თქვა ყველაფერი, რადგან დარწმუნებული იყო, რომ წერილს დანიშნულებისამებრ აძლევდა ადრესატს, ოჯახის ერთ-ერთ წევრს.

ბატონმა პოლიკარპემ, რაღა თქმა უნდა, იცოდა, გოგი ჯორჯაძე რამდენიმე დღის შემდეგ თბილისში რომ გამოცხადდებოდა. ამიტომაც ცდილობდა, დღედა ნატო, რაც შეიძლება, მალე გადაეყვანა. მაგრამ ვარაუდმა მაინც არ გაუმართლა, გოგი ჯორჯაძე აჩქარდა და ნავარაუდევზე ადრე ჩამოვიდა. იგი აჩქარდა, რადგან თავის ოთხ გამოგზავნილ წერილზე ერთხელაც ვერ მიიღო პასუხი.

დღედა ნატო მთელი დღე ტიროდა და იცინოდა, მთელი დღე ცდილობდა რაღაც ეთქვა თავისი სიძისათვის. წვალობდა და იტანჯებოდა, თქმას მაინც ვერ ახერხებდა. ამას კი აგებინებდა, ჩემთან ახლოს იყავი, ნუ მომშორდებიო. გოგი ჯორჯაძე სასთუმალთან ეჯდა და ამშვიდებდა. პირობა მისცა, რომ მთელ ქვეყანას გადააბრუნებდა და მაინც მონახავდა თავის მეუღლეს, ლუკას დედას. გოგი ჯორჯაძე შეძრწუნებული იყო მეუღლის ასე უაზროდ დაკარგვის გამო, — რატომ, რატომ წამოვიდა, მე ხომ შემოვუთვალე თბილისიდან ფეხი არ მოიცივლოო?!

გოგი ჯორჯაძემ ფული მისცა ბოგდანას. ბოგდანა და ლუკა ერთად წავიდნენ ბაზარში სანოვავის საყიდლად. ლუკამ თვითონვე მოითხოვა, — ბაზარში მეც წავალო. უცნაური გრძნობა დაეუფლა, შინ, მამასთან ახლო ყოფნა უქირდა, ალბათ ნამე-

ტანი სიხარულისა და მღელვარებისაგან, ამიტომ თუ ამჯობინა, ცოტა ხნით გასცლოდა აქაურობას, ბაზრის ღრვიანცელსა და აურზაურში იქნებ ოდნავ მაინც მოებრუნებინა სული.

მაგიდა მეორე ოთახიდან გამოიტანეს და დეიდა ნატოს საწოლთან დადგეს. ყველამ ერთად ისადილა: მამამ, ლუკამ, დეიდა ნატომ, ანდუყაფარმა და ბოგდანამ. კაცმა რომ თქვას, დეიდა ნატოს არაფერი არ უჭამია, ბოგდანამ შეახვერებინა სამიოდე კოვზი უკრაინული ბორში, რომელიც თვითონ დაამზადა.

მერმე ანდუყაფარმა და გოგი ჯორჯაძემ დიდხანს ისაუბრეს, ლუკამ ამ საუბრიდან გაიგო, რომ ფრონტზე მდგომარეობა ოდნავ შეიცვალა, თუმცა არც იმდენად, კაცი დამშვიდებულიყო და გული საგულეში ჰქონოდა.

პოლიკარპე გირკელიძის ვინაობა და პიროვნება მაინც ვერ დაადგინეს. დეიდა ნატო ვერაფერს ამბობდა, ხოლო ლუკას მამას შორეული წარმოდგენაც კი არ ჰქონდა, ვინ იყო, სადაური ან რა ნათესაობა აკავშირებდა ამ ოჯახთან. როცა დეიდა ნატოს ჰკითხეს, — მოაწერე თუ არა რაიმე ქალაქზე ხელიო? დეიდა ნატომ ანიშნა, — კი, მოვაწერეო. მაგრამ მან არ იცოდა, რაზე მოაწერინა ხელი ბატონმა პოლიკარპე გირკელიძემ.

ლუკას მთელი დღის მანძილზე ხმა არ ამოუღია. ჩუმად შესცქეროდა მამამისს ფარული სიამაყის გრძნობით. იგი უკვე დარწმუნებული იყო, დღეიდან ყველაფერი კარგად აეწყობოდა. დედაც მოინახებოდა და დაბრუნდებოდა ისევე, როგორც მამა დაბრუნდა. მაგრამ მერმე შეშფოთდა, როცა გაიგო, მამამისი ორ თვეში უკანვე უნდა წასულიყო ფრონტზე. ამ ორი თვის განმავლობაში როგორმე მოიშუშებდა ნატყვიარებს ბექსა და მარჯვენა ფეხზე.

მშვიდი საუბარი გოგი ჯორჯაძესა და ანდუყაფარს შორის დიდხანს არ გაგრძელებულა, საღამოს დეიდა ნატოს ხრიალი დააწყებინა და სულ მალე, სულ რაღაც ორმოცსა თუ ორმოცდაათ წუთში გათავდა. ექიმის მოყვანაც კი ვერ მოასწრეს. საწყალი დეიდა ნატო სიძის ჩამოსვლის დღესვე გარდაიცვალა.

დეიდა ნატო დეიდა ნუცას გვერდით დაასაფლავეს კუკიაზე. პანაშვილებზე მთელი კლასი დადიოდა. ერთხელ მიტოვ მოვიდა და ლუკას პატიება სთხოვა. ლუკამ უთხრა, — შენ რა

შუაშა ხარ, მე და მაიკო ირაკლი დევდარიანმა გვევალო. მ-  
ტომ ამაზე არაფერი უპასუხა, სინანულით ხელი ჩაიქნია და  
გაშორდა.

მაიკო ყოველ საღამოს მოდიოდა, ოღონდ მოდიოდა ძალო-  
ან ცოტა ხნით. თითქოს სადღაც აგვიანდებოდა. ლუკა უკვე  
გრანობდა, მაიკო რომ გადასხვადებოდა. თუმცა ცდილობდა,  
გარეგნულად ძველი იერი შეენარჩუნებინა. უკვე ისე აღარ  
ხვდებოდნენ, როგორც წინათ, თვითონ ლუკაც რაღაცნაირად  
მოკრწალბული იყო მაიკოს მიმართ. შეხვედრისას ძველებუ-  
რად ვეღარ გამოხატავდა სიხარულს, რაღაცის რცხვენოდა,  
რაღაცის ერიდებოდა.

დღედა ნატოს დაკრძალვიდან მესამე დღეს დათიკო ბერა-  
შვილი აწვიდა გოგი ჯორჯაძესთან.

— გამარჯობა, გოგი — მისალმა თავაზიანად.

— ვაგინარჯოს!

— კარგია, უვნებელი რომ დაბრუნდი!

— არც ისე უვნებელი, შენ რომ გგონია.

— რას ამბობ, ცოტას ნიშნავს, ცოცხალი ხარ კაცი!

— ციი რას გეტყვი, დათიკო, მე მიკიბულ-მოკიბული ლა-  
პარაკი არ მიყვარს და, თუ ღმერთი გწამს, პირდაპირ მითხარე,  
რა გინდა?

— შენი სიკეთე და კარგად ყოფნა!

— მაინც?

— ჩვენ უნდა გავუგოთ ერთმანეთს.

— მითხარი, რა გინდა და თუ გასაგები იქნება, გაგიგებ

კიდევ!

— სხვანაირად არ გამოვა.

— რა არ გამოვა სხვანაირად?

— ჩვენი ბინები უკვე გაცვლილია, მხოლოდ ფორმალური  
მხარეა შესასრულებელი.

— რომელია ეგ ფორმალური მხარე?

— შენ უნდა გადახვიდე ჩემს ბინაში, მე კი აქ გადმოვალ.

— ვითომ რაღაო?

— ეგრეა გადაწყვეტილი.

— ვინ გადაწყვიტა?

— ამ ბინის ძირითადი დამკვირვებელი დეიდა ნატოა და  
შისი თანხმობა რომ იცოდე, ჯიბეში მიღევს.

— აბა, მაჩვენე.

დათიკო ბერიშვილმა პიჯაკის უბის ჯიბიდან ოთხად დაკეცილი ქალაღდი ამოიღო და ლუკას მამას გაუწოდა. ლუკას მამას ქალაღდი არც გაუხსნია, დახია დაკმუქნა და გვერდზე ისროლა.

— ახლავე მომწყდი თავიდან! — უთხრა გოგი ჯორჯაძემ, — ახლა შენი თაღლითობისთვის საღა მცხელა, დრო არა მაქვს.

— მაშ, ეგრე ხომ?!

— იქნებ მემუქრები, ბიჭო, კიღეც?!

— ვითომ რომ დაგემუქრო, რა იქნება?

— შენი ნებაა, დამემუქრე! ისე კი, უნდა მოგახსენო, შენი კი არა, ტანკის არ შემშინებია.

— მე სხვა ვარ, ჩემო გოგის დაიმახსოვრე სხვა ვარ-მეთქი!

— ვინც გინდა ის იყავი, ახლა კი თავიდან მომწყდი!

— იფ, რა იოღად მიშორებ თავიდან?!

— რა გინდა. ბიჭო, რას გაღამეკიღე?!

— დაფიქრდი, ჩემო გოგი, კარგად დაფიქრდი ორი დღის გაღას გაძღევი!

— მე დასაფიქრებელი არაფერი მაქვს. თუ ეგ ოხერი თავი რამედ გიღირს, ახლავე გაშორდი და ნულარასოდეს მოხვალ ჩემთან.

დათიკო ბერიშვილს აღარაფერი უთქვამს, გესღიანად გაიღიმა, იატაკიდან დაკმუქვნული ქალაღდი აიღო და მაშინვე დატოვა ოთახი.

არც გოგი ჯორჯაძეს ამოუღია ხმა, დაფიქრებული იჯდა ერთხანს. ლუკა ამ დროს შუშაბანდში იყო და გაკვეთიღებს ამზადებდა. მან ყვეღაფერი ნახა და მოსმინა. რატომღაც ეგონა, მამამისი გამოვიღოდა და რაღაცას ეტყოღა დათიკო ბერიშვილზე, მაგრამ მოტყუეღა, მამა არა თუ გამოვიღა, შუშაბანდისკენ არც გამოუხეღავს, როგორც იჯღა, ორივე ხელით მაგიღას დაყრღნობიღი, ისე დარჩა.

მამა მარტო დღეს კი არა, ჩამოსვღის დღიდანვე დაფიქრებული და შეწუხებული ჩანღა. ლუკა ამას გრძნობღა, მით უმეტეს, როცა ეს დაფიქრებღა და წუხიღი, ტკივიღი თუ დარღდი წამდღაწამ შესამჩნევი ხდებოღა. ლუკა იმასაც გრძნობღა, რომ მათ შორის მოუღლოდნეღად აღიმაართა გაღაუღახავი, თუ დაუძღღევეღი ზღუღღე. შეიძღღებღა ითქვას, ლუკას პირვეღად

მიეცა მამასთან ასე ახლოს ყოფნის შესაძლებლობა და მაინც ვერ მიუახლოვდა, როგორც მას ფიქრებში წარმოედგინა. იქნებ ყველაფერი ეს იმიტომ ხდებოდა, რომ მამამისმა ერთგვარად დაჰკარგა ძველი სილაღე და სიმხიარულე. და თუ დაჰკარგა, რა მიზეზის გამო? მიზეზი ბევრი იყო, მაგრამ ყველაზე მეტად ლუკას ერთი მათგანი უკარგავდა მოსვენებას: ვაითუ, მამამ იცოდა დედის ამბავი და არ ამხელდა...

— ლუკა, მოდი აქი — უცებ დაუძახა მამამ.

ლუკა სწრაფად წამოდგა და ოთახში შევიდა.

— როგორა ხარ, ლუკა?

— კარგად.

— შენ ხომ არ გეშინია დათიკო ბერიშვილისა?

— არა.

— შენ უკვე დიდი ბიჭი ხარ, ლუკა... შენ არაფრის აღარ უნდა გეშინოდეს! ამ ორ თვეში მე აღბათ ისევ დავბრუნდები ფრონტზე. ორი თვე დიდი დროა, ყველაფერს მოვაგვარებ და მოვაწესრიგებ. შეიძლება, ეს ბინა დავეკეტო და თელავში წავიყვანო ბიძაჩემთან. შეიძლება სხვანაირადაც მოვიქცე. არ ვიცი, ჯერ არ გადამიწყვეტია. ასე თუ ისე, რაღაცას მოვახერხებ. შენ ნურაფრის შეგეშინდება... მით უმეტეს დათიკო ბერიშვილის, მაგ ლაჩარი თაღლითისა.

დათიკო ბერიშვილს დათქმული ვადისათვის არ გადაუცილებია, ორი დღის შემდეგ ისევ მოვიდა გოგი ჯორჯაძესთან.

— გამარჯობა, გოგი!

— გავიმარჯოს.

— როგორა ხარ?

— კარგად, თავად როგორ გიკითხო?

— მეც კარგადა ვარ, არა მიშავს რა.

— მადლობა ღმერთს!

— თუ ეს საქმე არ გამოვა...

— აკი გითხარი, არ გამოვა-მეთქი — შეაწყვეტინა გოგი ჯორჯაძემ.

— ისე კი შენთვის აჯობებდა, გამოსულიყო.

— რატომ აჯობებდა?

— როგორც გავიგე, ორ თვეში უკანვე ბრუნდები, ფრონტზე.

— მერე რა, რომ ვბრუნდები?!

— ამ ბიჭის მოვლა-მეურვეობას მე ვიკისრებდი... ვის უტოვებ ამ პატარა ბავშვს?

— ეგ შენ არ გეკითხება.

— შენ ხომ იცი, რომ მე სიტყვის პატრონი კაცი ვარ.

— მე არაფერი არ ვიცი.

— გოგი, რატომ მალიზიანებ?

— მე გალიზიანებ?!

— კარგი, მაშინ იმ გაიძვერა გირკელიძე მონახე და ჩემი ფული დამიბრუნე.

— აბა, გირკელიძე?

— თქვენი ნათესავი, ბატონო!

— ეგეთი ნათესავი მე არა მყავს.

— ჩემთვის, ხომ იცი, სულერთია, ეგ ნათესავი შენია თუ შენი ცოლისა.

— არ ვიცი.

— არც მე ვიცი... დამიბრუნეთ ჩემი ფული.

— მაინც რამდენი გემართებს?

— ასი ათასი მანეთი.

— ამდენი ფული როგორ ანდე, შე კაი კაცო, იმ გირკელიძესა, თუკი იცოდი, გაიძვერა იყო.

— გეუბნები, მონახე ის კაცი და ჩემი ფული დამიბრუნეთ.

— ერთხელ კიდევ გაფრთხილებ, დათიკო, ნუ მემუქრები!

— მე ჩემი ვითხარი, გოგი... ახლა შენ იცი!..

— კარგი, ჰო, დამანებე თავი!

— გეტყობა, ისე არ მიცნობ, როგორც საჭიროა.

— გაგიცნობ, დრო კიდევ მაქვს დარჩენილი.

— არ ინანო-მეთქი, იმას გეუბნები.

— რაღა უნდა ვინანო, — ლუკას მამა წამოდგა და ოთახში კოკლობით გაიარ-გამოიარა. — ამ ქალის სიკვდილი ხომ გაბატონე?! მეტი რაღა გინდა, შე ოხერო?! გამშორდი, რაღა!

— ეგ ქალი შენს ჩამოსვლამდე ცოცხალი იყო... მერმე რა მოხდა, მე რა ვიცი! — დათიკო ბერიშვილი სწრაფად გამოტრიალდა და წავიდა.

ლუკას დეიდა ნატო გაახსენდა. გაახსენდა, რა საოცრად ჰგავდა კუბოში მწოლიარე თავის ადრეგარდაცვლილ დას — დეიდა ნუცას, ლუკას გულის სიღრმეში რაღაც შესჯდომოდა და დაუნდობლად ღრღნიდა, აწვალებდა. მერმე მიხვდა, რომ



დეიდამისის ცარიელი საწოლი ტანჯავდა, რკინის საწოლი, რომელშიც უკვე აღარავინ იწვა, რომელშიც აღარავინ ჩაწვებოდა...

— ლუკა! — დაუძახა მამამ.

ლუკა შუშაბანდიდან ოთახში შევიდა.

— როგორა ხარ, ლუკა?! — ჰკითხა მამამ და გაუღიმა.

— კარგად!

— შენ ხომ არაფრის გეშინია, შვილო?

— რისი უნდა მეშინოდეს.

— ჰო, შვილო, შენ უკვე დიდი ბიჭი ხარ!

ეტყობა, არც ისე დიდი ბიჭი ვარ, რადგან ყოველთვის მარწმუნებენ, დიდი ხარო, — დაეჭვდა ლუკა. მერე გაიფიქრა, — მაინც რის უნდა მეშინოდესო? მართლაც, რისი უნდა მეშინებოდა ლუკას? იგი გარშემო ვერ ამჩნევდა ისეთ რამეს, რისიც შეიძლებოდა შეშინებოდა, მით უმეტეს, როცა მამა გვერდით ედგა. არცა გრძნობდა, არც გული ეუბნებოდა, თუ საშიშროება მის შორიახლო ბოგინობდა.

მაგრამ ერთ ღამეს შუშაბანდის კარს უცნობი მამაკაცი მოადგა და გოგი ჯორჯაძე იკითხა. მე ვარო, — უთხრა ლუკას მამამ. თუ შეიძლება, ერთი წუთით ეზოში ჩამობრძანდითო, თავაზიანად მიმართა უცნობმა მამაკაცმა. რადაო? — გაოცდა ლუკას მამა. თქვენი ძველი მეგობრები გთხოვენო. — უცნობ მამაკაცს ამის მეტი არაფერი უთქვამს, წავიდა და ღამის სიბნელეში ჩაინთქა.

ლუკამ დაინახა, როგორ შეფიქრიანდა მამამისი. მერმე დაფიქრებულ სახეზე ეჭვმა გამოჟონა. ლუკას გული შეუქანდა, საკუთარი გულის ცემამ თუ ბაგა-ბუგმა ერთი წამით თითქმის დააყრუა კიდევ.

გოგი ჯორჯაძემ სწრაფად ჩაიცვა კიტელი და წელზე ბრტყელი ქამარი შემოიჭირა, თითქოს საბრძოლო განგაში გამოცხადებულყოფოს. მერმე მეორე ოთახიდან რევოლვერი გამოიტანა. შეამოწმა და ჯიბეში ჩაიდო. ხელჯონზე დაყრდნობილი შუშაბანდში გამოვიდა. მამა ძალზე აღელვებული ეჩვენა ლუკას.

— ნუ ჩახვალ! — შეეხვეწა ლუკა.

— რატომ? — ლუკასთვის მოულოდნელად იკითხა მამამ.

— ნუ ჩახვალ, რა.. მეშინია..

— ნუ გეშინია, არაფერი არ მოხდება!

შუშაბანდის კარი ღია იყო. გარეთ ბნელოდა, ისე ბნელოდა, თითს თვალთან ვერ მიიტანდი. ლუკას მამამ გასვლა დააპირა, სიბნელეს გახედა და რატომღაც შეჩერდა.

— შენ არ გამოხვიდე, აქ დარჩი! გესმის?

— ბატონო გოგი, ქვევით გელოდებიან. — კიბის მხროდან მოისმა უცნობის ხმა.

— ვინ მელოდება? — იკითხა გოგი ჭორჭაძემ.

— არ ვიცი, ალბათ თქვენი მეგობრები. მე მხოლოდ თქვენს დასაძახებლად გამომგზავნეს.

— უთხარი, ახლავე ჩამოვალ.

ლუკას მამა გარეთ გასვლას აყოვნებდა. პაპიროსს ცეცხლი მოუკიდა და გააბოლა. ლუკას მიხედა, რაღაც უნდოდა ეთქვა, მაგრამ ვერ მოასწრო. ამ დროს შუშაბანდის ღია კარს ბოგდანა მოადგა.

— არ ჩახვიდეთ, გოგი... — თქვა ბოგდანამ. — მე წელან გამოვიარე ეზო. — სამტრედესთან ხუთი კაცია — დათიკო ბერიშვილი, რუბენა, დანარჩენი სამი ვერ ვიციანი. მე მგონი, ისინი უნდა იყვნენ, დეიდა ნატოს წასაყვანად რომ მოვიდნენ. ნუ ჩახვალთ, ძალიან ბნელა და თქვენ ვერაფერს დაინახავთ...

— გოგი, დაუჭერე ბოგდანას. ახლა ჩასვლის დრო არ არის... — ეს ანდუყაფარის ხმაა, ეს სიბნელიდან ესმის ლუკას.

— თქვენ ლუკას მიხედეთ, მე ახლავე ამოვალ! — გოგი ჭორჭაძე სიბნელეში გავიდა. გასვლამდე ანთებული პაპიროსი დააგლო იატაკზე და ჩექმით მოსრისა.

ბოგდანა უკან გაჰყვა, ლუკაც.

ბოგდანამ ლუკა აივანზე გაიყვანა, ორივენი მოაჯირს გადაეყუდნენ. ანდუყაფარი უკვე მოაჯირთან იყო თავის საეარძლიანად.

ეზოში ბნელოდა, არაფერი არ ჩანდა. არა მარტო ეზო, მთელი ქალაქი იყო გახვეული ღამის წყვედიადში.

— გოგი უკვე პირველი სართულის კიბეზეა. — თქვა ბოგდანამ.

— არ უნდა ჩასულიყო. — გაეპასუხა ანდუყაფარი.

— ჩვენი ბრალია, არ უნდა გაგვეშვა! — ეს ისევ ბოგდანაა. სამტრედესთან სამჭერ იფეთქა ცეცხლმა და გამაყრუებელმა ჭექამ შესძრა იქაურობა. შეარყია ღამის მყუდროება. ახლა

კიბის მხრიდანაც გაისმა სროლის ხმა. ეს შემაზრზენი ჰქეპა რამდენჯერმე განმეორდა აქედანაც და იქედანაც.

— მე მგონი, გოგი დაქრეს! — წამოიძახა ბოგდანამ და მოაჯირს მოწყდა.

— მამა! — წამოიყვირა ლუკამ და ისიც მოწყდა მოაჯირს.

ბოგდანა და ლუკა სირბილით დაეშვნენ კიბეზე... ჩაათავეს მეორე სართული... ლუკა ბრმად მიდიოდა, ირგვლივ ვერაფერს ხედავდა.

— ხომ არ დაიჭერით, გოგი?! — გაიგონა ლუკამ ბოგდანას შეძახილი.

— კი, მომარტყეს მაგ ოხრებმა.

ლუკამ სიბნელეში მამა მონახა. ფეხებზე შემოექლო და ატირდა:

— მამა!.. მამა!..

— ნუ გეშინია, შვილო, ცოტათი გამკაწრეს... ეგ არაფერია.

— იცით, ვინ გესროლათ? — ჰკითხა ბოგდანამ.

— ვინა?

— რუბენამ.

— შეხედე მაგ ჟუჯასა?! სროლა სცოდნია...

### თავი მეჩვიდმეტი

ბოგდანამ მხარი შეუდგა ლუკას მამას, დაქრილის კიბეზე აყვანა სცადა. წუთიც არ იქნებოდა გასული, ეზოში ყვირილით შემოცვივდნენ პატრულები. პატრულებმა კიბის ფარნები მოაშუქეს და კიბესთან მოიჭრნენ. ორნი იყვნენ, ორივეს მოკლე კარაბინები ეჭირათ ხელში. ფარნების შუქზე კარგად შეათვალიერეს ლუკას მამაც და ბოგდანაც.

— რა მოხდა, ამხანაგო მაიორო? — ჰკითხა ერთ-ერთმა პატრულმა გოგი ჯორჯაძეს.

— მესროლეს. — მოკლედ მიუგო მან.

— დაქრილი ხართ?

— კი, მომარტყეს მხარში... მსუბუქად უნდა ვიყო დაქრილი.

— ვინ იყვნენ?

— არ ვიცი.

— ბიჭები დაედევნენ... ალბათ დაიჭერენ.

თითქოს ამის დასტურად შორიდან ისევ მოისმა სროლის ხმა. ერთხელ... ორჯერ... სამჯერ...

— ჰოსპიტალში ხომ არ წაგიყვანოთ? მანქანა გყავს, ამ-  
ხანაგო მაიორო.

— ეგრე აჯობებს.

— მამა — წამოიყვირა ლუკამ.

— ჭრილობა მაინც ჭრილობაა, შეილო, უნდა შევიხვიო...  
ბოგდანა, ლუკას მოუარე... მე ალბათ ხვალ ან ზეგ დავბრუნ-  
დები.

პატრულები ორივე მხრიდან ამოუდგნენ გოგი ჯორჯაძეს და ფრთხილად წაიყვანეს. ბოგდანამ მხარზე მოხვია ხელი ლუკას, მოაბრუნა. მერმე ნელი ნაბიჯით აპყვნენ კიბეს. კიბის-თავთან მათ ანდუყაფარი ელოდებოდათ.

ყველანი ანდუყაფართან შევიდნენ, დარაბები დახურეს და ჭანთეს ლამპა. ლუკა ტახტზე მიიკუჭა. მუშტები ერთმანეთს მიატყუბა და ცერათითებს ზედა კბილები ტკივილამდე დააჭი-რა. ლუკას გული ეუბნებოდა, მამა იმაზე უფრო მძიმედ იყო დაკრული, ვიდრე თვითონ იმჩნევდა, თანაც დაინახა, როცა პა-ტრულებმა ფარნები მიანათეს, სახეზე წურწურით როგორ ჩა-მოსდიოდა ოფლი.

— რუბენამ ესროლა. — თქვა ბოგდანამ მთრთოლვარე ხმით. ძალზე აღელვებული ჩანდა, გაფითრებული დადიოდა ოთახში და თითებს იმტვრევდა. — ჩემი თვალითა ვნახე.

— ყველაფერი დღესავით ნათელია.

— დავიჯერო, ასეთი სულელია დათიკო ბერიშვილი? ხვალ ხომ ყველაფერი გაირკვევა?

— არც ისეთი, შენ რომ გგონია... არც ხვალ და არც ზეგ... — ანდუყაფარს, ეტყობა; უჭირდა ლაპარაკი, სიტყვებს ნაწყვეტ-ნაწყვეტ ისროდა.

— რა დაემართათ? რა უნდა ამ ხალხს?

— ჩვენ ყველას რაღაცა გვჭირს... და ვერ გავგიგია. — თქვა ანდუყაფარმა. ლუკა ცალი ყურით უსმენდა ანდუყაფა-რისა და ბოგდანას საუბარს. მას ისევ თვალწინ ედგა მამის დაძაბული სახე, რომელსაც სიმწრის ოფლი ასკდებოდა. არა სჯეროდა და არც უნდოდა დაეჯერებინა, რომ ჯუჯა რუბენამ

ასეთი ტკივილი მიაყენა და ასეთი სიმწრის ოფლი მოჰგვარა მამამისს. მართლაც, რისთვის? ლუკას მამას ხომ არაფერი დაუშავებია რუბენასათვის?

ლუკამ ანდუყაფარს გადახედა და უნებურად წამოდგა ფეხზე. ანდუყაფარი უღონოდ ესვენა თავის სავარძელში. თითქოს თვალეზზე ლიბრი გადაჰკვროდა ანდა დასძინებოდა და თვალები ღიად დარჩენოდა. ორივე ხელი სავარძლიდან გადმოვარდნოდა და უმწეოდ ქანაობდა ჰაერში. თანაც სუნთქვა გახშირებოდა, გეგონებოდა, სულს დაფავდა.

ლუკა ბოგდანასთან მივიდა და ჩურჩულით ჰკითხა:

— დაიძინა?

— დაიძინა. — ჩურჩულითვე უპასუხა ბოგდანამ. — ცოტა ხანს ასე ეძინოს, მერმე გადავიყვან საწოლში.

— ვილაცამ კარზე დააკაკუნა.

— ვინ არის?

— სამხედრო პატრული... მაიორის ამბავი მოგიტანეთ.

ბოგდანამ დარაბა გახსნა და კარი გამოაღო. ოთახში პირტიტველა ჯარისკაცი შემოვიდა და დამხედურთ ზრდილობიანად მიესალმა. მერმე მოახსენა, — ყველაფერი რიგზეა. მაიორი ამა და ამ ჰოსპიტალში მივიყვანეთ და თავს კარგად გრძნობსო.

— შენს ყოფილ სკოლაში მიუყვანიათ. — თქვა ანდუყაფარმა და თავის სავარძელში შეიშმუშნა.

თავაზიანი პატრული ყველას დაემშვიდობა და, ვიდრე წავიდოდა, ბოგდანას უთხრა, — დარაბის ღრიჭოებში შუქი იპარება და როგორმე დაგმანეთ, თორემ დაგაჯარიმებენო.

ბოგდანამ მადლობა გადაუხადა და პატრული წავიდა.

— სულაც ჩააქრეთ ლამპა და კარი გააღეთ! — წამოიყვირა ანდუყაფარმა, — სული მეხუთება!

მეორე დილას ანდუყაფარმა აივანზე დახედა ლუკას. ბოგდანა ადრიანად წასულიყო სამკერვალო ფაბრიკაში. ანდუყაფარი ახლა მძიმედ სუნთქავდა. სახეზე მეტად უსიამოვნო, სხვა რიგის ფერი დასდებოდა. ლუკას გული შეეკუმშა და თვალი ვედარ გაუსწორა, ალბათ ამას ჰქვია მიწისფერიო, — გაიფიქრა. ცხვირის ნესტოები, საულვაში და ნიკაპი დამუწუკებოდა. ეს მუწუკები გუშინ არ ჰქონდა, ყოველ შემთხვევაში, ლუკას არ შეუმჩნევია.

— როგორ გეძინა, ლუკა?  
 — რა ვიცი...  
 — ჰოსპიტალში წადი... — მამაშენი ინახულე.  
 — შემიშვებენ?  
 — ალბათ... თუ არ შეგიშვებენ, გეტყვიან, მაინც, რღვორ არის.

— უსათუოდ წავალ... გაკვეთილების შემდეგ.

— წავალ... წავალ... — გაიმეორა რატომღაც ანდრუყაფარმა, შერე თავი მარცხნივ გადააგდო და ლუკას გაღიმებული მიაშტერდა. ასე უყურა ერთხანს, ღიმილი შეუმჩნევლად გაქრა და სახეს ახლა ასევე ძლივს შესამჩნევი ტკივილი დაეუფლა. — იზა გაქცეულა სახლიდან.

— იზა?

— ბარათი დაუტოვებია... ძებნას ნუ დამიწყებთო...

— ძია ლადო რას ამბობს?

— ჰკითხე... მანდა დგას ეზოში...

ლუკამ ეზოში გადაიხედა. ძია ლადო, მართლაც, ეზოში იდგა ცაცხვის ქვეშ. ლუკას უცებ თვალი პირველი სართულის აივნისკენ გაექცა. ჭუჭა რუბენა აივნის მოაჯირს დაყრდნობოდა და პაპიროსს აბოლებდა, თავზე თავის განუყრელი უზარმაზარი კეპი ეხურა. დაფიქრებული ჭუჭა ძალზე მშვიდად აბოლებდა პაპიროსს. წუხანდელს აქეთ ლუკა დარწმუნებული იყო, რომ რუბენა გაექცა მართლმსაჯულების მსახვრალ ხელს, გაექცა სამუდამოდ და სადღაც ჭურღმულებში იმალებოდა. ახლა კი მისი დანახვა იმდენად მოულოდნელი იყო, რომ თვალებს არ დაუჭერა, შეკრთა და შემკრთალმა მოხედა ანდრუყაფარს. იქნებ ბოგდანა შეცდა, იქნებ ჭუჭა რუბენას არ უსვრია რევოლვერი ლუკას მამისთვის?

— რა იყო, ლუკა, ჭუჭა დაინახე?

— ხო... ჭუჭა რუბენა აივანზე დგას.

— შენ რა გეგონა?..

— რა ვიცი...

— რაღაცა გვჭირს, ლუკა, და ვერ გამიგია, რა?!

— წავალ. — თქვა ლუკამ, — სკოლაში წავალ.

მაგრამ მაშინვე მიხვდა, ძალიან გაუჭირდებოდა ეზოში გავლა, როცა ჭუჭა რუბენა იყო აივანზე გადმომდგარი. თან აქ ყოფნაც უკვე აღარ შეეძლო, ანდრუყაფარის მდგომარეობა აწ-

ვალეზდა, თრგუნავდა და ცდილობდა, როგორმე გასცლოდა იმ კაცს, ვისი სიახლოვეც გუშინ თუ გუშინწინ ქვეყნად ყველაფერს ერჩია.

— წადი, ლუკა, არ დაიგვიანო... წადი...

...ლუკა წელმოწყვეტილი წავიდა შუშაბანდისაკენ. ჩანთა გამოიტანა და კიბისთავთან შეყოვნდა.

— აღამიანი ბუნებით უმადურია... — გაიგონა ანდრუყათარის ხმა, — უმადური მოდის ამქვეყნად... უმადურივე უბრუნდება წიაღს...

ლუკას მეხსიერების სიმი დაეჭიმა. რატომღაც გაიფიქრა, ეს სიტყვა მეტად ნაცნობი და მნიშვნელოვანი იყო მისთვის და სცადა, გაეხსენებინა, საიდან იცოდა იგი ანდა სად გაეგონა პირველად. სულ ამაოდ იწვალა, ვერაფრით ვერ გაიხსენა. იღლიაში ჩანთაამოჩრილი სირბილით დაეშვა კიბეზე, სირბილითვე გაიარა ეზო თავჩალუნულმა, რათა ჯუჯა რუბენა კიდევ ერთხელ არ დაენახა, მაგრამ ცაცხეთან მისული ძია ლადომ შეაჩერა, მამაშენი როგორ არისო, — ჰკითხა.

— არ ვიცი, ძია ლადო, დღეს მივალ და ყველაფერს გავიგებ.

— ეს რა ხდება, კაცო, ლამის ჰკუთა დაკარგო! — ძია ლადო როგორღაც მოტეხილი და დაჩაჩანაკებული ჩანდა.

მტკვარი ამ ორი დღის მანძილზე იმდენად მოდიდებულებოდა, თითქმის ეზოს უწვდენდა ტალღებს. ეს მხოლოდ ახლა შენიშნა ლუკამ. მტკვარი ამღვრეული მოდიოდა, დიდი და ღონიერი პირთამდე ავსებდა თავის კალაპოტს. ხიდიდან ხილამდე შეტორტმანებული, თიხისფერი წყლის ვეება სივრცე იყო გადაშლილი. ძია ლადოს თავისი ბრტყელძირიანი ნავი ჯაჭვით გამოება ცაცხეზე. ნავში ერთი ნიჩაბი და რკინისკაპიანი ჭოკი ეგდო. ნავი აღი-ჩამოდიოდა ტალღებზე, ქანაობდა, ირწეოდა, ეზოს კიდეს ფერდით ეხეთქებოდა.

ლუკამ ახლავდა შენიშნა ისიც, ცაცხვის ქვეშ რომ აღარ იდგა არც მერხები და არც მაგიდა. ძია ლადომ უთხრა, — ამ ზამთარს, ეტყობა, ვილაცას შეშა შემოაკლდა და მოიპარაო. ლუკას ერთი სული ჰქონდა, იზას ამბავიც გაეგო. მაგრამ ძია ლადოს შეკითხვა ვერ გაუბედა.

— სალამოს შემოდი ჩემთან. მამაშენის ამბავი შემატყობინე.

— უსათუოდ შეგატყობინებ, ძია ლადო.

— ეს ქვეყანა მართლა ჩალით დახურული ხომ არ ჰგონია!

— რა ვიცი...

— წადი, ლუკა, წადი... დაგაგვიანდება...

ლუკამ თვითონაც კარგად იცოდა, რომ აგვიანდებოდა, მაგრამ მიბრუნებისა ეშინოდა: მის ზურგს უკან ჭუჭია რუბენა იყო, პირველი სართულის აივანზე გადმომდგარი. ყოყმანის შემდეგ მაინც მობრუნდა, თავჩალუნულმა გაიარა რამდენიმე ნაბიჯი. პირველი სართულის აივნისკენ არ გაუხედავს, რალაც-ნაირად იგრძნო, რუბენა რომ იქ აღარ იდგა. მაგრამ აივანზე ჭუჭიას არყოფნას ლუკასათვის შვება არ მოუნიჭებია. პირიქით, გაღიზიანდა და ერთთავად ცახცახმა აიტანა, გულიც სხვანაირად უფრიალებდა. თითქოს საგულედან ამოვარდნას ლამობდა.

„რა უცნაური თვალები აქვს ბოგდანას, — ფიქრობდა გზადაგზა. — ღამითაც ისევე ხედავს, როგორც დღისით. ბოგდანა რომ არა, ალბათ ვერაფერს გაიგებდა, ვინ ესროლა მამას... იქნებ სჯობდა, რახან მამა ცოცხალი გადაჩია, სულაც არ ეთქვა, არ გაემეღავენებინა ბოგდანას ეს საიდუმლო?“ ლუკას ერთი წუთითაც არ უნდოდა წარმოედგინა, მამამისის ჰოსპიტლიდან გამოწერის დღესვე, რა ამბავი დატრიალდებოდა მათ ეზოში... მაგრამ, ვაითუ, ბოგდანა ღამით ისე ვერ ხედავს, როგორც დღისით?! ვაითუ, შეეშალა, სიბნელეში ვერ გააჩია?! მითუმეტეს, რომ ეზოს იმ ღამის წყვდიადში მეორე სართულიდან გადმოსცქეროდა.

ექვეგაყონილმა ფიქრებმა ლუკას გუნება შეუცვალა. ახლა წელანდელივით აღარ ცახცახებდა, აღარც ისე უფრიალებდა გული. იგი სევდამ შეიპყრო, ყველაფრისადმი განურჩეველმა მოწყენილობამ. თითქოს ბურანში იყო, თითქოს ნისლში მიდიოდა, ირგვლივ ვერაფერს ამჩნევდა და არც აინტერესებდა, რა ხდებოდა მის გარშემო.

სკოლის შენობაში შესულს გეოგრაფიის მასწავლებელი შეეფეთა, იგივე სასწავლო ნაწილის გამგე.

— ჯორჯაძე, — დაუძახა სასწავლო ნაწილის გამგემ და მკაცრად უთხრა, — წამოდი ჩემთან!

ლუკა მორჩილად გაჰყვა მასწავლებელს. სხვა დროს აღ-



ბათ გულს გადაუტრიალებდა ასეთი მკაცრი კილო, მაგრამ ახლა შინაგანად გათიშული იყო გარესამყაროსგან და შიში გულთან ახლოსაც არ გაჰქარებია.

— ჯორჯაძე, რასა ჰგავს შენი საქციელი? როდემდე უნდა მოვითმინოთ შენი აღვირახსნილობა?! — უთხრა სასწავლო ნაწილის გამგემ კაბინეტში შესვლისთანავე.

ლუკა მუნჯივით იდგა, უაზროდ მიშტერებოდა მასწავლებელს თვალებში.

— რატომ გააცდინე გაკვეთილი?

ლუკას არც ახლა ამოუღია ხმა.

— ახლავე შინ წადი და მშობელი მოიყვანე!

— მე ვერავის მოვიყვან, პატივცემულო მასწავლებლო! — როგორც იქნა, დასძრა სიტყვა ლუკამ.

— რას ჰგავს ეს, როგორ თუ ვერ მოიყვან?

— მამაჩემი ჰოსპიტალში წევს.

— დედა მოიყვანე, ბატონო!

— დედა... დედა, არ ვიცი, სად არის... ომში დაიკარგა.

— ვის ატყუებ, ჯორჯაძე?! ახლავე წადი შინ და მშობელი მოიყვანე. მთელ კლასში ყველაზე მეტი გაცდენა შენა გაქვს! იცოდე, თუ მშობელს არ მოიყვან, ჩაგტოვებ მეხუთე კლასში ახლა წადი.. უსირცხვილო!.. წადი!

ნაცნობი ზარიც დაირეკა.

ლუკამ დატოვა სასწავლო ნაწილის გამგის კაბინეტი და გრძელი დერეფანი გაიარა. დერეფანში უკვე გამოცვენილიყვნენ ბავშვები, ერთი ყრიაშული ჰქონდათ ატეხილი, ლუკამ მაიკოს მოჰკრა თვალი და ისიც შენიშნა, მაიკომ რომ დაინახა ლუკა. შეჩერდა. ეგონა, მაიკო მოვიდოდა მასთან, მაგრამ მაიკო გატრიალდა, გაიქცა და სირბილით აჰყვა კიბეს.

იღლიაში ჩანთაამოჩრილი მარტო მიდიოდა ქუჩაში და ფიქრობდა — რა კარგია, ღღეს სკოლიდან რომ გამომაგდეს, გაკვეთილებზე მაინც ვერ გავძლებდიო. ეგეც კარგი ვინმე ყოფილა, ერთის გაცდენისათვის ოთხი გაკვეთილი გამაცდენინაო.

ყოფილი სკოლის წინ, სადარბაზო შესასვლელთან შეჩერდა. ჯარისკაცს უთხრა, — აქ მამაჩემი წევს და ძალიან მინდა მისი ნახვაო. ჯარისკაცმა მამის სახელი და გვარი ჰკითხა ლუკას და შენობაში შევიდა. ცოტა ხნის შემდეგ ისევ გამოვიდა. — მორიგეს დაეურეკე და ამ ჰოსპიტალში არავეითარი გოგი ჯორჯა-

ქე არ წევსო. როგორ არა, — არწმუნებდა ლუკა, — წუხელ ღამით მოიყვანესო. ჯარისკაცს არ დაზარებია, ისევ შებრუნდა პოსპიტალში და რამდენიმე წუთის შემდეგ გამობრუნებულმა იგივე მოახსენა ლუკას. ლუკა დაიბნა, უკვე აღარ იცოდა, რა ექნა ან როგორ მოქცეულიყო? განა შეეძლო სამხედრო პატრულს ტყუილი ეთქვა? რად დასჭირდებოდა ასეთი ტყუილის თქმა? იქნებ შეცდა? მაგრამ ლუკას კარგად ახსოვდა, წუხელ რაც თქვა სამხედრო პატრულმა, ახსოვდა ანდრეაფარის ნათქვამიც. — შენს ყოფილ სკოლაში მიუყვანიათო. ლუკას ყოფილი სკოლა კი ეს არის.

შეფიქრიანებული გამოტრიალდა და წამოვიდა, რკინის მესერს გამოჰყვა. საღამოს ბოგდანასთან ერთად წამოვალ და ყველაფერს ის გაარკვევსო, — დაიმშვიდა თავი.

ქუჩის კუთხესთან მისულს გაახსენდა, ამასწინათ რომ სთხოვა ბოგდანამ, — თუ ღმერთი გწამს, გამიგე, მთვარისა ნამდვილად არსებობს, თუ არ არსებობსო. ლუკას იმედი არ ჰქონდა, დარწმუნებული იყო, საგიჟის კარი ღია არ დახვდებოდა. მიუხედავად ამისა, მაინც გაუხვია, — ცდა ბედის მონახევრეაო.

სულაც არ მიუწევდა გული იქითკენ. მიდიოდა ისე — სასახეთაშორისოდ, ბოგდანასა და ანდრეაფარის წინაშე ვალის მოსახდელად. ოღრო-ჩოღრო ქუჩით მიმავალი ახლა ისევ მამაზე ფიქრობდა. მოაგონდა წუხანდელი შიშინანი ღამე, შემზარავი სროლის ხმა, პატრულთა ფარნებით განათებული, გაოფლიანებული სახე, რომელსაც მწარე ტკივილი მანჭავდა. იქნებ ცუდად არის მამა და მიმალავენო, — შიშმა გაუკაწრა გული, შეჩერდა და უკან მოიხედა.

წვდანდელი უგუნებობა მიეძალა და შინ დაბრუნება გადაწყვიტა, მაგრამ აღარც შინ დაბრუნება უნდოდა, ბოგდანა საღამომდე არ მოვიდოდა, ანდრეაფართან ყოფნა კი ღღეს ძალზე უჭირდა, ვეღარ უძლებდა მის გატანჯულ სახეს. ისევ დაჰყვა ნაცნობ, ოღრო-ჩოღრო ქუჩას და ალაყაფის კარს მიადგა. კარი, რა თქმა უნდა, დაკეტილი აღმოჩნდა. ახლაც უიმედოდ ჰკრა ხელი და გაოცდა: კარი ჰკრიალით გაიღო.

აღარ დაუყოვნებია, მაშინვე შევიდა საავადმყოფოს ეზოში და იმ ფანჯარას შეხედა, სადაც ოდესღაც მთვარისა ნახა. ბნელი, გისოსებიანი ფანჯარა ღია იყო. მერმე ეზოს მოავლო

თვალი, ეზო ამჟამად დაცარიელებული დახვდა. არც მოხუცი მეეზოვე, არც თმაგადაკრეჭილი, ნაცრისფერხალათიანი მამაკაცები არ გამოჩენილან. აუზი უკვე წყლით აევსოთ და შიგ უღრუბლო ცადა მწვანედ შეფოთლილი ხეები არეკლილიყო. ლუკამ ეზო მიიარ-მოიარა, ერთ მერხზე ჩამოჯდა კიდევ, მერმე ისევ ამოიჩარა თავისი ჩანთა იღლიაში და კარისკენ გაეშურა იმედგადაწურული.

კართან მისულმა მოულოდნელად ნაცნობი ხმა გაიგონა და კინაღამ გული გაუსკდა. თვითონაც არ იცოდა, რატომ შეაკრთო იმ ხმამ, რომლის გაგონებასაც ასე ესწრაფოდა.

— ბიჭო, ერთი წუთით მომისმინე! — ეს ნამდვილად მთვარისა იყო.

ლუკამ თავი მოაბრუნა. ღია ფანჯარას შიშველი მთვარისა მოსდგომოდა ისევე, როგორც მაშინ, პირველად რომ ნახა. თავზევით რკინის გისოსებისათვის ხელები ჩაეველო და ლუკას მისჩერებოდა დიდი და ნაღვლიანი თვალებით. მაგრამ ლუკას მაშინდელივით სიარცხვილისაგან სახე არ ალეწვია, არც თვალი მოურიდებია, არც აღელვებულა მაშინდელივით. ოღონდ ეს კი იყო, წედანდელი უეცარი შიშისა თუ ელდის გამო გული ისევ გამალეებით უცემდა.

— რატომ დაიგვიანე, ბიჭო? განა შეიძლება ამდენი ხანი ალოდინო ადამიანი?

ლუკამ რამოდენიმე ნაბიჯი გადადგა ფანჯრისაკენ.

— იგი დასჭრეს და მისი სხეული მოჰფინეს მთელ ქვეყანას... მისი სხეულის ყოველი ნაწილი იყო ნაწილი ჩემი სხეულისა და იგი იყო ძმა ჩემი და ქმარი ჩემი... თოთხმეტ ნაწილად დასჭრეს და გაჰფანტეს მთელ ქვეყანაზე, ამიტომ მტკიოდა სხეული თოთხმეტი ტკივილით, როგორც მთვარეს. მაგრამ მე მოვაგროვე გაფანტული მისი სხეული და აღვადგინე მკვდრეთით ძმა ჩემი და მეუღლე ჩემი. აღვადგინე მკვდრეთით და ტკივილები დამიყუჩდა, თოთხმეტივე ტკივილი. ახლა იგი — ძმა ჩემი და მეუღლე ჩემი ყოველ გაზაფხულს მოეახლება ქვეყანას და ყოველ შემოდგომას კვლავ განშორდება. იგი სიკვდილიც არის და სიცოცხლეც. სიცოცხლეცა და სიკვდილიც... — ესა თქვა მთვარისამ, ნაღვლიანად გაიღიმა. მერმე თავზევით გისოსებს ხელები გაუშვა და ასევე ხელებაწეული შებრუნდა, წასვლა დააპირა.

— მთვარისა! — უნებურად წამოსცდა ლუკას.

ლუკამ დაინახა, უცებ როგორ შეუტოკდა მთვარისას მხრები და რძისფერი სხეული თანდათან როგორ გაუვარდისფრდა. მთვარისა სწრაფად მოტრიალდა. მას ისევ ნალვლიანი თვალეები ჰქონდა, ოღონდ უხერხულად ილიმებოდა, დამნაშავესავით. მერმე ხელები ჩამოჰყარა და რაფას დაეყრდნო.

— მე მთვარისა არა ვარ, ბიჭო.

შიშველ სხეულს ძველი ფერი დაუბრუნდა, სახიდან უხერხული ღიმილიც აიკრიფა და გაჰქრა. ოღონდ ეს კი იყო, შუბლზე ოფლის წინწკლები უბრჭყვიალებდნენ ალმასის თვლებივით.

— გითხარი, მთვარისა არა ვარ-მეთქი!

ლუკას გაახსენდა ანდრეუყაფარის ნათქვამი. — შესაძლებელია, მთვარისა სულაც არა ჰქვია, ეს სახელი თვითონვე დაირქვაო.

— მე აღვადგინე ძმა ჩემი და მეუღლე ჩემი. მერმე დამიცხრა თოთხმეტევე ტკივილი და იგი — ძმა ჩემი და მეუღლე ჩემი მიუვლინე მეუფედ მკვდართა ქვეყანას. ტანჯვითა ჩემითა მე მოვიპოვე სული ჩემი და იგი ანათებს მზესავით. მე ვარ შემწე ყოველთა ტანჯულთა, ღატაკთა და უპოვართა, ნუგეშისმცემი ყოველთა დაცემულთა...

ლუკამ ახლაც იგრძნო, ქალიშვილი, რომელსაც მისთვის მიეპყრო ნალვლიანი თვალეები, მას არ უმზერდა. უფრო სწორედ, ქალიშვილის მზერა მას არ წვდებოდა. იქვე მის წინ ჰაერშივე წყდებოდა ან იფანტებოდა. ლუკას უკვე აღარ უნდოდა აქ დგომა და ამ გაუგებარი სიტყვების მოსმენა. აღარც ის აინტერესებდა, რა ახალ სახელს მოიგონებდა, რას დაირქმევდა. ლუკასთვის იგი მთვარისა იყო. ლუკამ სამიოდე ნაბიჯი გადადგა უკან, თითქოს გაპარვას აპირებდა.

— სად მიდიხარ, ბიჭო?

ლუკა შეჩერდა:

— წადი და ჩვენებს შეატყობინე, რომ მე აქა ვარ! მათ, რა თქმა უნდა, იციან, სადაც ვარ მე, მაგრამ მაინც შეატყობინე... იქნებ დაავიწყდათ, იქნებ შეხსენებაა საჭირო... ჩვენ ხომ ყველანი უმადურები ვართ და ბევრი რამ, რაც სიკვდილამდე უნდა გგანსოვდეს, გვაგიწყდება ხოლმე.

ლუკას გაახსენდა ანდრეუყაფარის დილანდელი ნათქვამი სი-

ტყვა, რომელმაც მაშინ მეხსიერების სიმი დაუჭიმა. სწორედ ამ ეზოში საუბრობდნენ ნაცრისფერხალათიანი მამაკაცები უმადურებზე. ლუკამ ეზოს გახედა, — იქნებ ის ნაცრისფერხალათიანებიც ისევ აქ არიანო. ეზოში არავინ ჩანდა.

— ნულარ იგვიანებ, ბიჭო!.. წადი... წადი, ბიჭო!.. — მთვარისამ, თითქოს ცეკვას აპირებსო, ხელები მაღლა შეისროლა და ლილინით გატრიალდა.

მთვარისას ვაუჩინარებისთანავე ლუკამ შინისკენ მოჰკურცხლა. მას სულაც არ ესმოდა, რა მნიშვნელობა ჰქონდა ანდუყაფარისათვის მთვარისას არსებობა-არარსებობას. რატომ აწვალებდა მისი ყოფნა-არყოფნა... გახარებული გარბოდა შინ, დარწმუნებული იყო, რომ ცოტათი მაინც შეუმსუბუქებდა ტკივილს, როცა ეტყოდა: მთვარისა ნამდვილად არსებობსო... მთვარისა არსებობს... მთვარისა არსებობს... მთვარისა არსებობს... მთელი გზა თითქმის სირბილით მოიტოვა უკან. დაღლილი მიაღგა ჭიშკარს. ჭიშკართან შეჩერდა და სული მოითქვა, იმდენად დაქანცულიყო, რომ თავბრუ ეხვეოდა და გულიც ერეოდა. „რას მოვრბოდი, სულერთი არ იყო, ათი წუთით ადრე თუ გვიან მოვიდოდი?“ შესასვლელი გვირაბი და ეზოს ნაწილი სვენებ-სვენებით გაიარა. ცაცხვთან მისულმა ისევ გაიფიქრა, — რა უცნაურია, დღეს ყველა მაჩქარებდა... მე არსად არ მეჩქარებოდა და მაინც ვჩქარობდიო... მერმე ეზოდან მეორე სართულს ახედა, ეგონა, ანდუყაფარს დაინახავდა.

პირველი სართულის კიბე აათავა...

თავზარდაცემული შეჩერდა.

უცებ დაინახა, მეორე სართულიდან კიბეზე როგორ დაეშვა ველოსიპედისთვლებიანი სავარძელი, რომელშიც ანდუყაფარი ესვენა. საშინელი სისწრაფით მიგორავდა სავარძელი, ხტუნვა-ხტუნვითა და გრიალით, როგორც ღარში მიშვებული ვეება ტალღა. ანდუყაფარს ორივე ხელი მკლავთა საყრდენებისათვის ჩაეველო, შიშჩამდგარი თვალები დაეჭყიტა და წინ იხედებოდა. ერთ ნაბიჯზე ელვასავით ჩაუქროლა ლუკას, ლუკა უნებურად გადაქანდა და შემადრწუნებელი ბლავილი გაიგონა.

— ლუუ-კაა!..

განწირული ბლავილი ჯახანმა და ლაწანმა დაახშო. დაქანებული სავარძელი ზვავით შეასკდა პირველი სართულის მოა-

ჯირს, გადალენა და გადაანგრია. ამევე ძალამ ჰაერში ცალ-ცალკე აისროლა ანდუყაფარიცა და სავარძელიც. ანდუყაფარ-მა ხელეები გაშალა, თითქოს გაფრენას აპირებდა, კიდევ ერთხელ იბლაღვა „ლუუ-კაა!“.. და უზარმაზარ მძიმე ჭვარივით ჩაეშვა მდინარეში.

ლუკა იმწამსვე დაეშვა პირველი სართულის კიბეზე, მაგრამ ფეხი წამოჰკრა ჩანთას, რომელიც წედან გავარდნოდა ხელიდან, დაგორდა და თავპირდალენილმა ჩაათავა კიბე. ეზოში სწრაფად წამოხტა და მიირბინა ცაცხვთან, სადაც დაბმული ნავი ეგულებოდა. ნავი ძველ ადგილზე აღარ აღმოჩნდა. გინდაც იქვე ყოფილიყო, მარტო ლუკა რას უშველიდა?!

ანდუყაფარი აღარ გამოჩენილა, იგი მტკვრის მღვრიე ტალღებმა სამუდამოდ შთანთქა.

— ანდუყაფარი დაიხრჩო! — შესძახა ლუკამ დაცარიელებულ აივნებს, — ანდუყაფარი დაიხრჩო!..

ლუკას ძახილი არავის გაუგონია, ანდა ვინ გაიგონებდა, როცა თვითონაც ძლივს ესმოდა საკუთარი ხმა.

— ანდუყაფარი, ანდუყაფარი დაიხრჩო!.. — ყვიროდა ლუკა.

მაგრამ ლუკა მიხვდა, მის ძახილს ახლა ვერავინ გაიგონებდა, რადგან ხმას მტკვრის ძლიერი ხმაური ნთქავდა... თითქოს დიდი ხნის წინათ დაკარგული სმენა დაუბრუნდა და ახლად გაიგონა, რა საზარლად ხმაურობდა მტკვარი.

უცებ იგრძნო, მუხლებში ძალა ელეოდა, მაინც გაემართა ძია ლადოს სახლისკენ, ძლივს მიათრევედა დამძიმებულ ფეხებს. რამდენიმე საფეხური გაჭირვებით აიარა და კარს მიაღდა. დააკაუნა...

— ძია ლადო, მიშველე, ძია ლადო! — კარი არავინ გაუღო.

— ძია ლადო, მიშველე!..

ეტყობა, ძია ლადო შინ არ იყო. ლუკა ისევ დაეშვა კიბეზე, დაბარბაცდა და კიბის მოაჯირს ხელი წაატანა, — არ წავიქცეო. მაგრამ ათიოდე ნაბიჯით წალასლასდა და ახლა მეორე კიბეს მიაღდა. შინ ესენი მაინც იქნებიანო, — გაიფიქრა. იცოდა, აქ პატარა ბავშვი იყო ავად და ავადმყოფ ბავშვს არავინ მიატოვებდა. კიბეზე ფეხი შედგა. მუხლებმა უმტყუნა და იქვე ჩაიკეცა. ახლა ფორთხვით აპყვა კიბეს... ჭერ კარს, მერმე ფანჯარას შეავლო თვალი. ორივეს, კარსაც და ფანჯარასაც

წითელი ფარდები ჰქონდა ჩამოფარებული. ლუკა კიდევ ორ  
საფეხურზე აფოფხდა. მეტი ვეღარ შესძლო, მოწყდა, მოეშ-  
ვა და თავი საკუთარ მკლავზე მიასვენა. ოთახის სიღრმიდან  
სიმღერა მოესმა, ალბათ დედა მღეროდა: !

მოუოხეთ, ბატონებო,  
ბატონებო, მოუოხეთ...  
ლამაზი ბატონებია,  
ია და ვარდი ჰფენია...

ლუკამ დიდი მწვანე მინდორი დაინახა, ყვავილებით მო-  
ფენილი. მინდორზე თეთრი ცხვარი და თხის ჯოგი გამოჩნდა.  
თხის ჯოგში ერთი ლამაზი თეთრი თიკანი შეკუნტრუშდა და  
შეხტა...

მოუოხეთ, ბატონებო,  
ბატონებო, მოუოხეთ...

# თეთრი ცხენი

## 1

დავბრუნდი...

ომის დამთავრებისთანავე დავბრუნდი ჩემს ქალაქს, ჩემს უბანს, სახლს, სადაც დავიბადე და გავიზარდე... თითქოს არაფერი დაჰკლებია და არც მომატებია, ისეთივეა, როგორიც დავტოვე: მყუდრო, ნაცრისფერი, ძველი და გაცვეთილი, მაგრამ ეს ალბათ პირველი შთაბეჭდილებაა, ამდენი ხნის განშორების შემდეგ პირველი შეხვედრის მსუბუქი ანარეკლი, ზედაპირული, მოტივტივე. ასეა თუ ისე, იგი სასიამოვნოდ დაემთხვა იმ მოლოდინის სევდას, რომელიც წლების მანძილზე გულს მიღრღნიდა იქ, გამოყრუებულსა და ღვთისაგან მივიწყებულ სოფელში.

ალბათ, მინდოდა კიდევ, ყველაფერი ხელუხლებელი დამხვედროდა, როგორიც მახსოვდა, ისეთივე მენახა, რადგან გადასხვაფერებულისა თუ შეცვლილის, ანდა უცნობის შესახებ ვეღარაღ შინაგანად მზად არ ვიყავი. ოთხი წელი მასულდგმულებდა მეხსიერებაში მკაფიოდ აღბეჭდილი სამყარო... ეს იყო ჩემი ბავშვობის მთლიანი, შეუვალი ქვეყანა, რომელსაც ფიქრებსა და სიზმრებში ვაცოცხლებდი და სხვებისთვის შეუმჩნევლად ვცხოვრობდი მასშივე დანთქმული.

სოფელში ერთხანს გამიჭირდა... განსაკუთრებით მალიზინებდა „ქალაქელი ბალოს“ დაუმსახურებელი უპირატესობა. უფროსებისა და თანატოლების მიერ აღიარებულ ამ უპირატესობას თითქმის ყოველ ნაბიჯზე ვგრძნობდი, უმცროსებზე აღარაფერს ვამბობ. ზემდეტი ყურადღება და გამორჩეულო-



ბის გრძნობა ერთგვარად მაწუხებდა და მბოქავდა, რადგან იგი ცხოვრების სხვანაირ, შეუჩვეველ წესრიგს მოითხოვდა ჩემგან და მეც მაშინვე უნდა მიმეცა ის, რასაც ჩვეულებრივ, ყოველდღიურ ყოფით გარემოში არ მივცემდი.

ზოგჯერ მეჩვენებოდა, ყველაფერი ხდებოდა იმის გამოც, რომ ხალხს ვეცოდებოდი, ერთნაირად ვებრალეობოდი ყველას — დიდსაც და პატარასაც. ჩემდამი სიბრალულის გრძნობა შეურაცხმყოფლად მოქმედებდა და ჩემსავე თვალში მამცირებდა. შესაბრალო თუ შესაცოდო არა მჭირდა რა, ობლობა, რომელიც დამაბრალეს, არა მჭეროდა და გინდაც დამეჭვრებინა, მას ვარეშეთათვის საწყალობლად არ უნდა გავეხადე, ამის საბაბი მე არავისთვის მიმიცია.

მხოლოდ ანანო (მამიდაჩემი) არ მთვლიდა ობლად და არც „ქალაქელი ბაღის“ უპირატესობას აღიარებდა, ჩემთვის მაშინ გაურკვეველსა და აბსტრაქტულს. ამ სამაგალითოდ დაუზარელმა და გამრჩვე ქალმა, თუმცა საშუალო სკოლა კი დაამთავრა, მაგრამ ოცდაათ წელს ისე მიატანა, სოფლიდან ფეხით თითქმის არ გაუდგამს. ერთს იმიზეზებდა — მოცლა არა მქონდაო. პირველ ხანებში ეკვის თვალითაც კი ვუცქეროდი მის საქმიანობას, რომელიც სხვებისთვის მოსაჩვენებელი ამოა ფუსფუსი მეგონა. მართლაც, ვერ წარმოვიდგენდი, თუ ქვეყნად ამდენი საქმე იყო გასაკეთებელი.

მეზობლებისაგან ხშირად გამიგონია: აქ ქალს თავისი კალო გალეწილი აქვს და ჩამუხლულს მაინც ვერა ნახავო. იგი თითქოს ცხოველური ყნოსვით აგნებდა საქმეს, რის გამოც არაერთხელ გამიფიქრია: ეს მოუცლელობა ცოტა ავადმყოფური ხომ არ არის-მეთქი. ანდა, შესაძლებელია, ანანოს ნამდვილად გააჩნდა იშვიათი ნიჭი, საქმე აღმოეჩინა. იქ, სადაც ჩვეულებრივ მოკვდავთათვის ამის საჭიროება არ არსებობდა.

ერთხელ სოფლის შარაზე ვიდაც ბერიკაცს წამოვეწიე, ბერიკაცმა გზაში ლაპარაკი გამიბა, ვისი ხარო? — მკითხა. წინასწარ ვიცოდი, რასაც მიპასუხებდა და მაინც ვუთხარი, ვისიც ვიყავი. ჰოო! — გაიქნია სინანულით თავი, — საწყალი მამაშენი ჩემს ხელში გაიზარდა და დავაუკაცდაო... დიდი მამაძალი ვინმე იყოო... აქო და აღიდა, ცამდე იყვანა. მე უკვე სათვალავი დავკარგე მამაჩემის გამზრდელებისა, ვინც კი სოფელში ხანმოყრილი შემხვდა, ყველა მისი აღმზრდელი აღ-

მოჩნდა. ჯერ ვიბნეოდი, ასეთი რა გაჩნდა ქვეყანაზე, რომ ერთი ბავშვის გაზრდამ მთელი სოფელი მოაყვინძოვებდა, მაგრამ ყური თანდათან გამეხედნა და მერმე მათ ნათქვამზე უხერხულად აღარ ვიშმუშნებოდი. თანაც ვიცოდი, შეიძლია თუ რვა წლისა ბიძამ ქალაქში წაიყვანა სასწავლებლად, ქალაქში გაიზარდა და დავაუკაცდა, იქვე დაქორწინდა, რის შემდეგაც მე მოვევლინე ქვეყნიერებას.

დალუბვის ცნობა არ გვქონდა მიღებული, მაგრამ სოფელში ყველანი რატომღაც დალუბულად თვლიდნენ: ფათერაკიანი ბაღი იყო, ხიფათს გეშით ეძებდა და თავის დროზეც რამდენიმეჯერ ბეწვზეა გადარჩენილი. ბერიკაცმა „საწყალიო“ რომ თქვა, დიდი მიხვედრა არ უნდოდა, მის დაბინდულ წარმოდგენაში მამაჩემი სადღაც ბრძოლის ველზე ხიფათს იყო გადაყრილი.

სულ მიკვირდა, გულში მწყინდა კიდევ: ასე უმტკივნეულოდ რატომ იმეტებდნენ ან ასე გულგრილად რატომ იშორებდნენ თავიდან მამაჩემს. შემდეგაც ბევრი მიფიქრია ამაზე, მაშინ კი მეჩვენებოდა, რომ სოფლებს სოფლიდან წასულების მიმართ, იმათდამი, ვინც სოფელი სამუდამოდ მიატოვა და ქალაქში დასახლდა, სხვაგვარი დამოკიდებულება ჰქონდათ. ხანდახან მათ პატივითაც იხსენიებდნენ, მაგრამ გულის სიღრმეში ეს პატივისცემა დიდი ხნის განვლებული იყო, ანდა მის ადგილს უკვე სხვა გრძნობა დაპატრონებოდა. თუ სოფლის მიტოვებაზეა საქმე, განა ჩვენ კი ვერ მივატოვებდითო? — ზოგს შური უკორტნიდა გულს, ზოგს — ბოღმა, ზოგს კი სოფლისა თუ მიწის ქეშმარიტი სიყვარული ალაპარაკებდა. ჩემდამი დამოკიდებულებასაც უნებურად ამ გზით ვხსნიდი. რახან მამაჩემს ომში დალუბულად თვლიდნენ, ალბათ ეგონათ, სამუდამოდ სოფელში დავმკვიდრდებოდი, ანდა უნდოდათ ასე მომხდარიყო, ეტყობა, ქალაქელის სოფლად დამკვიდრებასაც განსაკუთრებულ მნიშვნელობას ანიჭებდნენ...

მერმე ბერიკაცმა ანანო მოიკითხა.

ეგ დედაკაცი გულთმისანია, სხვა წყალი აქვს გადასხმულიო... ყური უგდე ხოლმე, ხომ იცი, ძირს დასაშვებ სიტყვას არ გეტყვისო... მართალი გითხრათ, კარგად ვერც გავიგე, რას ნიშნავდა „ძირს დასაშვები სიტყვა“, მიუხედავად ამისა, ბერიკაცთან საუბრის შემდეგ ანანოს უფრო მეტი გულისყურით

ვუსმენდი, მაგრამ სიტყვაძვირი და გულჩათხრობილი ქალი ისეთს არაფერს მეუბნებოდა, რომ „ძირს დასაშვები“ არ ყოფილიყო.

განსაკუთრებით მაინც „გულთმისანმა“ ჩამაფიქრა; ეს სიტყვა მანამდეც ბევრჯერ მქონდა გაგონილი და წიგნებში წაკითხული, მაგრამ მისი შინაარსით არასოდეს დავინტერესებულვარ, შეიძლება იმის გამოც, რომ იგი ბუნებაში არარსებული, ზღაპრული გმირების გაზვიადებულ ეპითეტად მიმაჩნდა. ბერიკაცის ნათქვამი კი უცებ თვალწინ უჩვეულოდ აელვარდა. ეს უცნაური სიტყვა ეხებოდა რეალურად არსებულ ადამიანს, რომლის გვერდითაც ვცხოვრობდი, რომლის სიახლოვესა და ზრუნვას ყოველდღიურად განვიცდიდი. თუმცა, რა თქმა უნდა, „გულთმისანი“ ამ შემთხვევაშიც გაზვიადებულად მომეჩვენა.

ოთხი წელი ანანოს ფრთებქვეშ შეეყუყულმა გავატარე, არც საკმელს მაკლებდა და არც სასმელს. თანდათან შემაჩვია, მომაწონა და შემეყვარა პაპაჩემის ძველი, ქვითკირის ორსართულიანი სახლი, რიკულებიანი აივანი, გრილი მარანი, თეთრი თხა, წითელი მამალი თავის პარამხანიანად და ღობის გასწვრივ ჩარიგებული თერთმეტი თუთის ხე. ამ თუთის ხეებს თითქმის ყოველდღე ვთვლიდი, თუმცა ღრმად ვიყავი დარწმუნებული, რომ ერთიც არ დააკლდებოდა. ისიც ვიცოდი, ომამდე მეორე სართულის ყველაზე ნათელი და დიდი ოთახი დათმობილი ჰქონდათ აბრეშუმის ჭიებს, რომლებიც მთელი ზაფხული სულმოუთქმელად ნთქავდნენ ჩვენი თუთის მწვანე ფოთლებს.

მოხუცმა ბოლოს ვიღაც მამაკაცზე ჩამომიგდო საუბარი — მაგარი იყო, კაცთსაკითხავიო... მე მოულოდნელად გავწითლდი და თავი გვერდზე მივაბრუნე. ამ კაცის არსებობა იმ დღეს პირველად არ გამიგია, მაგრამ მაინც ისე ავიღეწე, თითქოს ქურდობაზე წამასწრეს. საქმე ის არის, არ ვიცოდი, ვინ იყო ეს მამაკაცი, რა ურთიერთობა ჰქონდა ანანოსთან: კმრად ერგებოდა, საქმროდ თუ საყვარლად. ანანოს ერთხელაც არ უხსენებია, თითქოს არ არსებობდა, ან თუ არსებობდა, თითქოს სამუდამოდ ჰყავდა მოშორებული და დავიწყებული.

ისე კი, კაცმა რომ თქვას, რად უნდა მცოდნოდა მათი ურთიერთდამოკიდებულება, მე რა მეკითხებოდა, გინდაც საყვა-

რელი ყოფილიყო? რა მაწითლებდა, რისი მრცხვენოდა? ქალი უკვე იმ ასაკს იყო მიღწეული, შეეძლო, როგორც ინებებდა, როგორც მოისურვებდა, ისე, თავის შეხედულებებისამებრ ეცხოვრა....

მაგრამ სოფელი სხვანაირია...

მე მაინც მაწუხებდა გაურკვეველობა, ანდა მეგონა, გაურკვეველობა მაწუხებს-მეთქი. ეტყობა, ქვეცნობიერად ვგრძნობდი, აქ ყველაფერი რიგზე რომ არ იყო და იქნება ამიტომაც ჩემს წარმოდგენაში იზზარებოდა და ირღვეოდა ანანოს ერთიანი სახე, რალაცნაირად იბლალეზოდა კიდევ. მისი ღუმილიც ნიშანდობლივად მეჩვენებოდა.

ერთხელ...

კარგად მახსოვს შემოდგომის ცივი, მაგრამ ნათელი და გამჭვირვალე დილა: ანანოს ჩვეულებისამებრ არ გავუღვიძებია და არც ჩვენი თხის რძე შემოუტანია. ახალგამოდვიძებულს ჯერ გამიკვირდა, მერმე კი გავიფიქრე, — ალბათ საქმე გამოუჩნდა და ასე აღრიანად კოლმეურნეობაში იმიტომ წავიდა-მეთქი. ამავე დროს მთელი არსებით ვგრძნობდი — შინ იყო... თუმცა მისი ჩამიჩუმი არ ისმოდა.

არ ავმდგარვარ. არავის უთქვამს, ადექო და რატომ ავდგებოდი? ვიწეკი და ვნებივრობდი მატყლის საბანში გამოხვეული თუ შეფუთული. სკოლაში წასვლის დრომ რომ მოაღწია, ცოტა არ იყოს, ავფორიაქდი, — ეს რა ხდება-მეთქი მაგრამ ასადგომად თავი მაინც არ შემეწუხებია. კედლისკენ გადავბრუნდი და დილის ნანატრი ძილის გამოცხოვა ვცადე. მერმე კარის გაწეილი ჭრიალი გავიგონე. არ გავნძრეულვარ, თავი მოვიმძინარე: გავყუჩდი და გავიტრუნე. ფეხის ხმით მივხვდი, ანანო ჩემს ოთახში არ შემოსულა, ღია კარიდან მომჩერებოდა. დაძაბულობას დიდხანს ველარ გავუძელი, უცებ წამოვიწიე და ღია კარისკენ შევბრუნდი: იქ მართლა ანანო იდგა, უჩვეულოდ შავი და ბირქუში. არც ხმას იღებდა და არც ინძრეოდა, გაშტერებული მომჩერებოდა. ნამტირალევი თვალები ჰქონდა, დასიებული... ცხვირპირიც შემუშპებოდა.

— რა მოხდა? — ვკითხე შეშინებულმა.

— ადექი — მითხრა თუ მიბრძანა სხვა, უცხო ხმით.

— რა მოხდა?

— მოსახდენი მოხდა! — მიპასუხა და გატრიალდა.

არ ავჩქარებულვარ, ნელ-ნელა ვიცმევდი და კარგახანს ვჭრი-  
ალებდი ოთახში, ფეხს ვითრევდი, იქით გასვლას ვაჭიანუ-  
რებდი, რადგან სინამდვილის გაგების აშკარად მეშინოდა:  
თვალედაჭყეტილი შიში დაჟინებით ჩამცქეროდა სულში და  
მაფორიაქებდა. ფანჯარაში უმიზეზოდ გავიხედე, თუთის ხე-  
ებიც უმიზეზოდ სამჯერ დავთვალე და სამჯერვე თერთმეტი  
აღმოჩნდა. ისიც დავადგინე, რომ სამჯერ თერთმეტი ოცდაცა-  
მეტია, მაგრამ ვერც ამან მომგვარა შვება.

რამდენიც უნდა ამეთრია ფეხი, დიდ ოთახში ბოლოს და  
ბოლოს მაინც მომიწევდა გასვლა. რა მექნ, გავედი. ანანო  
გრძელ მაგიდას უჯდა, როგორც ჩანს, მე მელოდებოდა. ორი-  
ვე ხელი უღონოდ დაეყარა მაგიდაზე და გაქვავებული მიშტე-  
რებოდა კარს, რომლის იქითაც მე ვეგულეობდი.

— გათავდა! — თქვა და ახლა უკვე ცივი და მშრალი თვა-  
ლები მომაპყრო, — ოზო, შენ დიდი ბიჭი ხარ და მინდა იცო-  
დე... გათავდა... ყველაფერი გათავდა. ძალზე მიმიძიმს, მაგრამ  
სხვა გზა არა მაქვს, გეტყვი...

კედელთან ავიტუზე და უცებ ვიგრძენი, როგორღაც დავ-  
მშვიდებულვარ, წელანდელი შიში, შიშისმიერი მღელვარება  
თუ დაძაბულობა სადღაც ჩაწრეტილა ან სულაც გამქრალა.

აშკარად უბედურება დაგეტყდომოდა თავს, მაგრამ რალა-  
ნაირი, ჩემთვის აუხსნელი ალღოთი მივხვდი, ეს უბედურება  
მამაჩემის დაღუპვის გამო არ უნდა ყოფილიყო ჩვენს თავს დამ-  
ტყდარი. აქ სხვა რალაც დატრიალდა და მისი წარმოდგენა ასე  
ნაუცბათეგად მე არ შემეძლო. ალბათ. ამიტომაც დავმშვიდდი  
და დამეუფლა განურჩევლობის უსიამო გრძნობა, თუმცა ეს  
დამშვიდებაცა და განურჩევლობაც მერმე მოჩვენებითი აღ-  
მოჩნდა.

— საბა დაიღუპა! — თქვა მამილამ ბოლოს და ბოლოს.—  
გათავდა ახლა ყველაფერი დაღმა დაეშვება.

— რომელი საბა?! — წამომცდა უცაბედად, მაგრამ იმწამ-  
სვე მივხვდი, რას მეუბნებოდა ანანო. — ჰოო, საბა...

პირველად გავიგონე სახელი იმ კაცისა, რომელიც აქამდე  
ჩემთვის იღუმალებით იყო მოცული და რომლის არსებობას  
ხანდახან გამონაგონისა თუ ლეგენდის სფეროში მოვისროდი.  
ღუმილი საკმაო ხანს გაგრძელდა.

— ცნობა მოვიდა? — ვიკითხე გაუბედავად.

— არა! — მიბასუხა მოკლედ.

— თუ ასეა... იქნებ...

— მე ვიცი, რასაც ვამბობ! — გამაწყვეტინა სიტყვა ანანომ და რატომღაც გაბრაზებულმა შემომიტია, — რა არის ცნობა, ეს ქუჭყიანი, ფარატინა ქალაღი, ამდენი ხალხი მონად რომ უქცევია? რომელი ცნობა შეედრება ჩემს გულსა და გრძნობას? — წამოდგა და მაგიდის გარშემო დაიწყო სიარული ფრთხილად, თითქოს რაღაცას ეპარებოდა. ათიოდე წუთის შემდეგ მომიბრუნდა და თვალეზში ჩამხედა:

— რატომ არ მეკითხები, ვინ იყო საბა-თქო?

ველარ გავუძელი, თვალი ავარიდე. სოფელში გატარებული ოთხი წლის მანძილზე ასეთი მძიმე წუთები არ განმეცადა. ვიდექი კედელთან ატუზული, ყოვლად უმაქნისი და არ ვიცოდი, რა მექნა, როგორ მოვქცეულიყავი. ვინ იყო ეს საბა? მართლაც, ვინ იყო? წარმოდგენა არ მქონდა... ამავე დროს შეკითხვასაც ვერ ვუბედავდი. თვალეზში ჩამხედა თუ არა, მაშინვე ვიგრძენი, ანანო მიხვდა, ამ კაცის არსებობა აღრევე რომ მქონდა გავებული.

— არ მჭეროდა... არც მინდოდა დამეჭვრებინა. — თქვა ანანომ.

მერმე ჩემთვის თვალეზში აღარ ჩაუხედავს, გულხელდაკრეფილი დადიოდა, მაგიდას გარშემო უვლიდა მწუხარედ დაფიქრებული. ნათლად დავინახე, ერთხანს როგორ დამკარგა. შემდეგ ისევ მომნახა.

— ოზო, — უკვე ნაცნობი ხმა გავიგონე, — წელან რომ გითხარი, გათავდა-მეთქი ყველაფერი, უეცარი ტკივილის გამო არ მითქვამს... — ისევ გაჩუმდა და ჩაფიქრდა. მერმე ხმადაბლა განაგრძო, თითქოს ეშინოდა, მისი ნათქვამი ვისმე არ გაეგონა, — საბა დაიღუპა... მე ეს ვიგრძენი და გამეღვიძა... არა, ცხადად დავინახე, როგორ დაეცა, როგორ გატეხა ტყვიამ... ფუი ეტყობა, ვერ შევებრუნე ბედის ბორბალი, ჩემი ბედისწერა ეგა ყოფილა!.. რა კაცი წაიქცა, ღმერთო!.. როგორ გაიმეტე, როგორ გაიმეტე?

სვენებ-სვენებით ლაპარაკობდა, ღრმად სუნთქავდა, თითქოს ჰაერი არ ჰყოფნიდა. მე გულისყურიანი დაძაბულობით ვუსმენდი, თან თვალს არ ვაშორებდი. იქვე აღმოვაჩინე, რომ ანანო ძალიან ლამაზი ქალია, ეშხიანი. ლამაზიცა და ეშხია-

ნიც. შავგვრემანი, ტანადი... სახის ნაკვთები სწორი აქვს და დახვეწილი, თმა ხშირი, შავი და მზინავი, თითქოს ძლივს შესამჩნევი მუქი სილურჯე რომ დაჰკრავს ხოლმე. ჩემთან ამდენ ხანს არასოდეს უსაუბრია და მეტყველებითაც გამაოცა. რომ არ მცოდნოდა, ვერაფრით დავიჯერებდი, თუ ამ ქალს სოფლის გარეთ ფეხი არა ჰქონდა გადგმული... ყოველგვარი კილოკავის გარეშე მეტყველებდა.

საბა ომის დაწყებამდე ორიოდ წლით ადრე გამოჩენილა სოფელში, პირდაპირ თავმჯდომარესთან მისულა და უთქვამს: მუშახელი ხომ არ გჭირდებათ, რასაც დამავალებთ, იმას გაგიკეთებთო. სოფელს მუშახელი რახან სულ მუდამ სჭირდება, თავმჯდომარესაც ეგრევე აუყვანია, — ერთი ვნახოთ. რისი შემძლეცა ხარო... სამ-ოთხ თვეში საბა უკვე ყველასთვის საჭირო კაცი გამხდარა, სადაც კაცი აკლდათ, იქ აგზავნიდნენ. ეგეც მუყაითად შრომობდა და ყველა დავალებას პირნათლად ასრულებდა. უამკაცოდ აქამდე ანკი როგორა ვძლებდითო. — ამბობდნენ თურმე სოფლელები და საბას ერთიანად ემადლიერებოდნენ.

ჩვენს ორდობეში, მეზობელს მდგმურად ერთი დიდო ეყენა თურმე, მალალი, ხმელ-ხმელი. ჯანიანი. მაგარი კალატოზი ყოფილა და მოცლა არა ჰქონია. ისე გაუთქვამს სახელი, სხვა, შორეულ სოფლებიდანაც აკითხავდნენ ხშირად. დიდოც აიკიდებდა თავის გულა-ნაბადს და თვეობით იკარგებოდა. ზაფხულის ერთ მცხუნვარე დღეს ძლივს მოლასლასებულა, გულის კოვზზე ხელს იჭერდა — აქა მტკივაო... კვდებო, — ბოლოს უთქვამს და ტახტზე მკვდარივით დაგდებულა. უმწეონი და სასოწარკვეთილნი დასცქეროდნენ ულონოდ დავარდნილს. დიდო თვალდათვალ სანთელივით ადნებოდათ ხელში. სოფლის ექიმმა რომ ვერაფერი მოუხერხა, მეზობლებს ქალაქიდან დასასვენებლად ჩამოსული პროფესორი მოუყვანიათ, მაგრამ არც იმ განათლებული ქალაქელი ექიმისაგან გამომდნარა რამე სახეირო... ეს კი წუთიწუთ ილეოდა და ილეოდა, სულს თანდათან დაფავდა. ყველას ებრალებოდა, ასე უსაშველოდ რომ ილუპებოდა საწყალი დიდო, — ეგრე კაცის დაკარგვა როგორ იქნება, ნათესავებს მაინც შევატყობინოთო, მაგრამ რა ექნათ, არავინ იცოდა, საიდან იყო აქ გადმოხვეწილი.

— მახსოვს, შაბათი დღე იწურებოდა, — განაგრძობდა ანა-

ნო, — ქათმებს ვაპურებდი. ლობეს ვილაც კაცი მოადგა და მკითხა: ოხერი დიღო სადა ცხოვრობსო? მე ვუთხარი, სადაც ცხოვრობდა. ჯერ ხომ არ მომკვდარაო? — გაიღიმა. არა-მეთქი, — მეც გამეღიმა. ქალო, ის რჯულძალდი დღენიადაგ შენ თუ შემოგცქერის, დასნეულდებოდა, მა, რა ოხრობა მოუვიდოდაო! — გაიცინა გულიანად და ლობეს გაეცალა. მიმავალი სულ უკან იხედებოდა და მიღიმოდა. უცებ გული გადამიქანდა, თან ისეთი ბაგა-ბუგი დამიწყო, ვიფიქრე, სადაც არის, გამისკდება-მეთქი. ეს კაცი მანამდე არ მენახა, არსად შემხვედროდა და მაინც მივხვდი, საბა იყო, სწორედ ის, ამას წინათ სოფელს რომ შემოეხიზნა.

დიდოსთვის რომ დაუხედავს, ამ დღეში როდის ჩავარდიო, — უკითხავს. გუშინწინ არყით გამტყვრალი ტბორს დავეწაფე და ასე მომაქციაო. ან არაყმა მომკლა, ან ტბორის წყალმაო. — უპასუხია დიდოს. არაყი ამას არ გიზამდა, არაყმა სხვაგვარად იცის მოთავებაო. — გაუცინია საბას და ჩაფიქრებულა...

მერმე ისევ ანანო მოუკითხავს, ისევ მოსდგომია ლობეს.

— ქალო, იმ შენს ბებერ მამალს დიდოსათვის ვერ გაიმეტებ? — შეჰკითხვია.

— რამ დააბერა, შარშანწინდელია! — ცოტა არ იყოს, სწყენია ანანოს.

— შარშანწინდელი რომ არის, იმიტომ გეუბნები, ღონიერი მამალია და გული სისხლით ექნება სავსე.

— მარტო მამალი გნებავს, თუ დედალიც გამოვაყოლო?

— დედალი — სხვა დროს, ახლა ეგ მამალი გაიმეტე, ვერა ხედავ, კვდება ეგ რჯულძალდი. — უთქვამს საბას და გაბრუნებულა.

ანანოს ჯერ ჰგონებია — ეს კაცი მეხუმრებაო, მერმე, როცა დარწმუნებულა, მამალი ნამდვილად სჭირდებოდა, უარს როგორ ეტყოდა.

მეზობლებს დაუწიოკებიან ჩვენი ეზო, ძლივს დაუქერიან მამალი და მერმე საბასთვის მიუგვრიათ. საბას ამასობაში ნემსი და ძაფი მოუთადარიგებია, გულგახეთილი მამალი ხელში აუყვანია, ცოტა სული მოუთქმევინებია და ზურგზე ხელი გადაუსვამს, — ამ ურჯულოს უნდა შეეწიროო, კარგი კაციო, მაჟარი ოსტატიო... მერმე ჯიბიდან სამართებელივით მკრელი



დანა ამოუღია, მამალი მიწაზე გულაღმა დაუწვევინია, ფრთები და დეზებიანი ფეხები სხვებისთვის დაუქერინებია.

ცოცხალი მამლისთვის სწრაფად გადაუსხებია მკერდი და გული ამოუკვეთია. სწრაფადვე გაუყრია ძაფი და ჯერ კიდევ მფეთქავი, სისხლსავსე გული დიდოსთვის გადაუყლაპინებია.

ჩაუშვი, ჩაუშვიო, — აძალებდა დიდოს, თან ძაფს ხელს არ უშვებდა თურმე. აბა, ეგენი არ იყოს, რჯულძაღლო, გაუძელიო — უყვიროდა თავზე მდგარი საბა და ახლა უკვე ნერვულად იცინოდა. მერმე რამდენიმე წუთი დაუყოვნებია და ფრთხილად, ძალიან ფრთხილად დაუწყია ძაფის ამოწევა. ისე დაძაბული ყოფილა, ოფლი ათასწევრად ჩამოსდიოდა თურმე.

ბოლოს დიდოს ხორხიდან ამოუღია ძაფზე გამობმული მამლის გული. ყველანი სახტად დარჩენილან: მამლის სისხლიან გულზე კარგა მოზრდილი, მოშავო-მოწითალო წურბელა ეკიდა თურმე...

ეგეც ეგრეო — უთქვამს საბას, წურბელა მიწაზე დაუნარცხებია და ოფლიანი შუბლი მკლავით მოუწმენდია.

— ახლა ემაგ მამლის ჩიხირთმა მოუხარშეთ ამ უბედურს, ზედაც თუ ერთ ჭიქა საფერავს დააყოლებინებთ, ამას მეტი არა უნდა რა — საბას მხარზე ხელი დაუტყაპუნებია დიდოსთვის და წასულა.

— კაცო, ეგ რა გამოვიდა, დაიცა, შე მამაცხონებულო, ცოტა წავიხემსოთ, პური ეჭამოთ — შეხვეწნია მასპინძელი.

საბას არ მოუცდია:

— მაგ მამლის მოხარშვას თუ ვუცადე, დილამდე აქ მომიწევს ყოფნა.

— ხელი მაინც დაიბანე, კაცო! — შინ იტყუებდნენ საბას.

— ხელეები სუფთა მაქვს! — ორივე ხელი მალლა აუწევია და ყველასათვის დაუნახვევია. მერმე კვლავ მოსდგომია ჩვენს ღობეს და ანანოსთვის ღიმილით უთქვამს, — ხვალ დილით წითელსავე მამალს ამოგიყვან... ისეთი იქნება რომ... უსათუოდ!

ანანო ისევ გულხელდაკრეფილი დადიოდა ოთახში. ეტყობა, სათქმელი ბევრი ჰქონდა, მაგრამ ფრთხილობდა, თითქოს სიტყვებს საგანგებოდ მირჩევდა. მე შევამჩნიე, რომ ჩემს ასაკს უწევდა ანგარიშს: ცდილობდა, გასაგებად ეამბნა, თანაც საზღვარი არ გადაელახა, ისეთი რამ არ დასცდენოდა, რის გაგო-

ნებაც ჩემთვის ჯერ კიდევ ნაადრევი იქნებოდა. მე კი თექვსმეტი წლის ბიჭი ვიყავი, უფრო ზუსტად: რამდენიმე თვის წინ მეჩვიდმეტეში გადავდექი და დამეჭითებით შემეძლო მეთქვა: თექვსმეტი-ჩვიდმეტი წლისამ (გაცილებით უმცროსმა) უფრო მეტი იცის, ვიდრე უფროსებს ჰგონიათ. მათ ხშირად ავიწყლებათ თავიანთი ბავშვობაცა და ყმაწვილკაცობაც. მიამიტურად არიან დარწმუნებულნი, — მთავარი ცოდნა და გამოცდილება შემდეგ შევიძინეთ, ბავშვობა და სიჭაბუკე უკან რომ მოვიტოვეთ.

ასე ვფიქრობდი, თან გულისყურით ვუსმენდი ანანოს.

მეორე დღეს მართლა მოსულა საბა. ხმამაღლა გაუცინია და დიდი, წითელი მამალი ლობეზე გადმოუფრენია... ჩემი გუმანი გამართლდა: იმ მამლს თვითონაც შემოჰყოლია. ალბათ, მართლ დღისით კი არა, სხვა დროსაც მოდიოდა ხოლმე. ჯერისწერა, როგორც ანანო ამბობდა, ვერ მოუსწრიათ, რადგან ომი დაწყებულა... ბოლოს სიტყვები თავის მართლებას მივამსგავსე და იქნებ ამიტომაც გავიფიქრე, მხოლოდ ჩემს გასაგონად არის-მეთქი ნათქვამი და არა სინანულისმიერი ტკივილის გასამხელად...

ფეხზე დგომით ჩამოვწყდი. იქვე ვიდექი კედელთან ატუზული და საბას მიერ უცნაურად გადარჩენილ დიდოზე ვფიქრობდი: ეს ამბავი სინამდვილეს ჰგავდა კიდევ და არცა ჰგავდა, მჯეროდა და არცა მჯეროდა. დამაფიქრა თვით საბამაც, რომელიც თითქოს მომწონდა და არც მომწონდა, თავისი ხმამაღალი სიცილით როგორღაც მალიზიანებდა. ყველაზე მეტად მაინც ანანომ შემაფიქრია. უხმოდ ვადევნებდი თვალს მის ყოველ მოძრაობას, გაფაციცებით ყურს ვუგდებდი ლაპარაკს, მინდოდა, როგორმე გამეგო ან ამომეცნო: რა მოხდა? რატომ ირწმუნა ასე მტკიცედ რაღაც აბსურდული სიზმარი და მოკლა საყვარელი ადამიანი? რატომ გადაწყურა ბოლომდე წყალი და გამორიცხა საბას გადარჩენის თუნდაც პაწაწინა შესაძლებლობა? და, რაც მთავარია, რატომ გათავდა ყველაფერი? და კიდევ ათიათასი: რატომ?.. რატომ?.. რატომ?..

ანანო რომ ამდენს მესაუბრებოდა საბაზე, მე მაინც ვერ ვხედავდი საბას, ვერ წარმოვიდგინე, როგორი იყო თუნდაც გარეგნულად. ეს კი თითქოს ხელს მიშლიდა, რომ დამეჭერებინა ამ კაცის რეალურად არსებობა...

— როგორი იყო საბა? — ვკითხე უცებ, ჩემთვისაც თითქოს მოულოდნელად.

ანანომ გაკვირვებით შემომხედა, მერმე თავისთვის გაიღიმა. ხმა არ ამოუღია.

— გარეგნულად. — დავაზუსტე. ანანო მომიახლოვდა, მხარზე ხელი მომხვია და ფანჯარასთან მიმიყვანა.

ფანჯრიდან ეზოს უკანა, საბძლიანი ნაწილი მოჩანდა. წნელი ღობის იქით ბოსტანი იყო, ბოსტნის იქით კი — ვენახი. საბძლის წინ ნაკელში ქათმები იქექებოდნენ, ხოლო წნელის ღობეზე შეფრენილი მამალი ზემოდან დასცქეროდა თავის სამფლობელოს.

მამალს კარგად დავაკვირდი, რადგან წელანვე მივხვდი, სწორედ ის წითელი მამალი გახლდათ, საბამ დიდოსთვის შეწირული მამლის სანაცვლოდ რომ მოიყვანა. უცებ მომეჩვენა, მამალი მოუსვენრად წრიალებდა, რალაცნაირ შეშფოთებულ ხმებს გამოსცემდა, თან თვალი სულ ცისკენ გაუბოლდა, თითქოს ქორი დაინახა და ახლა „მრევლს“ აფრთხილებდა, — არიქა, თავს უშველეთ, ციდან საფრთხე გემუქრებათო.

ანანომ რატომღაც ფანჯარა გამოაღო. მამალს ჩვენთვის ყურადღება არ მოუქცევია, ფრთა ფრთას შემოჰკრა და საკმაოდ მაღალ საბძელზე ისე იოლად, ძალდაუტანებლად აფრინდა, გუნებაში კინაღამ გამეცინა, — ეს რა მფრინავი მამალი გვყოლია და არ ვიცოდი-მეთქი. მამალმა ახლა საბძლიდან გადმოხედა სამყაროს. მერმე „ყელი მოიღერა“, დასაყვივლებლად წაიგრძელა კისერი, მაგრამ ყივილის ნაცვლად უცნაური ხმა ამოუშვა, გაბზარული, ხრიალისა თუ ხროტინის მსგავსი, თითქოს უეცრად სული აღმოხდა არა მარტო მამალს, არამედ იქაურობასაც...

უცებ თვალნათლივ დავინახე, წითელმა მამალმა როგორ იცვალა ფერი და გაოცებულმა ანანოს მივხედე: ნაღვლიანად დაფიქრებული ანანო მიწას დასცქეროდა. მე ისევ მამალს მივაპყარი მხერა, თვალებს არ დავუჭერე: საბძლის სახურავზე წითლის ნაცვლად ყორანივით შავი მამალი შემართულიყო... და ვიდრე მე გაოცების სიტყვა წამომცდებოდა, მამალმა კიდევ ერთხელ შემოჰკრა ტკაცანით ფრთა ფრთას და... გაფრინდა. სწრაფად გადაევლო ბოსტანს, ვენახს, ვენახს ქვემოთ ალვის ხეებს და გაუჩინარდა.

— ასეც ვიცოდი! — თქვა ანანომ.

მე ვერ გავიგე, რას ნიშნავდა ანანოს სიტყვები, არც მიცდია გაგება, გაოცებული მივჩერებოდი ალვის ხეთა შორეულ წვეროკინებს, რომლის მიღმაც გადაიკარგა თუ დაინთქა შავი ფრინველი.

გარედან მონაბერმა სუსხმა თავი მაგრძნობინა და ფანჯარა მიმახურინა.

— ომი უკვე მალე დამთავრდება და მამაშენიც დაგვიბრუნდება. შეიძლება, ცოტა დააგვიანდეს, დაბრუნებით კი უსათუოდ დაბრუნდება. — ანანო უცნაურად დამშვიდებული მესაუბრებოდა, თითქოს მისთვის ყველაფერი საბოლოოდ გადაწყვეტილი ან სულერთი იყო. ჩვენ ისევ ფანჯარასთან ვიდექით, მხარზე ისევ ვგრძნობდი მის ფრთხილსა და ცივ ხელს და უხმოდ ვუსმენდი. — დაბრუნდება და წაგიყვანს. რა თქმა უნდა, წაგიყვანს, აბა, აქ ხომ არ დაგტოვებს? შენ იმ დროისთვის სკოლა გექნება დამთავრებული და სწავლის გაგრძელებასაც მოინდომებ... ეს კარგია, ოზო, სხვაგვარად როგორ იქნება, უნდა ისწავლო... მე კი აქ მარტო დავრჩები... შენ არ გეგონოს, მარტო დარჩენისა მეშინოდეს, არა, მე და ჩემმა ღმერთმა! არც მშინებია არასოდეს... ოღონდ... დაიხსომე... დიდი ხნის სიცოცხლე აღარ მიწერია, დიდხანს აღარ ვიცოცხლებ! აღარ თუ ვეღარ... ეგეც არ ვიცი, როგორ ვთქვა, თუმცა რა, სულერთი არ არის, როგორ ვიტყვი?! ოზო, კარგად დაიხსომე: მე რომ მოკვდები, სწორედ წლისთავზე ჩემი ძმა სანდრო, მამაშენი გაყიდის ამ სახლს, კარმიდამოს, ყველაფერს, რაც ჩვენს გვარსა და ჭილაგს, ჩვენს მამა-პაპათ უშენებიათ, უშენებიათ წმინდა ოფლითა და მართალი ხელით. წინ ვერავინ აღუდგება, ვერავინ დაარწმუნებს, რომ ამ სახლის გაყიდვა, ამ ბუდის მოშლა არ შეიძლება... არ შეიძლება... არ შეიძლება, აქ სხვები მოვლენ, აქაურობას სხვები დაეპატრონებიან!.. თუმცა შენ ერთხელ კიდევ ჩამოხვალ, ჩამოხვალ მამაშენთან ერთად, როცა მე ამქვეყნიდან აბარგებული ვიქნები... ჩემს დასამარხად ჩამობრძანდები, ოზო, ეგეც საქმეა... მაგისთვისაც მადლობელს დაგვრჩები...

ანანოს გრძელ, ამავე დროს შემაზრზენ მონოლოგს ისეთივე სიმშვიდით ვუსმენდი, როგორითაც ის წარმოსთქვამდა. თუმცა მისი ცივი და მთრთოლვარე ხელი, რომელიც ისევ მხარ-

ზე მქონდა მოხვეული, უნებურად მაგრძნობინებდა, რომ ამ სიმშვიდით დიდ ტკივილსა და მღელვარებას ნიღბავდა. მიუხედავად ამისა, მე ანანოს შინაგანად ერთგვარ წინააღმდეგობას ვუწევდი, არ ვუჭერებდი, მამაჩემი ომიდან რომ დაბრუნდებოდა, რატომღაც არც მე მეპარებოდა ეჭვი, მაგრამ ანანოს თავის თავისადმი გამოტანილი განაჩენი ნაადრევი სიკვდილისა ვერ ვირწმუნე. რას უნდა მოესწრაფა ასე უცებ სიცოცხლე, რა უნდა შეეყოფა თუ დამართოდა ასეთი? ბოლოს და ბოლოს, თავს ხომ არ მოიკლავდა? რახან ანანოს სიკვდილი ღრმა სიბერემდე გადაუვებად, ამ სახლის გაყიდვა და ფუძის მოშლა თავისთავად უკვე გულისამაჩუყებელ სისულელედ მომეჩვენა.

2

როდესაც ანანო ოთახიდან გავიდა, მივხვდი, არც ისეთი მშვიდი და უზრუნველი დამტოვა, როგორც მეგონა. შემომჩინდა მოულოდნელი, თანაც უცნაური გრძნობა, რომლის გახსენებაზე მერმეც უხერხულად ვიშმუშნებოდი და ვცდილობდი, მისთვის სხვაგვარი ახსნა მომენახა. ღრმად ვიყავი დარწმუნებული, ანანოს მხოლოდ ერთი სადარდებელი და ერთი საზრუნავი ჰქონდა. ის, ვისი დარდიც აწუხებდა და დღენიადავ მოსვენებას უკარგავდა, ვფიქრობდი, — მამაჩემია-მეთქი, ხოლო უმთავრეს ზრუნვის საგნად, რა თქმა უნდა, ჩემ თავსა ვთვლიდი. მაგრამ უცებ სრულიად გაუთვალისწინებელი „მეტოქე“ აღმოვაჩინე — საბა, ანანოს უპირველესი სატკივარი, მისი წუხილისა და დარდის მიზეზთა მიზეზი, რომლის იქით ყველაფერი თავდებოდა, მზე თავდაღმა ეშვებოდა. ამ აღმოჩენის შემდეგ მე და მამაჩემმა ჩვეულებრივად უკანა რიგში ამოვყავით თავი, რამაც ერთგვარად შემაკრთო და შემაცბუნა, თითქოს ვიღაც წლების მანძილზე მატყუებდა, თითქოს ჩემ წილსა და კუთვნილ, ღვთისაგან ნაბოძებ ულუფას ჩემგან დაფარულად სხვას უნაწილებდა. გუმანით ყოველთვის ვგრძნობდი უცხო და უცნობი მესამე სულდგმულის არსებობას, მაგრამ მას თუ ასეთი ფასი ედო და ასეთი მნიშვნელობა ენიჭებოდა, ვერაფრით წარმოვიდგენდი.

ზოგი რამ, რაც მანამდე ცნობიერების ბურუსში მყუდროდ

განისვენებდა და ამიტომ არც მაწუხებდა, ახლა თანდათან გამოიკვეთა.

ომის წლებში სოფელმა კვლავ გაიხსენა მივიწყებული თუ გაუქმებული საეკლესიო-საკულტო დღესასწაულები: გაჭირვებაში ჩავარდნილი ცხოველი, გარეული იქნება თუ შინაური, საშველად ადამიანს აკითხავს ხოლმე, გაჭირვებული ადამიანი კი — ღმერთს.

ამ ზაფხულის მიწურულს, მარიამობაზე, ჩვენი სოფლის ეკლესიის გალავანშიც და გალავნის გარეთაც ტევა აღარ იყო — ათასი ჯურის ხალხი ირეოდა, უმეტესად — ქალები და ბავშვები. მაინც დედაკაცები ჭარბობდნენ საგრძნობლად. შიგადაშიგ, რა თქმა უნდა, მამაკაცებიც ვერივნენ: მოხუცებულები, ხანდაზმულები, იშვიათად — ომგადახდილები. ზოგს ბრძოლის ველზე ფეხი დაეტოვებინა, ზოგს კი — ხელი, ზოგს გარეგნულად ვერაფერს შეატყობდი, მაგრამ საომრად, როგორც ჩანს, აღარ გამოდგებოდა, და მაინც სამხედრო ტანსაცმელს ვერა და ვერ შელეოდა. ერთად თავშეყრილ ამდენ ხალხს პირველად ვხედავდი და ძალაუნებურად ყველაფერს ხარბად ვაკვირდებოდი. იმ დღეს პირველად შევნიშნე, რომ ქალები მამაკაცებზე უფრო მხნედ, იმედიანად გამოიყურებოდნენ, მათი საქმიანობაც უფრო ენერგიული იყო, მიზანსწრაფული. მამაკაცები კი, ისეთი უმწეონი ჩანდნენ, თითქოს ქვეყნად საშველს ვერ ხედავდნენ და თუ ხედავდნენ, ხსნად და იმედად ისევ ქალები მიაჩნდათ. თვალებში შესცივინებდნენ და ყოველ მათ სიტყვას უხმოდ ემორჩილებოდნენ, აკეთებდნენ იმას, რასაც ისინი ავალებდნენ.

ხალხი მეზობელ სოფლებიდანაც მოზღვავებულიყო, მაგრამ ეკლესიის ეზოში ერთიანი თუ საერთო სუფრა იშლებოდა. ხალხი ემატებოდა და სუფრაც იზრდებოდა, სულ ცოტაც და ეკლესია პურ-მარილის ალყაში მოექცეოდა. პურ-მარილს სიღარიბის ელფერი დაჰკრავდა (პური, ლობიო, მწვანილი, შიგადაშიგ მწნილიც), თუმცა ამ ნაკლს ღვინის სიუხვე აბათილებდა. ანანომაც დადგა თავისი. წილი ხელადა და ქად-პურებიც დაყარა.

დიდიან-პატარიანად სვამდნენ ომში წასულების სადღეგრძელოებს, სანთლებს ანთებდნენ და ღმერთს მტრის დამარცხებასა და თავისიანების შინ მშვიდობით, გამარჯვებით დაბრუ-

ნებას ევედრებოდნენ. ეს იყო მწუხარე ზეიმი, სადაც ეკლესიის ყრუ და შებოლილ კედელზე მისრესილ სანთელივით ბუტბუტავდა ომში წასულთა შინდაბრუნების იმედი.

— წავალ, მამეშენს დაუენთებ სანთელს, — მითხრა ანანომ და წავიდა.

თვალი გავაყოლე. ანანო ხალხს შეერია და დამეკარგა. ცხელოდა. მზის მცხუნვარება და ხალხის გაბმული, გაუთავებელი ზუზუნის თავბრუს მახვევდა, ოფლის სუნი და მტვრის ბული კი გულს მირევდა. ოფლიანი ტანსაცმელი სხეულზე მეკრობოდა და სიგიჟემდე მინდოდა, სველი პერანგიდან როგორმე ამოვმძვრალიყავი.

ანანოს ისევ მოვკარი თვალი: ეკლესიიდან გამოვიდა და ხალხის დინებას გაჰყვა. მერმე შეჩერდა ეკლესიის ნიშთან, სადაც უამრავი სანთელი ენთო და კედელი აღისაგან მთლიანად იყო შეჭვარტლული. გარკვევით დავინახე, როგორ მოუქიდა ოლი და ცერათითით როგორ მიამაგრა კედელს სანთელი. მომეჩვენა, რაღაცას ბუტბუტებდა კიდევ. რატომღაც მეგონა, სანთლის დანთების ცერემონიალი ამით დამთავრდებოდა, მაგრამ ანანომ მეორე სანთელიც აანთო და ისიც ბოლოთი მიაგლისა კედელს. მერმე ორივე მუხლზე დაიჩოქა, ხელისგულები ერთმანეთს მკერდთან შეაწება და თავი დახარა. ასე დაჩოქილი იდგა კარგა ხანს. მაშინ ეჭვმა გამკრა გულში, ახლა კი ეჭვიც არ მეპარება: ის სანთელი, რომლის წინაშეც ანანომ დაიჩოქა, მამაჩემისთვის არ იყო განკუთვნილი, ჩემთვის — მით უმეტეს, მე რა მჭირდა სანთლის დასანთები და მუხლჩოქვით სავედრებელი?!

ოთახში მარტო დარჩენილს ეს ყველაფერი უნებურად გამახსენდა. უბრალო გახსენებაც დამთრგუნველად მაწვებოდა გულზე. იქნებ სჯობდა, ამ უსარგებლო ფიქრებისა და ვარაუდებისათვის ხელი ამექნია და იქაურობას დროებით მაინც გავცლოდი? რა მინდოდა, რას ვეძებდი, რას ვჩხრეკდი? რას ვფათურობდი სხვის გულში, რატომ ვიჭრებოდი სხვის ცხოვრებაში, რომლისაც არაფერი გამეგებოდა?

— ანანო! — დავუძახე ხმამალა.

პასუხს დაველოდე. სათქმელი მზად მქონდა, — დაგვიანებას რა უშავს, სკოლაში წავალ-მეთქი... ანანოს ხმა რომ ვერ გავიგონე, ჩავიცვი ჩემი ძველი, დაპატარავებული პალტო და

კარი გავიხურე. თავიდანვე სკოლაში წასვლა არც მიფიქრია, მაგრამ ეზოში გასული მივხვდი, რომ არც ორღობებში უმიზნოდ ხეტილს ჰქონდა აზრი. შემოდგომის სუსხიანი დილა იყო და გარეთ გვარიანად ციოდა. რა მექნა, ისევ სკოლისკენ გავეშურე, — მივალ, ამხანაგებს შევხვდები, გულს გადავაყოლებ-მეთქი.

ასეც მოვიქეცი.

მეორე გაკვეთილის დამთავრებას რაღაც წუთები აკლდა. შენობაში შევედი და საკლასო ოთახის წინ, დერეფანში ვცემდი ბოლთას. აქაც ციოდა, ეს სიცივე უფრო უსიამოვნო იყო, ვიდრე გარეთ. ჩამსხვრეულ მინებიდან შემოჰკრილი ორპირი ქარი ყოველი მხრიდან გიტევდა, ძვალსა და რბილში დაუკითხავად გადი-გამოდოდა. უცებ სასწავლო ნაწილის გამგის ხმა გავიგონე:

— სანდროს ბიჭო, ერთი წუთით მოდი აქ! — მომიხმო.

ვიფიქრე, დაგვიანებას მისაყვედურებს-მეთქი, ან იმას მაინც მეტყვის, — აქ რას აყუდებულხარ, რატომ კლასში არ შედიხარო. მივეახლე, მორცხვად ავიწურე, ვითომ, ვიცი, რომ დამნაშავე ვარ და სინდისიც მქენჯნის-მეთქი. სულაც არ მჭირდებოდა თავის მოკატუნება, რადგან მარო მასწავლებელი (ასე მივმართავდით სასწავლო ნაწილის გამგეს) ყოველთვის მმფარველობდა, როგორც მეზობელი და მამაჩემის ბავშვობის მეგობარი (თვითონვე ამბობდა, — ბავშვობის მეგობრები ვიყავით).

— ოზო, — მითხრა მასწავლებელმა, — კარიაულის ქვრივთან გადადი და უთხარი: ახლავე წამოდი, დირექტორი გიბარებს-თქო. შინ თუ არ დაგხვდა, კარიაულებთან ახვალ, იქ იქნება.

— სად ცხოვრობენ, რომ არ ვიცი, კარიაულები.

— ეკლესიის მარჯვნივ, ფერდობს რომ გადაივლი, გალავნიანი აგურის სახლი ხომ გინახავს?.. იქა.

ვერ გავიხსენე ეკლესიის მარჯვნივ, ფერდობს გადაღმა მდგარი გალავნიანი აგურის სახლი. კარგად არც ის ვიცოდი, გინ იყვნენ კარიაულები, თუმცა მათ შესახებ ბევრი რამ მსმენოდა.

ჩბებში ხელებჩაწყობილი მორჩილად წავედი დავალების შესასრულებლად. გულში ვიმედოვნებდი, შეიძლება, კარიაუ-



ლების სახლის ძებნა არც დამპირდეს-მეთქი, რადგან მეგონა, ქერივი შინ დამხვდებოდა, მაგრამ მოეტყუვდი, და ახლა ეკლესიისკენ ავუყევი მოსაწყენ აღმართს...

ოდრო-ოდრო გზით მივდივარ, აქეთ უფრო მძაფრად უბერავს სუსხიანი ქარი. კაცის ჰაქანება არ არის. ყველა შინ შეყუყულა, შემალულა და ჩათბუნებულა.

მოზუზული მიყვები აღმართს და კარიაულის ქერივზე ვფიქრობ. ვფიქრობ იმიტომ, რომ თავში უცნაურმა აზრმა გამიელვა... უცნაურმა, მაგრამ შესაძლო პარალელმა. კარიაულის ქერივი, რომელიც ამ ორიოდ წლის წინ გეოგრაფიას მასწავლიდა, ერთი კრუხივით დაღეული ქალია, შავი, უშნო და კაპასი, თითქოს იმთავითვე შინაბერად განწირული, მით უმეტეს, ამ უმამაკაცობის უამს, როცა სოფლის უმშვენიერესი და უტურფესი მადონებიც კი ვერ ბედავდნენ გათხოვებაზე ოცნებას.

ერთ დღეს, მიხო კარიაულის დაღუპვის ამბავი რომ მოვიდა, ამ ქალმა ყოველდღიური ტანსაცმელი გაიხადა, ძაძები ჩაიკვა და ისე იგლოვა, ვითომ საქმრო თუ ქმარი დამელუპაო. სოფელმა კი იცოდა, მიხო კარიაულს ვიღაც სხვა გოგო უყვარდა, სხვა სოფლის მკვიდრი. ამბობდნენ, — ომი რომ არა, შემოდგომით ქორწილსაც აპირებდაო. ღიმილით იმასაც დასძენდნენ ხოლმე, — გეოგრაფიის მასწავლებელი თავის დროზე რომ გათხოვილიყო, ალბათ მიხოს ტოლი შვილი ეყოლებოდაო. სოფელი, რა თქმა უნდა, აჭარბებდა, სოფელმა იცის გადაჭარბებაცა და ხუმრობაც, ზოგჯერ — ავი, ზოგჯერ — კეთილი.

გეოგრაფიის მასწავლებელი კი მთელი არსებით, ჭიუტი სიწრფელით გლოვობდა ქმრისა თუ საქმროს დაღუპვას. როგორც ჩანს, თავისი თავი ღრმად დაარწმუნა, — მიხო კარიაულის ცოლი თუ საცოლე ვარო და არა მარტო თავისი თავი, ბოლოს და ბოლოს, სხვებიც დააჯერა. ახლა მთელი სოფელი ისე ეპყრობოდა, როგორც ადრე თუ უდროოდ დაქვრივებულს, თანაც ყველა განსაკუთრებულ პატივსა სცემდა ერთგულებისა და პატიოსნებისათვის იმდენად, რომ მისი ნამდვილი სახელი დაივიწყეს და „კარიაულის ქერივად“ მონათლეს.

მიხოს მშობლებსაც დაუჯერებიათ მისი ერთგულება და თავდადება, სახლის კარი ფართოდ გაუღიათ და გეოგრაფიის

მასწავლებელიც ალბათ უკვე მათთან დასახლდა, ალბათ მათი ოჯახის განუყოფელ ნაწილად, ჭირისა და ლხინის მოზიარედ ითვლება. თურმე მიხოს მშობლებს ისიც კი უთქვამთ, — ჩვენს ვაჟს მხოლოდ ასეთი განათლებული, ქვეიანი და თვინიერი ქალი შეეფერებოდა, ბედის უკულმართობას რა ვუთხრათ, თორემ ჩვენი მიხო უკეთესს ვერც ინატრებდაო. რა თქმა უნდა, არ ღირს ახლა იმაზე ლაპარაკი, მიხო მშვიდობით რომ დაბრუნებულიყო, რას ინატრებდა და რას — არა..

ვაითუ, ანანოსაც კარიაულის ქვრივობა დაუპირებია და ის საბა თვითონვე გამოიგონა-მეთქი, — გავივლე გუნებაში, მაგრამ მაშინვე მოვიშორე უსიამოვნო ფიქრი, რადგან ქვეშეცნეულად არ მომწონდა და მალიზიანებდა ჩემი მასწავლებლის მიერ არჩეული ბედი, ცხოვრების გასაველელი გზა — სიცოცხლის დასასრულამდე თვითგვემით აღბეჭდილი. ასეთი ცხოვრებისათვის ანანო არ მემეტებოდა... თუმცა არა ვარ მართალი, მე მიმაჩნდა, რომ მას არ ჰქონდა ისეთი ცხოვრების უფლება, რადგან ქვეყანაზე ჯერ კიდევ არსებობდა მისი ძმა, ანუ მამაჩემი და, რაც მთავარია, ვარსებობდი მე, რომელიც... უკვე მეჩვიდმეტე წელში ვიყავი გადამღვარი და ჩემი ქარაფშუტული ეგოისტობის გამო გაფიქრებაც კი არ მინდოდა, რომ ანანოს ჩემს გარდა სხვა საზრუნავი და საწუხარი გააჩნდა.

ბოლოს და ბოლოს, ავითავე აღმართი და ეკლესიის მახლობლად აღმოვჩნდი. იქვე, ჩამონგრეული გალავნის ოდნავ ზევით ძველი, გაუქმებული სასაფლაოა, უწესრიგოდ გაფანტულა ცივი და ნაცრისფერი საფლავის ქვები. ტიტველი ფერდობი ტყიანი გორაკებით მთავრდება. ახლა მარჯვნივ უნდა გავუხვიო, ჩემი ვარაუდით, იმ პატარა ბორცვსაც გადავივლი და კარიაულების გალავნიან სახლსაც მივადგები... ბორცვზე ეშული ხე გატოტილა, მე მგონი, მუხაა.

ბორცვიდან მართლაც დავინახე სოფელს მოშორებული სახლი და გამიკვირდა, აქამდე რომ არ მქონდა შენიშნული. ჩქარი ნაბიჯით დავეშვი და კიდევ კარგა ხანს ვიარე, ვიდრე გალავანს მივადგებოდი. გალავანი რიყის ღიდი ლოდებით იყო ნაგები, შიგადაშიგ გათლილი ქვებით ჩაეყოლებინათ. ზოგიერთ მათგანს საფლავის გაცრეცილი წარწერა შემოენახა, ცალკეული სიტყვებით კი იკითხებოდა.

გალავანი მაღალი და მნიშვნელოვანი მეჩვენა, გინდოდა,

თუ არ გინდოდა, ყურადღებას მიგაქცევინებდა. ციხე-სიმაგრეს ჰგავდა, იდუმალებით მოცულის შთაბეჭდილებას ტოვებდა და ერთგვარი რიდით გამსჭვალავდა. მიუხედავად იმისა, რომ გალავნის კარი ღია დამხვდა, მაინც შეეყოვნდი, მერმე მცირე ყოყმანის შემდეგ, ეს უნებური კრძალულება გადავლახე, — რისი მერიდება, ჩემით ხომ არ მოვსულვარ, დამავალეს და ამიტომ მოვედი-მეთქი. სახლიც გალავნის შესაფერი აღმოჩნდა — ორსართულიანი, მაგრამ უზარმაზარი. ჩვენც ორსართულიანი სახლი გვედგა ვითომი ამასთან ქობალ მოგეჩვენებოდათ.

ეზოში მივიხედ-მოვიხედე, ძალი არ მეცეს-მეთქი. ასეთი სახლი უნაგზოდ ძნელი წარმოსადგენი იყო, თუმცა სოფლად მაშინ ძალს იშვიათად შეეფეთებოდი, რადგან ხალხს თავიკ ძლივს გაჰქონდა. ეზო სწრაფად გადავქერი, კიბეც ავირბინე (ნაგაზის მაინც მეშინოდა) და კარზე დავაკაყუნე. მივაყურე. მერმე ისევ ვურტყი მოკაკეული საჩვენებელი თითი კარს.

— რომელი ხარ?! — გავიგონე მამაკაცის მკაცრი ხმა. შეკითხვა ისეთი კატეგორიული იყო, თუ არ ავეხსნიდი, ვინ ვიყავი და რისთვის ვაკაკუნებდი, ალბათ კარს არც გამიღებდნენ; მასწავლებელი მინდა-მეთქი, — წავილულულდე.

— ვინა?!

— სკოლიდან გამომგზავნეს... პატივცემული მასწავლებელი მინდა...

მაინცდამაინც დიდხანს არ დამჭირვებია ლოდინი, კარიაულის ქვრივმა გამიღო კარი: ტანსაცმლიანად შავი იყო და დაღეული. არაფერი უკითხავს, სევდიანი თვალებით შემომხედა და ძლივსშესამჩნევი ღიმილით თითქოს გაკვირვება გამოხატა. რაკი კარი გამიღეს, მეგონა, შინაც მეპატიეებიან-მეთქი და შევედი, უფრო კი სითბომ შემიტყუა. გოაცებისაგან პირი დავადლე: კარიაულები... არა წითური დევები საუზმობდნენ, ყოველ შემთხვევაში — დევების პირდაპირი შთამომავლები მაინც. შუა დარბაზში, დიდ, ოთხკუთხედ მაგიდას უსხდნენ: მამა, დედა, ორი გასათხოვარი ქალიშვილი. ქალიშვილები ტყუპისცალებივით ჰგავდნენ ერთმანეთს, შესაძლებელია, ტყუპებიც იყვნენ. ოთხივენი დაქადავდნენ, ჯანმრთელად ჰყვოდნენ, ჩემი ყოფილი მასწავლებელი მათ ფონზე დამქნარ ფოთოლივით გამოიყურებოდა. შუა მაგიდაზე ლანგრით მორთმეული

მონარშული ტახის ეშვებიანი თავი იღო. ღორს გრძელი დინგი ორლულიანი თოფივით მიეშვირა ქერისთვის. ეტყობა, ეს-ეს არის ქვაბიდან ამოელოთ, ოხშვიარი ასდიოდა. ასევე ოხში-ვრიანი სპილენძის ქვაბი ჯერ კიდევ იდგა აბრიალებულ ბუხრის წინ...

ცოლ-ქმარი კარიაულები ისე მტრულად თუ უნდობლად შემომყურებდნენ, მივხვდი, ღირეზე ფეხი არ უნდა გადმო-მეღგა.

— ვინ არის? — იკითხა მამა კარიაულმა და ბანჯგელიან წითურ პირისახეზე მოისვა ხელი.

— ჩემი მოწაფეა. — უპასუხა ქვრივმა უაღრესი მოკრძალებით.

— აქ როგორ შემოვიდა?

— არ ვიცი...

— ეე, კუანავ, აქ როგორ შემოხვედი? — ახლა მე მომიბრუნდა მამა კარიაული, — გალავანზე გადმოფრინდი? ფრთებს რო ვერა ვხედავ?!

წითურმა დევის ქალებმა დაურიდებლად ჩაიხითხითეს. მე უცებ მომედო სახეზე ალმური და ერთიანად ავილეწე.

— დაჩუმიდით, თქვე მამაძაღლებო! — შეუტია მამამ ქალიშვილებს, — თქვენც კარგები მყევხართ, მე და ჩემმა ღმერთმა!

დევის ქალებმა ბედით კმაყოფილ ანგელოსებივით დაიმორცხვეს, თავებიც კი დახარეს, თუმცა ქვეშ-ქვეშ თითონ ორსამჯერ მაინც გამომხედა.

— ქალო, აკი გითხარ, გალავნის კარს ღიად ნუ ტოვებ-მეთქი!

— მაპატიეთ, ბატონო მამა! — კარიაულის ქვრივი სულ დაპატარავდა და გაიცრიცა.

უკვე ნათელი გახდა დევეების გულისწყრომა, მე მაინცდამაინც არ მერჩოდნენ, რომელი შარავზის ყაჩაღი მე მნახეს! მთავარი იყო: ვინ დატოვა გალავნის კარი ღია...

— ღირექტორი გიბარებთ, პატივცემულ მოსწავლებლო! — სხაპასხუპით მივაყარე, ქვრივის საცოდაობასა და ჩემს უმწეობას ველარ გავუძელი და გიყივით გავვარდი გარეთ. ორი ნახტომით ჩავათავე კიბე, მთელი ძალით მოვკურცხლე ჭიშკრისაკენ.

მხოლოდ ბორცვიდან მოვხედე კარიაულების სახლს. ერთ-  
ხანს ასე დავეკეროდი, მერმე თავი პალტოს საყელოში ჩავრ-  
გე და მუხის ძირას, ჯერ კიდევ მწვანე ბალახზე დავკეპი. ორი-  
ვე მკლავი მუხლებზე დავასვენე. სიმართლე რომ ვთქვა, ახლა  
გაოცებული უფრო ვიყავი, ვიდრე შეურაცხყოფილი, თუმცა  
იმ წუთს ძალიან მეწყინა და დამცილებული ავიღეწე კიდევ,  
ასე უხამსად და უდიერად რომ მომმართა. მაგრამ ვალავანს  
გამოვცდი და წყენამ გამიარა. ერთი-ორჯერ კინაღამ სიცილიც  
წამსკდა. ეგ კაცი ალბათ თავის ქალიშვილებსაც ასევე ტუქსავს-  
მეთქი და უფრო ამაზე მეცინებოდა.

ისევ ციოდა, ოღონდ ქარი ჩამდგარიყო და სუსხი ძვალსა  
და რბილში აღარ ატანდა. მობუზული ვიჩეპი და თვალს ვეღარ  
ვწყვეტდი კარიაულების ვალავნიან სახლს... დევების მაგიდას  
მხოლოდ ოთხი სკამი ედგა და ოთხივეზე მხოლოდ კარიაულე-  
ბი ისხდნენ, სუფრაც მხოლოდ ოთხისთვის იყო გაწყობილი.  
კარიაულის ქვრივი?.. ვითომ ადრევე ისაუზმა და მოხარშულ  
ღორის თავზე უარი თქვა? იქნებ უარი არც უთქვამს... ასეა  
თუ ისე, ჩემი ყოფილი მასწავლებელი რატომღაც შემებრაღა,  
მომეჩვენა, თითქოს კარიაულის ქვრივობა ვილაცამ განგებ მი-  
უსაჯა, თორემ ამგვარი ყოფა-ცხოვრების სურვილი თვითონ  
არ ექნებოდა-მეთქი.

იქ შესვლამდე მაინც მეგონა, კარიაულთაგან რომელიმე  
უსათუოდ მეცნობა-მეთქი. საკვირველია, ერთ სოფელში ამ-  
დენი ხანი ცხოვრობ და თანასოფლელებს პირველად ხედავ,  
ისიც მაშინ, როცა სოფელი თითქმის დაცილილია, თითქმის მე-  
სამედი, თუ მეტი არა, ომშია გაკრეფილი... ნუთუ ღვინვამ  
ამ ვალავანში არიან გამოკეტილნი და გარეთ არ გამოდიან? შე-  
იძლება მშობლებს გაუგოს კაცმა, მაგრამ ქალიშვილები რო-  
გორ ძლებენ, როგორ ცხოვრობენ ქვეყანას მოწყვეტილები?

ისე კი პირბადრები სულ წითლად ღვიოდნენ. ჩახვეულ-ჩა-  
ხუჭუჭებულ კულულებზე ცეცხლი ეკიდებოდათ. შავად შე-  
ღებილ, საზაფხულო შილიფ კაბებში გამოწყობილებს პირ-  
დაპირ მაგიდაზე ეწყობ მსხვილ, ქათქათა და დაქორფლილ  
მკლავებშორის ვერდატეული ძუძუები. ოთახში შესული პირ-  
ველად მაგათ მზერას წაეაწყდი და გარკვევით დავინახე, რო-  
გორ გაუფართოვდათ ჭროლა თვალები, თითქოს უცხო კაცს  
პირველად ხედავდნენ და მარტო რომ მოეხელთებინათ, ეგა

რევე შეახრამუნებდნენ. მართლა მოულოდნელი იყო იმ დროს ასეთი ნაპატიები არსებების ხილვა. ისინიც კი, ომამდე რომ სიმსუქნისაგან ძლივს მოძრაობდნენ, თავისივე სხეულებრივი წარსულის აჩრდილებად ქცეულიყვნენ და მუცლებში ლანი გასდიოდნენ.

მაინც რა დროს შევედი იმ დასაქცევში, ის-ის იყო საუზმეს უნდა შესდგომოდნენ და მეც გამოვეცხადე. სულ სამიოდე წუთით შევაცოვნე, სულ სამიოდე წუთით... ეს ალბათ დიდი დროა საუზმის შეყოვნებისა თუ გადადებისათვის, როცა დანა-ჩანგალი უკვე მომარჯვებული აქვთ... ნეტავი დარჩა რამე მოხარშული ღორის თავისაგან?

უცებ თავბრუ დამეხვა, ეს უკვე შიმშილის ბრალი იყო. დილით ისე გამოვედი შინიდან, პირში ლუქმაც არ ჩამიღვია.

გალავნიდან გამოსული შავი წერტილი ჩემ მიერ დროებით დაპყრობილ ბორცვისაკენ გამოეშურა. დიდი მიხვედრა არ უნდოდა: კარიაულის ქვრივი გახლდათ. გასაგები მიზეზის გამო არ ესიამოვნებოდა ჩემი დანახვა, თანაც ამ მუხის ძირას ჩასაფრებულებით მომლოდინესი. არც მე ესიამოვნებდა მასთან შეხვედრა, წელან ისეთ სურათს წავაწყდი, თვითონვე შეეძრწუნდი, ნეტავი რამ აიძულა, რატომ მოიგონა ეს შემზარავი ქვრივობა? ამის ახსნა მე არ შემეძლო... მერმე გამახსენდა დედა-კარიაულის — ჩიხტიკობიანი ქალბატონის გამჭოლი გამოხედვა, მოჭუტული ჭროლა თვალებით გამომცდელად რომ მიმზერდა. ამ გამოხედვის პატრონი ეგრე ადვილად არ მოტყუვდებოდა. ვითომ თვალები დახუჭა და დაიჯერა ის ყველაფერი, რაც გეოგრაფიის მასწავლებელმა დაიბრალა?!

კარიაულის ქვრივი ისევ შავი წერტილივით მოჩანდა, მაგრამ მე აშკარად ვხედავდი, ეს შავი წერტილი როგორ მიახლოვდებოდა. სწრაფად გავტრიალდი, ოღონდ, ქვევით კი არ დავეშვი, რატომღაც ჩამონგრეულ გალავანს გადავახტი და ეკლესიის ეზოს შევაფარე თავი. ეკლესიის კარი ღია იყო და მეც უმიზნოდ იქით გავწიე. ღია კარი რომ ჩემთვის ცთუნებაა, იმ დღეს დავრწმუნდი. ყოველ შემთხვევაში, ერთხელ უკვე მაცთუნა და ახლაც თავისკენ მეზიდებოდა. შესასვლელშივე შევიჩერდი, რადგან სანახევროდ ბნელ ეკლესიის სიღრმეში ნაცნობი სილუეტი დავინახე, უფრო სწორად, მივხვდი: საკურთხევლის წინ დანთებულ სანთლებთან ანანო იდგა და ლოცუ-

ლობდა. წამიც არ დამიყოვნებია, უმალ გამოვბრუნდი, მეგონა, ეს უნებური შეხვედრა თუ მოწმეობა ანანოს შეაწუხებდა და უხერხულ მდგომარეობაში ჩააყენებდა. იგი საიდუმლოდ იყო აქ მოსული და ღვთის წინაშე მდგარი, ალბათ, სხვებისგან დაფარულად ცდილობდა ტკივილის გამხელას. მწარედ ვინანე, წედან სულელურ ფიქრებს აყოლილმა თუნდაც ერთი წუთით „კარიაულის ქვრივობა“ რომ დავწამე.

სირბილით დავეშვი თავქვე, სულ რამდენიმე წუთი ვირბინე და ახლა ისევ სკოლის ეზოში ამოვყავი თავი. მარო მასწავლებელს მოვახსენე, თქვენი დავალება პირნათლად შევასრულე და კარიაულის ქვრივი საცაა ეზოში გამოჩნდება-მეთქი; ზარიც დაირეკა და გოგო-ბიჭები გარეთ ხმაურით გამოიშალნენ. მე თანაკლასელებს შევერიე...

— კარიაულის ქვრივი მობრძანდება!.. კარიაულის ქვრივი მობრძანდება!.. — გავიგონე მორიდებული ჩურჩული.

ყველა განსაკუთრებული მოკრძალებით ესალმებოდა და უთმობდა გზას პატარა, კაფანდარა, შავ ქალბატონს, რომელიც თავდახრილი, ნაღვლიანი და დაფიქრებული მიდიოდა სკოლის შენობისაკენ. უცებ შევეკრთი, თითქოს ჩემ თავს დანაშაულზე წავასწარი: მეც, პატივისცემით ავსებული თუ გამსჭვალული, მოკრძალებული ღიმილით ვესალმებოდი კარიაულის ქვრივს ისევე, როგორც სხვები, თან მორიდებით ვჩურჩულებდი:

— კარიაულის ქვრივი მობრძანდება!..

### 3

შინ მიმავალს ზიზი დამემგზავრა, მარო მასწავლებლის ქალიშვილი; როგორც ჩანს, ბოლო გაკვეთილზე დარჩენა არც მან მოინდომა. ზეინაბი ერქვა, მაგრამ დედა მოფერებით ზიზის ეძახდა და სოფელმაც მის ნამღვილ სახელს ტაბუ დაადო. სკოლიდან ხშირად ვბრუნდებოდით ერთად, რადგან ერთ კლასში ვსწავლობდით და თანაც მეზობლად ვცხოვრობდით. მე მომწონდა ზიზი: მართლა კარგი გოგო იყო, გულლია, უშურველი, არაეისტვის არაფერი ენანებოდა. საკმაოდ მოხდენილი ტანი ჰქონდა, სახე — ლამაზი, მიმზიდველი. ამავე დროს მღეროდა და ცეკვავდა, ხალხური ლექსებიც იცოდა ზეპირად და, როცა

საშუალება მიეცემოდა, ხმამაღლა, გამოთქმით კითხულობდა. ერთი სიტყვით, სოფელში პირველ გოგოდ ითვლებოდა და, ბუნებრივია, ყველა ბიჭს მასზე ეჭირა თვალი. სკოლაში სხვებიც იყვნენ ეგრეთ წოდებული კარგი გოგოები, მაგრამ ზიზის კიდევ ერთი უპირატესობა ჰქონდა: იგი ადრე დასრულდა, ქალური ნაკვთები ადრევე გამოეყვითა, ჩამოუყალიბდა და დაეხვეწა. ამ ნაკვთების გამოსავლენად ისიც უწყობდა ხელს, კაბას თვითონ რომ იკერავდა. ძველ, ნახმარ კაბებს დაკრიდა და მერმე ისე მოირგებდა, გაოცდებოდი. ეტყობა, ხელსაქმის ცოდნის გარდა თავის აღნაგობასაც ზედმიწევნით კარგად გრძნობდა.

ზიზი როცა ცეკვავდა და მღეროდა, ან ლექსებს კითხულობდა, მე მეჩვენებოდა, თითქოს ამ ხელოვნებას მხოლოდ იმისთვის დაუფლებოდა, რომ სხვისი ყურადღება მიექცია: თავს გაწონებდა, გზიბლავდა, თორემ თვითონ არავეთარი შინაგანი მოთხოვნილება არ ჰქონდა არც ცეკვის, არც სიმღერისა და არც ლექსების თქმის. ეს ყველაფერი, ისევე, როგორც გარეგნობა, თითქოს შენს მოსანუსხად და დასაპყრობად სჭირდებოდა, სხეულის მოქნილობასა და მოძრაობას, ხმის ვნებიან ჟღერადობას, სატრფიალო ლექსების ინტონაციას სხვა ფუნქციას არ აკისრებდა.

ჩემი დაკვირვებით ზიზი დედასა ჰგავდა, ყოველ შემთხვევაში, მე მეჩვენებოდა, რომ მარო მასწავლებელი სწორედ ასეთი იქნებოდა ქალიშვილობისას, ანდა, პირიქით, ზიზი ძალიან დაემგვანებოდა დედას, როცა მის ასაკს მიატანდა. ჩემი აღმოჩენილი მსგავსება მევე მბორკავდა და მბოჭავდა, როგორაც ხელს მიშლიდა, რომ მარტო დარჩენილს ზიზიზე მეფიქრა, ანდა ზიზისთან სიახლოვის წარმოდგენით ჭაბუკური ვნება დამეცხრო. ეს მსგავსება რომ არა, შეიძლება შემყვარებოდა კიდევ. სხვათა შორის, მე მისგანაც ვგრძნობდი ჩემდამი გარკვეულ ლტოლვას: ამხანაგებთან ლაპარაკით გართულს უეცრად შემინიშნავს უჩუმრად მოსული ზიზი — გაყუჩებული, მოყურადებული, თითქოს უაზროდ მოშტერებული. ამას სხვებიც ამჩნევდნენ და დაუფარავად მეუბნებოდნენ კიდევ: რამ დაგაბრმავა, შე ოხერო, ვერა ხედავ, თვალებით გჭამსო ასეთ დროს ვწითლდებოდი და ოფლად ვიწურებოდი, არ ვიცოდი, სად დავმალულიყავი.

თავის მხრივ ზიზის დედაც მამსგავსებდა მამაჩემს — პირ-



წავარდნილი სანდრო ხარო. მე, რა თქმა უნდა, სხვა აზრისკ  
ვიყავი. მამა კარგად მახსოვდა. საშუალო ტანისა იყო, შავგვ-  
რემანი, მკვრივი, ჩასხმული. მე — თხელი, აყლაყუდა, მხრებ-  
ში ოდნავ მოხრილი, ქერა თმა მქონდა, სწორი და მოუხეშავი  
და არა მამაჩემივით ხვეული. მახსოვს, ბავშვობაში დედას უფ-  
რო მამსგავსებდნენ, მამა შემტევ, აგრესიულ კაცად მესახე-  
ბოდა, მე კი შინაგანად მტანჯავდა ჩემი ზედმეტად მორიდე-  
ბულობა თუ გაუბედაობა, მაწუხებდა ისიც, ხშირად უადგი-  
ლოდ რომ ვწითლდებოდი.

აღრე, მასწავლებელი თუ შინ იყო, ვერიდებოდი იქ მისვ-  
ლას. მომაშტერდებოდა დიდი ცისფერი თვალებით, წაბლის-  
ფერ ხშირ თმაზე ორივე ხელს გადაისვამდა და გაღიმებული  
მეტყოდა — ოზო, ოზო, მამაშენს როგორ გავხარო. — მომე-  
ხვეოდა და გულში ჩამიხუტებდა, თავს მიკრავდა ფუმფულა  
მკერდში და სულს მიხუთავდა. მერმე ნელ-ნელა სიმაღლეში  
წავედი, თანდათან ავცდი მის გაფუებულ მკერდს და ახლა  
ძალაუნებურად ვიყნოსავდი ყელიდან თუ სახის კანიდან მო-  
ნაბერ მკვეთრ, სპეციფიკურ სურნელს, რაც შინ დამზადებუ-  
ლი ფერუმარულისა ან ნელსაცხებლისა უნდა ყოფილიყო. ეს  
სურნელი გულისრევამდე მალიზიანებდა, მაგრამ მერიდებოდა  
და მასწავლებლის ღონიერი მკლავებიდან თავის დაღწევას არ-  
ცა ვცდილობდი. მძაფრი სურნელი თან მიმყვებოდა და უკვე  
არც კი მცემდა, თითქოს ხმასავით მესმოდა, ხანდახან ღამლა-  
მობით მადვიძებდა კიდევ. რამდენიმე თვეა ამ სუნს აღარ შე-  
ვუწუხებვიარ, ზაფხულში ტანი ერთბაშად ავიყარე, ყველა და  
ყველაფერი თითქმის ერთი თავით დაბლა დავტოვე. შესაძლე-  
ბელია, ამის გამო დაეკარგე ის იერი, რითაც მარო მასწავლე-  
ბელი მამაჩემს მამსგავსებდა.

მარო მასწავლებლის სამოთახიანი სახლის არცთუ იშვიათი  
სტუმარი ვიყავი. თავდაპირველად მიხაროდა კიდევ იქ მის-  
ვლა, რადგან თბილისიდან ჩამოსული და უცხო გარემოში მოხ-  
ვედრილი, ასე თუ ისე, ამ ოჯახს გაუუშინაურდი, ზიზი ჩემი  
ტოლი იყო და დედამისიც ჩემდამი სასურველად კეთილისმყო-  
ფელი აღმოჩნდა. თანაც სოფლური სახლი სწორედ ამგვარი  
წარმომედგინა და იქნებ ამიტომაც ამათი ყველაფერი მომწონ-  
და: შარას გადევნებული ჭაგის დამტკრეული ღობეც, მორ-  
ყეული ქიშკარიც, ძველებური კრამიტით დახურული და

რიყის ქვით ნაგები შენობაც, რომლის ოთხივე კუთხე ქართული აგურით იყო ამოყვანილი. ხის აივანს საღებავი არასდროს მიჰკარებოდა და მზის, ქარისა და წვიმისაგან დამუშავებული მუქ ნაცრისფრად გამოიყურებოდა... ეზოს წინა მხარე ყვავილებს ჰქონდა დათმობილი, ძირითადად ვარდებს, რომლებსაც თვით მარო მასწავლებელი უვლიდა და სეზონურად ახარებდა. თუ არა ვცდები, მთელ სოფელში ეს ერთადერთი ეზო იყო, სადაც ომიანობის ოთხი წლის მანძილზე ყვავილებისთვისაც იცლიდნენ.

მარო მასწავლებელს მეუღლე ხასანის ტბასთან ბრძოლაში დაღუპოდა და, რადგან ხასანის ბრძოლები ქვეყანაზე არავის ახსოვდა, სოფელში მას ნამდვილ, ანუ შინმოუსვლელის ქვრივად არცა თვლიდნენ. ერთხელ ისიც კი გავიგონე, ვილაცამ სევდიანად რომ იხუმრა: იმ მირონცხებულს თუ ომში დაღუპვა ეწერა, ახლა მაინც დაღუპულიყო, მაროს მეტი შეღავათი ექნებოდაო. რას გაუგებ ადამიანს, ხანდახან მკრეხელური ხუმრობაც კი გაუელვებს ხოლმე!

მთავარი მაინც ის არის, რომ მარო მასწავლებელი თავს რაფიელ ერისთავის შთამომავლად თვლიდა და დიდადაც ამაცობდა თავისი შორეული და სახელოვანი წინაპრით. ბარბარე ჯორჯაძეზე რომ ჩამოაგდებდა სიტყვას, კნეინა ბარბარე მისი გამზრდელი მამიდა გეგონებოდათ და კულინარული ხელოვნებაც, იფიქრებდით, მისგან ჰქონდა შეთვისებული. შუა ოთახის კედლებზე სიმეტრიულად ეკიდა ათასნაირ ჩარჩოში ჩასმული, შიგადაშიგ პირდაპირ ჰიკარტით მიმაგრებული ანდა ლურსმნით მიჭედებული, დროისაგან გაყვითლებული და გახუნებული ფოტოები თუ დაგეროტიპები. მაგრამ ძირითადი კედლის ფარდაგი, რომელიც ძველებურ, რიკულებიან ტახტსაც ეფინებოდა, განკუთვნილი იყო მხოლოდ და მხოლოდ საკმაოდ მოზრდილ შავ ჩარჩოსთვის, საიდანაც დიდი რაფიელი ნაღვლიანად გამოსცქეროდა წარმავალ ქვეყნიერებას.

სოფელს შავ ჩარჩოში ჩასმული სურათით, რა ზომისაც უნდა იყოს იგი, რას გადაარწმუნებ, მაინც თავისას ფქვავდა: კაცო, პაპაჩემისაგან გამიგონია, — ძველად ეგენი იმათი ყმები იყვნენო... იყვნენ და იყვნენ, მით უკეთესიო... იქნებ ვილაცამ ვილაცა სამადლოდ აცდუნა კიდეცაო...

ეს ცნობები სხვათა შორის იმიტომ მოგაწოდეთ, რომ გეგ-  
რძნოთ, ამ ოჯახთან როგორ ვიყავი გაშინაურებული, თორენ  
მათი წარმომავლობა არც მათეკვებდა და არც მალელებდა.

ზიზი, როგორც ვთქვი, გზაში დამეწია და ერთად გამოვ-  
ყევით სოფლის შარას. დილით შინიდან უზმოდ გამოსული, თან  
აღმა-დაღმა ამდენი ნასიარულე-ნარბენი ფეხებს ძლივს მი-  
ვათრევდი. ის კი გვერდით მომყვებოდა და გაუთავებლად  
ლაპარაკობდა. მე ხან ყურს ვუგდებდი, ხან — არა, ზოგჯერ  
თითქოს სმენა მეთიშებოდა, როცა დღევანდელი დღის შთა-  
ბეჭდილებები ძალდაუტანებლად, თავისთავად ამოტივტივდე-  
ბოდა ცნობიერების ზედაპირზე, ამის მიხედვით, როგორც  
ჩანს, ყველაზე დიდი შთაბეჭდილება მაინც კარიაულების ქა-  
ლიშვილებს მოეხდინათ. სულ ისინი მედგნენ თუ მიტრიალებ-  
დნენ თვალწინ — პირმრგვალები, წითური დევის ქალები, უზ-  
არმაზარი ძუძუები პირდაპირ მაგიდაზე რომ ეწყობ.

მინდოდა ზიზისთვის ამ კარიაულებზე რაღაც მეკითხა, მაგ-  
რამ გარეკა და გარეკა! წუთით არ შეყოვნებულა, რომ სი-  
ტყვა ჩამერთო, ერთხელ არ ამოუსუნთქავს.

ომის ქარცეცხლი გზადაგზა ლაპარაკით თებერვლის მი-  
წურულისთვის სამულდამოდ ჩააქრო და მთელ დედამიწის ზურ-  
გზე შშვიდობა დაამკვიდრა. ათას ცხრაას ორმოცდაოთხის ზამ-  
თარი კარს მოგვდგომოდა და ომის ბედი აღარავის აეჭვებდა,  
მაგრამ ზიზი ისე გადაჭრით ამბობდა ამას, თითქოს ყველა სა-  
დავე ხელთ ეპყრა და, როცა მოისურვებდა, ომს მაშინ დაამ-  
თავრებდა. მერმე სულ დეტალურად, წვრილად მიაბმო, რო-  
გორ იზეიმა სოფელმა გამარჯვება. შემდეგ კი ამ ზეიმიდან პირ-  
დაპირ მეორე ზეიმზე ამომაცოფინა თავი — ახლა სკოლის დამ-  
თავრების აღსანიშნავად გამიმართა საღამო, ხოლო იქიდან, რა  
თქმა უნდა, სულმოუთქმელად, უკანმოუხედავად გავემგზავ-  
რეთ თბილისს... ზიზი უკვე მისაღებ გამოცდებს აბარებს თე-  
ატრალურ ინსტიტუტში... ჩააბარა და მოხვდა კიდეც — იგი  
სამსახიობო ფაკულტეტის პირველი კურსის სტუდენტია, არც  
მეტე, არც ნაკლები. მისი წარმატებით ყველა აღტაცებულია,  
გარდა მარო მასწავლებლისა — დედა წინააღმდეგია, მსახიო-  
ბობას ვერ უხსენებ, ამისთვის გავზარდე შვილიო! — თავს იკ-  
ლავს. მაგრამ დედამ რა იცის?.. რაღა დროს ეგ არის!.. ზი-  
ზიმ ათასი გზიდან ერთი აირჩია, რადგან ეს გზა მისია, მხო-

ლოდ მისი ერთადერთია მსახობის ყველა მონაცემი აქვს და არ ესმის, რატომ უნდა დაადგეს სხვა გზას. მართალია, ოდნავ დაბალია, თუმცა არც ისე, სამაგიეროდ კოხტა ტანი აქვს, აღნაგობა — პროპორციული, ლამაზია, ამავე დროს მღერის, ცეკვავს, ლექსებსაც კითხულობს... სხვა რა უნდა მსახიობობას?

სხვა რა უნდა მსახიობობას?!

მართლაც, რა უნდა?

მე ამ კითხვაზე პასუხის გაცემა არ შემეძლო და გაჩუმება ვარჩიე. ჩემი თეატრალური განათლება თუ ცოდნა მოზარდ მაყურებელთა თეატრში ომამდე ნანახი ათიოდე სპექტაკლით ამოიწურებოდა, თუმცა ერთიორჯერ უფროსებს რუსთაველშიც წავუყვანივარ, რასაკვირველია, დილის წარმოდგენებზე. მაგრამ მე მაინც მოზარდ მაყურებელთა თეატრი ჩამრჩენია მეხსიერებაში... გულში სხეულის მომთენთავმა სევდამ გაჟონა, სასიამოვნო ტკივილის მსგავსმა, თუკი შეიძლება ტკივილი სასიამოვნო იყოს. სპექტაკლებზე მთელი კლასი ერთად მივდივართ, აქვია ისიც, ვისი სიახლოვეცა და ქვეშ-ქვეშ გამოხედვა უცნაური, წარმოდგენელი თრთოლვითა და ქრუანტელით გავსებს... ღმერთო, როგორ მიყვარდა, როგორ მიხაროდა თეატრში წასვლა ყველაზე საოცარი მაინც ფარდის ახდის წინ ჩაბნელებულ დარბაზში გატრუნული ყოფნა იყო. ფარდის მიღმა იმალებოდა უცნობი სამყარო და იმ უცნობთან შეხვედრას სულ მუდამ რატომღაც შემკრთალი ველოდებოდი... მე ვიცოდი, ზიზის ეს მთრთოლვარე მოლოდინი არ ჰქონდა განცდილი, არათუ სცენა, თეატრისათვის თვალის არ მოეკრა, შენობის ფასადიც არ ენახა.

დაუსრულებელი ლაპარაკით თავგაბებრებულს ლოლიავი არ დამიწყია, პირდაპირ მივახალე:

— რატომ ამოიჩემე მაინცდამაინც ეს მსახიობობა, შენ ხომ თეატრი შორიდანაც არ დაგინახავს?!

— მინდა! — მიპასუხა მოკლედ და მკაცრად.

მივხვდი, ნამეტანი მომივიდა და ცოტა შევარბილე:

— იცი, რა, ზიზი, თბილისში რომ ჩავალთ... იქ რამდენიმე თეატრია...

— ვიცი! — გამაწყვეტინა სიტყვა და გულნატყენი გაჩუმდა.

— თეატრში ერთად ვიართ, სპექტაკლები ვნახოთ... იქნებ არც მოგეწონოს!

— მომეწონება! მე დიდი ხანია მომწონს თეატრი და... თუ ღმერთი გწამს დედაჩემივით ნუ მელაპარაკებ!

ამასობაში, როგორც იქნა, ჩვენს სახლს მივალწიეთ. გადავწყვიტე, უცებ დავემშვიდობებო, შინ შევალ, თან ისეთ არგუმენტებს მოვიშველიებ, როგორც შიმშილი და დაღლილობაა-მეთქი, მაგრამ ზიზი წინ გადამიდგა და ჩურჩულით, თითქოს საიდუმლოს მანდობსო, მითხრა: ერთად ვისადილოთ, ჩვენ ხომ ერთად არასოდეს გვისადილიაო. მერმე ხმაში მომწუსხველი ჯადო გაურია: ცეცხლი დავანთოთ, გავთბეთ, რა მოხდება, ცოტა ხანს ერთად ვიყოთო. მე ჩვენს სახლს გავხედე, როგორღაც ცივი და მიუკარებელი მომეჩვენა, ამავე დროს ვიგრძენი, ანანოს ნახვას მაინცდამაინც არ ვესწრაფოდი, თუმცა ანანო შინ რომ არ იყო, ეს ჩვენს სახლს გარედანვე, ერთი შეხედვით ეტყობოდა.

— დედა გვიან დაბრუნდება, ღღეს პედსაბჭოა. — ესეც ჩურჩულით მითხრა, ოღონდ — ხაზგასმულად, მნიშვნელოვნად.

ამ ჩურჩულმა უნებურად შემაკრთო და რაღაცნაირი, გამოუცნობი მოლოდინით გამმსჭვალა. ჩურჩული თითქოს რაღაცას მპირდებოდა, ანდა ორივესთვის რაღაცას ნიშნავდა და ის რაღაც, მე კი არა, შესაძლებელია, თვით მოჩურჩულემაც არ იცოდა. ზიზისთვისაც გაურკვეველი და ბუნდოვანი უნდა ყოფილიყო ჩურჩულით გამხელილი „საიდუმლო“ და იქნებ ამიტომაც ორივენი მორჩილად, დატყვევებულებივით მივყვებოდით ამ მოცახცახე თუ მთრთოლვარე ხმას. ზიზი პირაკრულივით მიმიძლოდა, ისე გავიარეთ გზა და შევალეთ კიშქარი, შინაც ისე შევედით, სიტყვა არ წასცდენია.

ოთახშიც საგრძნობლად ციოდა, პალტოები მაინც გავიხადეთ და მე დაუყოვნებლივ შევასრულე ზიზის ბრძანება: „ცეცხლი დაანთე!“ (ერთადერთი, რაც სოფელში კარგად ავითვისე და შემდეგ დავოსტატდი კიდევ, ცეცხლის დანთებაა. თუმცა თოხნაშიც საკმაოდ გავიწაფე: ზაფხულობით კოლმეურნეობის სიმინდსა და პერანს ვთოხნიდით მოსწავლეები). თუნუქის ღუმელი სულ მალე ავუგუნდა და სასიამოვნო სითბო დაღვარა. ამასობაში ზიზიც დატრიალდა — ყველა საგანსა თუ

ნივთს სწრაფად მოუნახა თავთავიანთი ადგილი. მერმე ღუმელზე თუჯის მძიმე, გაჭვარტლული ქვაბი შემოდგა და მაგიდის ერთი კუთხე, რომელიც ცეცხლთან უფრო ახლოს იყო, ორი კაცისთვის გააწყო, საკუჭნაოდან პური და კომბოსტოს მწნილი შემოარბენინა.

ცეცხლის დანთების შემდეგ საქმე აღარა მქონდა და ჯიბეებში ხელეზიარაწყობილმა კედლებზე გაკრულ სურათებს ჩამოვუარე, ბოლოს მარო მასწავლებლის დიდ წინაპარს მივაჩერდი უაზროდ. გამახსენდა, რომ ზიზი ძალზე ამადელევებლად კითხულობდა „სამშობლო ხევსურისა“-ს...

— ღვინოს დაღევ? — მოულოდნელად მკითხა ზიზიმ უჩვეულო კილოთი, ეს კილო სხვისაგან ნასესხებს ჰგავდა, რადგან ასე მხოლოდ უფროსები მიმართავენ ხოლმე ერთმანეთს.

ღვინოს რომ არ ვსვამდი, თვითონაც კარგად იცოდა. არაერთხელ შესწრებია, ამის გამო ბიჭები როგორ მამასხარავებდნენ და ზოგჯერ აბუჩადაც კი მიგდებდნენ. ამიტომ პასუხის გაცემა საჭიროდ არ ჩავთვალე, ყველაფერი ისედაც ნათელია მეთქი. მაგრამ მთავარი ეს არ იყო. ზიზი თითქოს სახლობანას თამაშობდა და მეც მაიძულებდა, იგივე მეთამაშა. ეს თამაში აშკარად გარეგნულ იერს ეფარებოდა ანდა ინიღბებოდა მოჩვენებითი ფუსფუსით, რომლის იქით სხვა რაღაც იმალებოდა — ჩემთვისაც და მისთვისაც გაცილებით მნიშვნელოვანი. მართლაც, რატომ თქვა, — დედა გვიან დაბრუნდებაო, იმითომ ხომ არა, ერთი მათლაფა ლობიოთი რომ გვარიანად დავნაყრებულ იყავით და ზედაც თითო ჭიქა ღვინო დაგვეყოლებინა? დასამალი და საჩურჩულო რა გვქონდა, მე და ზიზის თუჯი ამ სახლში ოდესმე ერთად გვისადილია, იმ ტრაპეზს ყოველთვის მარო მასწავლებელი წარმართავდა და საკმაოდ გულუხვადაც გვიმასპინძლებოდა ხოლმე...

ზიზიმ ხელადა დადგა მაგიდაზე. მე ცეცხლს განელემა აღარ ვაცალე, შეშა ბლომად შეეუკეთე.

— შენ აქ დაჯდები! — განმისაზღვრა ადგილი დიასახლისმა.

უსიტყვოდ დავმორჩილდი, დავჯექი მისჯილ სკამზე. დავჯექი მყარად, საფუძვლიანად, ორივე იდაყვით მაგიდას დავყვარდენი... პირდაპირ, ოდნავ შეღებულ კარიდან ზიზის ოთახის ნაწილი დავინახე. ლოგინი აშლილი იყო, ეტყობა, დილით

რომ ადგა, საწოლისათვის არც მოუხედავს, ეგრევე ხელუხლებელი დატოვა. იქვე, ვენურ სკამზე დაუდევრად მოესროლა ღამის პერანგი... საწოლს თვალი ავარიდებდა და ზიზისკენ გავაპარე მზერა, ხომ არ შემამჩნია, ლოგინს რომ ვუთვალე იერებმეთქი, თითქოს აკრძალული მქონდა იმ ოთახში შეხედვა. ზიზი ლუმელთან იდგა, ქვაბისთვის ხუფი მოეხადა და დიდი ხის კოვზით მუყაითად ურევდა, ლობიო ძირზე არ მიმეწვასო. ახლაც საქმიანი და მზრუნველი ჩანდა.

— ცოტაც და დაგანაყრებ. — მითხრა.

— შენ არა გშია? — ვკითხე სხვათა შორის, სადილთან დაკავშირებით რაღაც ხომ უნდა მეთქვა.

— ძალიან... დილით ცოტა წავიჭამე და იმის შემდეგ პირში ლუკმა არ ჩამსვლია... ლობიოა.

— წელანვე მივხვდი. სუნი მეცა.

— ხახვი ღორის ქონშია მოხრაკული, — იქვე დამიზუსტა, — დედაჩემი, საერთოდ, გემრიელ კერძებს ამზადებს.

მე, რა თქმა უნდა, ბარბარე ჯორჯაძის სურათს დაეუწყე ძებნა, კედლებს თვალი მოვავლე. რატომღაც მომეჩვენა, ამ ფოტოებიდან არცერთზე არ იყო იგი აღბეჭდილი და ნალვლიანად გავიფიქრე: ან ამათ ვერ იშოვეს, ანდა კნეინა ბარბარეს არ უზრუნვია, რომ მშთამომავლობისათვის ერთი პორტრეტი მაინც გამოემეტებინა-მეთქი.

— მომაწოდე შენი თეფში.

გავუწოდე, დევის ულუფა გადმომიღო.

— ამდენს ვერ მოვერევი.

— მოერევი. — დამამშვიდა. — ახლა ჩემი თეფში მომეცი.

ჩვენ ერთხანს უსიტყვოდ შევექცეოდით ლობიოს და კომბოსტოს მწნილსაც ვაყოლებდით — ერთიც გემრიელი იყო და მეორეც. ზიზიმ გათლილ ჭიქებში ჩამოასხა ღვინო — მუქი ქარვისფერი, კრიალა. ერთ ჭიქას დავლევე, ხომ არ მომკლავს-მეთქი, — და დასხმისას წინააღმდეგობა არ გამიწვია.

— დალიე, უფრო გემრიელად შეჭამ.

— შენა?

— მეც დავლევე... ცოტას. — მითხრა და ჭიქა მომიჭახუნა. — გაგვიმარჯოს!

— გაგვიმარჯოს!

მოვსვი. მართალი რომ ვთქვა, მესიამოვნა. მესიამოვნა გემოც და სურნელიც, განსაკუთრებით სურნელი, თუმცა დაბეჯითებით ვერ ვიტყვი, ერთის მეორისაგან გამოყოფა და ცალ-ცალკე შეგრძნება ალბათ არ შეიძლებოდა. კიდევ მოვსვი, კიდევ და ჭიქა გავანახევრე.

— როგორია? — გამიღიმა ზიზიმ.

— მე მგონი, კარგია!

— ჩვენ სხვანაირ ღვინოს ვაყენებთ, ყველას მოსწონს.

— კი, მშვენიერია! — დავუდასტურე საბოლოოდ.

ღვინომ მთელ სხეულში ქრუანტელივით დამიარა და სასიამოვნოდ, მსუბუქად გამაბრუნა. რამდენიც გეამება, იმდენი დალიეო, — მითხრა ზიზიმ და ჭიქა შემივსო, მერმე თვითონაც დაისხა. ზიზი მართალი აღმოჩნდა, უფრო გემრიელად მივაღეჭი ლობიოს; ღვინოსაც ვწრუპავდი ნელ-ნელა, მეორე ჭიქა რომ დავცალე, მესამე თვითონ დავისხი და ზიზისაც შევეუესე. მე ისევ ისე ვიყავი სასიამოვნოდ გაბრუებული, როგორც პირველი ჭიქის შემდეგ, ზიზი ხელმარჯვნივ მეჭდა, სულ ახლოს, მაგიდის კუთხე გვყოფდა მხოლოდ, ეს თვითონ ზიზიმ მოიგონა და დასაჯდომი ადგილებიც თვითონ გაანაწილა... ჭკვიანი გოგოა, მე ამას ვერ მოვიფიქრებდი: თან გვერდით მიზის, თანაც თავის მიბრუნება არ მჭირდება, პირდაპირ მივჩერებივარ: თეთრი ყელი აქვს, ქათქათა, წაბლისფერ თმიდან პატარა ბიბილო მოუჩანს, განხრეტილი, საყურისთვის გამზადებული. თმა გადაუტკეპნია და ერთ მსხვილ ნაწნავად დაუგდია ზურგზე...

ერთი ჭიქაც რომ გამოვცალე, აშკარად დავინახე, ღია ცისფერი თვალები როგორ გაუმუქდა, როგორ ჩაუგუბდა სევდა და დაუვიწროვდა. მე კი კარგ გუნებაზე ვიყავი, რალაცნაირად ამსუბუქებული და ამჩატებული, დაღლილობა აღარ მაწუხებდა და დღევანდელი ღღის შთაბეჭდილებებით დამძიმებული და დამკმუნვარებული გული ახლა მკერდში ლალად მიფართქალედა... მაგიდის ქვეშ, თუმცა არ ვეხებოდი, მაინც სულ ახლოს ვგრძნობდი ზიზის მუხლებს და არა მარტო ამ მუხლების, საერთოდ ზიზის სიახლოვე წარმოუდგენელ, ჭერგანუცდელ ბედნიერებას მანიჭებდა და გაურკვეველი მოლოდინის თრთოლვით მალვივებდა.

— რას აპირებ, ოზო? — მკითხა მოულოდნელად.



თითქოს ვიღაცის უჩინარმა ხელმა ხალათზე მომქაჩა. უცებ ვერ გავიგე, რას გულისხმობდა ზიზი და, მგონი, გავწითლდი კიდევ, რადგან იმ წუთას ქათქათა ყელს მივჩერებოდი და ღმერთმა უწყის, რას ვფიქრობდი ან რას ვაპირებდი.

— სკოლას რომ დაამთავრებ, სად აპირებ შესვლას? — დამიზუსტა ბოლოს.

— ოო... — შვებით გავიღიმე და ანგარიშმიუცემლად ვუპასუხე, — არ ვიცი.

— რას ჰქვია, არ იცი?!

წელან რომ მეგონა, ანგარიშმიუცემლად ვუპასუხე-მეთქი, არ იყო მართალი: მე ჯერ არ ვიცოდი, სკოლის დამთავრების შემდეგ სად გავაგრძელებდი სწავლას! მაგრამ ახლა არც ამის განსჯის უნარი და არც საამისო განწყობილება მქონდა. ორივენი, ვგრძობდით, ვთვალთმაქცობდით, ნამდვილ სათქმელს არ ვამბობდით, ღობე-ყორეს ვედებოდით.

— შენ რა გიჭირს, თბილისში სახლი გაქვს... მე ვიკითხო...

— ჩვენთან იცხოვრე, — გულწრფელად შევთავაზე, რადგან იმ წუთებში ასეთი პერსპექტივა რეალურად მესახებოდა.

— თქვენთან? — გაოცდა ზიზი. მერმე რატომღაც სიცილი აუტყდა და ერთხანს გულიანად იცინა. — რა სულელი ხარ, ოზო!

— რატომ ვარ სულელი?

— რა ვიცი, ხარ და...

— კარგი, ვარ! — დავეთანხმე უდრტვინველად.

ღია კარს იქით ისევ დავინახე აშლილი ლოგინი და ახლაც თვალი ავარიდე. ზიზიმ სიცილი უცებ შეწყვიტა და მოიწყინა, თეფში გვერდზე გადადო და ხელები მაგიდაზე დააწყო, დაჟინებით დასცქეროდა ღვინიან ჭიქას, რომელიც თითებშორის მოემწყვდია. „რა მოხდება, რომ ვაკოცო, — გავიფიქრე, — ლოყაზე ან ყელზე?.. ფრთხილად... სულ ოდნავ შევეხები... ანდა სულაც ხელებს დავეუკოცნი“. მაგრამ ზიზი ადგა, ღუმელიდან ქვაბი გადმოიღო, დაგვეწვაო, — თქვა და გარეთ გავიდა. მე კიდევ გამოვცალე ჭიქა, მაინცდამაინც მათრობელა ღვინო არ ჩანდა, ნეტარებით ვსვამდი, თანაც კარგ გუნებაზე მაყენებდა, სულ ღიღინი მინდოდა. ზიზიზე კი, როგორც ჩანს, სხვანაირად მოქმედებდა, უცნაურად მოიწყინა და სევდაც მოგრიდა.

ზიზიმ დაჩეხილი შეშა შემოიტანა, რაც ოთახში დაგვხვდა, უკვე ცეცხლს ჩაენთქა.

ვზივარ და ვაკვირდები ზიზის მოძრაობას, ტანის მიმოხრას. ცეცხლს რომ შეუქვთა, თავი მოაბრუნა და რალაცნაირად, მკრთალად გამიღიმა, თითქოს მიღიმის კიდევ და არც მიღიმის, მაგრამ ასე მომჭადოებლად ჯერ არავის შემოუხედავს ჩემთვის. ნამდვილად ულამაზესი გოგოა, ალბათ, არც არის ქვეყანაზე ასეთი გოგო.

წამოვდექი, ოთახში გავიარ-გამოვიარე; ღვინისა არაფერი მეტყობა, ისევ ოდნავ ვარ გაბრუებული, სულ ცოტათი... მივდივარ ღუმელთან, ხელებს წინ ვიშვერ, ვითომ გაყინული მაქვს და მინდა გავითბო.

ზიზიც ხელებს ითბობს, მეც... გახურებულ თუნუქის ღუმელისაკენ ორი წყვილი ხელია გაშვერილი, ხელები ერთმანეთს თითქმის ეხება, მათი პატრონები კი გაბრუებულები, გატრუნულები დგანან, თითქოს არაფერი ხდება, არაფერი.

ღუმელი საშინლად არის გახურებული, მცხელა, ლამის ტანსაცმელი შემოვიხიო. მიუხედავად ამისა, ხელებს მაინც ვითბობ. რალაცა ღვინოზე მეტად მაბრუებს, ან ზიზის სიახლოვე, ან ღუმლის სიმხურვალე. თავბრუ მეხვევა, თუმცა მზად ვარ, ისე მოვიქცე, როგორც გული, გონება, სხეული, მთელი არსება მეუბნება, მკარანახობს... ამავე დროს შებორკილი ვარ, ხელზე ხელის შეხებას ვერ ვუბედავ. სხვა დროს მხარზეც კი გადამიხვევია ხელი, ახლა რა ჯანდაბა მემართება, თითსაც ვერ ვაკარებ. ალბათ იმიტომ, რომ ჯერ არაფერი მითქვამს, სიტყვა არ წამცდენია. ბოლოს და ბოლოს ხომ უნდა ვუთხრა, — მიყვარხარ-მეთქი.. შენს მეტი ქვეყანაზე არავინ მიყვარს-მეთქი... მართალიც ვიქნები. მე ზიზი გაგიჟებით მიყვარს და მიკვირს, სად ვიყავი აქამდე? რამ დამიჩლუნვა გრძნობა და გონება, რამ წამართვა მეტყველების უნარი?! თუმცა არც ახლაა გვიან, სათქმელს ვეტყვი, გასამჟღავნებელს გავეუჟღავნებ... მაგრამ ვიდრე სათქმელს ვეტყოდე, ცოტა ხნით გარეთ გავალ, სუფთა ჰაერზე გავივლი, გონებას მოვიკრებ...

სწრაფად გავედი გარეთ, სახლს შემოვუარე და ფიცრის წაფერდებულ „ბუტკას“ მივადექი... გამობრუნებული არ ავჩქარებულვარ, ნელ-ნელა მოვაბიჯებდი კმაყოფილი, ბედნიერი. ფეხი ოდნავ მერეოდა, მაგრამ მაინც მაგრად ვიდექი, მუხ-

ლები არ შეეცებოდა. რაც მთავარია, წინასწარ მანიჭებდა უდიდეს სიამოვნებას იმის გრძნობას, რომ დიდი ხნის სათქმელს ბოლოს და ბოლოს ვეტყვოდი. ეზოში რატომღაც შევყოვნდი. ხალათის ამარა ვიყავი გარეთ გამოსული, მაგრამ არ შემეცებოდა, ალბათ შინიდან გამოყოლილი სიტბო მყოფნიდა... უცებ კარიაულები გამახსენდა და ჩემ თავს გავუბრაზდი, ასე უხამსად რომ მომმართა, რამ გამომაღენჩა, რატომ პასუხი იქვე არ გავეცი-მეთქი. საცაა გოგოს სიყვარული უნდა ავუხსნა და თურმე თავის დაცვა არ შემძლებია. მაინც როგორ ვაპატიე ასეთი შეურაცხყოფა?! ვთქვათ, ჩემს თვალწინ ასევე შეურაცხვეს ზიზი, იმასაც გადავყლაპავ და ხმის ამოუღებლად გავიძურწები? არაფერი უშავს, იმ კარიაულებთან ახლა რომ მივიდე და ერთი-ორი მაგარი სიტყვა მივახალო; ყველამ თავისი ადგილი უნდა იცოდეს!

— ოზო! — ჭიშკართან დამეწია ზიზის ხმა, — სად მიდიხარ, ოზო?

— სად მივდივარ?

ბინდბუნდში დავინახე, ზიზი ღია კარებში იდგა და ხელს მიქნევდა, — დაბრუნდიო. ეტყოდა, საკმაო დრო გასულა, რაც ზიზისთან ვარ, მოსაღამოვებულა. მე, რა თქმა უნდა, მაშინვე გამოვბრუნდი, ღია კარიდან მაგიურმა ხელის დაქნევამ მამა კარიაულთან ანგარიშსწორების ცეცხლი ჩამიქრო...

ზიზი ღუმელთან დამხვდა, დაფიქრებული დასცქეროდა წინ გაშვერილ ხელებს. ლღინ-ღღინით შესულმა ხელები მოვიფშენიბე, ვითომ გარეთ შემეცივდა-მეთქი. ზიზიმ ღიმილით გადმომხვდა, ალბათ ჩემ აღიღინებას არ მოელოდა. ხელების ფშენებით მივაშურე ღუმელს, მაგრამ ფეხები როგორღაც უკან მრჩებოდა თუ მებლანდებოდა... შევჩერდი უფრო მყარად დადგომა ვცადე.

— შეგცივდა? — მკითხა, — მოდი, გაგიტბო ხელები.

შორიდანვე საამო შორჩილებით გავუწოდე ორივე ხელი და ნაბიჯიც რომ წავდგი, უეცრად მუხლი მომეკვეთა, შევტორტმანდი. ამ დროს ზიზიმ იმარჯვა და შემაკავა, თორემ იატაკზე მოვადენდი ზღართანს... ვგრძნობდი, ზიზი მთელი სხეულით მეკვროდა, ფერუმარილის თუ ნელსაცხებლის ნაცნობი, მძაფრი სუნიც მცემდა და ერთი სული მქონდა ზიზისთვის მეთქვა, — მთელი ცხოვრება სწორედ ეს სურნელი

მტანჯავდა და მოსვენებას მიკარგავდა, ღღეღღამ მიხმობდა, ერთთავად მიზიდავდა-მეთქი, მაგრამ თქმას ვერ ვახერხებდი, ენა მებმოდა და გაუგებარ სიტყვებს ვისროდი. ზიზის ორივე ხელი ჩემს წელზე ღონივრად შემოეჭდო და არ მეშვებოდა, სადღაც მიმათრევდა, მეხვეწებოდა:

— ოზო, დაჯექი, რა გენაცვალე! ამ სკამზე დაჯექი... წაიქცევი და ვეღარ აგაყენებ.. ღმერთო, რა მთვრალია!

მე კი გუნებაში მეცინებოდა, — რატომ უნდა წაიქცე ან რა წამაქცევს-მეთქი... რა სულელი გოგოა ეს ზიზი...

როგორც ჩანს, ამის შემდეგ დამებინდა გონება, აღარაფერი მახსოვს, რაც დამამახსოვრდა, ისიც საექვო უნდა იყოს, რადგან მთვრალის მიერ არის დანახული და განცდილი.

#### 4

თავის ტკივილმა და გულის რევამ გამომალღვიძა, დაბნეულმა მიმოვიხედე და ჩემს ლოგინში რომ აღმოვჩნდი, გამიკვირდა, ვიფიქრე, ჯერ არ დაღამებულა-მეთქი! ოთახში კიდევ შეიძლებოდა საგნებისა და ნივთების გარჩევა. რის ვაივაგლახით წამოვწიე თავი და ისევ უღონოდ მივესვენე. მომეჩვენა, ძლიერი თავის ტკივილის გამო მაზიდებდა გულს, მაგრამ თავი რატომღა მტკიოდა?.. უცებ ზიზი გამახსენდა... სადილი, ღვინის სმა... და ორივე ხელი სახეზე ავიფარე. გავწითლდი, სიმწრის ოფლმაც დამასხა და ბალიშში წაყვავი თავი. გარკვეულ წუთამდე თითქოს ყველაფერი მახსოვდა, იმ წუთის შემდეგ— არაფერი. მეხსიერების წყვდიადში შეღწევა ვცადე, იქნებ ხელის ფათურით მაინც გამერკვია რაღაც-რაღაცეები, მაგრამ ტყუილ-უბრალოდ დავიძაბე და გავისარჯე. რა მოხდა? როგორ დამიბნელდა ერთ წამში გონება? რატომ გამოვეთიშე გარემოს?.. სირცხვილით ვიწოდი, თუმცა კერძოდ რისი მრცხვენოდა, არ ვიცოდი. ალბათ იმისი, რაც არ მახსოვდა, რაც სიბნელეში დამრჩა და გარეთ ვერ გამოვიტანე, ჩემთვის ვერ გამოვამზეურე...

კარმა გაიჭრიალა. ისევ წამოვიწიე: ნახევრად ღია კარიდან ანანომ შემოიხედა, თანაგრძნობით სავსე მწვანე ბივრიტის თვალები შემომანათა, ალბათ შემამოწმა, ხომ არა მიჭირდა. რა. გაღვიძებული რომ დამინახა, გამიღიმა!

— როგორა ხარ, ოზო?

— თავი მტკივა... საშინლად!

— ადექი. პიტნის ჩაის დაგაღვინებ, იქნებ გაგიაროს.

— ვერ ვდგები. თუ ჩამეძინა, ეს ტკივილი დილამდე, ალბათ, გამივლის.

— დილამდე? — ანანომ ისევ გაიღიმა, — აკი გათენდა!

— გათენდა?! — გაკვირვებულმა გაგხედე ფანჯარას.

— მაშა, წელანვე... პატარძალს ღრუბლიანი ამინდი დილა ეგონაო.

პატარძლის ანდაზა რატომღაც არ მეჭაშნიკა, ტანშიც კი გამცრა. ანანო ის ქალი არ იყო, სიტყვა უმიზნოდ, სხვათა შორის რომ დაეგდო. რახან „პატარძალი“ ახსენა, ამ სიტყვაში რალაც იგულისხმა კიდევ. ამიტომ ზოგ-ზოგი რამის გამორკვევა ვცადე:

— როდის დავბრუნდი? — მეც ვითომ სხვათა შორის ვიკითხე.

— ის-ის იყო დაღამდა, ლამპის ანთებას ვაპირებდი.

— მარტო მოვედი თუ ვინმემ მომიყვანა?

— ეგ შენთვის უნდა მეკითხა.

— ალბათ, მარტო მოვედი... ვინ მომიყვანდა?

— არ ვიცი, კარზე ჯოხივით მიყუდებული გნახე. მომიყვანი კი არავინ ჩანდა.

ამ ცნობამ ოდნავ დამამშვიდა, ცოტა ხნით ისეთი შეგება მომგვარა, თავის ტკივილიც კი დამავიწყდა. სულაც არ მინდოდა ანანოს გაეგო, გუშინ საღ და ვისთან გამოვტყვერი ასე შემზარავად. მაგრამ შეგება, როგორც ეთქვი, ხანმოკლე და უღლეური აღმოჩნდა: მაგიდას რომ ვუსხედით და პიტნის ჩაის შევექცეოდით, ანანომ ისე, თითქოს საუბარს (რასაკვირველია, არარსებულს) აჯამებსო, მოულოდნელად თქვა:

— ეგენი სხვა ჯურის ხალხია... — მერმე ასევე მოულოდნელად მკითხა, — შენ როგორა ფიქრობ?

რა თქმა უნდა, ანანოს ყველაფერი ხელისგულზე ეწერა! მაინც როგორ გავიფიქრე სულელმა, რაღაცას დავუშალავ ან გამოვაპარებ-მეთქი. მაგრამ ნათქვამის მშვიდმა კილომ ანდა იმ სიმშვიდემ, რაც ნამდვილად მეგონა მისი ხასიათიდან თუ არსებიდან მოედინებოდა, მაგრძნობინა, რომ ანანოსთან საუბარი შეიძლებოდა, არა მარტო საუბარი, საიდუმლოს გამხე-

ლაც კი. გადაჭრით არაფერი უთქვამს, მხოლოდ თავისი ვარაუდი გამოთქვა და მეც მომცა საკუთარი აზრის გამოთქმის საშუალება. მისი ვარაუდი რამდენად იყო საფუძვლიანი, არ ვიცი. მე სიტყვა არ დამიძრავს, იმიტომ კი არა, რომ მეცლია, იქნებ ანანომ სათქმელი უფრო გარკვევით მითხრას-მეთქი, არა, უბრალოდ გამოფიტული და დათრგუნული ვიყავი.

ალბათ, ანანო ფიქრობდა, საუბარში ოზოსაც ჩავეთრევო, მაგრამ რახან მე გაყუჩებული ვიჯექი კარგა ხანს და შემატყო, ხმის ამოღებას არ ვაპირებდი, მომლოდინე დუმილის შემდეგ თვითონვე გამიბა ლაპარაკი... ფრთხილობდა, მომეჩვენა, მთავარ სათქმელს გარშემო უვლიდა, სიტყვებს წონიდა. ცდილობდა ჩემთვის ვაგეგბინებინა, რას ნიშნავდა წელან ნათქვამი „სხვა ჯურის ხალხი“. აუგად არ მიხსენებიაო, პირიქით, კირსა და ლხინში ღმერთმა ეგეთები მოგცესო... მაგრამ თავისი თავის კითხული ხალხია და თავისუფალი გუნებისანი, თავის ნებაზე ცხოვრობენო... თუ რამე დაიჩემეს, ათასიც რომ უთხრა, ვერ გადაათქმევინებო.

ანანოს ნათქვამი მენიშნა.

— განა ეგ ცუდია? — ვკითხე.

— არც კარგია!

მარო მასწავლებელს იმდენად არ ვიცნობდი, მასზე თუნდაც ზერელე წარმოდგენა რომ მქონოდა, მაგრამ ზიზისთან, ასე თუ ისე, ახლოს ვიყავი; ხომ ამოიჩემა მსახიობობა და ჯერჯერობით ვერავინ გადაათქმევინა, ვერავინ გადაარწმუნა, ვერც დედამ, ვერც — სხვამ. მოულოდნელმა ეჭვმა შემაჩერა: ამოიჩემა კი? იქნებ ეს ამოიჩემა კი არა, სხვა რაღაცაა, რასაც ჩვენ ვერ ვხედავთ, ვერ ვგრძნობთ, რაც მას არსებობის აზრად მიაჩნია, ასულდგმულებს, აწვალებს, მოსვენებას უკარგავს?

— ოზო, ამას იმიტომ კი არ გეუბნები, ჩემს ნათქვამს დაუჯერო და ბრმად მიჰყევ... ვიდრე ნაბიჯს გადადგამ, მინდა, კარგად დაფიქრდე, — ანანომ ალმაცერად შემომხედა და ამ შემოხედვას გარკვეული მნიშვნელობაც მიანიჭა.

მე ვერ გავუძელი და თვალი ავარიდე.

— ზიზი ჩემს ხელში გაიზარდა და მისი ბედიც მაწუხებს. სხვა ბავშვებზე ნაკლებ არ მიყვარს, მაგრამ ასავალ-დასავალი ვერ გავუბნე, მის ქცევას ფიქრი ვერ მივაყოლე. — ანანო ცოტა ხნით ჩაფიქრდა. — ოზო, საათი რატომ არა გვაქვს, იცი?

რამდენი საათიც არ ვიყიდეთ, მამაშენმა დაშალა და ვერ ააწყო... გუგულიანიც, ჩვეულებრივი „გირებიანი“... ქალაქიდან ჩამოვიდოდა, ნაწილ-ნაწილ დაშლიდა, და ველარ ააწყობდა, თან იმას ამბობდა, — ამის აწყობას რა უნდაო! სოფელს გიჟად რომ არ მოენათლა, მე და პაპაშენი ამ ამბავს არც ვამხედდით... ეტყობა, ასეთი რამ ჭილაგით მოგვედგამს, მეც ეგრე ვიცი, კაცის ხასიათს გუნებაში დავშლი, და მერმე ისევ ავაწყობ ხოლმე, ზიზი კი ერთთავად მისხლტება, ჩემს ნებას არ მოჰყვება... არ მემორჩილება...

ამასობაში ორი ჭიქა პიტნის ჩაი დაველიე.

თითქოს გულდასმით, გულისყურით ვუსმენდი ანანოს, მთელი არსებით მაინც სხვაგან ვიყავი გადართული: გუშინდელი დღის დასასრული, ჩემი და ზიზის სადილობის დაბოლოება მაინტერესებდა და მაწუხებდა. ანანოს საუბრის მიზანი ჩემთვის ნათელი იყო, ყოველნაირად ცდილობდა დაესაბუთებინა, რომ ზიზი ცოლად არ გამომადგებოდა. მაგრამ ამ დასაბუთებისას ზოგი რამ ისეთი თქვა, რაც მერმე არაერთხელ გამხსენებია და რასაც ამ საუბრის გარეშე არასოდეს დავუფიქრებდებოდი.

თავის ტკივილმა, ასე თუ ისე, გამიარა, აღარც გული მერეოდა, შესაძლოა, პიტნის ჩაიმაც მიშველა. ამ შვების მიუხედავად შინაგანად მაინც გამოფიტული თუ დარბეული ვიყავი. არაფრის თავი არა მქონდა და არც მიფიქრია, რამე გავაკეთო-მეთქი, დარწმუნებული ვიყავი, ენერგია არ მეყოფოდა.

წვივები საშინლად მეწვოდა. ტკივილი ლოგინშივე ვიგრძენი და ფეხებიც იქვე დავითვალეიერე: მთლად დაკაწრული და დასისხლიანებული აღმომაჩნდა. სად დავიკაწრე, სად დავეხეტებოდი ნეტავი? ზიზი ალბათ ყველაფერს წვრილად მომიყვებოდა, მაგრამ ახლა მასთან შესახვედრად გული არ მიმიწევდა, მეგონა, ისეთ რამეს მეტყოდა, რაც ჩემსავე თვალში დამცემდა და დიდხანს სინდისის ქენჯნად გამყვებოდა. სინდისი ისედაც უკვე მქენჯნიდა, რადგან ჩემი გუშინდელი საქციელი ნამდვილად არაგულწრფელი და თვალთმაქცური იყო. მე არ მახსოვდა, რა ვუთხარი ბოლოს და ბოლოს ზიზის, მაგრამ ხომ მივისწრაფოდი, რომ არარსებული სიყვარული ისე მომეჩვენებინა, გამემქლავებინა და ამეხსნა, თითქოს ნაღდი

და გულწრფელი ვიყავი. ზიზიც ხომ გულისფანქალით ელოდებოდა ჩემგან ისეთი რაღაცის თქმას, რაც მისთვის, შესაძლებელია, გადამწყვეტიც აღმოჩენილიყო?

— იქნებ მამაჩემის საათისა არ იყოს, შენც დაშალე ზიზის ხასიათი და მერმე ველარ ააწყვე? — ჩემთვის მოულოდნელად ვკითხე ანანოს.

— შენ არ გეწყინოს, ოზო, მამაშენმა მხოლოდ დაშლა იცოდა, ისიც საათისა... თუ გაიგე, მე სულ სხვა რამ გითხარი.

პალტო ჩავიცვი და გარეთ გამოვედი. სრული შთაბეჭდილება შევუქმენი ანანოს, რომ სკოლაში მივდიოდი, სინამდვილეში იქ მისვლა არც მიფიქრია, — რადგან კლასში ჯდომასა და გაკვეთილების მოსმენას ვერ გავუძლებდი.

გარეთ უქარო, ღრუბლიანი ამინდი დამხვდა. სიცვიის შესახებ დრად ავიბუხე და თავი პალტოს საყელოშიც კი ჩაერგე, მაგრამ მალევე დავრწმუნდი, სულაც არ ციოდა, პირიქით, მომეჩვენა, საკმაოდ თბილოდა კიდევ. მიწამდე ჩამოქნძილი მოშავო-მონაცრისფრო ღრუბლები თითქოს შემოდგომის გადაუღებელ წვიმებს გვპირდებოდა, თუმცა ამას ჩემს გუნება-განწყობილებაზე ოდნავადაც არ უმოქმედია. ახლა ჩემთვის სულერთი იყო ეს ამინდის ცვალებადობაც, აქაურობაც, და აქ გატარებული ერთფეროვანი, ზოგჯერ სასოწარკვეთილი, ზოგჯერ კი იმედით აღბეჭდილი და მაინც დაუნდობლად გულისშემალონებელი დღეებიც.

გზად მიმავალმა უცებ ვიგრძენი, რომ უთბილისოდ არ შემეძლო არსებობა, თითქოს გარეთ სწორედ ამ გრძნობამ გამომაძევა, თორემ ეს რომ არა, შინიდან ფეხს ვერავინ მომაცვლევინებდა. ჯერ ვიფიქრე, ასეთი განუხორციელებელი ოცნება მე თვითონ მოვიგონე, ბავშვივით ავიჩემე და ავიკვიატემეთქი, მაგრამ თანდათან ვრწმუნდებოდი, ეს არც ბავშვური აჩემება და არც სულელური აკვიატება იყო. თბილისი ცოცხალ არსებასავით მიხმობდა... ძახილი, როგორც ვთქვი, მოულოდნელად გავიგონე, უფრო ვიგრძენი და ისეთი გულისცემა თუ გულისფრიალი ამიტყდა, მეგონა, გული საცაა გამისკდება. მეთქი. თბილისი ყოველთვის მახსენდებოდა და მენატრებოდა, მაგრამ დღეს ჩვეულებრივ გახსენებას არ ჰგავდა, არც ნატვრას, ეტყობა, იგი გუშინდელ ღვინოსავით ნელ-ნელა მაბრუნებდა და მიპყრობდა, მერმე ერთბაშად დამკრა და დამარეტი-



ანა, თითქოს დამსკდარ ძარღვებიდან სისხლმა იფეთქა და კე-  
ლარ ვაკავებდი.

ამ გაურკვევლობაში მაინც ვცდილობდი კონკრეტულად და-  
მენახა ანდა წარმომედგინა ის, რაც ასეთი ძალით მიხმობდა  
და მიზიდავდა... რა მიხმობდა?

სახლი?..

ეზო?..

უბანი?..

სკოლა?..

ამხანაგები?..

ანდა მტკვარი?..

მტკვარი, რომლის ნაპირზეც გავიზარდე, რომელსაც გავუ-  
შინაურდი და შევეთვისე?

იქნებ ამ ძლიერი და ჩემთვის ბუნდოვანი ლტოლვით ინილ-  
ბებოდა სოფლიდან გაქცევის, თავის დაღწევის სურვილი?  
მაგრამ რას გავუბოდი, რას მინდოდა გავქცეოდი?!

სოფელში ჩემს სასიკეთოდ და საკეთილდღეოდ იყო წარ-  
მართული ცხოვრება. ამ ოთხი წლის მანძილზე თბილისში მარ-  
ტო რომ დავრჩენილიყავი, კაცმა არ იცის, რა ღღეში ჩავვარ-  
დებოდი, მხოლოდ უგუნურსა და უმადურს შეეძლო ეს არ  
დაენახა და არ ეგრძნო. ქვეყნად რა ხდებოდა, კარგად ვიცო-  
დი და ყველაფერი მძაფრად მქონდა განცდილი. ნურავინ იფ-  
იქრებს, კავკასიონის უზარმაზარ მთებთან მიუყუთულ პატარა  
სოფელში თითქოს არ გამოჟონა იმ უბედურებამ, რაც ომმა  
კაცობრიობას მოუტანა. რა თქმა უნდა, ომის გამანადგურე-  
ბელ ცეცხლს უშუალოდ ამ მიწაზე არ გადაუვლია, იგი კავ-  
კასიონს ჩრდილოეთიდან — მეორე მხრიდან მოეხეთქა, მაგ-  
რამ ეს ხათქახუთქი, გრგვინვა და ზანზარი აქეთაც გვატყდებო-  
და თავზე რისხვად. არც ის საშინელი წარღვნა გაბრუნებულა  
თავისთავად უკან, მან მილიონობით ადამიანის სიცოცხლე შე-  
იწირა და იმ შეწირულებში ჩვენი პაწაწინა სოფლის ორასი-  
ოდე მკვიდრიც ერია. სოფელმა თავისი ჰქნა, რაც შეეძლო, იმა-  
ზე მეტი სისხლი გაიღო და ახლა ცრემლიანი იმედით, სევდი-  
ანი და მწუხარე სიხარულით ელოდებოდა ოთხწლიანი ტანჯ-  
ვის დაბოლოებას.

სოფელთან ერთად მეც ველოდებოდი... და ისიც მქონდა  
შეგნებული, რომ სწორედ აქ, ჩვენს სოფელში უნდა შეეხვედ-

როდი ამ ბედნიერ დღეს. სხვანაირად ძალიანაც რომ მდომოდა ვერ წარმოვიდგენდი, გარდა ამისა, მამაჩემმა რაღაც დამტოვა ბოლომდე ალბათ იქვე ვეგულებოდი, ომში წასვლისას აქი დამიბარა: თუ დავბრუნდი, აქ დავბრუნდებო. და იმ იშვიათი წერილებითაც, რომლებსაც ფრონტიდან გვიგზავნიდა ხოლმე, ერთს ვევედრებოდა ანანოს, — ეგ ბიჭი მანდ საღსა-ლაშათი დამახვედრე და მერმე მე ვიცი და ჩემმა კაცობამო. ისე, რომ მე შეგნებული მქონდა და ვიცოდი, ჩემი წასვლა აქედან არ შეიძლებოდა. მაგრამ შეგნება ერთია და ადამიანის სულიერი ძვრების ამოხსნა და დაოკება — მეორე.

მე თბილისში მინდოდა ყოფნა. „მინდოდა“ ცოტაა. იგი ოდნავადაც ვერ გამოხატავს იმ სულიერ აფორიაქებას, რომელიც შიგნიდან მარყევდა, სულსწრაფული მოუთმენლობით მავსებდა და გარდასულ და დავიწყებულ დღეთა შესახვედრად მიბიძგებდა, თითქოს ჩემი გაქცევა გარდუვალი აუცილებლობით იყო გამოწვეული, თითქოს დღესვე თბილისში რომ არ აღმოვჩენილიყავი, ან თბილისი დაინგროდა, ან მე გავთავებოდი აქვე.

სწრაფად მივაბიძგებდი, გარეშეთ რომ ეფიქრათ, ვითომ საქმეზე აგვიანდებო. სკოლისკენ მიმავალ გზას გვერდი ავუქციე და ვიწრო, ოღრო-ჩოღრო ორღობეებით სოფელი უკან მოვიტოვე. ძნელი კია, სოფელი გაიარო და გზად არავის გადაეყარო, მაგრამ ამჯერად გამიმართლდა, მახლობელთაგან არავინ შემხვედრია, ვიღაც-ვიღაცეებს კიდევ მივესალმე, სოფლად ეს მიღებულად ითვლება, სრულიად უცნობებიც კი ესალმებიან ერთმანეთს.

მე ჯერ არ ვიცოდი, საით მივდიოდი, რას ვაპირებდი, რას მოვიმოქმედებდი, ერთს ვცდილობდი მხოლოდ: აქაურობას მალე გავცლოდი, რათა მერმე შეფიქრა, ანუ დამშვიდებულს შემემუშავებინა ისეთი გეგმა, რომლის მიხედვითაც, დღეს თუ არა, ხვალ უსიკვდილოდ ამოვყოფდი თავს თბილისში. ყველაფერი ზუსტად უნდა ამეწონა და გამეზომა, ყველა სიძნელე თუ დაბრკოლება წინასწარ უნდა გამეთვალისწინებინა.

სოფლიდან პირდაპირ ნახნავეებში გავედი და მარჯვნივ გავუხვიე, გეზი გზატკეცილისაკენ ავიღე. სიარული ძალზე მიჭირდა, მაგრამ უკან დასახვევი გზა აღარ მქონდა; ჩემში უეცრად აღმოვაჩინე ჩემს შეგნებასა და ნებისყოფაზე უფრო ძლი-

ერი მუხტი, რომელიც უსიტყვოდ მიმორჩილებდა და ამობრუნებულ ბელტებს შორის უგეზოდ მიმაქანებდა გარკვეული მიზნისაკენ.

დაუსრულებლად მივიდოდი, ზოგჯერ ფეხი ღრმა ხნულში ჩამივარდებოდა, წავიფორხილებდი, ზოგჯერ დავეცემოდი კიდევ. წამოდგომა მიჭირდა, ვისაც ნახნავეებში უვლია, იცის, როგორია იქ სიარული. ვჩქარობდი, კახეთს საწვიმარი ღრუბლები ჩამომხობოდა და უცებ რომ მოეწვიმა, აქედან ველარ გავაღწევდი, წელამდე ტალახში ჩავეფლობოდი.

თვალწინ ყვაეების გუნდი ამიფრინდა და ყრანტალით სადღაც ჩემს ზურგს უკან გადაიკარგა.

ჩიუტად მივიწვევდი, გადახნულ მიწას ბოლო არ უჩანდა. სწორ გზას ავცდი-მეთქი, — შევჩერდი და ირგვლივ მიმოვიხედე: უკვე იმდენი გამომივლია, უკან დაბრუნება ნამდვილად უაზრობაა-მეთქი, — გავიფიქრე, ნახნავეებში სულელურად რომ არ შემოვხეტებულყავი და სოფლის კიდეს ადამიანურად გავყოლოდი, აქამდე ალბათ გზატკეცილზე ვიქნებოდი დამდგარი, დროსაც მოვიგებდი, ასე უღმერთოდ აღარ დავიღლებოდი და არც გულ-მუცელს ამოვითქვეფედი.

იმედი რომ გადავიწურე, — ამ ბელტებს თავს ველარ დავაღწევ-მეთქი — წინ, ასიოდე მეტრის მანძილზე სოფლისკენ მიმავალი ურემი დავინახე. კოლუმბის მეზღვაურებს ალბათ ისე არ გახარებიათ ნაპირის გამოჩენა, როგორც მე ურმის დანახვა გამიხარდა... თითქოს ზღვიდან გამოვედი დაღლილი და გასაფათებელი, სულის მოსათქმელად იქვე, გზის პირას მივეგდე. ეტყობა, წუხანდელმა ნასმურობამაც მიწია, ისევ მერეოდა გული და თავიც მისკდებოდა. ჩემი ძველი ჭლანები წავიძრე, შიგ ჩაფშენილი მიწა გადმოვყარე, ჩავიცვი... როდის-როდის წამოვდექი და ინერციით განვაგრძე გზა. ვიცოდი, პატარა აღმართს რომ ავათავებდი, იქიდან უკვე ალაზნის ველი გამოჩნდებოდა და მერმე სულ თავქვე მომიწევდა სიარული.

აჰა, ალაზნის ველიც გამოჩნდა!

აღარც კი მახსოვს, აქედან რამდენჯერ გადამიხედავს ამ საოცრებისათვის, სწორედ აქედან, აი ამ წერტილიდან, რადგან ალაზნისაკენ სხვა გზით არ მივლია და არც მიძებნია სხვა გზა.

აქედან ალაზნის ველი ორჯერ ერთნაირი არასოდეს მინახავს, სულ სხვადასხვაგვარად, ნაირფერად მაჩვენებდა თუ მიმქლავნებდა თავს, მაგრამ ყოველთვის ერთნაირ გრძნობას ბადებდა და ერთსადიამავე ყიჟინას ამომგლეჯდა ხოლმე მკერდიდან:

— აუუჰ!

მძიმე და გულჩათხრობილი დღეა, კავკასიონის მთები არ მოჩანს... ღრუბლებს კახეთის მიწა თავიდან ბოლომდე დაუღაბლებია, მთა და ბარი ერთი სიმალლით გაუთანაბრებია. ეპკიც კი შეგეპარება, რომ ამ ველს მიღმა გოლიათი მთებია ცად ატყორცნილი, მთები, რომლებიც მზიან ამინდში ვარდისფერი, გამჭვირვალე ბურუსით ათრთოლებულ სივრცეს, მიწას, ირგვლივ ყველაფერს, არარეალურ, ზღაპრულსა და სიზმარულ იერს ანიჭებს, ახლა ეს ყველაფერი დაბალი და ნაცრისფერია, ანუ ერთფეროვანი, მიწა თითქოს ცის ანარეკლია, მხოლოდ ერთგან, შორს, მარცხნივ ალავერდის თეთრი ტაძარი ანთია სანთელივით და მთელ სივრცეზე აქა-იქ, ნაწვეტ-ნაწყვეტ ალაზანი თუ გაიელვებს ხოლმე.

მე თბილისში დავიბადე და გავიზარდე, ძველ უბანში, ჩულურეთი რომ ერქვა და მტკვრის ნაპირს მიჰყვებოდა ყოფილი ვორონცოვის ხიდიდან მუხრანის ხილამდე. ეს იყო ჩემი ბავშვობის ქვეყანა: უბანს მტკვარზე დაკიდებული აივნისანი სახლები, მდინარის წისკვილები, მყუდრო ეზოები, ვიწრო ქუჩები, შესახვევები, ჩიხები, პატარ-პატარა მალაზიები და დუქნები, თონეები და ღვინის სარდაფები, სამჭედლოები და სამღებროები ჯერ კიდევ შემორჩენოდა და მთელი ქალაქის წინაშე თავის მოწონებასაც ცდილობდა, როგორც ძველისა და სხვაგან დავიწყებულის შემნახავი და პატივისმცემელი...

სულ მეჩვენებოდა, ამ სამყაროდან არკი წამიყვანეს, მის შუაგულს ძალით მომწყვეტეს და სხვაგან მომისროლეს. ბავშვობისას არაერთხელ მიგრძენია, უთბილისოდ, უფრო ზუსტად, ჩემი უბნისა და განსაკუთრებით მტკვრის გარეშე ყოფნა არ შემეძლო. ამას უფრო ზაფხულობით ვგრძნობდი, როცა ჩვენებს ქალაქიდან გავყავდი დასასვენებლად. გავიდოდა მცირე დრო და შემეყრებოდა სევდა ჩემი უბნისა, ჩემი მდინარისა, რომლის ნაპირზე აღმოვცენდი და ისე შევისისხლხორცე, თუ მისი ხმა არ მესმოდა, ჩემთვის სიმშვიდე არ არსებობ-

და. მტკვრის ხმაური ჩემთვის სიჩუმე იყო და სიმყუდროვის პირველი ნიშანი.

კარგად მახსოვს, ჩვენს სახლში სტუმარი თითქმის არ იღეოდა, მოდიოდნენ სადილად, ვახშმად. ანდა უბრალოდ — მურაბიანი ჩაის დასალევად, გულისგადასაყოლებლად, საჭორაოდ.

ამ დროს საღამოს სიმყუდროვეში ხშირად გამიგონია შემფოთებული შეძახილი სტუმრისა, რომელმაც ეს-ესაა მიაყურა გარედან შემოდწეულ წვიმის თქარუნის მსგავს ხმას.

— ეს რაა, წვიმა წამოვიდა?!

— არა, მტკვარი ხმაურობს. — შშვიდად უპასუხებდა დედა და საბოდიშო ღიმილით ამშვიდებდა წვიმისათვის მოუშზადებლად, შილიფად ჩაცმულ სტუმრებს, რომელთაც შემფოთება თუ წუხილი ამ ხმაურის პირველდომჩენისაგან გადასდებოდათ.

ასე მეორდებოდა ყოველთვის, მნიშვნელობა არ ჰქონდა, სტუმარი პირველად იყო ჩვენთან, მეორედ თუ მესამედ, რადგან ძველი დავიწყებოდათ და კვლავ შემფოთებულები კითხულობდნენ:

— ეს რაა, წვიმა დაიწყო?!

— არა, მტკვარი ხმაურობს. — ამშვიდებდა დედა და ახლაც მკრთალად იღიმებოდა.

— ახ, მტკვარი! — იტყოდა ვინმე უკვე რამდენჯერმე შემცდარი და გაცბუნებული, მერმე ნათქვამს გესლსაც გაურევდა გულმავიწყობის საკომპენსაციოდ, — მართლა, სულ მავიწყდება, თქვენ ხომ მდინარის პირას ცხოვრობთ... როგორც სოფელში.

მაშინ ყველა სოფელი ამქვეყნად მდინარის პირას მეგონა გაშენებული. სტუმრის ირონია ალბათ კარგად არ მესმოდა და არც მაინტერესებდა, საით იყო მიმართული ან ვისთვის იყო გამიზნული, მე ჩვეულებრივად მსიამოვნებდა, სტუმრებს რომ ეშლებოდათ და მტკვრის ხმაური წვიმის შხაპუნად თუ თქარუნად ეჩვენებოდათ. დავიძაბებოდი, სმენას გავამახვილებდი და ახლა უკვე მეც მესმოდა მდინარის შშვენიერი შრიალი, რომელიც ჩემთვის თითქოს იმ წუთს აღმოვაჩინე. მერმე აივანზე გავიდოდი და საღამოს ბინდბუნდში მანამდე ჩავცქე-

როდი ტალღების კრთომას, სანამ ეს საოცარი ხმები ჩემი სმენის მიღმა არ აღმოჩნდებოდა.

წლების მანძილზე-თანდათან მივიშინაურე მტკვარი, შევეჩვიე, გავითავისე, დედა მიშლიდა, თორემ შემეძლო მთელი დღე — დილიდან დაღამებამდე — მტკვრის ნაპირზე გამეტარებინა, არც საჭმელი მინდოდა და არც სასმელი, ჩემთვის რომ ეკითხათ, აღარც სკოლაში წავიდოდი. ახლაც ვერ ამიხსნია ასეთი გიჟური სწრაფვა ამ მდინარისაკენ. ქუჩიდან ეზოში შემოსული პირველად მტკვარს გადავხედავდი, თანაც ისე ვღელავდი, თითქოს იქ აღარ დამხვდებოდა.

მტკვარს ვაკვირდებოდი და ვიმახსოვრებდი მის ხასიათს, ზნეს, დინებათა მიმართულებას, ფერს, იერს, რადგან ჩემ მდინარედ ვთვლიდი. მე ერთთავად მენავეებთან, მეთევზეებთან და მეწისქვილეებთან ვტრიალებდი, ყურს ვუგდებდი მათ საუბარს. განსაკუთრებით მსიამოვნებდა, თუ მტკვარზე ლაპარაკობდნენ. მტკვარი ხშირად იცვლიდა ფერს და უკვე ბავშვმა ვიცოდი მიზეზი ამ ფერის ცვალებადობისა: თუ მოყვითალო-თიხისფრად მოედინებოდა, ეს იმას ნიშნავდა, რომ ბორჯომის ხეობაში ან უფრო იქით, ჩემთვის იმ დროს აბსტრაქტულ მესხეთში გაწვიმებულიყო, ხოლო თუ მდინარე შავად ამღვრეულ, ქვიშიან ტალღებს მოაგორებდა, ეს ფერი არაგვის ედებოდა ბრალად — არაგვის ხეობაში წვიმდა...

სოფლიდან გამოქცეული გზისპირა ფერდობზე ვზივარ და ალაზნის ველს გადავცქერა.

ალაზანი საკმაო მანძილით იყო ჩვენს სოფელს დაშორებული, მიუხედავად ამისა, სოფლის ბავშვებთან ერთად ხშირად დავდიოდი ალაზანზე სათევზაოდ თუ საბანაოდ, სწორედ ამ გზით მივეშურებოდი და აქედან რომ გადავხედავდი მდინარეს, გული გადამიქანდებოდა აღელვებისაგან, მაგრამ ახლოს მისულს რატომღაც აღარ მალეღვებდა მშვენიერ ჭალებად ატეხილი, დროდადრო განტოტილი ალაზნის ნაპირები. გაშინაურებასა და გათავისებას ვერ ვახერხებდი, თითქოს მეშინოდა კიდევ მისი და ვეკრძალებოდი. საჩემოდ ერთხელაც ვერ მოვიხელთე, თითქოს სხვას ეკუთვნოდა და ამიტომაც მისხლტებოდა ხელიდან... ახლა ისე დავცქერა, როგორც დაკარგულ შესაძლებლობას. გული ყელში მებჯინება და მოულოდნელად განშორების სევდა მიპყრობს...

წამოვდექი, ტანსაცმელი დავიბერტყე, პალტოს საყელო ავიწიე და საქმიანად განვაგრძე გზა. უცებ გავიგონე ნაცნობი ხმა და ადგილზევე გავშეშდი.

— ოზო!

რა თქმა უნდა, ეს ანანოა!

ანანოს ხმის გაგონებისთანავე მივხვდი: დღევანდელი გეგმა ჩამეფუშა და ჩემი თბილისის გამგზავრება კარგა ხნით გადაიდო. ერთი კი გავიფიქრე, გავიქცევი, ანანო რას დამეწევა-მეთქი, მაგრამ როგორც კი უკან მოვიხედე და დაღლილსა თუ გატანჯულ სახეს, მოშტერებულ მწვანე ბივრიტისფერ თვალებს წავაწყდი, მუხლები მომეკვითა და ჩავიკეციე.

ათიოდე ნაბიჯზე იდგა, თავშალმობხვეული, ზემოდან დამცქეროდა და ხმას არ იღებდა, იქნებ ვერც ახერხებდა სიტყვის თქმას, არ ვიცო. ერთხანს ასე ვიდრეკით, მე მუხლჩაქეცილი, ის — მღუპარედ თავსწამომდგარი. ამ დღემილში მთელი არსებით ვიგრძენი, ანანო ხსნასავით მომევილინა. რადგან ჩემი სულიერი ღტოლვანი და მისწრაფებანი საგრძნობლად აჭარბებდა ჩემს ფიზიკურ შესაძლებლობას.

— შენ რა, ფეხზე ვერა დგები? — მკითხა ანანომ.

— ახლავე! — მოკლედ ვუპასუხე და წამოვდექი.

— ამ აღმართს ამოვიღი, თუ მოგეხმარო?

— ამოვივლი.

ანანო გატრიალდა და თვალს მიეფარა. ნამდვილად გამოიჭირდა იმ პატარა აღმართის ავლა, ფეხის კუნთები მტკიოდა და სხეულიც დამმძიმებოდა. აღმართი რომ ავათავე, დავინახე: სოფლისკენ მიმავალ სწორსა, და, როგორც მეჩვენებოდა, დაუსრულებელ გზას ანანო მიჰყვებოდა თავდახრილი, არ ჩქარობდა, ნაბიჯს ფრთხილად ადგამდა, თითქოს ელოდებოდა, როდის დამეწევაო...

მას შემდეგ ბევრმა წყალმა ჩაიარა, მაგრამ აქამდე არ მავიწყდება დაღვრემილი გზატკეცილი, რომელსაც უჩუმრად მივყვებოდით ორნი: ანანო სამიოდე ნაბიჯით წინ მიდიოდა, მე კი თოკგამობმულ ხბოსავით მორჩილად მივდედდი უკან. არ მავიწყდება, რადგან სწორედ იმ დღეს ჩემ წინ მიმავალმა, თავშალმობხვეულმა ქალმა პირველად მაგრძნობინა, რომ მე, ხშირად სხვის საქციელთა განმკითხავ ჰაბუკს, თუნდაც მახლობელი ადამიანის თანაგრძნობა, მისი ტკივილისა და საწუ-

ხარის გაზიარება არ შემეძლო. წინასწარ ვიცოდი, ანანო არც გაქცევის მიზეზს შემეკითხებოდა და არც დამტუქსავდა უგუნური საქციელის გამო. ისე კი უსათუოდ რაღაცას მეტყვოდა, თითქოს სხვათა შორის, წყნარად, ღიმილნარევიად და ეს ნათქვამი, შესაძლოა, უფრო მწარე და მტკივნეული გამომდგარიყო, ვიდრე დატუქსვა.

ასეც მოხდა.

წელანვე ვთქვი, უკან მოვიხედე და ანანოს დაღლილი და გატანჯული სახე დავინახე-მეთქი. მერმე ფეხდაფეხ მიმდევარს სინდისმა დამიწყო ქენჯნა... მართლაც, რისთვის ანდა რა უფლებით მივაყენე ამ ქალს ამდენი ტკივილი? თითქოს ის არ ეყოფა, რომ მაჰმეფს, მაცმეფს, მინახავს, ახალი სადარდებელი გავუჩინე, ლობე-ლობე, შარა-შარა დამდევს, რამე სისულელე არ ჩაიდინოსო. გუნებაში გადავწყვიტე, ამგვარი ქარაფშუტობითა თუ თავქარიანობით ანანოს აღარ შევაწუხებ-მეთქი, მაგრამ თვითგვემური ფიქრები ანანომ შემაწყვეტინა.

— ოზო, — მომიბრუნდა და გამიღიმა, მერმე თითქოს ხუმრობით მითხრა, — ამ ყოფაში ჩავარდნილს მტოვებდი, ბიჭო?!

კიდევ კარგი, მიტრიალდა და გზა განაგრძო, არ მინდოდა ენახა, უცებ როგორ გავწითლდი, სახე როგორ წამომენთო. რა თქმა უნდა, იმწამსვე გუშინდელი დილა გამახსენდა, მწარედ ჩაფიქრებული ანანო და ის წუხილი და ტკივილი, რომელიც ფრთხილად გამიმჟღავნა. ისიც გამახსენდა, კარიაულებისაგან მომავალი ნახევრად ბნელ ეკლესიაში რომ აღმოვჩნდი. იქ ხომ ანანო იდგა საკურთხეველთან დანთებულ სანთელს მიშტერებული. ეტყობა, ტკივილი უფრო მძაფრი იყო, ვიდრე მე ჩავთვალე ან მეგონა და მთელი დღე, შემდეგ საღამო, საკუთარ გრძნობებს აყოლილმა უზრუნველად გავატარე, არც ანანო გამახსენებია და არც საბა.

იქნებ ჭერჯერობით შინაგანად არ ვიყავი მზად სხვისი თანაგრძნობისათვის, არ ვიცოდი, რა უნდა გამეკეთებინა, როგორ უნდა მოვქცეულიყავი ან რით გამომეხატა ეს თანაგრძნობა, მაგრამ, როცა თავს ჩავუბრუნდი, ვიგრძენი, რომ მე არ მაწუხებდა ანანოს საწუხარი, არც ანანოს სატკივარი მტკიოდა. ვითომ ბოლომდე ვერ გავიგე, ვინ იყო საბა და რა ურთიერთობა ჰქონდა ანანოსთან? ის, რასაც მე ვფიქრობდი, რისი ეჭვიც მქონდა, თანაგრძნობით კი არ მმსკვალავდა, პირიქით, მაღიზიანებდა.



მაგრამ ანანო ხომ იტანჯებოდა?!

მთავარი მაინც სხვა იყო... ანანომ გამანდო საიდუმლო, რომელსაც ალბათ ქვეყნად არავის უმხელდა, ეტყობა, მიიჩნია, რომ მე ვარ ის ადამიანი, ვისთვისაც შეიძლებოდა დაფარული ტკივილების გამჟღავნება... ერთი სიტყვით, კაცად მცნო, მალიარა და მენდო. ალბათ, ჩემგან დიდ ნუგეშის ცემას არც მოითხოვდა, მხოლოდ უნდოდა გვერდით ვყოლოდი, როგორც თანამდგომი, ვისაც სათქმელს ეტყოდა, ვისთანაც გულს გადაშლიდა და მოიოხებდა.

5

ანანომ თუნუქის ღუმელი ჩემს ოთახში შემოიტანა, სიპატარავის გამო ოთახს ნაკლები შეშა სჭირდებოდა გასათბობად. აქ ვსაუზმობდით, აქვე ვსადილობდით და ვევახშობდით, ძილის დრო რომ დადგებოდა, ანანო დასაძინებლად დიდ ოთახში გადიოდა, მე მარტო ვრჩებოდი და კარგა ხანს ვკითხულობდი წიგნს ან ჟურნალს, ან გაკვეთილს ვამზადებდი. მხოლოდ ზამთრობით ვახერხებდი წიგნების კითხვას, სხვა დროს მოცლა არა მქონდა: ადრიანი გაზაფხულიდან ზაფხულის მიწურულამდე მოსწავლეები თითქმის კოლმეურნეობის მინდვრებში ვალამებდით: ვთოხნიდით, ვმარგლავდით, ვაზს ვფურჩნიდით, დაღლილ-დაქანცულნი გვიან ვბრუნდებოდით და გაკვეთილებსაც რის ვაი-ვაგლახით ვერეოდით.

და, აჰა, ჩამორიგდა მოსაწყენი და ერთფეროვანი ზამთრის დღეები, სკოლიდან დაბრუნებული ისევ ვმეცადინებო, ისევ ათასჯერ წაკითხულ წიგნებსა და ძველ ჟურნალებს ვფურცლავ-აღარც ეს საქმე მიტაცებს, რადგან ყველა წიგნი და ჟურნალი ზეპირად ვიცი. ჩემს ოთახში თბილა და ანანოც მთელი დღე აქ ტრიალებს, ან ქსოვს, ან აუთოვებს, ან გაცვეთილ წინდებსა კემსავეს. არავითარ ყურადღებასა და ნუგეშს არ მოითხოვს ჩემგან, თითქოს კმაყოფილია, რომ მე შინ ვყავარ მოყურებუ-ლი, მივლის და ზრუნვას არ მაკლებს... თითქოს ქვეყნად სხვა არა უნდა რა, მხოლოდ ერთადერთი მიზანი ასულდგმულებს: ომიდან დაბრუნებულ ძმას საღსალამათი შვილი დაახვედროს, მაგრამ ბრმა და უგრძნობელი უნდა იყო, რომ არ შეამჩნიო ის ცვლილება, რომელიც ანანომ ასე მოკლე დროში განიცადა.

ბევრი ლაპარაკი არასოდეს ჰყვარებია, ბოლო ორი-სამი კვირის მანძილზე კი სულ მთლად დამუნჯდა, უფრო გულჩათხრობილი და პირქუში გახდა. ზოგჯერ სინანულით გავიფიქრებდი, — ასე თუ გააგრძელა, ეს ქალი გაზაფხულს ვერ მიატანს-მეთქი. ერთი-ორჯერ გართობაც ვცადე, ბავშვობისდროინდელი რაღაც გავიხსენე, თბილისური, ჩემი აზრით — სასაცილო ამბავი. არ ამყვა, არ დაინტერესდა. ვერ გავიგე, მისმენდა თუ არ მისმენდა, გარეგნულად არაფერი დასტყობია. მე კი, სულელი, სიცილით ვიქაჭებოდი. მერმე ცუდ გუნებაზე ვდგებოდი, ღუმილი გამთიშველად მოქმედებდა და ჩემსავე არსებაში, როგორც უფსკრულში, მიმაქანებდა.

მაშინ, როცა აქაურობა მივატოვე და გავიქეცი, არ ვიცოდი, რას გავუბოდი, მაგრამ ახლა თუ გავიქეცი, უკვე მეცოდინება, რას გავუბრვიარ... ველარ ვუძღებ დაგუბებულ ღუმელს, რომელმაც ანანოსთან ერთად მძიმე გარსში მომაქცია და ამ გარსს თავი რომ დავაღწიო, იმედიც არა მაქვს.

იქნებ ამიტომაც ჩვენს მკვდრულ მღუმარებაში ნელ-ნელა შემოვიტყუე ზიზი, წარმოსახული სიახლოვითა და საუბრებით როგორმე მაინც რომ დამეჩლვია მოჩვენებითი მყუდროება, სიჩუმე, რომელიც საშინლად მძაბავდა და ჩემსა და ანანოს შორის წარმოქმნილ პატარა ბზარს თანდათან აფართოებდა და აღრმავებდა. საღამოობით ზიზიზე ფიქრი და მასთან სიახლოვის წარმოდგენა მოთხოვნილებად მექცა, ხოლო ამგვარი ფიქრისა და წარმოსახვის შემდეგ უკვე თავს ვაჭერებდი და ვარწმუნებდი, — ზიზი მიყვარს-მეთქი. ის, რაც იმ დღეს გარდამხდა, არც ისე სამარცხვინო აღმოჩნდა, როგორც მაშინ მომეჩვენა და რისთვისაც რამდენჯერმე გავწითლდი და სინდისმაც შემაწუხა. ერთადერთი, რითაც აუნაზღაურებელი ზარალი მივაყენე მარო მასწავლებლის ეზოს, ეტყობა, ის იყო, რომ მთვრალს თურმე ვარდის ბუჩქები გადამიჩვეგია. თითქოს ნახირს გადაუვლიაო, — ასე თქვა ზიზიმ. სამაგიეროდ მეც გვარიანად დამეკაწრა ფეხები და ნაკაწრი კარგა ხანს მეწოდა. სამიოდე დღის შემდეგ, რა თქმა უნდა, ეს ყველაფერი აღარავის ახსოვდა. იმას კი, რაც ჩემში მოულოდნელად აღორძინდა, ანანოს ვუმალავდი, რადგან კარგად ვიცოდი მისი აზრიც, დამოკიდებულებაც ზიზისა და, საერთოდ მათი ოჯახისადმი. ამიტომ ვითომ წიგნებში ჩაფლული ვფიქრობდი ჩემთვის, ხანდა-

ხან ფიქრშივე ახლოს მოვისვამდი ზიზის, ველაპარაკებოდი და ვეკამათებოდი, თან ათას სისულელეს ვეუბნებოდი და ვუმტკიცებდი... სწორედ ერთ-ერთ ასეთ საღამოს გავარკვიე, რომ მე არარაობა ვარ, უკვე მეთე კლასს, ანუ საშუალო სკოლას ვამზთავრებ და წარმოდგენაც კი არა მაქვს, სკოლის დამთავრების შემდეგ რას ვაპირებ, რისი გაკეთება მსურს. ზიზიმ იცოდა, რა უნდოდა, სად მიდიოდა: გზა ჰქონდა არჩეული, მე — არა. მას ჰქონდა გარკვეული და ნათლად წარმოდგენილი მიზანიც, რომლისკენ ლტოლვას ვერავენ გადაეღობებოდა, თუმცა ამას ზოგიერთნი დაუფარავად ცდილობდნენ კიდევ. მე ისიც არ ვიცოდი, სად უნდა გამეგრძელებინა სწავლა, ან მინდოდა კი სწავლის გაგრძელება? ზიზიმ ერთი-ორჯერ, თითქოს სხვათა შორის, მკითხა კიდევ — რას ფიქრობ, რას აპირებო? მაგრამ მე გაჩუმება და სიტყვის ბანზე ავდებ ვამჯობინე, რადგან ამ კითხვაზე პასუხის გაცემა არ შემეძლო, თუნდაც იმიტომ, რომ მანამდე ასეთი კითხვები არ მაწუხებდა და არც დაუფიქრებულვარ: — ამ ცხოვრებისაგან რა მინდა ან თვითონ ცხოვრება ჩემგან რას მოითხოვს-მეთქი? ამასობაში ზიზი მიდიოდა წინ, ვერაფერი აჩერებდა: ლექსებს, მოთხრობებს, მონოლოგებს იზეპირებდა, სკოლაში თეატრალიზებულ საღამოებს მართავდა, იბრძოდა, იღვწოდა... ერთი სიტყვით, თავისი დაუმცხრალი ენერჯითა და ნიჭით ყველას აცვიფრებდა.

მე კი საღამოობით ჩემს ოთახში ანანოსთან ერთად გამოკეტილი ისევ ზიზიზე ვფიქრობდი და მასთან შეხვედრის სახვალის გეგმებს ვაწყობდი. გეგმა ძალზე მარტივი იყო: სკოლაში მიმავალი ზიზი უსათუოდ ჩვენი სახლის წინ ჩაივლიდა. დილით დაუღუდარაჯდებოდი და გავყვებოდი, მერმე სკოლამდე ერთად ვივლიდით და თუ გზაში შევეთანხმდებოდით, სკოლიდანაც წყვილად დავბრუნდებოდით უკან... ასეთ აბსურდზე ვხარჯავდი დროს... ჩემი გეგმის განხორციელებას სრულებითაც არ სჭირდებოდა წინასწარი მზადება და საგანგებო თადარიგის დაჭერა. ჯერ ერთი, ზიზი არც მემალებოდა და არც თავს მარიდებდა, პირიქით, სულ ცდილობდა ჩემს ახლომახლო ეტრიალა. მეორეც, ჩვენთვის არავის დაუშლია და აუკრძალავს, არამც და არამც ერთმანეთს არ შეხვდეთო...

მაგრამ ჩემთვის სხვა რამ იყო გაუგებარი და აუხსნელი: როგორც კი დილით ფანჯრიდან დავინახავდი სკოლისკენ მიმავ

ვალ ზიზის, მასთან შეხვედრის ყოველგვარი სურვილი მიქრებოდა. ასევე მემართებოდა სკოლაშიც, ათასნაირად ვთვალთმაქცობდი, დასვენებაზე ზიზის რომ არ გადავყროდი და გაკვეთილების შემდეგ შინ რომ მარტო დაებრუნებულიყავი. მაგრამ სალამოხანს, როცა ანანო თავის ხელსაქმეს მიუჯდებოდა, მე კი ვითომ გაკვეთილებს ჩავკირკიტებდი, ისევ ზიზისთან შეხვედრას ვოცნებობდი: ვხედავდი მის ღიმილს, გამომეტყველებას, მოძრაობას, მესმოდა ხმა, მცემდა მისი სურნელი... ხოლო მეორე დღეს კვლავ ქრებოდა და ორთქლდებოდა ყველაფერი, რაც წინა სალამოს მალეღვებდა და მიზიდავდა; უფერულდებოდა ანდა ჩვეულებრივად ერთფეროვანი ხდებოდა, რაც უმშვენიერეს ჰარმონიულ ფერებად მქონდა წარმოსახული და განცდილი.

ერთ-ერთ ასეთ სალამოს ჩემი თავის შემოწმება გადავწყვიტე: გათენებას აღარ დავუცდი, ავდგები და ზიზისთან გადავალ-მეთქი. შეუძლებელი იყო ათიოდე წუთში, ვიდრე მარო მასწავლებლის სახლში მივდიოდი, გამნელებოდა ის გრძნობა, რომელსაც მთელი სალამო ვყავდი შეპყრობილი. მე ხომ ზიზის გვერდით მინდოდა ყოფნა, მისი ცქერა, მისი ხმის გაგონება, მისი სურნელით თრობა. აჰა, ბატონო, ინებე ზიზი! არც მეტი, არც ნაკლები, სულ რამდენიმე წუთი სჭირდება მის სახლამდე მისვლას!

ხვალისთვის ნუ გადასდებ საქმეს, ხვალამდე დიდი დროა! ანანოს ვუთხარი, — ალგებრის დავალება დამავიწყდა, ერთი ზიზისთან გადავალ და დავაზუსტებ-მეთქი. პალტო მოვიხურე და ისე სწრაფად გავედი გარეთ, თითქოს მოსალოდნელ ხიფათს ერთი ფეხით გავასწარი. ეზოში გვარიანად იღო თოვლი, ფეხი მისრიალებდა. სიბნელეში ძლივს გავიკვლიე გზა ჭიშკარამდე. ჭიშკართან მისული შევეყოვნდი, რადგან მივხვდი... უფრო ზუსტად, მივხვდი და, რა თქმა უნდა, იმიტომაც შევეყოვნდი; მე ეზოდან ფეხის გამდგმელი არ ვიყავი. ეს არც ჩემი გაუბედაობით მომდიოდა, არც კრძალულებით. ზიზისთან მისვლა არ მინდოდა, მისი დანახვა და ხმის გაგონება ამ წუთას არ შემეძლო. მიზეზი ისევ აუხსნელი რჩებოდა. თუმცა რა, ამ მიზეზთა ფესვების მოძიებისათვის მაინცდამაინც თავი არ შემიწუნებია, უფრო სურვილის — მინდა-არმინდას — მონა-მორჩილი ვრჩებოდი.

მაშინვე დავბრუნდი. აღარ მახსოვდა, შინიდან გამოსვლი-  
სას შევხედეთ თუ არა მე და ანანომ ერთმანეთს. სახის გამო-  
მეტყველება მაინტერესებდა, ტყუილი რომ ვუთხარი, ხომ არ  
მიმიხვდა-მეთქი, მაგრამ გინდაც შემეხედა, ანანოს სახეზე  
რას შეატყობ, რას გაუგებ? აივანზე ფეხები დიდხანს ვაბაკუ-  
ნე, ფეხსაცმელებს, როგორც იქნა, მოვაშორე თოვლი, მერმე  
საქმიანად შევედი ოთახში და პალტო ტახტზე მოვისროლე.

— უკვე დაბრუნდი, — მკითხა ანანომ, — თუ ჯერ არ წა-  
სულხარ?

— არ წავსულვარ. დავალება გზაშივე გამახსენდა და რა-  
ტომ წავიდოდი — როგორღაც დამაჯერებლად გამომივიდა  
ნათქვამი და კმაყოფილმა მოვიფშენიტიე ხელები.

— ჰოო, თუ გზაშივე გაგახსენდა, რატომღა წახვიდოდი? —  
ანანო საქმით იყო გართული და თავი არ აუღია. მეორე დღეა,  
წინდებს მიქსოვს.

— რთული საგანია ალგებრა, — ვთქვი და სახელმძღვანე-  
ლოს დაუუწყე ფურცელა, — მაგრამ არა უშავს...

— კი, რთულია... ოღონდ, თუ თავიდანვე აულებ ალლოს,  
მერმე არ უნდა გაგიკვირდეს. ისე, თუკი გიკვირს, დაგეხმარები,  
რალაც-რალაცები მე კიდევ მახსოვს.

ჩვენი ალგებრული დიალოგი აქ დამთავრდა. ამასობაში გა-  
რედან ვილაცამ დაუძახა ანანოს.

— ეს ფოსტალიონია — წამოიძახა ანანომ და კარისკენ  
გაიქრა.

ფოსტალიონმა თავი მოიკლა, შინ ფეხი არ შემოდგა, ქვეყა-  
ნაზე მარტო თქვენ ხომ არა ხართ, ვითომ ათასგანა ვარ მისასვ-  
ლელიო, — გარედანვე მოგვაწოდა სამკუთხა ბარათი და ბუზ-  
ლუნ-ბუზლუნით წავიდა, სიბნელეში დაინთქა. ანანო ხვეწნა-  
მუდარით დაედევნა, მაგრამ მალევე გაწბილებული მობრუნ-  
და. ერთი პირქუში ბერიკაცი იყო ეს ფოსტალიონი, თუმცა  
სოფელში ყველას უყვარდა, პატივსა სცემდა და გულისფან-  
ცქალითაც ელოდებოდა მის გამოჩენას.

— მამაშენის წერილია! — მითხრა ანანომ, — ერთი გახ-  
სენი და წაიკითხე!

სასწრაფოდ მივუსხედით მაგიდას. მე ჩემი წიგნები მიეწი-  
მოვწიე, მბუუტავი ლამპა ახლოს მივიდგი და სამკუთხა ბარა-  
თი ფრთხილად გავხსენი. წერილიდან პირდაპირ სანიმუშო ოპ-

ტიმიზმის ალი ამოვარდა. რა სხვანაირი კაცი იყო მამაჩემი აქეთ გვანუგეშებდა და გვამხნევებდა, მოთმინებით, იმედითა და სიხარულით გვავესებდა. მე ისეთი შთაბეჭდილება დამრჩა, რომ ომს მამაჩემი იგებდა, ყოველ შემთხვევაში, მამა რომ არ წასულიყო, ძალზე გაუჭირდებოდათ ომის მოგება. გაზაფხულზე ყველაფერი მოთავეებული გვექნებოდა, მეც მაშინვე დაებრუნდები და მერმე მე ვიცი და ჩემმა კაცობამო.

— ხედავ, რა კაცია! — თქვა ანანომ, — შენისთანა მამა ქვეყანაზე არავისა ჰყავს!

ანანო თითქოს თვალსა და ხელს შუა გამოცვლილიყო. დიდი ხანია არ მენახა ასე გაღიმებული, შინაგანი კმაყოფილება გარეთ გამოეტანა, სახესა და თვალეებზე აღბეჭდოდა. მეც თითქოს მძიმე ლოდი მომეხსნა გულზე და ბედნიერი შევეცქეროდი ანანოს საქმიანობას. უცებ გააწყო ვახშამი, მაგიდაზე ერთი ჩარეკა ღვინოც დადგა. სველი დოქის შემოტანისას კინალამ გული ამერია, უფრო იმის გამო, რომ სველმა დოქმა მაშინვე მარნისა თუ ღვინის მსუყე სუნი დააგუბა ოთახში. ანანომ ღუმელზე სახელდახელოდ შეწვა ერბოკვერცხი და ტაფიანად დამიდგა წინ. ღორის ქონში შემწვარმა კვერცხმა უკვე სხვა, სასიამოვნო, მადისაღმძვრელი სურნელი, სწორედ რომ სურნელი, მოაფრქვია ირგვლივ და ჩვენც შევუღდექით ვახშამს. ყველი, პური, ერბოკვერცხი — ნამდვილად მეფური ვახშამი იყო!

ანანომ პატარა, საარყე ჭიქაში ჩამოასხა ღვინო, მამაჩემი აღღეგრძელა, შინ მშვიდობითა და გამარჯვებით დაბრუნება უსურვა, დღევანდელი სიხარულისათვის მადლობა შეუთვალა და ჭიქა გამოცალა.

— ცოტა მაინც მოსვი, — ახლა მე მომიბრუნდა, — სხვა რომ არა იყოს რა, მამაშენის საღღეგრძელოა!

— არ შემიძლია, ღვინის დანახვაც კი მზარავს!

— მაშ, რა გეგონა, პირველსავე ცდაზე რომ დოქები მიიყუდე! ღვინოს თანდათან, ნება-ნება უყვარს მოშინაურება და შეჩვევა, არ უნდა გაუთამამდე და არც აბუჩად აიგდო, ღვინო, წამალივით, მტერიც არის და მოყვარეც, როგორც მოეპყრობი, ისე მოგაქცევს... ახლა ცოტა შესვი, სხვანაირად არ გამოვა. შეირგე და ამაღამ კარგად დაგეძინება.

ძალზე გამიჭირდა, მაგრამ რა მექნა, ანანოს ხათრი ველარ!

გავუტეხე და რამდენიმე ყლუპი ისე გადავკარი, რომ სუნი არ მცემოდა. მეგონა, გული ამერეოდა, პირიქით კი მოხდა, ღვინომ მაშინდელივით საამო ჟრუანტელად დამიარა სხეულში. ანანომ ხელმეორედ შეავსო ჭიქები, მე წინდაწინვე ვიცოდი, რის თქმასაც აპირებდა.

იმ ხანებში და შემდეგაც, წლების მანძილზე შინმოუსვლელთა სადღეგრძელო სავალდებულოდ ითვლებოდა. სულ სამიოდე ჭიქაც რომ შეესვათ, ერთ-ერთი უსათუოდ შინმოუსვლელისა უნდა ყოფილიყო. ამ სადღეგრძელოს თქმა ბრძანებით არავის დაუკანონებია, თვითონ ცხოვრებამ მოიტანა და აღამიანების შინაგან მოთხოვნილებად აქცია.

ანანომ შინმოუსვლელები ახსენა და, რა თქმა უნდა, საბა იგულისხმა. უმაღლეს ჩაფიქრდა და მის ბივრიტის ანთებულ თვალეებში ფერფლისფერი ნისლი გაწვა. ეს კი იმას ნიშნავდა, რომ წელანდელი მხიარული განწყობილება დასრულდა. თანადგომისთვის თუმცა უსიტყვოდ შეესვი შინმოუსვლელთა სადღეგრძელო, გამომეტყველებით ვაგრძნობინე, — მეც შენთანა ვარ-მეთქი. ანანომ შემომხედა და მადლობის ნიშნად თავი დამიქნია, თან შემპირდა, — ერთ ძველ ამბავს ვიამბობო. არაფრის მოსმენა აღარ მინდოდა, რადგან მამაჩემის წერილით გამოწვეული სიხარული უკვე განელებულიყო. ერთი სიტყვით, მე და ანანოს ზეიმი არ გამოგვივიდა. ჩვენ შორის ისევ ჩადგა საბას ლანდი, რომელმაც უცებ გავგთიშა და სხვადასხვა ნაპირზე მოგვისროლა.

სანამ მე ჩემსას ვფიქრობდი, ანანოს შეპირებული ამბის მოყოლა დაუწყია, ჯერ ვერ ავუღე ალლო, მერმე სწრაფად გავერკვიე, ვილაც იოთამზე ჰყვებოდა, ღონიერი მწყემსი იყო, სამოცდაათ წელს. მიტანებული ჭიზიყის ერთ სოფელში ცხოვრობდაო. ნისლაურშიო... ამ იოთამის ბიოგრაფიით დიდად არ დავინტერესებულვარ, მაინც ველოდი, საბაზე ჩამოაგდებდა ლაპარაკს, სულაც არ მეპიტნავენებოდა სამოცდაათ წელს მიტანებული მწყემსი, რომელსაც თურმე ხუთიათასამდე სული ცხვარი ჰყოლია. იმთავითვე არ მომეწონა იოთამი: არ შეიძლება კაცს ამდენი ცხვარი ჰყავდეს და პატიოსანი იყოს-მეთქი, — გავიფიქრე. ანანო კი სხვას მარწმუნებდა: თურმე გონიერი, პატიოსანი და მშრომელი კაცის სახელი ჰქონდა დავარდნილიო, ვინც მწყემსად დაუდგებოდა, ორი წლის შემდეგ ასსულიან

ნოტოს მოუსხლეტდაო... ანანოს მონაყოლი ზღაპარი მეგონა და გუნებაში მეცინებოდა, არც ეს „თურმე“ მომწონდა, რადგან ამბავს სინამდვილის ნიადაგს აცლიდა და ყველაფერს არყოფილის ბურუსში ხვევდა.

ესეც მეუცნაურა და დაუჯერებელ ამბად მომეჩვენა: თურმე იოთამი ერთი აკვიატებული იდგით, ერთი აზრით ყოფილა შეპყრობილი, — ჯერ შშობლიური ქიზიყი და მერმე მთელი კახეთი უნდა გავამდიდრო და ავალორძინო: გამდიდრების წყაროდ კი თუშური ცხვრის მომრავლება მიაჩნდა თურმე.

ისევ „თურმე“!

კოლექტივიზაცია რომ დაწყებულა, სოფელში ვინმე ბარნაბიშვილი მოუვლენიათ. გამოცდილი კაცი ხარ და შენ იცი და სოფელმაო! ბარნაბიშვილს კარგად სკოდნია თავისი საქმე და შესდგომია კიდევ მის აღსრულებას. მალევე ჩამოუყალიბებია კოლექტივი და თავმჯდომარეობაც თვითონვე უკისრია. მერმე ამბავი მიუკითხ-მოუკითხავს და დაკვირვებული მზერა, რა თქმა უნდა, იოთამისათვის მიუპყრია. გაგიჟებულა, ამდენი სული ცხვარი ერთ კაცს რა უფლებითა გყავსო?!

— არავის შევეუზღუდივარ, — უთქვამს იოთამს, — ვფიქრობდი, ამ ცხვარს სოფლის საკეთილდღეოდ გავამრავლებ-მეთქი. თუ რამე დანაშაული ჩამიდენია, აქა ვარ, არსად გავრბივარ!

— ეგ ცხვარი დღეიდან სოფლისა და ხალხის საქუთრება იქნება! — მოკლედ მოუჭრია ბარნაბიშვილს.

— იყოს ნება თქვენი! მეც ეგ მინდა! მაშ, ამოდენა ცხვარს მარტო ხომ ვერ მოვერევი.

— ნუ თვალთმაქცობ, იოთამ, მე რას გამაცურებ! სხვა გზა არა გაქვს და თავს იმიტომ იკატუნებ, შენ კულაკი და კერძო მესაკუთრე ხარ!

— კაცო, რას მემართლები, ხომ არ გართმევთ, გაძლევთ! შირაქში რომ ცხვრის ბინები მაქვს, ისიც თქვენი იყოს, მთათუშეთის ბინებიც თქვენთვის მომირთმევია! სხვა რაღა გითხრა? მეც თქვენთან მიგულეთ, საქმე ვიცი და გამოგადგებით, წყალს გასაყოლებელი კაცი არა ვარ, მე და ჩემმა ღმერთმა!

— ვერ მომატყუებ, იოთამი — უყვიროდა ბარნაბიშვილი. — ვისაც მხოლოდ ასი თუ ორასი სული ცხვარი ჰყავს, ისინი ვერ შემომიყვანია კოლექტივში და რაღა შენ გამომიხვედი ან-



გელოზი? ხუთი ათას სულს ვითომ ეგრევე ჰყრი?! დავიჯერო?!  
— რატომ ვყრი, კაცო, აკი გაბარებთ? იმასაც გეუბნებთ, მწყემსი კაცი ვარ, ცხვრის ავან-ჩაჟანი ვიცი და გამომიყენეთ-მეთქი!

— ჩვენი წისქვილი ეგრე არა ფქვავს, იოთამ, — უთქვამს ბარნაბიშვილს, — შენ წურბელა ხარ და თავიდან უნდა მოგიშორო. სანამ შენ ამ სოფელში იბოგინებ, მაგ ცხვარს მაინც შენს საკუთრებად ჩასთვლი, ამიტომ შენთვისაც და საქმისთვისაც, შენთვისაც და სოფლისთვისაც უმჯობესი იქნება, გუდა-ნაბადი აიყარო და წახვიდე, აქაურობას გაეცალო.

— სად წავიდე, კაცო?

— სადაც გინდა, ქვეყანა დიდია!

— სხვაგან რა ოხრობა მინდა!.. ჩემს მამა-პაპათ აქ უცხოვრიათ, აქვე დახოცილან... ეს არის იმათი საფლავი, იმათი მიწა... სად წავეხეტო, კაცო, ღმერთი აღარ არის?!  
— აღარ არის! ვერ გაიგე?!

— ვერც გავიგებ! ეგ როგორ გავიგო?! მაძეგებ, შე უღმერთო?!  
— არ გაძეგებ, იოთამ, გეუბნები, შენი ნებით აიყარეთქი გუდა-ნაბადი. თუ არ აიყრი, მაშინ გაგაძეგებ. ჯერ გაგაჯულაყებ, ქვეყანაზე თავს მოგპრი, მერმე გაგაპანდურებ კიდევ.

— ეგრე უდიერად რატომ მელაპარაკები, ბარნაბიშვილო, ჩემთან ბავშვი ხარ და არ გეკადრება! რა დავუშავე, ვის რა ბალღამი ვასეი?! მეგონა ქვეყნად სიკეთეს ვთესავ-მეთქი... ხედავ, ყველაფერი ხელუკუღმა როგორ შემომიბრუნდა?!  
— ასეთია მთავრობის გადაწყვეტილება!

— მთავრობისა თუ შენი?

— მე მთავრობის წარმომადგენელი ვარ!

— შენა ხარ მთავრობა?! — აღელვებულა იოთამი, წონასწორობა დაუქარგავს, — შენისთანა თახსირი კაცი არ შეიძლება მთავრობა იყოს!  
იოთამს სხვაც ბევრი უთქვამს — სულ სალანძლავი და მაგარ-მაგარი, საცემალაც გაწეულა, მაგრამ ბარნაბიშვილს თან ვილაც-ვილაცები ხლებია და არ მიუშვიათ, დაუქერიათ. ბარნაბიშვილს წარბიც არ შეუხრია.

— წახვალ თუ არა შენი ნებით?

— წავა, წავა, მაშ, რას იზამს! — დაუმშვიდებიათ ბარნაბი-  
შვილი დამქაშებს.

— იოთამ, ცოლ-შვილი მაინც შეიბრალე! — ეს იყო ბარ-  
ნაბიშვილის უკანასკნელი გაფრთხილება-მუქარა, ცოლ-შვილი-  
ანად გაგაუბედურებო.

იოთამი მიმხვდარა, რომ ბარნაბიშვილი ლიტონ სიტყვებს  
არ ისროდა, იგი იმუქრებოდა და ძალიც შესწევდა ქადილისა.  
ჩათრევას ჩაყოლა სჯობიაო, უფიქრია, ბარნაბიშვილი გვერდ-  
ზე გაუყვანია და უთქვამს:

— ჩემს ცოლ-შვილს რაღას ერჩი, განა მე სამყოფი არა  
ვარო? — იოთამს თვრამეტი წლის დედისერთა ვაჟი ჰყოლია,  
გვიან გასჩენია და ამიტომაც ცივ ნიავს არ აკარებდა, მზე და  
მთვარე მასზე ამოსდიოდა თურმე.

— თუ ჰკვიანად მოიქცევი, შენს ოჯახს თითსაც ვერავინ  
დააკარებსო.

— ჰკვიანად როგორღა მოვიქცეო?

— რაც გითხარ, ისა ჰქმენ... აქ მომხდარი აქვე უნდა  
მოკვდესო!

— რანაირადო?.. მთელი ბატალიონი ხალხი წამოგილა-  
ლია და მაგათი პირის ამკვრელი ვინ არისო.

— შენ არხეინად იყავი, ეგენი ხმის ამომღებნი არ არიანო.

— სიტყვა სიტყვა იქნებაო?

— სიტყვა სიტყვააო!

აქ შეწყვეტილა მათი საუბარი. იოთამი მაშინვე შემჯდარა  
ცხენზე და სოფლისკენ აუღია გეზი.

— ეს ამბავი აღრე გაზაფხულზე მომხდარა. — განაგრძობ-  
და ანანო, — მე თავიდანვე არ მითქვამს, იმ დროს იოთამი  
თურმე შირაქიდან მოდენილა, ზამთრის საძოვრებიდან, იქ  
თადარიგი დაუქერია: მალე ცხვარი უნდა აეყარათ, რომ მთის-  
კენ დაძრულიყვნენ. შირაქში მწყემსებისათვის დაუბარებია,  
ერთ კვირაში დავბრუნდებიო. ბარნაბიშვილი კი თავის კაცე-  
ბიანად დახვედრია ალაზნთან, სანამ სოფლისკენ აღმართს შე-  
უყვებოდა, და ყველაფერი იქ გადაწყვეტილა. იოთამს შინ  
ვაჟი ელოდებოდა, მამა და შვილი ერთად აპირებდნენ გამგ-  
ზავრებას ჯერ შირაქში, მერმე იქიდან — მთათუშეთში, იო-  
თამს უგუნებობა ოჯახში არავისთვის უგრძნობინებია, მესამე  
დღეს ცხენი შეუკაზმავს, საგზალი ხურჯინში ჩაუწყვია, საქ-

მეზე მივდივარო, — სიტყვა დაუგდია და წასულა... წასულა და წასულა, იმ დღის შემდეგ იოთამი სოფელში არავის უნახავს, თითქოს მიწამ უყო პირი, დაიკარგა, გაქრა ადამიანი... მიიკითხეს, მოიკითხეს, მკვდარიც ეძებეს, ცოცხალიც, გადაქექეს ქვეყანა, სულ ტყუილად, იოთამის მნახველი კაციც ვერ იპოვნეს...

ანანო ჩაფიქრდა, ცოტა ხნით შეყოვნდა და მეც ამოვისუნთქე. სახის გამომეტყველებაზე შევატყვე, ამბავი აქ არ მთავრდებოდა, კიდევ დარჩენოდა სათქმელი. შეყოვნებისას ვცადე გამომეცნო, რისთვის მიყვებოდა ანანო ამ ამბავს, რა აწუხებდა. უცებ ექვი აღმეძრა, მაგრამ ამ ექვის შესამოწმებლად დრო აღარ მეყო. ანანომ ამბის მოყოლა განაგრძო.

იოთამის უგზო-უკვლოდ დაკარგვის შემდეგ სამი-ოთხი, შესაძლოა — მეტიც, ყოველ შემთხვევაში იმდენი წელი გასულა, რაც ერთი ადამიანის დავიწყებას სჭირდება... იოთამი აღარავის ახსოვდა, ადრე ხანდახან გაიხსენებდნენ, ისე, კანტი-კუნტად, ხელის ჩაქნევით, — საწყალი, კარგი კაცი იყო, კეთილი... ცხვარი რომ ჩამოართვეს, ჯავრმა გადაიყოლო, ამდენს ვეღარ გაუძლოო, ღმერთმა აცხონოსო... მხოლოდ შირაქში დარჩენილ ცხვრის ბინებს შერჩენიათ იოთამის სახელი, ისიც ვინმე მწყემსს თუ წამოსცდებოდა ხოლმე, — იოთამის ბინებში ვდგავართო, იოთამის ბინებში მივდივართო, ან იმ ბინებიდან მოვდივართო. ამასაც ისე იტყოდნენ, თითქოს იოთამი უხსოვარ დროს ცხოვრობდა და მისი სახელი მწყემსმა მხოლოდ გადმოცემით იცოდა.

იმ დღიდან, მესამე თუ მეოთხე გაზაფხული დამდგარა. მწყემსები შირაქის ველიდან იყრებიან, მთაში მიდიან. მთელი დღე ბარგსა ჰკრავენ, ცხენებიცა და ცხვარიც მოურეკიათ და ძაღლებიც დაუსვენებიათ. ხეალ დილით აპირებენ გამგზავრებას. საღამო ხანად ნაჯაფრებსა და დაღლილებს თავიანთი სადგომების წინ ცეცხლი გაუჩაღებიათ. სწორედ ეს სადგომები ქვითა და ალიზით აუშენებია ოდესღაც იოთამს მწყემსთა ღამის სათევად, წვიმა-ავდარში თავის შესაფარებლად...

მწყემსები ახლა ცეცხლის გარშემო სხედან, ცეცხლზე სახინკლე ქვაბი შემოუდგამთ და წყლის ადუღებას ელოდებიან, გამგზავრების წინ ცოტა წაქეიფება მონდომებიათ. იქვე ძაღლები დაყრილან, თავისი წილი სალაფავი მიუღიათ და ზარმაცად თვლემენ.

წინ დიდი ველია, თითქოს ქვეყნის კიდემდე ასე მოსაწყენად და ერთფეროვნად გაწვდილი. გაზაფხული ჯერ არ დასტყობია, ჟანგისფერია, ალაგ-ალაგ ჩაშავებული, გეგონება, ზედ ცეცხლის ბორბალს გადაუვლია, ხმელი ბალახი ერთიანად გადაუძოვია და, სიჩქარეში რაც მოუსწრია, აქა-იქ ფესვიანად ამოუბუვია კიდევ.

პორიზონტი მარცხნივ უფრო ახლოსაა, ამ მხარეს ველი ოდნავ დაფერდებულია, მწყემსთა სადგომიდან სამასიოდე ნაბიჯის იქით ნელ-ნელა თავქვე ეშვება და მერმე ისევ სწორდება... ამ მხრიდან მომავალი მგზავრი ველზე უცებ ჩნდება, მოულოდნელად, თითქოს მიწიდან ამოიზარდაო.

იმ სადამოს სწორედ აქედან გამოჩენილა ერთი ხელჯოხიანი მგზავრი. პირველად ძაღლებს შეუნიშნავთ, გასაფრთხილებლად შეუყეფიათ კიდევ, მაგრამ უცხო კაცი არ შეჩერებულა, არც ნაბიჯი შეუწელებია, პირდაპირ მოდიოდა სადგომებისაკენ. ძაღლები წამოცვენილან, აჯაგრულან, ახლა უკვე გაავეებული ყეფით აფრთხილებდნენ თურმე მომავალს, — ნაბიჯიც და ადგილს მოვწყდებითო. მწყემსებს, რა თქმა უნდა, უმაღვე უგრძენიათ საშიშროება, წამოშლილან, შეუკივლიათ ძაღლებისთვის, დაწოლა და დაშოშმინება უბრძანებიათ. ამჭერად ქოფაკები არ დამორჩილებიან პატრონებს, ბეწვაშლილები ყეფა-ღრენით გაბაწრულან უცხო მგზავრის შესახვედრად.

მწყემსები კეტებით გამოდევნებიან გაცოფებულ ნაგაზებს, მაგრამ სად ძაღლის სისწრაფე და სად ადამიანისა! შორიდანვე შეუმჩნევიათ, რომ უცხო მგზავრი ვიღაც მოხუცი მათხოვარია. ჭალარა, წვერმოშვებული, ძველ მაზარაში გამოხვეული. ძაღლების ყეფა-ღავლაში მწყემსები გამწარებით უყვირიან თურმე: დაჯექ, მანდვე დაჯექ, ნუ მოდიხარო! (დამჯდარ კაცს რომ ძაღლი არ ერჩის, მეც გამიგონია). მათხოვარი მაინც არ გაჩერებულა, ხელჯოხიანი ჯიუტად მოდიოდა. ალბათ მაგ ჯოხის იმედი აქვსო, — უფიქრიათ მწყემსებს, — ის კი არ იცის უბედურმა, ჯოხიანად რომ შეჭამენ და შეახრამუნებენო. მოხუცს ჯოხის მოქნევა არ უცდია. ეგ ოხერი თუ ბრმაა, ყრუც ხომ არ იქნებაო, — ჯავრობდნენ მწყემსები, ძაღლების ყეფა მაინც ვერ გაიგონაო!

ათი ქოფაკი ერთად დასევია ბერიკაცს, ეგრევე გადაუთელიათ, გლეჯა და ფლეთა დაუწყიათ. იქნებ მიუესწროთ და გა-

დავარჩინოთო, — უფრო აჩქარებულან მწყემსები, მერმე გულამოვარდნილები, ოფლში გაწურულები კეტებით თავს დასხმიან გააფთრებულ ძაღლებს.

ახლოს მისულნი თურმე თვალებს არ უჯერებენ: თვალი გვატყუებს თუ რა ხდებაო?! მიწაზე მართლაც საოცარი რამ ხდებოდა: ერთმანეთში არეული და ჩახლართულ-გადახლართული ძაღლები საცოდავად წკმუტუნებენ, წკავ-წკავებენ, გულაღმა გაწოლილ ბერიკაცს სახესა და ხელებს ულოკავენ, რამდენიმე ქოფაკი გვერდით მისწოლია, გატრუნულებსა და განაბულებს ბომბორა თავები ბერიკაცის ტანსაცმელზე დაუსვენებით, სხვები ისევ ეხვევიან, ეგლისებიან, ძაღლურად ეალერსებიან. სახეზე ნეტარებააღბეჭდრილ ბერიკაცს თავი მიწაზე გადაუგდია და აკანკალებული უხეში ხელებით ძაღლებს ებლაუკება, ეფერება, უთათუნებს...

ეს ბერიკაცი იოთამი იყო, მწყემსებმაც იცნეს და გაკვირვებულნი დასცქეროდნენ ამ უცნაურ სანახობას. როგორც ჩანს, ნაგანებს უფრო ადრე უცვნიათ ძველი პატრონი, მონატრებულები დასევიან, წაუქცევიათ და ამგვარად გამოუხატავთ ძაღლური სიხარული.

მწყემსებმა ყვირილითა და მუქარით ძლივს მოაშორეს ქოფაკები ძველ პატრონს, მერმე წამოაყენეს, ტანსაცმლიდან მტვერი ჩამოუბერტყეს, დაბლა დაგდებული ცარიელი აბგა ზურგზე გადაჰკიდეს და ბინისაკენ წაიყვანეს. მიცნესო, კაცო, მიცნესო — გზადაგზა წამოიძახებდა თურმე იოთამი და თვალეებზე მომდგარ ცრემლს ხელით იმშრალებდა.

ბინებთან მისული სახვალოდ მორეკილ ცხენებს მიაშტერდა თურმე: ცხენებისკენ რამდენიმე გაუბედავი ნაბიჯი გადადგა, შეჩერდა, გაღიმებულმა უკან მოიხედა და ისევ ცხენებისაკენ გაემართა.

— საღარავი! ნისლავი! შამილავი! — ჩურჩულებდა თურმე გაოგნებული, ბერიკაცი, თან ცხენებს აკვირდებოდა და არჩევდა, — შეთევი! შე ვერანავ, ისეთივე გიჟი ხარ, თუ დაქკვიანდი?!

— გიჟია, გიჟი მაგას რა დააქკვიანებდა?! — პასუხობდნენ მწყემსები, თან თვალს ვერ უსწორებდნენ, ზოგი პირსაც არიდებდა.

— ეჰა, მირაბო! — გამოარჩია იოთამმა შავი ცხენი, რო-

მელსაც შუბლზე თეთრი მთვარე აღბეჭდოდა, — მირაბო, ჰაიტ, მირაბო!

მირაბომ ლამაზი შავი ყურები სცქვიტა, მერმე თავი აიღო და ჭიხვინით გაეპასუხა იოთამს.

— მირაბო!

ცხენმა ისევ დაიჭიხვინა.

— მირაბო! ცოცხალი ხარ, შე ოხერო, შენა!

მირაბოს სხვა ცხენებიც აპყოლიან, თითქმის მთელი რემა აჭიხვინებულა: იოთამისაკენ მობრუნებულნი ტორებს სცემდნენ მიწას და ყალყზე დგებოდნენ...

იოთამს ორივე ხელი ცისკენ აუბყრია და მოწყვეტით დაშვებულა მიწაზე.

— დიდება შენს სახელს, შენი სახელის ჭირიმე! — უთქვამს ჩურჩულით და რის ვაი-ვაგლახით ისევ წამოდგარა.

ამასობაში ბევრი რამ მოუსწრიათ ბიჭებს, აქაფებულ ქვაბიდან ხინკალი ამოუყრიათ, თოხლი დაუკლავთ, გაუტყავებიათ, სამწვადე ხორცს ცალკე აწყობენ და საყაურმეს — ცალკე...

იოთამი კი ცეცხლთან ზის ცხვრისტყავგადაფარებულ უნაგირზე, ხელები მუხლზე დაუყრია და ცეცხლს ჩასცქერის. აქეთ-იქიდან ტყაბუქსა და თექაში გამოხვეული მწყემსები მოსხდომიან. მზის ჩასვლის შემდეგ საკმაოდ აგრილებულა. მწყემსებს ლაპარაკი უნდათ, მაგრამ სათქმელისათვის თითქოს თავი ვერ მოუბამთ, ერთმანეთს შეთქმულებივით გადახედავენ ხოლმე და ხმას ვერ იღებენ, ენადაბმულებსა ჰგვანან. უჩუმრად შეექცევიან ხინკალს, სიჩუმეში ცეცხლის ტკაცუნი, ხინკლის წვენის ხვრება და ტუჩების ტკაბუნი ისმის.

— ჰაი, დედასა! — წამოიძახებს დროდადრო იოთამი და ისევ ხინკალს მიუბრუნდება.

უმთვარო ღამის ბინდი დასწოლია ზამთრის საძოვრებს; გაუვალი, მძიმე წყვილიადი ისე ახლოს მოჭრილა, რომ მიწაზე აღისაგან დაცემულ სინათლის რკალს თანდათან ავიწროებს და კუმშავს. მწყემსებს ნაკვერჩხალი წინ გამოუშლიათ და მწვადებს წვავენ. აშკარად უფრო მეტს მოძრაობენ, ვიდრე ეს მწვადის შეწვასა და ყაურმის მოხარშვას სჭირდება. ცრუ ფუსფუსი და მიდგომ-მოდგომა დუმილის გამო ჩამოვარდნილი უხერხულობისაა, ამას ყველა გრძნობს და მაინც დუმილის საზღვარს ვერაფერ არღვევს.

— სასმელი მაინც გვექონდეს! — ამბობს იოთამის გვერდით მჯდარი თომა ბიკაშვილი, სარქალი, ხმელი და დაძარღვული, რომელსაც თუშური ქუდი წარბებზე ჩამოუფხატია. — ამათ არყითა და ღვინით ვინ დააძლობს?.. წინ სულ ჩაფებით უნდა ედგათ... როდისღა ამოსვლიაპეს ამ ოხრებმა!

— მირაბო, — სადღაც შიგნით იღიმება იოთამი, — მაგარი ცხენი იყო...

— ახლაც მაგარია! — ეუბნება სარქალი.

— მიცნო, მაგანაც მიცნო! — უხარია ბერიკაცს.

— მა! — უდასტურებს სარქალი, მერმე იმის შიშით, ისევ დუმილი არ ჩამოვარდესო, ეუბნება, — ეგ სახელიც შენი შერქმეულია, იოთამ.

— რა ხნისაა ეგ ცხენი?

— თხუთმეტი წლისა...

— თხუთმეტი წლისა. — ისევ იღიმება იოთამი, — რა დრო გასულა. არკი მახსენდება, ამ ცხენს რატომ დავარქვი ეგ სახელი.

— მაგაზე აღარ გიფიქრია და როგორღა გაგახსენდება.

— ჰო, აღარ მიფიქრია, მაგის ჯავრი ვიღასა ჰქონდა?

მერმე თუში მონამგლეები გადმოსულან და ცოტა არაყიც გადმოუტანიათ. არაყს იოთამი ახლოსაც არ გაჰკარებია, მაგრამ სასმელს თავისი საქმე მაინც გაუკეთებია, ხალხი გამხიარულებულა და ის დამთრგუნველი დუმილიც თავისთავად დარღვეულა.

ვანშამი აღარ გაუჯანჯლებიათ, რადგან დილითვე უნდა აყრილიყვნენ მთაში გასამგზავრებლად. იოთამს თომა ბიკაშვილი ცეცხლთან დაუტოვებია და, გარშემო ყველაფერი რომ მიწყნარებულა, თავისიანების ამბავი უკითხავს. შენი დედაკაციც კარგად არის და შენი ვაჟიცო, — უთქვამს სარქალს. — შენ რომ უგზო-უკვლოდ დაიკარგე, იმისი დარდი ჰკლავთ, სხვა არაფერი უჭირთ, ცოცხლები და ჯანმრთელები არიანო. თომა ცდილობდა, გულითადი ლაპარაკისათვის თავი აერიდებინა, რომ არ დასცდენოდა რალაც-რალაცეები, რასაც მთელი საღამო მუყაითად უმაღავდა.

იოთამს მერმე ბარნაბიშვილი უხსენებია, — სიტყვის კაცი გამოდგა ეგ თქვენი ბარნაბიშვილი თუ არაო.

— რა სიტყვას მეუბნები, იოთამ, რომ ვერ გავიგე? — დაბნეულა ბიკაშვილი.

— მე ხომ ჩემი ვქმენ, პირი არ გამიტეხია... იმანა?!

— ვერ გავიგე-მეთქი, რას მეუბნები.

— ჩვენ ხომ პირობა დავდეთ, მე და ბარნაბიშვილმა.

— რა პირობა, რის პირობა, მე რომ არა ვიცი რა?!

— ჰო, არ გეცოდინება. — იოთამი ჩაფიქრებულა, — იქნებ მეც არ უნდა მეთქვა? მაგრამ ცხოვრება წავილა და ვინმემ ხომ უნდა იცოდეს?! კარგად გიცნობ, თომავე, ამიტომ იმედოცა მაქვს, ჩემს ნათქვამს გულში შეინახავ და დრომდე არავის ეტყვი. — მერმე სარქლისათვის წვრილად უამბნია ალაზნის პირას დადებული პირობის შესახებ, აუხსნია, რატომ დაკარგულა უგზო-უკვლოდ, ამ ქვეყნიდან რატომ გამქრალა... მუქარას შემისრულებდაო. ჯერ მე მომიშორებდა თავიდან, მერმე ბალღს დამიღუპავდაო.

— რას ამბობს, კაცო! — თავზარი დასცემია თომა ბიკაშვილს, — ეს რა მითხარი, კაცო! — გიყვივით იმეორებდა თურმე ერთიდაიგივეს, მაგრამ გულახდილობას მაინც არ აპყოლია.

ბერიკაცს იქვე ხომ ვერ გავუხეთქავდი გულს, ხომ ვერ მოვკლავდიო? ბარნაბიშვილის მზაკვრობის ამბავი რომ მეთქვა, სულს ჩიტივით გავაფრთხობინებდიო, — იტყვის შემდეგ თომა ბიკაშვილი. სათქმელი, რა თქმა უნდა, ჰქონდა, იოთამი როგორც კი სოფლიდან გაიგულა ბარნაბიშვილმა, თავისი ბნელი ზრახვების აღსრულება აღარ დაუყოვნებია: ამ ხუთი ათასი სული ცხვრის ნაცვლად კოლექტივში ორი ათასი აღურიცხავს, მთავრობა, სულერთია, ვერაფერს გამიგებს, პირიქით, კმაყოფილიც კი დამრჩებაო, მთავრობამ რა იცის ან როგორ შეიტყობს, იოთამს რამდენი სული ცხვარი ჰყავდაო. ბარნაბიშვილს თავის ძმაკაცებთან ერთად იოთამის ცხვრის ორი მესამედი საქართველოს გარეთ გაურეკია და ეგრევე გაუყიდა. როგორც ამბობენ, დიდი ფული ჩაუგდია ხელში.

სარქალი ამას უმალავდა იოთამს. მთელი საღამო იმის შიშში ჰქონია, ბერიკაცმა ცხვარი არ მოიკითხოსო.

— ბალღი მაფიქრებდა, თუ არა დაუშავებია რა, ეგ თქვენი ბარნაბიშვილი სიტყვის კაცი ყოფილა, — თავს ინუგეშებდა იოთამი.

— იმასთან რა ხელი ჰქონდა? გინდაც მოენდომებინა, რას



დააკლებდა, ისეთი ვაჟკაცი დადგა, ირიბ მზერას ვერავინ აკადრებს, სხვის ბუზს თავზე არ გადაიფრენს.

— ღმერთო, შენი სახელის ჭირიმე! ბალლი უნდა გაიზარდოს, ფეხზე დადგეს, ქვეყანა ნახოს... კაცი სოფელს უნდა გამოადგეს.

— ეგრეა, იოთამ, ეგრე!

— ჩემს ბიჭს უთხარი, ბარნაბიშვილს მაინც ერიდე-თქო, ნუ ენდობი, მზაკვარი კაცი მაინც მზაკვარია-თქო! ეს მერმე, როცა მე ამქვეყნად აღარ ვიქნები.

— როგორ თუ აღარ იქნები?!

— შენ ის უთხარი, რასაც გეუბნები.

— ვეტყვი, იოთამ, ვეტყვი შენს ნათქვამსაც და ჩემსასაც დავუმატებ.

— მე არ შეგხვედრივარ და არც გინახივარ!.. მე ამქვეყნად აღარა ვარ და ჩემსას როგორ ეტყვი? რახან მიცანი, რახან ცეცხლთან დამსვი და გამიმასპინძლდი, ეს იმას ხომ არ ნიშნავს, რომ გავცოცხლდი, რომ ხელმეორედ მოვედი ამქვეყნად? ბარნაბიშვილმა თუ შეიტყო ჩემი აქ ყოფნა, ბიჭს დამიღუპავს. ბარნაბიშვილი ღონიერია, დიდი ძალა აქვს.

— გავიგე, გავიგე...

— ესენიც გააფრთხილე, სიტყვა არ დასცდეთ... სიკეთეს სიავით ნუ გადამიხდინან.

— გავიგე, იოთამ.

— ბარნაბიშვილი სხვა კაცია, თომა, ეგრე ადვილად არ დაშოშმინდება.

— ვიცი, რაც არის.

— ეტყობა, მაგათ ცხოვრებას მარტო მე ვუშლიდი ხელს, მაგათ გზაზე ლოდით ვეგდე... აჰა, ხომ გადავთარიე ჩემივე თავი გზის შუიდან გზის ნაპირამდე! ხომ გავერიდე? სხვა რა შემეძლო?! ღმერთი იყოს მაგათკენ!

გამთენიისას წამოშლილან მწყემსები, სწორედ იმ დილით უნდა დაეტოვებინათ ზამთრის საძოვრები და მთათუშეთის იალაღებისაკენ გაეწიათ. წინ გრძელი, დამქანცველი და ძნელადსავალი, ხიფათიანი გზა ედოთ. იოთამსაც არ დაუყოვნებია, თავისი ძველი მაზარა ჩაუცვამს, ზურგზე აბგა მოუკიდებია და ხელჯოხიანი გასდგომია გზას. დამშვიდობებისას კიდევ ერთხელ უთქვამს ბიკაშვილისთვის, — ისე ჩათვალეთ, ვითომ

აქ არ ვყოფილვარო, და წასულა, წასულა იმავე გზით, რომლითაც გუშინ საღამოს მოვიდა. მწყემსებს მხოლოდ თვალი გაუყოლებიათ, რადგან გაცილებისათვის დრო აღარავის ჰყოფნიდა. ყველა თავისი საქმით იყო დაკავებული, მთელი მწყემსური ავლადიდება ცხენებისათვის უნდა აეკიდათ. ეს დიდი ჯაფის გარდა დიდ დროსაც მოითხოვდა...

იოთამს მხოლოდ ძაღლები გაჰყოლიან. მიდიოდა აბგამოკიდებული ბერიკაცი და უკან მოწყენილი ქოფაკები მისდევდნენ, ჯგროდ, თავჩაკიდებულები. მწყემსებმა იცოდნენ, ძაღლები გარკვეულ მიჯნამდე მიაცილებდნენ, მერმე მობრუნდებოდნენ და თავის ჰაპანს ძაღლური ერთგულებით გასწევდნენ; ამიტომ ყურადღება არ მიუქცევიათ, ყველა ნაგაზი რომ იოთამს გაჰყოლია.

თომა ბიკაშვილს კიდევ ერთხელ რომ გაუხედავს იოთამისაკენ, ბერიკაცი უკვე თავქვე მიდიოდა. სარქალი ისევ ხედავდა ჰორიზონტზე ბერიკაცის ზურგსა და აბგას, მერმე — თავს, მერმე თავიც გამქრალა. სარქალს ჰგონებია, ძაღლები ამის იქით აღარ გაჰყვებიანო, მაგრამ მოტყუებულა. მტრედისფრად განათებულ ცის ფონზე ნაგაზები სათითაოდ ჩნდებოდნენ და ქრებოდნენ — დაბლა ეშვებოდნენ... როგორც ჩანს, უფრო შორ მანძილზე აცილებდნენ ძველ პატრონს.

სარქალმა მირაბო შეკაზმა და ახლა მოდარაჯე კაცის თვალით გასცქეროდა ველს და სივრცეს, რომელმაც წელან ჩანთქა იოთამი ძაღლებიანად. ძაღლების დაბრუნებას ელოდებოდა: ლოდინი დიდხანს არ დასჭირვებია, ძაღლები მალევე ამობრუნებულან და სწორედ იმ ზღვარზე, საიდანაც დაღმართი იწყება, თომასკენ ზურგმექცეულნი თითო-თითოდ, გვერდი-გვერდ გამწყკრივებულან. თომა ბიკაშვილს უფიქრია, ძველ პატრონს ახლა მზერით აცილებენო, მაგრამ ჯერ ერთ ნაგაზს, მერმე მეორეს, მერმე მესამეს... დანარჩენებსაც დრუნჩები ცისკენ აუშვებიათ და ისეთი ყმუილი გაუბამთ, რომ იქაურობა შეუძრავთ. სარქალს გული შეკუმშვია და იმწამსვე ცუდი რამ უაზრია. ძაღლების გაბმულ ყმუილზე მირაბოსაც ყურები დაუცქვეტია და მოუსვენრად ცმუკვა დაუწყია...

კიდევ ერთი წამიც და შეშფოთებული ბიკაშვილი უკვე ველზე მიაჭენებდა ცხენს, ძაღლებთან მიჭრილს თურმე დაუნახავს:

მარჯვნივ, გზის პირას იოთამი ეგდო...

ზურგზე ისევ აბგა ჰქონდა მოგდებული...

ყავარჩინიანი ხელი წინ გაშვერილი დარჩენოდა...

წელანვე, ანანომ იოთამის ვაჟიშვილი რომ ახსენა, მივხვდი, რატომ მიყვებოდა ქიზიყელი მწყემსის ამბავს. რა თქმა უნდა, საბა ამ მოხუცი კაცის შვილი იყო.

## 6

მწყემსებს მწყემსური წესით ბერიკაცი იქვე დაუსაფლავებიათ, გზის პირას, სადაც გარდაცვლილა. ეს უბედურება ოჯახისათვის მაშინვე ვერ შეუტყობინებიათ, მაგრამ თომა ბიკაშვილი შუა ზაფხულს რაღაც საქმისათვის ორი დღით ჩასულა სოფელში, იოთამის ვაჟი უნახავს, მამის გამოჩენისა და გარდაცვალების ამბავი მიუტანია. მისი დანაბარებიც გადაუცია და თავისიც დაუმატებია, — ბარნაბიშვილს ერიდებოდა, მზაკვარი კაცია, სადმე ჩიხში არ მიგიმწყვდიოსო. იოთამის ბიჭი შეხვეწნია, — წამომყევი, მამის საფლავი მაჩვენეო, არაო, — უთქვამს თომას, — ეგ საქმე შემოდგომამდე გადავდოთ, იქ ჩვენნი მისვლა არ იქნება, ვიდრე მთიდან ცხვარს არ წამოვრეკავთო. წასვლისას დაურიგებია, — ისე მოიქეც, იოთამისა ვითომ არაფერი გაგიგია. დედა რომ დედაა, იმასაც ნუ ეტყვიო, რატომაო? ამიტომა და იმიტომაო!

ანანო დინჯად და აულელვებლად, თანაც ხატოვნად მიამბობდა ჩემთვის მეტად უცნაურსა და მოულოდნელ თავგადასავალს, რისი გადმოცემაც მე მხოლოდ ჩემი ღარიბული სიტყვით შევძელი. ამ ამბავმა მორევით თანდათან ჩამითრია, დამაინტერესა და ამაგზნო. ვერც კი ვიგრძენი, როგორ გავხვდი ანანოს სატკივარისა და საწუხარის მოზიარე, თითქოს თავისი თანმიმდევრული შეუპოვრობით შეთქმულების თანამზრახველად მაქცია.

ანანომ ვახშმის ნამუსრევი აალაგა და ოთახიდან გაიტანა, უკან შემობრუნებულს ვკითხე, — იოთამი ხომ საბას მამა იყო-მეთქი? — ეგ რა საკითხავიაო, — შემომხედა გაოცებულმა.

— შენ არ გითქვამს... საბა არც ვიხსენებია. — ვუპასუხე.

— არა?! — ისევ გაიკვირვა ანანომ, — მაშ, თუ არ მიხსენებია, რა იცი, საბა რომ იოთამის შვილი იყო?

— მივხვდი... ჯერ ექვი შემეპარა, მერმე, რა მიხვედრა უნდოდა, სხვის ამბავს რატომ მომიყვებოდი?

— ჰო, ეგრეთა — დამიდასტურა და გვერდიდან ექვიანი ღიმილით გამოძხედა, მართლა არ მიხსენებია, თუ ეს ბიჭი მატყუებსო. მერმე ღუმელის კარი გამოაღო, ნალვერდალი გამოჩნდებოდა და ღუმელში რამდენიმე შეშის ნაჭერი შეალაგა.— განგებ არ ჩამიდენია, უნებურად გამომჩენია მისი სახელი.

ათასი კითხვა მიფორიაქებდა ისედაც ატეხილ ცნობის-მოყვარეობას და ცნობისწადილს. ბოლოს და ბოლოს, საბას ვინაობითაც დავინტერესდი. აშკარა იყო, იმ ოჯახის ამბავი იოთამის სიკვდილით არ მთავრდებოდა, იქ კიდევ რაღაც მოხდა, რაღაც დატრიალდა, თორემ გაუგებარი საქციელია, როცა კაცი უბრალოდ და უმიზეზოდ მამა-პაპის სახლს ტოვებს და სხვა სოფელს შეეხიზნება, ისე კი კმაყოფილი წინასწარ ვიფშენეტდი თითებს, რატომღაც ღრმად ვიყავი დარწმუნებული, რომ საბამ სამაგიერო მიუზღა ბარნაბიშვილს, საკადრისად დასაჯა და მერმე, სხვა გზა რომ არ ჰქონდა, ამიტომაც მიატოვა თავისი სახლ-კარი, სოფელი და, საერთოდ, იქაურობა.

ანანომ კი თავისი ხელსაქმე მოძებნა, წინდების ქსოვა განაგრძო, — მარტო ყელი დამრჩა და ამაღამვე მოვათავებო. მე ავწრიალდი და ოთახში უთავბოლოდ დავიწყე სიარული, თან გულისყური ანანოსკენ მეჭირა, ნუთუ ამბის მოყოლა ამით დაასრულა-მეთქი.

— შემოდგომაზე რა ჰქნა, აჩვენა თომა ბიკაშვილმა მამის საფლავი?

— საფლავზე მისვლა შემოდგომითაც ვერ მოუხერხებიათ. ჯერ ერთი, ცხვარი, შირაქში კი არა, ყიზლარში გაურეკიათ საზამთროდ, მეორეც, საბას დედა გარდაცვლილა და ველარ მოუტლიათ.

— იოთამის ამბავი თუ შეუტყობინებიათ?

— არა. მოულოდნელად გარდაიცვალა.

— მერმე?

— რა, მერმე?!

— ასე თავისუფლად დადიოდა ბარნაბიშვილი? არავინ გადაუდგა წინ?

ანანო გაჩუმდა. როგორც ჩანს, შეგნებულად არ გამცა პასუხი. მე, რა თქმა უნდა, ცხოვრების გამოცდილება არ მალა-

მარაკებდა, უფრო წაკითხული წიგნებისა და სკოლაში ნასწავლი ლიტერატურის წყალობით ვიცნობდი ცხოვრებას და ალბათ იმიტომაც წარმოვიდგინე, პირადად როგორ გაუსწორდა საბა იმ ბარნაბიშვილს. ასე არ გვასწავლიდნენ, გმირი ჯერ შურს იძიებდა და მერმე ტყეში გავარდებოდა?..

— საბა?.. საბამ ეგრევე აპატია ყველაფერი?

— საბას რა უნდა ექნა? შური ეძია?

— თუნდაც!

— ჩასაფრებოდა და მოეკლა?

ანანომ ისე შემომიტია, განაჩენი, ცოტა არ იყოს, მკაცრი მომეჩვენა.

— კაცის მოკვლა დიდი დანაშაულია... დიდი ცოდვაა...

— სხვანაირადაც შეიძლებოდა დასჯა. — თანდათან უკან დავიხიე.

— გზაში დახვედროდა და ეცემა, გაელანძლა და დაშოშმინებულყო?

— სიმართლე ეთქვა! — წამომცდა უცებ და მერმე ამ წამომცდარი სიტყვის გაშლა და დასაბუთება ვცადე, — ხალხის თანდასწრებით, ყველას გასაგონად უნდა ეთქვა, რასაც ფიქრობდა... მე მგონია, ნათქვამს მიაქცევდნენ ყურადღებას. — მე თვითონ არ ვიცი, როგორ დამებადა ასეთი აზრი, იგი ჩემთვისაც აღმოჩენასავით იყო.

— აკი გითხარი, ბალღი ხარ-მეთქი.

— რატომა ვარ ბალღი?!

— ხარ და რა გიყო! თუ მოწმე არ გეყოლებოდა, ცამდე მართალიც რომ ყოფილიყავი, შენს მართლად ნათქვამს მაინც ცილისწამებად ჩავითვლიდნენ. თანაც იმ დროს, როცა ქვეყანა ჯერ არ იყო დალაგებული, შეიძლება მოწმეებიანადაც გაემტყუნებინე... ეგეთებიც ხდებოდა.

— ეგ რა გამოვიდა?!

— რაც გამოვიდა, ის გამოვიდა!

— მაშინ საშველი არ ყოფილა.

— ვინ გითხრა, საშველი არ ყოფილა!

— რა ვიცი!

— შენ რას გამტყუნებ, ოზო, გაგიკებულნი მეც ეგრე ვფიქრობდი, როცა საბამ ყველაფერი მიაშობო. ისიც კი მივახალე, — ლაჩარი ყოფილხარ-მეთქი! იმ ბარნაბიშვილს ეგენი როგორ

აპატიე-მეთქი.. მერმე, დრო რომ გავიდა, ვინანე, ახლაც ვნანობ და ალბათ, სანამ ცოცხალი ვარ, ვინანებ კიდევ! ამიტომ არ მინდა, მოუფიქრებელი საქციელი შენც სანანებლად და სატანჯველად გადაგექცეს.

მე არ მესმოდა, რას მეუბნებოდა ანანო, რა სინანულზე მელაპარაკებოდა, რატომ ქენჯნიდა სინდისი ან რას ნიშნავდა მოუფიქრებელი საქციელი. მინდოდა, რაც ვერ გავიგე, მაშინვე აეხსნა და განემარტა, მაგრამ თავი რატომღაც ისე მეჭირა, თითქოს უმნიშვნელო წვრილმანებშიც კი კარგად ვერკვეოდი, თითქოს ყველაფერი ჩემთვის ცხადზე უცხადესი იყო. თუმცა შინაგანად მაინც ვგრძნობდი, დაძრული ზეავის შეჩერება აღარაფერს შეეძლო, ანანომ რახან ამბის მოყოლა დაიწყო, ბოლომდე გავიდოდა კიდევ.

დუმილი საკმაო ხანს გაგვიგრძელდა. ანანო ისე თავაუღებლად ქსოვდა, გეგონებოდა, ვიღაცას ექიშებოდა ან ჯიბრს უწევდა. მე ჩემს მაგიდას დაეუბრუნდი, იდაყვებს დავეყრდენი და მივაჩერდი ფანჯარას, რომელსაც ღამის წყვედიანი მობჯენოდა. აფორიაქებულმა და გძლიზიანებულმა ახლა უკვე ნათლად წარმოვიდგინე, როგორ ვსჯიდი ბარნაბიშვილს. მართალია, ამ კაცის საჯაროდ მხილება მოვითხოვე, მაგრამ ამან, ეტყობა, ბოლომდე არ დამაკმაყოფილა. პერანგი გავხადე, მუხლზე დავაჩოქე და ასე დაჩოქილს გამეტებით ვურტყამდი მათრახს. როგორც იტყვიან, ზურგზე ბოლი ავადინე, ოღონდ დასჯის ეს პრიმიტიული ხერხი წინა საუკუნეებს რატომ დავესესხე, დღემდე არ ვიცი, ვერც იმას ვიფიქრებდი, შინაგანად თუ ასე მკაცრი და დაუნდობელი ვიქნებოდი.

მათრახის ტყლაშუნი ანანოს ხმამ შემაწყვეტინა:

— მაშ, არ მითქვამს, რომ საბა იოთამის შვილი იყო?

— არ გითქვამს. — ისევ გადავუჭირე მათრახი ბარნაბიშვილს.

— ჰოო!

— რა მნიშვნელობა აქვს, გითქვამს, თუ არ გითქვამს? — კიდევ ერთხელ გაიზუზუნა შოლტმა ჰაერში.

ბარნაბიშვილმა გონება დაჰკარგა. ერთი ვედრო ცივი წყალი ზურგსა და კეფაზე დავასხი, გმინვა გავიგონე და მათრახი იქვე მიწაზე მივაგდე. გული გამალეებით მიცემდა. მარჯვენა ხელი დაღლილი და დაბუყებული მქონდა...

— ახლა იმასაც გიამბობ, — მომესმა ანანოს ხმა, — მერმე რა ჩაიღინა ბარნაბიშვილმა. იოთამის ცხვრით კარგად რომ მოითბო ხელი, სულ გათამამდა და გათავხედდა, სოფელი ფეხებზე დაიკიდა. მართლაც, ვინ იცოდა, ვინ დათვალა და აღნუსხა, რამდენი ცხვარი ჰყავდა? ხუთი ათასი? იქნებ — ნაკლები? იქნებ — მეტი? ისიც არავის დაუთვლია, ბარნაბიშვილმა რამდენი სული შეერეკა კოლმეურნეობის ბაკებში, მერმე იქიდანაც თანდათანობით რომ გააქრო. ნაწილი საქართველოში გაყიდა, ნაწილი — აზერბაიჯანსა და სომხეთში, დანარჩენი — კავკასიონის გადაღმა, ყიზლარში. მერმე სოფელს გამოუცხადა: ცხვარი რა ჩვენი საზრუნავია, გვიბრძანეს, ძირითადად მიწათმოქმედებას მიხედეთ, თქვენი საქმე პური და ვენახიაო...

ცხვარი ხომ მოინელა და მოინელა ბარნაბიშვილმა, თვალი ახლა იოთამის ცხენებს დაადგა.

ანანოს ნათქვამს თუ დავუჯერებთ, იოთამი უბირი ვინმე არ ჩანს, პირიქით, ახალგაზრდობაში თელავის სასწავლებელი დაუმთავრებია და ერთგვარი განათლებაც მიუღია. თელავში ვაჟა-ფშაველასთან ერთად უსწავლია, იქვე დამეგობრებია კიდევ და მეგობარს რამდენჯერმე ჩარგალშიც კი სწვევია თურმე.

ერთხელ ვაჟას გულის ტკივილით უთქვამს: საქართველოში ქართული ჭიშის ცხენი თითქმის გაწყდაო... ყარაბახულს, არაბულს, ინგლისურს მივეტანეთ და ჩვენი ფორეჯებიანი ლურჯა, რომელიც აღნაგობით, ამტანობით, ერთგულებითა და სილამაზით სხვაზე მეტი თუ არა, ნაკლები არ იყო, თვალსა და ხელს შუა გაგვიქრა და გადაგვიშენდაო. ჩვენ რომ ხალხი ვიყოთ, ამ ჭიშის გადარჩენა ჯერ კიდევ გვიან არ არის, შესაძლებელიაო. ლურჯა ბედაურის გადარჩენა ვაჟას ძნელ საქმედ მიაჩნდა, მაგრამ შესაძლებლობას არ გამორიცხავდა. ამ საქმისთვის კაცს უსათუოდ თავი უნდა გადაედო, გარდა ამისა, მას ფულიც ბლომად უნდა ჰქონოდა, რადგან, სადმე თუ აღმოჩნდებოდა ასეთი ფორეჯებიანი ლურჯა, საჩუქრად არავინ მიართმევდა. თანაც მოსაშენებლად ერთი და ორი ცხენი არ იკმარებდა, ღვთის წყალობით, თუ ვინმე იყისრებდა და ცხენებს მოაშენებდა, იმ რემასაც ღიღი მოვლა-პატრონობა სჭირდებოდა, რაც ისევ ფულთან იყო დაკავშირებული...

იოთამს ვაჟასთან სიტყვაც არ დასცდენია, იქიდან წამოსულს კი გუნებაში მტკიცედ გადაუწყვეტია, ქვეყანაზე თუ

კაცი ვარ, ეს საქმე მე უნდა ვიკისრო, ვაჟას გული ამ ჯავრს არ უნდა შევაჭმევინო. მერმე ისინი ერთმანეთს აღარ შეხვედრიან, რადგან ვაჟა მალე, თითქმის სამი წლის შემდეგ გარდაცვლილა. იოთამს თავისი გადაწყვეტილება მაინც არ შეუცვლია, ხუთი წლის მანძილზე მთელ კახეთში ეძებდა და არჩევდა ქართული ჯიშის ცხენს, ეგრეთ წოდებულ ლურჯას. ვისფულს აძლევდა, ვის — ცხვარს, ბოლოს და ბოლოს ათი ცხენი შეუძენია, აქედან შეიღი — აჯილა.

ამ ამბავს რომ ვისმენდი, შეიძლება ჩემი ასაკის, შესაძლოა სხვა მიზეზის გამოც, ეჭვი შემეპარა, ვერ ვირწმუნე, ვერ დავიჯერე ვაჟასა და იოთამის შეხვედრები და საუბრები, ის უფრო საბას ფანტაზიის ნაყოფად მომეჩვენა, ვიდრე სინამდვილედ. ლურჯას ამბავსაც თითქოს ნიადაგი ჰქონდა გამოცლილი, ამგვარი ცხენი თუკი მართლა არსებობდა, უცებ რამ გადააშენა, ან ჩვენ თვითონ ასე უმტკივნეულოდ როგორ შეველიეთ-მეთქი. პირადად მე ერთი ლურჯა ვიცოდი, მაგდანასი, და ისიც სახედარი იყო. თუმცა მაშინვე სხვაც გამახსენდა: „შეჯდა თავის ლურჯა ცხენზე, გააჰვენ-გამოაჰენა“. ამ ცხენსაც ჩვენი თექვსმეტი წლის არსენა ისე იოლად დააჰვენებდა და დააჯირითებდა, რომ ჩემს ცნობიერებაში „ლურჯა“ ერთგვარად ირონიულ ელფერს იძენდა და ვერავითარ განსაკუთრებულობას ვერ ვატყობდი.

ახლა მინდა მოვლენებს გავუსწრო და ორიოდე ცნობა მოგაწოდოთ ქართული ცხენის შესახებ. ერთ კერძო ბიბლიოთეკაში წიგნების ქექვისას შემთხვევით წავაწყდი 1608 წლით დათარიღებულ დოკუმენტს, რომელმაც უნებურად გამახსენა ზამთრის ეს ღამეც და ანანოს მონაყოლი ძველი ამბავიც: თავად მიხეილ ტატიშჩევის საჯაროდ გასაყიდი ქონების ნუსხაში სხვათა შორის მოხსენებულია: «...жеребец аргамачей сер грузинской... цена 65 рублей...»

მიაქციეთ ყურადღება, იმ დროისათვის რა ფანტასტიკური ფასი ადევს ქართულ ცხენს... აი, კიდევ მეორე, ცოტა უფრო გვიანდელი, რუსეთის მეფის მიხეილ თევდორეს ძის დროინდელი საბუთი:

«Ведомо государю подлинно, что в грузинской земле есть аргмаки, самые добрые. И государь указал в грузинской земле купить аргмака самого лутчего. И князю



Ефиму да дьяку Ивану в грузинской земле проведывать накрепко, купить на государя аргاماка самого доброво которово б аргاماка нигде лутчи не было, чтоб который был в летах, молод, и во всем цел и здоров и до-суж и уряден. И привести с собою к Москве с великим береженьем».

ეჭვი არაა, ქართული ცხენი თვით რუსეთის ხელმწიფისათვის უნდათ. ამ დროს რუსეთი უკვე დიდი და ძლიერი მხედრული ქვეყანაა. რჩეული ჯიშის ცხენებიც კი უფრო მეტი ჰყავს, ვიდრე სჭირდება. და მაინც ხელმწიფისათვის ეძებენ და არჩევენ ყველა ნიშნის მიხედვით საუკეთესოს. ასეთი ცხენისთვის აკი მიუგნიათ კიდევ... საქართველოში!

რა თქმა უნდა, ვაჟა-ფშაველა ტყუილუმბრალოდ არ წუნდა ფორეჯებიანი ლურჯას გადაშენების თაობაზე, ალბათ იცოდა, რა სტკენდა გულს და რასაც ამბობდა.

ამის შემდეგ ვაჟას ლექსებსა და პოემებში ნახსენებ ლურჯასაც უკვე სხვანაირი თვალით შევხედე, ვიგრძენი დიდი პოეტის სევდა, ანუ ნოსტალგია ქართული ცხენის — ლურჯას მიმართ, აგრეთვე ცდა: იქნებ თავისი გენიალური ქმნილებებით მაინც გადაერჩინა და უკვდავეყო ის ჯიში, რომელმაც მრავალი საუკუნის მანძილზე, დამპყრობელთა წინააღმდეგ ბრძოლასა თუ შრომაში ასეთი დიდი სამსახური გაუწია ქართველ ხალხს...

ახლა ისევ დაეუბრუნდეთ ანანოს ნაამბობს.

გასულა კიდევ თორმეტი წელი, იოთამს ცხენებისთვის ზრუნვა და ყურადღება არ მოუკლია და მისი რემა უკვე ორმოცამდე ბედაურს ითვლიდა.

ნისლაურას ზემოთ, ტყის გასწვრივ მწვანით დაფარულ პატარა-პატარა გორაკებსა და ფერდობებს სოფელი საძოვრებად იყენებდა. აქ ბალახი არ ითიბებოდა, ადრიაინი გაზაფხულიდან გვიან შემოდგომამდე საქონელი იყო საბალახოდ მიშვებული. იოთამის ცხენებიც იქვე სძოვდნენ ბალახს, თითქოს უპატრონონი, ზამთარ-ზაფხულ თავისუფლად დანაეარდობდნენ. იოთამს მხოლოდ ზამთრობით აჰქონდა თივა და ალაგ-ალაგ ბულებებად უყრიდა. რაც უფრო მეტი დრო გადიოდა, უფრო მეტ ყურადღებას საჭიროებდნენ. ჭერ მარტო მათი დაქერა და დანალვა რა ღირდა! მომრავლდნენ და მომძლავრდნენ, თი-

თქმის გაველურებულნი გრიგალივით დაჰქროდნენ აღმა-დაღმა. ეს კი იყო, ქვეყანაზე მხოლოდ ერთ კაცს სცნობდნენ — იოთამს.

იოთამი სოფლიდან რომ გადახვეწილა და დაკარგულა, რემა მთლად უპატრონოდ დარჩენილა, მაგრამ ცხენები უპატრონობას უკვე აღარ დაგიდევდნენ, მაინც მრავლდებოდნენ და ოთხ წელიწადში უკვე ასამდე ბედაური ნავარდობდა ტყის სანახებში. არაფერი სჯობდა თურმე იმის ნახვას. ლურჯი რემა სოფელს გრიალით რომ ჩაუქროლებდა და ფერდობებს ჰიხვინ-ჰიხვინით შეუყვებოდა ან ნისლივით გაწელილი ალაზნისკენ რომ დაქანდებოდა დასარწყულეზღად.

მართალია, თვალს უხაროდა მათი ცქერა, მაგრამ ასი ცხენი, ისიც უპატრონოდ მიშვებული, თითქმის გაველურებული, სხვა საფიქრალს უჩენდა ადამიანს და სხვა საზრუნავს მოითხოვდა. ის პატარ-პატარა გორაკები და ფერდობები სოფლის საქონელს კი არა, ახლა ცხენებსაც ძლივს ჰყოფნიდა. ამიტომ სოფლის მკვიდრნი უკმაყოფილოდ ბუზლუნებდნენ და ჩიოდნენ კიდევ.

რა თქმა უნდა, ყველაფერი იოთამს ბრალდებოდა. ეს იცოდა საბამ, ისიც იცოდა, ბარნაბიშვილი რომ კარგა ხანია აღმაცერად უყურებდა ცხენების თავისუფალ ჯირითს, გულისწყრომას არც მალავდა, იმუქრებოდა, — ცოტაც დამაცადეთ და მაგ ცხენებს მე მოვუვლიო! მაგრამ გადიოდა დრო და ბარნაბიშვილის მუქარა მუქარად რჩებოდა, ცხენები კი ისევ აღმადაღმა დაჰქროდნენ და დანავარდობდნენ. აშკარა იყო, ამ ლიტონი მუქართა და დაყოვნებით ბარნაბიშვილი სხვათა უკმაყოფილების გაღვივებას ცდილობდა.

— ბარნაბიშვილი მაგ ცხენებს დალუპავს, — ერთხელ საბასთვის უთქვამს თომა ბიკაშვილს, — იქნებ მიხვიდე და მოელაპარაკო.

— მივიდე? — გასცინებია საბას, — რა ვუთხრა, რომ მივიდე?

— სათქმელი რა, ცოტაა?.. კაცო, ეგ ცხენები თითო-თითოდ უნდა დავიჭიროთ და გავხედნოთ, ზოგი ჩვენი კოლმეურნეობის სამსახურში ჩავაყენოთ, ზოგი — სხვებს მივყიდოთ. ცხენი ყველას სჭირდება, მერმე ეგეთ ბედაურებს რომელი კოლმეურნეობა არ იყიდის?! ჩვენც მოგებულები დავრჩებით

და ისინიცა. თუ არადა, ფერმა გავაშენოთ, ცუდი რად იქნება ცხენების ფერმა? ბარნაბიშვილს უთხარი, დიდ მოგებას მისცემს სოფელს-თქო... ისიც უთხარი, ფერმაში მე თვითონ ვიმუშავებ-თქო... საბავ, ცხენების პატრონობა შენ უნდა იკისრო!

— მე რა მესაქმება?

— როგორ რა გესაქმება, ეგ ცხენები იოთამის ნაყიდი და მოშენებულა.

— იოთამისა იყო, ახლა არავისია... იქნებ ბარნაბიშვილისაც იყოს?!

— ეგ რა თქმაა, საბავ, ეგრე მსხვილად ნუ დაფქვავ, ჯერ ბალლი ხარ!

— არც მსხვილად დავფქვავ და არც წვრილად... განა მე კი ვერა ვხედავ, მაგრამ რა ვქნა, გინდაც მომკლა, იმასთან წერ მივალ.

— ვითომ რატომაო?!

— კაცი არ არის და იმიტომა. კაცი რომ იყოს, მივიდოდი, დაველაპარაკებოდი.

— შენ სცადე, იქნებ...

— ვერა ვცდი.

— კაცო, გეუბნები, ცხენებს დალუპავს-მეთქი.

— ვიცი.

— ვერა ხედავ, ზოგ-ზოგები რომ გადაიბირა და საქვეყნოდ აყბედებს, საქონელი შიმშილით გვეხოცებაო.

— ეგეც ვიცი, რისთვის აყბედებს.

— თუ იცი, რას დამდგარხარ და შემომცქერი? შიდი და უთხარი!

თომა ბიკაშვილი გაჭაერებული წასულა, ხელი ჩაუქნევია, ეგრე არაფერი გამოვო.

ერთხელ (მაისი იწურებოდა თურმე) საბა ადრიანად ამდგარა, გარეთ გამოსულს ლობის იქით ცხენი დაუნახავს, თვალები მოუფშვინეტია, ხომ არ მელანდებოა. არ მოლანდებია, კიშკართან ლურჯა ულაცი მდგარა, მოწყენილი, თავჩაქინდრული... საბას კიბე სწრაფად ჩაურბენია და კიშკარი გამოუღია...

ბებერი, ქანცაწყვეტილი ცხენი, ეტყობა, მგლებს გამოქცეოდა, ყელი თითქმის გამოლადრული ჰქონდა, გავა და ფეხის კუნთები — ბასრი კბილებით დასერილი.

საბას კრილობები რომ დაუთვალე რეზი, გადარჩენა შეიძლებაო, — უფიქრია და ეზოში შემოუყვანია. სისხლი, მტვერი და ჭუჭყი ჩამოუბანია, მერმე იოთამის მალამოების დასაძებნად შესულა შინ... კრილობის მკურნალობაცა და მალამოს დამზადებაც საბას მამისგან ჰქონია ნასწავლი და შეთვისებული, ფრთხილად უსვამდა თურმე არაყს, ყელზე ჩამოკონწილავდა ხორცის ნაფლეთებს ფრთხილადვე აკრიდა, კრილობას მალამოთი უამებდა, ზედ ულაყისავე გაგლეჯილ ტყავს აფარებდა და ბანდით უხვევდა.

მერმე თვალი უნებურად ღობისკენ გაქცევია: სამი მხედარი თურმე შეუძრწველად მოსდგომოდა ღობეს; საბა მაინცადამაინც ბარნაბიშვილის მზერას წასწყდომია: უსიამოვნოდ აწურულა და დაძაბულა.

— სტუმრად თუ მოსულხართ, ბარემ შინ შემოდით. — შემოუპატიოია.

— ეგ ცხენი ვისია? — სიტყვა ბანზე აუგდია ბარნაბიშვილს.

— თუ შემოხვალთ, სათქმელი მაქვს და მოგახსენებთ.

— სათქმელი ჩვენა გვაქვს... მაგ ცხენებმა აქაურობა მოახრეს, შენ კი აქ ლაზარეთი გაგიმართავს.

— მეც მანდა ვარ, იქნებ ცხენები გაგვეხედნა, ქვეყნის საქმისთვის გამოგვეყენებინა, მეც მოგეხმარებოდით... გაუჭირდებათ... აი, დღეს ერთი მგელს დაუგლეჯია...

— როდის აქეთ დაიწყეთ ქვეყნის საქმეებზე ფიქრი, ჰა?!

— ჯიბრით ნუ მელაპარაკები, ბარნაბიშვილო, ეს ცხენები მოსავლელად ღირს და მოვუაროთ.

— ჰკუა მაშინ უნდა გქონოდათ, როცა მომრავლება და მოშენება დაიწყეთ, ახლა გვიან არის. ამოდენა ჯოგის მომვლელი ვინ იქნება?!

— მე მოვუვლი!

— შენა? მაინც იქა ხარ, ძველს არ ივიწყებ, არა? ერთ კაცს ასი ცხენი მეტი ხომ არ მოუვა?

— თქვენთვის მოვუვლი, თქვენთვის!

— მოსავლელი გაგიჩენია და მოუარე! — ბარნაბიშვილს ღიმილით შეუხედავს ბებერ ლურჯასთვის და წასულა. ორივე ცხენოსანი უკან გაჰყოლია.

საბასაც ღიმილით გაუცილებია მიმავალნი. ოღონდ ეს ღი-

მილი მწარე ყოფილა. გუნებაში ლანძღავდა ბიკაშვილს, რომელმაც გულწრფელი საუბარი გააბმევინა ბარნაბიშვილთან.

ერთი კვირის შემდეგ კი უჩვეულო და თავზარდამცემი სახანაობის მოწმე გამხდარა.

კეტებითა და ფიწლებით შეიარაღებული ოციოდე მხედარი ყიჟინით შესევია ტყისპირა ფერდობებს, იოთამის ცხენები დაუფეთებია და წინ გამოურეკავს იმ გზით, რომლითაც ისინი მდინარეზე ჩადიოდნენ წყლის დასალევად. ჭიხვინით დაშვებულან თავქვე, ფლოქვების თქარათქური მიწას არყევდა, მტვერი კი ცასა სწვდებოდა. გარკვეულ მანძილზე ხმაურითა და კეტების ქნევით ხვდებოდა ჩასაფრებული ხალხი, გზის აქცევის საშუალებას არ აძლევდა რემას, რომელიც ნიაღვარივით დაძრულა გუგუნითა და გრიალით მიექანებოდა ალაზნისაკენ.

ხოლო ალაზანს დიდროას ჯერი დასდგომოდა, მიდიოდა ატორტმანებული, მღვრიე, შავი, პირქუში, ვეება ტალღებს მოაგორებდა, კალაპოტი ვადმოელახა და ერთიანად მოჰქონდა, რაც გზად დახვედროდა...

ეს ყველაფერი საბას თავისი თვალით უნახავს. ჯერ ხალხის ყვირილი და ყიჟინა გაუგონია, მერმე — ცხენების ჭიხვინი და ფლოქვების თქარათქური. გამოქცეულა და ბორცვზე შემდგარი კარგა ხანს დასცქეროდა ამ სანახაობას.

თითქოს ღვარცოფმა დამბა გაგლიჯა, ზედ გადაეცლო და ახლა მიხვეულ-მოხვეულ ხრამებით დაქანებული გზას მიიკვლევს მდინარისაკენ.

ალაზანთან მისული რემა უცებ შემკრთალა, ერთმანეთს შემსკლარ ცხენებს უკან მობრუნება უცდიათ, მაგრამ მხედართა და ქვეითთა ალყაში მოქცეულები იქვე, ადგილზევე მორევით დატრიალებულან, იქნებ გასარღვევ ჯებირს მივაგნოთო.

კეტმომარჯვებულთ ხმაურითა და შეძახილებით შეუტევიათ, რკალი თანდათან, ნაბიჯ-ნაბიჯ შევიწროებულა, დაფეთებული ცხენები თურმე ერთმანეთს ეხეთქებოდნენ, სხვა რა გზა ჰქონდათ, ისევ მდინარისკენ დაუხვევიათ. ერთ-ერთ ცხენს გაუბედავს და აქაფებულ ალაზანში გადაშვებულა, მას მეორე მიჰყოლია და... ასე მთელი რემა შერევია მდინარეს. რამდენიმეს ნაპირისკენ მობრუნება უცდია, მაგრამ ნაპირიდან ქვეები დაუშენიათ, გვარიანი შეძახილებით ისევ გაუტრიალებიათ.

ახლა რემას გეზი გაღმისკენ დაუქერია, თუმცა გაღმაც მდგარან ქვა და კეტმომარჯვებული, ხმახაფიანი მომლოდინე ვაუკაცები.

ბორცვზე მდგარი საბა გაოგნებული დაჰყურებდა მდინარეს, რომლის ატორტმანებული ზედაპირი მოჩითული იყო ცხენების თავებით. გამწარებულ ცხენებს კისრები დაეგრძელებინათ და თავადერილნი მთელი ძალით ებრძოდნენ ღონიერ ტალღებს, მზაკვრულ დინებებს, ღრმა ძაბრულებს. ხალხო, რას სჩადითო! — საბა ბღავილით მოსწყვეტია ადგილს და თავქვე წასულა. ხან გორაკები თუ ბორცვები ეფარებოდა, ხან — ხეები, მაგრამ ბორცვებს იქით თუ ხეებს შორის მაინც გაიღვებდა კისერწაგრძელებული ცხენის თავებით მოფენილი მდინარის ზედაპირი...

ასე ურბენია ერთხანს, მერმე გულამოვარდნილი შეჩერებულა და ისევ მდინარისათვის დაუხედავს: წყლიდან ამოშვერილი თავები მოჩანდა მხოლოდ. დინებას შორს გაეტაცა ცხენები, მაგრამ მაინც გარკვევით ხედავდა წყალწაღებულებს. გაღმა უკვე მალალი კბოდე იწყებოდა. აქედან მდინარე მარჯვნივ უხვევდა და დინებას მიმართულებას უცვლიდა. ამ ადგილს თუ გადაურჩებოდნენ, მერმე შვილდევით მოზიდული ნაპირი ისევ სწორდებოდა და... საბას უცებ გახსენებია, რომ სწორედ აქ თავდებოდა საქართველოს საზღვარი, იქით უკვე აზერბაიჯანი იყო.

აღარ ახსოვდა, სად და რამდენი ირბინა ან როდის და რატომ დაეცა, რა დრო გავიდა, თავი რომ წამოუწყევია და თვალი გაუხელია, ვერაფერი დაუნახავს, მხოლოდ წყლის შხუილი შემოესმა თურმე. მერმე თანდათან გამოკვეთილა საგნები, მერმე გონსმოსული ნელ-ნელა წამომდგარა, მდინარის გაღმა-გამოღმა ხალხი დაუნახავს, ხალხიც და ცხენებიც, ოღონდ მდინარეში კი არა — ნაპირზე. ცხენები უცვნია, ხალხი — ვერა. უკვე მოსულიერებულს შვევით ამოუსუნთქავს — ცხენები გადარჩენილანო!.. ალბათ, ნაწილი დაიღუპა, მაგრამ უმრავლესობას გადარჩენილსა და ცოცხალს ხედავდა. ეს კი იყო, ადამიანებს სათოფედ რომ არ იკარებდნენ, ახლა მდინარის მიერ გახედნილები თვინიერად და მორჩილად იდგნენ — თავჩაქინდრულები, დადლილები, გასავათებულები. ვიდაც-ვიდაცები გულისყურით ათვალეირებდნენ თუ ამოწმებდნენ,

მხრებსა და გავაზე ხელებს უტყაბუნებდნენ, კბილებს უსინჯავდნენ.

თელებს მოფარებული საბა გადარჩენილ ცხენებს გასცქეროდა და უხაროდა. მან ჯერ არ იცოდა, რომ ეს ასცხენიანი რემაც ისევე, როგორც ოთხი წლის წინათ ცხვარი, ბარნაბიშვილმა წინასწარვე გააჩიდა, ადიდებულ ალაზანს გაატანა, გააშორა საქართველოს ფარგლებს. იქ კი იმ ცხენებს, რომლებსაც მდინარის ტალღა ვერ მოერეოდა, სხვა, ახალი პატრონი ელოდებოდა.

სალამო ხანს საბა ფეხით ამობრუნებულა სოფელში, მიუხედავად იმისა, რომ მშვიერი და დალლილ-დაქანცული ყოფილა, მაინც მჩატედ მოდიოდა თურმე, მსუბუქად, რადგან გულში იმედის ნაპერწკალი უღვივოდა: იოთამის ცდა ფორეჯებიანი ლურჯა ცხენის მოშენება-მომრავლებისა გამართლდა და, ადრე თუ გვიან, თავის ნაყოფს მაინც გამოიღებსო. მაგრამ ამ ნაპერწკალს გზადაგზა დაუქარგავს სითბო და ელვარება. თუმცა საბა ბოლომდე ვერ გარკვეულა, ირგვლივ რა ხდებოდა, ექვის ჭია მაინც შესჯდომია მკერდს შიგნით და გულისგამაწვრილებლად დაუწყია ღრღნა...

ნახევარი სოფელი ისე გაუვლია, ძეხორციელი არ შეხვედრია. ამ სიციარიელესა და მკვდრულ სიმყურდროვეს შეუკრთია, შინაგანად შეუწუხებია. ხოლო ნაბიჯაჩქარებულს როცა თავის ორლობისკენ გაუხევეია, ორლობის სიღრმიდან მომავალი ბებერი ლურჯა დაუნახავს, ამ ერთი კვირის წინ მგლების მიერ დაფლეთილი და ყელგამოღადრული.

ცხენი და ვაჟი თურმე ნელ-ნელა, ნაბიჯ-ნაბიჯ უახლოვდებოდნენ ერთმანეთს, თითქოს ერთსაცა და მეორესაც უფრო მძიმე ტვირთი ეკიდათ, ვიდრე ზიდვა და ტარება შეეძლოთ. ბარბაცით, ფეხების თრევით კიდევ რამდენიმე ნაბიჯი გადაუდგამს საბას, მერმე მუხლი მოჰკვეთია, ჩაკეცილა, სულ ახლოს ნაცნობი დაბრეცილი ფლოქვები დაუნახავს და უგრძვნია, როგორ უყნოსავდა ბებერი ლურჯა ულაცი თავსა და კისერს.

ლამით ცხენების ჭიხვისნა და ფლოქვების თქარათქურს გაუღვიძებია, დაფეთებული წამომჭდარა საწოლზე... სწორედ იმ ღამეს შესრულებია ოცდაორი წელი.

— დილით კი გედეონ ომანაშვილი მოსულა საბასთან, —

განაგრძობდა მოყოლას ანანო, — ამ ომანაშვილს პირველ მსოფლიო ომში, რუსეთ-გერმანიის ფრონტზე ფერშლად უმსახურია, ნისლაურაში კი ექიმად თვლიდნენ და კარგი მკურნალის სახელიც ჰქონია დავარდნილი. მამამისს თავის დროზე მამულები მიუყიდ-მოუყიდა, ქონება პარიზსა და პეტერბურგში გაუნიავებია და გაკოტრებული დაბრუნებულა უკან. ოდესაში სასწავლებლად გაგზავნილი ერთადერთი ვაჟიშვილი სასწრაფოდ სილნალს გამოუხმია, — დავუძღურდი, ბოლო დღეებს ვითვლი, ჩამოდი და მომხედეო. რა ექნა, ისიც ჩამოსულა, ოღონდ შინ მისვლამდე მახლობლებს მამის საფლავზე მიუყვანიათ. ერთი სიტყვით, გედეონ ომანაშვილს სწავლა ველარ გაუგრძელებია, მერმე პირველი მსოფლიო ომიც დაწყებულა... ომიდან დაბრუნებული გედეონი, რატომღაც ნისლაურაში დასახლებულა. როგორც საბა ამბობდა, ცოტა უცნაური კაცი ყოფილა, შინიდან პირგაუპარსავს ვერ გამოიყვანდი თურმე. დარიბულად ცხოვრობდა, არკი იმჩნევდა, დღენიდაღ ძველსა და ერთადერთ კოსტუმს იწმენდდა და იუთოვებდა. სუფთად ჩაცმული და გამოწკეპილი, თავაზიანი და დაუზარელი სოფელს ერთგულად ემსახურებოდა... იმ დილითაც წმინდად გაპარსული, დავარცხნილ-დაუთოვებული მობრძანებულა, საბას კმაყოფილებით გაუფიქრია, — ნეტა საიდან შეიტყო, უქეიფოდ რომ ვარო. მართლაც შეუძლოდ გამხდარა. თავი უბრუოდა და სახსრებშიც ამტვრევდა თურმე...

ანანოს მონაყოლის ზუსტად გადმოცემა, რა თქმა უნდა, მიჭირს. ჩვენ შორის დარჩეს და არ შემიძლია. ამიტომ შევეცდები, მეხსიერებაში მიახლოებით მაინც აღვადგინო ის დიალოგი, რომელიც სტუმრად მისულ გედეონ ომანაშვილს გაუმართავს საბასთვის. ანანოს წარმოდგენით ბატონ გედეონს ოდნავ გაწელილად უნდა ელაპარაკა, თანაც — მაღალფარდოვნად.

— ფრიად ვაოცებული ვარ, ყმაწვილო, ლოგინში რომ გხედავ, — უთქვამს საბასთვის მისალმების შემდეგ, — ზარმაც კაცად არასოდეს მიმიჩნევიხარ და არც ავადმყოფობისა გეტყობა რამე.

— ცოტა უქეიფოდ შევიქმენ, ბატონო გედეონ.

— უქეიფოდა? მერმე აქამდე რატომ არ შემატყობინე, ვეთო? — სწრაფად მისულა ავადმყოფთან და შუბლზე ნები



დაუფარებია, თან გამაფრთხილებელი ჩურჩულით უთქვამს, — ბატონობით ნულარ მომმართავ, გეთაყვა, ეგ სულაც არ არის საჭირო... ჰო, მაინც რა გაწუხებს?

— თავბრუ შესხმის... მგონი, სახსრებიც მტკივა.

— მაღლობა ღმერთს, სიცხე არა გქონია. თავბრუსხვევა გაგივლის... აი, სახსრების ტკივილი კი, მართალი გითხრა, რა-ღაცნაირად არ მომწონს. ვეჟო, იქნებ გუშინ დაიღალე და სტყუვდები, სახსრებისა კი არა, კუნთების ტკივილი გაწუხებს?

— როგორ არა, დავიღლებოდი.

— დიახ, დიახ, დაღლილს უფრო ჰგევხარ, ვიდრე ავადმყოფსა... თუმცა დაღლილობაც მსუბუქი და ხანმოკლე ავადმყოფობაა. წუხელ ხომ კარგად გეძინა?

— რა მოგახსენოთ, მეორედ რომ გამეღვიძა, ვეღარ დავიძინე, ეგრევე თეთრად გავათენე.

— დაიმახსოვრე, ძილი კარგი რამ არის! ღმერთმანი, ძილი დაღლილობის უებარი წამალია და არა მარტო დაღლილობისა! ბევრი ავადმყოფი მომირჩენია ძილის საშუალებით. აი, მე რომ აქედან წავალ, ეცადე დაიძინო. — აქ ცოტა ხნით შეყოვნებულა ყოფილი ფერშალი და ჩაფიქრებულს შემდეგ სხვა გზით წარუმართავს საუბარი. — ახლა კი მიზეზს გაუწყებ იმისა, თუ აგრე აღრიანად რისთვის მოვსულვარ. მე ჩემ თავს არ ვაკუთვნებ რიცხვს იმ ადამიანებისა, რომლებსაც ქვეყანა ჩალით დახურული ჰგონიათ. როდემდე უნდა ვუტკიროთ გულხელდაკრეფილებმა ამ ვიღაც ბარნაბიშვილის თავხედურ ფაფაშა?! სხვისა რა მოგახსენო და პირადად მე მეტის მოთმენა არ შემიძლია. ეს გახლავთ უიშვიათესი მაგალითი იმისა, თუ ერთ უგუნურს როგორ შეუძლია სოფლის დანგრევა და გაპარტახება. ჩემი პატიოსნება, მამულიშვილობა და რევოლუციონური იდეებით აღკურვილობა სიჩუმისა და ხმაგაკმენდილობის უფლებას არ მაძლევს. შენ შეგნებული გაქვს, ვეჟო, ამ ხუთიოდე წლის მანძილზე რა ყოფაში ჩააგდო ჩვენი სოფელი?! ეგ არ უქმნიათ თვით მურვან ყრუსა და ჯალალ ედდინს! კმნით როგორ არ უქმნიათ, მაგრამ ისინი მოთრეული გადამთიელები იყვნენ, ეს კი ქართველია, ვეჟო! მე, როგორც სოფლის ინტელიგენციის წარმომადგენელი, ეგრე არ დავტოვებ ამ საქმესა, ოთარაანთ ქვრივისა არ იყოს, რკინის ქალამნებს ამოვისხამ, რკინის ჯოხს დავიჭერ ხელში და სიმართლის საძებნელად გავეშურები..

გედეონ ომანაშვილი მართლა წასულა სიმართლის საძებნელად, ოღონდ უკან აღარ დაბრუნებულა. სად წავიდა, რა მიმართულებით გაეშურა, სად შეჩერდა, რატომ შეყოვნდა ან სამუდამოდ სად დარჩა, არავინ იცოდა. რაც შეეხება ბარნაბიშვილს, ის იმავე ზაფხულს დაუტკერიათ და სამართალში მიუტციათ. ზოგს ახალა ახელია თვალი, — კაცო, ეს ვინა ყოფილა, ამ ერთმა კაცმა მთელი სოფელი როგორ მოგვადოროა... თუმცა რატომ — მთელი სოფელი? იმ დღეს ცხენები ალაზანში რომ შეყარა, ხომ მიეჭრა თომა ბიკაშვილი? ბარნაბიშვილს ჯიქურ დახვედრა მონდომებია, მაგრამ თომას ხმელი ხელი ისე დაუთხლეს თავ-პირში, რომ წაქცეული ძლივს აუკრეფიათ. წამომდგარს ცალკებად გაუღიმიო, — თომავე, ეგ რა ხუმრობააო? ხუმრობასა და თამაშს მერმე გაჩვენებო, — მიუფურთხებია თომას და თავის გზით წასულა. არ აპატიებს, არ შეარჩენს, ახლავე გამოუდგებო, — ფიქრობდნენ ამ ამბის მოწმენი, მაგრამ ბარნაბიშვილი არ განძრეულა, ფეხიც არ მოუნაცვლებია. ასე ყოფილა, თუ ისე, ბარნაბიშვილი სოფლისთვის მოუშორებიათ, ზოგი ამბობდა, — ეგ თომა ბიკაშვილის წყალობაა, ნაცემი თავმჯდომარე ვის რა ოხრობად უნდაო, ზოგი კი ხანდაზმულ ფერშალს იხსენებდა და ემადლიერებოდა თურმე.

ანანომ ამბის მოყოლა უცებ შეწყვიტა და მითხრა, — გვიან არის, დაწეკი, დანარჩენი სხვა დროსო... მართლაც, შუა ღამე კარგა ხნის გადასული იყო. არ მახსოვს, სოფელში ასე გვიან დაეწოლილიყავი დასაძინებლად, თითქოს კინწიც მწყდებოდა და თვალებიც მებლიტებოდა, მაგრამ დაწოლისთანავე მივხვდი, ძილის ანგელოსს იმ ღამეს ჩემს ოთახში შემოფრენა დავიწყებოდა. ანანომ ლამპა გაიტანა, მე ღამის უსიერ წყვდიადში აღმოვჩნდი და იმის ნაცვლად, თვალები რომ დამხუტვოდა, თავისთავად მეტყუიტებოდა. ეტყობა, გავონილმა ამბავმა ამაგზნო და ამაფორიაქა, ისე კი შინაგანად მცირე კმაყოფილება მაინც განვიცადე, რადგან ბარნაბიშვილის გაშოლტვის სურვილი აღარ გამჩენია. მერმე თანდათან ათასგვარი ეჭვი და საფიქრალი აღმეძრა. ანანოს მონაყოლიდან ზოგი რამ არ მესმოდა, ვფიქრობდი, ათასი წელიც რომ ვიცხოვრო, მაინც ვერ გავიგებ-მეთქი. ეგრევე მინდოდა ჩავწლომოდო იმ ადამიანების ზრახვებისა და სულისკვეთების ნამდვილ არსს.

რატომ ირჩევდნენ გასავლელად იმ გზას, რომელიც ერთი თვალის გადავლებითაც კი განწირულად ჩანდა და ადამიანს დაღუპვას უქადდა? ეს ხომ არ იყო არც რისკი, არც თავდადება, არც გმირობა? რისკსაცა და თავგანწირვასაც მაშინ აქვს მხოლოდ აზრი და მნიშვნელობა, თუ დიდი და საყოველთაო საქმით არის შთაგონებული, სიკეთისკენაა გამიზნული?.. ან ერთი უგუნურის ხელში რატომ იყრიდა თავს ისეთი ძალა, რომელსაც სოფლის გაჩანაგება და გაპარტახება შეეძლო? რა ძალები და ღინებები მოქმედებდნენ? მიწისქვეშა თუ მიწისზედა? ნუთუ ბარნაბიშვილმა ის ცხვარიცა და ის რემაც იმიტომ გაანადგურა, რომ თვითონ გამდიდრებულყო? გამდიდრების ვარიანტი ადამიანისათვის ისე წერილმანად, დამამცირებლად მეჩვენებოდა, დაჭერებაც კი არ მიცდია. ამ საშინელი აქტის მიღმა სხვა რაღაცის, უფრო ძლიერის, მამაკაცური ვნებების აღმოჩენას ვცდილობდი.

ერთგვარად გული მწყდებოდა, რომ ვიღაცის მონაყოლის მონაყოლს ვისმენდი, უცნაური სურვილიც კი დამებადა, მიწდოდა იმ ამბების უშუალო მონაწილე ვყოფილიყავი, იმათთან მეცხოვრა, იქ მეტრიალა, ეს ყველაფერი ჩემი თვალით მენახა, თვითონ მეგრძნო, განმეცადა: რა ამოძრავებდათ, რა უნდოდათ, საით მიდიოდნენ?

და უცებ, ჩემდა გასაკვირვებლად, მიეხვდი, რომ მე მამაკაცების ახლომახლო, მათ გვერდით, მათ საზოგადოებაში არასოდეს მიცხოვრია. იმ წამსვე თვალი გადავაელე ჩემს წარსულს, იმ საცოდავ თექვსმეტ წელს, რომელიც უკვე მოტოვებული მქონდა უკან. შინ, სანამ ცოცხალი იყო, დედის კალთას ამოფარებული ვცხოვრობდი, მამაჩემი დილით ადრე გადიოდა შინიდან, სადილობისას ბრუნდებოდა, ისადილებდა, მერმე ერთი საათით წაიძინებდა და ისევ საღმაც მიდიოდა. ვცდილობდი გამეხსენებინა და ვერ გავიხსენე, დავრჩენილვარ კი მამაჩემის პირისპირ თუნდაც ერთი დღე, ერთი დღე იქით იყოს, თუნდაც ერთი საათი? არა, არასოდეს! იქნებ საერთოდ ასე ხდება ან ასე უნდა მოხდეს, ან ასეა საჭირო-მეთქი? იქნებ მამა მერმე მოგიახლოვდება და მოვა შენთან, როცა წამოიზრდები, როცა შინაგანად და გარეგნულადაც მამაკაცს დაემსგავსები, როცა მამაკაცური მიზნები და ზრახვები გაგიჩნდება-მეთქი?..

სკოლა? რამდენადაც მახსოვს, თითქმის ყველა საგანს ქალი გვასწავლიდა, დამრიგებელიც ქალი გვყავდა. შემდეგ, ომის დაწყებისთანავე სოფელში მიკრეს თავი და აქაც ანანოსა და ქალების გარემოცვაში მოვხვდი, რადგან სოფელი უმამაკაცოდ დარჩენილი დამხვდა, ვისაც თოხის დაჭერა შეეძლო, თოფი ეპყრა ხელთ და ფრონტზე იბრძოდა.

გულზე რალაც სევდისმაგვარი შემომამწვა და გუნება დამიმძიმა.

— ანანო! — წამომცდა მოულოდნელად.

— შენ რა, არ გძინავს? — არც ანანოს ეძინა.

რატომ დავუძახე? თუ დავუძახე, რამე ხომ უნდა ვუთხრა ან ვკითხო მაინც, მაგრამ, რომ არ ვიცი, რა ვკითხო? ანანომ თითქოს თავისი მოგონებებისა და განცდების ლაბირინთში შემეშვა, ოღონდ არიადნეს ძაფის მოცემა დაავიწყდა, ამიტომ იქიდან გამოსვლა, უკან დაბრუნება ალბათ ძალზე გამიჭირდებოდა...

## 7

ისე მალე მოვიდა გაზაფხული და მოვლენებიც ისე სწრაფად განვითარდა, რომ ნაზამთრალი, ღამამიმებული ფიქრებისაგან გამორკვევა და გამომშეურება ძლივს მოვასწარით. ომი აპრილის მიწურულისთვის ფაქტიურად დამთავრებული იყო, მაგრამ ოფიციალურ გამოცხადებას, ეტყობა, მაინც სხვა მნიშვნელობა ენიჭებოდა. გაზაფხულის დადგომისთანავე წუთიწუთ ველოდებოდით ამ დღეს და რადიომ ფაშისტური გერმანიის უსიტყვო კაპიტულაციის ცნობა რომ გადმოსცა, თითქოს უეცარი და მოულოდნელი რამ გავიგონეთ და შევიტყეთ, ყველანი დიდიან-პატარიანად გიჟებს დავემსგავსეთ: ვყვიროდით, ვტიროდით, ვიცინოდით, ერთმანეთს ვეხვეოდით და ვკოცნიდით, ვიგინებოდით, მუშტებს ვიჭნევდით — ცაში ვილაცას ვემუქრებოდით...

მთელი სოფელი გარეთ გამოვიდა, მაგიდები პირდაპირ შარაზე და ორლობებში გამოიტანეს. სუფრას გვერდს ვერ აუვლიდი, ერთი ჭიქა ღვინო მაინც უნდა შეგესვა, ერთი სადღეგრძელო მაინც უნდა გეთქვა, სულერთია, ვინ იყავი — ქალი თუ კაცი, შინაური თუ გარეული, ასაკოვანი თუ უასაკო. გა-

რეთ გამოტანილმა პურ-მარილმა საღამომდე გასტანა, ხალხი ერთმანეთთან დაუსრულებლად მიდი-მოდიოდა, ღვინოს აქაშნიკებდა, სიტყვას ამბობდა, თუ შესაძლებლობა მიეცემოდა, იმღერებდა კიდევ. ერთი სიტყვით, გულჩათხრობილი, ჩაგუბებულ-ჩამდორებული ტბა შეტოკდა და შეიჩხა, შებარბაცდა და შეტორტმანდა, თითქოს მაცოცხლებელმა ქარმა დაუბერა... საღამოს ღვინო უკვე ოჯახებში გადაინაცვლა, იქ უფრო საფუძვლიანად ჩაუსხდნენ საქმეს, სიმღერა, დოლ-გარმონის ცეცხლი, ცეკვა და თოფების გრილი დილამდე არ შეწყვეტილა.

ზიზიმ შეპირებული კონცერტი გამარჯვების მეორე დღესვე გამართა სკოლის კლუბში. კონცერტს წინ პატარა მიტინგი უძღოდა. მიტინგზე სამნი გამოვიდნენ, მარო მასწავლებელი, კარიაულის ქვრივი და მერვეკლასელი ფრიადოსანი გოგონა. თავიანთ გამოსვლებში მარო მასწავლებელმაც და მერვეკლასელმა მოსწავლემაც გამარჯვებით გამოწვეული სიხარულისა და სიამაყის გრძნობა გამოხატეს, კარიაულის ქვრივმა კი ძირითადად შინმოუსვლელთა გმირობასა და ადამიანთა ხსოვნაში მათ უკვდავებას მიუძღვნა სიტყვა. ყველასათვის მოულოდნელად კოლმეურნეობის თავმჯდომარემ, ფილო კვლიაშვილმა ითხოვა სიტყვა და ავსტრიიდან გამოგზავნილი წერილი წაიკითხა. წერილი მადლობისა იყო. № სატანკო შენაერთის მეთაური გვატყობინებდა, რომ ჩვენი სოფლის კოლმეურნეობისა და მისი წევრების დანაზოგით აგებულმა ტანკმა სახელოვნად განვლო ომის მძიმე გზა, ახლა ავსტრიის მიწა-წყალზე იბრძვის და სულ მალე ვენის განთავისუფლებაში მიიღებს მონაწილეობასო. წერილი ომის დამთავრებამდე კარგა ხნით ადრე იყო, რა თქმა უნდა, გამოგზავნილი, მაგრამ ჩვენზე მაინც უდიდესი შთაბეჭდილება მოახდინა. ტაშის გრიალითა და აღტაცების შეძახილებით შევხვდით ამ ცნობას.

ამის შემდეგ, შესაძლოა, წინასწარ იყო მომზადებული, სცენაზე გამოვიდა სამი მოსწავლე — ორი დაი და ერთი ძმა. გოგონებმა გარმონი და ფანდური გამოიტანეს, ბიჭმა — სალამური, რომელიც ქამარში ჰქონდა გაჩრილი და სცენის კიდესთან მოსულმა ხანჯალივით დააძრო. ალბათ, იმის გამო, რომ ჩვენი სოფლის ტანკი ავსტრიის განთავისუფლებაში იღებდა მონაწილეობას, ტრიომ „ვენის ტყის ზღაპარი“ შეასრულა. გარ-

მონს, ფანდურსა და სალამურს — ამ სამ ინსტრუმენტს თანაარსებობა თუ შეეძლო, მანამდე ვერც ვიფიქრებდი. ბავშვები ნამდვილი ვირტუოზები აღმოჩნდნენ, ახლა გამიჭირდება დასაბუთება, მაგრამ მაშინ მომეჩვენა, რომ ყოველ მათგანს აბსოლუტური სმენა ჰქონდა და სრულყოფილად ფლობდა თავის ინსტრუმენტს, დები სკამებზე ისხდნენ, ერთი მათგანი, მგონი, მეფანდურე, იატაკამდე ფეხებს ვერ აწვდენდა. თმაგაბურძენილი ძმა შუაში ეყენათ. სამივენი ერთნაირად უფერულეები იყვნენ, ოღონდ თვალები ჰქონდათ ღიდრონი და დასამახსოვრებლად ნაღვლიანი. ჩემს გარშემო ვისაც ვკითხე, მათი სახელები არავინ იცოდა, სამივეს ერთად კი „ილოს ბაღებს“ ეძახდნენ. ეგრეთ წოდებულ „ილოს ბაღებს“ პირველად ვხედავდი, თუმცა ჩვენს სკოლაში სწავლობდნენ, დაბალ კლასებში... როგორც ჩანს, სამივეს ერთად არ შეეხვედრივარ და ცალ-ცალკე გინდაც მენახა, ალბათ ვერ დავიმახსოვრებდი.

ამასობაში ზიზიმ დაიპყრო სცენა, ლექსები წარმოთქვა, იმღერა და იცეკვა კიდევ, მაგრამ მე მთელი საღამო ისევ ილოს ბაღლებზე ვფიქრობდი, იმ ჰქვიან და ნაღვლიან ბავშვებზე, რომლებსაც ნოტები ალბათ არც ცხადში ენახათ და არც სიზმრად დასიზმრებოდათ. მხოლოდ განგების მადლიან ტალღას ბგერებისა და ჰანგების ნაპირზე მოესროლა და იქ დაესახლებინა. მაშინ მათ მომავალ ბედზე არ მიფიქრია და არც შემეძლო მეფიქრა, მე რაღაცნაირად, ალბათ გაუცნობიერებლად ბედნიერი ვიყავი, რომ ისინი ვნახე და მოვუსმინე, რომ ისინი არსებობდნენ ქვეყანაზე — ღვთიური მადლით აღბეჭდილები, პატარა, ნაღვლიანი მუსიკოსები, რომლებსაც სხვებისთვის სიხარულის მონიჭება შეეძლოთ.

ილოს ბაღლები კიდევ რამდენჯერმე ვნახე და სამუდამოდ დავიმახსოვრე. უცნაური ის იყო, რომ მათ ყოველთვის ერთნაირ გარემოში ვხედავდი, სოფლის ცენტრში, როცა თბილისისაკენ მიმავალ მგზავრებს ვაცილებდი.

თუ არა ვცდები, პირველი იყო ზიზი, ვინც ომის დამთავრებისთანავე დატოვა სოფელი და თბილისს გაემგზავრა. კარგად მახსოვს სოფლის ცენტრი და ორცხენიანი ოთხთვალა, რომელსაც სოფელელები „ლილეინკას“ უწოდებდნენ. ამ ოთხთვალას თელავის სადგურამდე მიჰყავდა მგზავრები, ხოლო თე-

ლავიდან კახეთის მატარებელი ჩაიყვანდა თბილისამდე. როგორც კი სკოლა დავამთავრეთ, ზიზი ატყდა, არ მოისვენა, სულ თბილისი ეკერა პირზე, დღეს დღეზე ითვლიდა, ბოლოს თავისი გაიტანა და ივლისის ერთ მშვენიერ დილას უკვე სოფლის ცენტრში იდგა თავის ჩემოდნიანად — გაბრწყინებული, კმაყოფილი, ბედნიერი. სწავლის გასაგრძელებლად მიემგზავრებოდა, დედა თან მიჰყვებოდა, — ოთახს დავუქირავებ, დავაბინავებ და დავბრუნდებო... იქნებ მაღლიანი ხალხი შემხედეს, პატივისცემას არ მოვაკლებო. ზიზის გასაცლიებლად თითქმის მთელი სოფელი გამოსულიყო, დიდი და პატარა. „ლილიენკის“ გარშემო ირეოდნენ, ფუსფუსებდნენ, ყაყანებდნენ, წამსვლელებს ათასგვარი ლოცვითა და სურვილით ავსებდნენ. ამ ორომტრიალში, მოშორებით, გზის გადაღმა ილოს ბაღლები დავინახე. სამივენი ხელიხელჩაკიდებულნი იდგნენ და ცნობისმოყვარე, ნაღვლიანი თვალებით აკვირდებოდნენ მოფუსფუსე ხალხს. ერთხანს ვუყურე, მაგრამ მერმე მეეტლემ ცხენები დასძრა, ყველაფერი აირია და მეც გულიდან გადამვარდნენ ილოს ბაღლები, თუმცა შინ მიმავალს გამახსენდა, რომ დაძრულ ოთხთვალას გალიმებულები უქნევდნენ ხელებს.

სხვათა შორის, ბევრმა მოინდომა თბილისში სწავლის გაგრძელება. მანამდე, ზიზისგან განსხვავებით, რატომღაც არ ამქლავნებდნენ ამ სურვილს, ქალაქში წასვლაზე კრინტიც არ დაუძრავთ, ზიზის გამგზავრების შემდეგ კი თითქმის ყოველდღე მიხდებოდა თანაკლასელების გაცილება, მათთან ერთად მიემგზავრებოდნენ ისინიც, ვინც შარშან და შარშანწინ დაამთავრა სკოლა. გაცილებისას თავიანთ ძველ, ამორჩეულ ადგილზე, როგორც საგუშაგოზე, იდგნენ ხელიხელჩაკიდებული ილოს ბაღლები და ნაღვლიანი ღიმილით, გულის სიღრმეში ჩაგუბებული თუ ჩაბრუნებული, თვალისთვის შეუმჩნეველი სიხარულით ხელს უქნევდნენ თბილისში მიმავალ თანასოფლელებს. არ ვიცი, ისინი მამჩნევდნენ თუ არა, მაგრამ მე ყოველთვის ვაკვირდებოდი და ვგრძნობდი, რომ უნებური მოკრძალებით ვიყავი ამ ლამაზი ბავშვების მიმართ გამსკეალული.

გასაცლიებელი გავაცილე, გასამგზავრებელი გავამგზავრე, სოფელში თითქმის მარტო დავრჩი, მარტო დავრჩი მე, რომელიც ჭერ კიდევ შარშან შემოდგომის ერთ ღრუბლიან დღეს გიჟივით გავრბოდი აქეოან.

სკოლის დამთავრება, როგორც ჩანს, თავისთავად დიდი და მნიშვნელოვანი მოვლენაა, უცებ უნდა მოწყდე ანდა თუ არ მოწყდები, მაშინ, საოცარი სისწრაფით უნდა დაშორდე გუშინდელ დღეს, გუშინდელ ყოფას, ცხოვრების წესს. ათწლიანი, ერთგვარი თუ ერთფეროვანი, სავალდებულო ცხოვრების ციკლი მთავრდება და იწყება სხვა, ახალი, თვისობრივად განსხვავებული დღეები, რომელიც შესაბამის დამოკიდებულებას მოითხოვს შენგან. განვლილი წლების ინერციას თავი რომ დააღწიო, შინაგანად მზად უნდა იყო ახლის შესახებდრად.

შესაძლებელია, ალღო ვერ ავუღე, მაგრამ მე მეორე დღესვე ვიგრძენი ახალი ცხოვრების მონაბერი სიო. ეს არც იყო ძნელი, ამას ყველა იგრძნობდა... სკოლაში არ უნდა წავსულიყავი, არც გაკვეთილები მქონდა მოსამზადებელი, რაღაც არდადეგების დროინდელი განწყობილება დამეუფლა. უფრო ხშირად იღოს ბალებზე ვფიქრობდი ანდა იღოზე. წარმოდგენა არ მქონდა, ვინ იყო, რა კაცი იყო, მაგრამ სერიოზულად მაწუხებდა, დაბრუნდებოდა თუ არა ომიდან, თუ არ დაბრუნდებოდა, რა ეშველებოდათ მის ბალებს.

ამ ბავშვებზე არა ნაკლებ, თუ უფრო მეტად არა, მაფიქრებდა ზიზის ბედი. ვერ გავუგე, ვერაფრით ჩავწვდი მისი გიჟური ლტოლვის საიდუმლოს, რომელიც მოჩვენებითი და რატომღაც არაგულწრფელი მეგონა. მით უმეტეს, მისი წასვლით თითქოს სოფელი დაცარიელდა, თითქოს ხმაც დაკარგა და სმენის უნარი, დაკარგა მომხიბვლელობა თუ მიმზიდველობა... მეჩვენებოდა, რომ სოფელი მშვენიერი იყო მანამდე, სანამ ზიზის სული იქ ტრიალებდა.

იოთამის ცხენებზეც ვფიქრობდი. ლურჯფორებიან ბედაურებზე, არ მინდოდა მათი გადაშენება დამეჯერებინა და რამდენ თეთრ ცხენსაც დავინახავდი, გული გადამიქანდებოდა, ქართული ლურჯა ხომ არ არის-მეთქი.

მას შემდეგ, რაც ანანომ ამდენი რამე მიაპბო, თითქოს გამოვიცვალე, თითქოს რაღაც ცხოვრებისეული გამოცდილება შევიძინე და გავმდიდრდი: მე ვიცოდი ის, რაც ჩემს გარშემო არავინ იცოდა, არც ჩემმა თანატოლებმა და არც სხვამ. ამან ერთგვარი უპირატესობის გრძნობითაც კი გამმსჭვალა.

ფიქრისთვის ბევრი დრო მრჩებოდა, რადგან მთელი დღე მარტო ვიყავი, ანანო გაზაფხულის დადგომისთანავე კოლმე-



ურნეობის მთავარ ეკონომისტად თუ ბუღალტრად, არ მახსოვს, გადაიყვანეს და დილიდან გასული საღამოს ბრუნდებოდა. საქმე არ მქონდა და აღმა-დაღმა უაზროდ დავყიალობდი ან შინ ვიჭექი და ანანოს ველოდებოდი. ხანდახან მეგონა, ანანომ დამივიწყა-მეთქი, თითქოს რაც სათქმელი ჰქონდა, მითხრა და მოისვენა, სული მოითქვა, თუმცა მისი ზრუნვა და ყურადღება არ მომკლებია. მაგრამ მე ხომ დარწმუნებულიც ვიყავი, რომ სათქმელი ბოლომდე არ ჰქონდა ნათქვამი. იმას, რაც მთავარი იყო, რაც ყველაზე მეტად სტკიოდა, არ მეუბნებოდა. ერთ დილას დავატყე, ანანო შინიდან გასვლას არ აპირებდა და ვკითხე, — შემდეგ რა მოხდა, რატომ არ მეუბნები-მეთქი. ანანომ წამიყრუა, ვითომ ვერ გაიგო, რას ვეკითხებოდი, მაგრამ აშკარად დავინახე, თუ ვიგრძენი, გუნება შეეცვალა. მერმე სადღაც წავიდა და მალევე მობრუნდა, ჩემს ოთახშიც შემოიხედა, აქ ხარო, — გამიღიმა. ჩვენ უკვე ვეღარ ვატყუებდით ერთმანეთს. მივხვდი, რისთვისაც წავიდა, იმასაც მივხვდი, რომ უკვე მზად იყო ჩემს შეკითხვაზე პასუხი გაეცა, ეთქვა, შემდეგ რა მოხდა.

აი, რა მიაბო ანანომ...

ომის დაწყებამდე თითქმის ერთი თვით ადრე ვიღაც შავ-გვრემანი და ხმელ-ხმელი კაცი მოსულა ანანოსთან, ცხენზევე მჯდარს უთქვამს, — ნისლაურელი ვარ, საბას მეზობელი და მისი ნახვა მინდაო. თავზე მჭიდროდ მორგებულ თუშური ქუდიდან შეკალარავებული საფეთქლები მოუჩანდა. მზედაკრულ სახესა და აქერცლილ კანზე ეტყობოდა, ცხოვრების უმეტესი ნაწილი ცის ქვეშ ჰქონდა გატარებული. ანანოს შინ შემოუპატიებია, — სტუმარი ღვთისაა, მაგრამ საბა აქ რომ არა ცხოვრობსო. ვიცო, — უპასუხია სტუმარს და მრავალმნიშვნელოვნად გაუღიმია, — სოფელში მითხრეს, იქნებ იქ იყო-სო. ანანოს ჭიშკარი გაუღია, სტუმარს ცხენი თუთის ხეზე მიუბამს და თვითონ ეზოში შემოსულა. ცოტას კიდევ დავუცდი, თუ დროზე არ გამოჩნდა, სათქმელს დავტოვებ და მერმე ჩემს გზას გამოვუდგებო.

ანანოს ვარაუდით სტუმარი თომა ბიკაშვილი უნდა ყოფილიყო, არც შემცდარა, ეზოში შემოსვლისას თვითონვე გასცნობია, — ესა და ესა ვარო. ანანოს სწრაფად გამოუტანია სკამი და აივანზე დაუსვა მს. თომა ბიკაშვილს, ერთი შეხედვით,

მოლაპარაკე კაცის შთაბეჭდილება არ დაუტოვებია, მაგრამ საკმაოდ სიტყვაუხვი გამომდგარა. სულ იმას ამბობდა, საბამ სახლ-კარი უპატრონოდ რომ დატოვა, ინგრევა და ოხრდებო, თუ დროზე არ მოხედა, ჰინკების სათარეშო გახდებო. რაღა გახდებო, ახლაც გრიალი გააქვთ, ჭარივით გადიან და გამოუდიანო.

ამასობაში ანანოს ხეში მოუშზადებია, მაგრამ თომა ბიკაშვილი სამხრად არ დარჩენილა. — გზაში დამილამდებო. ერთი ჰიქა ღვინით ანანო უღღეგრძელებია, ოჯახი დაულოცია და წასულა. ანანოს გული დასწყევტია. — ან მოსვლა რა იყო, ან წასვლა რა არისო.

თომა ბიკაშვილი სოფელს გაცილებული რომ ეგონა ანანოს, ცოტა ხნის შემდეგ ისევ გამოჩენილა. — იმ ბაღს ესეც უთხარი, ბარნაბიშვილი სოფელშია, სულ ერთი კვირაა, რაც დაბრუნდა-თქო, მერმე გულმაეიწყობისთვის ბოღიში მოუხდია.

ვითომ ბარნაბიშვილის დაბრუნება გზაში გაახსენდა თომა ბიკაშვილს თუ სოფელი კიდევ ერთხელ რომ შემოიარა და საბა ვერ ნახა, მხოლოდ შემდეგ გადაწყვიტა ანანოსთვის ეთქვა, რაც წელან არ გაუძხილა?

— ოზო, გინდა დამიჯერე, გინდა არა, როგორც კი დავინახე, ხომ ვიცანი თომა ბიკაშვილი, ეგრევე, თვალეში შევხედე და ვიგრძენი, რის სათქმელადაც იყო მოსული, თუნდაც არ მობრუნებულყო, მაინც მეცოდინებოდა, რისთვისაც დაეძებდა ასე გამწარებული საბას. ეგ კი არადა, თითქოს წლების მანძილზე ვილაცას ველოდებოდი კიდევ. სულ მეგონა, დღეს არა, ხვალ მოვიდოდა და იტყოდა: ბარნაბიშვილი დაბრუნდაო. მართლაც, მოვიდა და თქვა, რომ იცოდე, ოზო, როგორ გამიხარდა, სხვანაირმა სიხარულმა ამიძგერა გული, ამანთო, თვის ზვინივით ამბრიალა და თავგზა დამაქარგვინა. არ ვიცი, რა ეშმაკები შემიჭდა, რამ გამავიქა, რამ დამაქარგვინა გონება და აზრი, ჩემს თავს ველარა ვცნობდი, ვითომ სხვა რატომ ვიქნებოდი? ჩემს ნაცვლად ვითომ სხვა ფიქრობდა. მეგონა, სხვა ვილაც იამძახოდა, მაიძულებდა, ეგრე ჰქმენ, ეგრე იფიქრეო. ის სიხარულიც ჩემი არ იყო, ჩემსას არ ჰგავდა, იმიტომ რომ უნიადაგოდ მიხაროდა რაღაც, მიხაროდა, რაკი უნდა გამხარებოდა... მარტო მე ვიცოდი, რატომ დაბრუნდა ბარნაბიშვილი,

მოსახლენი უნდა მომხდარიყო ბედისწერამ ჩამოახეტა და და-  
აბრუნა-მეთქი, ვფიქრობდი გუნებაში, მჯეროდა კიდევ, მოსახ-  
ლენი რომ მოხდებოდა, ოღონდ არ ვიცოდი, ბედისწერა რო-  
გორ გადაუვლიდა... ახლა უკვე ის მაფიქრებდა, საბა როგორ  
წამყევანა ნისლაურაში, რადგან მანამდე ბევრჯერ მითქვამს —  
წადი, მიხედე იმ სახლს, შენი მამა-პაპის ბუდე ეგ არის და ნუ  
მოშლი-მეთქი. ყურცი არ გაუპარტყუნებია. რაც მოხდა, მოხ-  
დაო, — ამბობდა, — არც ის სახლი მინდა, არც ის ქონებო,  
ფრინველივით ლაღად, დღიური გარჯით უნდა ვიცხოვროო,  
სხვის ბოღმას ჩემი გული უნდა გავაჭიბროო. ერთი კი გავი-  
ფიქრე, საბა თომა ბიკაშვილს იქნება მაშინვე შეუთანხმდა, ბარ-  
ნაბიშვილი თუ გამოჩნდა, შემატყობინეო. აჟმცა შეთანხმე-  
ბულიც რომ ყოფილიყვნენ, მას შემდეგ ბევრმა წყალმა ჩაია-  
რა... საბა უკვე სხვანაირად ჰქრიდა და კერავდა, სხვა ჰქუაზე-  
დაც იყო დამდგარი. შვიდი-რვა წელი ცოტა ხომ არ არის?!  
შვიდი ან რვა წელი გავიდა მას შემდეგ, რაც ბარნაბიშვილი  
დაიჭირეს, რაც საბამ მიატოვა სოფელი, მამის სახლი. ეგრე  
ხიზანივით დადიოდა სოფელ-სოფელ, კარდაკარ, ხან ვის შე-  
ეკედლებოდა, ხან — ვის, დღიური გარჯით ცხოვრობდა და  
სჯეროდა კიდევ, კეთილ გზაზე ვადგავარო. ზოგს კედელს ამო-  
უყვანდა, ზოგს სახლს გადაუხურავდა, ზოგს მიწას დაუბარავ-  
და... სულ უსასყიდლოდ. ოღონდ გეთქვა, ოღონდ სიტყვა წა-  
მოგცდენოდა. უმაღლ შენს გვერდით დადგებოდა. ეს კი იყო,  
მოუკრეფავეში არ გადაგიშვებდა, თავის კაცობას არ შეგაბლალ-  
ვინებდა და არც შენს შებლალვას გაივლებდა გუნებაში. —  
ანანომ სული მოითქვა: დიდხანს იფიქრა და მერმე განაგრძო —  
საბა იმ დღეს არ გამოჩენილა, მხოლოდ მეორე დღეს მოვიდა  
და მოსვლისთანავე მივაგებე, თომა ბიკაშვილი გეძებდა-მეთქი.  
რას ამბობო, — წამოიძახა გახარებულმა, — აფსუს, შინ რომ  
არ დავხვდიო. დაგიბარა, სახლ-კარი გენგრევა და ერთი-ორი  
დღით მაინც ჩამოდიო, — ვუთხარი. ინგრევა და დაინგრესო, —  
მიპასუხა, — მე იქ მიმსვლელი არა ვარო. მაშინვე მივხვდი,  
თომა ბიკაშვილი თავისი ნება-სურვილით იყო მოსული. ჩემს  
ვალს მოვიხდი, საბას მაინც შევატყობინებ, ბარნაბიშვილი  
რომ დაბრუნდაო. იმ წუთიდან შევუჩნდი საბას, არ მოვასვენ-  
ე, — მამა-პაპის სახლი კაცმა რატომ უნდა გაწიროს-მეთქი.  
ვირზე რომ შევდა, იქიდან ჩამოსვლა აღარ ინდობა. მეც კარ-

გი ვინმე შეეხვდი, აღარ მოვეშვი, უული ამოვხადე. ბარნაბი-  
შვილი არ მიხსენებია. დაეუმალე.

საბა — გზიდან ნუ გადამახვევინებ, რახან ვთქვი, ვთქვი  
მორჩა და გათავდა!

ანანო — მე თუ მკითხავ, იქიდან ფეხი არც უნდა მთგუც-  
ვალა, იქ უნდა დამკვიდრებულიყავი... ის არის შენი მამული!

საბა — იქ რომ დავმკვიდრებულიყავი, შენი ჭირი როგორ-  
ღა შემეყრებოდა?

ანანო — სიტყვას ბანზე ნუ მივდებ.

საბა — ტყუილს ვამბობ? ეგრე არ არის? ქვეყანაზე აგო-  
რებულს შენ ვადამიდექი წინ, შენ შემაჩერე, თორემ ახლა  
წიფის გვირაბი კარგა ხნის წინათ მექნებოდა გავლილი.

ანანო — შენ თუ არ გინდა იქ მისვლა, მე წამიყვანე, მე  
მაჩვენე. ხომ უნდა ვიცოდე, სად დაბადებულხარ, სად გაზრ-  
დილხარ, სადაური მოსულხარ.

საბა — წავიყვან, ოლონდ ჯერ საბჭოში შევიაროთ.

ანანო — (ვითომ ვერ მიხვდა). საბჭოში რა ოხრობა გვინდა.

საბა — კარგად იცი, რაც მინდა!

ანანო — აკი შემოდგომაზეო.

საბა — შემოდგომას რალად ვუცადოთ.

ანანო — (სიცილით) სანამ შენს სახლს არ მაჩვენებ, სანამ  
არ გავიგებ, ვინა ხარ და სადაური ხარ, ცოლად არ წამოგყვებ-  
ი...

არ ვიცი, ანანომ კიდევ რა ქალურ ეშმაკობას მიმართა, რა  
ჯაღო-თილისმა იხმარა, ამის მეტი არაფერი უთქვამს. საბა,  
რა თქმა უნდა, დაუყაბულებია და ერთად გამგზავრებაც გა-  
დაუწყვეტიათ. მთელი კვირა საგანგებოდ ემზადებოდნენ თუ-  
რმე. მეზობლის ბავშვებისთვის სოფლის მაღაზიაში კამფეტე-  
ბიც კი უყიდიათ. ჩემს იქ არყოფნაში მეზობლად ბალები  
გაჩნდებოდნენო, — გაუცინია საბას. მერმე დაქირავებულ  
ცხენებზე ამხედრებულნი გზას გასდგომიან ნისლაურისაკენ.

თითქმის საღამომდე უვლიათ. ორჯერ შეუხსვენებიათ. ანა-  
ნო კი მაინც დაღლილა. არ ჰგონებია, თუ ასეთი შორი გზა  
იდო ნისლაურამდე. ბოლოს ალაზნის დიდ მანძილზე გაპყო-  
ლიან ნაპირ-ნაპირ და ანანოს რომ უფიქრია, ქვეყანას გაცუ-  
დით ან ქვეყნის კიდემდე მივედითო, საბას უთქვამს, — აჰანდე,  
ნისლაურაცო! ანანოს ალაზნის პირიდან კარგა მოშორებით,

მალა მწვანე ფერდობებზე შეფენილი, ხეებში ჩაფლული სოფელი დაუნახავს, სოფელი კი არა, წითელი კრამიტით დახურული რამდენიმე სახლი (ქვეყიდან მთელი სოფელი არ ჩანდა თურმე). ალაზნის პირი, თელები, ბორცვები და გორაკები, სოფლის თავზე ტყეფოთლოვანი... ეს ყველაფერი საბას მონაცოლიდან ისე ცოცხლად აღდგენია მეხსიერებაში, თითქოს ადრე, ერთხელ უკვე ჰქონდა ნანახი.

— ის კი აღარ მეგონა, თუ ქვეყანას ასე მოწყვეტილი იყო საბას სოფელი, — მეუბნებოდა ანანო, — ცხენდაცხენ ავეყვით ბილიკს, ავედიო, მერმე სოფელში საურმე გზამ შეგვიყვანა. მანამდე არა მიშავდა რა, მერმე უცებ უგუნებობა შემეყარა, ახლოვდებოდა ის დრო, როცა მთავარი სათქმელი უნდა გამემქლავნებინა საბასთვის, ბოლოს და ბოლოს, ხომ უნდა მეთქვა — აქ იმიტომ წამოგიყვანე, რომ ბარნაბიშვილი დაბრუნდა, უნდა შეგახვედრო-მეთქი. ვლელავდი. მაგრამ საბას არ შეუმჩნევია, გვერდით მომყვებოდა და გაკვირვებული რაღაცას მეუბნებოდა. ჯერ ვერ მივხვდი, რა აწუხებდა, მერმე ერთიდაიგივე რამდენჯერმე გაიმეორა: — ხალხი რა იქნა, სოფელი სად გაკრეფილა?! სოფელს მე ვერაფერი შევატყე, აქაიქ ვილაც-ვილაცები გამოჩნდნენ, ცნობისმოყვრულად გვაკვირდებოდნენ და წესისამებრ გვესალმებოდნენ კიდეც. გადაფერდებულ-გადაბრეცილ ღობის წინ ერთ დაბალსა და ძველ სახლთან რომ შევჩერდით, ეს არის ჩვენი სახლიო, — თქვა საბამ, ცხენიდან ჩამოხტა, მეც ჩამომახტუნა და ღიმილიანი შხერით მიაშტერდა თავის ძველ ბუდეს. მე კი ვიცოდი, ერთსართულიანი სახლი რომ ედგათ, მაგრამ ის სახლი უფრო დიდი და სხვანაირი წარმომედგინა. ქვით იყო ნაგები. აივანი აღარ ჰქონდა, სამიოდე ქვისსავე საფეხურს აივლიდი და პირდაპირ მძიმე მუხის კარს მიადგებოდი. ეზოში ვაშლის ბებერი ხეები ახლავდა ჰყვავდა. ყვავილებს იმდენი ფუტკარი დახვეოდა, გეგონებოდა, მუქით მიუყრიათო. შინ შესვლამდე შავკაბიანი სამი დედაკაცი გამოგვეცხადა, თავზეც შავი ხილაბანდები ჰქონდათ მოხვეული...

მეზობლის ქალებს, რომელთაგან ერთი საკმაოდ მოხუცებული ყოფილა, საბა ვერ უცვნიათ, საუბარი კი სიამოვნებით გაუბამთ. საბას ამ საუბრით ზოგი რამ შეუტყვია და გაურკვევია. შვიდი წლის მანძილზე სოფელი მართლაც გაკრეფილა. აქე-

დან წასული ხალხი სხვა სოფლებს შეხიზნებია. განსაკუთრებით ახალგაზრდებს აღარ უდგებოდათ გული, — ცხოვრება განზე გვრჩებაო. როდემდე უნდა გავძლოთ ქვეყანას მოწყვეტილებმაო.

— ერთი რამ არ მესიამოვნა, — ამბობდა ანანო, — საბამ თომა ბიკაშვილი რომ მოიკითხა, დედაკაცებმა იმაზეც ჩაიქნიეს ხელი, — პირველი ეგ წავიდაო. აიკრა თავის გუდანაბადი და ცოლ-შვილიანად მირზაანში დასახლდაო. ამას უკვე აღარ მოველოდი, კინაღამ მუხლები მომეკვეთა და უნებურად უნაგირის კეხს წავავლე ხელი. აქეთ რომ მოვეშურებოდი, სულ იმის იმედი მქონდა, თომა ბიკაშვილი სოფელში დაგვხვდებამეთქი.

შინ შესვლამდე საბა გამოცნაურებია მეზობლებს. ესა და ეს ვარო. დედაკაცებს ქოთქოთითა და ვიშვიშით თითქმის მთელი სოფელი შეუყრიათ. მერმე ეს ხალხი სახლს შესევია, სწრაფად მიულაგებიათ იქაურობა, დაუგვიათ, დაუწმენდიათ, დაუსუფთავებიათ. ზოგი ღვინოს მოარბენინებდა თურმე, ზოგი — პურს, ზოგი — ხორცს, საბასაც დაუპირქვავებია საგზლიანი ხურჯინი და დიდი პურ-მარილი გაშლილა. ამ სახლს სიმღერით ჭერი უნდა ავხადოთო. — ამბობდნენ ქეიფის გუნებაზე დამდგარი ნისლაურელები. ანანო ყველა შინ შემოსულ მამაკაცში ბარნაბიშვილს ხედავდა თურმე. მაგრამ ექვსა თუ ვარაუდს არ გაუშართლებია, ბარნაბიშვილი იმ სალამოს არ გამოჩენილა, წესით და რიგით, არც უნდა გამოჩენილიყო.

ანანოს ახლა ის უფიქრია, — ბარნაბიშვილი თუ აქ არის, ვინმე მაინც ახსენებსო. როგორ იქნება ამოდენა ხალხში ერთს მაინც არ მოაგონდესო, მაგრამ პირველ მამალს ისე უყვილია და ბოლო სტუმარიც ისე წაბარბაცებულა, რომ ბარნაბიშვილი არავის მოჰგონებია, თითქოს ქვეყანაზე არც უარსებია. მარტო რომ დარჩენილან, საბას უთქვამს, — ეგ თომა ბიკაშვილი რამ გააგიჟა, აკი სახლი ინგრევას? კრამიტი რა არის, ერთი კრამიტი არ დაუტრებულა, როგორიც დაეტოვე, ისეთივე დამიხვდაო! ბოლოს და ბოლოს უნდა ეთქვა ანანოს, რისთვის მოვიდა თომა ბიკაშვილი და რა დაუბარა. უთხრა კიდევ.

საბა — თუ ბარნაბიშვილი დაბრუნდა, სად არის, რატომ არ გამოჩნდა?

ანანო — არ ვიცი. ის კაცი ტყუილს არ იტყოდა, ასე თქვა,—  
ბარნაბიშვილი დაბრუნდაო.

საბა — კარგი, ეგრე იყოს... დაბრუნდა... მერმე მე რა  
გქნა?

ანანო — არ გინდა შეხვდე, დაელაპარაკო?

საბა — რატომ შეეხვდე?.. რატომ დაველაპარაკო?

ანანო — კაცი ხარ და იმიტომ! რა, არათფერი დაგრაჩა სათ-  
ქმელი?

საბა — კარგი, დავიძინოთ... ხვალეც ამ თვისაა...

ანანოს ის ღამე თეთრად გაუთენებია... თითქოს სატანა სუ-  
ლში ჩაჰბუღებია და გათენებას დაძაბული მოუთმენლობით  
ჩასაფრებია, ღრმად დარწმუნებული, რომ ბარნაბიშვილთან  
შეხვედრა უსათუო და გარდუვალაია.

ადრიანად ამდგარი საბა რიყრაყზევე შესდგომია საქმეს,  
ანანოს ფანჯრიდან დაუნახავს. ცხენებს ჰკაზმავდა თურმე. მე-  
რმე ცხენით წასულა და მალევე მობრუნებულს ანანოსთვის  
გარედან მიუწვდენია ხმა, — წასვლის დროაო. ეგრევე ზეზეუ-  
რად წაუხემსებიათ და კარი გამოუხურავთ. სოფელს ჯერ კი-  
დეც სძინებია. გამოუშვდილობებლად დაუტოვებიათ იქაურობა.

— მაისის ბოლო დღე იყო, კარგად მახსოვს. — ამბობდა  
ანანო.

მოსული გზით გაბრუნებულან უკან. საბა ჩქარობდა თუ-  
რმე და ანანოც იძულებული ყოფილა, სწრაფად ეტარებინა  
ცხენი. დიდი მიხვედრა არ უნდოდა, საბა იმიტომ ჩქარობდა,  
რომ ბარნაბიშვილს გარიდებოდა. ასე უფიქრია ანანოს, —  
ბარნაბიშვილთან შეხვედრას გაურბისო. ადრინდელი ვნებები  
თითქოს განელებია კიდევც, — საბას კაცობაზე ვფიქრობდი,  
მამის ჯავრი რატომ უნდა ექამაო. მაგას თუ სანალგლო არა  
აქვს რა, აქ რალა მომარბენინებდაო. მაგრამ ეს გულგრილობა  
მოჩვენებითი ყოფილა, ანანო თავის თავსაც აღარ უმხელდა,  
რომ სულში ისევ ეშმა-ქაჭები ესხდნენ, ჯერ ხომ იქიდან ერ-  
თიც არ გაუძეებია.

დაღმართი ფეხით ჩაუთავებიათ და ალაზნთან ისევ შემს-  
ხდარან ცხენებზე. ანანოს ახლალა შეუშინევია, მდინარე ადი-  
ლებული და ამღვრეული რომ მოედინებოდა. აქედან თითქოს  
მარცხნივ უნდა გაეხეიათ. საბას მარჯვნივ აულია გეზი, თე-  
ლები სწრაფად გაუვლია, მერმე აღმა აპყოლია ბილიკს და

პატარა, ყვავილებით მოფენილ ბორცვზე შეუყენებია ცხენი, ანანოს ბორცვიდან ასიოდე ნაბიჯზე, ქვევით, მდინარის მახლობლად მათკენ ზურგშექცევით მდგარი კაცი დაუნახავს, ბარით ორმოს თხრიდა თურმე.

— აგე, ბარნაბიშვილი! — უთქვამს საბას და ხელი გაუშვევრია.

ანანო უცებ აღელვებულა. მაგრამ ძველი ცეცხლით ანთებულს გარეგნულად სიმშვიდე შეუნარჩუნებია და წყნარად უთქვამს:

— მივიდეთ, ვნახოთ.

ცხენები ბორცვზე დაუტოვებიათ და ფეხით ჩასულან. მუყაითად და გულისყურით თხრიდა ორმოს ბარნაბიშვილი და მათი მისვლა არც გაუგია.

— აკი გითხარი, ბარნაბიშვილია-მეთქი! — გაუცინია საბას.

ბარნაბიშვილი შემკრთალა, სხარტად შემობრუნებულს ბარი მოუმარჯვებია...

დაბალი, თითქმის ოთხკუთხედი. პირმრგვალი და მელოტი. უღვაშივით აპრეხილი ხშირი წარბები. წვრილი, ერთმანეთთან ახლოს ჩამსხდარი, მოძრავი თვალები. სწორი და თხელი, დიდნესტოებიანი ცხვირი, უტუჩო, პატარა ფოსოსავით პირი. ხაკისფერი, ძველი და გაცვეთილი ხალათი. თეთრ, გაჭუჭყიანებულ სოფლურ წინდებში ჩატანებული ხაკისფერივე გალიფე. ფეხები წვეტიან კალოშებში წაყოფილი...

ასეთი დამახსოვრებია ანანოს ბარნაბიშვილი.

— ვინა ხართ, რა გინდათ? — შემკრთალსავე უკითხავს გაბზარული ბოხი ხმით, ბარი ისევ მომარჯვებულად სჭერია. თავის დაცვას თუ აპირებდა.

— აქაურები ვართ, ნისლაურელები. — დაუმშვიდებია საბას.

— აქაურებს რომ არა ჰგავხართ? — მაინც დაეჭვებულა ბარნაბიშვილი.

— შენც არა ჰგავხარ აქაურს, მაგრამ აქა ხარ... დაწყნარდი, ბარნაბიშვილო, ეგ ბარი ცოტა ხნით მანდვე მიაყუდე. — საბა იქვე ჩამომჯდარა და სახეში მისჩერებია ბარნაბიშვილს, ანანოსთვისაც უთქვამს, — შენც დაჯექიო, მაგრამ ანანო არ დამჯდარა.



— აჰა, ეს ბარიც მივაყუდე. — ბარნაბიშვილი ორმოს გვერდით ხელებჩამოშვებული გაჰიმულა.

— ხეების ჩარგვას თუ აპირებ, მოგეხმარები.

— ეგ მე ვიცი, რასაც ვაპირებ. — ისევ ბარისთვის წაუტანებია ხელი.

— რას მეჩხუბები, კაცო, სამტროდ კი არ მოვსულვარ.

— არც სამოყვროდ უნდა იყო მოსული. — ბარნაბიშვილს რატომღაც ხითხითი ასტეხია და ჩაბჭირებულა.

— არაყს ხომ არ გადაჰკრავდი, დილის მადლისას?

— მეე?.. არც არასდროს გადამიკრავს, არც არასდროს გადამიკრავს!.. — წაულიღინებია.

— მაშ, რაც ჩაგიდენია, სულ ფხიზელს ჩაგიდენია!

— სულ! — დაუდასტურებია კმაყოფილს.

— ამ გამთენიისას ბარით ხელში რომ დაგინახე, გამიყვირდა.

— რა გაგიკვირდა, სულ გარჯაში არა ვარ?

— გარჯაში კი ხარ, მაგრამა... ბარს ძველად ვინ გაკადრებდა?

— ჰოო... ბარს ძველად ვინ გაკადრებდა, ბარს ძველად ვინ გაკადრებდა...

— შენისთანა თავმჯდომარე მეორე არც იყო ქვეყანაზე.

— შენ მართლა აქაური ჩანხარ... აქაური ხარ?

— ვიყავი, მერე ავიბარგე და მოვშორდი აქაურობას... მაგრამ შენი კაიკაცობა არ დამვიწყებია.

— ეგეც ხეირია.. ქვეყანა უმადური ყოფილა. — აქ ხმა დაუდაბლებია, ჩურჩულით უთქვამს, თითქოს საიდუმლოს ანდობს ან უმჯღავენებსო, — რაც მე ამათ საქმე ვუკეთე, ვემსახურე... დღე და ღამე, დღე და ღამე სულ ამათ საქმეში ვიდექი ყელამდე... მერე აიღეს და ყველაფერი წყალში ჩამიყარეს.

— კაცო, შენც ემდური ამ ქვეყანას?

— ამ გაოხრებულ სოფელში კოლექტივი ჩამოვუყალიბე, მეტი რა უნდოდათ? ამ დასაქცევში ჩემს გარდა სხვა ვინ წამოვიდოდა? მაგათ კი ყველაფერი წყალს გაატანეს.

— იმ ცხენებივითა, არა?

— შენ საიდან იცი? — ბარნაბიშვილს ეს შეკითხვა ჯერ

თითქოს წამოსცდენია, მერმე კი ყალყზე შემდგარს უკითხავს,—  
ეგ შენ საიდან იცი?!

— კიცი.

საბას ზუსტად აღუწერია, როგორ გამორეკეს ტყის პირი-  
დან ასი ბედაური და მერმე აქ, სწორედ ამ ადგილას როგორ  
შერეკეს ალაზანში ყივინითა და კეტების ქნევით.

ბარნაბიშვილი უცებ მოწვებულა, მოღუნებულა, თითქოს  
~~დაპატარავებულა, პორჩილად დამკდარა და თავისივე ამოთხრილ~~  
ორმოში ვეხები ჩაუყრია, ათროლოებულა თუ აკანკალებული  
ხელები ბარძაყებშორის ძლივს ჩაუტენია.

— აკი ვალიარე, შეცდომა მომივიდა-მეთქი, — დამნაშავე-  
სავით ჩაუკიდა თავი, — ოქროზე არ უნდა გამეყიდა...

— ოქროზე?

— ვილაც ოხრები შემომიჩნდნენ და შემაცდინეს... ერთი  
შეცდომა ვის არ მოსვლია... მაპატიეთ.

— რამდენი გაჰყიდე?

— თითო ცხენში ოცდახუთი მანეთი მომცეს... ოქროთი...  
მე რა ვიცოდი, თუ კონტრაბანდისტები იყვნენ, თუ ცხენებს  
ირანში გაიყვანდნენ?.. საიდან უნდა მცოდნოდა, ჰა? ადა-  
მიანურად შელაპარაკებოდნენ, ხალხი მეგონა, ისინი კი კონტ-  
რაბანდისტები ყოფილან.

— ალაზანს რამდენი ცხენი გადაურჩა?

— არ ვიცი... მახსოვს, სამასი ოქროს ხუთმანეთიანი დამი-  
თვალეს, სულ კრიალი გაჰქონდა.

— ეგ კარგად დაგიმახსოვრებია.

— სამოცი ცხენი გადარჩენილა. — სწრაფად დაუთვლია  
ანანოს.

— ჰო, ეგრე იქნებოდა... — დასთანხმებია ბარნაბიშვილი.—  
სამასი ოქროს ხუთმანეთიანი... ოლონდ არ მაგონდება, სად  
ჩავუვალი... მაგასაც გეტყვით, გავიხსენებ და გეტყვით...

— ერთი ისიცა თქვი, — ახლა უკვე ანანო შეჰკითხვია,—  
იოთამის ცხვარიც ოქროზე გაჰყიდე?

— იოთამის ცხვარი? — მორცხვად გაულიშია და თვალები  
დაუხრია ბარნაბიშვილს, — არა, ჩვენი ფული ავიღე. არა, არა,  
ცხვარში ოქროს ვინ მოგცემდა? ოქრო სხვა რამეა! ოქრო...  
ოქრო... რომ არ მაგონდება, სად ჩავფალი...

— ხომ მიხვდი, რატომა თხრის ორმოებს? — საბა წამომ-  
დგარა და ანანოსთან მისულა.

— ოქროს ეძებს. — უთქვამს ანანოს.

ბარნაბიშვილს უცებ თვალები ამღვრევია და ყბა მოქცევია. ორმოდან მოულოდნელად, თან უცნაურად ამომხტარს ნერვიულად დაუწყია წინ და უკან, გარდიგარდმო სიარული, გარკვეულ მიჯნამდე მივიდოდა და უკან გამობრუნდებოდა თურმე, ასე დიდხანს უვლია, ოღონდ განსაზღვრულ მიჯნისთვის არ გადაუბიჯებია, თითქოს კედელს აწყდებოდა.

— ხედავ, რა დღეშია ჩავარდნილი? — საბა ბარნაბიშვილისკენ ზურგით მიბრუნებულა. — წავიდეთ.

— მოიცადე! — ანანო, პირიქით, თვალს არ აშორებდა თურმე ბარნაბიშვილს, — ეს გარეწარი მოერია მთელ სოფელს?!

— ახლა იოლია ეგრე თქმა... წამო, წავიდეთ! ხომ ხედავ, კაცი აღარ არის.

— მოიცადე-მეთქი! — ანანოს რამდენიმე ნაბიჯი წინ გადაუდგამს, — ბარნაბიშვილო!

ბარნაბიშვილი ოდნავ გვერდზე შებრუნებულა, მერმე პირქვე დამხობილი გახიზნებულა, თითქოს გასაძვრომი იპოვა და გაძვრაო. ასე მუცელზე ხოხვით მისულა და ბარისათვის ხელი ჩაუვლია. გამახსენდა, გამახსენდაო, — წამოუყვირია და უცებ წამომხტარი ბარიანად გაქცეულა, ანანო შორიასლო გაპყლია. ბარნაბიშვილს ერთი-ორჯერ თვალის ცეცებით მოუხედავს, ალბათ, უკან ხომ არ მომდევნ ან ხომ არ მითვალთვალებენო და ჩქარი ნაბიჯით გზა გაუგრძელებია...

— ისე მიდიოდა, თითქოს მიიპარებოდა, თითქოს ვილაკას ემალებოდა, — მიამბობდა ანანო, — მე უკან მივდევდი, ფეხდაფეხ მივყვებოდი. თანაც ზურგზე საბას თვალს ვგრძნობდი. ერთხელ დამიძახა კიდევ, ჩემი შეჩერება უნდოდა, მაგრამ ვერ შემაჩერა. ტოტებშორის დავინახე, ბარნაბიშვილი ერთ დიდ თელასთან იდგა, გულმოდგინედ ათვალიერებდა, ხეს ორჯერ შემოუარა, მერმე ისევ შეჩერდა და მიაშტერდა. მერმე სულ ახლოს მივიდა, ხეს ზურგით მიეყრდნო და ჩემსკენ გადმოთვალა შვიდი ნაბიჯი. ჰო, კარგად მახსოვს, შვიდი ნაბიჯი... მეშვიდე ნაბიჯი რომ გადმოდგა, თითქოს მიწა გაუსკდა და თან ჩაიტანა... მივხვდი, მეშვიდე ფეხი ორმოში ჩავარდნოდა და იმიტომ წაქცეულიყო... ჩემი ვარაუდით, ეს ის ორმო იყო, რომელსაც ეძებდა; მაგრამ ორმო უკვე ამოთხრილი დახედა. ეგრე

წაქცეული გაირინდა, მერმე მუცელზე დაწოლილი ორმოსკენ შეტრიალდა და შიგ წაპყო თავიცა და ხელებიცა. ორმო ძველი ამოთხრილი ჩანდა, შიგ ბალახი ამოზრდილიყო და მანამდე ვერ შეამჩნევდი, სანამ ფეხი არ ჩაგიცდებოდა. ბარნაბიშვილი აღარ მოძრაობდა, იმ ორმოში ხომ არ ჩაკვდა-მეფუქი, გავიფიქრე. მერმე გამეტებით დავუძახე:

— ბარნაბიშვილო..

ბარნაბიშვილს შემკრთალი თავი ორმოდან ამოუყვია, მაგრამ არ წამომდგარა.

საბას ერთხელ კიდევ უთქვამს ანანოსთვის, აქედან წავიდეთო.

— ბარნაბიშვილო, გახსოვს იოთამი?! — არ ეშვებოდა თურმე ანანო.

— იოთამი?!

— გახსოვს თუ არა?!

ბარნაბიშვილს ხმა არ გაუცია.

— ეს კაცი საბაა — იოთამის შვილი!

— იოთამი მე არ მომიკლავს.

— ეს კაცი იოთამის შვილია! — კიდევ ერთხელ უთქვამს ანანოს და საბასკენ გაუშვერია ხელი.

ბარნაბიშვილს წამოდგომა არც უცდია, მხოლოდ თავი წამოუწევია. იქაურობა მიმოუთვალიერებია და ხოხვა-ხოხვით დაძრულა ალაზნისაკენ, უკან აღარ მოუხედავს, ოღონდ დროდადრო სკუპსკუპით იმოკლებდა გზას მდინარემდე. ალაზნის ნაპირთან მისული სულ ერთ წამში, თვალის ერთ დახამხამებაში გადამხტარა, გადაშვებულა... თითქოს ბაყაყი იყო და ბავშვმა ჯოხი მოუქნია, იმანაც, თავს ვუშველოო, წყალში ისკუპა... თითქოს თავის სტიქიას შეერია, თითქოს ის იყო ერთადერთი ხსნა, ერთადერთი თავშესაფარი.

გაოგნებული ანანო მდინარის ზედაპირს დასცქეროდა თურმე, ან ახლა ამოპყოფს ბარნაბიშვილი თავს, ან ახლაო.

ამაოდ!

უცებ საბას ხმა გაუგონია:

— ეგ გინდოდა?!

როგორ იფიქრებდა ანანო, რომ უკანასკნელად ესმოდა საბას ხმა. შინ დაუბრებულეზებით დაბრუნებულან, მთელი გზა სიტყვის უთქმელად გამოუვლიათ.

— სახლამდე მომაცილა, — მეუბნებოდა ანანო, — არც დამემშვიდობა, არც შემომხედა, ცხენები წაიყვანა და წავიდა. უხმოდ წავიდა, უსიტყვოდ... შემდეგ აღარ მინახავს, აღარ მოხუფდა... სულ მალე, როგორც იცი, ომი დაიწყო.

ანანოს გაშტერებული, ბივრიტისფერი თვალები ცრემლით ჰქონდა სავსე, მაგრამ საკვირველი ის იყო, რომ ერთი კურცხალიც არ გადმოვარდნია, თვალებში ასევე ამოუშრა ცრემლი, თითქოს ბოლმამ და ნალველმა უკანვე შეისრუტა და შეიწოვა.

მე დიდ ოთახში გამოვედი, ერთხანს უაზროდ ვიწრიალე, მერმე ფანჯარას მივადექი, უკანა ეზოში გადავიხედე: საბძლის წინ ქათმები იქექებოდნენ, მხოლოდ ახლდა გამახსენდა ჩვენი წითელი მამალი, საბძელზე შეფრენილმა ფერი რომ იცვალა და გაფრინდა.

## 8

თბილისში ივლისის თხუთმეტს ჩამოვედით და რამდენიმე დღე ვალაგებდით ანგრეულსა და მტვრიან ბინას. საქმეს თავი ვერ დავადგით და ჩვენი უმწეობითა და უგერგილობით შეწუხებულმა მეზობლებმა დახმარება შემოგვთავაზეს. მამას უარი არ უთქვამს.

ცხელოდა, ქალაქს ბული ასდიოდა. ოთხი წლის მანძილზე სოფლის ჰაერით ვალაგებულსა და განებივრებულს სუნთქვა მიჭირდა. სიცხისაგან გასავათებული მტკვარზე ჩავიბენდი, გავგრილდებოდი და სველი, წყალი წურწურით რომ დამდიოდა, ისევ ჩვენს აივანზე ამოვიბენდი. დაუსრულებლად ჩამქონდა და ჩამქონდა ეზოში ნაგავი. როდის დაგროვდა ამდენი? ჩვენს აქ არ ყოფნისას ვერ დაგროვდებოდა და ნუთუ მანამდე ამ ნაგავში ვცხოვრობდით? რამდენი გამოუსადეგარი ძველმანი იყო შეჩურთული განჩინებსა და კარადებში, ტახტსა და ზანდუკში, საწოლების ქვეშ, ბნელ კუნჭულებში! საკვირველია, რატომ ვერ ელევა ამ ნაგავს ადამიანი? შინიდან რაც გავქონდა, ნახევარი არ იყო იმ ძველმანებისა, რასაც ვიტოვებდით. ეს შეიძლება გამოგადგეთო, — საქმის კარგ მცოდნესავით იტყოდა ვინმე მეზობელთაგანი და რაღაც ძველ ჭლანს, — თავგების დაღრღნილ ფეხსაცმელს ან ჩვრადქცეულ შარვალს დაბერტყავდა და გვერდზე გადასდებდა. მამაჩემი რატომღაც

ყველას უსიტყვოდ ეთანხმებოდა და ემორჩილებოდა, მე გუნებაში წინააღმდეგობას ვუწევდი მეზობლებს, ერთგვარი პროტესტის გრძნობა შეუფლებოდა, ზოგჯერ მეცინებოდა, — კიდევ ერთი მსოფლიო ომი ხომ არ არის საჭირო, რომ ამ ძველმანების გამოუსადეგრობაში დაერწმუნდეთ-მეთქი.

მამაჩემისთვის, მგონი, უკვე სულერთი იყო, რას დატოვებდნენ და რას გადაყრიდნენ, ყველაფერზე თავს იქნევდა განურჩევლად, რალაცნაირად შეფიქრიაუნებული მეჩვენებოდა. თავის თავს არ ჰგავდა, ხმას აღარ იღებდა და მთელ ამ საქმიანობას, რასაც სახლის დალაგება და დასუფთავება ერქვა, აღარ ხელმძღვანელობდა. რამდენი კაცი გვეხმარებოდა, სათვალავი ამერია, ვინ შედიოდა, ვინ გადიოდა, ვის რა გაჰქონდა, ვის რა შეჰქონდა, ველარ ვარჩევდი. მამაჩემი ოთახიდან ოთახში უაზროდ გადი-გამოდოდა და პაპიროსს აბოლებდა.

მერმე უცებ უანგარო დახმარებისათვის ყველა მეზობელს მადლობა გამოუცხადა, — მაღარიჩი ჩემზე იყოსო, ამ პატივისცემას, სანამ ცოცხალი ვარ, არ დაგივიწყებთო და კიდევ რალაც-რალაცები უთხრა, სიტყვა არ დაუშურებია. მე მგონი, დროულად თქვა მადლობა, რადგან მეზობლების (ძირითადად ქალების) მოჩვენებითი საქმიანობა უკვე ცნობისმოყვარეობაში გადაზრდილიყო. უდიდესი ინტერესით ათვალეირებდნენ შინ რა მოგვეძევებოდა. ნივთებს ყოველი მხრივ ამოწმებდნენ, აფასებდნენ კიდევც, — საბურთალოს ბაზარზე ამდენად და ამდენად გაიყიდებაო. ერთმა მეზობლის ქალმა კარადიდან დედაჩემის კაბაც კი გადმოიღო, ზურგზე მოაზომა მეორეს, რომელიც ამ დროს ფაიფურის მოგრძო ქურჭლით, როგორც ჭოგრიტით, ღია ფანჯრიდან ცაჲს უქვრეტდა.

— იცი, რამდენი საქმეა გასაკეთებელი, — მითხრა მამაჩემმა, როცა ნარტონი დავრჩით, — მაგრამ არა უშავს, ყველაფერს მოვევლება.

სარბენი და საზრუნავი, მართლაც, არ გამოლევია. სამხედრო კომისარიატში უკვე გამოცხადდა, რალაც საბუთი წარადგინა, რითაც ომში მონაწილეობა და დემობილიზაცია დაუდასტურა. იქიდან გახალისებული დაბრუნდა, დიდი პატივით მიუღია თვით კომისარს, მთელი საათი მელაპარაკაო, — მითხრა, — ყველაფერი დაწვრილებით გამომკითხაო, საღ იბრძო-

დი, რომელ ფრონტზეო. რვა მაისმა საღ მოგისწროო... მერმე  
ორი დღე პურიისა და სასურსათო ბარათებისათვის ირბინა, არც  
იმ ბარათების აღება უნდა გასჭირვებოდა, რადგან ჯერ კიდევ  
სამხედრო ფორმა ეცვა და ყველგან თავისუფლად შედიოდა.  
მთავარი მაინც ბარათების მოპოვება იყო. ამის შემდეგ უკვე  
შეგვეძლო თბილისში ცხოვრება, არსებობის საშუალება ხელ-  
თა გვექონდა.

— აუჰ, ეს რა შემოსევა ვნახე, ეს რა იყო, კაცო!.. ასე  
ჩვენ არ შევსვევივართ ბერლინსა — ხელები უმწეოდ გაშალა  
მამაჩემმა, — ამას რა დაალაგებს... თუმცა უმადური არ უნდა  
იყო, ბევრი ნაგავი გაგვატანინეს... ვერ დავემდურებით, კარგი  
ხალხია...

ორივენი უმწეოდ დავდიოდით ანგრეულ, აყრილ-დაყრილ  
ბინაში და არ ვიცოდით, ლაგება საიდან დაგვეწყყო, მაგრამ  
ნელნელა, თანდათან ყველა ნივთს თავისი ადგილი მივეუჩინეთ  
და ჩვენმა ორმა ოთახმა და შუშაბანდმა თავისი ძველი, დედა-  
ჩემისდროინდელი იერი დაიბრუნა. მამა დროდადრო თითო-  
ოროლა სიტყვას იმეტებდა ჩემთვის, შემპირდა, — კვირას სა-  
ბურთალოს ბაზარში წაგიყვან და წესიერ ტანსაცმელს გიყი-  
დიო. აბა, ინსტიტუტში ამ დამოკლებული შარვლით და ძირ-  
გავარდნილი ფეხსაცმელებით ხომ ვერ ივლიო. ამას ბუნებრი-  
ვად მოჰყვა საუბარი სწავლის გაგრძელებაზე, — საღ აპირებ  
შესვლას და რა გინდა გამოხვიდეთ. ჩემგან გარკვეული პასუ-  
ხი რომ ვერ მიიღო, თვითონვე შემომთავაზა, — ინდუსტრიულ  
(ახლანდელ პოლიტექნიკურ) ინსტიტუტში შედიო, რამე კარგ  
სპეციალობას დაეუფლე, ხომ იცი, ტექნიკის საუკუნეა და  
ჩვენც საუკუნეს ფეხდაფეხ უნდა მივყვეთო. პირადად მე ომ-  
ში ძალზე გამომადგა ტექნიკური განათლებათ.

ხმა არ ამომიღია, გაჩუმებული ვუგდებდი ყურს, რადგან  
წარმოდგენა არ მქონდა, რა მეპასუხა, რა მეტქვა. გულწრფე-  
ლად რომ ვაღიარო, ტექნიკური განათლების დაუფლებისაქენ  
გული მაინცდამაინც არ მიმიწევდა. თუმცა სკოლაში მათემა-  
ტიკურ საგნებს ადვილად ვითვისებდი და ჩემი პედაგოგებიც  
დარწმუნებული იყვნენ, რომ სწორედ ამ განხრით გავაგრძე-  
ლებდი უმაღლესში სწავლას. მამაჩემის რჩევა-დარიგებას გუ-  
ლისყურით მოვუსმინე და მისი ნათქვამი ერთგვარად ჭკუაში  
დამიჯდა.

იმ საღამოსაც ანანოს სანოვაგით კივახშმით, ნახევარი ტომარა სიმინდის ფქვილი, ლობიო და კვერცხები გამოგვატანა. მოხარშულ დედალს მატარებელშივე შოველდეთ ბოლო, ძალიან ცხელა, გაგვიფუჭდებაო, — თქვა მამამ და წუთით არ დაგვიყოვნებია, მრგვლად მოხარშული დედალი უმაღვე გადავაჭრიქნეთ გაფუჭებას.

მამაჩემის დაბრუნებამდე ძალიან ბევრს ვფიქრობდი და ფიქრში საკმაოდ ნორმალურ ურთიერთობასაც ვამყარებდი მამასთან. ამას სულ ადვილად ვახერხებდი, რადგან მეხსიერებაში ჩაბეჭდილ სახეს ჩემი ფანტაზიის წყალობით, როგორც მსურდა ყოფილიყო, სწორედ ისეთად წარმოვიდგენდი ხოლმე.

სოფელში ათ ივლისს ჩამოვიდა, ოფიცრის ფორმა ეცვა, უკვე დემობილიზებული იყო, მაგრამ კაპიტნის სამხრეებს მაინც ატარებდა. დაბრუნდა სიცოცხლით სავსე, მხნე, ჯანიანი, ლაპარაკსა და მხიარულებას მონატრებული და დახარბებული. მამა პირველი მერცხალი არ ყოფილა, მანამდე სამნი ჩამოვიდნენ, სხვადასხვა ფრონტიდან წამოსულები თელავის სადგურში შემთხვევით შეხვედრიან ერთმანეთს და სოფელსაც ამიტომ ერთ დღეს გამოეცხადნენ. სოფელიც, რა თქმა უნდა, ზერ-ზეიმით შეეგება გამარჯვებით დაბრუნებულებს. დაბრუნებულთაგან ერთს კონტუზია ჰქონდა მიღებული, მეორეს — მარცხენა ხელი მაჯაში წაწყვეტილი, მესამე კი, როგორც სოფელში ამბობდნენ, საღსალამათი იყო. ისინი ორჯერ ვნახე და ორჯერვე ჩაფიქრებულები და გულჩათხრობილები მომიჩვენენ, ცოტას ლაპარაკობდნენ და შეკითხვებზე ძუნწად იძლეოდნენ პასუხს.

მამა ჭახჭახის მაგვარი სიცილით შემოვიდა ეზოში, ჩემოდანი გვერდზე მოისროლა, ანანოს ორივე ხელი წელზე შემოხვია, აიტაცა და ციბრუტივით დატრიალდა. მერმე მე შემომხედა და ერთხანს დაჟინებით მიცქერდა, მიცნო და ახლა მე დამეძგერა, ანანოზე უარესი დღე დამაყენა: ამიტაცა, დამაბზრიალა, დამგრიხა, დამკმუჭნა, მერმე ისევ გამასწორა და გამაუთოვა. თან სულ იმას ამბობდა, — რამოდენა ხარ, ბიჭო, გზაზე რომ შემხვედროდი, ვერ გიცნობდიო.

დალაპარაკება ვერ მოვასწარიტ, ერთმანეთს სიტყვა ვერ ვუთხარით, ეზო ხალხით გაიჭედა, მოდიოდნენ და მოდიოდნენ, თან მოსაკითხი მოჰქონდათ, — ვის ქათამი, ვის — ყვე-



ლი, ვის — დედას პური თუ დეინო... ანანომ ყველას განუცხადა, — სანდროს ჩამოსვლისათვის ცხვარი უნდა დაგვკლაო. ეს ცხვარი განათხულზევე იყიდა თუში მწყემსებისგან. დღეს — ნუო! — უთხრეს მეზობლებმა, — დღეს რაცა გვაქვს, იმით გავჩდეთ იოლადო, ცხვარი ხვალ იყოსო... იოლად კი არა, ეზოში ისეთი სუფრა გაიშალა, ავ თვალს არ დაენახებოდა.

სულ ვცდილობდი მამაჩემის ახლომახლო მეტრიალა, მაგრამ ვინ მიგიშვა, ვინ მიგაკარა?! შეესივნენ დედაკაცები და ამოსუნთქვის საშუალება აღარ მისცეს, ვინ ქმარს კითხულობდა, ვინ — შვილს, ვინ — ძმას... მამა კარგ გუნებაზე დამდგარი ჩანდა და ყველას იმედიან სიტყვას უბრუნებდა, — ეგენიც ჩამოვლენო, დღეს თუ არა, ხვალ უსათუოდ აქ იქნებიანო. იმათაც სხვა რა უნდოდათ, ბედნიერები ლოცავდნენ და აღიღებდნენ მამაჩემს.

მერმე ამ ლოცვა-დიდებას სუფრაზე გადაინაცვლა.

სუფრას ათიოდე ხანდაზმული მამაკაცი უჯდა, დანარჩენი ქალები იყვნენ, ოცდახუთზე მეტი დავთვალე, რა თქმა უნდა, ყველას დედაბრები ჭარბობდნენ. მამაჩემს ქალთა სიმრავლე თვალთახედვიდან არ გამოპარვია, ხმამალა განუცხადა სტუმრებს, — სოფელი ქალებს აგილიათ და ეგ არისო, ბოლოს კოლმეურნეობის თავმჯდომარე ფილო კვალიაშვილი მოვიდა და თამადობაც იმას ებოძა. ეს კაცი რალაცნაირად მესიმპათიურებოდა, სულ გარჯილს ვხედავდი. ერთთავად საქმით გართულს, ომში წასულთა ოჯახების ქომავობასაც და შეძლებისდაგვარად ზრუნვასაც ახერხებდა. ერთხელ მეც გამომიგზავნა ახალი ფეხსაცმელები, რომლებსაც ძალზე პრაქტიკული და ჩემთვის ფრიად მნიშვნელოვანი თვისება აღმოაჩნდა: ფეხის გავრდასთან ერთად რალაც მანქანებით თვითონაც იწვლებოდნენ და იზრდებოდნენ ისე, რომ სკოლაც კი დამამთავრებინეს.

ფილო კვალიაშვილი დინჯად, მამაპაპურად გაუძღვა სუფრას, კარგი ოქროპირიც აღმოჩნდა.

მე ჩემი საფიქრალი მქონდა, მამას ერთი წუთითაც არ ვაშორებდი თვალს, მის ყოველ მოძრაობას, სახის გამომეტყველებას, წარმოთქმულ სიტყვას ვაკვირდებოდი, ვწონიდი, გუნებაში ვადარებდი იმ კაცს, რომელსაც აღრე, ბავშვობისას ვიცნობდი და ოთხი წლის წინათ ფრონტზე გავაცილე. ჭარბად აღტაცებული და აღტკინებული მომეჩვენა, თუმცა რატომ არ

უნდა ყოფილიყო აღტაცებული, რა უშლიდა ხელს? კიდევ კარგი, ეგრეა, თორემ სხვებივით გულჩათხრობილი და დაძიმებული რომ დაბრუნებულყო, ის უკვე სხვა კაცი იქნებოდა-მეთქი.

სუფრა სადამო ხანს აიშალა. ხალხო, სირცხვილია, ეს ნაომარი კაცი ცოტა მაინც მოვასვენოთ, ზვალაც ამ თვისააო! — სტუმრები ნელ-ნელა გაიკრიფნენ ეზოდან, ლაპარაკ-ლაპარაკით, ლილინ-ლილინით, სიმღერ-სიმღერით. მაგიდას მეზობლის ქალები დაუტრიალდნენ. ხელად აალაგეს, დაასუფთავეს იქაურობა, ხორავი ცალკე გადააწყვეს, ჯამ-ჭურჭელი დარეცხეს და დააკრიალეს.

მამაჩემს ღვინო მოჰკიდებოდა, უკეთეს გუნებაზე დამდგარიყო და ქალებს ეხმარებოდა. ჯამ-ჭურჭლის რეცხვა რა მამაკაცის საქმეაო, — ესუმრებოდნენ აქეთ-იქიდან, ის კი თავისას არ იშლიდა, ჯარში შემაჩვიესო, — იცინოდა.

განსაკუთრებულ ყურადღებას მაინც თავისი ძველი მეგობრის, მარო მასწავლებლისადმი იჩენდა. სულ კუდში დასდევდა და რაღაცას ეჩურჩულებოდა, აცინებდა და თვითონაც მხიარულად ჭახჭახებდა.

მამაჩემისა და ზიზის დედის ეს ჩურჩული, კისკისი და ჭახჭახი რაღაცნაირად არ მომწონდა და დადარაჯებული ვადევნებდი თვალყურს. შეიძლება იმან უფრო გამაღიზიანა, რომ პირველი შეხვედრისა და სიხარულის შემდეგ მამამ ყურადღება აღარ მომაქცია, თითქოს დამკარგა და დაკარგვისთანავე მიმატოვა და დამივიწყა. მაგრამ მალე ყველაფერი ჩაწყნარდა. მოხდა ის, რაც უნდა მომხდარიყო, ბოლოს და ბოლოს მართონი დავრჩით ანანო, მამა და მე.

მე და ანანო პირველ სართულზე, ლამპის შუქით მკრთალად განათებულ დიდ ოთახში მაგიდას ვუსხედით, მამა ჯიბეებში ხელებჩაწყობილი ბოლთას სცემდა, ფეხი თუ შეეშლებოდა, მაშინვე აღიდგენდა წონასწორობას. ორივეს, ანანოსაც და მეც, წინ გვეწყობ საჩუქრები. იმას — კრელი, ყვავილებით მოჩითული თავშალი, მე — პატარა, არაჩვეულებრივად ლამაზი ნიკელის პარმონიკა, რომელსაც სულს ჩაჰბერავდი და მშვენიერ ხმებს გამოსცემდა, ოღონდ უსათუოდ დაკვრა უნდა გცოდნოდა. ასე მდუმარედ ვისხედით და გაურკვეველი, უცნობის მომლოდინე ღუმილით შევცქეროდით მამას.

დუმილი ანანომ დაარღვია, ნაწყვეტ-ნაწყვეტად ძლივს შეჰბედა ძმას:

— სანდრო, რაღაც გვითხარი... რას გაჩუმებულხარ, ხმა ამოიღე...

— დაწეკით, დაწეკით, — გვიბრძანა მამამ, — ხვალ ვილაპარაკოთ.

— შენ თვითონ რატომ არ წეები?

— მეც დავწეები, ძალიან დავიღალე.

— ზემოთ გაგიშალე ლოგინი, შენს ოთახში.

— კარგი გიქნია, ავალ და დავიძინებ.

დაწოლით მანც არავინ დაწოლილა. მამა ისევ ბოლთას სცემდა, ჩვენ კი უაზროდ ვისხედით და ასევე უაზროდ შეცქეროდით ნაბახუსევ კაცს, რომელიც თავის მთვრალ ფიქრებში დაძირულიყო და ჩვენთვის ვერ იცლიდა. მერმე ანანომ თვალთ მანიშნა, — წადი და დაიძინეო. დაუჭყრე. უსიტყვოდ წამოვდექი და ჩემს ოთახში გავედი, კარი მივხურე. სიბნელეში ხელის ფათურით მივაგენი ჩემს საწოლს და ფრთხილად ჩამოვჯექი. ერთხანს ასე მჭდარი ყურს ვუგდებდი მამაჩემის არეულ ნაბიჯებს ხმას. მერმე გავიგონე, აივნის კარი გაიღო და მიიხურა. ფეხის ხმა ახლა გარედან მომესმა. ისიც გავიგონე, მამამ ჭრიალით აიარა ხის კიბეები და ოთახში შეიკეტა.

მერმე სიჩუმე ღამის წყვილიაღში გაზავდა. სიბნელეს თვალი შევაჩვიე და ღია ფანჯრიდან გავცქეროდი ჩაღამებულ სოფელს, რომლის ზემოთ და მიღმა ვარსკვლავებით დაცხრილული ცა გამოიკვეთა. მერმე მომესმა შორეული, ჩემთვის ყოველთვის იდუმალებით მოცული ხმა, რომელზედაც ბევრჯერ უთქვამთ, ტურები კივიანო. მიუხედავად ამისა, ეს ხმები ჩემში ყოველთვის სხვა, არარეალურ, უცნაურ შეგრძნებას იწვევდა, უსიამოვნოსა და არასასურველს. როდის-როდის პირველმა მამლებმა იყიველეს. მე საწოლზე ვიჯექი საკანში გამომწყვდეული კაცივით, რომელმაც არ იცის, რატომ და რისთვის მიუსაჯეს საკანში ჯდომა. მერმე ტანსაცმელი გავიწადე და ლოგინში შევწექი, თან ვცდილობდი გამერკვია, რამ დამიმძიმა ასე გული, რა მაწვალებდა, რა მიფრთხობდა ძილს, როცა ჩემზე ბედნიერი კაცი მთელ ქვეყანაზე არ მეგულებოდა, რამდენი შენატროდა ჩემს ბედს... როგორც ჩანს, მე თვი-

თონა ვარ უქემური და უხასიათო, არ შემძლია ბედნიერება და სიხარული სიხარულითვე გამოვიატო-მეთქი, — ვლიქრობდი საწოლზე გაშოტილი...

უეცარმა კივილმა დამიფრთხო ძილი, გაოგნებული საწოლზე წამოვჯექი, მეგონა, კოშმარმა გამომალვია-მეთქი. ჯერ ისევ ბნელოდა. გარედან ვიღაც-ვიღაცების ჩოჩქოლი და ყაყანი მესმოდა. ამ ყაყანიდან უცებ მძაფრი კივილი მაშხალასავით ამოვარდებოდა და ყველა ხმას ფარავდა. მერმე ისიც ვიფიქრე, ვიღაცამ ალბათ ნაგვიანვეად მიიღო დაღუპვის ცნობა-მეთქი. ღია ფანჯრიდან ეზოს გადაღმა გავხედე ორღობეს, საიდანაც ხმაური მოდიოდა. არაფერი ჩანდა და არც სიტყვები ისმოდა გასაგებად.

ანანოს უკვე კაბის ჩაცმა და ლამპის ანთება მოესწრო, ოთახში დაბნეული ფუსფუსებდა, თითქოს უსაგნოდ და უმიზეზოდ. მე რომ იქვე მდგარი დამინახა, შემკრთალმა რაღაც ჩაილაპარაკა და უფრო მეტად დაიბნა, მაგრამ მალევე მოთოკა და მოქიმა ეს დაბნეულობა, ორივე ხელით თმა გაისწორა და სწრაფად გაიქრა გარეთ. ღია კარიდან გავხედე სიბნელეს და აივანზე გავედი. ანანო უკვე სიბნელეში გაუჩინარებულყო:

ყაყანსა და გნიასში ნაცნობი ხმაც (ანანოსი) ამოტივტივდა და ისევ დაინთქა. კიბე ჩავიბრინე, ფრთხილად გავეშურე ეზოს შორეულ კუთხისაკენ, რომლის იქითაც ორღობეში გამოფენილი ხალხი მეგულებოდა. ღობესთან მისული გავყუჩდი და გავილურსე, ყველანი მარო მასწავლებლის სახლის წინ შექუჩებულებყვენ, რაც ცუდად მენიშნა. ყაყანს ყური მიეუგდე, ზოგი რამ გავარკვიე კიდევ: ცოტა ხნის წინ ვიღაც მამაკაცს მაროს ფანჯარაში გადაძრომა დაუპირებია, მაგრამ მაროსთან დამის გასათევად დარჩენილ ქალებს განგაში აუტეხიათ. ქალები ერთხმად ადასტურებდნენ, რომ იმ კაცს სამხედრო ფორმა ეცვაო...

მე ღობის უკან ვიმალებოდი, მრცხვენოდა, თანაც მეშინოდა, არავინ დამინახოს-მეთქი.

ღმერთო, რა ქალია ანანო!

რა გააფთრებით იბრძოდა და უტევდა, ედავებოდა და აშოშმინებდა აღელვებულ ქალებს, — ეგ ყველაფერი მოგეჩვენათო, სწორედ რომ იმ ასაკისანი ხართ, მოჩვენებები რომ ეწყებათო. სანდროსთან რა ხელი გაქვთ, მთვრალი და დაღლილი,

როგორც დაეგდო, ეგრევე გულის ძილით სძინავს, თავისთვის გდია და ხვრინავსო. არც თქვენი ყაყანი და ჩოჩქოლი გაუგია და არც თქვენი წივილ-კივილი. ფეხიც არ გაუტოკებიაო. წამოდით და ნახეთ, მაგის ხვრინვისაგან ფანჯრებს ზრიალი გაჟჭებსო... მეტი დამაჯერებლობისათვის რამდენჯერმე გაიმეორა, — ხვრინავსო.

ისევე ჩუმად გავეცალე იქაურობას, როგორც მივუახლოვდი. უკნიდან კვლავ მესმოდა მოჩოჩქოლე ხმები, ოღონდ უკვე დამცხრალი და დაშოშმინებული. ანანომ, ეტყობა, თავისი გაიტანა, ექვის მარცვალი ჩააგდო ხნულში, ამ მარცვალს მაინცდამაინც პოხიერი ნიდადაგი არ დახვედრია, მაგრამ მარცვალი მაინც მარცვალია და, როგორც ჩანს, ბოლოს გალივდა.

ქვეყნად არავის დაუჭერებდი, მათ შორის ჩემს თავსაც, გინდაც დამენახა, რომ მამაჩემი შუალამით შინიდან გაიპარა, მაროს ფანჯარას ქურდულად მიადგა და გადაძრომა დააპირა. ჯერ ერთი, ღრმად ვიყავი დარწმუნებული, მამა ამას არ ჩაიდენდა, მეორეც, მისი ასაკის ადამიანები ასეთი ვნებებისათვის უკვე ხანდაზმულად შეჩვენებოდნენ...

ამასობაში გათენდა კიდეც, ჯერ ცა გაბაცდა, გაფერმკრთალდა, მერმე კი სინათლემ იძვლავრა. მე კიბეზე ვიჯექი და ანანოს დაბრუნებას ველოდებოდი.

უცებ ზემოდან მამამ დამიძახა:

— ოზო!

წამოვხტი, მეორე სართულის აივანს ავხედე. მამა დონიჭ-შემორტყმული იდგა და ღიმილით ჩამომცქეროდა.

— ერთი გამაგებინე, რა ჟრიამულია მანდ?!

შემკრთალმა ხელები უმწეოდ გავშალე, ვითომ არ ვიცი-მეთქი.

ჩემგან რომ ვერაფერი შეიტყო, ეზოს გადასკეჭა და იქით, ორლობეში გააგონა მეზობლებს:

— რა ყოფაში ხართ მანდა, რა იყო, რა დაგვისიზმრათ?! ხალხს თქვენგან ძილი და მოსვენება აღარა აქვს!

ხალხი მამაჩემის ხმის გაგონებისთანავე უხმოდ დაიშალა, თავისი გზით წავიდ-წამოვიდა. მე ისევე კიბეზე ჩამოვჯექი. ყველაფერი თითქოს ნათელი და გასაგები იყო, ქალებს რალაც მოეჩვენათ და წიოკობაც ამიტომ ატეხეს, თუ არ მოეჩვენათ, მაშინ მისამართი შეშლიათ, არეგ-დარევიათ-მეთქი. ძალზე აღ-

ვილად დავიმშვიდე თავი, თითქმის დავწყნარდი კიდეც. მალე ანანომ შემოაღო ჭიშკარი, გაბრაზებული ჩანდა, სახეზე ადამიანის ფერი აღარ ედო. სწრაფად გამოიარა ეზო და კიბეები აირბინა, მერმე მამაჩემთან ერთად შეიკეტა ოთახში და ორივენი კარგახანს აღარ გამოჩენილან.

საუზმემ მშვიდად ჩაიარა, მამა მშვენიერ გუნებაზე დადგა, განსაკუთრებით სამი სახარების შემდეგ. იქვე გადაწყდა: ცხვარსაც დაჰკლავდნენ და ხალხსაც დაჰპატიებდნენ, რათა საზეიმოდ აღენიშნათ სანდრო ბოდაველის მშვიდობიანად დაბრუნება. მართალია, ვილაც-ვილაცებმა მოინდომეს, გამარჯვებით დაბრუნებულისათვის სახელი გაეტეხათ, მაგრამ არ გამოუვიდათ, როგორც იტყვიან, კოვზი ნაცარში ჩაუვარდათ. ცხვარი დაიკლა და გატყავდა, ცხვარს ქათმებიც მიაყოლეს და ქვევრსაც მოხადეს თავი. პირველად ერთმა ნაფრონტალმა შემოაღო ჭიშკარი, აი იმან, საღსალამათი რომ ჩამოვიდა. პირქუში და დაღვრემილი გამოცხადდა, მოსვლისთანავე მაგიდას მიუჯდა და ჯიბიდან თუნუქის კოლოფი ამოიღო, თამბაქო გაზეთის ქაღალდში გაახვია და ცეცხლი მოუკიდა. სანდრო, ომი რომელ ქვეყანაში დაამთავრო, — პირველადვე ეს იკითხა და პასუხსაც დაელოდა. ფირან, რა დროს ეგ არის, მერმე ვილაპარაკოთო, — დიალოგი განუსაზღვრელი დროით გადაუვდა მამამ და ფირანაც უღრტვინველად დაეთანხმა, — კარგი, ეგრე იყოსო. ფირანას შემდეგ ორნი მოვიდნენ პურ-ღვინოზე და გეშილები, საქვეყნოდ აღიარებული მსმელ-მჭამელები, სულ იმაზე წუხნდნენ, გუშინდელი ღღე როგორ გამოგვატოვებინეთო. ერთი სიტყვით, დიდი სუფრა გაიშალა ჩვენს ეზოში და სოფელმა გვარიანადაც მოილხინა, მხოლოდ მარო მასწავლებელი არ მოსულა, იმ ღღეს საერთოდ არ გამოჩენილა.

ზიზი სოფელში არ იყო, წუხანდელ აყალმაყალსა და აურზაურს ასცდა... ალბათ ძალზე უხერხული იქნებოდა ქალიშვილისათვის, ასეთ უსიამოვნო შემთხვევას რომ დასწრებოდა. უცებ წარმოვიდგინე, რა ღღეში ჩავარდებოდა და ცუდ გუნებაზე დავდექი, თუმცა მანამდეც უკმაყოფილო და აფორიაქებული ვიყავი, მთელი ღღე მაწუხებდა უკმარისობის გრძნობა, თითქოს რაღაც საგნები ისე არ უნდა აგვეწყო და დაგველაგებინა, როგორც ავაწყეთ და დავალაგეთ; შინაგანად ვერ მოვწესრიგდი და ისიც მეჩვენებოდა, ყველანი თავს თი-

თქოს ვიტყუებდით მხოლოდ იმის გამო, რომ სულიერი წონასწორობა აღგვედგინა. ამ მოსაჩვენებელ სიმშვიდესა და გუნებიერებას ანანოსაც ვატყობდი. თუმცა შენიღბვას ყოველნაირად ცდილობდა... უთუოდ ჯობდა, მარო მასწავლებელი, სამი-ოთხი დღით კიდევ დარჩენილიყო თბილისში, მით უმეტეს, რომ კმაყოფილი ჩამოვიდა ქალაქიდან, ზიზი კარგად მოვაწყე და დავაბინავეო.

მოცლა არა მქონდა, მერიქიფეობა დამაკისრეს, დაცლილი ხელადები მომქონდა, ღვინით ვავსებდი და ისევ მაგიდაზე ვდგამდი.

ცხელოდა, დილა თითქოს ღრუბლიან ამინდს გვპირდებოდა, მერმე ღრუბელი უკვალოდ გაქრა და ივლისის მზემ ლამის თავის ქალა აგვხადა. მზის მცხუნვარებას მესუფრენი მაინცდამაინც არ შეუწუხებია, კაცს არ მოუნაცვლებია ადგილი, მყარად ისხდნენ. გაოფლილებსა და ღვინით გაქლენთილებს ოხშივარი ასდიოდათ. მზე რომ გადაიხარა და ჩვენს სახლს მიეფარა, ასე მეგონა, ეზომ შვებით ამოისუნთქა-მეთქი.

ამ ღროს ვიღაცამ წამოიძახა — კარიაულები მოდიანო!

მე ჭიშკართან ვიდექი და უნებურად ორღობეს გავხედე: ოციოდე ნაბიჯზე მართლაც დავინახე კარიაულები, მოულოდნელი კი იყო მათი გამოჩენა, მაგრამ მე არ გამკვირვებია, რატომღაც გამეღიმა და თითქოს გამიხარდა კიდევ. წინ უფროსი თაობა მოდიოდა: მამა-კარიაულს თუშური ქუდი ეხურა და შავი შარვალ-ხალათი ეცვა — სრული, ფართხუნა; დიდ მუცელზე ბალთიანი წვრილი ქამარი ჰქონდა მოჭერილი. დედა-კარიაული ჩიხტი-კობით იყო გამოწყობილი, ფართო, ყვრიმალთან სახეზე აქეთ-იქიდან წაბლისფერი კულულები ნაზად ერხეოდა, ხელში გაშლილი, ძველებური შავი ქოლგა ეჭირა, გეგონებოდა, არკი მოდიოდა, რწევა-რწევით, სხეულის თანთალით ნელ-ნელა მოსრიალებდა. მამა-კარიაული მიიმედ მოაბიჯებდა, ეტყობოდა, მყარად, მაგრად იდგა ნიადაგზე.

მათ ზურგს უკან პირგაბადრული ქალიშვილები გამოჩნდნენ, წითურები, მზის მხურვალეებისაგან სახეალეწილები, კრელ და შილიფკაბიანები, თეთრ ყელსა და მკლავებს მოაელვარებდნენ. კაბაში ვერდატეული დიდი ძუძუები წინ მოუძლოდათ, დევის ქალები ფეხზე მდგარნი არასოდეს მენახა, მაშინ მაგიდას უსხდნენ, არ წამომდგარან და რატომღაც უფრო ჩა-

გოდრებულები, უფორმოები წარმომედგინა. თურმე სიდიდისა და ხორცმრავლობის მიუხედავად, აღნაგები იყვნენ, ტანადები. კარიაულის ქერივს თვალი ვერ მოვკარი და ამათ არ წამო-  
პყოლია-მეთქი, — გავიფიქრე, — მაგრამ ეზოს რომ მოუახლევ, დნენ, დევებშორის მოქცეული თუ მომწყვდეული მოდიოდა, თავდახრილი და ხელებჩამოყრილი სულ დაატარავენბული, დალეული ჩანდა.

ეზოს კარი გავუღე, ანანო შეეგება, მობრძანდით, მობრ-  
ძანდითო, — შემოიპატიჟა, მერმე მამაჩემს გასძახა — სანდრო, სტუმრები გვეწვივნენო. ეზოში ჯერ უფროსი კარიაულები შე-  
მობრძანდნენ, შემდეგ — კარიაულის ქერივი, ბოლოს დევის ქალები შემომზვედნენ და იქაურობა გაანათეს. ორივენი და-  
მორცხვებულები და ოდნავ დაბნეულებიც კი მომეჩვენნენ, ვერ მივხვდი, ბუნებით იყვნენ მორცხვები, თუ თავს იკატუ-  
ნებდნენ.

ანანომ მისალმება და ხელის ჩამორთმევა რომ მოათავა, ძმა წარუდგინა კარიაულებს და გააცნო. მამა ღიმილით მიეახ-  
ლა სტუმრებს. დედა-კარიაულს ხელზეც კი ეამბორა. მე იქვე, გვერდით მდგარი გავცქეროდი სტუმარ-მასპინძლობის ამ ცე-  
რემონიალს და ყველაფერს კარგად ვხედავდი. სწორედ ერთი წამის წინ გავიფიქრე, — ეს დევის ქალები მამაჩემზე ნეტა რა შთაბეჭდილებას მოახდენენ-მეთქი და უცებვე მოწმე გავხდი ამ შთაბეჭდილებისა: მამაჩემი ჯერ შეცბა, პირი ისე დაალო, თითქოს გაოცების რომელიღაც შორისდებული ამოსცდა ყე-  
ლიდან, მერმე გაშეშდა და გაშტერდა, კარიაულის ქერივს ხე-  
ლი ისე გაუწოდა, ზედაც არ შეუხედავს, ეტყობა, თვალი ვერ მოსწყვიტა იელის ბუჩქებივით ოქროსფრად აბღღვრიალებულ დევის ქალებს... მერმე ღიმილად დადნა, ორივეს გადაჭარბე-  
ბული მოკრძალებით ჩამოართვა ხელი და რალაცნაირად მოი-  
ქნა, ძალზე უჩვეულოდ, არაბუნებრივად მოძრაობდა. ხუთი-  
ვე მაგიდასთან მიაცილა, დასხა, მომსახურე ქალებს ხორავი დაახვავებინა. ახალმოსულებს თავისი ხელით დაუსხა ღვინო და მხოლოდ ამის შემდეგ დაჯდა, კარიაულებს დაუჯდა წინ და გულითადი საუბარი გაუმართა. მერმე საქმით გავერთე და კარიაულები გულიდან გადამვარდნენ, მაგრამ ამ საქმიან ფუს-  
ფუსში ერთხელ შევნიშნე, ჩვენი აივნის ბოძს მოფარებული ანანო გამჭოლი თვალებით უმზერდა მამას, რომელიც დევის ქალებს აცინებდა და თვითონაც გულიანად იცინოდა...



შემდეგ ყველაფერი ისე წარიმართა, როგორც წინა დღეს: გვიან საღამოს წამოიშალნენ სტუმრები, ლაპარაკ-ლაპარაკით, ლილინ-ლილინით სათითაოდ გაიკრიფნენ ეზოდან. ერთი-ორმა სცადა დარჩენა და ქეიფის გაგრძელება, მაგრამ თანამზრახველები ვერ იპოვეს. მეზობლებმა სუფრა სწრაფად აალაგეს და ჯამ-ჭურჭელიც დარეცხეს, ოღონდ ჭურჭლის რეცხვაში მამაჩემს მონაწილეობა აღარ მიუღია, დევის ქალების წასვლისთანავე საშინლად მოიწყინა.

ბოლოს ისევ სამნი შევიყარენით ჩვენს დიდ ოთახში. მე და ანანო მაგიდას ვუსხედით, მამა კვლავ ბოლთას სცემდა. გუშინდელთან შედარებით უფრო ფხიზლად და მხნედ გამოიყურებოდა. გუშინ ალბათ ნაგზაური იყო და იმიტომაც მოეკიდა ღვინო, დღეს ფეხი არ ეშლებოდა, არც ბარბაცებდა, ჯიბეებში ხელებჩაწყობილი დადიოდა და ლილინებდა. მერმე უცებ მე მომიბრუნდა:

— როდის გავემგზავროთ? — მკითხა.

მე მხრები ავიჩეჩე.

— რა გეჩქარებათ? თვის ბოლომდე რომ დარჩეთ, არაფერი გიშავთ, — უპასუხა ანანომ.

— არა, არა! — გადაწყვეტით თქვა მამამ, — თბილისში უამრავი საქმეა მოსაგვარებელი... აქ რომ დავრჩე, ღვინოში ჩამახრჩობენ... ხვალ კოლმეურნეობის თავმჯდომარესთან ვარ დაპატიჟებული, არ მომეშვა... რა გვარია ეგ თავმჯდომარე?

— ფილო კვალიაშვილი.

— ჰო, ფილო კვალიაშვილი... ზეგ კიდევ ვილაცა გამოჩნდება, მაზეგ კიდევ — ვილაცა... საშველი არ არის!

— შენც ნუ აპყვები, სოფლის ქვევრებს შენ ხომ ვერ ამოცლი?! —

— ეგრე არ არის, ანანო, არა! — მამამ პირდაპირ ლამპიდან მოუკიდა პაპიროსს ცეცხლი.

ზეგ, უსათუოდ ზეგ!

ასე გადაწყდა: სოფელში ერთ დღესაც დავრჩებოდით და შემდეგ თბილისს გავემგზავრებოდით, დაყოვნებას, შეიძლება, დამლუპველად ემოქმედა ჩვენს საშურო საქმეებზე. სხვას რომ თავი დავანებოთ, საბუთები ხომ უნდა შეგვეტანა რომელიმე უმაღლეს სასწავლებელში!

თბილისში დაბრუნება, რა თქმა უნდა, მიხაროდა, მაგრამ

მიხაროდა თითქოს იმიტომ, რომ ეს სიხარული რამდენიმე წლის წინ მქონდა შინაგანად დაგეგმილი. მე ანანოს მივაჩერდი, მეგონა, მხოლოდ მას შეეძლო მამაჩემის გადაწყვეტილებათა შეცვლა ან გაუქმება. თვალეში შევხედე და უმალ დავრწმუნდი, ანანო უსიტყოდ დაემორჩილებოდა ძმის ყოველგვარ ნებას<sup>1</sup> სურვილს.

ვერ ვიტყვი, თითქოს თბილისში დაბრუნებაზე უარს ვამბობდი და სოფელში დარჩენა ვინდოდა. ეს აშკარა ტყუილი იქნება. თბილისში დაბრუნებას ვოცნებობდი, თანაც დიდი ხანი ვოცნებობდი. მაგრამ ახლა, ცოდვა გამხელილი სჯობია, იქ, თბილისში მამაჩემის პირისპირ ყოფნა გამიჭირდება-მეთქი. — ვფიქრობდი. ასე მოკლე დროში ვერ მოვახერხებ შეგუება და ურთიერთობის დამყარება, იქნებ ამიტომაც მოვინდომე, კიდევ ცოტა ხანს დავრჩენილიყავით სოფელში, სადაც ანანო იყო. ანანო ჩვენს შორის ხიდივით იდგა და ერთგვარად გვიადვილებდა მამასაც და მეც ურთიერთობას.

ანანოს დატოვებაც მიმძიმდა, ჯერ ერთი, შევეჩვიე და მეორეც, მიმაჩნდა, რომ ახლა ანანოს მე ვჭირდებოდი, მხოლოდ მე ვიცოდი მისი საფიქრალი და საწუხარი, მთელ სოფელში მე ვიყავი ერთადერთი ადამიანი, ვისაც ტკივილს უმეკლავებდა, ვისთანაც გულს იოხებდა. ჩვენი გამგზავრებისთანავე სრულიად მარტო რჩებოდა და ეს მარტო დარჩენა, მარტო ყოფნა რას უქადდა, რას მოუტანდა, არავინ იცოდა. ბოლო დროს, როგორც წყალწალბებული — ხავსს, ისე მეჭიდებოდა. მისი ერთხელ ნათქვამი თანდათან ღრმად ჩამებეჭდა მეხსიერებაში და მეგონა, თუ მივატოვებდი, ცოცხალს ვეღარ ვნახავდი. მაშინ რაც მითხრა, სისულელედ ჩავთვალე და გუნებაში გამეცინა კიდევ, მაგრამ მერმე, დროთა განმავლობაში, უფრო ზუსტად, დრო და დრო დენივით დამკრავდა და შემარყევდა... „თუმცა შენ ერთხელ კიდევ ჩამოხვალ, ჩამოხვალ მამაშენთან ერთად, როცა მე ამ ქვეყნიდან აბარგებული ვიქნები... ჩემს დასამარხად ჩამობრძანდები, ოზო. ეგეც საქმეა...“

მამას უკან აღარ დაუხვევია, თქვა და მოათავა ამ საკითხზე ლაპარაკი. დავიძინოთ, დროაო, — მთქნარებით გვითხრა და დაგვტოვა, თავის ოთახში ავიდა, მეორე სართულზე. ანანო მთელი დღის ჭაფით დაღლილი ჩანდა და დასვენება სჭირდებოდა. უხმოდ ავდექი და დასაძინებლად გავეშურე.

სხვანაირად ალბათ არც მქონდა წარმოდგენილი მამაჩემის დაბრუნება და ჩვენი დახვედრა. ორი დღე ვზეიმობდით, ჩვენს სახლში თითქმის მთელმა სოფელმა მოიყარა თავი, სიმღერა არ დაგვიკლია და ცეკვა-თამაში. მაგრამ გული მაინც რალაც-ნაირად მეთანაღრებოდა, თითქოს ამ ორი დღის განმავლობაში რაც აქ ხდებოდა, იმის მიმართ არაგულწრფელი ვიყავი. მე კი არ შემეძლო ეს არაგულწრფელი დამოკიდებულება ჩემ სულში სასხვათაშორისოდ მიმეფუჩჩეჩებინა, იგი მაწუხებდა და სინდისივით მქენჯნიდა.

დაწოლისთანავე ჩამეძინა, ეტყობა, მთელი დღე მეც გვარიანად დავიღალე. არ ვიცი, რამდენ ხანს მეძინა. უცებ ცხენის ქიხვინმა გამაღვიძა, გვერდი ვიბრუნე და გამახსენდა, რომ უცნაური სიზმარი დამესიზმრა, თუმცა ყველა სიზმარი თავისთავად უცნაურია.

გამოღვიძებულმა სიზმრის აღდგენა და გააზრება ვერ მოვასწარი, კიბის ჭრიალი და ფრთხილი ფეხის ხმა გავიგონე. საწოლზე წამოვკეჭი, მივაყურე. აშკარა იყო ჩვენს კიბეზე ვიღაც ჩამოდიოდა, ან ადიოდა. უცებ გულმა რეჩხი მიყო, რატომღაც მამაჩემი წარმოვიდგინე, სწრაფად წამოვდექი და ღია ფანჯარას მივვარდი.

მთვარე ჯერ არ იყო ჩასული და მამაჩემიც მაშინვე ვიცანი. ქეღდა აივანი აღარ გაუვლია, პირდაპირ გადაეელო მოაჯირს და ეზოში უხმაუროდ ჩახტა, ერთხელ მოხედა სახლს და ჭიშკრისკენ გაემართა, მოზომილ, ფრთხილ ნაბიჯებს აღგამდა, მერმე თუთების ჩრდილში დამეკარგა. ფანჯრიდან გადავძვერი და აივნის ბოძს მოფარებული ვუთვალთვალეზღი, მინდოდა გამეგო, სად მიდიოდა. ეზოში ვერ ჩავიდოდი, რადგან მთვარით იყო განათებული და მამა უსათუოდ დამინახავდა, აივნიდან კი უკვე არაფერი ჩანდა. არც ჩამიჩუმე ისმოდა, ნაბიჯების ხმით რომ მაინც მივმხვდარიყავი, საით გაეშურა, მარჯვნივ თუ მარცხნივ? თუ მარჯვნივ წავიდა, ექვი აღარ შემეპარებოდა, რომ მაროსთან მიდიოდა, რომ წუხანდელი აყალმაყალის მიზეზიც ეგ იყო... მაგრამ იმ აურზაურის, იმ ხმაურის შემდეგ წარმოუდგენლად მეჩვენებოდა მისვლა იმავე სახლში, საიდანაც გამოაძევეს.

მარჯვნივ, ჩვენი ღობის იქით, შესახვევში გაკრთა ნაცნობი ლანდი და ისევ გაუჩინარდა. წუხელ სწორედ იქ იდგა მოყა-

ყანე ქალების ჯგუფი და მამაჩემს უტევდა. ცოტა არ იყოს შევცბი და კარგახანს გაშტერებული ვიდექი, იმდენად აბსურდულად მომეჩვენა ეს ყველაფერი, რომ არ ვიცოდი, რა მექნა. სხვა რომ ვერაფერი მოვახერხე, უაზროდ გამელიმა. გარედან შემოვჯექი ფანჯრის რაფაზე და გულგრილად ველღობოდი წუხანდელზე უარეს ხმაურსა და აყალმაყალს.

ამ დროს ანანო გამოვიდა ოთახიდან, ფანჯარაზე შემომქდარი დამინახა და ჩემთან მოვიდა. ანანოს დანახვისთანავე ისევ დავიძაბე.

— არც შენ გძინავს? — მკითხა.

— არ მეძინება.

— დაწევი და დაგეძინება... გათენებამდე ჯერ კიდევ აღრეა.

— ცოტა ხანს ვიქნები.

— სხვანაირი ღამეა, არა?

ანანომ, როგორც ჩანს, სცადა ჩემი ყურადღება სხვა საგანზე გადაეტანა, თუმცა „სხვანაირში“ რა იგულისხმა, ვერ გავიგე. ფანჯრის რაფიდან ჩამოვხტი და ღამეს გავხედე. თითქოს მინდოდა დავრწმუნებულიყავი, ანდა იქვე შემემოწმებინა ღამის სხვანაირობა. ეს კი ვიგრძენი, რომ ჰაერი მთვარის სხივებით იყო გაუღენთილი, თანაც ათასი იდუმალი ხმა გავიგონე ღამის მწერებისა: კრუალები კრუალებდნენ, ჭრიჭინები ჭრიჭინებდნენ და კიდევ სხვა ხმებიც ისმოდა. ისინი ღამის დიდ ცხოვრებას უცნაურად ამხელდნენ, მაგრამ მე ამჯერად მათთვის არ მეცალა. მთელი არსებით დადარაჯებული ვიყავი და წუთიწუთ ველოდებოდი საშინელ აფეთქებას, რომელიც ამ მშვიდობიან, მყუდრო, ნირვანის მომგვრელ ღამეულ ხმებს ერთიანად დანთქამდა.

ანანოს შევხედე, — შეშფოთებული თუ არის, მოახლოებულ საშიშროებას თუ გრძნობს-მეთქი. სახეს გარკვევით ვერ ვხედავდი, თუმცა აღელვებული ან შეშფოთებული რომ ყოფილიყო, უსათუოდ შევატყობდი.

— კიდევ ერთი დღეც და გულა-ნაბადს აიკრავთ, წახვალთ, — მითხრა ანანომ. — თითქოს გუშინ ჩამოგიყვანა მამაშენმა პატარა, დაბნეული, შეშინებული... მამას ერთ ნაბიჯზე არ ტოვებდი. ჩემთან არ გინდოდა დარჩენა... ამ ოთახში შეხვედი და ტიროდი...

ნუთუ არაფერი გაუგია? თუ არ გაუგია, ახლა გაიგებს-მეთქი. — ვფიქრობდი, მაგრამ გადიოდა დრო და სოფელში ჩამოწოლილი სიჩუმე არ ირღვეოდა.

— ახლა მგონია, რომ სწრაფად გავიდა დრო, ისე ვარ, თითქოს არც მიწვალაია, არც მიღელვია...

რალაც ხმაური შემომესმა და შევეკრთი, ალბათ სმენამ ან ნერვებმა მიღალატა, თორემ ღამეს ჩქამი არ გაუღია, მხოლოდ კრულები გვიტყვიდნენ აქეთ-იქიდან.

— გახსოვს, გზიდან რომ მოგაბრუნე, — გაიცინა ანანომ, — რამდენი ვირბინე? შენც კარგად იყავი გასავათებელი, ფეხზე ვერ დგებოდი.

— ნახნავებში ვიარე, თორემ ვერ დამეწეოდი.

— დაგეწეოდი! ეგ კი არადა, მატარებელი დაძრულიც რომ ყოფილიყო, გავაჩერებდი და ჩამოგსვამდი... ახლა მშვიდად ხარ, გაგიჟებული აღარ მიიწევ იქითკენ, თუმცა რაღა დაგრჩა, ერთ დღეს კიდევ გაუძლებ...

მთვარით განათებული ეზო განახევრდა. ეტყობა, მთვარე საკმაოდ გადაიხარა, ეზოს დიდ ნაწილს ჩვენი სახლის ჩრდილი ეცემოდა და სიბნელეში ხვევდა.

— ერთი დღე რა არის, თვალის დახამხამებას ვერ მოასწრებთ...

მე ვგრძნობდი და ვიცოდი, ანანო სხვა რალაცას მიმანიშნებდა, სხვა რამ აწუხებდა და აწვალებდა, მაგრამ ახლა ამის გაგება არ შემეძლო. მთელი ყურადღება იქითკენ — ღამის წყვდიადისკენ მქონდა მიპყრობილი.

საღლაც მამალმა იყივლა, მას სხვა მამლებიც აპყენენ. წინ და უკან, აღმა-დაღმა, გარდი-გარდმო, ყოველი მხრიდან ჰკვეთდა ღამის სივრცეს ელვასავით ცივი და ბასრი ყივილი. მე მზად ვიყავი, ყოველგვარი, ყველანაირი ხმა გამეგონა, ოღონდ არა ის, რამაც წუხელ თავზარდაცემული წამომახტუნა... თითქმის ყველა ვადა გავიდა, მაგრამ კივილი, რასაც დაძაბული და წინასწარ შეძრწუნებული ველოდებოდი, აღარ გაისმა, არადა წელანვე, როგორც კი ანანომ ხმა ამოიღო და დამელაპარაკა, უნდა მივმხვდარიყავი, რომ წუხანდელი ხმაური და წივილ-კივილი ამაღამ არ განმეორდებოდა.

— გათენებამდე დიდი დროა, — თქვა ანანომ.

— ეს საქმეა, — ვუთხარი მე, — მხოლოდ ჩვენს ეზოში

არ ყვირს მამალი, შენი რომ ვიყო, ერთ მამალს მეც ავაყვი-  
ლებდი.

— ლამეს ტყუილად ათევ, წადი, დაიძინე. — გამიღიმა და  
მხარზე დამისვა ხელი.

— შენა?

— მეც დავწვები. აკი გითხარი, გათენებამდე დიდი დროა-  
მეთქი.

ისევ ფანჯრიდან გადავძვერი და საწოლზე მივეგდე. არ  
დამეძინა. ყურადღება არ მიმიქცევია ან ვერ გავიგონე, რა  
ჰქნა ანანომ, ოთახში შევიდა და დაწვა თუ იქვე, აივანზე დარ-  
ჩა. მამაჩემი რომ დაბრუნდა, თენდებოდა, ჩიტები ახალი გალ-  
ვიძებულები იყვნენ და ერთი ჟრიაბული და ჟივჯივი ჰქონდათ  
ატეხილი.

## 9

ანანო დილიდანვე წავიდა კოლმეურნეობის კანტორაში,  
შინიდან გასვლისას მითხრა, — მამას ეძინოსო, ჩემს მოსვლამ-  
დე ალბათ არც გაეღვიძებო. მართლაც, არ გაღვიძებია სამხ-  
რობამდე, ყოველ შემთხვევაში, ოთახიდან ფეხი არ გამოუდ-  
გამს. ჯერ ვისაუზმე, ეზოში კარგა ხანს უაზროდ ვიწვრიალე,  
მერმე გამახსენდა, რომ ანანოს ნაჩუქარი წიგნები და ჟურნა-  
ლები თაროდან უნდა გადმომეღო და შემეკრა. ბევრი არ იყო.  
ყველა ერთად — წიგნიცა და ჟურნალიც ოცდაათი ან ცოტა  
მეტი იქნებოდა: ილიასი და აკაკის ლექსები და მოთხრობები,  
ვაჟას ლექსები და პოემები, აგრეთვე „შელის ნუკრის ნაამ-  
ბობი“, რომელიც კარგად იყო აღუსტირებული, ყაზბეგის  
„ხევისბერი გოჩა“ და „ელგუჯა“, პუშკინის „კაპიტანის ქალი-  
შეილი“, ლერმონტოვის „ჩვენი დროის გმირი“, ტოლსტოის  
„ჰაჯი მურატი“ და „ბავშვობა, ყრმობა და სიჭაბუკე“, „დი-  
კენსის „დავიდ კოპერფილდი“, სერვანტესის „დონ კიხოტი“  
და ვალტერ სკოტის „აივენგო“. ჟურნალები: „ქართული მწერ-  
ლობა“, „მნათობი“, ორიოდღე ნომერი „ჩვენი თაობისა“ და ერ-  
თიეც „კავკასიონი“, სულ დაფურცლულ-დაფლეთილი. ეს იყო  
ანანოს ბიბლიოთეკა, ოთხი წლის მანძილზე ჩემი სულიერი სა-  
ზრდო. საშუალო სკოლა რომ დავამთავრე, თბილისში წაკი-  
თხულ საბავშვო წიგნებს თუ არ ჩავთვლი, მხოლოდ აქ ჩა-

მოთვლილი წიგნები და ჟურნალები მქონდა წაკითხული. რა თქმა უნდა, ცოტაა, მაგრამ მაინც ბედის კმაყოფილი და მადლობელი ვიყავი. ხომ შეიძლებოდა, ანანოს სულაც არ ჰქონოდა ასეთი წიგნები და ჟურნალები, დაემდურებოდი თუ რა?

მეგონა, სწრაფად შევკრავდი წიგნებს და საქმესაც ამით მოვათავებდი, მაგრამ ძველ ჟურნალებს რომ მივადექი, მათდამი უეცარი მოკრძალებით გავიმსჭვალე, თითო-თითოდ გადმომქონდა და დიდხანს ვფურცლავდი და ვათვალიერებდი, ალაგ-ალაგ ვკითხულობდი და უნებურად მახსენდებოდა ზამთრის გრძელი, დაუსრულებელი ღამეების სიხარული, ამ წიგნებისა და ჟურნალების ფურცვლისას, ყოველთვის ახალსა და მოულოდნელს რომ აღმოვაჩენდი ხოლმე, თითქოს პირველად მეჭირა ხელში, თითქოს პირველად ვკითხულობდი. ახლა კი თან მიმქონდა თბილისში და ვფიქრობდი, — ამათ ალბათ ვერასოდეს შეველევი, რადგან ჩემი ყოფნის უძნელეს წუთებში მსსნელებივით მომეკლინნენ-მეთქი.

ჟურნალის ფურცვლით რომ ვიყავი გართული, მამაჩემი შემოვიდა, ხელები გაშალა და რატომღაც გაიციინა. გამოძინებული და კმაყოფილი ჩანდა, კაცო, რა დრო გასულაო, — თქვა და გატრიალდა. პირი სასწრაფოდ გაიპარსა და დაიბანა. გუშინ ფიდო კვლიაშვილმა დამპატიჟა და იქ მივდივარო, — მითხრა, თავისი საპარადო ფორმა კოხტად მოირგო, სარკის წინ ერთხელაც დაივარცხნა თმა და ორდენები და მეღლები შეათვალიერა.

როგორც იქნა, დავიმართოხელე, უკეთეს გარემოს ვერც ვინატრებდი. ბოლოსდაბოლოს გავუმხილე, რაც მაწუხებდა, ფრთხილად ვუთხარი, — თბილისში ანანოც ხომ არ წაგვეყვანა-მეთქი; დარწმუნებული ვიყავი, შემეკითხებოდა, — რატომ, რა მოსაზრებითო? მაგრამ მოსაზრების დასაბუთება არ მოუთხოვია, ეტყობა, ჩემი ნათქვამი, ბავშვის აკვიატებულ სურვილად, აჩემებად თუ კაპრიზად ჩათვალა და თვითონ სცადა დაესაბუთებინა, თუ რატომ იყო აუცილებელი ანანოს სოფელში დატოვება. რაც მითხრა, ის ანანოსაგან უკვე გაგონილი მქონდა და ვიცოდი. რა სათქმელია, სოფლად ფუძის მოშლა, კერის ჩაქრობა უგუნურება იქნებოდა, მაგრამ მე ხომ ანანოს სამუდამოდ წაყვანას არ ვთხოვდი, მინდოდა ცოტა ხნით, თუნდაც ორი-სამი თვით წამოსულიყო, — სხვა გარემოში მოხვედრი-

ლმა იქნებ გული გადააყოლოს-მეთქი. ბოლო დროს რაღაცნაირად ვიგრძენი, რომ ანანოს მარტო დატოვება არ შეიძლებოდა. მარტობა რას უქადდა, ამის წინასწარ განჭვრეტა მე არ შემეძლო, ოღონდ ეს კი იყო, ნათლად ვხედავდი და ვგრძნობდი: ახლა მე ვკირდებოდი ანანოს. ეს მინდოდა მამაჩემისათვის მეთქვა და ვერ გავუბედე, თუმცა მომაჩერდა, დამაცადა, კიდევ რაიმე სათქმელი ხომ არა აქვსო. მე იდიოტივით გავჩუმდი და ხმა ვერ ამოვიღე. მამამ მიყურა, მიყურა, მერმე ქუდი დაიხურა, გაღიმებულმა თითქოს ოღნავ მობოდიშებით მითხრა, — კვალიაშვილებთან წავედიო და წავიდა.

თვალი გავაყოლე, გამართული, მხედრული ნაბიჯით მიდიოდა, მოძრაობაში ძალა და შეუპოვრობა იგრძნობოდა...

თითქმის შუალაშემდეგ ველოდებოდი მე და ანანო მამაჩემის დაბრუნებას. ბარგი უკვე სახვალიოდ ჩალაგებული გვექონდა და ანანო, ეტყობა, მაინც ნერვიულობდა. ერთხელ წამოსცდა, — ეს კაცი რა გვექნა, ხომ არ დაავიწყდა, ხვალ რომ მიემგზავრებიო? მერმე თვითონვე დაიმშვიდა თავი, — რას იზამ, ეგრე ბღებო, მთელი სოფელი კვალიაშვილებთან იქნებოდა შეყრილი და მაგას ვინ გამოუშვებდაო.

დილით რომ გამეღვიძა, მამაჩემისა და ანანოს საუბარა შემომესმა. ჭერ, რამდენადაც მივხვდი, წუხანდელი ღამე მამას შინ არ უნდა ჰქონოდა გათეული, მერმე, ლაპარაკი გახურდა და ადვილად დავრწმუნდი ჩემი ვარაუდის სისწორეში, მამა სულ ახალი მოსული იყო.

— წუხელაც მაროსთან მიხვედი, არა? — ჰკითხა ბოლოს ანანომ.

— არა, კაცო, იქ რა ოხრობა მინდოდა? — მაშინვე იუარა მამამ და გაიცინა.

— მე რას მატყუებ, შენი ციცხვიც ვიცი და ჭამიცა.

— არა, არა-მეთქი — იცინოდა მამა.

— ნუ იცინი, სანდრო!

— ვთქვათ, ვიყავი, მერმე რა, რა მოხდა ასეთი?!

— არ გეყო? იმ ღამეს ქალებმა ისე გლანძღეს, იმდენი ლაფი გასხეს, პური რომ გჭეროდა, ძალღი არ გამოგართმევდა.

— ერთი მაგათი ვისი რა საქმეა, მე სად დავდივარ?!

— ეგრე რად ლაპარაკობ?

— მაშ რთგორ ვილაპარაკო? ძალით ხომ არ შევეუვარდი,



შაი ყველაფერი ნებაყოფლობით მოხდა... როცა ასე ხდება ხოლმე, ანანო, არავინ არ უნდა ჩაპყოს იქ ცხვირი, გაიგე? ეგეც არ იყოს, მე კაცი გამამტყუნებს ახლა? იცი, საიდან დაებრუნდი, იცი, სად ვიყავი, რა ჯოჯობით გავიარე? მე რომ მომყოლა, რა ცეცხლს გავუძელი და რა გადავიტანე, მაგათ თმა ყალყზე დაუდგებოდათ და თვალები ბუდიდან გადმოუცვივდებოდათ. ვაი, დედასა, არ მაპატიეს, არა? ომიდან ჩამოსვლა ვერ მოასწრო, დედაკაცის შეურაცხყოფა მოინდომაო... ვითომ დაავიწყდათ, ომამდეც რომ მანდ დავდიოდით?! ორ აღამიანს უნდა ერთმანეთის შეხვედრა და ხედებიან... არც იმასა ჰყავს ქმარი და არც მე მყავს ცოლი

— ეგ რა გამართლებაა, სანდრო?!

— მთავარი რა არის, იცი, ანანო? მე და ის დედაკაცი ერთმანეთს არ ვატყუებთ, შიგნით მეც მართალი ვარ იმასთან და ისიც მართალია ჩემთან.

— ერთმანეთთან იქნებ მართალიც იყოთ, ჯანდაბას თქვენი თავი! მაგრამ ბაღთან თუ ხარ მართალი?

— აბა, ბაღი?

— დაგავიწყდა, შვილი რომ გყავს?

— ხოო.

— შენა გგონია, თვალები აკრული აქვს და ყურები კი — ბამბით გამოტენილი? არაფერს ხედავს და არაფერი ესმის? იმ ღამეს ფეხაკრეფით რომ გაიპარე, გგონია, ვერ გაიგონა? გარეთ გამოვედი და ეგეც აივანზე დამხვდა...

— რაო, რა თქვა?

— რას იტყოდა? ხმა არ ამოუღია, მაგრამ მე ხომ დავატყე...

— ოზო რაღა ბაღია, კაცია და კაცურად გამიგებს!

ანანომ როგორც კი მახსენა, მამაჩემი გატყდა, უცებ დაპკარგა წელანდელი აგრესიულობა. თუმცა ერთი-ორჯერ კიდევ სცადა გაბრძოლება, მაგრამ ამჯერად თავს ისე უსუსურად იმართლებდა, რომ ფარ-ხმლის დაყრა ამჯობინა და საბოლოოდ უმცროს დას დანებდა. რა კარგად ვიცნობდი ანანოს, წინასწარვე ვგრძნობდი, ამდაგვარი რაღაც უსათუოდ მოხდებოდა. ეს საუბარი გასაფრთხილებლად ჩამოუგდო ძმას, შეახსენა შვილი, რომელიც ძალაუნიებურად თვალს აღევნებდა მამის ყოველ გადადგმულ ნაბიჯს, მტკივნეულად განიცდიდა ყველა-

ფერს, რასაც ხედავდა და ამჩნევდა. ანანო აჭარბებდა, რა თქმა უნდა, აჭარბებდა, მე შემაშფოთა იმ ღამით ატეხილმა აყალმაყალმა და მეშინოდა კიდევ არ განმეორებულისო, დანარჩენი ისე მტკივნეულად არ განმიცდია, როგორც ანანო ხატავდა, თუმცა გარკვეული კვალი დამიტოვა სულის სიღრმეში.

— კარგი, კარგი! — წამოიყვირა ბოლოს მამამ, — რაც მოხდა, მოხდა, ახლა ველარაფერს უშველი.

მათი ლაპარაკი ალბათ ამით არ დამთავრდებოდა, მაგრამ ამ დროს ვიღაცამ გარედან დაუძახა ანანოს. ბავშვების ხმა გარკვევით გავიგონე და ღია ფანჯრიდან ეზოსაც გავხედე და ჭიშკარსაც. ხმა ისმოდა, ხმის პატრონი კი არ ჩანდა.

— დეიდა ანანო!

ანანო აივანზე გამოვიდა და ჭიშკარს გასძახა:

— კარი ღიაა, შემოდი!

კარი ჭრილით გაიღო და ეზოში სამნი შემოლაგდნენ — ილოს ბალები, ჯერ გოგოები შემოვიდნენ, მერმე ბიჭმა შემოჰყო გაბურძენილი თავი, რატომღაც მიმოიხედა, ეზო გულდასმით მიმოათვალიერა და ისიც შემოვიდა, შუაში ჩაუდგა დებს.

— შეიძლება, დეიდა ანანო? — იკითხა უფროსმა.

ხმა ვიცანი, ეზოს გადაღმიდანაც ის ეძახდა ანანოს.

— აბა, ეგ რა საკითხავია?! მოდი, მოდი! — ანანომ კიბე ჩაირბინა და ბავშვებს მიეგება; შემდეგ უკნიდან მოუარა, სამივეს მხრებზე მოხვია ხელი და სახლისკენ წამოლალა.

კიბემდე მორჩილად მოჰყენენ, კიბესთან რომ დადგნენ, ფეხი ვერ მოაცვლევინა ანანომ, აივანზე ამოსვლა არ მოიწადინეს, რაღაცას ამბობდნენ და ფანჯრიდან გამომზიარალს არ მესმოდა.

ამ ბავშვების დანახვისას გაუგებარი, ჩემთვის აუხსნელი გრძნობა მეუფლებოდა, თითქოს მეზრალეობდნენ და ამავე დროს რაღაცნაირად ვეკრძალებოდი კიდევ, მოულოდნელად ისეთი პატივისცემით ვიმსჭვალეოდი, თითქოს ჩემზე უფროსები იყვნენ.

ანანომ ბავშვებს ძვრა ვერ უყო, ახლავო, — უთხრა, კიბე ამოირბინა და შინ შემოვიდა. მე სწრაფად ამოვიცვი შარვალი, ფანჯრიდან გადავძვერი და ბავშვებს მივეახლე. სამივენი თავდახრილები იდგნენ, ჩემთვის არ ამოუხედავთ, მე კი

ისე დავცქეროდი, როგორც ბუდიდან ჩამოცვივებულ ბარტყებს, რომელთა გადარჩენა თითქოს მხოლოდ მე შემეძლო. სამივეს თავზე და მხრებზე ფრთხილად გადავუსვი ხელი, ვერ ვიტყვი, მაინცდამაინც სიამოვნება მოჰგვარა-მეთქი ჩემმა მოფერებამ, უცნაურად შეიშმუშნენ და აიჯაგრნენ, იქნებ დაიმორცხვეს ან მიუცხოეს კიდევც. შესაძლებელია, ჩემს გამომეტყველებას შიშით და საქციელშიც გაქონა აშკარა სიბრალულმა და იუკადრისეს. მე კი მთელი არსებით მიხდოდა დავმახსოვრებოდი, დამახსოვრებოდათ ადამიანი, რომელიც კეთილად იყო მათდამი განწყობილი და თუ ცხოვრების გზაზე სადმე შეხვდებოდნენ, მისი იმედი უსათუოდ უნდა ჰქონოდათ, რადგან ეს ადამიანი ყოველთვის გაუწყვდიდა დახმარების ხელს. ჩემი პათეტიკური თავაზი, რაც სახის გამომეტყველებითა და ხელების მოძრაობით უნდა ეგრძნოთ, ბავშვებმა არ მიიღეს, იხტიბარი მაინც არ გავიტეხე და კიდევ ერთხელ მოვეუთათუნე მხრებზე ხელი.

სახლის ღია კარიდან ანანო გამოვიდა და მამაჩემი გამოიყვანა, თან ეუბნებოდა, — ილოს ბალები არიან, შენი ნახვა უნდათო... ილო ხომ კარგად განსოვსო?... როგორ არა, ძალიან კარგად მახსოვსო, — ხელები გაშალა მამამ და აივნოდან გადმოხედა ბავშვებს. სამთავემ დიდრონი წყლიანი თვალები მიაპყრეს სამხედრო ფორმაში გამოწყობილ მამაკაცს, რომელსაც მკერდზე ორდენები და მედლები უბრწყინავდა. იმედითა და სასოებით, ოდნავ შესამჩნევი, გოცებისა თუ ალტაცების ღიმილით შესცქეროდნენ, ისე იდგნენ, როგორც მხსნელის, როგორც ღმერთის, როგორც არამიწიერი არსების წინაშე.

— ძია სანდრო, — როდის-როდის გაბედა უფროსმა დამ, — დღეს მიემგზავრებით, არა?

— ჰო, შვილო, დღეს ვაპირებთ გამგზავრებას.

— ძია სანდრო... იქნებ...

— თქვი, შვილო, თქვი ნუ გეხათრება, მითხარი — გაამხნევა და შეაგულიანა მამამ.

— მამაჩემი ხომ არ შეგხვედრიათ... ფრონტზე... იქნებ შემთხვევით სადმე შეხვდით... ძია სანდრო...

მძიმე ღუმილი ჩამოვარდა. ამ ღუმელს ველარ გავუძელი, სწრაფად ავირბინე კიბე და შინ შევევარდი. ჯიბეებში ხელებ-

ჩაწყობილი ნერვიულად ვწრიალებდი, გული ყელში მქონდა მობჯენილი და კედლიდან კედელს ვაწყდებოდი. მამაჩემის დაბნეული ლაპარაკი მესმოდა, ნაწყვეტ-ნაწყვეტ ისროდა ჩსიტყვებს, ბავშვებს რაღაცას უხსნიდა, განუმარტავდა... შესაძლოა, ანუგეშებდა კიდევ ისევე, როგორც სხვები დააიმედა, — დღეს თუ არა, ხვალ უსათუოდ ჩამოვაო. რა უნდა ეთქვა ბავშვებისათვის? ალბათ ეუბნებოდა იმას, რაც ახლა მათ ყველაზე მეტად სჭირდებოდათ.

უცებ ჭურჭლის კარადაზე შემოდებული ჩასაბერი ჰარმონიკა დავინახე და, მიუხედავად იმისა, რომ მამაჩემის ნაჩუქარი იყო, დაუფიქრებლად გადავწყვიტე ილოს ბიჭისათვის მიმეცა. ჰარმონიკას ხელი დავავლე და სასწრაფოდ გამოვედი გარეთ, — ბავშვებმა არ გამასწრონ-მეთქი, რა თქმა უნდა, იმისათვის უფრო უპრიანი იყო, ვიდრე ჩემთვის. მამაჩემს ბავშვებთან საუბარი უკვე მოეთავებინა და ახლა ანანო ტრიალებდა მათ შორის, შინ ეპატიებოდა, — ერთად ვისაუზმოთო, მაგრამ ბავშვები მაგარზე იდგნენ. მე ჩავიბრინე კიბე და ნიკელის პრილა ინსტრუმენტი ილოს ბიჭს გავუწოდე, — აჰა, გამომართვი-მეთქი. — ბიჭმა ხელები უკან წაიღო და ამომხედა. გამომართვი-მეთქი! — გავუმეორე. ბიჭმა თავი გააქნია, — არაო, თან დებს გადახედა.

— იცი, ეს რა არის? — ვკითხე.

— ვიცი! — მიპასუხა.

— გქონია ოდესმე?

— არა!

— მაშ, თუ არა გქონია, აიღე!

ბიჭმა კიდევ ერთხელ გადახედა დებს და გამომართვა, როგორც ჩანს, ცთუნებას ვერ გაუძლო, თანაც მე საკმაოდ კატეგორიულად ვუთხარი, — აიღე-მეთქი! სხვა გზა არ ჰქონდა, უნდა დამორჩილებოდა ჩემს ნებას. უფროსმა დამ ყველას მადლობა გადაგვიხადა და სამივენი უხმოდ გატრიალდნენ, თითო-თითოდ გაძვრნენ ოდნავ გამოღებულ ჭიშკარში.

— ამ ბავშვებს დედა არა ჰყავთ, — იკითხა მამაჩემმა, — რაღა ბავშვები გამოგზავნა ამბის გასაგებად? კინალამ მოკვდი კაცი!

— დავრდომილია, გარეთ არ გამოდის, — უპასუხა ანანომ.

მე კიშვართან მივედი და ორღობეში მიმავალ ბავშვებს გავხედე. რატომღაც მეგონა, პატარა ბიჭი უკან მოიხედავდა და კმაყოფილი გაიღიმებდა; შევეციდი, ბიჭს უკან მოხედვა არ უცდია. ისიც მეგონა, ეზოდან გასვლისთანავე პარმონიკას გამოართმევდნენ და ცნობისმოყვარეობით დაათვალიერებდნენ. აქაც მოვეტყუედი. ბავშვები თავჩალუნულები მიაბიჯებდნენ, წინ—უფროსი, მერმე — შუათანა, სულ უკან ბიჭი მიჩანჩალებდა, თმაგაბურძგნილი, ბუილა, ჩემი პარმონიკა ისევ მარჯვენა ხელში ეჭირა, ხელს რომ მიიქნევდა, მზის სხივზე დროდადრო გაიელვებდა კრიალა ლითონი. გამიკვირდა და ცოტათი გულიც კი დაჰწყდა, ტუჩთან რომ არ მიიტანა და არ ჩაჰბერა. გაეგო მაინც, რა ხმას გამოსცემდა ეს მოელვარე, საოცრად ლამაზი საკრავი.

შუადღეს უკვე ვიდექით სოფლის ცენტრში, სადაც ჩვენს გასაცილებლად უამრავი ხალხი მოგროვდა, თითქმის მთელმა სოფელმა მოიყარა თავი. მამა, ანანოს შენიშვნების შემდეგ, ცოტა ვერ იყო გუნებაზე, ისე კი ცდილობდა, ეს უგუნებობა არ შეემჩნია, თავი მხნედ ეჭირა, იცინოდა, ხმამაღლა ლაპარაკობდა, ვიღაც-ვიღაცებს ეხვეოდა და მხარზე ურტყამდა ხელს, მაგრამ ჩემდამი მოქცეული განსაკუთრებული ყურადღება, მზრუნველი გამოხედვა მაინც ამხელდა. სულ მეძებდა, მკითხულობდა, იქვე ახლო მდგარს რომ დამინახავდა, თითქოს მშვიდდებოდა. მამაჩემის ასეთი დაძაბულობა არ მსიამოვნებდა, ეწუხდი, — ნეტავი ანანო სულაც გაჩუმებულიყო, არაფერი ეთქვა, უკეთესი იქნებოდა-მეთქი. ამას ანანოც გრძნობდა და ერთთავად ჩემს გარშემო ტრიალებდა, მეც მხოლოდ ანანოს ახლოს მინდოდა ყოფნა. ახალა-ლა, გამგზავრების წინ შევაჩინე, როგორღაც არაბუნებრივად გამხდარი იყო, დაღეუული, თვალის უბეები და ტუჩები ჩალურჯებოდა... მოულოდნელად მკრეხელურმა ფიქრმა გამიელვა და შემადრწუნა, — ვაითუ ანანოს უკანასკნელად ვხედავ-მეთქი და შემკრთალმა უნებურად თვალეში ჩავხედე, ანანომ გამიღიმა და თავი დამიქნია, თითქოს ნაფიქრალი გაიგონა და დასტური მომცა. უეცარმა ელდამ ოღალ გამოყოფა შუბლზე, სახეზე, მთელ სხეულზე... ოფლი წურწურით დამდიოდა, ანანომ მკლავზე ხელი წამავლო და მკითხა:

— რა მოვივიდა, ოზო?

— არაფერი, — სწრაფად ვუპასუხე, — ცხელა.

— ძალიან ცხელა, — დამეთანხმა ანანო, — ჰაერიც დაიხუთა.

ოფლი რომ შემაშრა, ჩემი მკრეხელური გაფიქრების გამოსასწორებლად ანანოს გავუღიმე და მოვეხვიე.

— ნეტავი შენც მოდიოდე, — ვუთხარი.

— ნუ გეშინია... ყველაფერი რიგზე იქნება! ოლონდ თქვენ მიხედვით ერთმანეთს, შენ და სანდრომ.

— ცოტა ხნით მაინც წამოსულიყავი.

ანანომ ორივე ხელი შემავლო სახეზე, ასე მიყურა, ერთ ხანს, მერმე თვალებში მაკოცა და „ლილეინკისაკენ“ წამიყვანა.

ჩვენი გამგზავრების დრო დამდგარიყო.

ხალხის ტევრში გავიკვლიე გზა და ამ ფუსფუსსა და ორ-ომტრიალში, გზიდან ოდნავ მოშორებით, თავიანთ ძველ ადგილზე ილოს ბაღებს მოვკარი თვალი, განმარტოებით იდგნენ და აკვირდებოდნენ ყველაფერს, რაც ირგვლივ ხდებოდა. ბიჭს ჩემი ნაჩუქარი ჰარმონია ისე, როგორც გამომართვა, მარჯვენა ხელში ეჭირა.

ჩვენ უკვე დავსხედით „ლილეინკაზე“, რომელზეც ხუთი მგზავრი ეტეოდა. ყველაზე „საპატიოდ“ კოფოზე, მეეტლის გვერდით ჯდომა ითვლებოდა. დანარჩენები ოთხთვალაზე წყვილ-წყვილად, ზურგშექცევით, მარჯვნივ და მარცხნივ სხდებოდნენ. მამაჩემს, რასაკვირველია, კოფო შესთავაზეს, უარი თქვა, — ჩემ შვილთან დავჯდები, ასე მიარჩევნიაო. მეეტლემ ცხენებს შეუძახა, მე ანანოს გავუღიმე, ხელი დავუქნიე და ჩვენი „ეკიპაჟი“ თელავის რკინიგზის სადგურისაკენ ჩაქჩაქით დაიძრა.

ასე დავტოვე სოფელი.

უკან რჩებოდა კრამიტით დახურული ქვითყირის სახლები, ორლობეები, ხილით დახუნძლული ბაღები, ლურჯი ზვრები, მწიფე ყანები, გალავანმორღვეული თეთრი, პატარა ეკლესია და, რაც მთავარია, იქ რჩებოდა ანანო, რომლის მსგავსი არც მანამდე და არც შემდეგ, არავინ შემხვედრია. როგორც ჩანს, ადამიანები უმადურებად გაგვაჩინა ღმერთმა, ანდა იმავე ღმერთმა მადლიერებას გარკვეულად დააკლო საფანელი... მე ოთხთვალაზე ვზივარ და მადლიერების გრძნობით გამსკვალუ-

ლი ანანოზე ვფიქრობ, მებრალება და ვწუხვარ, რომ მარტოდ-მარტო დარჩა და ახლო-მახლო კაცი არა ჰყავს გამგები. ალბათ კარგია, მოყვასურია ეს ფიქრიც, ეს წუხილიც, მაგრამ მაინც ხომ ვერ შეედრება იგი იმ ზრუნვასა და სიყვარულის ენერგიას, რომელიც ანანომ ოთხი წლის მანძილზე ჩემთვის და ჩემს გამო დახარჯა?.. თუმცა იქნება არცაა საჭირო, ასე ცი-და-ციდა და მისხალ-მისხალ გავზომოთ და ავწონოთ ჭეშმა-რიტი გრძნობები, რადგან ქვეყანაზე სუფთა სახითაც არსებობს უმადურება — ცივი, უგულო, მშრალი, გამოფიტული, რომელსაც მესხიერება დაბინდული და გამოფიტული აქვს...

დამწიფებული ყანის გასწვრივ მიდიოდა ჩვენი ოთხთვალა, ეს სწორედ ის ადგილია, საიდანაც ანანომ ლტოლვილი მომაბრუნა. მაშინ აქ ნახნავეები იყო, მე დაუსრულებლად მივიდიოდი ნახნავეებში და წინ ყვავების გუნდი ყრანტალით ამიფრინდა. უცებ შევეკრთი, რადგან ყვავების ჩხავილი ცუდად მენიშნა, იმდენად ცუდად, რომ თავის თავსაც ვერ გავუმხილე. ამ გზით დაბრუნდით მე და ანანო სოფელში, ის სამიოდე ნაბიჯით მიდიოდა წინ და მე თოკგამობმულ ხბოსავით უკან მივყვებოდი, ეს გზაც დაუსრულებელი მეჩვენებოდა.

ახლა გადავივლით ბორცვს და ალაზნის ველი გამოჩნდება, ვარდისფერ, გამკვირვალე ნისლში დაძირული, ხოლო იმ მთართოლვარე ნისლის მიღმა, როგორც სიზმარში, მოულოდნელად გამოგვეცხადება კავკასიონის დათოვლილი მწვერვალები. ის არაფერს ნიშნავს, რომ იცი და წინასწარ ელოდები მათ გამოჩენას, მაინც მოულოდნელად გამოგვეცხადება...

— ოზო, — მხარი გამკრა მამაჩემმა. — ერთი რამ უნდა გითხრა და, თუ ღმერთი გწამს, კარგად გამიგე.

მივხედე და უსიტყვოდ ვანიშნე, — გისმენ-მეთქი.

— მაროს... მარო მასწავლებლის თხოვნა უნდა ვადმოგ-ცე. ხომ იცი, ქალაქი მაინც ქალაქია, ის გოგო პირველად არის ქალაქში, თანაც მარტოა და შეიძლება გაუჭირდეს კიდევ. შეიძლება კი არა, ნამდვილად გაუჭირდება. ყურადღება მიმიქციეო, — გთხოვა, მისამართი მომცა, კიდევ რალაც-რალაცეები გამომატანა... ანანოსთვის არ მითქვამს. რალაცაზე გამიბრაზდა და... შენც იცი ქალების ამბავი...

— კი, ვიცი.

— ერთი სიტყვით მაროს... ჰო, მარო მასწავლებელს შენი

დიდი იმედი აქვს, — ოთხი წელი ერთ მერხზე ისხდნენო, მეც გობრობდნენო.

— მარო მასწავლებელს რომც არ დაებარებინა, მე მაინც მივხედავდი.

— ჰო, ეგრე, ეგრე... ისე, ამბობენ, ნიკიერი გოგოაო.

— მე მგონი... კი, ნიკიერია.

— ალბათ მოხვდება უმაღლესში.

— ეტყობა, მოხვდა, რახან სოფელში არ დაბრუნდა. თვითონ მითხრა, იმ ინსტიტუტში ერთი თვით ადრე იწყება გამოცდებიო. ალბათ, ჩააბარა.

— ჰო, ეგრე, ეგრე, შენი ჰირიმე!

## 10

ყველა გადაუდებელი საქმე მოგვარდა: ბინა დავასუფთავეთ და დავალაგეთ, პურისა და სურსათის ბარათები ავიღეთ და ინდუსტრიულ ინსტიტუტში საბუთები შევიტანეთ. მანამდე, რასაკვირველია, საბურთალოს ბაზარში ჩემთვის ერთი ხელი საზაფხულო ტანსაცმელი (შარვალი, პერანგი, ფეხსაცმლები) შევიძინეთ. მამას ათას ადგილზე შესთავაზეს სამსახური, მთელი კვირა ორკოფობდა, ყოყმანობდა, ფიქრობდა, დიდი არჩევანი ჰქონდა და ალბათ საბოლოოდ ამიტომაც ვერ გადაწყვიტა, სად დაეწყო მუშაობა.

საბურთალოს ბაზარში ნაყიდი ტანსაცმლით რომ გამომაწყო, საკუჭნაოდან საკმაოდ მოზრდილი და მძიმე, ბიაზგადაკრული კალათი გამოათრია და მითხრა, — ეს ზიზის მიუტანეო. ცოტა მეუხერხულა ამხელა კალათით ქუჩაში გასვლა და ფრთხილად შევაპარე, — ჩემოდანში ხომ არ გადაგეწყო, სატარებლად ის უფრო მოსახერხებელია-მეთქი. თუ ღმერთი გწამს, სხვის კალათაში ფათურს ნუ დამაწყებინებო, მიპასუხა, — არა უშავს ჩინ-მედლებს არავინ ჩამოგართმევსო. ანანოს როგორ აუხვიე თვალები, ეს როგორ გამოაპარე-მეთქი? — ვკითხე. იცის ბიჭმაო, — თვალი ეშმაკურად ჩამიკრა. მეც გამეღიმა, ოღონდ მამაჩემის გულუბრყვილობაზე, დარწმუნებული იყო, — ამხელა კალათი სოფლიდან ისე წამოვიღე, ანანოს არაფერი გაუგიაო.

თბილისში დაბრუნება უფრო სხვანაირად მქონდა წარმო-



დგენილი, ვითომ ტყვეობიდან დახსნილის სიხარული უნდა განმეცადა. გამომგზავრებამდე რამდენიმე თვით ადრე უკვე სხვანაირად ვფიქრობდი, მაგრამ მაინც არ მეგონა, თუ აქ ჩამოსულს ყოველდღიური, თითქმის უსაგნო, წერილმანი ფუს-ფუსი ჩამითრევდა.

როგორ ვიფიქრებდი, ამდენი ხნის უნახავ სკოლის ამხანაგებს ვერ შევხვდებოდი. მეგონა, აღტაცებით შევეგებებოდი ერთმანეთს, თბილისის ქუჩებში აღმა-დაღმა ვივლიდით, სათქმელს ვიტყოდით, შთაბეჭდილებებს გავუზიარებდით, დროს გავატარებდით. დრო კი ისე გავიდა, ძველ ამხანაგთაგან არავინ მომინახულებია... არცერთის ასავალ-დასავალი არ ვიცოდი, როგორ ცხოვრობდნენ, როგორ დაამთავრეს სკოლა, სად აპირებდნენ სწავლის გაგრძელებას. პირველ ხანებში სოფლიდან მოკლე-მოკლე წერილებს ვუგზავნიდი, პასუხი რომ ვერ მივიღე, მეც ხელი ჩავიქნიე, რვეულის სუფთა ფურცლებს ისგადაც ვერ ვშოულობ-მეთქი. სამაგიეროდ თბილისში დაბრუნებისას მქონდა მათთან სასიხარულო შეხვედრის იმედი.

მძიმე კალათით „ხელდამშვენებული“ გავედი ეზოდან და გეზი პლატონის ქუჩისაკენ ავიღე, სადაც ზიზი დაქირავებულ ბინაში ცხოვრობდა თურმე. ეს ქუჩა კარგად მახსოვდა, ჩვენს უბანში იწყებოდა და კარლ მარქსის მოედანზე ვადიოდა. ამაზე ვიწრო და მოკლე ქუჩა თბილისში ალბათ იშვიათად მოიძებნებოდა. კორადორივით იყო და ხანდახან, როცა გზის შემოკლება გვინდოდა, უბნელი ბიჭები ამ ქუჩით დავდიოდით ხოლმე.

სალამოს ჩრდილი ეფინა ჩვენი ქუჩის ორივე ტროტუარს, მზის სხივები მხოლოდ მეორე სართულის ფანჯრებს აელვარებდა, ისიც ზედა მინებს. ნაბიჯ-ნაბიჯ მივიწვედი წინ, ათიოდე მეტრს გავივლიდი და შევისვენებდი, კალათმა მკლავები დამაწყვიტა, ხელისგულებზე ბებერები გამიჩინა. მაინც რას უგზავნიდა ამისთანას, მხოლოდ ტრაქტორის ნაწილები შეიძლებოდა ყოფილიყო ასეთი მძიმე.

ქუჩის კუთხეს მივადექი, შენობის ამ კუთხიდან ქუჩა ფართოვდებოდა, პატარა მოედნის შთაბეჭდილებას ჰქმნიდა. ომამდე აქეთ და იქით დუქნები და სახელოსნოები იყო ჩარიგებულნი, იმათგან მხოლოდ საპარიკმახერო დაიტოვა ცხოვრებამ. საპარიკმახეროს რომ გასცდებოდი, ქართული პური ცხებო-

და, მოპირდაპირე მხარეს ირანული ლავაში, იქვე—სამქედლო, ცოტას გაივლიდი და — სამლებრო... პარმენას დუქანი ანუ სახარჩოე... ეკლესიის ეზოსთან, სარდაფში მოხუც მხატვარს სახელოსნო ჰქონდა გახსნილი, ამ მხატვრის გვარი გვიან შევიტყე, იგი ზაზიაშვილი აღმოჩნდა, გიგო გაბაშვილის სკოლის მხატვარი, რომელიც ჩვენს უბანში არ აჭაქანებდა ფიროსმანს, — ხატვა არ იციო, და თვითონ ხატავდა აბრებს, ჩვენი უბნის პატარა ეკლესიაც ალაგ-ალაგ მისი მოხატული იყო...

საპარიკმახეროს წინ ჭარისკაცების ჯგუფი დავინახე, ზოგი ტროტუარის კიდეზე ოჯდა, ზოგი ფენზე მდგარი საუბრობდა. ნელ-ნელა, სვენებ-სვენებით, მივუახლოვდი და, ცოტა არ იყოს, მათი ჩაცმულობა მეუცნაურა. ახლოს მისულმა გავარკვიე, თურმე ტყვეები ყოფილან. ტყვეებს პირველად ვხედავდი, კალათი მაშინვე ძირს დავდგი და მივაჩერდი. აქ სხვებიც დამხვდნენ ჩემსავით ცნობისმოყვარენი, იდგნენ და დიდი ყულისყურით ათვალეერებდნენ უცხო ადამიანებს, ბუობდნენ, კამათობდნენ, ათასგვარ ვარაუდს გამოთქვამდნენ. გამიკვირდა, ტყვეებს სუფთად და კონტად ეცვათ, თავიც ღირსეულად ეჭირათ, იმდენად ღირსეულად, რომ ზოგი ცნობისმოყვარე გაღიზიანებას დაუფარავად გამოხატავდა, — თუ ტყვეები არიან, ტყვეებს უნდა ჰგავდნენ, დაგავიწყდათ, ჩვენებს რა დღეს აყრიდნენო? საწინააღმდეგო აზრს უფრო მეტი მომხრე გამოუჩნდა და საბოლოოდ დადგინდა, — ტყვეც ადამიანია და ადამიანურად უნდა მოვეპყრათო. ასე იყო თუ ისე, ტყვეებს ქართული არ ესმოდათ და ალბათ არც აინტერესებდათ, თითო-თითოდ შედიოდნენ საპარიკმახეროში და იქიდან გაკრეჭილები და გაპარსულები გამოდიოდნენ. ვიღაცამ თქვა, ესენი გერმანელები არ უნდა იყვნენ, სხვა ენაზე ლაპარაკობენო, მეც ამის შემდეგ მივაყურე და სოფლის სკოლაში ნასწავლი გერმანულით მივხვდი, სხვა ენით მეტყველებდნენ, ამას ახლავე დაგიდგენთო, — თქვა ერთმა იმათგანმა, რომელიც ტყვეებისათვის განსაკუთრებულ რეჟიმს მოითხოვდა. ეტყობა, შეხედულება აქვე შეეცვალა, რადგან ტყვეებს გაღიმებული მიეახლა და პაპიროსიცი შეესთავაზა, რაზეც იმათ უარი არ უთქვამთ. თვითმარქვია ბარლამენტიორმა ქესტ-მიმიკის ენითა და სახელდახელოდ მოგონილი ესპერანტოთი დაადგინა, რომ ტყვეები მაღიარები, ანუ

უნგრელები იყვნენ. ამ ცნობამ გარკვეული შთაბეჭდილება მოახდინა, როგორც ჩანს, გუშინდელ მტრებთან — გერმანელებთან ურთიერთობას რატომღაც ერიდებოდნენ და რახან ესენი უნგრელები აღმოჩნდნენ, თითქოს ტვირთი მოეხსნათ, გამხიარულდნენ და აყაყანდნენ, ერთმანეთში აირივნენ. მე ამიტაცა საერთო განწყობილებამ, მინდოდა ჩავრეულიყავი, რაღაც მეტქვა, მაგრამ კალათზე ვიყავი გამობმული და აღარც მოვლენების შემდგომი განვითარებისათვის თვალის მიდევნება დამცალდა, რადგან ნაცნობი ხმა გავიგონე.

— ოხო! — ეს იყო გაკვირვებისა და აღტაცების შეძახილი, — მე კი შენთან მოვდიოდი!

ზიზი გადამეხვია და გადამკოცნა, გახარებული შემომციცინებდა. მეც იმდენად გამიხარდა, ენა დამება და სიტყვის თქმა ვერ მოვახერხე. სულ ის მელაპარაკებოდა, — შორიდანვე გიცანი, მაგრამ თვალებს არ დაეუჭერეო... მამაშენის დაბრუნება დედამ შემატყობინა და დღე-დღეზე ველოდებოდი თბილისში თქვენს ჩამოსვლასო... უცებ იმდენი რამ დამაყარა, რომ მათი დამახსოვრება, თავმოყრა და დალაგება გამიჭირდებოდა, ამიტომ გადიმებული ვუცქერდი და აღარ ვუსმენდი. ბოლოს მოვიფიქრე და ვუთხარი, — აქაურობას გავეცალოთ-მეთქი. ცნობისმოყვარეთა რიგები თანდათან შევსებულყო და უნგრელებსა და ქართველებს შორის ხელჩართული საუბარი იყო გაჩაღებული. ზიზიმ ახლალა შენიშნა ტყვეები და თქვა, — ესენი უნგრელები არიანო. აქამდე სად იყავი, — ვუთხარი ხუმრობანარევი გაკვირვებით, — ამათი ეროვნება ძლივს დავადგინეთ-მეთქი.

ორივემ შეთანხმებულებივით წავევლეთ კალათს აქეთ-იქიდან ხელი და პლატონის ქუჩისაკენ გავეშურეთ. ამ ორი თვის მანძილზე საკმაოდ გამოცვლილიყო. ჭერ ვერ მივხვდი ამ ცვლილების მიზეზს, მაგრამ გზაში მივაქციე ყურადღება, რომ თმა მოკლედ შეეკრიჭა და ჩალისფრად გადაეღება, წარბები ამოექნა და თვალებს ზემოთ ახალ მთვარესავით მორკალული ორი წვრილი ზოლი დაეტოვებინა. ამასთანავე, გაფერმკრთალებული და გამხდარი მეჩვენა, შესაძლოა, ამ შთაბეჭდილებას სრული, მაღალმხრებიანი კაბა და ხის სქელ ლანჩიანი ფეხსაცმელი ქმნიდა. ერთადერთი, რაც შეენარჩუნებინა, ეს იყო შინდამზადებული ნელსაცხებლის მძაფრი სურნელი.

როგორც კი ზიზი დავინახე, რალაცნაირად მივხვდი, გამოცდები არ ჰქონდა ჩაბარებულნი...

ხელიხელჩაკიდებულებივით მივდიოდით, ტვირთი საგრძნობლად შემსუბუქდა, აღარც წვივებზე მებახუნებოდა და თავისუფლად მივაბიჯებდი. ზიზისთან ლაპარაკით გართულმა წინიდან მომავალი სკოლის ამხანაგი, ვიცანი, დურმიშხან წილოსანი, გამიხარდა, ვიფიქრე, — ისიც მიცნობს და მივესალმები-მეთქი, მაგრამ ისე ჩამიარა, არც შემოუხედავს, ალბათ ვერ მიცნო, ან მიცნო და თვალი ამარიდა... თუმცა თვალი რატომ უნდა აერიდებინა?

— იცი, როგორ მომენატრე, — მეუბნებოდა ზიზი, — სხვებიც, განსაკუთრებით — ანანო.

— მეც მომენატრე, ალბათ ანანოსაც ენატრები.

— მამა როგორ არის, ხომ საღსალამათი დაბრუნდა?

— საღსალამათი! (როგორ ვერ ვიტან ამ სიტყვას!).

— ეჰ, — ამოიოხრა ზიზიმ.

— რა იყო? — ვკითხე.

— არც რა.

— რას ნიშნავს „არც რა“? — ვითომ ვერ გავიგე რას მეუბნებოდა.

— ვერ ჩავაბარე... ჩავიჭერი.

— მაინც რა გითხრეს?

— რას შეტყობდნენ, მერმის მოდიო... ჩემი ბრალია, გამოცდებზე ეგრე გასვლა იქნებოდა? ხეირიანად ისიც არ ვიცოდი, რა უნდა ჩამეხარებინა და როგორ უნდა ჩამეხარებინა.

— სოფელში თუ შეატყობინე?

— არა.

— რატომ?

— რა ვქნა, არ ვიცი, დედას თუ გავაგებინე წამიყვანს, თუ წამიყვანა, როგორღა მოვემზადო.

— იქვე აპირებ ჩაბარებას?

— მაშ!

— იქნებ სხვაგან გეცადა...

— ათი წელი რომ დამჰკირდეს, მაინც იქ ჩავაბარებ.

— დედაშენს რა უთხარი, — ჩავირიცხეო?

— თავისუფალ მსმენელად ჩამრიცხეს-მეთქი, — ასე მივწერე... აქ გოგო-ბიჭები გავიცანი, კარგები არიან... ზოგჯერ

ლექციებსაც დავესწრები... მოგინერხებთო, — მითხრეს. სხვანაირად არაფერი გამოვა, ოზო, სოფელში რომ დავბრუნდე, სულ გამოვეყრუდები.

— როგორ გითხრა, ალბათ უკეთესი იქნება, აქ რომ დარჩე.

— ბოლოს და ბოლოს, თუ გამიჭირდა, ვიმუშავები წვეალ და ქარხანაში დავიწყებ მუშაობას, პურის წიგნაკსაც მომცემენ და ქალაქშიც ჩამწერენ! ეგრე კი არ არის საქმე?!

— ნება შენია, ზიზი. მე მხოლოდ ერთი მინდა... მინდა შენ იყო კარგად.

— შემოდგომაზე სეზონი გაიხსნება, თეატრებში ვივლი, ყველა სპექტაკლს ვნახავ... ცოტა გამოცდილება რომ მქონოდა, ნაღდად ჩავაბარებდი. ჩემსავით ერთმაც ვერ იმღერა, ვერც იცეკვა... ჩემისთანა სმენა და რიტმის გრძნობა არცერთს არ ჰქონდა.

მოწითალო-მოყავისფროდ შეღებილ სადარბაზოსთან შემაჩერა, — აქ ვცხოვრობო, თავისუფალი ხელით მიაწვა კარს და შეაღო. აგურის ყრუ კედელში ჩასმული კარი ძალიან ჰგავდა სადარბაზო შესასვლელს და ასეც მეგონა, — შენობაში შევდივართ-მეთქი, მაგრამ ღია კარს იქით სუფთა, მოვლილი თბილისური ეზო დავინახე, რიკულებიანი აივნებითა და შუშაბანდებით შემოზღუდული. ქუჩა გაცილებით მაღლა გადიოდა, ეზოში ჩასასვლელად ხუთი-ექვსი საფეხური უნდა ჩაგეარა.

— ძალიან ცხელა, სული მეხუთება! თქვა ზიზიმ და შუბლზე ცხვირსახოცი თეიმშრალა ოფლი, მერმე თითქოს ჩურჩულით გამაფრთხილა, — ჩემი დედაბერი ცოტა უცნაური ქალია და არაფერი გაგიკვირდეს.

კალათს ორივე ხელი წავავლე, ავწიე და ეგრევე ციმციმ ჩავარბენინე ეზოში. კვირა სადამო იყო, ეზოშიც და ორივე სართულის აივნებზე მეზობლები იყვნენ გამოფენილნი. ამიტომ მათ წინაშე ჩემი კალათიანად გამოჩენა მნიშვნელოვან მოვლენად უნდა ჩათვლილიყო და ჩაითვალა კიდევ, პატარა ჩოჩქოლი ატყდა, — ეს კალათი ნეტა ვის ეკუთვნისო, მაგრამ ზიზიმ სწრაფად ჩამოათავა კიბე და ყველაფერი ნათელი შეიქნა. იქვე, ხელმარჯვნივ, შუშაბანდში შემოძღვა.

შესვლისთანავე დავდე კალათი, წინასწარ დაშინებულმა,

დამშვიდობება და გამობრუნება დავაპირე, — დედაბერს არ შევეფეთო-მეთქი. ჯერ თვითონ ზიზი გადამეღობა, მერმე ოთახიდან გამოვიდა მოხუცი ქალი, რომელიც ზიზიმ წელან აგდებულად ახსენა. ეს ქალი წიგნებში წაკითხულ ცხოვრებისაგან გაბოროტებულ, ხარბ დედაბრად წარმოვიდგინე, ოთახიდან კი სასიამოვნო შესახედაობის მოხუცი ქალბატონი გამობრძანდა, თხელი, მალალი, ქალარა. სახის ნაკეთები სწორი და დახვეწილი ჰქონდა, თუმცა ღრმად დანაოჭებული. ოქროს პენსე ეკეთა. გამოსვლისთანავე, რა ხდებო, — იკითხა და, მე რომ დამინახა, თავაზიანად მომესალმა.

ბოლომდე მაინც არ ვენდე ჩემს პირველ, უშუალო შთაბეჭდილებას, თუმცა ოთახშიც შემიპატიჟა და დამსვა სასაღილო მაგიდასთანაც, რომელსაც გუმბათივით ეხურა ჰერინდანი ჩამოშვებული, მდელოსფრად განათებული დიდი აბაჟური. დადარაჭებული ვიჯექი და ველოდებოდი, ან ახლა გაამჟღავნებს და გაამხელს, ან ახლა-მეთქი თავის უცნაურობას. ზიზისი მჭეროდა და ვენდობოდი კიდევ, მაგრამ მოხუცი ქალბატონი ამ საღამოს, მგონი, არ აპირებდა თავის უცნაურობათა გამომზეურებას.

ძალა არაგინ დამატანა და არც მე დავიდე თავპატიჟი, სიამოვნებით დავრჩი ერთი ფინჯანი ჩაის დასალევად. დავრჩი, რადგან იქაურობა მომეწონა, მართალი გითხრათ, ასეთი მყუდრო გარემო ჯერ არ მენახა და ზიზისი ცოტა შემშურდა კიდევ.

მაგიდაც, ნოზგადაფარებული ქართული ტახტიც, კარადებიც, წიგნის თაროებიც, საწოლიც, თეჯირიც ოთახში ისე იყო განლაგებული, რომ ავეჯის სიქარბე არ იგრძნობოდა. განსაკუთრებით ერთი კუთხე მომეწონა; წიგნების თაროებთან დაბალი მრგვალი მაგიდა და სავარძელი.

უხმოდ შევექცეოდით ყურძნის მურაბიან ჩაის, ყურძნის მურაბა მეცნო, ზიზის დედის ნახელავსა ჰგავდა. შაქარი რომ არ იშოვებოდა, ბადავით ხარშავდა და მურაბის მაგვარი რაღაც გამოუდიოდა.

ოთახის ორივე ფანჯარა ღია იყო, მაგრამ გარეთ უკვე სიბნელე ჩამოწოლილიყო და არაფერი ჩანდა, არც ხმაური ისმოდა.

ღიასახლისმა ჩაი რომ დალია, ერთი ღერი პაპიროსი და საფერფლე მოიტანა, პაპიროსს ცეცხლი მოუკიდა და ბოლი

ბოლქვებად გაუშვა ღია ფანჯრებისაკენ. მერმე ნელ-ნელა შეეყვით. საუბარს, დაინტერესდა, ვინ ვიყავი, სად ვსწავლობდი. როცა ვუთხარი, თბილისელი ვარ, ამ უბნელი, აქ დავიბადე-მეთქი, სოფელში ყოფნას თავისი კვალი დაუტყვა, ჯანმრთელად და მხნედ გამოიყურებო, — მითხრა.

დიდხანს აღარ დავყოვნდი, კეთილი მასპინძლობისთვის მადლობა გადავუხადე მოხუც ქალბატონს და წამოვედი. ზიზიმ გამომაცილა.

— რას ერჩი? — გამოსვლისთანავე ვკითხე.

— არაფერს, გღია თავისთვის და ეგდოს!

— მოიცა, ეგრე როგორ იქნება?!

— მაგას შენ ვერ გაიგებ, ეგ რომ გაიგო, ქალი უნდა იყო!

— მე მგონი, შენ ცოტას ამეტებ.

— აბა, მიდი და იმ დედაბერს მთელი დღე მიუჩექი! — უკმაყოფილოდ წამოიძახა ზიზიმ, — ათ საათზე წვება და იძინებს, დილის შვიდ საათზე უკვე ფეხზეა და გადი-გამოდის.

— ეგრე არ იყო იქაც? — სოფელი ვიგულისხმე.

— იქ საქმე გვექონდა, აქ რა ამაყენებს შვიდ საათზე?!

ლაპარაკ-ლაპარაკით მივედით საპარკმახერომდე, სადაც წელან უნგრელები ისხდნენ ტროტუარზე. ახლა მე გაგაცილებ-მეთქი, — ვუთხარი და უკან მოვბრუნდით. ახალი სიტყვების, გამოთქმების და მოძრაობის ათვისება მოესწრო უკვე, კი, საგრძნობლად იყო შეცვლილი, ისიც ვიფიქრე, — ასეთი მოუსვენარი ბუნების გოგოს გაუჭირდება-მეთქი იმ მოხუცი ქალის შეგუება, მის გვერდით ყოფნა. მიუხედავად ამისა, რაღაც მაწუხებდა, არ მომწონდა, თითქოს ისე არ უნდა ყოფილიყო, როგორც ერთი შეხედვით ჩანდა.

— მოვეშვათ იმ დედაბერს... შენი მითხარი, ოზო, — ორივე ხელით მკლავზე დამეკიდა და მხარზე მომაყრდნო თავი, — დადინარ გოგოებში?

— სხვა რა საქმე მაქვს, — თავი გამოვიდე.

— გახსოვს, რომ დათვერი?.. რა დღეში ჩამაგდე? წაგიყვანე და ანანოს კართან მიგაყუდე. მერმე ერთი კვირა ცერად მიყურებდა ანანო.

იმ ამბის გახსენება არ მინდოდა და სიტყვა შევაწყვეტინე, თმა შეგიპირა-მეთქი, — ვუთხარი, შევიპირიდი, მაშ ნაწნავიანი ხომ არ ვივლიდიო, — გაიცინა.

— აქამდეც როგორ გაუძელი, ალბათ დედაშენი არ გაქრევენებდა.

— შევიჭერი და გავყიდე, აქ მაგის მოვლის თავი ვის ჰქონდა! ეგეც არ იყოს, ვინ დადის ახლა ნაწნავეებით?!

— გაყიდე?

— კი, კინოსტუდიაში მივიტანე, ასორმოცდაათი მანეთი მომცეს და დავამღერეთ...

— ხო...

— მაგას სხვა ღროს გიამბობ, ძალიან სასაცილო ამბავია.

— სხვა ღროს იყოს... უკვე შენს სახლთან მოვსულვართ.

— თუ გინდა, ცოტაც გავიაროთ და მოგიყვები.

— არა, არა...

ზიზის, როგორც ჩანს, ეწყინა ჩემი უარი, უცებ ხელი ჰკრა კარს და შევარდა, თვალი გავაყოლე, მაგრამ კარი თავისით სწრაფად მოიხურა. ისეთი შთაბეჭდილება დამრჩა, თითქოს ზიზი სადღაც გადაეშვა ან სიბნელემ დანთქა.

გზაში ვინანე, ლაპარაკი რომ არ ვაცაღე და სიტყვა გავაწყვეტინე, ახლა უკვე დამაინტერესა, ვინ გაიცნო, ვის დაუშვებობრდა, ვისთან ერთად დამღერა თმაში აღებული ასორმოცდაათი მანეთი? თბილისს ძალზე გაშინაურებია, ცოტა შემაცბუნა თმის გაყიდვამ, მაგრამ მომეწონა ზიზის შეუპოვრობა... არაფრის ეშინია, მიდის და მიდის, მხოლოდ თავისი თავის იმედი აქვს, თუ დასჭირდა იმუშავენს კიდევ, და მაინც ექვის ჭია მიღრნიდა წელანდელივით გულს, იქნებ მომაჩვენა, რომ ინსტიტუტში განცდილი მარცხით არაფერი დაუკარგავს, პირიქით, — შეიძინა გამოცდილება, რაც მომავალში საქმეს წაადგება, თანაც მაგრძნობინა, — თბილისშიც ისე ვარ, როგორც თევზი წყალშიო, — სინამდვილეში კი, რასაც გრძნობდა და განიცდიდა, დამიმალა.

მე მხოლოდ დაეკვებულე ფიქრისა და ყოყმანის შემდეგ უნდა გადავწყვიტო და გავბედო, — გადავდგა ეს ნაბიჯი, თუ არ გადავდგა-მეთქი, თუ გადავდგი, ეჭვი არც შემდეგ მასვენებს. სხვანაირად მოქცევა არ შემიძლია, არ შემიძლია, პირველი გაცნობისთანავე აღამიანს მხარზე მოვუტყაპუნო ხელი და იქვე მეგობრული ურთიერთობა დავამყარო; არ შემიძლია, პური ჯრიგოდ ავიღო, ქუჩა გადავჭრა იქ, სადაც გადასასვლელი არ



არის, ტრამვაიში წინა ბაქნიდან ავიდე; არ შემოძლია, კაცს ვუთხრა, — მოვალ-მეთქი და არ მივიდე... ათასი რამ არ შემოძლია და სხვებს რომ ვაკვირდები, მაწუხებს ჩემი თავი, ჩემი ხასიათი და ბუნება... ისე კი უკეთესი იქნებოდა, ისიც მცოდნოდა, რისი გაკეთება შემეძლო.

შინ დაბრუნებულს მამაჩემმა მკითხა, — როგორ არის ის გოგო, რას შერება, შეეჩვია თუ არა აქაურობასო? დიდებულად დაბინევებულა და თავსაც მშვენივრად გრძნობს-მეთქი. ჩემს არყოფნაში მამას ნავთქურაზე მქადი დაეცხო, ცხელ-ცხელი დამახვედრა, ყველიც გვექონდა და გემრიელად ვივახ-შმეთ. ზიზიზე სხვა არაფერი უკითხავს და არც მე მომიწადინებია ჩემი შთაბეჭდილების ბოლომდე გაზიარება. ამ დღეებში კიდევ მივალ და დავხედავ, გავიგებ, რა კვლავა-მეთქი, — გავიფიქრე, მაგრამ დღეები ისე გავიდა, ზიზისთვის ვერ მოვიცალე, ინსტიტუტში ლექციები დამეწყო და თავისუფალი დრო სულ აღარ მრჩებოდა.

კვირისათვის გადავდე ზიზის მონახულება, მაგრამ სწორედ კვირა დღეს გავედით მე და მამაჩემი კუკიის სასაფლაოზე, მამამ მითხრა, — წუხელ დედაშენი დამესიზმრაო... ხუთი წელია ნინოს საფლავზე არ ვყოფილვარ და იქნებ ვერც მივაგნოთო. მამაჩემის გადაწყვეტილებამ გული ამიჩუყა და თითქოს ზედაპირზე ამოაცურა ის გრძნობა, რომელსაც თვითონვე ვძირავდი გულის სიღრმეში. სასაფლაოზე მივიღიოდი სიხარულით, რადგან სოფელში მომხდარი ამბის შემდეგ მეგონა, დედა სამუდამოდ ჰყავდა დავიწყებულნი.

აღარ მახსოვდა არც ის, დედა სად დაეასაფლავეთ და არც ის, როგორი იყო საფლავი. დიდხანს უგზო-უკვლოდ ვიარეთ საფლავთა ლაბირინთებში, ხან — აღმა, ხან — დაღმა, დაახლოებით აქ უნდა იყოსო, — იტყოდა მამა, მივიდოდით და, სამწუხაროდ, იქ არ აღმოჩნდებოდა. ზოგიერთ უცხო საფლავთან ჩერდებოდა, წარწერას წაიკითხავდა და სინანულის მაგვარი ღიმილი გამოეხატებოდა სახეზე, ვაჰ, ესეც აქ ყოფილაო! — წამოიძახებდა გაკვირვებული. თითქოს თავის თავს, ელაპარაკებოდა: მე მეგონა, მარტო იქ იხოცებოდნენ, ხალხს აქაც დარეგია მიქელ-გაბრიელი, ხედავ, ეს სასაფლაო სადამდე წასულაო. შეიძლება თავს იმართლებდა, რახან დედის საფლავს ვერ მივაგენით.

აღრიანად წამოვედით და უკვე საკმაოდ ჩამოცხა, მზე თავზე წამოგვადგა. სასაფლაოს დარაჯი მოვნახეთ, დარაჯმა ისიცი ვერ გაიგო, რა გვინდოდა, რას ვეკითხებოდით, ღვინით თუ არყით იყო გამობრუებული და ისე უარდა, კინალამ გული ამერიო. სასოწარკვეთილი შევეყურებდი დაბნეულსა და დარცხვენილ მამას, რომელიც დაძაბული კი იყო, მაგრამ ინტიბარს არ იტეხდა, თუმცა ხელებს მაინც უმწეოდ შლიდა. იმედი რომ გადავიწურე, გამახსენდაო, — იყვინა განარებულმა და მხარზე ხელი დამკრა. — წამომყევით. ჩქარი ნაბიჯით გაეშურა სასაფლაოს სიღრმისკენ და მეც სირბილით წავეყვი. ამჯერად მეხსიერებას არ უღალატია, მივადექით თუჯის გისოსებთან საფლავს, სადაც ბალახი წელამდე მოხშირებული დაგვხვდა. ჩაქანგული კარი დიდი ჯაჯგურის შემდეგ გამოვალეთ, შევედით და ჩაჩოქილებმა ხელით დაეუწყეთ. ბალახს გლეჯა. დანები მაინც წამოგველოო, — წუხდა მამა, მერმე წინ წაიჩოქა, ბალახი ორივე ხელით გადასწია და საფლავის ქვა და წარწერა გამოაჩინა, თან ისე ბედნიერმა შემომხედა, — ეს არისო, რომ მეორედ ამიჩუყდა გული. თეთრ მარმარილოზე ჩამუქებული ოქროს ასოებით ეწერა: „ნინო მიხეილის ასული თორია-ბოდაველისა (1906—1940)“. თურმე ოცდაათობმეტი წლის გარდაცვლილა, მე კი ხანდაზმული მეგონა. მუქი ლურჯი თვალეზი მახსენდება ხოლმე, ქერა, მოკლედ შეჭრილი თმა, მკრთალი, გადატკეცილი სახე. მახსენდება მამაჩემის ტრაბახი, კოლხი ცოლი მყავსო, — სტუმრებთან ხმამალა რომ აცხადებდა ხოლმე, მე მაშინ არ მესმოდა, რას ნიშნავდა „კოლხი ცოლი“.

კარგა ხანს არ ვიცოდი, რითი გარდაიცვალა, არ მეუბნებოდნენ, ვატყობდი, მიმალავდნენ და მიზეზით რატომღაც არც მე დავინტერესებულვარ. დრო რომ გავიდა, უფრო ხშირად ვიგონებდი დედას და იმასაც ვფიქრობდი, — ნეტა რა მოუვიდა, რა დაემართა-მეთქი. მერმე, უკვე ძნელი აღარ იყო იმის მიხვედრა, რა დაემართა, ან რატომ მიმალავდნენ იმ განუკუტრნებელ ავადმყოფობას.

თითქმის საღამომდე ვიმუშავეთ. ოფლით გასვითქულებმა, ვგლიჯეთ და ვგლიჯეთ ბალახი, ვერავითარი ცელი ვერ მოთიბავდა ასე თანაბრად; მართალია, დიდი დრო და ძალა შევალეთ, მაგრამ ფრიად კმაყოფილნი დავრჩით შედეგით. გავასუფთავეთ, გავწმინდეთ საფლავი და თუჯის მესერს იდაყ-

ვებით დაყრდნობილები უხმოდ დავცქეროდით საფლავს. იმ საღამოს პირველად ვიგრძენი, თითქოს ვიღაცისა თუ რაღაცის წინაშე მცირეოდენი ვალი მოვიხადე. არ ვიცი, მაშინ რამ ჩამინერგა ან საიდან მომევილინა ასეთი მაცთუნებელი გრძნობა... თუმცა ნეტარი სიმშვიდე რომ დამეუფლა, აშკარა იყო...

ზიზის მხოლოდ ერთი თვის შემდეგ მივაკითხე, ოქტომბრის პირველ კვირას. კარი დიასახლისმა გაშიღო, ჯერ ვერ მიცნო, მაგრამ თავი რომ შეეახსენე, შინ შემიპატიჟა და ძველ ადგილას დამსვა.

ღია ფანჯრიდან მთაწმინდის ფერღობი მოჩანდა.

— თქვენ ალბათ ზეინაბს მოაკითხეთ?

— დიახ, ქალბატონო. — გამახსენდა, რომ ზიზის ნამდვილი სახელი ზეინაბი იყო.

— ზეინაბი აქ აღარ ცხოვრობს, წავიდა. — მითხრა მშვილად.

— სად წავიდა?

— არ ვიცი... ამ ათიოდე დღის წინ პენსიის ასაღებად გავედი და შინ დაბრუნებულს მაგიდაზე ბარათი დამხვდა. — მოხუცმა ქალმა კარადის უჯრა გამოსწია, ქალაღდის ნაგლეჯი ამოიღო და გამომიწოდა.

გამოვართვი.

— თუ ნებას დამრთავთ...

— რა თქმა უნდა, იმიტომ მოგაწოდეთ, რომ მინდა წაიკითხოთ.

ბარათს დაეხედე, ზიზის ხელი ვიცანი.

„ქალბატონო მარიამ!

თქვენ ძალიან კეთილი, ძალიან კარგი ქალი ხართ, მაგრამ მე თქვენთან ცხოვრება არ შემიძლია. მაპატიეთ. მე სხვა ბინა ვიქირავე და იქ გადავდივარ საცხოვრებლად. დედას ყველაფერი შევატყობინე. ველარ დაგელოდებით, მწჩქარება, თქვენი ზეინაბი“.

გაოცებულმა ავხედე დიასახლისს, რომელმაც ოქროს პენსნე გაისწორა და ჩემს პირდაპირ დაჭდა.

— გაგიკვირდათ? — მკითხა ღიმილით.

— ძალიან.

— მე მაინცდამაინც არ გამკვირვებია, ოღონდ როგორღაც შეურაცხყოფილად ვიგრძენი თავი. საერთოდ, მდგმურად არა-

ვის აყვანას არ ვაპირებდი, არც არასოდეს მყოლია, მაგრამ აქეთ-იქიდან შემომიჩინდნენ, — მოხუცი ხარო, მარტო რა გძალებინებსო... ამ გოგონას შენთან თუ დააყენებ, მაღლი იქნებაო, შვილივით გეყოლება და, როცა დაუძლურდები, გიპატრონებსო. ერთი სიტყვით, შემარცხვინეს და შემაცდინეს. შემდეგ შევეჩვიე და შემიყვარდა კიდეც. ვიფიქრე, — ნიჭიერი ბავშვია, გავზრდი, განათლებას მივცემ, გზაზე დავაყენებ-მეთქი. შემეძლო, ნამდვილად შემეძლო, ბევრი რამ მიმეცა ამ ბავშვისათვის, მაგრამ არ მოინდომა, გამაცურა და გამაბრეყვა ამხელა ქალი.

ქალბატონმა მარიამმა სახე ჩამოაყრდნო ხელისგულებს და ჩაფიქრდა. მე უხერხულად ავიწურე, საგონებელშიც ჩავვარდი, ისე გაპარულა, მისამართიც კი არ დაუტოვებია... ზიზის მაგივრად ლამის ბოლღში მომეხადა.

— პირადად მე არ მჭირდება მომვლელი, ისე არ წავეალ ამ ქვეყნიდან, რომ ვისიმე მოსავლელი გავხდე, მაგრამ მე მაქვს ძვირფასი განძი, რომელსაც ნამდვილად სჭირდება დიდი მოვლა-პატრონობა. ნაწილი იმ განძისა მემკვიდრეობით მივიღე, ნაწილი თვითონ შევიძინე... იცით რა, მე არ ვიცი, თქვენი სახელი...

— ოზო, ქალბატონო.

— ჩემო ოზო, როდესაც მე გადავწყვიტე ზეინაბის მდგმურად დაყენება, (ხაზგასმით ამბობდა „ზეინაბს“ და არა „ზიზის“), მხედველობაში, რა თქმა უნდა, ჩემი განძიც მქონდა, — თითო-თითოდ ნელ-ნელა თანდათან შევაჩვევ-მეთქი. მსახიობი სურდა გამოსულიყო, არა? კი, ბატონო! ჩემთან თვით ალექსი მესხიშვილი დადიოდა, მაკო საფაროვა-აბაშიძისა, თვით სარაჯიშვილი!

გრძლად და მოსაწყენად ლაპარაკობდა, თუმცა გულისყურით ვუსმენდი, მაინც ვერ გავიგე, ასე ხშირად რა განძს ახსენებდა ან ის ცნობილი მსახიობები რატომ დადიოდნენ მასთან. მერმე დიდხანს მიხსნიდა, თუ რა ძნელი და რთული პროფესიაა მსახიობობა და როგორ ცდილობდა ეს გაეგებინებინა ზეინაბისათვის.

— მე მიხნდა გაჩვენოთ ჩემი განძი და დაგარწმუნოთ, რომ მართალი ვარ, — მითხრა ბოლოს და წამოდგა. სავარძლის უკან გადასწია ფარდა (რომელიც მე დეკორაციული დეტა-

ლი მეგონა) და კარს მიაღდა. კარის გაღებამდე წიგნის კარადებისკენ ხელი გაიშვირა, — ესენი მხოლოდ ენციკლოპედიებია, სხვადასხვა გამოცემები.

ქალბატონი მარიამი შევიდა „განძის ოთახში“ და მეც შევეყვები. შესვლისთანავე ძველი წიგნებისა და მტკრის სუნი შეცა. ოთახში საკმაოდ ბნელოდა, მაგრამ სინათლე აანთო და უცებ დავინახე, რომ უზარმაზარ წიგნთსაცავში ვიმყოფები.

— ახლა თქვენ შეიძლება დაუჭერებელ ამბად მოგეჩვენოთ, მაგრამ ამ წიგნებით დიდი ილია სარგებლობდა... ივანე მაჩაბელიც... იაკობ გოგებაშვილიც...

— თქვენ იცნობდით ილია ჭავჭავაძეს?

— რა თქმა უნდა.

— საოცარია!

— ეს ბიბლიოთეკა იმითაც არის მნიშვნელოვანი, რომ აქ თავის დროზე უდიდესი ადამიანები მუშაობდნენ. აი, ეს მხარე ისტორიის განყოფილებაა, ივანე ჯავახიშვილი მთელი კვირა მჯდარა აქ, დღე და ღამე უსწორებია.

თაროებშორის დავდიოდით და ქალბატონი მარიამი აღტაცებული ამბობდა:

— ეს ინგლისური ლიტერატურაა!.. ინგლისურ ენაზე, ბატონო!

— ეს რუსული კლასიკა უიშვიათესი გამოცემები.

— ეს ბერძნული და რომაული პოეზიაა! უნიკალური წიგნები!

— ეს ქართული ლიტერატურა და ისტორია!

— ეს ფრანგული...

— ეს გერმანული!

— ეს უკვე აღმოსავლურია! სპარსეთი, არაბეთი, ინდოეთი, იაპონია!..

— ეს მხატვრობაა! საქართველოში ყველაზე დიდი კოლექცია ალბომებისა მე მაქვს.

— ეს კი თეატრია!..

აქ შეყოვნდა ქალბატონი მარიამი და მრავალმნიშვნელოვნად შემომხედა.

— ამას ვთავაზობდი ზეინაბს! და არ ისურვა „ქალბატონმა“. თუ მსახიობი დადგებოდა, მე მინდოდა განათლებული პროფესიონალი გამოსულიყო. ქართულ ენაზე არსებული ლი-

ტერატურა თვითონ წაეკითხა, რუსულსა და ფრანგულს მე წავუკითხავდი და ვუთარგმნიდი... ოღონდ წიგნებისთვისაც მიეხედა, მტვერი გადაეწმინდა... ამას დღეში ნახევარი საათი ეყოფოდა, მეტ დროს არ წავართმევდი. მე დაკებერდი, აღარ შემიძლია... ამ ქერის სიმაღლე თითქმის ხუთი მეტრია, როგორ მივხედო წიგნებს ამ სიმაღლეზე?!

ჩვენ გამოვედით წიგნთსაცავიდან, ქალბატონ მარიამს საუბარი არ შეუწყვეტია.

— ხუთი წელი არავინ მოსულა... მართალია, ომი იყო, მაგრამ ომის დროსაც საჭიროა წიგნი... საშინელებაა ხელუხლებელი წიგნი. ღმერთო, ვინ არ მოდიოდა, ვინ არ სარგებლობდა ამ წიგნებით, ვასილ ბარნოვიც ყოფილა აქ და მიხეილ ჯავახიშვილიც, პავლე ინგოროყვაც, დიმიტრი უზნაძეც, ევგენი მიქელაძეც... ამ შვიდიოდე წლის წინ ზედიზედ სამჯერ მოვიდა გალაკტიონი... ერთხელ გამსახურდიაც იყო და რაღაც გერმანული წიგნი მთხოვა, არ მახსოვს, რა წიგნი, — რამდენიმე დღით შინ გამატანეთო... ბატონმა კონსტანტინემ არ იცოდა, რომ წიგნებს სახლში არავის ვატანდი... მგონი, ნაწყენი წავიდა...

აღარ დავმჯდარვარ, არც ქალბატონ მარიამს შემოუთავაზებია — დაჯექიო, მოგონებებში გადართულს ბედნიერი ღიმილი ეფინა სახეზე, ასახელებდა და ასახელებდა ადამიანებს, რომელთა გვარები, იშვიათი გამონაკლისის გარდა, არ გამეგონა. მე გაბრუებული ვუსმენდი, ამ წიგნებმა თავზარი დამცა და შემაშინა, ამდენი წიგნი ერთად თავმოყრილი ჯერ არ მენახა და ვერც წარმოვიდგენდი, თუ შეიძლებოდა, ერთ ადამიანს ასეთი ბიბლიოთეკა ჰქონოდა. ეს სახლი მთლიანად მაჩემისა იყო. ამბობდა, — მაგრამ მერმე მე ამ ოთახში ვარჩიე ცხოვრება, რომ ეს წიგნები გვერდით მქონოდაო... ისიც, მითხრა, — აღრე კლასიკურ ენებს ვასწავლიდი ქალთა გიმნაზიაშიო, ხოლო შემდეგ სკოლაში ფრანგული ენის მასწავლებლად მოვეწყეო... ეხლა კარგი პენსია მაქვს დანიშნული და ჩვეულებრივად ვცხოვრობო. ბოლოს მის ბედნიერ ღიმილს სევდა გაერია და გულის ტკივილით თქვა:

— ძნელია, როცა არავინ მოდის... ანდა ვინ მოვა ამ მტვერსა და სიბნელეში, როცა სუფთა და ნათელი დარბაზები არსებობს...

დიღხანს აღარ დავრჩენილვარ, დავემშვიდობე და წამოვე-  
დი. გამომაცილა, თუ ღრო დავრჩებათ, გამოიარეთო, — თავა-  
ზიანად მითხრა, — თუ წიგნები დაგჭირდათ, მით უმეტეს, ნუ  
მომერიდებითო...

მე დავტოვე მოხუცი ქალბატონის ბინა და სალამოს ბინდ-  
ბუნდში შინისაკენ გავყევი ქუჩას. ზიზის თითქოს გავუგე, უკ-  
ანმოუხედავად რატომ გაეჭა ამ გარემოს, თანაც ისე წავიდა,  
რომ მისამართი არ დაუტოვებია. ზიზი ვერ გაუძლებდა ვერც  
ამ წიგნებს და ვერც ქალბატონ მარიამის მოგონებებს, შორე-  
ეულ და ახლო წარსულის შთაბეჭდილებათა ნამსხვრევებს.  
მაგრამ სად წავიდა, ან როგორ გაბედა წასვლა? ერთის მხრივ  
მსიბლავდა და ამავე ღროს მაკრთობდა კიდევ ზიზის გამბე-  
დაობა, უცნობი გარემოს სწრაფად ათვისებისა და გათავისე-  
ბის უნარი. მაინც სად წავიდა? ალბათ იქ, სადაც უკეთესად  
მოერგო, ანდა უკეთესად მოირგო გარემო. მაგრამ, როგორც  
ვთქვი, შინაგანად მაკრთობდა და არ ვამართლებდი ზიზის საქ-  
ციელს, განა იმიტომ, რომ თვითონ სხვა ბუნებისა ვიყავი და  
ამ შემთხვევაში ზიზისავეთ არ მოვიქცეოდი, სრულებითაც  
არა. ზიზი სწრაფად ეგუებოდა სასურველ სიტუაციას, თით-  
ქოს მასში ერკვეოდა კიდევ და შეეძლო დამოუკიდებლად გა-  
დაწყვეტილების მიღებაც. ყველაფერ ამას, არა ეშმაკობით,  
ღია, უშუალო გულწრფელობით აკეთებდა. ზიზი საკუთარი  
გულწრფელობის ტყვე იყო და ამავე ღროს ეს გულწრფელო-  
ბა ანებივრებდა და ათამამებდა, სხვა ქალიშვილების მიმართ  
უპირატესობის გრძნობით მსკვალავდა. ამ ვნებებს დამორჩი-  
ლებული მომავალიც ვარდისფრად ჰქონდა დანახული.

შინ მოსულმა მამაჩემს ვუთხარი, — ასე და ასეა-მეთქი  
საქმე. მამა შეფიქრიანდა, კეფა მოიფხანა, დედამისს ხვალვე  
წერილს გავუგზავნიო, — თქვა და მაშინვე შეუდგა წერილის  
წერას, წუთი არ დაუკარგავს.

ზიზიმ იცოდა ჩვენი მისამართი და მაინც მეგონა, მოვი-  
ლოდა, დღეს თუ არა, ხვალ მოგვაკითხავდა, მაგრამ შემოდ-  
გომა ისე მიიწურა, არ გამოჩენილა, არც მარო მასწავლებლის  
პასუხი მიგვიღია, ეტყობა, იცოდა თავისი ქალიშვილის ასავალ-

დასავალი. ბოლოს და ბოლოს, უპატრონოდ ხომ არ დააგდებდა? ვერც ზიზი იარსებებდა უდედოდ, ის ამარაგებდა ფულითაც, სურსათითაც.

ერთი სიტყვით, ზიზი დამეკარგა.

თუმცა ზიზი რომ ცოცხალი იყო და თბილისში ცხოვრობდა, ვიცოდი, ცოტა უცნაური კია, მაგრამ ჩემამდე დროდადრო ექოსავით აღწევდა ზიზის ამბავი, ზოგჯერ ისე მოულოდნელად, გაოცებასაც ვერ ვახერხებდი, ზოგჯერ იმ გზით, საიდანაც არ ველოდებოდი. პირადად მე კი ვერ ვხვდებოდი, ვერ ვნახულობდი, ხოლო მისი ხმა, სუნთქვა დროგამოშვებით მესმოდა. ეს იმას ნიშნავდა, რომ ზიზი არსებობდა, თბილისში ცხოვრობდა. სად? ზუსტად არ ვიცოდი. იქნებ დიდუბეში ან ნაძალადევში, ან სოლოლაკში, ან ვერაზე, ან ორთაჭალაში, ან ავლაბარში, ან... აკი ვთქვი ზუსტი მისამართი არ ვიცოდი, ვიცოდი მხოლოდ ის, რომ იყო, არსებობდა, ცხოვრობდა, ესე იგი მღეროდა, ცეკვავდა, ლექსებს კითხულობდა...

ერთხელ ინსტიტუტის დერეფანში ვიდექით, ბიჭებიც იყვნენ, გოგოებიც ვლანდინდარობდით, ვიცინოდით. ჩვენ შორის იდგა ღურმიშხან წილოსანი, ყოფილი თანაკლასელი, ახლა — თანაკურსელი. ამ ღურმიშხან წილოსანმა უცებ მე მომმართა:

— ოზო, რა მაგის პასუხია, და, წუხელ სოლოლაკში ვიყავი ერთ ჩემ ძმაცთან, პატარა პურ-მარილი იყო გაშლილი... იქ შენი ნათესავი გოგონა გავიცანი.

— ჩემი ნათესავი, ისიც გოგონა? მე ასეთი ნათესავი არა მყავს.

— რას ცეკვავდა და მღეროდა იცი? ხალხი გადარია... მაგარი რამე დადგება!

უსიამოვნოდ გამცრა ტანში, ზიზიზე ხომ არ ლაპარაკობსმეთქი, — გავიფიქრე.

— შენ თუ მოგისმენია, ტარზანივით რომ ყვირის? ხელებს პირზე აიფარებს და მიდი, შეუბერავს... სუფრაზე სამჯერ გავამეორებინეთ.

ყველას გავცინა, მეც გამეცინა. სულელი, რა აყვირებდა ტარზანივით.

— ახლა არა თქვა, ზიზი ჩემი ნათესავი არ არისო. — არ მომეშვა ღურმიშხანი.

— არ არის და, ხომ არ დავიბრალებ?



— შენ რას მალავ, თვითონ მითხრა,— ვარო.

ისევე გამეცინა.

— ბიჭო, ამასწინათ შენ და ზიზი არ მიათრევედით ქუჩაში კალათს? აქედან შენ გქონდა ხელი ჩავლებული, იქიდან — იმას, თანაც ტკბილად მისაუბრობდით. ასეთი იდილია არცერთ ორლობეში არ მინახავს.

ყველანი სიცილისთვის იყვნენ განწყობილი და ისევ ფხუკუნნი და სიცილი ატყდა.

— მაშ, ტარზანივით ყვიროდა?! — ვილაცა სიცილისთვის ილიზიანებდა თავს.

— აბა, კაცო, ტარზანისაგან ვერ გაარჩევდი სხვა რა გზა მქონდა, მეც ვიციხოდო...

გავიდოდა დრო და ვილაც მეტყოდა:

— ოზო, ამასწინათ შენი ნათესავი გოგონა გავიცანი, ბიჭო, რა მაგრა ცეკვავს და იგრიხება...

კიდევ:

— ოზო, ეს რა ნათესავი გყოლია, ბიჭო, ნამდვილად გასახელებს!

კიდევ:

— ოზო, ამ შაბათს...

კიდევ:

— ოზო...

ერთხელაც თავი დაგეკარგე და ნერვებაშლილმა წამოვიძახე, — ხო, ჩემი ნათესავია, ვიცი, ტარზანივით ყვირის-მეთქი! მაგრამ ეს იყო წუთიერი აფექტი, მაშინვე დავმშვიდდი და გუნებაში ზიზიზეც და ჩემს თავზეც მეცინებოდა.

ზიზისთვის აღარ მომიცლია, ჩემი სტუდენტური საქმეებით ვიყავი გართული, თუმცა რა შემეძლო, ჩემი თავის მიხედვა მიჰქირდა. ზიზი უკვე გასროლილ ტყვიასავით იყო, უკან ვერ მოაბრუნებდი. ლექციებზე დავდიოდო. ზოგჯერ ვაცდენდი კიდევ, მაგრამ იმდენს არა, რომ სალაპარაკო ყოფილიყო. ვერ ვიტყვი, თითქოს ცოდნის ანდა საგნების დაუფლების წყურვილი მქლავდა, უფრო ინერცია, აღებული ქანი მამოძრავებდა, რახან ინდუსტრიულ ინსტიტუტში შემოვდი, უნდა ვისწავლო კიდევ-მეთქი. ლექციებზე დასწრებამ მაინც გარკვეულ ყალიბში ჩამაგდო, წესრიგს შემაჩვია და დროის გრძნობა გამიმახვილა. უფრო ძნელი გამოდგა სტუდენტებთან ურთიერ-

თობის დამყარება. ზოგიერთი მათგანის თვითდამკვიდრებისა-  
კენ ვითომ შენიღბული ლტოლვა იმდენად აშკარა იყო, რომ  
საკუთარ ნაქუქში ჩაკეტვის სურვილს აღმიძრავდა. ხანდახან  
მეჩვენებოდა, ამ ხალხს სხვისი მოსმენის, ყურის გდების უნა-  
რი ჰქონდა დაკარგული, უბრალოდ არ გისმენდა, ყურს არ  
გიგდებდა, არ აინტერესებდა, რას ამბობდი. ზოგჯერ არ გაცლი-  
და ლაპარაკს. თუ დაგაცლიდა, მხოლოდ იმისათვის, რომ შემ-  
დეგ ეთქვა ისეთი რამ, რითაც შენს ნათქვამს გააბათილებდა,  
მიჩქმალავდა, ანდა სხვებს სასაცილოდ და აბსურდულად მო-  
აჩვენებდა, აცინებდა, ახარხარებდა... მერმე მივხვდი, ესეც  
თვითდამკვიდრების ერთ-ერთი გზა იყო, საზოგადოებაში უპი-  
რატესობისა თუ იაფფასიანი პოპულარობის მოპოვების საშუ-  
ალება. ამის შედეგი ბოლომდე გაცნობიერებული არ მქონდა,  
მხოლოდ მაღიზიანებდა, რადგან ვგრძნობდი, რომ ასეთი ურ-  
თიერთდამოკიდებულება ქარბ, უადგილო და გამომთფიტველ  
სიცილ-ხარხარს გვაჩვენებდა, სხვისი აზრის, ფიქრის, შთაბეჭდი-  
ლების ნიველირებასა და უპატივცემულობას, ამავე დროს გაუ-  
ბედაობას გვინერგავდა, გვაკარგვინებდა საკუთარი აზრის გა-  
მოთქმის, ფიქრისა და შთაბეჭდილების გაზიარების სურვილს...

ლექცია გაგვიცდა და ათიოდე სტუდენტი აუდიტორიაში  
დავრჩით, წასასვლელი არსად გვქონდა და ლაყბობით ვერთო-  
ბოდით. თავიდანვე ქუჩაში გავლა მინდოდა, მაგრამ გადავი-  
ფიქრე, რადგან დარჩენა გადაწყვიტა ერთმა ქალიშვილმა, რო-  
მელსაც პირველი დღიდანვე მივაქციე ყურადღება. ყურადღე-  
ბა კი არ მივაქციე, სტუდენტობის პირველი დღის ორომტრიალ-  
ში თითქოს შემთხვევით აღმოვაჩინე. იმ დროს, როცა ყველა  
და ყველაფერი სააშკარაოზე იყო გამოტანილი — ღიმილიც,  
სიცილიც, სიხარულიც, ალტაცებაც... როცა ბედნიერებით აღ-  
სავსენი თავიანთ თავს სთავაზობდნენ ერთმანეთს, ანდა ისე  
იქცეოდნენ, როგორც დიდი ხნის ნაცნობები, მეც შემხვდა  
რამდენიმე თანაკლასელი თუ შორეული ნაცნობი, რომელსაც  
ერთი-ორჯერ სადღაც შევხვედროდი, ზოგი ვიცანი, ზოგმა მი-  
ცნო და თვითონ შემახსენა თავი, ზოგს მე შევახსენე. ამ რი-  
აში შორიდან დავინახე დიდი თვალები და უცებ გული რა-  
ღაცნაირად შემეკუმშა, ეს იყო და ეს. მერმე გამოირკვა, რომ  
ერთი ფაკულტეტისა და ერთი კურსის სტუდენტები ვიყავით.

ცოტა უცნაური გოგო აღმოჩნდა. განზე მდგომი და გულ-ჩათხრობილი, ახლოს არავინ მიუშვა, არც თვითონ მიეკარა. თითქოს ამაყი და მიუქარებელი არ უნდა ყოფილიყო, მე მგონი, გაუბედობისა და მოკრძალებულობის გამო ჩანდა ასეთი. გარეგნულად უმნიშვნელო იყო, უმწიფარი გოგონას აღნაგობა ჰქონდა და ალბათ ესეც თრგუნავდა, მაგრამ თვალები, არ ვიცი, სხვებსაც ჩემსავით ნუსხავდა თუ არა, ეს დიდი და ნისლიანი თვალები.

სწორედ ამ თვალების გამო დავრჩი-მეთქი აუდიტორიაში, — ვამბობდი, ლაყობით გული რომ მოვიოხეთ, მოსაწყენი დუმილი ჩამოვარდა. დუმილი მე დავარღვიე, რატომღაც ილოს ბალები გამახსენდა. საერთოდ, ხშირად მახსენდებოდა სოფელი, ანანოც, საბაც, იოთამიც... ის ცხენებიც... რახან ილოს ბალები გამახსენდა, მომინდა კიდევ რაღაც მეთქვა იმ საოცარ ბავშვებზე, რომლებიც მიყრუებულ სოფლის კლუბში „ვენის ტყის ზღაპარს“ უკრავდნენ. თითქოს იმ ბავშვებისათვის აქაც თანაგრძობას ვეძებდი, მეგონა, აქედან ვანუგეშებდი, რაღაცნაირად გავამხნევებდი... მოყოლისას სტუდენტები თითქოს გულისყურით მისმენდნენ, თანაგრძობის სხივიც კი დავინახე თვალებში, მაგრამ დურმიშხან წილოსანმა, ვითომ სხვათა შორის, მკითხა:

— ბიჭო, შენ ხალხოსანი ხომ არა ხარ?

მოულოდნელად ისეთი სიცილი და ხარხარი ატყდა, დავიბენი და იმ წუთას ვერც მივხვდი, რატომ იცინოდნენ, ან რამ გაამხიარულა ეს ხალხი. რა თქმა უნდა, ამბის მოყოლა არ გამისრულებია, არც დაინტერესებულან, — შემდეგ რა მოხდაო, ანგლობას ანგობა მოაყოლეს, იცინეს და იცინეს, ვიღაცამ ისიც კი გაიხსენა, გამოცდაზე სწორედ „ხალხოსნების შემოჭმედება“ ვწერეო. ჯერ მეც ვიცინოდი, მერმე დავიბოლმე, თანდათან უფრო შემებრაღნენ ის ბავშვები, გზის პირას რომ იდგნენ და თბილისისაკენ მომავალ მგზავრებს გამოსამშვიდობებლად ნაღვლიანი ღიმილით უქნევდნენ ხელებს.

გუნებაწამხდარი თითქმის მაშინვე წამოვედი, — ერთი მაგათი, დანარჩენ ორ ლექციასაც ვავადენ-მეთქი. აუდიტორიიდან გამოსვლის წინ დურმიშხან წილოსანმა ჩამჩურჩულა, მერმე დერეფანშიც გამომყვა, — რა მოგივიდა, ბიჭო, ხუმრობა არ იციო? მხარზეც მეგობრულად მომიტყაპუნა ხელი, — იღირო-

რის გრძნობა სოფელში ხომ არ დაგრჩაო. მე გავუღიმე და ვანიშნე, — არაფერია-მეთქი. მაგრამ საექვოდ კმაყოფილი, რომ გატრიალდა, უცებ ავენთე, — რატომ უნდა შევარჩინო-მეთქი და ვუძახე, არ მობრუნებულა, ირიბად მომხედა და საექვო ღიმილიც შეაშრა სახეზე.

— ისე, რომ იცოდე, არც ცინიზმია იუმორი და არც მასხრად აგდებაა, ხუმრობა. — ვუთხარი მეგობრული რჩევა-დარიგების კილოთი.

— ვა! — დამცინავად აუციმციმდა თვალები, — მაგას შენ თვითონ მიხვდი, თუ სადმე წაიკითხე?

— მიხვდები, თუ წაეკითხე, შენი საქმე არ არის, რაც გითხარი, ის დაიმახსოვრე! — ოდნავ ავეუწიე ხმას.

— ვა!

— რა „ვა“ აგიტყდა?!

— შენ აღარ ხუმრობ, სოფელში ძალიან აგიშვია, აი!

— ახლაც ის მაიმუნი ხარ, რაც სკოლაში იყავი!

ღურმიშხანი გაშტერებული მომჩერებოდა, თითქოს ვერ გადაეწყვიტა, გაბრაზებულყო, თუ ნათქვამი ხუმრობად ჩაეთვალა. ამხედ-დამხედა, თვალთ გამზომა, შემამოწმა. ვიგრძენი, უკან დახევა აღარ შეიძლებოდა.

— ისინიც შენისთანები არიან, წადი, უთხარი! თუ გინდათ, დაგელოდებით, თუ არა და გზაში დამეწიეთ!

არც მე დავლოდებივარ და, მგონი, არც ისინი დამდევნიბიან. ვერის ხილამდე პატარ-პატარა, მიხვეულ-მოხვეულ ქუჩებით ნელ-ნელა ვიარე, თან ვჩერდებოდი და უკან ვიხედებოდი, მე ჩხუბისთვისაც მზად ვიყავი, არავის შევებუთებოდი. არც ბავშვობისას, არც მერმე, არასოდეს, მიჩხუბია, ხელი არავისთვის გამირტყამს. ისიც არ ვიცი, საქმე საქმეზე რომ მიდგეს, შემიძლია ჩხუბი თუ არა. სოფლიდან ჩამოსვლის შემდეგ მკლავებსა და მხრებში ძალას ვგრძნობ, ვატყობ უფრო ღონიერი ვარ, ვიდრე ვჩანვარ, ყოველ შემთხვევაში, ადვილად ვერ მომერევიან...

ვილაცამ დამიძახა, ქალის ხმა იყო, უცნობი. მოვბრუნდი და თვალები დავინახე, სწორედ ის თვალები, აუდიტორიაში რომ დავტოვე. ამ მშვენიერ თვალებს ლამარა ერქვა. შევჩერდი და ლამარამაც გულამოვარდნილმა მოიბრინა, — მაპატიეთ, ძლივს დაგეწიეთო. თვალები ანუ ლამარა იმათ ხომ არ

დამადევნეს, იქნებ შეწუხდნენ და შემორიგებაც კი მოინდო-  
მეს-მეთქი, — გავიფიქრე. მაგრამ გზაში გაირკვა, სინდისს არა-  
ვინ შეუწუხებია. ლამარა თავისი ნება-სურვილით წამოსულა,  
მასაც ჩემსავით გადაუწყვეტია ლექციების გაცდენა.

ხიდი გავიარეთ და ვერის აღმართს ავუყვევით.

— იცით, მე გავიგონე... იმ დროს დერეფანში გამოვედი  
და კარგად მესმოდა, რასაც ღურმიშხანს ეუბნებოდით... საქ-  
მე ისაა, რომ აუდიტორიაში მეც გამეცინა, შემდეგ კი თავი  
ცოტა უხერხულად ვიგრძენი... მე მესმის თქვენი...

— თუ გულწრფელები ვიქნებით, თქვენ არ უნდა გესმო-  
დეთ ჩემი.

— რატომ?

— მე მგონია, რომ თქვენ ვერ გაიგეთ, რა მეწყინა.

ლამარა ერთი წამით შეყოვნდა და ისეთი ღიმილით ამომ-  
ხედა, თითქოს გაიფიქრა, — ამ ხეპრეს ვის გადავეყარეო. მარ-  
თლაც, უხეშად ვპასუხობდი, ნეტავი რას ვერჩოდრი. ამ მშვე-  
ნიერ, ნისლიან თვალებს ხომ არაფერი დაუშავებია?

რალაცის თქმა დააპირა და სიტყვა გავაწყვეტინე.

— მაპატიეთ, ლამარა, თქვენს ვარაუდებს ალბათ აჯობებს,  
ისევ მე ვითხრათ, რა მეწყინა... პირდაპირ გეტყვით, აუდი-  
ტორიაში მასხრად აიგდეს ჩემი გრძნობა, ჩემი დამოკიდებუ-  
ლება იმ ბავშვებისადმი. არ მომისმინეს და ამიტომ არც იციან,  
რა ბავშვები არიან ისინი, ვისზეც საუბარი დავიწყე. არ მინ-  
და, ახლა გული ავიჩუყოთ, მაგრამ... მე ხშირად ვფიქრობ იმ  
ბავშვებზე, ვწუხვარ, მებრალებიან... მე მხოლოდ ეს შემიძლია:  
ვიფიქრო იმათზე, გული მეტკინოს, შევწუხდე, სხვა რამის გა-  
კეთება ჭერჭერობით ჩემს ძალას აღემატება. ის კი მეუბნება, —  
ხალხოსანი ხომ არა ხარო? რა არის ეს? ხუმრობა? არა მგო-  
ნია... წუხილის უფლებასაც აღარ მაძლევთ? თუ თანაგრძნობა  
არ შეგიძლიათ, გაჩუმდით მაინც!

ლამარა დაფიქრებული მომყვებოდა.

— ის, ვინც წამოვიდა, არ უნდა წამოსულიყო... ისინი კი,  
ვინც წამოსვლის ღირსნი არიან, იქვე დარჩნენ, გზის პირას  
დგანან და წამოსულებს ხელებს უქნევენ.

— რა თქვით?.. ვერ გავიგე...

— არაფერი... — გავიციე.

ვერის აღმართი აცთავეთ და რუსთაველის მოედნიდან

მარცხნივ, პროსპექტისაკენ გავუხვიეთ. ლამარამ მკლავზე ფრთხილად შემავლო ხელი და შემაჩერა.

— ოზო, მე თქვენ მომწონხართ! — მითხრა ისე უბრალოდ, თითქოს ძველ ნაცნობს ესალმებოდა.

მართალი რომ ვთქვა, ამგვარ გულახდილობას არ მოველოდი და უცებ დავიბენი. ასე პირდაპირ, შეუშზადებლად, ასე დაუფარავად და უშუალოდ თუ ეუბნებოდნენ, — მომწონხარო, — არ მეგონა. გამოცდილება არ მყოფნიდა, არ ვიცოდი, რა მეთქვა, როგორ მოვექვეულებიყავი, ისე კი მეტად სასიამოვნოდ დავიბენი, სადღაც სულის სიღრმეში გაღვივდა პატარა ცეცხლი, რომელიც მთელ სხეულს ჟრუანტელივით მოეკიდა.

(ასეთ დროს გამოცდილება არ უნდა ინატრო ხოლმე. თუ დაიბენი და გაწითლდი, რა სჯობია ამას ალბათ, ასეა საჭირო, უნდა დაიბნე და გაწითლდე! თუ არ იცი, რა თქვა ან როგორ მოიქცე, გაჩუმდი და ნურათერს გააკეთებ, ყოველ შემთხვევაში, გამოუცდელიობის გამო ნუ დაგწყდება გული. ასეთი გამოცდილება გრძნობას ცვეთს და აჩლუნგებს, პირველყოფილ სიწმინდის ელვარებას უკარგავს... ამას ვამბობ თითქმის ორმოცი წლის შემდეგ).

ლამარამ დაბნეულობა შემატყო და თვალი ამარიდა. ხუთიოდე ნაბიჯი გადადგა და მომხედა, — მომყვება თუ არაო. გავყვი და დავეწიე. ჩემი წარმოდგენა იმ თვალეზე, რომელსაც ლამარა ერქვა, ისე დაიმსხვრა და ერთ წამში გაცამტვერდა, ჩემს მიერ დაბრალებული გაუბედაობის პაწაწინა კვალიც არ დარჩენილა.

— ოზო, რაც გინდათ, ის იფიქრეთ, ოღონდ ცუდად არ გამიგოთ. იცოდეთ, ჩემი ნათქვამი არაფერს გავალდებულებთ... მე ვამბობ იმას, რასაც ვგრძნობ... მე მგონი, ამაში ცუდი არაფერია...

„თქვენობით“ ლამარაკი აშკარად გვიშლიდა ხელს, სათქმელს ბუნებრიობასა და უშუალობას უკარგავდა, თითქოს ჩვენ კი არა, ვიღაც სხვები ლამარაკობდნენ, ჩვენზე უფროსები. ჩემი აზრი უმალვე გავუზიარე ლამარას და ისიც უყოყმანოდ დამთანხმდა, — კი ვგრეაო.

— სად მივდივართ? — მკითხა, ოპერის თეატრთან რომ მივედით.

— არ ვიცი. — ვუპასუხე.

— ხეტიალი ხომ არ გეზარება?  
— პირიქით, მე მოხეტიალე რაინდი ვარ!  
— რაინდები რომ აღარ არიან?! სამწუხაროდ, გადაშენდ-  
ნენ.

— მაშინ, მე ვარ მოხეტიალე რაინდის ცხენი!

— ცხენი? — გაიცინა ლამარამ.

— ხო, რა გაგიკვირდა?!

— იქნებ როსინანტი ხარ?

— არა, მე ვარ ლურჯფორეჯებიანი თეთრი ცხენი! — წა-  
მომცდა დაუფიქრებლად და გამელიმა. უცებ გული შემეკეუმ-  
შა და სევდა მომერია. — შენ გგონია, ვლაპარაკობ? აბა, კარ-  
გად დაუგდე ყური... შენ ახლა ჩემი ჭიხვინი გესმის...

რატომღაც საბა გამახსენდა, ალაზნიდან მობრუნებულს  
ორღობეში მგლის დაგლეჯილი ცხენი რომ დახვდა... ახლაც  
ნათლად დავინახე: მუხლებზე დაეცა საბა, ბებერმა ცხენმა  
ნელა წაიგრძელა კისერი და მის წინ დაჩოქილს თავი ფრთხი-  
ლად დაუყნოსა... თითქოს ფრუტუნიც გავიგონე.

— კიდევ კარგი, ლექციებზე არ დავრჩი, — თქვა ლამა-  
რამ.

ასე მოულოდნელად დაეუახლოვდით ერთმანეთს და დაე-  
მეგობრდით მე და ლამარა, რაც შეეხება ღურმიშხანს და იმათ,  
რომლებიც მაშინ აუდიტორიაში დავტოვე, მეორე დღეს შევ-  
ხვდი. შევხვდი ისე, ვითომც — არაფერი! ოდნავ მორიდებუ-  
ლად კი მეპყრობოდნენ, მაგრამ ორი დღის შემდეგ ცხოვრე-  
ბა ჩვეული კალაპოტით წავიდა. ალბათ ასეც უნდა მომხდა-  
რიყო.

ლამარას თითქმის ყოველდღე ვხვდებოდი, უკვე აღარ შე-  
მეძლო, ყოველდღე არ მენახა, თუ რაიმე შემთხვევის გამო  
ავცდებოდი, შინ ტელეფონი ედგათ და ვურეკავდი. ერთხელ  
მამაჩემსაც მივგვარე და გავაცანი. მამა დატრიალდა, ვახშა-  
მიც გაგვიწყო, მაგრამ ვიგრძენი, სარძლოდ არ მოეწონა. ლა-  
მარა რომ გავაცილე და დაებრუნდი, მეგონა, რაღაცას მაინც  
იტყოდა, მაგრამ სიტყვა არ დასცდენია. სუფრა აელაგებინა  
და რადიოს მისჯლომოდა — უკანასკნელ ცნობებს ისმენდა. ბევ-  
რი ვიწროილე, აივანზე გავედი, მტკვარს გადავხედე, შემოვ-  
ბრუნდი, წიგნის წაკითხვაც ვცადე, მაგრამ გული ვერ დავუ-  
დე. დუმილსაც ვეღარ გავუძელი და ისევ მე მივაღეჭი მამა-

ჩემს, როგორ მოგეწონა-მეთქი ჩემი საცოლვე? — ვითომ ხუმრობით ვკითხე. ნუ აჩქარდებიო, — მშვიდად და სერიოზულად მიპასუხა, თან ცალი ყური რეპროდუქტორისაკენ ჰქონდა მიშვერილი. მაინც როგორია-მეთქი, — არ მოვეშვი. ხედავ, დრო როგორ გამოიცვალაო, — თქვა სინანულით, — ეგეთი გოგოები ჩვენს დროსაც იყვნენ, მაგრამ შენისთანა ბიჭებს კი არ მოსწონდათო. რატომ-მეთქი? ბიჭო, ქალს თუ თავისი ატრიბუტებით არა აქვს, ის რა ქალიაო — კეფა მოიფხანა და გაიღიმა. ადვილი მისახვედრი იყო, ქალის ატრიბუტებად რა იგულისხმა, მაგრამ მე არ მეწყინა, პირიქით, დაემშვიდდი და კარგ გუნებაზეც დავდექი, სასაცილოდ მომეჩვენა ამაზე ლაპარაკი და მეც სიცილით ვუთხარი, — ეტყობა, დრო მართლაც შეიცვალა-მეთქი. შვილო, როგორც არ უნდა შეიცვალოს დრო, ოჯახში ქალმა ჯერ ძუძუ უნდა შემოიტანოს და მერმე — ტრაკო!.. ხელები ჩვეულებისამებრ გაშალა და აჭახჭახდა, წამოდგა, ვადამეხვია, თან ჭახჭახი არ შეუწყვეტია... უცებ თვალწინ კარიაულების ქალიშვილები დამიდგნენ და რატომღაც მეგონა, როცა მამაჩემი ხმამაღლა იცინოდა, ისიც დევის ქალებს ხედავდა თვალნათლივ...

მე და ლამარა მალე დავშორდით ერთმანეთს, დავშორდით სამუდამოდ, მაგრამ არა ამ „ატრიბუტების“ გამო, მოხდა ისეთი რამ, რის შემდეგ ჩვენი ერთად ყოფნა შეუძლებელი აღმოჩნდა.

ლამარა რუსთაველის მოედნის მახლობლად ცხოვრობდა, პატარა ქუჩაზე, ოთხსართულიან სახლში. იმ დროს პროსპექტებიც თითქმის ჩაბნელებული იყო და რა გასაკვირია, ქალაქის კულისებში მოქცეული პატარა ქუჩები დაღამებისთანავე წყვდიადს რომ ჩაენთქა. ლამარას ქუჩა, რახან ცენტრის მახლობლად მდებარეობდა, მთლად განწირული არ იყო, ალბათ ყვეთლად ბეუტავდა რამდენიმე ნათურა. ჩვენ მაინც ბნელ კუნჭულებს ვაფარებდით თავს, იქ უფრო მყუდროდ ვიყავით მოყუჩებულები. ერთხელ დეკემბრის სუსხიან ღამით მივაცილე, სიბნელეში შევიყუჩეთ, მაგრამ ლამარამ ყინვას ვერ გაუძლო, ძალიან მცივა, წავალო, — მითხრა და სადარბაზომდე სულ სირბილით მივაცილე. მე, რა თქმა უნდა, შინისკენ გავწიე. ქუჩა ცარიელი იყო. ოციოდე ნაბიჯი რომ გავიარე, რუსთაველის მოედნის მხრიდან ვიღაც კაცმა შემოუხ-



ვინა და ჩემკენ წამოვიდა. ბარბაცით, უფრო ზიგზავით მოდოდა. კარგად გამტყვერალა-მეთქი. — გავიფიქრე. მე მგონი, მძინარე მოდიოდა. ან მთელემარე, ასე იყო თუ, ისე, თვალები უშეკველად დახუჭული ჰქონდა. გვერდს ავუქცევ-მეთქი, მარჯვნივ ავუარე გვერდი, ისიც მარჯვნივ წამოვიდა, ახლა მარცხნივ გავიჭერი, ისიც მარცხნივ გამოქანდა. ერთი სიტყვით, ერთმანეთს შევეფეთეთ. როგორც კი შევეჩახეთ, შემკრთალმა წამოიყვირა და მოულოდნელი სისწრაფით გახტა გვერდზე, დაფეთებული აეკრა კედელს, პატარა, ჩია კაცი ჩანდა, ბეწვის დიდი ქუდი ეხურა.

— რა გინდა? — მკითხა მკაცრად, მკახე ხმით.

— არაფერი, ბატონო, მე ჩემი გზით მივდივარ. — მის მღელვარე წამოძახილს მშვიდი ხმა და კილო დავუპირისპირე.

— რა გინდა-მეთქი, გეკითხები!

— არაფერი არ მინდა, ბატონო! — ვითომ გაოცების ნიშნად ხელები გავშალე.

— ხელები დაუშვი, ლაწირაკო! — გამოსცრა კბილებში.

არც ისე მთვრალი ჩანდა, როგორც მომეჩვენა. ერთს მოვლდებ ყბაში და გაუგებრობას ამით მოეუღლებ-მეთქი ბოლოს, — გავიფიქრე, მაგრამ ხელი როგორ გამერტყა მამის ტოლი კაცისთვის, თანაც მივხვდი, ვილაც სხვა ვეგონე და ჩემი ეშინოდა.

— რომელი ხარ შენ?!

— თქვენ მე არ მიცნობთ, ბატონო, — ვცადე დამშვიდება, ზავის ნიშნად ნაბიჯიც კი გადავდგი, — მე ის არა ვარ, თქვენ რომ გგონიათ...

— არ გაინძრე! — დამიყვირა.

ისეთ უჩვეულო და სულელურ სიტუაციაში აღმოვჩნდი, ხელს ჩავიქნევ და გავეცლები-მეთქი, — გადავწყვიტე. მაგრამ სიბნელეში რაღაცამ გაიჩხაკუნა და უნებურად ხელებზე დავხედე, მომეჩვენა, თითქოს რევოლვერმა იელვა და ისე შემეშინდა, მუხლებიც და მკლავებიც მომეკვეთა.

— არ გაინძრე, თორემ ადგილზევე გაათავებს!

უკვე ველარ ვაზროვნებდი, ხმაც წამერთვა — სიბნელეში ჩემკენ მოშვერილი ლულა გაკრთა.

— მიტრიალდი! — მიბრძანა.

ვერ მივტრიალდი. იმიტომ კი არა, რომ არ დავმორჩილდი, განძრევა არ შემეძლო.

— მიტრიალდი, შე ნაბიჭვარო!

როგორც იქნა, ფეხები ავამოძრავე და მივტრიალდი ზურგი მივუშვირე.

— ახლა წადი!

მთვრალია, თან შეშინებული, — ვფიქრობდი, — ნადვილად მესვრის-მეთქი.

— წადი, გაიარე! — მიყვირა და ნაბიჯის გადასადგმელად პანდური მომაშველა.

წავბორძიკდი, შემობრუნება დავაპირე, მაგრამ რევოლვერის გრიალმა გამაყრუა. გონს რომ მოვედი, თავქუდმოგლეჯილი გავრბოდი. უკანმოუხედავად დავეშვი სკვერის ბოლოს ქვის კიბეებზე და ვერის ხიდისკენ მოვუსვი. ხიდთან შევჩერდი, მივაყურე, არსაიდან ჩამიჩუმე არ ისმოდა. როგორც ჩანს, გვიან იყო. გადავრჩი-მეთქი, — პირველად ეს გავიფიქრე, მაგრამ მესროლა კი? მესროლა, თუ პაერში დაცალა? ვითომ ორ ნაბიჯზე ამაცილა ტყვია?.. თანდათან მოვსულიერდი და შინ წასვლა დავაპირე. შუა ხიდზე ისევ შევჩერდი, მსუსხავი ქარი უბერავდა და პალტოს საყელო ავიწიე, თავი შიგ ჩავრგე. ტირილი მომინდა, საზიზღრად დამცირობულად და შეურაცხყოფილად ვიგრძენი თავი. ვინ იყო ეს გიჟი, რა დღეში ჩამაგდო? მეც რა ლაჩრულად, რა დედლურად მოვიქეცი, ლამის დავუჩოქე. შემეშინდა. რისი და ვისი შემეშინდა?

ჩემს თავს უკვე ველარ ვერეოდი, გული გახეთქვაზე მქონდა, ნერვები დამაწყდა და ტვინი ამემღვრა. რატომ? რისთვის დავისაჯე ასე მკაცრად, რა უფლებით დამამცირეს, რა უფლებით მომაყენეს შეურაცხყოფა? იქნებ სჯობდა კიდევ ტყვია მომხვედროდა? სირბილით მივბრუნდი უკან, ქვის კიბეებიც ავირბინე და მივედი იმ ადგილას, საიდანაც წელან დამფრთხალი და შეშინებული კურდღელივით გამოვრბოდი. ქუჩა ცარიელი და უკაცრიელი დამხვდა, მყუდრო და მღუმარე, თითქოს ეს სიჩუმე და მყუდროება საუკუნეების მანძილზე არ დარღვეულა.

შინ აღელვებული და აფორიაქებული დავბრუნდი. მამაჩემი იწვა, მაგრამ არ ეძინა, მე მელოდებოდა. ამ ღამ-ღამობით რას დაეთრევიო, — მითხრა და კედლისკენ გადაბრუნდა.

მეც ვუთხარი, რას დავეთრეოდი, დეტალურად მოვუყევი, რაც გადამხდა, თან ჩემი მძიმე განცდებიც მივაყოლე, გული გადავუხსენი. მამისგან თანადგომასა და თანაგრძნობას ველოდებოდი, მინდოდა, როგორმე დავმშვიდებულიყავი, მამის ნუგეშიანი სიტყვა გამეგონა. კარგად გადარჩენილხარო, — მითხრა ისე, ჩემთვის არც მოუხედავს. კიდევ საკმაო ხანს ვიდექი მისი საწოლის წინ, — იქნებ კიდევ რაღაც მითხრას-მეთქი. ვგრევე, სიტყვის უთქმელად დაიძინა.

ღილით ადრე ავდექი, მამა წასული დამხვდა. ასე ადრინად არასოდეს გადიოდა სახლიდან.

ორი დღე გულს ვასკდებოდი, გარეთ ფეხი არ გამიდგამს. გამწარებულმა არ ვიციოდი, რა გამეკეთებინა და აყრილ-დაყრილი სახლი დავალაგე. ოთახები გამოვხვეტე, ერთი კვირის გაურეცხავი ჭურჭელი დავრეცხე და დავაყრიალე. მამაჩემს ხაზგასმულად არ ვცემდი ხმას, ბევრს ხომ არ ვთხოვდი, მხოლოდ მცირე ნუგეში მინდოდა, მინდოდა მეგრძნო, რომ გვერდით ვიღაც მიდგას და ქვეყანაზე მარტო არა ვარ. ჩემი დამდურება თუ გაბუტვა აინუნში არ ჩაუგდია, ერთხელ არ უკითხავს, — შვილო, რა დაგემართა, ხმას რატომ არ მცემო? სამსახურიდან მოვიდოდა, ისადილებდა, ცოტას წაუძინებდა და ისევ წავიდოდა, თითქოს მე მეჭინებოდა, ახლა მან დაიწყო დამ-დამობით გვიან-გვიან დაბრუნება.

ორი დღის შემდეგ ლამარას შეეხვდი და ისევ ამ პაწაწინა არსებამ მომგვარა შვება. ჩემი დამცირებისა და სამარცხვინო გაქცევის ამბავი არ გამიმხელია, ისე, თავისთავად იყო ლამარა სიმშვიდისა და იმედის მომტანი. მის ახლოს, მის გვერდით თავს ყოველთვის კარგად ვგრძნობდი, იმედიანად... ისევ ვაცილებდი დამ-დამობით სახლამდე, ქუჩა-ქუჩა ვეძებდით და ადვილად ვპოულობდით ბნელსა და მყუდრო თავშესაფარს, სადაც დრო ჩვეულებრივი საათის მიხედვით არ აღირიცხებოდა, გაცილებით სწრაფად მიედინებოდა.

ლამარასაგან წამოსული ყოველთვის ვგრძნობდი, ვიღაც მითვალთვალებდა, უფრო სწორედ, სიბნელეში მორიალე ლანდი რამდენჯერმე შევამჩნიე და ამან მაფიქრებინა, — ვიღაც მითვალთვალებს-მეთქი. ვერ დავიტრაბახებ, ეს ჯიუტად ადევნებული ლანდი თითქოს არ მაშფოთებდა, ან არ მაშინებდა. შემკრთალი და დაძაბული ვცდილობდი, გავმაგრებულიყავი,

არ შევქრთალიყავი, რადგან უეცარ შეხვედრასაც ვითვალისწინებდი... ჯერ იგივე, ბეწვის ქუდიანი კაცი მეგონა, მაგრამ მალე დავრწმუნდი, სხვა იყო, სხვა აღნაგობა ჰქონდა, იმასთან შედარებით ეს გოლიათად მეჩვენებოდა, თუმცა რა ვიცი, ზოგჯერ გავიფიქრებდი, — შიშს დიდი თვალები აქვს-მეთქი, მით უმეტეს სიბნელეში.

დრო გადიოდა, ლანდი ახლოს არ გამეარებია, პირიქით, მემალებოდა, ალბათ ეგონა კიდეც, — ვერ მამჩნევსო. ამან უფრო დამძაბა და შემაფიქრიანა, ეტყობა, ხელსაყრელ მომენტს ეძებდა, მაგრამ ჩემთან თუ რაიმე ანგარიში ჰქონდა გასასწორებელი, უკეთეს დროს ვერ მოიხელთებდა. ზამთარი იყო, ციოდა, ბნელოდა, ქუჩაში კანტი-კუნტად თუ გაივლიდა ვინმე, იმასაც ალბათ თავისი უჭირდა და სხვისი დარღისა და საწუხრის გაზიარება გაუძნელდებოდა.

ბოლოს და ბოლოს, ადამიანი ყველაფერს ეჩვევა და მეც შევეჩვიე იმ ლანდს, ჩემი ბედისწერა ეგა ყოფილა-მეთქი, — ვფიქრობდი და ერთი დღეც რომ გაეცდინა, ხეს ან შენობის კუთხეს ამოფარებული რომ არ დამეღანდა, უსათუოდ ძებნას დავუწყებდი. შიშს დიდი თვალები აქვს-მეთქი, ვთქვი და მეც ცოტას ვაზვიადებ, თორემ ამ კუკუ-დამალობანამ სულ ერთი კვირა გასტანა, თუმცა ერთი კვირის მანძილზე გამუდმებული გულის კანკალი არც ის, იოლი საქმე იყო.

ომის დამთავრების შემდეგ პირველი ახალი წელი დგებოდა. ოთხი დღეც და ათასცხრაას ორმოცდაექვს წელს ვიდღესასწაულებდით. ლამარამ მითხრა, — საღამოს ჩემთან უნდა მოხვიდეთ, რამდენიმე სტუდენტი, მათ შორის დურმიშხანიც, ჩამოთვალა, — ესენიც იქნებიანო. რა ხდება-მეთქი, ვკითხე. ისეთი არაფერიო, — მიპასუხა, — არ გამაწბილო, თორემ მეწყინებო. ლამარას დაბადების დღე ვივარაუდე, თითქოს ვიცოდი, როდის იყო დაბადებული. ერთხელ გაკვრით ახსენა და, როგორც ჩანს, გადამავიწყდა. ზოგს დაბადების დღეს ვერ გამოაპარებ, სწორედ ამ დღის მიმართ აქვთ გამახვილებული და დაგეშილი მენსიერება. მე ვერ ვიმახსოვრებ, არც იმის თავი მაქვს, ბლოკნოტი შევიძინო, ჩავეიწერო და მერმე თვალი ვადევნო, — არიქა, არ გამომჩრჩეს, ერთი ვნახო, დღეს ვისი დაბადების დღეა-თქო. მაგრამ ლამარას დაბადების დღე უსათუოდ უნდა გამხსენებოდა.

გულით მინდოდა, დასამახსოვრებელი რაღაც მიმეტანა, რაც უნდა იყოს, ლამარას ოჯახში პირველად მივიღიოდი. საკუთარი სახსრებით ამას ვერ შევძლებდი, ისევ მამაჩემისათვის უნდა მიმემართა, მაგრამ ეს ერთი კვირა შინაგანი ბოიკოტი მქონდა გამოცხადებული, ვითომ ჩემი მძიმე და რთული სულიერი მდგომარეობა არაფრად ჩააგდო-მეთქი. ინსტიტუტიდან ცოტა ადრე წამოვედი. მეჩხერი წვერი სამართებლით ჩამოვიფხიკე, პირი და კისერი დავიბანე და საღაბადებისდღეოდ გამოვეწყე. მამა სამსახურიდან დროზე მოვიდა, ერთად ვისადილეოთ. ახლა მთავარი იყო, სათქმელი მეთქვა, თანაც ისე, რომ მეგრძნობინებინა — მაშინდელი უგულო დამოკიდებულება ჭერ არ დამვიწყებია-მეთქი. გამიჭირდა. ბოლოს, სხვა რა გზა მქონდა, გავბედე და ვუთხარი. ჭერ ჩემთვის გაუგებარი ფრაზა წამოსცდა, — წაიღებ, ინანებ, არ წაიღებ, მაინც ინანებო... მერმე დაფიქრდა, — ფული რომ მოგცე, ყიდვით ახლა რას იყიდო?.. ყვავილების მიტანა შეიძლებოდა, მაგრამ გვიან არის, ველარ იშოვნო, თანაც მაინცდამაინც ყვავილების მიმართვე კაბუქს არა ჰგავხარო... დესაუში, მდინარე მულღეში გერმანელი ბავშვი იხრჩობოდა და გადავარჩინე, დედაშისმა იმავე საღამოს მომნახა, სამახსოვრო საჩუქარიც დიდი მოწიწებით მომართვაო. — თქვა და ჭურჭლის კარადიდან ფაიფურის ლურჯი ფინჯანი გამოიღო თავის თეფშიანად და მაგიდაზე დადო, — შინ ამაზე ლამაზი და ძვირფასი არაფერი მოგვეძიებება და, თუ გინდა, ეს წაიღეო. მეც არავინ მყავდა ლამაზზე უფრო ლამაზი და ძვირფასი და დავთანხმდი. თვითონვე გამიხვია ფრთხილად და გამატანა, შინიდან გასვლისას შემატრიალ-შემომატრიალა, ამხედ-დამხედა, — როგორ გამოიყურებით და გამიშვა.

მაინც სხვა კაცია-მეთქი, — ვფიქრობდი გზაში, — ერთადერთი ძვირფასი ნივთი მქონდა და ისიც გამომატანა... თითქოს შემეცოდა კიდეც, განა ვერ ვგრძნობდი და ვერ ვატყობდი, როგორ შეიცვალა, მუდამ შეწუხებული და ჩაფიქრებული დადიოდა, გეგონებოდა, რაღაც დაჰკარგა და ველარ მიაგნო ან დაკარგული ვერ აინახლაურა. ერთი სიტყვით, ის სანდრო აღარ იყო, როგორიც ომიდან დაბრუნების პირველი დღეებიდან დამამახსოვრდა. ძველებურად აღარ ბობოქრობდა, აღარ იციონოდა, აღარ ჭახჭახებდა. კარგად ისიც არ ვიცოდი, სად მსა-

ხურობდა. ვისთან დადიოდა, რა ხალხთან ჰქონდა ურთიერთობა. ამდენი რჩევა-რჩევის შემდეგ კმაყოფილ იყო, თუ არა სამსახურისა? იქნებ ვიღაც ქალი შეუყვარდა, ცოლის მოყვანა უნდოდა და ჩემი ერიდებოდა, მე ვუშლიდი ხელს? ქალისკენ ლტოლვა უკვე მისი ასაკისათვის შეუფერებელ საქციელად აღარ მეჩვენებოდა, თრმოცდასამი წლის კაცი იყო, ჯანღონით სავსე, ენერგიული... კაცს ალბათ ათასი რამ აწუხებდა, თავისი სატკივარი სტკიოდა და მე კი ჩემსას მივრეკავდი, ბავშვივით ვებუტებოდი.

კარი გაღიმებულმა ლამარამ გამიღო, ბედნიერი თვალები შემომანათა, ლოყა მომიშვირა, — მაკოცეო და მეც დავიხარე, კოცნით მივულოცე დაბადების დღე, საჩუქარიც გადავეცი. შემიყვანა ბროლის დიდი ჭაღით განათებულ დარბაზში, სადაც დიდი, ოთხკუთხედი მაგიდა სტუმრების მისაღებად გაწყობილი და გამზადებული დამხვდა. ახლავე დავბრუნდებიო, — თქვა და ჩემი საჩუქრიანად გაცუნცულდა.

ამოდენა სივრცეში მარტო დავრჩი და სინანულით გავიფიქრე, — ასე აღრიანად ნეტავი რა მომარბენინებდა-მეთქი. ლამარა, რა თქმა უნდა „ახლავე“ არ დაბრუნებულა და რახან ღროცა და საშუალებაც მქონდა, იქაურობის დათვალიერებას შევუდექი. უცნობ, ჩემთვის უჩვეულო გარემოში მოვხვდი და ჩემ თავს ხუმრობით ვაფრთხილებდი, — ახლა მთავარია, არაფერი გაგიკვირდეს-მეთქი. ნუგბარი სუფრა იყო გაშლილი. მეხსიერება დავძაბე, მინდოდა გამეხსენებინა, ასეთი საჭმელები მენახა თუ არ მენახა ომამდე, ვერ გავიხსენე, რადგან მაგიდაზე ელაგა ის, რაც კაცობრიობამ ომის დროს გადაივიწყა. სუფრის აღწერას არ შევუდგები, არც მაქვს სურვილი, რადგან მაშინ ომი ახალი დამთავრებული იყო, ხალხი ჯერ კიდევ შიმშილობდა და, შესაძლებელია, რაღაც-რაღაცები გაზვიადებულად მომეჩვენა კიდევ.

ოთახში უამრავი ძვირფასი ნივთი იდგა: წითელი ხის სერვანტი, ინკრუსტირებული, ასევე ინკრუსტირებული ვიტრინა, წითელი ხის დაბალი, მრგვალი მაგიდა, სოფა, ტყავის ორი სავარძელი... კედლებზე სურათები ეკიდა. ერთი კედელი დათმობილი ჰქონდა უზარმაზარ ტილოს, ეს იყო აივანოვის „მეცხრე ტალღა“. სხვადასხვა ზომის „მეცხრე ტალღა“ ბევრ ოჯახში მინახავს, მაგრამ ისე დიდს პირველად ვხედავდი, ეს სუ-

რათი ფართობით ჩაგრავედა დანარჩენებს. ვიტრინაში იმდენი და ისეთი ძვირფასი ფინჯნები გამოეფინათ, რომ შემრცხვა ჩემი მოტანილი საჩუქრისა და მგონი, გავწითლდი კიდევ სირცხვილისაგან, — ალბათ ჯობდა, ყვავილები მომეტანა-მეთქი.

ისევ ლამარა მომველინა მხსნელად, სახეგაბრწყინებული შემოვიდა და, საცაა სხვებიც მოვლენო, — დამაიმედა, მერმე, როგორც საიდუმლო, ჩურჩულთ გამანდო — დედაჩემი გაგიჟდა, ძალიან მოეწონა შენი საჩუქარიო. ჩემი საჩუქრის ამგვარ შეფასებას არ მოველოდი და უფრო თავაზიან ქათინაურად ჩავთვალე. შემდეგ გაირკვა, ლამარას დედა ფაიფურის დიდი მოტრფიალე და მცოდნე ყოფილა თურმე. ჩემი მიტანილი ფინჯანი მეჩვიდმეტე საუკუნის მიწურულის ან, უკიდურეს შემთხვევაში, მეთვრამეტე საუკუნის დასაწყისის გერმანული ფაიფური აღმოჩნდა. გულწრფელად გამიხარდა, ამაზე სასიამოვნო რა უნდა იყოს, როცა შენი საჩუქარი მოეწონებათ...

ამასობაში ღურმიშხანი შემოუძღვა თანაქურსელებს. ხმაურითა და სიცილით შემოცვივდნენ, კალიებივით მოედვდნენ იქაურობას, სასწრაფოდ დაიპყრეს სივრცეები, სოფა, სავარძლები, საიდანდაც ნარდი გააჩინეს და თამაშიც გაახურეს. კარტი ხომ არ გინდათო, — იკითხა ლამარამ და გავიდა, მაგრამ კარტი აღარ შემოუტანია, ალბათ დაავიწყდა. სულ ათი თანაქურსელი დავთვალე, ექვსი — გოგო და ოთხი ბიჭი, მე მეთერთმეტე ვიყავი. ღურმიშხანი მოვიდა და მკითხა, — დიდი ხანია მოხვედიო? არა-მეთქი, — ვუპასუხე. პირველად ხარო? პირველად-მეთქი! ჰოო — დასძინა მრავალმნიშვნელოვნად, მხარზე ხელი დამკრა და ნარდისაკენ წავიდა.

შემოვიდა დაბალი, მსუქანი არსება, ეს დედაჩემიაო, — თქვა ლამარამ და ყველა ერთბაშად წამოიშალა. დიდი პატივისცემითა და მოწიწებით მივესალმეთ. ლამარას დედას სამი ქალბატონი შემოაპყვა. ესენი დეიდები არიანო, — განაცხადა ისევ ლამარამ. დები ერთი სიმალლისანი იყვნენ, ოლონდ მეტნაკლებად მსუქნები. არა, დაბლები არ ეთქმოდათ, რა გასაკვირია, აღამიანი ზოგი დაბალია, ზოგი — მაღალი, ზოგიც საშუალო ტანისაა. ესენი კი უფრო ჯუჯებს ჰგავდნენ, რალაცნაირად კოტიტები იყვნენ. სამივე გაუთხოვარიო, — მამცნო ღურმიშხანმა.

— თქვენ შორის ოზო რომელია? — იკითხა ლამარას დედამ.

— მე ვარ, ქალბატონო, — წინ წავდგი ფეხი და თავი დაგხარე.

— ძალიან კარგი — ღიმილით ამოხხედა.

არ მოველოდი, სასიამოვნო სახე ჰქონდა, თან მომეჩვენა, რომ ლამარა თვალებით დედას ჰგავდა.

— მე ფაიფურის ტრფიალი ვარ და თითქმის ყველა მისი საიდუმლოც ვიცი, — თავი ოდნავ გვერდზე გადახარა და გაღიმებული მეუბნებოდა — თქვენი ფინჯანი მეჩვიდმეტე საუკუნის მიწურულსაა გერმანიაში დამზადებული. ამას წყალი არ გაუვა. ჩემი უფროსი და კი ამბობს მეთვრამეტე საუკუნის დასაწყისისააო, მაგრამ არ არის სწორი.

— ამოცანა გვეკითხება, რომელი დაა უფრო მართალი? — ჩურჩულით მითხრა ჩემს ზურგს უკან მდგარმა დურმიშხანმა.

— „ცისფერი ხმლები“ ევროპაში უძველესი ფირმაა და რამდენადაც ვიცი, ეს ფირმა დღემდე არსებობს. ჩემი ოცნებაა — ამ ფირმის მთლიანი სერვიზი... ოღონდ ძველი... თუნდაც მეცხრამეტე საუკუნისა.

— ქალბატონო, ამ ფირმის ერთადერთი ფინჯანი გვექონდა. — ვუბასუხე სხაპასხუპით, არ იფიქროს, თითქოს კარადები „ცისფერი ხმლების“ სერვიზით გვაქვს გამოძეძვილი.

— ისიც ლამარასთვის გაიმეტეთ, არა!

— ლამარასთვის არაფერს დავიშურებ, ქალბატონო.

— ყოჩაღ! ყოჩაღ! ნამდვილი ქართველი ხარ — ამას ისევ დურმიშხანი მეჩურჩულედა.

— დედა, ნუ აწუხებ სტუმრებს!.. დავსხდეთ, მეგობრებო, დავსხდეთ! — ეს კი, ალბათ მიხვდით, ლამარაა.

ქალბატონები ოთახიდან რომ გაგოგმანდნენ, დურმიშხანმა ერთხელ კიდევ ჩამჩურჩულა:

— ბიჭო, ამათ, მგონი, ჯიშის გასაუმჯობესებლად უნდინხართ!

კინალამ გამეცინა, — გამოუსწორებელი ვილაცაა-მეთქი ეს დურმიშხანი.

ჩიტი ასაფრენად მზად იყო და ხელის აქნევას ელოდებოდა... როგორც კი ნება დაგვრთეს, წამიც არ დაგვიყოვნებია, შევესიეთ და, ვიღრე თამადას ავირჩივდით, შემუსრული



აღმოჩნდა მთელი სუფრა. ოთხი ქალბატონი ვერ აუდიოდა ჩვენი მაგიდის სურსათ-სანოვაგით მომარაგებას. ღურმიშხანი თამადად დადგა, თვითონვე თქვა — თამადობას სხვა მაინც არ იკისრებს, ვიცი ჩემი ბედის ამბავიაო. მოკლე-მოკლე სადღეგრძელოებს ამბობდა, ოღონდ ღვინოს გვაძალებდა, ძალით გვასმევდა, მომცრო ჭიქა კი იყო, მაგრამ ბოლომდე გვატლე-ვინებდა...

ლამარა ჩემს გვერდით იჯდა, კმაყოფილი და ბედნიერი, ვერ ითმენდა და წინასწარ მეუბნებოდა, — ახლა ამ კერძს შემოიტანენ და ახლა ამასო. მეტის ჭამა არ შემეძლო, თავიდანვე დაეხარბდი და ზედმეტი მომივიდა. ხომ კარგი დეიდები მყავსო, — მეკითხებოდა, — შეხედე, რა საყვარლები არიანო... და კიდევ ერთი ცნობა მომაწოდა, — გაუთხოვრები არიანო. ეს უკვე ღურმიშხანისაგან ვიცოდი, თანაც ჩემთვის ამას რა მნიშვნელობა ჰქონდა, მე ხომ არ მომიწევდა მათი გათხოვება. მთავარია, ლამარა მიყვარდა და მსიამოვნებდა, გახარებულსა და კმაყოფილს რომ ვხედავდი. ლამარამ რამდენჯერმე მიხსენა კიდევ საყვარელი დეიდები, არ ვიცი, მეც შევეჩვიე, თუ რა მოხდა, მართლაც საყვარლად მეჩვენებოდნენ უკვე ეს კოტიტა ქალბატონები, მზრუნველები და კეთილები ჩანდნენ, ისიც კი წარმოვიდგინე, როგორ ანებივრებდნენ ერთადერთ დის-შვილს.

ზარი დაირეკა.

ეს მამაჩემიაო, — წამოიძახა ლამარამ, სხარტად წამოხტა და შემოსასვლელისაკენ გაიქცა. დაბრუნებულმა ღურმიშხანს უთხრა, — მამას ვთხოვე და ახლავე შემოვო. ისევ თავის ძველ ადგილას, ჩემს გვერდით დასკუპდა. ჩვენ ყველანი მოლოდინით აღვსილნი გავიტრუნეთ, ღურმიშხანი ფეხზე იდგა, სავსე ჭიქისთვის ხელი წაველო და ისიც მოთმინებით ელოდებოდა ლამარას მამის შემობრძანებას. ჩაფიქრებულიც იყო, ეტყობა, გუნებაში ჩარხავდა და აქაზრაკებდა შესაფერ სადღეგრძელოს.

ლამარას მამა შემოვიდა და ყველა ფეხზე წამოდგა.

მე არ წამოვმდგარვარ, უნებურად წამოვიწიე, მაგრამ წელი ვერ ავითრიე, რადგან მოულოდნელი და გაუთვალისწინებელი ელდა მეცა. ჩემ წინ იდგა ის კაცი... სწორედ ის კაცი, ამასწინათ ნასვამი რომ შემეფეთა ქუჩაში... შემოსვლისთანავე

ვიცანი! მე მისი სახე არ მახსოვდა, ნამდვილად არ მახსოვდა, ის სიბნელეში არ ჩანდა, ვერ დავინახე და როგორ დავიმახსოვრებდი? მაინც ვიცანის როგორც კი ოთახში ფეხი შემოდგა და ერთი ჰაერი ჩავისუნთქეთ, იმია ვიცანის!.. მოულოდნელი ელდით ვიცანის!

არ ვიცი, ლამარამ და სხვებმა რა იფიქრეს, ამ კაცს ფეხზე რომ არ წამოვუდგე. მე უკვე ვერაფერს ვხედავდი და არაფერი მესმოდა. მესმოდა მხოლოდ გაუთავებელი დუდუნით თუ ზუზუნით და ვგრძნობდი, დურმიშხანი სადღეგრძელოს აჯახირებდა. თანდათან აზრზე მოვდიოდი, მაგიდასთან ოდნავ მოწყვეტილი ვიჯექი. ხელები მუხლებზე მეწყო და ფეხებშორის იატაკს ჩავცქეროდი, თავის ალება მიჭირდა, ლამარას მამისკენ გახედვა არ მინდოდა, ალბათ არც შემეძლო. რა მოგივიდა, ცუდად ხომ არა ხარო, — მკითხა შეწუხებული ხმით ლამარამ. პასუხი არ გამიცია, ახლა უკვე ერთს ვფიქრობდი, — აქაურობას როგორმე თავი უნდა დავაღწიო-მეთქი. ღვინო საგრძნობლად მომკიდებოდა და მეშინოდა, უხერხულად არ მოვქცეულიყავი...

მერმე წამოიშალნენ და ყველამ ერთად თუ ერთხმად ადღეგრძელეს ბატონი ვარლამი... ბატონი ვარლამი... ვარლამი... ვაარლაამ! ეს კაცი თურმე ბატონი ვაარლაამი ყოფილა... სამწუხაროა, რომ აქამდე არ ვიცოდი... ოზო, ადღეგრძელე, მამა შენ გელოდებო, — ეს ისევ ლამარა იყო... ბიჭებო, ამ სადღეგრძელოს კარგი „მრავალქამიერი“ მოუხდებო, — დურმიშხანი სიმღერის შეკოწიწებას ცდილობდა, განა ვერ ვხვდებოდი, სიმღერაზე უფრო ყველასათვის გაუგებარი და უხერხული დუმილის დარღვევა უნდოდა... ოზო, მამა გელოდებო, — არ მეშვებოდა ლამარა, მეჩურჩულებოდა.

ახლავე ქალბატონო, რახან ასეა საჭირო, აქ არა ვარ?! 1

უცებ წამოვდგე, სკამი გავწიე და პირდაპირ ბატონ ვარლამისკენ გავეშურე, დუმილში მხოლოდ ჩემი ნაბიჯების ხმა ისმოდა. ერთი წუთით თავი ავიღე და დავინახე: ღია კარიდან ოთხი და ღიმილით შემომყურებდა, უფრო — შემომციცინებდა, როგორც მომავალ იმედს, როგორც სიხარულისა და ბედნიერების მომავალ მომნიჭებელს. მე უკვე მტკიცე ნაბიჯით მივუახლოვდი ბატონ ვარლამს, დავიხარე და თვალებში ჩავხედე. ქვემოდან ვილაცამ წვრილი, უფერული თვალებით შე-

მომხედა. მერმე ყურში ჩავჩურჩულე, — ბატონო ვარლამ, მე ის გახლავართ, ამასწინათ ქუჩაში რომ ავინეთ და რევოლვერი ესროლე-მეთქი. ახლაც უკან გადახტომა დააპირა, მაგრამ დავასწარი, ხელი მაგრა წავავლე მკლავზე და შევაჩერე.

— ნუ აღელდებით, ბატონო, ყველაფერი რიგზე იქნება, — დავამშვიდე, ისევ მტკიცე ნაბიჯით გავწიე შემოსასვლელისაკენ, ჩამოვხსენი ჩემი პალტო და... სადარბაზო კიბეზე დავექანდი.

ქუჩაში გამოსულმა სიცივე ვიგრძენი და გამხსენდა, პალტო ხელით რომ მომქონდა. პალტოს ჩაცმისას წინ ჩემი ნაცნობი ლანდი დავინახე და გამეცინა. მშვიდობით-მეთქი — დავემშვიდობე, ამიერიდან შენთვის დამითმია ეს ქუჩაც, ეს სახლიც და ისინიც, ვინც ამ სახლში ცხოვრობენ, ამიერიდან შენ ამ ქუჩაზე გავლილს ველარ მიხილავ-მეთქი. ეტყობა, ჩემმა ძველმა მეგობარმა და ერთგულმა ლანდმა ვერ დამინახა, ისიც კაცია, მართლა ლანდი ხომ არ არის?! შეიძლება, ჩაფიქრდა ანდა დაეჭვდა, შეიძლება, იმასაც უჭირს, მაშ ამ ღამეში, ამ მსუსხავ ღამეში, როცა ძალღსაც კი არ გაავდებენ გარეთ, რას დაძრწის, რატომ ეფარება ხეებსა და შენობის კედლებს?

სწორედ იმ დროს მივეუახლოვდი, პაპიროსს ცეცხლს უკიდებდა. ეს იყო მეორე ელდა, თუმცა იგი არაფრით ჰგავდა წელან განციდილს, მაგრამ მაინც ელდა იყო.

ზურგით ხეს მიყრდნობილი ლანდი, ანთებული ასანთი პირთან რომ მიეტანა, მამაჩემი აღმოჩნდა, თვით სანდრო ბოდაველი. თავი რომ ასწია და მის წინაშე მდგარი და გაღიმებული დამინახა, ოზო, შენ ხარო? — წამოიძახა. მე ვარ-მეთქი, — ვუპასუხე. აქ საიდან გაჩნდიო? — ისე გაიკვირვა, ვითომ არ იცოდა, აქ საიდან გავჩნდი. მაგრამ შენ აქ რა გინდა, რას უდგახარ-მეთქი. ამ შეკითხვისათვის როგორც ჩანს, მზად არ იყო, დიდხანს იფიქრა, მაგრამ პასუხი არ გაუცია. შინ ისე წამოვედი, თითქოს ერთად კი არ მოვდიოდით, დარცხვენილი და დაბნეული უკან მომყვებოდა და თავის გასამართლებელ სიტყვებს ეძებდა. აქ ერთი ჩემი ფრონტელი მეგობარი ცხოვრობს, შინ არ დამხვდა და იმას ველოდებო, — აშკარად მატყუებდა, — სასწრაფო საქმე მქონდა, გადაუდებელიო... არა უშავს, ხვალ აღრიანად მივაკითხავ, დღეს სადმე გატყუებოდაო. არავითარი ფრონტელი მეგობარი ამ ქუჩაზე არ ცხოვ-

რობდა, ეს ვერსია გზაში მოიგონა. მე ხომ ლანდი ერთი კვირის წინ შევნიშნე, ოღონდ არ ვიცოდი, რომ მამაჩემი იყო. ამ ერთი კვირის მანძილზე ქუჩის ბნელ კუნძულებში მდარაჯობდა თურმე, თუ კვლავ გადავეყრებოდი იმ ტიპს, თვითონ გაუსწორდებოდა, თუმცა არც ისაა გამორიცხული, რომ მარტოც ესწრაფვოდა შეხვედრას... ოღონდ არ იცნობდა და ალბათ შემთხვევის იმედით უსაფრდებოდა, იქნებ ბედმა გამიღმოსო.

კარგად გიცნობთ, ბოდაველებო, კარგად ვიცი თქვენი ავანჩავანი! სანდრო ბოდაველო, განა შენც ის არა ხარ, რაც ანანოა? განა ერთი ჭილაგისანი, ერთი ბუღისანი არა ხართ?! განა ანანომ ცხრა მთა არ გადაიარა, ვილაც გარეწარი რომ დაესაჯა?!

ჰაერზე გამოსულმა უფრო ვიგრძენი ღვინის ძალა. მამაჩემმა მკლავზე ხელი მომკიდა და მკითხა, — როგორი ღვინო იყო?

მე სულ სხვა რამ ვუბასუხე:

— შენი ფრონტელი მეგობარი იქ აღარ ცხოვრობს, ერთი კვირაა, რაც გადავიდა... იმის ძებნაში ტყუილად დროს ნუ დაჰკარგავ. აღარც ლამარა ცხოვრობს იმ ქუჩაზე, ისიც გადასახლდა. სად? არ ვიცი... სადღაც! ამიტომ იქით, — მარჯანიშვილის თეატრთან შევეჩერდი და უკან მივიხედე, — არც მე ვივლი, მორჩა! იცოდე, ყველა ვალი გასტუმრებული მაქვს, შენი შვილი არავის ვალში არ დარჩება.

ალბათ, მიმიხვდა მამაჩემი, რაც ვუთხარი, უმაღვე დამეთანხმა — რაკი ეგრეა, ეგრე იყოსო.

ღილით ცუდ გუნებაზე ავდექი და შიგნით უსიამოვნოდ ვიშმუშნებოდი. მომეჩვენა, წუხელ ცუდად მოვიქეცი, თუმცა არც ის ვიცოდი, კარგად როგორ უნდა მოვექეულიყავი. იმ წუთებში მე ხომ ველარ ვაზროვნებდი, ჩემს თავს — გულსა და ნერვებს ვერ ვერეოდი. ხომ შეიძლებოდა უარესიც ჩამედინა? თავის მართლებამ შეება ვერ მომგვარა. მამაჩემისთვის მინდოდა რალაციები მეთქვა და მეკითხა, წასული დამხვდა. ნავთქურაზე ჩაი აგადულე და დავლიე. ოთახშიც ისევე ციოდა, როგორც გარეთ, ზამთარს მოუმზადებელი შეეხვდით, არც ღუმელი გვეკონდა, არც შეშა მოგვიმარაგებია, ნავთქურა რას წავადგებოდა, თუმცა დილიდან გვენთო შუშაბანდში...

იმან ლაწირაკი და ნაბიჭვარი მიწოდა, მერმე პანლური ამ-  
რმკრა და ტყვია დამახალა. ამის სანაცვლოდ მე ყურში ჩავ-  
ჩურჩულე, — მე სწორედ ის გახლავართ, თქვენ რომ იმ და-  
მეს შეურაცხყოფა მომაცენეთ და რევოლვერიც მესროლეთ-  
მეთქი. მერმე მკლავზე უხეშად წავევლე ხელი და მოვქაჩე. ეს  
იყო და ეს. შურისძიების გრძნობის ანაფხევი კი დავიკმაყო-  
ფილე, მაგრამ ეს ხომ ვერ აანაზღაურებდა დამცირებას, შე-  
ურაცხოფას, შელახულ ადამიანურ ღირსებას და ამით გამო-  
წვეულ ტკივილის განცდას, სულიერ ტრავმას? მე მგონია, ასე-  
თი რამ უკვალოდ არ ქრება, იგი სამუდამო მნიშვნელოვან  
დაღს ასვამს ადამიანის სულს, მით უმეტეს, როცა ის ადამი-  
ანი ჩვიდმეტი-თვრამეტი წლისაა. მე მინახავს, ქუჩაში რა  
დღე დაუყრიათ ჯიბის ქურდისთვის, რომელსაც ვიღაცისთვის  
ჯიბიდან ხუთი მანეთი თუ თუმანი ამოუცლია, თითქმის იქვე  
ჩაუქოლავთ. ისიც მინახავს, ყველას წინაშე ერთმა როგორ და-  
ამცირა მეორე, ძალ-ღონით როგორ დაჩაგრა. ტრამვის გაჩე-  
რებასთან კეფაში წაჰკრა, ცხვირში ხელი წაუჭირა, ყბა მოუღ-  
რიცა, დედა აგინა... ვითომც არაფერი... ვაგონში ავიდა თავ-  
ხედურად გაამაყებული. ის კი მხრებჩამოყრილი, დამცირე-  
ბული, შევიწხებული, სეირის მოყვარულებმა ანუგეშეს, ასეც  
უთხრეს, — არაფერიაო, ისეთი არაფერი მომხდარაო, დაწყ-  
ნარდი და დამშვიდდი, რას იზამ, მჯობნის მჯობნი არ დაილე-  
ვაო... ბავშვობისას ვნახე და დღემდე მახსოვს იმ კაცის გამ-  
წარებული სახე, ცრემლჩამდგარი შეშლილი თვალები. ქურდი  
უსათუოდ უნდა დაისაჯოს, მაგრამ კაცის ღირსებას როცა ბლა-  
ლავენ...

ინსტიტუტში აღარ წავსულვარ, მეორე-მესამე დღეს უკვე  
საბოლოოდ მქონდა გადაწყვეტილი, ინსტიტუტისათვის თავი  
დამენებებინა და უნივერსიტეტში გამეგრძელებინა სწავლა.  
ეს გადაწყვეტილება დიდხანს მწიფდებოდა და ბოლოს ნა-  
ყოფიც მოწყდა. მამაჩემს დაუუჯერე, იმან მიჩჩია, თუმცა მა-  
შინ არც მე ვიცოდი მტკიცედ, რა მინდოდა.

ლამარასთან შეხვედრას გავუბოდი, მაგრამ იმდენად არა,  
რომ ინსტიტუტიდან გამოვქცეულიყავი. თუ მოინდომებდა ჩემ-  
თან დალაპარაკებას, ვეტყოდი, რაც მოხდა, რის გამოც ჩა-  
ვიდინე ასეთი უსაქციელობა.

მალე ღურმიშხანმა მომაკითხა, თითქოს შემფოთებული

იყო, თვალსა და ხელს შუა უგზო-უკვლოდ რომ დავიკარგე. მარწმუნებდა, — ჩემი სურვილით მოვედი, ლამარას არ გამო-  
ვუგზავნივარო. მაინცდამაინც არ დავინტერესებულვარ, ლა-  
მარამ დაავალა თუ საკუთარი ინიციატივით გამომეცხადა, ჩემ-  
თვის ესეც და ისიც სულერთი იყო. მირჩია, მიდი და ბოდინში  
მოუხადეო, შენი ხულიგნობა ღვინოს დააბრალებ, იქნებ გაპატი-  
ოსო. სიამოვნებით, — ვუთხარი, — თუ კი მაპატიებენ ამას რა  
სჯობია-მეთქი. ცოტა გაკვირვებული დარჩა, ეტყობა, ასეთ  
თვინიერ თანხმობას არ მოელოდა, სასწრაფოდ მიაბო, ჩემი  
წამოსვლის შემდეგ ლამარას ოჯახში რა ამბავი დატრიალებუ-  
ლა, მერმე დამემშვიდობა და წავიდა... ბატონი ვარლამი ისე  
გამოშტერებულა, რომ იარაღით გამოდევნებას აპირებდა,  
შაგრამ, ქალები დასევიან და შეუჩერებიათ. ლამარას ტირილი  
ავარდნია და ვერ დაუშვებიათ. რალა გავაგრძელო, მშვე-  
ნივრად დაწყებული დაბადების დღე სამარცხვინოდ ჩამიშ-  
ლია.

ღმერთი და რაჯული, წინასწარ არაფერი მქონდა განზრა-  
ხული.

ერთი კვირა შინიდან ფეხი არ გამიდგამს, შვიდმა დღემ  
თითქოს შეუძმინველად ჩაიარა, შემდეგ კი ძალზე გამიჭირდა,  
უსაქმობისაგან ლამის კედლებზე გავსულიყავი. ვიფიქრე, —  
სოფელში წავალ-მეთქი, ანანოსთან, მაგრამ მტკიცედ ვერ გა-  
დავწყვიტე, რადგან გუნებაში მაინც ზაფხულს ვვარაუდობდი,  
სოფელში ჩასასვლელად ზაფხული მერჩია. სოფელი ალბათ  
იმიტომ გამახსენდა, რომ ანანოს წერილი მივიღეთ, იწერე-  
ბოდა — კარგად ვარო.

ისე გამიჭირდა, ქალბატონ მარიამთანაც კი მივედი — იქ-  
ნებ ზიზის ამბავი შეიტყო და მისამართი მაინც მითხრას-მეთ-  
ქი. ქალბატონი მარიამი ჩვეულებრივად შემხვდა, ოთახში თა-  
ვაზიანად შემიპატიჟა, მაგიდასთან დამსვა და თვითონაც ჩემ  
წინ დაჯდა. ზიზის ამბავი, რა თქმა უნდა, არ იცოდა, ისე კი  
წუხდა, — მისამართი რომ ვიცოდე, დღესვე მივაკითხავდიო.

— ეგ გოგო თავს დაიღუპავს! — დაასკვნა ბოლოს ქალბა-  
ტონმა მარიამმა.

მე არაფერი მითქვამს, რადგან საწინააღმდეგო აზრის ვი-  
ყავი და შინაგანად მჯეროდა, ზიზი არ დაიკარგებოდა, თავისას  
მიაღწევდა.

ქალბატონმა მარიამმა მერმე მე მომიკითხა, — როგორ მი-  
დის შენი სწავლის საქმეო. არ დამიმალავს, ვუთხარი, როგორც  
მიდიოდა და შეძლებისდაგვარად ავუხსენი კიდევ, ინსტიტუტს  
რატომ დავანებე თავი. შეცდომა მომივიდა, — ვალიარე, —  
თავიდანვე უნივერსიტეტში უნდა შევესულიყავი-მეთქი. მეგო-  
ნა, არ მომიწონებდა საქციელს და ქარაფშუტობას დამწამებ-  
და, მაგრამ პირიქით მოხდა.

— გეთი შეცდომა ბევრს მოსდის, — ამბობდა ქალბატო-  
ნი მარიამი, — მაგრამ უმრავლესობა ამას ვერ ხვდება, ანდა  
თუ მიხვდა, გზიდან მობრუნება არ შეუძლია, ერთხელ არჩე-  
ულ გზას მიჰყვება და ბოლოს ყველაფერი სანანებლად რჩე-  
ბა. კაცს უნდა შეეძლოს გზიდან მობრუნება, არ უნდა დაენა-  
ნოს გავლილი მანძილი და ამ გზის მონაკვეთისათვის დახარ-  
ჯული დრო და ენერჯია. მე იმ ჩიტირეკიებზე არას ვამბობ,  
ხელმოკარულებზე, თვითონაც რომ არ იციან, რას ეცნენ, ღღეს  
ერთ საქმეს მიადგებიან, ხვალ — მეორეს.

მენიშნა. გზიდან მობრუნებაზე როცა ლაპარაკობდა, ნამდ-  
ვილად ზიზის გულისხმობდა. ოღონდ წარმოდგენა არ ჰქონ-  
და, რომ ის ჩიტირეკია, რომელმაც არ იცოდა, რას სცემოდა,  
რას მიესწრაფოდა, სწორედ მე ვიყავი.

ერთი ღერი პაპიროსი და საფერფლე მოიტანა. მე მყუდ-  
როდ ვიჯექი და წასვლაზე არც მიფიქრია, აქ ყოფნა მსიამოვ-  
ნებდა, თუმცა რატომ მხიბლავდა და მიზიდავდა აქაურობა, ვერ  
მივმხვდარიყავი, რა თქმა უნდა, არა იმიტომ, რომ სხვაგან წა-  
სასვლელი არ მქონდა და თავს აქ ვაფარებდი.

— ჩემო ოზო, მნიშვნელოვანი რამ გადავწყვიტე და მინდა  
გავგიზიარო, — ქალბატონმა მარიამმა პაპიროსს ცეცხლი მოუ-  
კიდა, — რაც დრო გადის, მით უფრო მაწუხებს ჩემი წიგნების  
ბედი. სულაც არა მსურს, ძუნწი რაინდის მდგომარეობაში აღ-  
მოვჩნდე... განძი გაქვს და ამ განძით არავინ სარგებლობს...  
საშინელებაა!.. დრო მართლაც შეიცვალა: ვილა მოვა აქ, რო-  
ცა ქალაქში მრავალი ბიბლიოთეკაა, სადაც უკეთესი სამუშაო  
პირობებია შექმნილი. მე წიგნს არავის ვატან შინ, ასე რომ  
გამეტანებინა, ჩემი ბიბლიოთეკიდან აღარაფერი დარჩებოდა.  
სად შემეძლო დევნა და დავიღარაბა, — წიგნი დამიბრუნეთ-  
მეთქი! ცალკე წიგნი, რა ღირებულებისაც უნდა იყოს იგი,  
მხოლოდ წიგნია, ერთად თავმოყრილი კი განძია, რომელსაც

ჩვენ ბიბლიოთეკას ვუწოდებთ. მე გადავწყვიტე; ჩემი განძი თბილისის უნივერსიტეტს ვუანდერძო, იქ უფრო გამოიყენებენ, იქ უფრო საჭიროა ეს წიგნები; ცილრე აქ — უქმი, დამტვერილი და გაოხრებული... არაფერი მითხრა, ვიცი, სწორი, გონივრული გადაწყვეტილებაა, ოღონდ ეს საქმე ახლა როგორმე უნდა მოგვარდეს. საქმე ისაა, რომ წიგნები უნდა აღინუსხოს. უნდა არსებობდეს კატალოგი, თორემ გადაცემა-გადმოცემის დროს, რა მოხდება; კაცმა არ იცის. შეიძლება, დაიტაცონ კიდევ წიგნები, ეს არ არის გამორიცხული... წიგნი სხვა რალაცაა, წიგნის მოპარვა თქვენ წარმოიდგინეთ, საზოგადოებაში ქურდობად არ ითვლება, ყოველ შემთხვევაში, სასირცხოდ არ მიაჩნიათ... ამიტომ ბიბლიოთეკარი მჭირდება, კარგი, გამოცდილი, პატიოსანი, ფულს მე გადავუხდი, ფული მაქვს და არც მენანება... შემეძლო უნივერსიტეტისათვის მეთხოვა, მაგრამ ჭერჯერობით ათასი მიზეზის გამო, გახმაურებას ვერიდები... მერმე მოვიყვან ნოტარიუსს და საქმეც ამით მოთავდება.

— მე რითი შემიძლია დაგეხმაროთ, ქალბატონო.

— როგორ გითხრათ... ახალგაზრდა კაცი ხართ, სტუდენტი, წარმოუდგენელია, ბიბლიოთეკაში არ დადიოდეთ... იქნებ იცნობდეთ ანდა იქნებ გაიცნოთ ისეთი პიროვნება, რომელსაც შეიძლება ვენდოთ... ჩემო ოზო, აქ ისეთი უნიკალური წიგნებია, ფასი რომ არა აქვს... ხომ გესმით ჩემი... ვისმე ხელიც რომ წაუცდეს, არც იქნება დასაძრახი.

— ქალბატონო, იქნებ მე შევძლო... ოღონდ მასწავლეთ, როგორ უნდა გაკეთდეს და მერმე მე ვიცი.

— არა, ჩემო ოზო, როგორ გეკადრებათ! — შეკრთა ქალბატონი მარიამი, — არა, გენაცვალე, ეს იოლი საქმე არ გეგონოთ. აქ ათიათასი წიგნია!

— გთხოვთ, ქალბატონო მარიამ.

— არა, ჩემო კარგო, დამიჯერეთ, ამიტომ არ მითქვამს, ღმერთმანი, თქვენ არ მიგულისხმობხართ.

— მეც დამიჯერეთ, ქალბატონო მარიამ, თუკი მენდობით, ბედნიერი ვიქნები.

— არა და არა!

— შევძლებ... ახლა მაინც არავითარი საქმე არა მაქვს... უსაქმობისაგან ლამის გავგიჟდე, ქალბატონო.



თავს გულწრფელად ვთავაზობდი, მაგრამ არათფერი გამომ-  
ვიდა, ჯერ ვიფიქრე; — არ მენდობა-მეთქი, მაგრამ თუკი სხვა  
ვილაყის მოყვანას მენდობოდა და მავალბდა კიდეც, პირა-  
დად მე რატომ არ უნდა მნდობოდა? თანდათან ავენთე და ყო-  
ველნაირად ვუმტკიცებდი, — მხოლოდ ამ საქმისათვის ვარ  
დაბადებული და მოწოდებული, კატალოგების შედგენა ჩემი  
ბავშვობის ოცნებაა-მეთქი!

— მაშ, კატალოგების შედგენაზე ბავშვობიდანვე ოცნე-  
ბობდით, არა? — გაეცინა ქალბატონ მარიამს, მიხედა, სასა-  
ცილოდ გადაეაჭარბე.

შემრცხვა და გაეწითლდი, თუმცა ჩემსაზე მაინც ჯიუტად  
ვიდექი, — სანამ არ დავითანხმებ, აქედან ფეხს არ მოვიცე-  
ვლი-მეთქი. ისე ავლელდი, როგორც ბავშვი სათამაშოების მა-  
ლაზიის წინ, მოუთმენლობისა თუ სულწასულობის გრძნობა  
მეუფლებოდა.

— იქნებ თქვენთვის უკეთესიც იყოს, — მითხრა ბოლოს  
ქალბატონმა მარიამმა. — წიგნების შერჩევა, წიგნებთან კონ-  
ტაქტი დიდ რამეს ნიშნავს, მით უმეტეს ახალგაზრდა კაცისთ-  
ვის. ეს შეიძლება, ერთგვარი სკოლაც იყოს. ოღონდ ნაუცბა-  
თევად ნუ გადაწყვეტთ... დაფიქრდით... იფიქრეთ... მე არ მეჩ-  
ქარება, ერთი კვირის, ათი დღის შემდეგ მოდით და მითხარით,  
რა გადაწყვეტეთ...

— დიახ, ქალბატონო!

— კიდეც ერთი პირობა: სტიპენდიას დაგინიშნავთ...

— როგორ გეკადრებათ, ქალბატონო!

— სხვაგვარად არ გამოვა, არც იფიქროთ...

— ქალბატონო... — ვცადე შეჩერება.

— ამაზე ნუ ვილაპარაკებთ... ისიც წინასწარ უნდა იცო-  
დეთ, ერთი წელი არ გეყოფათ... იფიქრეთ, კარგად იფიქრეთ.

— დიახ, ქალბატონო... ოღონდ ფულს არ ავიღებ.

— პირობა პირობაა! მაშინ, არც მე გავიღებთ ბიბლიოთე-  
კის კარს!..

მეექვსე დღეს სოფლიდან მარო მასწავლებლის დეპეშა მი-  
ვიღეთ, გვატყობინებდა, — ანანო ცუდად არის და ჩამოდითო.  
მამაჩემი განერვიულდა და აყვირდა, — ამ შუა ზამთარში რა  
დროს იქ წასვლაა, საქმეებში ყელამდე ვარ ჩაფლულიო,  
ბრღვენივდა და გრგვინაედა. მერმე თანდათან დაცხრა და

მითხრა, — ჯანდაბას, ნჯალ წავალო. მე ვუთხარი, — უსათუოდ დღესვე უნდა წავიდეთ-მეთქი, ამაღამვე!.. ვიგრძენი, ანანო ან ძალიან ცუდად იყო, ანდა... შეიძლება... ის, რაც ვიგრძენი, არ დამიმაღავს. მამა მწარედ ჩაფიქრდა, შეუძლებელია, შეუძლებელიაო... — იმეორებდა. ისევ აფორიაქდა, აიშალა, თითქოს გამოსავალს ეძებდა და ვერ პოულობდა, ეტყობა, მართლა საქმეებში იყო ჩაფლული და მათ მოწესრიგებამდე გამგზავრება უჭირდა. ჩვენი ერთად წასვლა არ გამოვაო, — თქვა და ბარათების წერას შეუდგა. მერმე დამიბარა, ესა თუ ის ბარათი სად მიმეტანა და ვისთვის გადამეცა. ჩქარობდა, მაგრამ არ დაბნეულა, თითქოს ყველაფერი მოაწესრიგა, დაალაგა, ჯიბეებში ხელებჩაწყობილი კარგახანს სცემდა ბოლთას. მერმე კარადანსთან შეჩერდა, ჯიბიდან გასაღები ამოიღო და ერთ-ერთ უჯრას ჩხაკუნით მოარგო, გამოსწია და ჩაიხედა. აქ ფულია! — მითხრა, — თუ საჭირო იქნა, ხვალვე შეგატყობინებ, წამოდი და წამოიდეო. ნაწილი ფულისა ჯიბეში ჩაიღო.

იმ ღამეს თითქმის არ მიძინია. ოთახიდან ოთახში დავწრიალებდი. იმდენი ვეცადე და ვიწვალე, ანანო ვიხსენი — გამოვაჯანმრთელე და ფეხზე დავაყენე. მამა თბილისს გამოვისტუმრე, მე კი ანანოსთან გაზაფხულამდე დაერჩი. ჩემ თვალწინ დადნა თოვლი, თანდათან შეიფოთლა ღობის გასწვრივ ჩარბილებული თუთის ხეები, დავთვალე და ისევ თერთმეტი იყო. ანანომ კი მითხრა — აბრეშუმის ქია უნდა გავიჩინო, მამ, ამ ხეებს ხომ არ მოვაცდენო. მერმე ცოტათი ჩამთვლიმა და საბძელზე შემომჯდარი შავი მამალი დამესიზმრა. კისერწაგრძელებული ფრთებს აფართხუნებდა, დაყვილებას ცდილობდა და ვერ ყიოდა.

მეორე დღეს მამამ მიდებეშა — ჩამოდიო!

მივხვდი, ანანო აღარ იყო.

იმავე საღამოს გავედი რკინიგზის სადგურზე, ვისაც იმ დროს კახეთის მატარებლით უმგზავრია, ალბათ ახსოვს, ბილეთის შეძენა პრობლემას არ წარმოადგენდა, იმდენ ბილეთს ყიდდნენ, რამდენიც გაიყიდებოდა. ბილეთი თუ გქონდა, შეგეძლო, კიბეზე ჩამოკონწიალებულიყავი, სახურავზეც შეგეძლო აცოცება, ერთი სიტყვით, სადგურზე არ დაჯროვებდნენ, ასე თუ ისე, მაინც წაგიყვანდნენ, ბილეთს არ გაგაუქმებინებდნენ.

რა მნიშვნელობა აქვს, როგორ ვიმგზავრე, მთავარია, დილით უკვე თელავში ვიყავი და პალტოთი შეფუთული „ლილეინ-კაზე“ ვიჭექი. ვიცოდი, ანანო ცოცხალი არ დამხვდებოდა, მაგრამ გული სხვანაირი ყოფილა თურმე, ბოლომდე რაღაცის იმედი აქვს, ბოლომდე არ სჯერა ანდა არ უნდა დაიჭეროს უბედურება. თოვლიან გზაზე მიეჩაქჩაქებდი და იმედის პატარა სხივი მაინც მითრთოდა გულში, სანამ სოფლის ცენტრში არ გაჩერდა ჩვენი ოთხთვალა. როგორც კი მიწაზე ჩამოვდგი ფეხი და ნაცნობებს თვალეებში შევხედე, საბოლოოდ დავრწმუნდი, მოსახდენი მომხდარიყო. ამ დღეს თითქოს ველოდებოდი კიდევ, თვითონ ანანომ ჩამაგონა და დამაჯერა, — ასე და ასე მოხდებაო. მაგრამ საოცრად მალე ახდა, რაც ანანომ თავის თავზე იწინასწარმეტყველა, რაც დღემდე აუხსნეღლი და გაუგებარია ჩემთვის.

პირველად ფოსტალიონი მოვიდა და მკითხა, — ჩამოხვედიო? ჩამოვედი-მეთქი, — ვუბასუხე. მე შეგატყობინეთო, — მითხრა, მერმე თანაგრძნობის ხელი ჩამომართვა, — კარგად კი მოგიარა მაგ მადლიანმაო... ჯავრს თავი შეაქმევიანაო... ეეჰ, რა ბნელი ხარ, წუთისოფელო! — ესეც დასძინა და გამშორდა. მერმე სხვებიც მოვიდნენ, იქვე საპარიკმახეროსთან უსაქმოდ რომ იდგნენ და ლაპარაკით თავს ირთობდნენ, ყველას გული წყდებოდა, ყველა სინანულით აქნევდა თავს.

მუხლამდე თოვლში მივდიოდი, დათოვლილი იყო ყველაფერი, რასაც თვალი გასწვდებოდა: ხეები, სახლები, სახლებს იქით ტყიანი ფერღობები. თოვლს მივარღვევდი და ვფიქრობდი, — ნეტავი ზარით არ შემხვდნენ-მეთქი. შორიდანვე დაეინახე, ჩვენს ეზოში ქალები ფუსფუსებდნენ, ჭიშკარი ღია იყო.

ეზოში შევედი. აივანზე კედელთან ჩამწკრივებული მამაკაცები იდგნენ. დიდი ოთახის კარიც ღია იყო. კიბე ავიარე და ყველამ მე მომაშურა, სათითაოდ ჩამომართვეს ხელი. გიმარჯვიაო, — მითხრა მამაჩემმა, — ხვალ დილით გელოდებოდიო... შედი და დახედეო... ახლა არ შემიძლია-მეთქი, — ვუთხარი. მამაკაცები მიიწ-მოიწივნენ და ჩამაყენეს. მეც მათ შორის, კედელს ავეკარი. ამ დროს ვიღაც ქალმა ეზოდან დაიძახა — ეგ ბალლი მშიერი იქნება და აქეთ გამოუშვითო...

მეორე დღეს დილიდან თოვდა. ბარდნიდა, ხელისგულისოდენა ფანტელები ცვიოდა. ფიღო კვალიაშვილმა თქვა, — მსხვი-

ლი თოვლია და მალე გადაიღებსო. მალე კი გადაიღო, მაგრამ მალევე წამოთოვა, ამჯერად წვრილი, დამდები თოვლი ჩამოყარა. მე მამაჩემის გვერდით ვიდექი, კედელს აკრული იქვე, სადაც გუშინ ჩამაყენეს. ფილო კვალიაშვილი შინაურით ტრიალებდა, განკარგულებებს იძლეოდა, ხალხს ასაქმებდა.

დაუსრულებლად მობიოდნენ მოსამძიმრენი. ჩემ წინ ჩაიარა მთელმა სოფელმა, მე ყველას ვცნობდი და გულის სიღრმეში რაღაცნაირად მიხაროდა, რომ მათ ისევ ვხედავდი, ხელს ვართმევდი და წრფელ სამძიმარს ვისმენდი. ჩამომართმევდნენ ხელს და ღია კარს მიაშურებდნენ, იქ შუა ოთახში ანანო ესვენა, ირგვლივ შავად ჩაცმული დედაკაცები ისხდნენ, დროდადრო ვიღაც წამოიჩივრებდა, მერმე სიჩუმე კვლავ მოიცავდა იქაურობას. ყველაფერი ზედმეტი ფუსფუსის, ხმაურისა და მოძრაობის გარეშე ხდებოდა, თითქოს ყველამ იცოდა თავისი საქმე და აკეთებდა იმას, რისი გაკეთებაც აუცილებელი იყო.

კარიაულებიც გამოჩნდნენ, დათოვლილ მთებივით შემოვიდნენ ეზოში ოთხივენი ერთად; (კარიაულის ქვრივი ადრევე მოვიდა და კირისუფლებში იჯდა). მამაჩემი შეტოკდა, ფეხი მოინაცვლა და გასწორდა. ჰერ მამა-კარიაული მოვიდა და ხელი ჩამოგვართვა, მერმე — დედა. ქალიშვილებმა ხელი რომ გაუწოდეს მამაჩემს, ისეთი გამომეტყველება ჰქონდათ, ვიფიქრე — გაიცინებენ-მეთქი, მაგრამ დროზე დახარეს თავები და ოთახში შევიდნენ. მე რატომღაც გამომტოვეს, ჩემთვის ხელი არ გამოიმეტეს. დევის ქალებმა ოთახისკენ რომ გაუხეიეს, მამამ თავი ჩემკენ გადმოხარა და საქმიანად წამჩურჩულა, — ანანოს ძველ სასაფლაოზე ვმარხავთ, მშობლების გვერდითო. ეს უკვე ვიცოდი, გუშინ უფრო ბუნებრივ გარემოში მითხრა. ახლა რაღაცისთვის დასჭირდა, რომ მე მომჩვენებოდა, ვითომ საფლავზე ფიქრით იყო გართული. მე კი სწორედ ამ დროს ვფიქრობდი, — როგორც კი თბილისში ჩავალ, ქალბატონ მარიამს ვეახლები და ვეტყვი: თქვენი ბიბლიოთეკის კატალოგი მხოლოდ მე უნდა შევადგინო, გინდაც ამისთვის ორი წელი დამჭირდეს-მეთქი.

დედაკაცებმა ოთახი დატოვეთო, — გავიგონე ფილო კვალიაშვილის ხმა და მივხვდი, დაკრძალვის დრო დამდგარიყო. ქალებს ოთახი დაატოვებინეს და ჩვენ შევედით, მამაკაცები. ოთახის კარი მივხურეთ, კუბო ავწიეთ და სამჯერ წალმა და-

ვაბრუნეთ, მერე კარს ისევ წინა მხრით სამჯერ მივახეთქეთ, კარი ისევ გავალეთ და ანანო გარეთ გავასვენეთ.

მთელი გზა თოვლა.

უკან დავტოვეთ ჩვენი სახლი, ჭიშკარი, ორღობე და სასაფლაოსკენ აღმართს შევეუღექით. ეს აღმართი ყოველთვის ეკლესიის გზა მეგონა, არასოდეს მიფიქრია თუ სასაფლაოსიკ იყო. სიარული ჭირდა, თოვლზე ფეხს ვერ ვიკიდებდით, სხლტებოდა, სრიალებდა, მაგრამ ნელ-ნელა მივიწვედით წინ, აღმა-აღმა, სულ ზევით, ზევით — ეკლესიის გალავნისაკენ...

თბილისში მარტო დავბრუნდი. მამა დარჩა, — აქაურობას უპატრონოდ ვერ დავაგდებ, სასაფლაოსაც მივხედავ და მერმე წამოვალო. პირველი ღამე მძიმე და დამთრგუნველი იყო. ჯერ მატარებელში ვერ მოვნახე დასაჯდომი ადგილი, ფეხზე მდგარმა ვიმგზავრე თბილისიდან თელავამდე, აქაც არ დავმჯდარვარ და არ დამიძინია. გამოფიტული ხან აივანზე, ხანაც ოთახიდან ოთახში დავდიოდი. ყინავდა. შუა ოთახის, სადაც ანანო ესვენა, კარიცა და ფანჯრებიც ღია იყო. ხალხის მიმოსვლა მთელი ღამე არ შეწყვეტილა, ვინ მიდიოდა და ვინ მოდიოდა, უკვე ველარა ვცნობდი. მომსვლელები მამაჩემსა და ფირო კვალიაშვილს ეთათბირებოდნენ, ხვალინდელ დასაფლავების საკითხებს წყვეტდნენ, ისეთი შთაბეჭდილება შემექმნა, თითქოს მთელი სოფელი ჩვენთან ერთად ათევდა ღამეს.

დასაფლავებაზე, მერმე ქელებზე მთელმა სოფელმა დასდო პატივი ანანოს, ზემო და ქვემო აივანი, ყველა ოთახი ხალხით იყო გაჭედილი. ზედმეტი სიტყვა არავის წამოსცდენია, არც ღვინო შეუსვამს ვისმე ზომაზე მეტი, ყველაფერი წესიერად და ზომიერად ჩატარდა და ამითაც იგრძნობოდა, სოფელს ანანო უყვარდა და პატივსაც სცემდა. სამაგიეროდ მეც ერთი წუთით არ ჩამოვმჯდარვარ, ავრბოდი და ჩამოვრბოდი კიბეზე. ოთახებშიც ვტრიალებდი, — სუფრას რამე არ დააკლდეს-მეთქი. საღამოს უკვე მთელი სხეული დამიბუჟდა და დამიძიმდა... თავიც მიბრუოდა...

მეზობლებმა ღამის გასათევი შემოგვთავაზეს, — ჩვენთან დაისვენეთ, ამაღამ აქ რა გაგაძლებინებთო. მამამ უარით განისტუმრა და საქმე მართლა გაძლებაზე მიდგა. სახელდახელოდ მიალაგეს იქაურობა, — დანარჩენი ხელო, მერმე წავიდნენ, გაიკრიფნენ და უანანო სახლში მარტო დავრჩით მე და მამაჩე-

მი. ორივეს პალტოები გვეცვა და ჭიბეებში ხელებჩაწყობილნი უბრად ვაწყდებოდით კედლიდან კედელს. მამამ რამდენჯერმე ახსენა ფილო კვალიაშვილი, — ეს ვინ ყოფილა, კაცობა მაგან თქვასო. მეც დამამახსოვრდა კოლმეურნეობის თავმჯდომარე, ეგ თავკაცობდა, ეგ მიდი-მოდიოდა, იმ მძიმე დღეებმა მაგის ზურგზე გადაიარა. მე კი ვფიქრობდი, — რახან თავმჯდომარეა, ალბათ ევალემა-მეთქი, მაგრამ მთლად ეგრე არ ყოფილა საქმე.

ყველაზე მტანჯველი გრძნობა მაინც ის იყო, რომ სულ მეგონა, ანანო კი არა, სხვა ვიღაც დავასათლავეთ. ნაბიჯების ხმა მომეყურებოდა ხოლმე და კარის შემოღებას ველოდებოდი. ხომ ვიცოდი, სმენა რომ მატყუებდა, ანანოს აკი ჩემი ხელით მივაყარე მიწა, მიუხედავად ამისა, ვიძაბებოდი, თითქოს ვცდილობდი ნაბიჯების ხმა ისევ გამეგონა, თვალის სულ კარისკენ მექირა. ეს უსაგნო, გამოგონილი მოლოდინი მთრგუნავდა და გულს შიგნიდან მიღრღნიდა.

რალაცნაირად არ მესიაშოვნა, ფოსტალიონმა ჩამოსვლის-თანავე რომ მითხრა, — თავი ჯავრს შეაქმევენაო. საგანგებოდ გულში ჩამარხული და ჩაკეტილი მეგონა ანანოს ამბავი და პირველმავე შემხვედრმა მომახალა, — ჯავრს შეაქმევენა თავიო... რა უცნაური და რამდენის მთქმელია: ჯავრს თავი შეაქმევენა... რას გამოაპარებ სოფელს, სოფელმა ყველაფერი იცის! შენ კი თურმე საგულდაგულოდ მალავდი, არ ამხელდი და შენს განუმეორებელ სიტოცხლეს საკუთარ ჯავრს აქმევენებდი...

მამა ბორგავდა და შფოთავდა, თუმცა გარეგნულად არ იმჩნევდა, წუხდა, რალაც ვერ მოენელებინა და არც მეუბნებოდა. ვიცოდი მამაჩემის ხასიათი, ასე დიდხანს ვერ გაძლებდა, იტყოდა, არ დამალავდა, დააპირა კიდევ თქმა, — რატომ ვიკლავთ თავს, ვითომ ის არ კმარა სხვები რომ გვბოცავენო... მაგრამ სათქმელი ვერ დაასრულა, ოთახში ჩემი თანაკლასელები შემოვიდნენ, ორნი — თეთრი ნიკა და შავი ნიკა, ერთი ქერა იყო, მეორე — შავგვრემანი და განსასხვავებლად ასევე შეარქვეს. „თეთრი“ და „შავი“. გარეთ ძალღი არ გაიგდებო, — თქვეს შეცივებულეებმა და დათოვლილებმა, თოვლი ღუმელთან ჩამოიბერტყეს, გაყინული ფეხები ააბაყუნეს. მამაჩემი თითქოს ამათ მოსვლას ელოდებოდა, ქუდი დაიხურა და

წავიდა. მეზობლებში გადავალ და მალე დავბრუნდებიო, — დაიბარა. ვისთან, რომელ მეზობელთან გადავიდა, არ ვიცი, ოღონდ ვისაც მიაკითხა, იქ ღამე გაათია, დილამდე არ გამოჩენილა.

ბიჭების მოსვლა გულით გამიხარდა. ესენი დასაფლავებაზეც იყვნენ, გუშინწინაც მომისამძიმრეს და მაინც მოვიდნენ. ექვს თვეზე მეტია, არ მენახა. ამ ექვს თვეში საკმაოდ გამოცვლილნი მეჩვენენ, თითქოს დავაჟაკებულიყვნენ, ყოველ შემთხვევაში მოსწავლის იერი აღარ ჰქონდათ. შენც გამოცვლილხარო, — მითხრეს, — ისევ ქალაქის ფერი დაგდებიაო... როგორ ცხოვრობო, სად სწავლობო? ბოლოს ზიზი გაიხსენეს, — ვიცით, ისიც მოეწყო უმაღლესში და კარგადაც სწავლობსო. ერთმანეთს ალბათ ყოველდღე ხვდებითო. ხომ არ იცი, რატომ არ ჩამოვიდაო... ბედნიერი, ოდნავ დამორცხვებული ღიმილით შემომცქეროდნენ და უცებ გამახსენდა, რომ ორივე ნიკას გაუმხელელი, უიმედო სიყვარულით უყვარდა ზიზი. როცა ვუთხარი, — ზიზი მხოლოდ ერთხელ ვნახე-მეთქი, არ დამიჯერეს. ათასი ტყუილისა და მართალის თქმა დამჭირდა, რომ დამეჯერებინა, თუ რა მიზეზის გამო ვერ ვნახე ერთხელს მეტად, ამაოდ დავიხარავე, ისეთი ღიმილით წავიდნენ, თითქოს კეთილად ვატყუებდი, თითქოს გაუუფრთხილდი, რათა ჩემი და ზიზის ყოველდღიური შეხვედრებისა და დროსტარების გამო გული არ დასწყვეტოდათ. მხოლოდ ორივე ნიკას წასვლის შემდეგ დავფიქრდი და მეწყინა კიდევ, — რატომ არ ჩამოვიდა ანანოს დაკრძალვაზე, დავიჯერო, დედამისმა არ შეატყობინა-მეთქი? შეუძლებელია, უსათუოდ გაუგზავნიდა დეპეშას.

მამაჩემს სკამზე მითვლემილი დავხვდი, შეციებული და გამოფიტული, ვერც კი გავიგე, როგორ ჩაქრა ღუმელი. რატომღაც ანანო გამახსენდა, ამ ექვსი თვის წინ შუალამით აივანზე ვიდექით და მაშინ თქვა: „გათენებამდე დიდი დროაო“. მამა ისევ საქმიანად შემოვიდა, როგორც გავიდა, თითქოს დრო არ იყო გასული, ერთი წუთით გადგა ფეხი გარეთ და ისევ შემობრუნდა. მაგრამ მე უკვე აღარ განვიციდდი, აღარ მაწუხებდა მისი „მოულოდნელი გაქრობა“, პირიქით, მომწონდა კიდევ ეს დაუცხრომლობა და დაუშრეტელი ენერჯია. ერთი რამ ნათელი იყო ჩემთვის, სოფელში უფრო კარგად და თა-

ვისუფლად გრძნობდა თავს, ვიდრე თბილისში. იქ შებოქილი, შეზღუდული და თავშეკავებული მეჩვენებოდა.

— ხედავ, რა დღეში ჩაგვყარა ანანომ, — შემოსვლისთანავე მითხრა სინანულით. — გაპყოლოდა ცოლად ამ ფილო კვალთაშვილს, ვილაცის გულისთვის თავი რომ მოიკლა.

— რატომ უნდა გაპყოლოდა ფილო კვალთაშვილს? — უცებ გამოვფხიზლდი და გამოვცოცხლდი, ეს ამბავი ჩემთვის აღმოჩენასავით იყო.

— რატომ? — მამაჩემი ოთახიდან გავიდა, სამკუთხედი წერილების რამდენიმე შეკვრა შემოიტანა და მაგიდაზე დაყარა — აი ამიტომ! აქ ორმოცზე მეტი წერილია. სულ ფრონტიდან გამოგზავნილი... ვაიგე, რა მოხდა? გაპყოლოდა, თვითონაც ცოცხალი იქნებოდა, დაწვრილშვილებული, ბედნიერი და ჩვენც მოვისვენებდით. არაო, არ მინდაო! აჰა, თუ არ გინდა... ის კაციც უცოლშვილოდ ბერდება.

— იქნებ არ უნდოდა.

— მაშ, რა უნდოდა, ესა? ;

— რახან ასე მოხდა...

— შენც კარგი ვინმე ხარ!.. ის უყვარდა, არა ვილაც, სოფელს შემოხიზნული?

მეგონა, რაც ანანოს ეხებოდა, ყველაფერი ვიცოდი, თითქოს არაფერს მიმალავდა. მაგრამ ეს ფილო კვალთაშვილი... ეტყობა, მნიშვნელობას არ ანიჭებდა, თორემ რალაცას უსათუოდ მეტყუოდა ან მიმანიშნებდა. განსაკუთრებულ ყურადღებას რომ იჩენდა თავმჯდომარე ჩვენდამი, ვხედავდი, შეშით და ზოგჯერ ჭირნახულითაც გვამარაგებდა, ერთხელ ფეხსაცმელებიც მაჩუქა... ანანოს ხასიათი კარგად მახსოვდა და წესით, ეს საჩუქრები არ უნდა მიეღო, თუმცა... იქნებ არ იყო საჩუქარი... ფილო კვალთაშვილი... მე ისიც კი არ ვიცოდი, რომ ნაფრონტალი იყო, არათუ ეს წერილები...

— რა ეშველება ახლა აქაურობას, ჩვენს სახლს, ვენახს, ვის ჭირად უნდა გახდეს?!

მამა ისევ ბობოქრობდა, მე ვხვდებოდი, რისთვისაც შფოთავდა და გუნებაში გავიფიქრე, — ეს არ არის ის ლაპარაკი, რომელიც ამ სახლზე ერთხელ და საბოლოოდ უნდა გაიმართოს მეთქი. ჩვენს სახლს ანანომ დიდი ხნის წინათ გამოუტანა განაჩენი და მე უკვე დარწმუნებული ვიყავი, მისი ნათქვამი



ახდებოდა. მამაჩემი გულიანი კაცი იყო და, რა თქმა უნდა, იქაურობის ბედიც აწუხებდა, მაგრამ ამჯერად იმასაც ცდილობდა, რომ მე მეფიქრა, ვითომ საიდანაც ახლა მოვიდა, იქაც მხოლოდ ამაზე ფიქრობდა და წუხდა. იმ დღესვე გამომისტუმრა თბილისში და თვითონ გასაგები მიზეზის გამო დარჩა, ჩვენი სახლისთვისაც, ანანოს საფლავისთვისაც უნდა შივხედა.

მატარებელში გამახსენდა, ილოს ბალები არც პანაშვიდზე, არც დასაფლავების დღეს, არც მერმე გამოჩენილან, გული დამწყდა, რომ ვერ ვნახე.

დურმიშხანმა თბილისში ჩამოსვლა არ მაცალა, იმავე დღეს გამომეცხადა და ყოველგვარი მიკიბულ-მოკიბულის გარეშე მითხრა — ინსტიტუტიდან გაგრიცხესო. კაცმა რომ თქვას, ინსტიტუტისათვის თავი კარგა ხნის დანებებული შქონდა, არცერთი საგანი არ ჩამითვლია და არც გამოცდა ჩამიბარებია, მაგრამ მაინც მეწყინა. ამ ცნობამ როგორღაც შემაკრთო და ცუდი გრძნობა დამიტოვა. ნეტავი საბუთების გამოტანა მომესწრო-მეთქი, — გავიფიქრე. დურმიშხანი გულწრფელად დელავდა, გამოსავალს თუ საშველს ეძებდა, ინსტიტუტში აღდგენის ვარიანტი შემომთავაზა, ვიღაც გავლენიანი პირები ახსენა, — ამათთან მივიდეთო, თან ფრთხილად შემომამარა — იცოდე, ამ საქმეში ლამარას მამის ხელი ურევიაო. მე არ დავუჯერე. კიო, — მარწმუნებდა, — ეგ რომ არა, ერთხელ მაინც დაგიბარებდნენ და გაგაფრთხილებდნენო. თავის ღროზე რომ მისულიყავი და ბოდიში მოგეხადა, არაფერი მოხდებოდაო. დურმიშხანს შეწუხებისათვის მადლობა მოვახსენე და ისიც დავძინე, — ინსტიტუტში დაბრუნებას არც ვაპირებდი-მეთქი. დურმიშხანი გაგოჟდა, არ დამიჯერა, ოთახში გაიარ-გამოიარა და გაშტერებული მომაჩერდა.

— როგორ, შენი შესაძლებლობის კაცი ინსტიტუტს ანებებ თავს?

— კი, უნივერსიტეტში უნდა გადავიდე.

— უნივერსიტეტში? მასწავლებელი გინდა გამოხვიდე?!

— ვნახო, რაც გამოვალ, ის გამოვალ.

— აუ, რა გიჟია!

— რაცა ვარ, ესა ვარ. — გავუცინე.

— მეგონა, ცოტას მეც მომეხმარებოდი, ხელს წამიკრავდი... ბიჭო, ეგეთი რამე არ გამიგია, იცი, რა ქაობში მიდიხარ?!

— ვიცი.

— გეოდეზიაში შენი იმედი მქონდა, რა შეშველება?!

მეორე დღეს საბუთები გამოვიტანე და ჰირდაპირ ქალბატონ მარიამს მივაშურე, გულდაწყვეტილი მივდიოდი, მაინც არ მეგონა, საბუთებს ასე უმტკივნეულოდ თუ გამომატანდნენ, სიტყვა არავის დასცდენია, — რა მოხდა, ასეთი რამ როგორ დაგემართაო. ცივად, უსიტყვოდ გამომისტუმრეს, ღურმიშხანის გარდა არავის დაწყვეტია გული. არა უშავს რა. ისეთი კაცია, ცხოვრებაში არ დაიკარგება, სხვას მონახავს, სხვა წაუტყარავს ხელს და ჩააბარებინებს საგანს...

ქალბატონმა მარიამმა თავისი ბიბლიოთეკის კარი გამიღო და შემიშვა.

— არ ვიცი, როგორ წარიმართებოდა ჩემი ცხოვრება, ეს კარი რომ არ გაეღოთ ჩემთვის...

მაგრამ მე მაინც ზიზის მონაყოლით შექმნილი თავდაპირველი შთაბეჭდილების ძონძები მქონდა სულში ჩარჩენილი. ერთი თვე ძალზე გამიჭირდა, თუმცა სწრაფად ავითვისე ბიბლიოთეკარის პროფესია, კალმისტრით, მელნით, რვეულებით მომარაგებული ვიყავი და მონდომებითაც შეეუღდექი საქმეს. დაუსრულებლად მეორდებოდა ერთი და იგივე: გადმოიღე წიგნი, ჩვრით გაწმინდე, მტვერი მოაშორე, მერმე ამოიწერე ავტორის გვარი, სათაური, გამოცემის დრო და ადგილი, გამოცემელი... წიგნი ისევ დააბრუნე თავის ადგილზე... შემდეგ მეორე წიგნი გადმოიღე, შემდეგ მასამე, მეოთხე, მეხუთე და ასე გაუთავებლად...

რეგულარულად დავდიოდი, ყოველდღე, როგორც სამსახურში, ასე ბეჯითად ინსტიტუტში არ მივლია, რახან გადავწყვიტე და ვთქვი, ამ სამუშაოზე უარს აღარ ვიტყვოდი, თუმცა გულში პროტესტის მაგვარი რაღაც მაინც ილექებოდა. ზიზის ამბოხებასა და გაქცევას ახლა თითქოს გავუგე და შინაგანად უფრო დავუჭერე. ერთი თვის შემდეგ ჩემი ნამოღვაწარი რომ ვუჩვენე, ქალბატონი მარიამი გაოცდა, — ამდენი როგორ შესძელითო. გუნებაში გამეღიმა, — მაქეზებს-მეთქი, მაგრამ მოვტყუვდი.

— ოხო, — მითხრა ქალბატონმა მარიამმა, — თქვენ აქ შავ მუშად კი არ მყავხართ დაჭირავებული, ასე თუ ვანაგრძეთ, ბიბლიოთეკას აღარ მიგაკარებთ. მე მირჩევნია, აქედან წა-

იღოთ ზუფრო მეტი, ვიდრე დატოვოთ. აბა, თქვით ამ ერთ თვე-ში რა წაიკითხეთ?

არაფერი. მე კეთილსინდისიერად ვავსებდი რვეულებს და აზრადაც არ მომსვლია, რამე თუ უნდა წამეკითხა.

— წიგნს რომ გადმოიღებთ, ავტორსა და სათაურს წაიკითხავთ, წიგნსაც ჩახედეთ, გეთაყვა, გადაფურცლეთ, იქნებ დაინტერესდეთ. თუ დაინტერესდით... მაშინ... თქვენ რა, მართო ყდებს ათვალეირებდით?! ღმერთო ჩემო, გაგონილა წიგნთან ასეთი დამოკიდებულება! — უცებ აღშფოთდა ქალბატონი მარიაში, მერმე ცოტა ხანს ჩაფიქრდა, — ხუთი წელია, აქ არავინ შემოსულა და წიგნი არ წაუკითხავს... მე გული მტკივა. მე არ შემიძლია ამის გაძლება... ჩემო კარგო, ბიბლიოთეკაში შეხვედით და წიგნი არ წაიკითხეთ?!

ვერაფერი ვუბასუხე, ან რა უნდა მეუბასუხა?

ფანჯარასთან პატარა, ოთხკუთხედი მაგიდა იდგა, იქ მიმქონდა წიგნები და ვმუშაობდი. მშვენიერი მყუდრო ადგილი იყო; თუ დავიღლებოდი, მთაწმინდის ფერდობებს გავყურებდი ან მტკვარს: მარცხნივ მუხრანის დაკიდული ხიდი და მდინარის ნაწილი მოჩანდა, თავი ოდნავ უნდა გადაგეხარა და დაინახავდი. ამ მაგიდასთან ჯერ მისჯილივით ვიჯექი, მერმე თანდათან გამიტკბა ბიბლიოთეკაში ყოფნა. წიგნებს შეჩვევა და მორევივით ჩათრევა სცოდნია.

მამას ეგონა, ასე მუყაითად ინსტიტუტში დავდიოდი, დამედებულნი იყო, — რახან კარგად სწავლობს, კარგი ინჟინერიც დადგებაო. ჩემი საიდუმლო მანამდე არ გამიმხელია, სანამ უნივერსიტეტში მისაღები გამოცდები არ ჩავაბარე. ისე კი უკვირდა, მთელი გაზაფხული თბილისში რომ დავრჩი და დასასვენებლად გამგზავრება არ ვინდომე. ბოლოს ხელები გაშალა, — კარგი, თუ ეგრე გინდა, ეგრე იყოსო. შევატყე, ინსტიტუტიდან ჩემი უნივერსიტეტში გადაბარგება გულზე მოხვდა, ძალიან ეწყინა, მაგრამ რას იზამდა, საქმეს არაფერი ეშველებოდა და უკან ველარ დამაბრუნებდა. იმედგაცრუებული შემომმტკეპროდა, ერთადერთ შვილს ტექნიკური განათლება ვერ ჩიმაღებინა.

უნივერსიტეტში ჩარიცხვის შემდეგაც არ შემიწყვეტია ქალბატონ მარიაშის ბიბლიოთეკაში სიარული, დაწყებულ საქმეს შუა გზაზე ხომ ვერ მივატოვებდი. სექტემბრამდე ოთხი ათასი

წიგნი აღვსუსხე. ჩემი ვარაუდით ეს მთელი ბიბლიოთეკის ერთი მესამედი იყო. ქალბატონი მარიაამის მეზობლებიც გავიცანინი. უფრო იმათ შოინდომეს ჩემი გაცნობა. ცნობისწადილი აწვალეზდათ, ვერ ისვენებდნენ, ერთი სული ჰქონდათ გაეგოთ რისთვის დავდიოდი, რა მესაქმებოდა ამ დედაბერთან. დაცინვით კნენა მარიაამს ეძახდნენ. ეჯავრებოდათო, — ვერ ვიჭყვი, მაგრამ არც გულზე ეხატებოდათ. მაგის ხნისა რიყეზე ქვაც არ გორავსო... ეგ მამაცხონებული მალე ასს მიუკაკუნებს და ერთი შეხედეთ, ჩიტივით არ დაფრინავსო... ყველაზე მეტად მაინც ბიბლიოთეკა აღელვებდათ, — ათ-ათი სული თავვის სოროებში ვცხოვრობთ, მაგას კი იმოდენა დარბაზი ცარიელი აქვსო... ბიბლიოთეკა ცარიელ ოთახად მიაჩნდათ. ქალბატონ მარიაამს კი თითქოს მყარი, ხმაგაუმტარი გარსი ჰქონდა შემოკრული, იმ გარსში ეს ხმები არ აღწევდა. არაჩვეულებრივი მეხსიერება ჰქონდა და ყოველ საღამოს ნეტარი ღიმილით აღბეჭდილი გარდასულ დღეებს იგონებდა, ზუსტად ახსოვდა, ვინ როდის მოვიდა, ვინ რა წიგნი სთხოვა და რა დრო დასჭირდა იმ წიგნის წასაკითხად. ქალბატონი მარიაამი იქ ცხოვრობდა, იმით სულდგმულობდა.

ზუსტად წელიწადნახევარი — თვრამეტი თვე მოვანდომე ქალბატონ მარიაამის წიგნების აღვსუსხვას, ანუ ბიბლიოთეკის კატალოგის შედგენას. ორმოცდაშვიდი წლის ივნისის დამდგისათვის საქმე მოთავებული მქონდა. ენციკლოპედიების ჩათვლით ბიბლიოთეკაში თერთმეტიათას ას სამოცდათექვსმეტი წიგნი და ქურნალი აღმოჩნდა. მე კი ამ დროის მანძილზე უამრავი წიგნის წაკითხვა და გადაკითხვა მოვახერხე, რალაც-რალაცები ამოვიწერე და ჩავინიშნე კიდეც. ბიბლიოთეკის აღწერას გაცილებით ადრე მოვათავებდი, მაგრამ უნივერსიტეტში სწავლას დიდი დრო მიჰქონდა, ზოგჯერ კვირა ისე გავდიოდა, ბიბლიოთეკაში ერთხელაც არ შევიხედავდი, ზოგჯერ კითხვა გამიტაცებდა და დღე თვალსა და ხელს შუა გამეპარებოდა. ამხანაგებთან ერთად ქუჩაში უსაქმოდ დგომა-ხეტილიც, დაბადების დღეებზე, კინოსა და „დინამოს“ სტადიონზე სიარულიც თავისას მოითხოვდა. უამისოდ რა აზრი ჰქონდა ცხოვრებას?

მე არ ვიცოდი, როგორ გაფორმებოდა ბიბლიოთეკის გადაცემა უნივერსიტეტისათვის. ქალბატონი მარიაამი ამბობდა, —

ეს ყველაფერი ნოტარიალური წესით უნდა გაფორმდესო. წარმოდგენა არ მქონდა, ჩვენს დროშიც თუ არსებობდნენ ნოტარიუსები, ისინი ფრანგული რომანების აუცილებელი პერსონაჟები მეგონა. ქალბატონი მარიაში თავიდანვე მეუბნებოდა, — არ მეჩქარება, ანდერძის გადაცემას ყოველთვის მოვასწრებო, არც ჩქარობდა... საქმის ეს მხარე უკვე მე არ მეხებოდა და ვერც ვუბედავდი მეკითხა, — ანდერძი ნოტარიული წესით გააფორმეთ თუ არ გააფორმეთ-მეთქი.

ასე იყო, თუ ისე, მე მაინც ზიზის კმაყოფილი ვიყავი, ეს მშვენიერი ქალბატონი რომ გამაცნო, ზიზის ვემადლიერებოდი და ვგრძნობდი, მენატრებოდა, სალაპარაკოც დამიგროვდა, მაგრამ ვერა და ვერ შევხვდი. სად იყო, რას საქმიანობდა, როგორ ცხოვრობდა? თუმცა ხანდახან, უფრო იშვიათად, ვიდრე მაშინ, აქეთ-იქიდან მაინც მესმოდა, — შენი ნათესავი გოგო გაეციანო... მე საბოლოოდ შეფურიგდი და შევეთვისე ზიზის ნათესაობას. ოღონდ რაღაცნაირად სინდისი მქენჯნიდა, უყურადღებოდ რომ მივატოვე, თუმცა რა, ამოდენა ქალაქში ქუჩა-ქუჩა სად მეძებნა? სექტემბრის შუა რიცხვებში თეატრალური ინსტიტუტში მივედი, მოვიკითხე, ასეთი სტუდენტი არცა გვეყოლია და არცა გვეყავსო, — მიპასუხეს, ერთხელ რუსთაველის თეატრში დავესწარი პრემიერას, მეორედ — მარჯანიშვილში, — იქნებ ზიზის აქ მაინც წავაწყდე-მეთქი. არადა, ისეთი წინათგრძნობით მივდიოდი სპექტაკლებზე, ვფიქრობდი, დღეს უსათუოდ შემხვდება-მეთქი.

მამაჩემი ერთთავად მკიცხავდა და უსულგულობას მწამებდა, — სირცხვილია, ბოლოს და ბოლოს, რა განხა იმ გოგოს მონახვა, თუ მოვინდომე, ხვალვე აქ მოგვეგრიო! მოინდომა, ძალიანაც მოინდომა, მაგრამ ტყუილად გაისარჯა, მაინც მე მსაყვედურობდა, მე მამბრალეობდა ზიზის უგზო-უკვლოდ დაკარგვასა თუ გაქრობას.

— გამოეგზავნა დედამისს მისამართი და ვიპოვიდი, ქუჩა-ქუჩა სად ვიხეტილო, — ვთქვი გაბრაზებულმა.

— იცის, რო...

— არც იმან იცის?

— არა... საქმეც ეგ არის, რომ არ იცის და გაგიყებულა — პათეტიკური თანაგრძნობით წარმოსთქვა მამაჩემმა, მერმე დაეკვდა, — ბიჭო, იქნებ ის გოგო არც არის ქალაქში?!

ზიზის ხმა ამის შემდეგ ერთი-ორჯერ კიდევ მომწვდა, ეს იმას ნიშნავდა, რომ ზიზი ქალაქში იყო. მაგრამ თანდათან ის კანტი-კუნტი ხმებიც მიწყდა, ბოლოს სულ გაქრა და დაინთქა. მიუხედავად ამისა, ზიზის ბედი არც ახლა მალეღვებდა, მე ისევ მჯეროდა, ზიზი არ დაიკარგებოდა, თვითონვე ჩამინერგა ეს რწმენა და მიხაროდა, ვითომ შენიღბული ირონიით რომ აღარ შეუბნებოდნენ, — შენი ნათესავი გოგონა გავიციანი, ასე ცეკვავდა და ისე მღეროდა, ანდა ტარზანივით ყვიროდაო (მაინც რა აყვირებდა ტარზანივით ამ გადარეულს?!). ალბათ გონს მოეგო, დამშვიდდა, საეჭვო ოჯახურ პურ-მარილებსა და დროსტარებას თავი დააღწია. საზაფხულო სესიების შემდეგ სოფელში ვაპირებდი წასვლას და ღრმად ვიყავი დარწმუნებული, ზიზის იქ ვნახავდი.

მე სულ სხვა რამ მაწუხებდა. მამაჩემმა თანდათან შემაჩვია იმ აზრს, რომ ჩვენი სახლი დღეს თუ არა, ხვალ უსათუოდ უნდა გაყიდულიყო. ანანომ იცოდა, რაც მოხდებოდა და აღრევე მიწინასწარმეტყველა ყველაფერი, მაგრამ სახლის გაყიდვა, როგორც მამაჩემთან საუბრისას გავარკვიე, მართლა გარდაუვალი ყოფილა, მოკლედ და გასაგებად მითხრა, ვისაც უნდა სოფელში ედგას სახლი, იმან სოფელში უნდა იცხვროსო. ეს კანონია და ამ კანონს ვერავინ დაარღვევსო. თუ ასეა, რას იზამ, მაგრამ მე მალიზიანებდა მამაჩემის შინაგანი კმაყოფილება იმის გამო, რომ არსებობდა ქვეყნად ისეთი კანონი, რომელიც თითქოს დაბოროტად ხელ-ფეხს უხსნიდა და რაღაც ვალდებულებებისაგან სამუდამოდ ათავისუფლებდა. მაშინ ვთხოვე, იქნებ ეს ზაფხული სოფელში გავატაროთ და მერმე გავყიდოთ-მეთქი. გაცინა, — იმ სახლის გაყიდვა ეგრე იოლი არ არის, სოფელში არ მეგულება კაცი, რომელიც ანანოს სახლს იყიდისო. მაშ, რა უნდა ჰქნა-მეთქი. მყიდველი სხვა სოფელში უნდა ვეძებოთო. ბოლოს ხმამალლა წამოსცდა, — ღმერთმა ჰქნას, გაიყიდოს, იქნებ ცოტა ხანს აღამიანურად ვიცხოვროთო.

ზაფხულის სესიები დროზე მოვითავე და სოფელში გასამგზავრებლად მოვემზადე. ქალბატონ მარიამთანაც წავედი, მინდოდა გამეგო, რა ჰქნა, გააფორმა, თუ არა ანდერძი, ანდა როდის აპირებდა გაფორმებასა და უნივერსიტეტისათვის გადაცემას. რა დასამალია, რახან ამ საქმისთვის მეც გავიღე პატარა

წვლილი, ისიც მინდოდა, გადაცემის აქტს დავსწრებოდი, მენახა, და თუ საჭირო იქნებოდა, დავხმარებოდი კიდევ, ჩემზე კარგად ვინ იცოდა, სად რა წიგნი იყო.

ქუჩაში გამოსულს ლუკა შემხვდა და დამემგზავრა. ლუკა ჩვენს მახლობლად სხვა ეზოში ცხოვრობდა, თითქმის ერთი ასაკის ვიყავით და ომამდე ბავშვობა მტკვრის ნაპირზე გვექონდა გატარებული, ომის დროს მძიმე ცხოვრება გადაიტანა, მაგრამ გაჭირვებას გაუძლო და შარშან უნივერსიტეტში ჩააბარა მისაღები გამოცდები. ვინც კი იცნობდა, ყველას უყვარდა, განსაკუთრებით გოგოები იყვნენ ლუკათი აღფრთოვანებულები, ძალიან მოსწონდათ, თუმცა გარეგნობით მაინცა და მაინც არ გამოიჩინებოდა, საშუალო ტანისა იყო, მოკლედ შეკრებილი რაღაცნაირად აკრელებული თმა ჰქონდა. ალაგ—ქერა, ალაგ—წაბლისფერი, მუდამ დაფიქრებული იყო და გეჩვენებოდა, უფრო მეტი იცოდა, ვიდრე ამჟღავნებდა, ისე კი გასაოცარი მოსმენის უნარი ჰქონდა, ყურს დიდი ინტერესით გიგდებდა და სიტყვას არასოდეს გაწყვეტინებდა. ჩვენს დროში სად ნახავ ისეთ კაცს, გულისყურით გისმენდეს, თანაც წრფელად აინტერესებდეს, რას ლაპარაკობ, რას ამბობ.

გზაში ვუთხარი, სადაც მივდიოდი და გაგიყდა, თითქოს არც დაიჭერა, რომ თბილისში ვილაცას ასეთი მდიდარი ბიბლიოთეკა ჰქონდა. ნეტავი მცოდნოდა, მეც მოგეხმარებოდიო,—სინანულით თავი გააქნია, გული დაწყდა, ასეთი იშვიათი შესაძლებლობა ხელიდან რომ გაუშვა. მერმე მოუსვენრად აწრიალდა, მაჩქარებდა, თითქოს ვეღარ ითმენდა, ახლავე, აქვე უნდოდა იმ წიგნების ნახვა, ხელის ხლება და დათვალიერება.

სწრაფად გავუხვიეთ პლატონის ქუჩისკენ.

ქალბატონი მარიამის ეზოს წინ პატარა ვიწრო ქუჩაზე უამრავი ხალხი საექვოდ ფუსფუსებდა. ახლოს რომ მივედით, დავინახეთ ვილაცებს ეზოდან წიგნები ამოჰქონდათ, ვედროებით, ტაშტებით—სარეცხის ქვაბებით, ტომრებით, ბალიშის პირებით ეზიდებოდნენ და სადღაც მიაბრუნებდნენ. ჯერ ვიფიქრე—ქალბატონ მარიამს ანდერძი გაუფორებია და უნივერსიტეტს ნაანდერძევი მიაქვს-მეთქი, მაგრამ იქ რაც ხდებოდა, ანდერძის გადაცემა-მიღებას არ ჰგავდა. ჩქარობდნენ, შეშინებულებიც ჩანდნენ და დაფეთებულ თვალებს აცეცებდნენ, დავატყვე, საქმე მოსწრებაზე იყო. რა ხდება-მეთქი — ვკითხე მოხუც

ქალს, რომელმაც ერთხელ ეზოს ქორებისა და ინტრიგების ზღარბებში გამარკვია. კნენა მარიამი დაიღუპაო, — მითხრა სინანულით, — წუხელ ფაეტონი დასჯახებია და ადგილზევე გარდაცვლილაო, ჯერ არ მოუყვანიათ, მორგშია, პატრონა არა ჰყავდა მაგ უბედურსაო.

გული გამისკდა, სწრაფად მივედი კართან და ეზოს ჩახედე, ეზოში წიგნების ზვინი იღვა, ეგრევე ეყარა მიწაზე და ხალხი ესეოდა წიგნებს, ვედროებში, ტომრებში, ბალიშისპირებში ჩურთავდნენ განურჩევლად. ეს წიგნები ქალბატონ მარიამის შუშაბანდიდან კი არა, რაღომღაც მეზობლის ოთახიდან გამოჰქონდათ და იქვე ჰყრიდნენ. ერთ წამში იმ ოთახთან გავჩნდი და, რას შერებით-მეთქი, — ვიყვირე. ჩემთვის არავის მოუცლია, ბებრები, ხანდაზმულები, ახალგაზრდები, ბავშვები ერთმანეთში ირეოდნენ, შერბოდნენ და გამორბოდნენ, დაუსრულებლად გამოჰქონდათ წიგნები.

ოთახშიც შევედი, სიღრმეში საკარედ გამონგრეულ კედლიდან ქალბატონ მარიამის ბიბლიოთეკა გამოჩნდა: დაღეწილი თაროები, წიგნებით მოფენილი იატაკი, რომელზეც ხალხი დაურიდებლად დააბიჯებდა, გადი-გამოდიოდა. მერმე ბიბლიოთეკაში გადავინაცვლე, კალატოზს ქალბატონ მარიამის ოთახიდან შემოსასვლელი კარი ჩამოედო, გაეუქმებინა — აგურით ამოეგმანა და უკვე გაჭით ლესავდა. მხოლოდ მაშინ მომაქციეს ყურადღება, როცა კიდევ ერთხელ ვიყვირე, — რას შერებით, ეს ხომ დანაშაულია-მეთქი! დანაშაულს გიჩვენებთო, — კინწისკვრით გამომისტუმრეს, სამმა დიდულვაშიანმა ახმახმა ერთდროულად წამავლო ქეჩოში ხელი და ჯერ ეზოდან, შემდეგ კი ქუჩიდანაც გამაძევა.

— გამაგებინე, რა ხდება?! — მკითხა შემფოთებულმა ლუკამ, რომელმაც თავისი თვალთ იხილა ჩემი სამარცხვინო გამეგება.

ვუთხარი, რაც ხდებოდა, რაც ნაწილობრივ ვიცოდი და რაშიც ახლა სახელდახელოდ გავერკვიე. ქალბატონ მარიამს წუხელ ეტლი (არც მანქანა, არც ტრამვაი, არც ტროლეიბუსი, მაინცდამაინც-ეტლი) დასჯახებია და გარდაცვლილა. ეს ამბავი რომ შეუტყობინებიათ, მეზობელს, რომელიც ბიბლიოთეკის მომიჯნავე ოთახში ცხოვრობდა, გამოუხგრევეია კედელი და შესულა ბიბლიოთეკაში, ხოლო ის კარი, ბიბლიოთეკას



ქალბატონ მარიამის ოთახიდან რომ აკავშირებდა, აგურით სამუდამო ამოუშენებია. წიგნები? წიგნები ხელს უშლიდა და მოიშორა. ცხრასულიანი ოჯახია, აქედან ორი მოხუცია და ხუთი — ბავშვი, როგორც კი შევლენ გამოთავისუფლებულ ოთახში, იქიდან ვერაფერს მოაცვლევიან ფეხს, ხუთ ბავშვს ქუჩაში არაფერს გამოუყრის...

ასე ვფიქრობდი მე.

წიგნები?

ვერ შეეღია ქალბატონი მარიამი წიგნებს, როგორც წარსულს, როგორც გარდასულ დღეებს, ეს მისი ცხოვრება იყო. მე არ დამიბრკოლებია, არ შემიფერხებია, რაც ვიკისრე, შევუსრულე კიდევ, ნაბიჯის გადადგმა იყო საჭირო, ფორმალური მხარის შესრულება... იქნებ იმისიც ეშინოდა, — ანდერძის აღსრულებისთანავე მეზობლები ცარიელ ოთახს დაიკავენბენო. დაეკავენბინათ, სწორედ რომ უნდა დაეკავენბინათ რა მოხდებოდა, თვითონვე გამოეჭრა კედელი, ბავშვებისთვის გაეღო კარი? მაგრამ... ეს „მაგრამ“ დიდი, მაღალი დულაბის კედელია და ამ კედელში ნებაყოფლობით კარის გამოჭრა თითქმის შეუძლებელია.

ნოტარიული წესით უნივერსიტეტისთვის წიგნების გადაცემა ჩაიშალა.

წიგნები?

— ოზო, სად მიაქვთ ეს წიგნები?

— რა ვიცი, მიაქვთ... ალბათ — სახლებში... რატომ არ წაიღებენ, შენ გგონია, მაგათ არ იციან წიგნის ფასი? თუნდაც არ იცოდნენ, მუქთად იშოვეს და მიაქვთ, ახლა მაგათ ვინ შეაჩერებს, ვინ დააკავენბს?..

— იქნებ ნაწილი მაინც გადაგვერჩინა!

— რატომ? რისთვის?

— თუ შესაძლებელია, იქნებ ჩვენც ამოგვერჩია...

— არა, ლუკა, მე მაგ წიგნებს ხელს აღარ ვახლებ.

— შენი ნებაა.

— ღმერთმა შეარგოთ! წაიღონ! ტაშტებით, ვედროებით, ტომრებით, რითაც უნდათ წაიღონ! წაიღონ! წაიღონ!

წიგნები?

უკვე აღარ მახსოვს, რა მოხდა, ხელმეორედ ეზოში როგორ

გავჩნდი, ალბათ წამით გონება დავკარგე, შევიშალე... გაგიყე-  
ბული ხალხს ვაკავებდი, ხელიდან წიგნებს ვტაცებდი, ვყვი-  
როდი, ვბლაოდი, — სად მიგაქვთ, რა უფლებით მიგაქვთ, რას  
შერებით, თქვე ბარბაროსებო, ეს ხომ განძია-მეთქი ახლა  
უკვე ყველა, დიდიან-პატარიანად დამესია, ყოველი მხრიდან  
მომცვივდნენ, დამიჭირეს, ხელები გადამიგრინხეს, მირტყეს...  
ამ ორომტრიალში თვალი კი მოვკარი ლუკას (კიბეზე ჩამორ-  
ბოდა), მაგრამ მერმე ისევ აირია ყველაფერი, რადგან ხალხს  
ხელიდან დავუხსლტე და გაქცევა ვცადე. ისევ წამატანეს ხე-  
ლი, დამბეგვეს, დამგრინხეს და ბურთივით ამისროლეს ეზოდან.  
ქუჩიდანაც გამაპანლურეს. გონს რომ მოვეგე, მე და ლუკა გა-  
ოფლილები, მტვრიანები მოედანთან სულს ვიბრუნებდით, შე-  
ნობის კუთხესთან ვიდექით, იქ, სადაც პლატონის ქუჩა მოე-  
დანს უერთდება. ლუკა გალახულის ღიმილით შემომყურებ-  
და, ისიც მაგრა იყო ნაბეგვი, ჩემთვის მარტო ცემა არ ეკმარე-  
ბინათ, პერანგი მთლად შემოეფლითათ, მხრებსა და მკერდზე  
ძონძები მეკიდა. გულამომჯდარს ტირილი მინდოდა და ვერ  
ვტიროდი. შენობის კუთხეს მოფარებული ცალი თვალით გავ-  
ცქეროდი ვიწრო, დაქანებულ ქუჩას, ხალხი ისევ ირეოდა, ისევ  
გარბოდნენ და გამორბოდნენ, გაჰქონდათ და გამოჰქონდათ...  
რაღაც გაუგებარი სიგიჟის მოწმე ვიყავი, არა მარტო მოწმე,  
დამარცხებული და გაბითურებული მონაწილეც ამ სიგიჟისა.  
რამოდენიმე წამით ამემღვრა მზერა, წინ ვერაფერს ვხედავ-  
დი, მერმე ჩვეულებრივად გამეწმინდებოდა... თავბრუ მეხვე-  
ოდა და ყოველი კუნთი მიცახცახებდა.

— წავიდეთ, — მითხრა ლუკამ.

— წამოვალ, ცოტა დამაცადე.

— არაფერი გამოგვივიდა, — ისევ გაიღიმა ლუკამ.

ლუკა მაწუხებდა, უცებ ვერ მივხვდი, ამ სიცხესა და ბულ-  
ში რატომ იდგა ასე ახლოს, რატომ ამეკრა და ამეტმანსა, ისე-  
დაც სული მეხუთებოდა. სულ დამავიწყდა, პერანგი რომ  
მთლად შემოფხრეწილი მქონდა ტანზე. თურმე მეფარებოდა, —  
ასეთი დახეულ-დაფლეთილი ხალხმა არ დაგინახოსო. სასწრა-  
ფოდ გავეცალეთ იქაურობას, წასვლამდე, კიდევ ერთხელ გავ-  
ტედე ქუჩას, ქვაფენილზე უწესრიგოდ მიმოფანტულ წიგნებ-  
შორის ვილაც მაღალი და გამხდარი მოხუცი იდგა, ხელში გა-  
დაშლილი წიგნი ეჭირა და გულისყურით ჩასცქეროდა.

სირბილით გავიარეთ რამდენიმე პატარა ქუჩა და მარჯვნივ გადავხვიეთ, მტკვარზე ჩავედით, ნაპირ-ნაპირ ვამჯობინეთ შინ წივსლა. მანამდე ტანსაცმელი გავიხადეთ და მდინარეში შევტოპეთ. წყალი აწეწილ სულსაც და ნერვებსაც ამშვილებს და აწყნარებს.

ოფლი და მტვერი ჩამოვირეცხეთ. ჩემი დაფლეთილი პეჩრანგი შორს მოვისროლე და მტკვარს გავატანე.

მართლაც, მდინარემ თითქოს დაგვაშვიდა, დაგვაწყნარა, მაგრამ მე და ლუკა რატომღაც ერთმანეთს თვალს ვერ ვუსწორებდით, დარცხვენილებს ვგავდით. წყალში მდგარნი დაუჩინებთ მივჩერებოდით გაღმა ნაპირს, სანაპიროს ბეტონის კედელს.

— დონ კიხოტს ჰგავდა ის მოხუცი. — აქვა ლუკამ.

— ვისა?

— ხომ გახსოვს, დონ კიხოტი რომ დგას და წიგნს კითხულობს...

თვალი უნებურად მარჯვნივ გამექცა, იქ, ხიდის ახლოს, პირდაპირ მდინარეზე აღმართული აგურის შენობის ერთ-ერთი ფანჯრიდან წყალში ცვიოდა წიგნები, ქალღებები, ნაგავი, მტვერი... მივხვდი, ეს იყო ის ფანჯარა, საიდანაც თითქმის წელიწადნახევარი გავცქეროდი მთაწმინდის ფერდობებს, მტკვარს, მუხრანის ხიდს. ახლა ფანჯარა ღია იყო და მტკვარში იყრებოდა მორჩენილი, დაგლეჯილი და დაფურცლული წიგნები, რისი წაღებაც არავენ ინდომა. იყრებოდა მტვერთან, ნაგავთან ერთად, წიგნის ფურცლები ჰაერში იფანტებოდა, ფრიალ-ფრიალით ეშვებოდა დაბლა და ნელ-ნელა, ფრთხილად ეფინებოდა მდინარის ზედაპირს. ჩვენ მუხლამდე წყალში ვიდექით და გავცქეროდით, მტკვრის გლუვი ზედაპირი თითქმის მოფენილი იყო წიგნის სველი ფურცლებით. სწორედ ჩვენს წინ ჩქერი იწყებოდა და ჩვენამდე მოღწეული, მოტივტივე ფურცლები ჩქერში ინთქმებოდა... თავი ველარ შევიკავე და ცრემლი წამსკდა.

მე და ლუკა სადამომდე დავრჩით მტკვრის ნაპირზე.

მამამ სოფელში გამგზავრება განუსაზღვრელი ვადით გადამიღო. ჩემი ვარაუდით, წერილი მიიღო, თანაც ძალზე მნიშვნელოვანი. ის დღეები ცოტა აგზნებული მეჩვენებოდა, ბორგავდა, ვერ ისვენებდა. მერმე მითხრა, — მგონი, გვეშველაო. ეს საშველი, როგორც გაირკვა, ჩვენი სახლის გაყიდვას ნიშნავდა. მე უკვე შინაგანად შევურიგდი, რადგან დამარწმუნეს და ვიცოდი, სახლი უსათუოდ უნდა გაყიდულიყო, სხვა გამოსავალი არ არსებობდა. მაინც შეევასხენე ჩემი თხოვნა, — შემოდგომამდე ნუ გაყიდით-მეთქი, მაგრამ მამაჩემს მუშტრის დაკარგვა არ უნდოდა. ისე კი ვერ გაამტყუნებდი, სწორად მსჯელობდა, — იმ მამაცხონებულმა შემოდგომამდე თუ მოიცადა, არ მივეძალებიო, თუ არა და სხვა რა გზა მაქვს, უნდა მივცეო. როგორც კი ასეთი რამ მითხრა, მივხვდი, სახლი უკვე გაყიდული იყო და სოფელში ზაფხულის გატარება არ მეწერა. არც შევმცდარვარ, მამა გამგზავრა და ერთ კვირაში უკან გახარებული და უზომოდ კმაყოფილი დაბრუნდა.

გული დამწყდა. უსათუოდ მეც უნდა წავყოლოდი, მით უმეტეს, წაყოლა თვითონ შემომთავაზა. არ ვქენი, რა ჭია შემიჯდა, არ ვიცი. ვითომ იმ სახლის გაყიდვას ვერ დავესწრებინეთქი. სისულელეა. უბრალოდ დამეზარა. ვინანე, მაგრამ უკვე გვიან იყო.

მეკვირია არასოდეს ვყოფილვარ, თუმცა ბევრი რამ გამკვირვებია და ბევრჯერ გავოცებულვარ კიდევ. არც მომწონს ისეთი კაცი, ვისაც ვითომ არაფერი უკვირს და აოცებს. მაგრამ ამის მსგავსი არაფერი დამმართნია, როცა მამაჩემმა მითხრა, — ჩვენი სახლი კარიაულებმა იყიდესო. გაკვირვებისაგან თავზარი დამეცა, გავხვდები და ყურებმა წივილი დამიწყო, ვიფიქრე, — მომესმა-მეთქი.

— ჰო, ჩვენი სახლი კარიაულებმა იყიდეს! — გაიმეორა მამამ.

ჩემთვის ნამდვილად სულერთი იყო, ვინ იყიდდა ჩვენ სახლს, კარიაული თუ სხვა ვილაც, მაგრამ მაინც შემადრწუნა ამ ცნობამ. რატომ იყიდეს, რად უნდოდათ? იმათ გალავანშემორტყმულ სახლთან ჩვენი სახლი ხომ საცოდავ ქონებად გამოიყურებოდა. რატომ?.. რისთვის... ამაო იყო თავის მტკრე-

ვა. რამდენიც უნდა მეფიქრა, ვერ მივხვდებოდი. ამ საიღუმ-  
ლოს ვერ ამოვხსნიდი, ამისთვის არც ჭკუა მეყოფოდა, არც  
გამოცდილება და არც ეშმაკობა. მამაჩემმაც არ იცოდა, მგონი,  
ერთ-ერთ ქალიშვილს მზითვად უყიდაო, — ივარაუდა, მაგრამ  
რომელი როტშილდი ეგა მყავს, ქალიშვილს მზითვად სახლი  
გაატანოსო, — ესეცა თქვა.

ცოტა ხნის შემდეგ რაღაცნაირი მძიმე და ჩუმი სევდა შე-  
მომაწვა გულზე, ოთახში ვეღარ გავძელი და აივანზე გავედი,  
იქაც ცხელოდა. ივლისის ღრუბლიანი დღე იყო, ჰაერი — და-  
გუბებულო და შედედებული, სუნთქვა ჭირდა. ყველაფრისათ-  
ვის თითქოს მზად ვიყავი, გარდუვალობაც გავითვალისწინე,  
მილიონჯერ ვუთხარი ჩემს თავს, — რას იზამ-მეთქი, მაგრამ საქ-  
მე საქმეზე რომ მიდგა, ვერ შევეგუე, ვერ შევეურიგდი იმ აზრს,  
რომ ანანოს სახლი აღარ არსებობდა. მე და მამაჩემი კი ვამ-  
ბობდით, — ჩვენი სახლიო, მაგრამ რა ჩვენი სახლი ეგ იყო,  
ჩვენი რომ ყოფილიყო, ალბათ, არც დამწყდებოდა გული. ის  
იყო ანანოს სახლი და ანანოსთან ერთად წავიდა და გაქრა. არ  
შეგონა, ოდესმე ეს თუ მოხდებოდა, არ ვუჭერებდი არც ანა-  
ნოს და არც ჩემს წინათგარძნობას, სულში ვჩქმაღავდი და ვა-  
ფუჩეჩებდი, სხვა გარძნობებით ვცვლიდი, უფრო იმედია-  
ნით, დამაშშვიდებელ აბებივით ვყლაპავდი გონებაში წარმოდ-  
გენილ თუ გამოგონილ მომავლის ვარდისფერ გარძნობებს, ყვე-  
ლაფერი რიგზე იქნება-მეთქი, — გავიფიქრებდი და ყოველგვა-  
რი იქვისა და ტკივილისაგან თავისუფალი განვაგარძნობდი გზას.  
ყველაფერი რიგზე იქნება...

აივანზე მდგარმა მდინარეს გადაეხედე და გამახსენდა, რომ  
ბიბლიოთეკის დარბევის შემდეგ მტკვარს პირველად ვხედავ-  
დი. თავისთვის მიედინებოდა უშფოთველად, უღრტვინველად.  
მომწვანო ტალღებს თვალი აღმა ავაყოლე და მზერა ხიდთან,  
ნაპირიდან აღმართულ აგურის შენობაზე შევაჩერე. უკვე ვი-  
ცოდი და აღვილად მოვნახე ის ფანჯარა, საიდანაც თითქმის  
წელიწადნახევარი გავცქეროდი თბილისის ცას, მთაწმინდის  
ფერდობებს, ქალაქს, და საიდანაც ამ რამდენიმე დღის წინ  
დაუსრულებლად ცვივოდა დაფურცლული წიგნები თუ წიგ-  
ნის ფურცლები, ფრიალ-ფრიალით მდინარის ზედაპირს რომ  
ეფინებოდა. გული ახლაც შემიქანდა. იმ დღის გახსენება აღარ  
მინდოდა, მაგრამ თავს ვერ ვერეოდი. რა იყო ეს? შემზარავი

კოშმარი თუ ცხადზე უცხადესი სინამდვილე, რომელმაც შინაგანად დამარბია და დამწეწა? არა მარტო შინაგანად, მხოლოდ მეორე დღეს ვიგრძენი, რა მაგრად ვიყავი ნაცემი და ნაბეგვი. ჯანდაბას ჩემი თავი!

ქალბატონი მარიამი წავიდა და გაქრა დიდებული განძი, ბიბლიოთეკა, რომელიც ალბათ მთელი საუკუნის მანძილზე იქმნებოდა. თითო-თითოდ მოდიოდა წიგნები პარიზიდან, ლონდონიდან, ბერლინიდან, პეტერბურგიდან, მოსკოვიდან... რა თქმა უნდა ამ ნაკადებს ქართული გამოცემებიც ემატებოდა. გაქრა ის ისტორიაც ის უიშვიათესი შეხვედრებიც, რაც ამ ბიბლიოთეკასთან, ამ წიგნებთან იყო დაკავშირებული. ჩვენს დაუდევრობას საზღვარი არა აქვს! სხვას თუმცა რას ვემაართლები? განა მე თვითონ ცალი ყურით არ ვუსმენდი ქალბატონ მარიამს, როცა ის საღამოობით გასაოცარ ამბებს მიყვებოდა იმ ადამიანებზე, რომლებიც ბიბლიოთეკაში მოდიოდნენ და წიგნებით სარგებლობდნენ? გულისყურით უნდა მომესმინა, დამემახსოვრებინა, ჩამეწერა... სულელს მეგონა ხვალაც ასე იქნებოდა, მეგონა ყველაფერი რიგზე იყო და ასევე გაგრძელდებოდა.

აივნიდან შინ რომ შევბრუნდი, რატომღაც იოთამის ცხენები გამახსენდა, ალაზანში შეყრილი რემა, თავაწეული, კისერდაქიმული თეთრი ბედაურები... სადღაც გორაკებში ჩაკარგული ნისლაურა... უცებ გულმა იქითკენ გამიწია და გამიკვირდა აქამდე ასეთი სურვილი რატომ არ გამიჩნდა-მეთქი. ერთხელაც არ მომნდომებია იქით გახედვა... სხვათა შორის, ისიც ვიფიქრე, რატომ მაინცდამაინც ახლა მომინდა იმ ადგილების მონახულება? თან ბუნდოვანი წარმოდგენაც არ მქონდა, დაახლოებით სად იყო, სად მდებარეობდა ნისლაურა.

გავიდა ორი დღე და ეს სურვილი უფრო გამიმძაფრდა. შეუპოვარი სიჯიუტით მეწეოდა და მექაჩებოდა, მოუთმენლობის თრთოლვით მავსებდა.

სურვილის განხორციელება ძნელი არ იყო, მაგრამ ამ ლტოლვის მიზეზთა აღმოჩენასაც ვცდილობდი. ეს ლტოლვა ჯერ ჩვენი სოფლით დაიწყო და ყველაფერი გასაგებად მესახებოდა. მერმე მოულოდნელად ნისლაურა ამოტივტივდა, ის გორაკები, ფერდობები, ალაზანი, თეთრი ცხენების რემა...

მერმე სივრცე თანდათან გაფართოვდა და მთელი მხარე მოიცვა... დავიბენი, ვერ გავერკვიე... ჩემი „ვნებათა ღელვანი“ ლუკას გავუმხილე და გავანდე, ლუკამ ნახევრად სახუმარო კილოთი მითხრა, — რა დიდი ამბავი ეგ არის, წავიდეთ, დავაცხროთ ეს „ვნებათა ღელვანი“, ყველაფერი იქ გაირკვევაო, მხარი ამიბა, მეორე და მესამე დღეს გამგზავრებას უკვე თვითონ მაძალებდა.

მეგონა, ლუკას სიარული გაუჭირდებოდა, ჩემსავით ვერ ივლიდა, მაგრამ ჭანიანი და გამძლე გამოდგა, მომყვებოდა და მოჰქონდა თავისი დიდი ზურგჩანთა. ცოტას ლაპარაკობდა, თუმცა ვატყობდი, გაბრუებული და გოგნებული იყო ყოველდღიური შთაბეჭდილებით.

თელავიდან შუა მთისკენ რომ გავუხვიეთ, მარჯვნივ, შორს, ატმისფერ ნისლებიდან ამოზრდილი კავკასიონი გამოიკვეთა. როცა მთებს გავცქეროდი, ვცდილობდი, თავი ისე დამეჭირა, ვითომ შეეხვდი ძველისძველ ნაცნობს, რომელმაც ყოველდღიური შეხვედრებით თავი მომაბეზრა და ახლა მხოლოდ ის მაინტერესებდა, ლუკაზე რა შთაბეჭდილებას მოახდენს-მეთქი.

— შეიძლება კაცი გაგიედეს, — თქვა ლუკამ, — ალბათ ვერავინ დაარქმევს ამას სახელს.

— რა დარქმევა უნდა, ამას კავკასიონი ჰქვია, თანაც ძალიან დიდი ხანია.

— არა, აი, რას დაარქმევდი იმ განცდას, რომელიც კავკასიონის პირველად ნახვისას გეუფლება? თუ არა ვცდები, ტოლსტოიმაც ვერ მოუნახა ამას სახელი. გახსოვს ოლენინი, პირველად რომ დაინახავს კავკასიონის მთებს? აბა, თქვი, რას განიცდის: სიხარულს? აღტაცებას? შეშფოთებას? თავზარდაცემას? თუ რას?

მე არ მახსოვდა და არც შეიძლებოდა მხსომებოდა, რადგან ჯერ წაკითხული არ მქონდა ეს მოთხრობა, რომელსაც ლუკა გულისხმობდა და გავყუჩდი, ვერც ვალიარე, — არ წამიკითხავს-მეთქი.

ის ღამე შუამთაში გავათიეთ, სამი დღე იყალთოსა და ალავერდს მოვანდომეთ, მერმე უკან მოვბრუნდით და ალაზნანს გაღმა, გრემთან, დავბანაკდით, აქ ორიოდღე დღე დავყავით, ყველაზე მეტად მდინარის პირას მოგვწონდა ღამისთე-

ვა, ცურვით გულს რომ ვიჭერებდით, ცეცხლს გავაჩაღებდით და ჩაის მოვადუღებდით, ხანდახან ვთევზაობდით. კიდევ ც. ლუკას ანკესები ჰქონდა წამოღებული. მერმე კინწის მოწყვეტამდე ვყვებოდით აქეთურსა და იქეთურს. მე ჩვენი სოფლისა და ანანოს ამბებს ვუყვებოდი, გაყუჩებული მისმენდა, არკი მისმენდა, თითქოს ნაამბობს მთელი არსებით ნთქამდა.

გრემიდან ისევ თელავს დავბრუნდით და წინანდლისკენ გავუყვებით გზას. სულ ფენით სიარული და ბარგის თრევა არ გვიხდებოდა, ზოგჯერ საბარგო მანქანა გაგვიყოლებდა, ზოგჯერ — ურემი, თუ ურემზე ჩვენი ადგილი არ მოიძებნებოდა, ბარგს დავუდებდით, ესეც დიდი შეღავათი იყო. თელავიდან წამოსულებმა ბოდბისხევის ბაზრობაზეც ამოვყავით თავი, ცხელ საჭმელს დანატრებულები ხინკალსა და მწვადს მივეძაღეთ. მერმე საგზლითაც (დედას პური, ყველი, კიტრი, ვაშლი) მოვმარაგდით, დამატებით შევიძინეთ მატყლის წინდები და თუშური ქუდები, კინკრისხოზე რომ ძლივს ჩამოგვაცვა იმ ქუდივით შავმა, თანაც გაქნილმა მექუდემ. კახეთში ქუდი ყველა თავს მოვარგე და, — ამბობდა სხვების გასაგონად, — ეგრე დამწიფებულებს ჯერ არ გადაეწყდომივარო. ჩვენც შეგვრცხვა მოულოდნელად, ასე დიდთავიანები რომ აღმოვჩნდით, სასწრაფოდ გადავუხადეთ ფული და იქაურობას უხერხული ნაბიჯით გავეცალეთ, თავებს კისრებზე ძლივს ვიმაგრებდით.

აღმა-დაღმა ხეტიალში კიდევ ათი დამლღელი, მაგრამ სასიამოვნო დღე გავიდა. ღამე სადღაც ალაზნის პირას, თელიანში გავათენეთ და დილიდანვე სამზადისს შევუდექით. ცეცხლის გარშემო მიმოფანტული ნივთები მოვაგროვეთ და ზურგჩანთაში ჩავტენეთ. მზის ამოსვლამდე გვინდოდა გავდგომოდით გზას.

წუხელაც, დილითაც მოუსვენრად ვგრძნობდი თავს, რაღაც მაფორიაქებდა, თითქოს ამ ადგილებში ერთხელ უკვე ვიყავით. მდინარის ეს ნაპირიც, ეს თელებიც, თელებს ზემოთ პატარა გორაკებიც უკვე ნანახსა და განცდილს ჰგავდა. ნუთუ ისე დაგვებნა თავ-გზა, რომ ერთხელ ნამყოფ ადგილებს დავუბრუნდით-მეთქი, — ვფიქრობდი. ლუკა დაბეჯითებით ამბობდა, — სხვისი არ ვიცი და მე აქ პირველად ვარო.

თელებს რომ ავცდით, ბორცვიდან გავხედე გორაკებს



ზემოთ გაშლილ მწვანე ფერდობს, რომლის იქით ტყით დაფარული მთები იწყებოდა. დაუინებით გავცქეროდი და უცებ შორს, იმ მწვანე ფერდობზე გარკვევით დავინახე თეთრი ცხენი... ცხენი საოცარი სისწრაფით მიჰქროდა ტყის გასწვრივ. ცხენი-მეთქი, — წამოვიყვირე.

— სადა? — მკითხა ლუკამ.

— აგერი — გავიშვირე ხელი ფერდობისაკენ.

— სად ხედავ ცხენს?

— ზევით, ტყის გასწვრივ გარბის.

— მე ვერაფერს ვხედავ.

— როგორ ვერ ხედავ?!... აგერი... აგერი... — უკვე ველარც მე ვხედავდი ცხენს, ან ბორცვს მიეფარა ან ტყეში შევარდა.

— ალბათ მოგეჩვენა. — მითხრა ლუკამ.

— რას ქვია, მომეჩვენა? ისე ვხედავდი, როგორც შენ გიყურებ.

— შეიძლება.

— შენ გგონია, უკვე მოჩვენებები დამეწყო?

— არა... მეც მინდოდა დამენახა.

უცებ ეჭვმა გულის სიღრმეში გამეკენწლა, ბორცვიდან ალაზანს გადავხედე. ქვევით, კარგა მოშორებით დავინახე კბოდე, რომელიც ხელმარჯვნივ უხვევდა და მდინარეს მიმართულებას აცვლევინებდა, მერმე თელიანს გადავავლე თვალი, ესეც მენიშნა. ისევ გორაკებს მივაშტერდი, ადგილს მოვწყდი და ახლა სხვა ბორცვზე ავირბინე. იქიდანაც გადავხედე ალაზანს, თელიანს, მერმე ნელ-ნელა ავაყოლე თვალი ბორცვებს, გორაკებს... მწვანე ფერდობს, ტყეს...

— ოზო, სად გარბიხარ?! — გავიგონე ლუკას ხმა.

მთელი სხეულით, მთელი არსებით, გულით, ფილტვებით, ყნოსვით ვიგრძენი, რომ იქ, იმ პატარა გორაკებსა და მწვანე ფერდობს შორის ჩამალული იყო ნისლაურა, საბას სოფელი. სიხარულისაგან ისე ავლელდი, თვალეებზე ცრემლი მომადგა. ტირილი მინდოდა, თავბრუ დამეხვა, დავრეტყიანდი, რომ არ წავქცეულიყავი, იქვე ჩავჯექი და უღონოდ მკლავები მუხლებზე გადავიკიდე...

ჯერ ხალხის ყიჟინა და ყვირილი გავიგონე, მერმე — ცხენების ჭიხვინი და ფლოქვების თქარა-თქური. ნიაღვარივით დაძრული თეთრი ცხენების რემა გუგუნითა და გრიალით მი-

ექანებოდა ალაზნისაკენ... თითქოს ღვარცოფმა დამბა გაგლიჯა, ზედ გადაევიდა და ახლა-მიხვეულ-მოხვეული ხრამებით გზას მიიკვლევდა დაღმა... ყოველ ნაბიჯზე ხმაურითა და კეტების ქნევით ხვდებოდა ჩასაფრებული ხალხი, გზის აქცევის საშუალებას არ აძლევდა რემას... გარბოდნენ და გამორბოდნენ, გააქონდათ და გამოაქონდათ... გაგიჟებული ხალხი ტომრებით, ვედროებით, ტაშტებით, ბალიშისპირებით ეზიდებოდა წიგნებს... მდინარის ატორტმანებული ზედაპირი მოჩითული იყო ცხენების თავებით, წიგნის ფურცლებით. გამწარებულ ცხენებს კისრები დაეგრძელებინათ და თავალერიონი მთელი ძალით ებრძოდნენ ღონიერ ტალღებს, მზაკვრულ დინებებს, ღრმა ძაბრულებს... ეს ღრმა ძაბრულები გაშმაგებით ნთქავდნენ დაფურცლულ წიგნებს... წასვლამდე კიდევ ერთხელ გავხედე ვიწრო ქუჩას, ქვაფენილზე უწესრიგოდ იყო მიმოფანტული წიგნები...

— ოზო, — ისევ დამიძახა ლუკამ, რომელიც ქვემოდან ორ დიდ ზურგჩანთას ხენეშა-ხენეშით მოათრევდა. — რას მიღიმი, ვერა ხედავ, ძლივს მოვათრევე?

ცხადად წარმოვიდგინე, მწვანე ფერდობიდან გამორეკილი ცხენების რემა გრიალით როგორ დაქანდა ალაზნისაკენ და ალაზნთან მისულები ძალით როგორ შეჰყარეს მდინარეში, მაგრამ ამ წარმოსახვას ჩემთვისაც მოულოდნელად ხელი შეუშალა ცნობიერებაში ამოტივტივებულმა სხვა სურათებმა. უნებურად მახსენდებოდა მძიმე შთაბეჭდილებათა ნაფლეთები იმ დღისა, როცა ქალბატონი მარიამის ბიბლიოთეკა დაანგრის, გაძარცვეს და მთელი ქუჩა დაფურცლული წიგნებით მოჰფინეს. ახლალა მტკიოდა გული, ამ ქალის დასაფლავებას რომ აღარ დავესწარი და უკანასკნელი პატივი არ მივაგე. მინდოდა ამ სივრცეში მდინარის შორეულ ხმაურში, განთიადის ბურუსში, ცის სილურჯეში, თელგების შრიალსა და გორაკების ხასხასა სიმწვანეში დავნთქმულიყავი და დავშლილიყავი, რომ ერთი წუთით მაინც იმად ვქცეულიყავი, რასაც გარშემო ვხედავდი, რაც სიხარულსა და ტკივილს ერთდროულად მანიჭებდა.

ლუკა ხენეშა-ხენეშით ამობობდა ბორცვზე. ორივე ზურგჩანთა იქვე მიყარა და გვერდით მომიჯდა. ცოტას სულს მოვითქვამ და წავიდეთო, — მითხრა. მე გუნებაში დღევანდე-

ლი მარშრუტი შეეცვალა, უკან გაბრუნებამდე ჯერ ნისლაურაში ავიდოდით, იქაურობას შეეხედავდით, დავათვალიერებდით და იქიდან უკვე ჩვენი სოფლისაკენ გავეშურებოდით. გულით მინდოდა, ლუკასთვისაც მენახებებინა ჩვენი სოფელი.

ლუკამ ჩემი მონაყოლით იცოდა ნისლაურას არსებობა და ზოგიერთ ყოფილ მკვიდრსაც ასევე იცნობდა, ამიტომ სიამოვნებით წამომყვა.

დიღხანს ვიარეთ, ნისლაურაში ასასვლელ გზას ვერ მივაგენით და პირდაპირ აღმართს შევუყვებით, გაცვეთილი ლანჩები ნამიან ბალახზე სრიალებდა, მიწაზე ფეხს ძლივს ვიკიდებდით, ხშირად ვეცემოდით და მუხლამდე გალუმპულები ნაბიჯ-ნაბიჯ მივიწვევდით აღმართზე. მზის ამოსვლისას უკვე სოფელში შემაველ საურმე გზას დავადექით. ძველი გზა იყო, თითქმის გაუქმებული, შალაფამოძალებული, მაგრამ მაინც გზა ეთქმოდა და ჩვენც საკმაოდ გავვიოლდა სიარული.

სოფელი მთლად მიტოვებული არ ჩანდა, ბელურები ყივ-ყივებდნენ, შორიდან მამლის ყივილიც კი გავიგონეთ. სოფელში შესვლისთანავე ყეფა-ღრენით ნაგაზიც გამოგვენთო. ჯერ შეგვეშინდა, შევდრკით, მერმე ლუკამ გაიცინა და მეც დამამშვიდა, — ბებერია, კბილები არა აქვსო, ქოფაკი არ გვეშვებოდა, გაავებული, ბოხი, ხრინწიანი ხმით გვიყეფდა და გვიღრენდა, საცოდავს მართლაც, ყბებზე ერთი კბილიც არ შერჩენოდა.

— ნუ გვატყუებ, ბებერო, — უთხრა ლუკამ რალაცნაირი ალერსიანი ღიმილით.

ნაგაზმა თითქოს გაიგონა ლუკას ნათქვამი, გაჩუმდა, აჯაგრული ბეწვი დაულაგდა, მერმე მორცხვად თავდახრილი მოუქნელად დაიგრისა და დაიკვანწა, კუდის ქნევით გამოგვეყვა უკან. სამწუხაროდ, სოფელი თითქმის მიტოვებული და დაცარიელებული აღმოჩნდა. უპატრონობით გაოხრებული ეზოები, მორღვეული ღობეები, დაბზარული კედლები, აყრილი კრამიტი... ძველი პატარა ბაზილიკა წაქცევაზე იყო და ღია კარიდან თითქმის სიბნელე გვითვალთვალავდა... ასეთი ვნახე ნისლაურა. მაგრამ ბუნებას მაინც თავისი გაჰქონდა, ვაშლითა და პანტამსხლით დახუნძლულ ხეებს თითქმის მიწამდე ჰქონდათ დაშვებული ტოტები. ქვეყნის დასალიერიდან კიდევ ერთხელ იყვილა მამალმა და ჩვენც სოფლის წყაროს

მივაღეჭით. წყაროსთან სამი შავხილაბანდიანი დედაბერი საუბრობდა, ჩვენი ფეხის ხმა შემოესმათ და მობრუნდნენ, ცნობისმოყვარეობით დაგვიწყეს თვალიერება. მივესალმეთ, ზურგჩანთები მოვიხსენით და იქვე კაკლის ჩრდილში მივყარეთ. აღმართზე სიარულით დაღლილები და გაოფლილები ბრტყელი აგურით ნაშენებ წყაროსთან მივედით, მოხუცმა ქალებმა თავიანთი სველი ღოჭები გვერდზე მიდგეს და წყალთან მიგვიშვეს; წყალი თითბრის მილიდან მსხვილ ნაკადად მოთქრილობდა, ცივი და ანკარა იყო. წყურვილიც მოვიკალით და თავ-პირიც მივუშვირეთ, გამოვცოცხლდით. დედაკაცები დაინტერესდნენ, — სადაურები ხართ? ქალაქელები-მეთქი, — ვუთხარი. ასე დავიწყეთ და შემდეგ გავაბით საუბარი. იქვე გავარკვიეთ, სოფელში თურმე ოთხი კომლილა დარჩენილიყო, ისიც მოხუცები. წავიდ-წამოვიდნენო, — თქვენს მშვიდად, თითქოს ესეც უნდა მომხდარიყო, — მა, აქ რა გააჩერებდათო, თითქოს იმას გვეუბნებოდნენ, — სიბერეს რა ვუთხრათ, თორემ ჩვენ აქ რა დავგაყენებდაო. მერმე ერთ-ერთმა გვიოთხრა, — თქვენ რაღამ მოგიყვანათო? ქვეყანას ვათვალიერებთ, ვეცნობით-მეთქი, — ეუპასუხე. მერმე ამაზე უკეთესი სხვა ვერა ნახეთ რაო, — გაიცინეს. ჩვენთვის ამაზე უკეთესი ქვეყნად არც არის და არც იქნებაო, — უთხრა ლუკამ. დედაბრებმა ისევ ჩაიცინეს, ნათქვამი ალბათ ხუმრობად ჩაუთვალეს ლუკას.

საუბარი აღარ დაგვცალდა, რადგან ჩვენკენ მომავალი მამაკაცი დავინახეთ და იმას მივაქციეთ ყურადღება. ქალები აფუსფუსდნენ, აწრიალდნენ, თავიანთ კოცებს სასწრაფოდ დაავლეს ხელი და წავიდ-წამოვიდნენ. ჩვენკენ მომავალს ძველი, გახუნებული სამხედრო კიტელი, გალიფე შარვალი და ჩექმები ეცვა, ზომიერი ნაბიჯით მოდიოდა, გამართული, მოგვიახლოვდა და თავაზიანად მოგვესალმა. არ გვეგონა, საკმაროდ ხანში შესული აღმოჩნდა. სუფთად გაპარსული სახე მთლად დაღარვოდა, დანაოქებოდა, თხელი, ჭაღარა თმა კოხტად, ყმაწვილურად გვერდზე გადაევარცხნა. დედაბრებს რატომღაც ზიზლით გააყოლა თვალი და მიაძახა, — ყვავებო, ტყუილად ნუ ყრანტალებთ, არაფერი გამოგივათ, არაო! რამდენადაც ანანოს მონაყოლიდან მახსოვდა, გედეონ ომანაშვილი აქედან წავიდა და მერმე აღარ დაბრუნებულა. არადა ახლა ნაძღვეს

დავდებდი, რომ ეს გახუნებულ სამხედრო ტანსაცმელში გამოწყებილი კაცი გედეონ ომანაშვილი იყო. ზუსტად ასეთი მყავდა წარმოდგენილი, ოღონდ ახლა სხვა ტანსაცმელი ეცვა, ასეთ ტანსაცმელს იმხანად ბევრი ატარებდა, რადგან შედარებით იოლი ხელმისაწვდომი იყო.

— ჭაბუკებო, მე გედეონ ომანაშვილი გახლავართ, ამ სოფლის მკვიდრი.

ეს ხმა და კილო თითქოს ერთხელ უკვე გაგონილი და მონშენილი მქონდა, იმდენად მეცნო, რომ ძლივს შევიკავე თავი, თორემ ბერიკაცის მოხვევას ვაპირებდი.

— ხომ არ ინებებთ ჩემთან წამობრძანებასა და მოსვენებას? დალლილებსა ჰგავხართ და თანაც წყლით გაწუწულხართ...

ლუკამ ისე შემომხედა, თითქოს მკითხა — ის ომანაშვილი ხომ არ არისო? სწორედ ის ომანაშვილია-მეთქი, — ვანიშნე. თავპატივის დადება არც გვიფიქრია, მაშინვე მოვიგდეთ ჩვენი ზურგჩანთები და გავყევით. მოგეშველებითო, — კი გვითხრა, წამოიწია კიდეც, მაგრამ ბარგი არ დავანებეთ. წინ ბატონი გედეონი მიდიოდა, ხანდახან მოგვხედავდა და გზას განაგრძობდა. ჩვენს უკან ბებერი მურა-ნაგაზი მოძუნძულვდა, თავჩაკიდული, მოწყენილი. რაღაცნაირი სოფელი იყო, უცნაური, სახლები მხოლოდ გზის ერთ, მარჯვენა მხარეს აეშენებინათ, ფერდობზე, მარცხენა მხარე ალაზანს გადაჰყურებდა, ქვემოთ ერთმანეთზე მიყრილი ბორცვები და თელიანი მოჩანდა.

უხმოდ მიეყვებოდი მოხუცს, საბას სახლიც ვიცანი, ქვის სამი საფეხური, მუხის კარი... არ შეეჩერებულვარ, მხოლოდ მივხედე და მოჯადოებულებით ისევ ბატონ გედეონს გავყევი. ვინ იყო ან რა იყო ეს გედეონ ომანაშვილი? მე ხომ მონაყოლის მონაყოლით ვიცოდი, რომ ქვეყანაზე არსებობდა ასეთი კაცი — გედეონ ომანაშვილი... ახლა პირველად შევხვდი, პირველად დავინახე... მაშ, რატომ ავღელდი, რატომ ამიტანა სიხარულმა, რატომ შევცქერი სასოებითა და მოწიწებით, თითქოს ეს იყოს სისხლი სისხლთაგანი და ხორცი ხორცთაგანი?

თითქმის მთელ სოფელს წინ ჩაეუარეთ, ბოლოს ერთ პატარა აივნის სახლთან შეჩერდა, ცალი ხელი არტისტულად, მოხდენილად გაიშვირა და გვითხრა, — აი, ეს გახლავთ

ჩემი აპარტამენტის ეზოში შეგვიძლება. ეზო სუფთად დაგვილი და მოვლილი მომეჩვენა. შინ არ შევუყვანივართ. ცაცხვის ჩრდილში დაგვსხა, მოგრძო მაგიდაც და მერხებიც ბატონი გედეონის ნაოსტატარი უნდა ყოფილიყო. დაწვრილებით გამოგვკითხა, ვინ ვიყავით, სადაურები, სად მივდიოდით, რას ვაპირებდით? ყველაფერი ვუთხარით და განვუმარტეთ. დიდად კმაყოფილი დარჩა, გაგვაძხვნევა და შეგვაქო, ყოჩაღ, ყოჩაღო! საუბარში რომ ვიყავით გართულნი, ჩვენი ნაცნობი ზოხუცი ქალები მოადგნენ ღობეს, ორნი იყვნენ, პური, მწვანელი და კიტრი მოიტანეს.

— აჰა, კეთილინებეთ და მობრძანდით, არა? უჩემოდ აღარ შეგიძლიათ ცხოვრება! — უთხრა ბატონმა გედეონმა, — შემოდექით და ეგენი მაგიდაზე დააწყეთ. ქალბატონი მაგდალინა სადღაა?

— მაგდანა ახლავე გახლებათ, ხინკალს გახუხავს და მოვა.

— კარგია, სტუმარმასპინძლობის წმინდა წესები ჯერ რომ არ დაგვიწყნიათ.

დედაბრებმა მოტანილი სანოვაგე მაგიდაზე დაახვავეს და წავიდნენ.

— თქვენი კაცებიც გამიფრთხილეთ, არქვით, რომ სტუმრები მყავს. — მიაქახა ბატონმა გედეონმა წასულებს და ჩვენ მოგვიბრუნდა, — ვეჟო, მხოლოდ ოთხი კომლიდა შევრჩით ამ დიდებულ სოფელსა, ეს დედაბრები ატეხილან, ამათაც მონდომებით წასვლა, რაიონის ცენტრში გადასახლება და გადაბარება. საქმე ის გახლავთ, რომ კაცებიც აუყოლებიან, მაგრამ მე აქ რისთვის ვარ, ისეთ-ისეთები ვუთხარი; გაჩენის დღე ვაწყვევლინე... არ გამოგივათ, არა, ბატონებო! ჩემთან ერთად დაიხოცებით აქა!

ბატონი გედეონი გარეგნულად პენსიაში გასულ პროვინციელ აქტიორსა ჰგავდა. მისი ქესტი, მიმიკა, მოძრაობა, ხმა, კილო-კავი ერთდროულად კომიკურიც იყო და ტრაგიკულიც, საოცარი ისაა, რომ ამ კაცში კომიკურსაც და ტრაგიკულსაც ერთი საფუძველი თუ მიზეზი ჰქონდა. მის მიხრამოხრას, მეტყველებას, შინაგანის გამჟღავნებას, აღელვება იქნებოდა ეს, სიხარული თუ გაბრაზება, ძველყაიდურის იერი დაჰკრავდა და ამიტომაც ღიმილსა გვეკრიდა, ამავე დროს

გრძნობდი, რომ ეს ყველაფერი ხვალ აღარ იქნებოდა, აღარ განმეორდებოდა და რაღაცნაირად წინასწარი სევდა გიპყრობდა.

სახელდახელოდ გაგვიწყო სუფრა, გამოიტანა თეფშები და დანა-ჩანგალი, პური დაჭეხა, ყველი დაჭრა და კიტრი დათალა, ამასობაში მესამე დედაკაციც გამოჩნდა, სპილენძის პატარა ქვაბუნათი გახუხული ხინკალი მოგვიტანა. სანამ ცხელია, ისიამოვნეთო, — გვითხრა და მაშინვე წავიდა.

— მაგდალინა, — დააწია ხმა ბატონმა გედეონმა, — თქვენმა კაცებმაც უნდა იცოდნენ, რომ ყოველი სტუმარი ღვთის მიერაა მოვლენილი და ქართველი კაცი დასაბამითგანვე უღრეს პატივს მიაგებდა სტუმარს.

მაგდანა, რომელსაც ბატონი გედეონი ჯიუტად მაგდალინას უწოდებდა, მობრუნდა, მერმე საწყალობლად გაიღიმა და მხრები აიჩეჩა. რამდენადაც მივხვდი, ბატონი გედეონი და ის სამი ბერიკაცი წაჩხუბებულები თუ წაკინკლავებულები უნდა ყოფილიყვნენ და ახლა ჩვენი ანუ სტუმრიანობის მიზეზით ცდილობდა იმათ შემორიგებას, მაგრამ ისინი, როგორც ჩანდა, თავისაზე მაგრად იდგნენ და პოზიციას არ თმობდნენ.

ხინკალს ნუ გავაციებთო, — გვითხრა ბატონმა გედეონმა და მაგალითი გვიჩვენა, პატარა ქვაბში ხინკალს მისწვდა, დიდებულთაო, — თქვა და ჩვენც ხმისამოუღებლად მივბაძეთ კეთილ მასპინძელს. ნავაზმა დაამთქნარა და თავი შეგვახსენა.

— ძაღლი მაინც ძაღლია, — ამბობდა ბატონი გედეონი, — კბილიანი თუ უკბილო. ყუფაც საქმეა, ბატონებო, ჩვენი თოფალა რომ არა, თქვენს მობრძანებას მე ვერ შევიტყობდი. ბებერო ქოფაკო, — ახლა ძაღლს მიუბრუნდა, — ძვალს ველარა ხრავ და რა გიყო... ხინკალი მოგინდა, არა?!

ბებერმა თოფალამ ბატონი გედეონის ნასროლი ხინკალი მარჯვედ დაიჭირა და ყბის ერთი მოქნევით გააქრო.

— ახლა ეგ იკმარე, მერმე სალაფავს მოგიმზადებ.

ბატონ გედეონს უცებ რაღაც გაახსენდა, სწრაფად წამოდგა, შინ შევიდა და ცოტა ხანში უკან დაბრუნდა, თან პატარა ვერცხლის სურა და ვერცხლისავე, სათითებებივით პაწაწკინტელა სირჩები გამოიტანა.

— ბატონებო, თქვენ ახლა სიცოცხლის ელექსირს შე-

გასმევთ. ეს ელექსირი აქაური ბალახების ნაყენია. ჩვენებურ არაყთან შეზავებული ამბროზიაა... ოლიმპოს ღმერთების სასმელია... მე ამით მიდგას სული, ყოველ დილას თითოს გადავკრავ ხოლმე, ოღონდ უზმოდ... ენერჯისა და სიხალისის უშრეტი წყაროა.

პაწაწინა სირჩებში ჩამოგვისხა მღვრიე, მოშავო-მოყვი-თალო სითხე და თვალი ჩაგვიკრა, მერმე დაილოცა და გადაჰკრა. ჩვენც დავილოცეთ და გადავკარით... შხამი... ასეთი მყრალი, ასეთი მწარე და მაგარი სასმელი ჯერ პირში არ ჩამსვლოდა, ლამის თავის ქალა ამეხადა.

— ხომ არის ნექტარი? — გვკითხა ბატონმა გედეონმა.

მე ლუკას გადავხედე და შევატყვე, ისიც ჩემს დღეში იყო ჩავარდნილი, სიმწრის ღიმილით ეთანხმებოდა, — დიახ, ბატონო, ნამდვილი ნექტარიაო. მეორე სირჩა არც მე და არც ლუკამ აღარ ვინდომეთ.

არაფერი მითქვამს იმის გამო, რომ აქაურობას, ასე თუ ისე, ვიცნობდი. არც იოთაში გამხსენებია, არც საბა, არც თომა ბიკაშვილი. რა თქმა უნდა, შემეძლო ამით ჩვენი ურთიერთობა უფრო გამეიოლებინა და გამემარტივებინა, ზოგი რამ თვით გედეონ ომანაშვილზეც მქონდა გაგონილი, რატომღაც თავი შევიკავე, თავის შეკავება ცოტა გამიჭირდა, მაგრამ ბოლომდე გავუძელი, ერთი ვკითხე მხოლოდ:

— ბატონო გედეონ, დილით ამ ფერდობზე თეთრი ცხენი დავინახე, გაიქროლა და უცებ გაქრა... ჩემმა მეგობარმა როგორღაც ვერ მოასწრო მისი დანახვა... ახლა ვფიქრობ ხომ არ მომეჩვენა-მეთქი.

ბატონმა გედეონმა პასუხს თითქოს თავი აარიდა, დაფიქრდა და ისევ თავის ამბროზიაზე ჩამოგვიგდო საუბარი, — ეს ელექსირი მხოლოდ ვერცხლის ჰურჭელში მზადდებაო, რა თქმა უნდა, ვერცხლის სასმისითვე უნდა შეისვას, თორემ ეფექტი მიღწეული არ იქნებაო. აშკარად ერთს ამბობდა და სხვას ფიქრობდა, უფრო ზუსტად რომ ვთქვა, რალაცის მოფიქრებისთვის სჭირდებოდა დრო, მაგრამ არც ამის შემდეგ გამცა პასუხი, ამბის მოყოლა შორიდან დაიწყო და ის, რაც გვიამბო, მე ერთხელ უკვე ანანოსგან მქონდა გაგონილი, ლუკას კი — ჩემგან, მიუხედავად ამისა, მაინც გულისყურითა და ინტერესით ვისმენდით იოთამის ცხენების ამბავს. გვიამბო.



ისიც, მერმე როგორ ჩაიცვა რკინის ქალამნები, როგორ დაიჭირა ხელში რკინის ჯოხი და გაეშურა ბარნაბიშვილის თარეშის ასალაგმავად.

— ავლაგმე კიდეც, მაგრამ თავადაც დაეზარალდი. არად დაგიდევდით ჩემს დაზარალებას, ოღონდ ის ვანდალი და გარეწარი დამემარცხებინა... — ბატონმა გედეონმა კიდეც ერთხელ შემოგვთავაზა „სიცოცხლის ელექსირი“. ამჯერად უარი ვერ ვკადრეთ და ვერცხლის „სათითეები“ მივეუშვირეთ სურას. მერმე პათეტიკურად წარმოსთქვა, — საქმე ის გახლავთ, ბატონებო, რომ ცოდნისა და ინფორმაციის მიღებას დავეწადეთ და ამასობაში დავეკარგეთ სიბრძნე.

ბატონი გედეონი ისევ ჩაფიქრდა.

— ვწვალობ და ერთი რამ აქამომდე ვერ გამიგია, თუ ბარნაბიშვილი იყო დასასჯელი, მაშინ, მე არ უნდა დავსჯილიყავი. ხოლო თუ მე ვიყავი დასჯის ღირსი, ბარნაბიშვილი აღარ უნდა დავსჯათ. სწორედ ეს გახლავთ ცხოვრების პარადოქსი, ბატონებო, ჩვენ ორივენი დავისაჩეთ, მეც და ისიც, შესაძლოა მე უფრო მეტად... რა უნდა მექნა, ვერ შევასმინე იმ კაცთმოძულეს, რომ მე სოფლის მახრებლის ალაგმვა მწადდა, ვერ გავაგებინე, რისთვის ვიღეწოდდი, რას ვებრძოდი, ვის ვერკინებოდი. პატივცემულო ვარლამ — ვეუბნებოდი გაძომძიებელს, — ბარნაბიშვილმა სოფელი ასე და ამგვარად ააოხრა-მეთქი... არაო, — მეუბნებოდა ის, მხდალი და ლაჩარი, — ბარნაბიშვილი ჩემი მეგობარია და ამას არ იკადრებდაო. იკადრა-მეთქი, — ვარწმუნებდდი, არა და არაო — გაჯიქდა ჭუჭა გულდღედალი ვარდანაშვილი. საქმე ის გახლავთ, ბატონებო რომ მერმე თავისი მეგობარიც აღარ დაინდო. ცოდვების გამო მშიშარაც იყო და დაუნდობელიც, თითქოს ამ შიშის გამო არ ინდობდა შინაურსაცა და გარეურსაც... ასე გასრულდა ბარნაბიშვილის პარპაში.

უცებ წამოვდექი და მაგიდის გარშემო დავიწყე სიარული. ლუკამ მანიშნა — დაქეკი, უხერხულიაო. მაგრამ არაფრის გაგონება აღარ შემეძლო. გამახსენდა ის ცივი და ბნელი ღამე, შეშინებული და იარაღმომარჯვებული ვარლამი, ანუ ჭუჭა და გულდღედალი ვარდანაშვილი, როგორც ბატონმა გედეონმა უწოდა. თვალწინ დამიდგა ოთხი მომღიმარი კოტიტა ქალბატონ-

ნი — ფაიფურის ტრფიალნი და მცოდნენი, თვით ლამარა — დიდი ნისლიანი თვალები...

— აღელდით, ყმაწვილებო?! — ბატონი გედეონიც ადგა და ორივე ხელი მხარზე შემავლო, — ეგ კარგი ნიშანია, ვეყო რამე თუ ქვეყნად ჩემი წინააღმდეგობრივი ცხოვრებით ერთი ნერვიც კი ვერავის შეეუძარი, უგულონი თუ უგულისყურონი შევიქმენით და სხვის ტკივილს არაფრად ვაგდებთ — გმადლობთ თანაგრძნობისათვის და გულისხმიერებისათვის, მეგობარო, ამას არასოდეს დაგივიწყებთ... ახლა ბარემ ისიცა ვთქვათ, მერმე რა მოხდა, ბარნაბიშვილი ღმერთმაც დასაჯა და, როგორც ამბობენ, თელის ქალებში შეშლილი დაძრწის... სიბრძნე დავკარგეთ, ბატონებო, სიბრძნე!

— ბარნაბიშვილი ცოცხალია? — ჰკითხა ლუკამ.

— როგორც ვითხარით... გამიგონია: გაგიუებული თელიანში დარბის და ორმოებს თხრისო. პირადად მე არსად შემხვედრია, თუმცა ერთი-ორჯერ საგანგებოდ მივაკითხე თელის ქალებსა. ხედავთ, ბატონებო, უკვე ლეგენდაც კი შექმნილა იმ ბარბაროსზე.

აღელვებამ უცებ გამიარა, უცებ დავმშვიდდი. თითქოს რაღაც წრე შეიკრა და შინაგანი სიმშვიდე ვიგრძენი. ლუკამ ისე შემომხედა, რომ მიმახვედრა, — კიდევ ცოტა ხნით დაყოვნება ხვალ დილამდე აქ დარჩენას ნიშნავსო.

— გეთაყვა, იმ თეთრი ცხენის გამო ვერაფერს გეტყვით, თუმცა ჩვენს მშვიერ დედაბრებს თუ დაუუჭერებთ, თითქოს თვალი მოუქრავთ კიდევც, ისიც კი მითხრეს, — ღამ-ღამობით ზოგჯერ ჭიხვინიც გვესმისო. ბერიკაცის გვერდით მძინარე დედაბერს სხვა ხმებიც შეიძლება ჭიხვინად მოეჩვენოს. — გაიცინა ბატონმა გედეონმა, — ისე კი, საცა სამართალია, თუ ახლო-მახლო ცხენი ჭიხვინებს, ჯერ მე უნდა გამეგონა — ძველ მხედარსა და მეომარს.

— ალბათ მომეჩვენა, ბატონო გედეონ!

— იმ დედაკაცებმა გამახსენეს... ხედავთ, რა ხალხში ვცხოვრობო?! აკი შევეუთვალე, — სტუმრები მყვანან და მობრძანდით-მეთქი. ერთიც არ მოვიდა ამ საღამოს მივუვარდები და ერთს ლაზათიანად მივლანძღავ სამივეს, ეგენი აქედან ნაბიჯსაც ვერ გადადგამენ, ვიდრე მე ცოცხალი ვარ, მე კი ძალიან დიდხანს ვაპირებ ცხოვრებას... ეს ნათელჰყო ჩემმა ჰოროსკოპმა.

ბატონ გედეონს დიდი მადლობა გადაუხადე კეთილი და გულუხვი მასპინძლობისათვის და ორივეს სახელით შევპირდი, — გაისად უსათუოდ გინახულებთ, ოღონდ ასე შემთხვევით კი არა, წინასწარ, მომზადებულნი ჩამოვალთა და ათი-ოდე და მაინც დავრჩებით-მეთქი. რაკი ეგრეა, დავილოცოთო, — თქვა და ვერცხლის „სათითეს“ მისწვდა. ჩვენც დავილოცეთ და კიდევ ერთხელ გადავკართ ეს შემზარავი სითხე, რომელიც მხოლოდ ოლიმპოს ღმერთთა ღირსი სასმელი იყო.

ზურგზე მოვიგდეთ ჩვენი ჩანთები და ნისლაურას ერთადერთ შარას გავყევით. ბატონმა გედეონმა გამოგვაცილა, წრფელად იყო გულდაწყვეტილი, რატომღაც ეგონა, რომ ღამეს სოფელში გავათევდით და დილაადრიან გავუღებოდით გზას. ბებერი ნაგაზიც წამოგყვება, ძლივს აითრია წელი და გამოძუნძულდა. ნისლაურელი დედაბრები ისევ წყაროსთან იდგნენ და მასლაათობდნენ. ბატონი გედეონის დანახვისთანავე დაიშლებიან-მეთქი, — ვიფიქრე, მაგრამ შევცდი, სინანულის ღიმილით შეგვეგებნენ, რა გაჩქარებთო, — გაცდნენ, — ჯერ ხომ არ მოსულხართ და უკვე მისდინხართო. საიდანღაც სამი ბერიკაცი გამოჩაყუნდა. სამივეს მივესალმეთ, ხელი ჩამოვართვით, მოვიკითხეთ... ეგრე როგორ იქნებაო, — შეწუხდნენ ბერიკაცები, — ამ სოფელში ჩვენც ვცხოვრობთ, სახლ-კარი ჩვენც გვაქვსო, ხალხნი ვართ და მასპინძლის ქუდი ჩვენცა გვხურავსო. უკვე აბარებულები და გზაზე დამდგარნი ვიყავით, რა გვექნა, ძალზე უხერხულად ვგრძნობდით თავს, ვაჩერებდით, ვეხვეწებოდით, — მეტს ნულარ გამოგყვებით, ნუ შეწუხდებით-თქო, მაგრამ არ გვიჭერებდნენ, მაინც მოგყვებოდნენ, მოგვაცილებდნენ. ერთმა დედაკაცმა საიდანღაც კრელი წინდები გამოგვიტანა, მეორემ თეთრი ბოლჩა მოგვაწოდა, — ხილია, გზაში პირი გაისველეთო... მოგვედედნენ, ჩვენს ირგვლივ ფუსფუსებდნენ, წუხდნენ, შფოთავდნენ, რა გეჩქარებათ, დარჩითო, — ერთთავად იმეორებდნენ, დილაღდე დაგესვენათ, მერმე წასულიყავითო. ასეთ ყოფაში გავცდით სოფელს, ახლა თავკევე უნდა დავშვებულიყავით. შევჩერდით, გედეონ ომანიშვილი ორივეს გადაგვებხვია და გვითხრა, — აბა, ყოჩაღად, ყოჩაღადო, მერმე უფრო ხმამაღლა, ყველას გასაგონად წარმოსთქვა:

— სიტყვა, სიტყვაა, ბატონებო, მომავალ ზაფხულს გელოდებით! მეც გაძლევთ პატიოსან სიტყვას, რომ ჩვენ ყველანი ამ სოფლის მკვიდრნი აქ დაგხვდებით, აქედან ფეხს არ მოვიცვლით!

ბერიკაცებს შევხედე და მივხვდი, დამშვიდობებისას ამათაც უნდა მოვხვეოდით, თორემ გული დასწყდებაოდათ, ისედაც ნაწყენები იყვნენ, უნებურად მხოლოდ ომანაშვილის სტუმრები რომ აღმოვჩნდით, სათითაოდ სამივეს მოვეხვიე, იმათაც ჩამიხუტეს გულში და აკანკალებულ ხელებს მითათუნებდნენ მხრებსა და თავზე. ლუკამაც მომბაძა, ისიც გადაეხვია ბერიკაცებს და დაემშვიდობა.

სწრაფად მოვწყდით ადგილს და დავეშვიტ. ხუთიოდე ნაბიჯის შემდეგ ისევ ავხედეთ ბებრებს. ხუთივენი (ნავაზიანად ექვსნი) ერთ ხაზზე გამწყკრივებულნიყვნენ და ცრემლნარევი ღიმილით ჩამოგვეცქეროდნენ. ჩამოღით, ჩამოღით, აქვე ვიქნებოდათ, მა სად ჯანდაბაში წავალთო, — გაგვაგონეს ზემოდან. გედეონ ომანაშვილმა ხელი დაგვიქნია, — გელოდებითო. მეც მინდოდა ერთი სიტყვა მეთქვა, თუნდაც „ნახვამდის“, მაგრამ ვგრძნობდი, ხმის ამოღებისთანვე, ცრემლი მომერეოდა, ამიტომ სიტყვა ვერ ვუთხარი, მღუმარედ შევეცქეროდი ნისლაურელ მოხუცებს. მაინც რატომ შევიკავე თავი, მეტირა, თუკი მეტირებოდა. მე ხომ ვიცოდი, რაც იმ დღეს მოხდა, ის არასოდეს განმეორდება.

გვერდიდან ლუკას გავხედე, მოდიოდა პირქუში, გულჩათხრობილი.

ჩემო ლუკა, ჩემო ძმაო და მეგობარო, შენ ხომ ყველა გრძნობას, ყველა განცდას თავის სახელს არქმევ, ანდა ცდილობ, რომ დაარქვა. თუ ძმა ხარ, მითხარი, რა ჰქვია ან რას დაარქმევდი იმას, რასაც ჩვენ, მე და შენ, ახლა განვიცდით! ეს მინდოდა მეთქვა ლუკასთვის, მაგრამ არ მითქვამს...

მე კიდევ ერთხელ მოვავლე თვალი იქაურობას, ალაზნის ველს, თელებს, მერმე ბორცვებსა და გორაკებს ავყაოლე მზე-რა... იქ იმ გორაკებსა და მწვანე ფერდობთშორის ნისლაურაა. მაგრამ... მწვანე ფერდობზე ისევ დავინახე თეთრი ცხენი, გაქროლებული, ფაფარგაშლილი — თეთრი ცხენი!... ამჯერად ლუკასთვის არ გამიმხელია, რადგან ავღელდი, თვალები

ამიკრელდა და თვითონ არ ვიყავი დარწმუნებული, მეჩვენებოდა თუ ნამდვილად ვხედავდი.

— უნდა დავრჩენილიყავით, — გავიგონე ლუკას ხმა. — რა მოხდებოდა? არაფერი. ისე გამოვცვივდით, თითქოს სოფელს ხანძარი ეკიდებოდა. თუკი შენი ყოფნით შეგიძლია ვისმე ასიამოვნო, თუნდაც პატარა სიხარული განაცდევინო, დარჩი, იყავი მათთან ერთად და გასაცემი გაეცი...

ლუკა უქმაყოფილოდ ისე ბუზღუნებდა, თითქოს წამოსვლა მე ვაიძულე. მე მესმოდა ლუკასი, უმიზეზოდ აჩქარება ვერ აპატიო და ამის გამო გაუბრაზდა თავის თავს.

სულ ერთი წამით მოვხედე ლუკას და თეთრი ცხენი თვალს მიეფარა...

მართლაც, რატომ წამოვედით. რატომ არ დავრჩით თუნდაც ერთი ღამე ნისლაურაში? იმ ხალხისათვის ყური დაგვეგდო, ბოლომდე მოგვესმინა, გაგვეგო, რას ამბობდნენ, რა უნდოდათ, რაზე წუხდნენ... იქნებ სწორედ ამას გამოვექეციოთ, ამას ავირიდეთ თავი?.. იქნებ მართლა დავკარგეთ სიბრძნე?

ნისლაურიდან წამოსულებმა მხოლოდ მესამე დღეს მოვალწიეთ ჩვენი სოფლის სანახებს. მანამდე ისე დავიღალე, ვიფიქრე, — ჩემი ფიზიკური შესაძლებლობის ზღვარამდე მივედი-მეთქი, ამ ზღვარის იქით თითქოს ნაბიჯის გადადგმა არ შემეძლო; ზურგჩანთამოკიდებული მივლასლასებდი და ძლივს მოვათრევედი ისედაც დამძიმებულ სხეულს. ლუკა რამდენიმე ნაბიჯით მისწრებდა. უკანიდან შევეყურებდი და მიკვირდა მისი ჯანი და ამტანობა, ერთხელ არ დაუწუწუნებია, ერთხელ არ დასცდენია — დავიღალეო. ხანდახან მობრუნდებოდა, ან იოთამზე ჩამომიგდებდა სიტყვას ან საბაზე ან გედეონ ომანაშვილზე. ეტყობა, ფიქრში რაღაცას აზუსტებდა, აკონკრეტებდა. ისევ იქ იყო, იმ შთაბეჭდილებით იყო დანთქმული.

როგორც კი ჩვენი სოფლის სანახებს მოვადექით გამოვცოცხლდი, თითქოს ენერჯის გადამაღული მარაგი აღმომაჩნდა, გავმხნევედი და ნაბიჯსაც მოვეუმატე. სოფელში ჩვეულებრივი, სატრანსპორტო შარა-გზით არ შევესულვართ, მარცხნიდან მოვუარეთ, ტყეში აღმართ-აღმართ ვიარეთ და სამხრობისას, ტყიდან გამოსულებმა, ქვევით ჩვენი სოფლის ეკლესია დავინახეთ. აქ იყო ანანოს საფლავი.

მე და ლუკა ცოტა უცნაური სურათის მოწმენი გავხდით.

სასაფლაოს მალლიდან რომ გადმოვხედეთ, ვილაციის საფლავთან მდგარი მამაკაცი შევნიშნეთ. მერმე, არ ვიცი, შეგვნიშნათუ რა მოხდა, ქუდი დაიხურა და სწრაფად გაშორდა იჭაურობას, გალავნის კართან ცხენს მოახტა და თავქვე დაეშვა. ანანოს საფლავთან მისულნი, მივხვდით, ის უცნობი კაცი სწორედ აქ იდგა თავდახრილი ანანოს საფლავს დასცქეროდა. ვინ იყო? ვითომ ფილო კვალიაშვილი, არა, კვალიაშვილს უსათუოდ ვიცნობდი, კვალიაშვილი ასე ახალგაზრდად არ გამოიყურებოდა და არც ასეთი გრუზა თმა ჰქონდა. მაინც ვინ უნდა ყოფილიყო-მეთქი, — ვფიქრობდი და ანანოს საფლავს დავყურებდი.

ეს ფიქრი, როგორც ზედმეტი ტვირთი, ზედმეტი საზრუნავი, სწრაფად მოვიშორე და მერმე თითქმის მთელი ცხოვრება ვცდილობდი არასოდეს გამხსენებოდა, არ გახსენების ეს ცდა კი თავისთავად გულში ათას ექვს აღმიძრავდა ხოლმე.

სასაფლაოზე კარგა ხანს დავყავით, მეგონა, ანანოს საფლავი მოუვლელი იქნებოდა, მაგრამ კარგად მოვლილი და გასუფთავებული დამხვდა, ხელი არ გამინძრევია. ეს ჭერ კიდეც დედაჩემის საფლავთან ვიგრძენი, უცნაური მიზიდულობის ძალა აქვს მახლობელი ადამიანის საფლავს, მიხვალ და გელარ ეშვები, ველარ შორდები, გინდა მოუარო, იქ იტრიალო, რაღაც მიუმატო ანდა ჩვეულებრივად იდგე და ქვას დასცქეროდე. ათასი წვრილმანი გავიხსენე, ყველაფერი ვუამბე ლუკას, თითქოს ვცდილობდი დამემტკიცებინა, რომ ანანო სულ სხვა ქალი იყო — გულთმისანი. შინაგან, ჩუმ, გამოუთქმელ კმაყოფილებას ვგრძნობდი. ახლა მივხვდი, თბილისიდან აქეთ რომ გამოვეშურე, სწორედ ეს მინდოდა, აქ ყოფნა მინდოდა, ქვეცნობიერად ამას მოვესწრაფვოდი. როგორც ჩანს, ამის გამო ვჩქარობდი და აღარც ნისლაურში დავრჩი დამის სათევად.

საფლავთან ცოტა წავიხემსეთ და მერმე ლუკა მოვიყვანე მუხასთან, საიდანაც კარიაულების გალავნიანი სახლი დავინახე. მუხის ძირას დავსხვდით, წავთვლიმეთ კიდეც. მერმე ისევ ავიკიდეთ ჩვენი გუდა-ნაბადი და სოფლისაკენ დავუყვავით დაღმართს. უკვე საღამოვდებოდა. გზაზე თითქმის არავინ შეგვხვდებოდა, ეტყობა, ხალხი საკოლმეურნეო ზვრებიდან და მინდვრებიდან ჯერ არ დაბრუნებულიყო. სოფელში უფრო ღრმად რომ შევედით, ვილაკეები კანტი-კუნტად შეგვხვდნენ.

ზოგიერთი მათგანი ვიცანი კიდევ, ოღონდ იმათ ვერ მიცნეს, ვერც მიცნობდნენ, ასეთი არასოდეს ვუნახივარ, წვერმოშე-ბული, მზით გარუჯული, მტვრიანი, ზურგჩანთამოკიდებუ-ლი...

ჩვენი ორლობისაკენ გავუხვიეთ და გულმა ბაგა-ბუგი და-მიწყო, მეგონა, არ ავლელდებოდი და მაინც ავლელდი, რა-ღაცნაირად მოვითენთე, მოვდუნდი და მუხლებში ძალა გამო-მელია, თავისთავად მეკეცებოდა, სხეულისა და ზურგჩანთის სიმძიმეს ველარ უძლებდა.

— ეს არის თქვენი სახლი. — დარწმუნებით მითხრა ლუ-კამ.

— როგორ მიხვდი? — გამეცინა.

— თერთმეტი თუთის ხე დავთვალე.

მეც დავთვალე, არც მეტი, არც ნაკლები, კვლავ თერთმეტი იყო. ხეებშორის ქურდულად გავაპარე მზერა, სახლს შევხე-დე. რატომღაც დარწმუნებული ვიყავი, ოთხივე კარიაული აივანზე სავახშმოდ ისხდებოდნენ. არც აივანზე, არც ეზოში, არსად კაციშვილი არ ჭაჭანებდა. ამან უფრო დამწყვიტა გუ-ლი. ვერ შევჩერდი, უცხოსავით ჩავუარე ჩვენს სახლს, ჩვენს კარმიდამოს, მხოლოდ გარედან შევავთვალე, თითქოს სხეი-სი იყო, თითქოს აქ ჩვენიანს არავის უცხოვრია, არც ანანოს, არც მე... თითქოს... თითქოს... თითქოს.

სოფელს რომ გავცდით და მეგონა, ყველაფერმა გამიარა-მეთქი, გულის სიღრმეში, შიგნით, ძალიან ღრმად პაწაწინა ნაღმივით რაღაც ამიფეთქდა და ახლა ტკივილი მთელ სხეულს მოედო, მთელი სხეული და გონება მოიკვა.

რაღაც დიდი და განუმეორებელი გასრულდა.

P. S. იმავე ზამთარს, ორმოცდაშვიდი წლის დეკემბერში ფულის რეფორმა მოხდა. ვერ ვიტყვი, თითქოს ეს ამბავი სრულიად მოულოდნელი იყო და ხალხმა არაფერი იცოდა, პი-რიქით, რეფორმას წინ უსწრებდა ათასი ჰორი, მითქმა-მოთქ-მა, მოსაზრება, ვარაუდი. ზოგი იმედით ელოდებოდა ფულის გამოცვლას; ზოგს თავზარი ჰქონდა დაცემული და არ იცოდა, რა მოეხერხებინა ფულით დატენილი ჩემოდნებისათვის.

ჩვენც გვაწუხებდა ეს პრობლემა. გაყიდულ სახლში აღე-ბული ფული ოხრად გვრჩებოდა. რეფორმის ამბავმა ხალხში

მანც გვიან გამოჟონა და, ძალიანაც რომ მოგვენდომებინა, იმ ფულს ასე უცებ ვერ დავხარჯავდით, თავზე არ გადაგვდიოდა, მაგრამ რაც გვექონდა, ჩვენთვის ბევრზე ბევრი იყო, ისე რომ, სახლიც დავკარგეთ და ფულიც გაგვიუქმდა.

უცნაური რამ დამემართა, ჩემთვის მოულოდნელად ვიგრძენი, რომ ფულის გაუქმება გამიხარდა, თითქოს გულში ვზეიმობდი კიდევ და ეს ზეიმი, თუ შეიძლება ასე ითქვას, მორალურ შურისძიებას ჰგავდა იმის გამო, რომ ანანოს სახლი გაიყიდა.

მამაჩემი კი მართლა შემეცოდა, ჯერ ბღღვინავდა, კედლებს აწყდებოდა, მერმე მოიწყინა. ხმას აღარ იღებდა, ისევ დაფიქრებული და გულჩათხრობილი გახდა, მერმე გამომიციხა — ის სახლი უნდა დავიბრუნოო. როგორ-მეთქი, — ვკითხე. სოფელში მივდივარ სამუშაოდ, იქ ვიცხოვრებ და მერმე მე ვიციო. ზამთრის მიწურულს მართლა წავიდა. სოფელში მტს-ის დირექტორად დანიშნეს და იწერებოდა, — საქმე და გასაკეთებელი ბევრია, მაგრამ მე მანც კმაყოფილი ვარ, აქეთ რომ გადავწყვიტე წამოსვლაო.

სამი თვის შემდეგ შევიტყვე: დაქორწინებულა, კარიაულის ერთ-ერთი ქალიშვილი მოუყვანია ცოლად.



# ოქროს თევზი

მთაწმინდის უბანში, წყნარსა და უხმაურო ქუჩაზე იდგა გასული საუკუნის მიწურულში აგებული სამსართულიანი სახლი, სადაც სხვა მობინადრეებთან ერთად ცხოვრობდა ოჯახი, შემდგარი ხუთი სულისაგან:

პლატონ ბარამიძე.

მარიამი — პლატონის მეუღლე. |

შვილები: მირიანი, დათო, თეონა.

მირიანი და დათო ნათიშვილები არიან, თეონა — ბარამიძე.

პლატონი თეონას მამაა. მირიანმა და დათომ მამა აღრე დაჰკარგეს, მაგრამ პლატონი იმდენად კეთილი ადამიანი აღმოჩნდა, რომ ბიჭებს უმამობა თითქმის არ უგრძობიათ.

ძირითადად ოჯახს მარიამი უძღვებოდა. ენ იყო მშვიდი და აუღელვებელი ქალი, შვილების მოყვარული დედა. მისი წყალობით ოჯახში მუდამ სიმშვიდე სუფევდა.

დედა ყოველთვის ამბობდა:

— სხვამ არ უნდა იცოდეს, რა ხდება შენს ოჯახში.

ამიტომ თუ ზეიმობდნენ — უხმოდ ზეიმობდნენ, თუ წუხდნენ — უხმოდ წუხდნენ. ხოლო ჩვეულებრივ დღეებს ეს სიმყუდროვე არასოდეს დაურღვევია.

## ნაწილი პირველი

დათოს ცხოვრებამ გაუმართლა.

ინსტიტუტის დამთავრებისთანავე მშენებლობაზე მოეწყო სამუშაოთა მწარმოებლად, უზარმაზარ საცხოვრებელ სახლს აშენებდა საბურთალოში.

ახლა, სამუშაოდან დაბრუნებული, ტახტზე იწვა და მთვლემარე თვალებით მიჩერებოდა აქვარიუმს, რომელიც იქვე, შუშაბანდის კუთხეში, პატარა მაგიდაზე იდგა. სისხლისფერი, გრძელფარფლებიანი თევზი ნებივრად დასრიალებდა, ჩამავალი მზის სხივები მომწვანო წყალს აელვარებდა.

აქვარიუმი და ოქროს თევზი უფროს ძმას — მირიანს ეკუთვნოდა. ერთ დღეს ყველასთვის მოულოდნელად მოიტანა მინის ეს მრგვალი ჭურჭელი მირიანმა. ოჯახში ჰკითხეს: „რად გინდა, მირიან?“ მირიანმა უპასუხა: „მკირდება“.

მირიანი, საერთოდ, ცოტას ლაპარაკობს.

მერმე წითელი თევზი მოიყვანა. აქვარიუმის ფსკერზე ზღვის ქვიშა და ჭრელი კენჭები დაყარა, წყალი ჩაასხა. მას შემდეგ დგას ეს ჭურჭელი შუშაბანდის კუთხეში და შიგ სისხლისფერი, გრძელფარფლიანი თევზი ცხოვრობს. თევზს მირიანი უვლის — წყალს უცვლის და აპურებს.

— დედა, სად არის მირიანი?

— არ ვიცი, — მოესმა სამზარეულოდან.

— დიდი ხანია წავიდა?

— კი, კარგა ხანია.

სამზარეულოს ღიად დარჩენილ კარიდან კატამ გამოყო თავი. ცნობისმოყვარე, მრგვალი თვალებით შეხედა დათოს და შემოვიდა, კულაპრეხილი, ნებიერი კრუტუნით მიეგლისა კედელს, მერმე უკანა თათებზე აიწია და ტახტი მოათვალიერა.

— ოჰი გამარჯობა შენი

ჭრელი გაფუებული კატა ტახტზე შეხტა და დათოს ფეხებთან მოკალათდა. თვალები მილულა, კრუტუნს მოუხშირა.

კატა თითქმის ზურგით იწვა აქვარიუმისაკენ, მაგრამ სწავირველი ალლოთი გრძნობდა თევზის მოძრაობას. თევზი მზის სხივზე რომ გაიღვებდა, ხატაურა შეკრთებოდა, თავს სწრაფად მოაბრუნებდა და დიდ ყვითელ თვალებს მიანათებდა. მერმე ჩათვლემდა და ისევ მოჰყვებოდა კრუტუნს, ვიდრე მზის სხივზე კიდევ არ გაიბრწყინებდა ოქროს თევზი.

— მაინც როდის წავიდა მირიანი?

— არ მახსოვს, მგონი, სამი იყო დაწყებული.

დათო წლების მანძილზე შეეჩვია მირიანის შინ ყოფნას. და ახლა გაუკვირდა, სახლში რომ არ დახვდა.

უფროსი ძმა არსად არ მუშაობდა. ძნელი იყო ამხელა კაცისთვის უმუშევრობა, მაგრამ რას იზამ, ზოგჯერ ხდება ხოლმე. პლატონი უსაქმურობას არ აყვედრიდა, ლუკმაპურს არ ამადლიდა, მაგრამ თვითონ მირიანი მწარედ განიცდიდა უქმად ყოფნას. წუხდა, ცდილობდა რაღაც გაეკეთებინა, ემოქმედა, თუმცა არაფერი გამოუდიოდა.

სულ უქმად რომ არ მჯდარიყო, დილით ყველაზე ადრე დგებოდა, რძისა და პურის მოსატანად მიდიოდა. ორ დღეში ერთხელ სანოვაგისთვის ბაზარშიც გზავნიდნენ.

— რა თქვა, როდის დავბრუნდებით?

— არაფერი არ უთქვამს, ვითომ არ იცი...

უნივერსიტეტი მირიანმა ომამდე დაამთავრა. სტუდენტობისას პატარ-პატარა მოთხრობებს აქვეყნებდა ახალგაზრდულსა და სალამოს გაზეთებში.

მერმე ჯარში გაიწვიეს...

ომმა ბრესტში მოუსწრო.

მერმე ცნობა მოვიდა: ბრესტის სიმაგრეში გმირულად დაიღუპაო...

დიდი უბედურება დატრიალდა: ოჯახი გლოვობდა უფროსი შვილის დაკარგვას.

ომის დამთავრებიდან თითქმის სამი წლის შემდეგ გაიგეს — მირიანი კი არ მოუკლავთ, ჭყვედ ჩავარდნილა. წერილი მოვიდა მაგადანიდან, ცოცხალი ვარ და სასჯელს ვიხდიო.

— კი მაგრამ, როდის გადიოდა ამ დროს შინიდან?! — ხმამალა წამოსცდა დათოს.

დედას, როგორც ჩანს, შვილის სიტყვები არ გაუგონია, შეკითხვა უპასუხოდ დარჩა.

დათომ ახლალა იგრძნო, მოუსვენრობა დაუფლებოდა. შეჩვეული იყო მირიანის შინ ყოფნას და ეუცხოვია, ძმა ამდენი ხნით სადღაც რომ წავიდა. დათო დედის დამშვიდებულმა პასუხებმაც გააღიზიანა ერთგვარად. თუმცა მიხვდა, ის სიმშვიდე მხოლოდ გარეგნულ იერს ატარებდა.

ისე კი, კაცმა რომ თქვას, შესაშფოთებელი არაფერი იყო. ბავშვი ხომ აღარ არის? როდესაც მოისურვებს, შეუძლია, რამდენი ხნითაც უნდა, წავიდეს. მაგრამ დათომ იცოდა, მირიანი არსად წავიდიოდა. მაგადანიდან დაბრუნების შემდეგ არ მოუკითხავს არც ერთი მეგობარი თუ ამხანაგი და არც ახლის

შეძენა უცდია. თითქოს არაფერი აღარ აინტერესებდა, განდევნილი ცხოვრობდა, თითქოს უარს ამბობდა ამქვეყნიურ ყველა სიამოვნებაზე.

მირიანი შეშინებულიც ჩანდა, არც მშობლისთვის, არც ძმისთვის არ გაუმხელია, რისთვის დასაჯეს, ანდა როგორ მოიხადა სასჯელი. შეკითხვებზე უმეტესად ღუმლით იძლეოდა პასუხს. გაჭირვებით, ძლივსძლივობით ამოქაჩეს რამდენიმე ბუნდოვანი ფრაზა... ტყვეობიდან როგორღაც გაქცეულა... მერმე ფრანგ პარტიზანებთან უბრძოლია ომის დამთავრებამდე... შემდეგ რა მოხდა? მირიანი სდუმდა. სასოწარკვეთილი ეძებდა საშველს, როგორმე თავი რომ დაედწია მომაბეზრებელი, თითქოსდა საშიში შეკითხვებისათვის.

მერმე შეეჩვივნენ მირიანის ღუმილს და შეკითხვებით აღარ აწუხებდნენ.

მირიანიც თითქოს შეეგუა თავის მდგომარეობას, რძესა და პურზე, ანდა ბაზარში წასვლაზე არასოდეს გამოუთქვამს უკმაყოფილება, პირიქით, ამ საქმის შესრულება მოვალეობად მიაჩნდა.

სამსახურის შოვნა რამდენჯერმე სცადა. ერთი-ორჯერ უარით გამოისტუმრეს, ერთი-ორჯერ რაღაცით არ დააკმაყოფილა შეთავაზებულმა სამუშაომ და სამსახურის ძებნას თავი დაანება.

დათომ შემოსასვლელი კარის ხმაური გაიგონა და გაუხარდა, ეგონა, მირიანი დაბრუნდა.

— დედა — შემოსასვლელიდანვე მოესმა თეონას ხმა.

დედა სამზარეულოდან გაეპასუხა. თეონამაც, როგორც ეტყობა, გეზი სამზარეულოსაკენ აიღო.

— დედა, იცი რა მოხდა? ბუბა მასწავლებელი ქმარს გაეყარა!

— როგორ თუ გაეყარა? — ისე იკითხა დედამ, თითქოს მისი თანხმობის გარეშე გაყრის უფლება არ ჰქონოდა.

დათოს გაეღიმა.

ბუბა თეონას მუსიკის მასწავლებელია. დათოს ხშირად გაუგონია ამ ქალის სახელი. ოჯახში არცთუ ისე იშვიათად ახსენებდნენ ხოლმე ბაბუ მასწავლებელს. ახსენებდნენ მოწიწებით, რიდით, პატივისცემით. თვით თეონაც უდიდესი მო-

კრძალებით იყო გამსჭვალული და ერთგვარად ამყობდა კიდევ თავისი მასწავლებლით.

სამზარეულოში ერთხანს დუმილი ჩამოვარდა. ეტყობა, ამ ცნობამ უფრო მძიმე შთაბეჭდილება მოახდინა, ვიდრე თეონა მოელოდა. „ბუბა მასწავლებელი ქმარს გაეყარა“... ისე წარმოთქვა თეონამ ეს სიტყვები, თითქოს დედას რაღაც მიახარა. ღმერთო, რა სულელი გოგოა!

მშვიდად კრუტუნებდა დათოს ფეხებთან მოკალათებული ხატაურა.

შუშაბანდში დედა შემოვიდა. ხელები და კრელი ჩითის წინსაფარი ფეკვილით ჰქონდა მოსვრილი.

— გაიგე, დათო, რა მომხდარა?

— კი.

ხატაურამ თავი წამოჰყო და ირგვლივ სიზმარეული თვალბით მიმოიხედა. დათომ არ იცოდა, რა ეპასუხა და გაჩუმება არჩია.

იგრძნო, სამზარეულოს კარს თეონა მოადგა. რატომღაც ეგონა, თეონა იღიმებოდა. თავი მიაბრუნა. თვალეში დას გაურკვეველი შეშფოთება ჩადგომოდა.

დედას მოულოდნელად დაეკვება გამოეხატა სახეზე, თეონას მიუტრიალდა:

— შენ რა იცი, საიდან გაიგე?

— სკოლაში თქვეს... მთელი სკოლა ლაპარაკობს.

— იქნებ იხუმრეს?.. თუმცა ეს რა ხუმრობაა!

თეონამ მხრები აიჩეჩა.

დედა და თეონა სამზარეულოში გავიდნენ. კარი ისევ მიიხურა.

დედა, საერთოდ, იშვიათად იმჩნევდა აღელვებას. ყოველ შემთხვევაში, ისევე, როგორც ახლა, ცდილობდა, აღელვება არ დატყობოდა.

რა თქმა უნდა, უსიამოვნოა, როცა ოჯახი ინგრევა, მაგრამ ვინ გაიგებს, ვინ იცის?.. იქნებ ეს ერთადერთი გამოსავალი, ერთადერთი სწორი გზაა? დათოს უნდოდა, როგორმე მოეშორებინა ბუბა მასწავლებელზე ფიქრი, წამოედგა. ერთხანს იწრიალა შუშაბანდში, მერმე მიაგიდას მიუჯდა და გაზეთები გადაშალა. გაზეთებსაც მიანება თავი, გადაიწია და ხელი ჰკრა სამზარეულოს კარს.

— უკვე შვიდი სრულდებოდა, სად არის ამდენ ხანს მირიანი?

ათიორდე წუთის შემდეგ პლატონი მოვიდა.

სასადილო მაგიდას მიუხსდნენ.

ყოველთვის ასე იყო, პლატონი სამსახურიდან გვიან ბრუნდებოდა და სადილს ვახშობისას შლიდნენ.

არავითარი შთაბეჭდილება არ მოუხდენია პლატონზე ბუბა მასწავლებლის ამბავს. ხოლო მირიანის დაგვიანება რომ გაიგო, თქვა:

— ისა..., რა... ჰო, მოვა!

პლატონს, საერთოდ, უყვარდა ლაპარაკი. ყოველ შემთხვევაში, ცდილობდა, ბევრი ელაპარაკა, მაგრამ აზრის გადმოსაცემად ვერ პოულობდა საჭირო სიტყვებს. ადრე უფრო ახერხებდა. ახლა კი სიტყვები ავიწყდებოდა, ვერაფრით იხსენებდა და საშინლად წვალობდა. თუ მარტივი რამე არ ჰქონდა სათქმელი, წინადადებას ველარ ამთავრებდა.

დათო ვერ უგებდა. დედა და თეონა, პირიქით, ნახევარ სიტყვაზე გრძნობდნენ ქმრისა და მამის სათქმელს.

პლატონს დიდი, მელოტი თავი ჰქონდა, სახე — ბუნჩულა, კეთილად მოდიმარი. ბოლო დროს ძალიან გასუქდა და მესამე სართულზე ამოსვლა უძნელდებოდა. ხარბად არ ეტანებოდა საჭმელს და ეს სიმსუქნე ალბათ წლებისა იყო. პლატონი ზომიერად ჭამდა, ოღონდ ეს კი იცოდა, რაც უნდა ეჭამა, ერთ ჭიქა ღვინოს აუცილებლად დააყოლებდა. ღვინის დალევაზე იტყოდა: „ეჰ, დავკარგეთ... დიდი ადამიანი...“

დათომ სწრაფად მოათავა თავისი ულუფა და ხელების დასაბანად წავიდა. რვა საათზე ციციხოს უნდა შეხვედროდა კიროვის პარკთან. მირიანი საეჭვოდ იგვიანებდა და ხელების ბანისას უფროსი ძმა ისევ გაახსენდა.

სადამო თბილი და გამჟვირვალე იყო.

დათომ აივანი გაიარა და ხის კიბით დაეშვა. კიბის ყოველი მოსახვევიდან მოჩანდა მოასფალტებული, ოთხკუთხედი ეზო. აივნებშორის გაკიდულ თოკებზე თეთრეული ზავის ალმებივით ფრიალებდა. ეზოში, თავისი სარდაფის წინ, ფუტყუსებდა ძია ვანო — ჩია, მოუსვენარი ბერიკაცი.

ძია ვანო თბილისის ძველი მკვიდრი იყო. ოდესღაც მხატვრად თვლიდნენ — მაღაზიის აბრებზე კოხტად გამოჰყავდა ქართული ასოები, თანაც ვიტრინების ლამაზად გაწყობა სცოდნია. მერმე დაბერდა თუ ნეონის შუქის რეკლამებმა შეაფიქროვეს, ამ საქმეს თავი მიანება და ახლა პენსიით ცხოვრობს. საქმე აღარა აქვს და ეზოს მოვლა-პატრონობა ითავა. დაუზარელი კაცია, ყოველ წვრილმანზე განცხადებებს წერს, დარბის აღმასკომში, ქალაქის საბჭოში, მოჰყავს კომისია...

— სალამო მშვიდობისა, დათო!

— გაგიმარჯოს, ძია ვანო!

— საით გაგიწევია?

— რა ვიცი, მივდივარ...

— რა გენაღვლება რა, ახლა შენი ჯერია; მიდი, გაიხარე. დათომ გაიღიმა და ჭიშკრისაყენ დააპირა წასვლა. ძია ვანომ შეაჩერა.

— მერმე რა გოგოები!

— ძველად არ იყვნენ, ძია ვანო, ესეთი გოგოები?

— ძველად? ჰაი, გიდი...

— ზოგი ამბობს, ძველად უკეთესები იყვნენო.

— ერთი პოლონელი ქალი მყავდა, სულ ფაეტონით ვატარებდი, ფულიც ბლომად მქონდა... — ძია ვანომ სინანულით გააქნია თავი, მერმე წაიღიღინა:

საყვარლისა ეშხითა  
ღვინოც დამიღვეთა...

დათო ახლა შეაჩერა ბავშვის ხმამ, რომელიც ზემოდან მოესმა:

— გამარჯობა, ძია დათო!

დათომ აიხედა. მეორე სართულის მოაჯირისთვის ნიკაპი დაებჯინა ბავშვს და ქვემოთ ჩამოხედვას ცდილობდა. ქვევიდან სახე კარგად არ ჩანდა. ეტყობა, ვერც ბავშვი ხედავდა ეზოში მოსაუბრეთ, მოაჯირს ნიკაპი მოაშორა და ხის რიკულებში გამოიჭვრიტა.

— ვისი ბავშვია?

— სარალიძეების მდგმურები არიან, ერთი თვეა, რაც გადმოვიდნენ.

— საიდან იცის ჩემი სახელი, ვინ უთხრა?

— ეგეთი ეშმაკის ფეხი მეორე არ დაბადებულა, ყველაფერი იცი.

— ძია დათო, გლანდები უნდა ამოვიქრა! მეტკინება?

— არ გეტკინება, ნუ გეშინია!

ერთხელ კიდეც ახედა დათომ ბავშვს და ჭიშკრისკენ წავიდა. ბერიკაცი უკან დაედევნა.

— იცი, რა დედა ჰყავს? ძალიან ლამაზია.

— ბავშვიც არ უნდა იყოს ურიგო, ლამაზად მომეჩვენა.

— ყველა ბავშვი ლამაზია. შენ დედა ნახე თანაც ამბობენ, რომ... — ძია ვანომ არ დაამთავრა სათქმელი, სამაგიეროდ, ისე ჩაიცინა, დათო მიხვდა, რის თქმასაც აპირებდა. ბოლოს თვალი ჩაუკრა და რატომღაც რუსულად წაჩურჩულა: — Эстрадная певица.

— ძია, დათო, მე ზურიკო მქვია! — დათოს ბავშვის ხმა ჭიშკართან დაეწია. თავი მოაბრუნა, მაგრამ მეორე სართულის აივანს აგურის ყრუ კედელი ფარავდა.

ძია ვანო მოკლე და სწრაფი ნაბიჯებით მიცუხნუხებდა ეზოში.

თბილი, მსუბუქი ბინდი ეფინებოდა ქალაქს. გეგონებოდა, უზარმაზარი მინის ჭურჭელი გამჟვირვალე, იისფერი სითხით ივსებოდა. ბინდში საგნები თითქოს თანდათან პატარავდებოდნენ, იკუმშებოდნენ.

დათო თავიქვე დაეშვა.

უსიამოვნო ნალექი დაუტოვა ძია ვანოს ნალაპარაკებმა.

უცნაური კაცი იყო ეს ძია ვანო. არ დაგზარდებოდა, რა საქმეც უნდა გეთხოვა, უსათუოდ, ერთგვარი სიამოვნებითაც კი შეგისრულებდა, ოღონდ ნუ მოსთხოვდი, კარგი ეთქვა შენზე. აგყია იყო, კაცზე ცუდისა და აუგის მთქმელი. აუგის თქმა და კარგი საქმის გაკეთება ერთნაირ სიამოვნებას ანიჭებდა.

რადგანაც სიტყვას საქმეზე მეტი ფასი აქვს, ძია ვანო მეზობლებს ეჩავრებოდათ, ლანძღავდნენ, ეჩხუბებოდნენ, მაგრამ ბერიკაცი თავისას მაინც არ იშლიდა.

დათო მიჰყვებოდა ვიწრო, მღუმარე ქუჩას და სარალიძეების მღვმურებზე ფიქრობდა, პატარა ზურიკოზე, დღეს რომ გამორემცნაურა, და მის ლამაზ დედაზე. ზურიკოსადმი უნებუ-



რად სიბრაღული იგრძნო. რატომ შეეცოდა ეს პატარა ბიჭი, რომლის ხმაში ნათელი სიხარული წკრიალებდა?

დათომ აღმართზე ამომავალი ძმა დაინახა და შეჩერდა. მირიანი ტანის რხევით იცნო. მიუხედავად იმისა, რომ უჩვეულოდ მოძრაობდა, მაინც იცნო.

დაელოდა.

მირიანი აუჩქარებლად, უდარდელად მოდიოდა. ისე უზრუნველად მოაბიჯებდა. დათოს მოეჩვენა, თითქოს მისი ძმა ღიღინებდა კიდევც.

დათო ფილაქანზე იდგა და ელოდა.

მირიანი ძმას მიუახლოვდა, ნაბიჯს უკლო და აკაციასთან მდგარი დათო აათვალიერ-ჩაათვალიერა. უაზროდ გაიღიმა.

უფროსი ძმა მთვრალი იყო.

მაგადანიდან დაბრუნების შემდეგ პირველად დათვრა მირიანი, გაოცებულმა დათომ ბავშვივით დაალო პირი, მაგრამ ძმას ვერაფერი უთხრა.

— მეც ხომ მაქვს ღვინის დაღვეის უფლება?.. მაქვს თუ არა? — მირიანმა ორივე ხელი მოავლო დათოს მხრებზე და შეანჯღრია.

დათომ არაფერი უპასუხა.

— ჰოდა, დავლიე!..

— სად დალიე, ვისთან იყავი?!

— გეტყვი, ყველაფერს გეტყვი, ოღონდ... არა, რატომ არ უნდა დამელია?.. მეც ხომ შენსავით ადამიანი ვარ?.. ანდა ისეთი, — მირიანმა ხელი გაიშვირა და თავქვე მიმავალი, ჩალის შლიაპიანი კაცი დაანახა, — თუმცა შეიძლება იმაზე უკეთესიც ვიყო... იმას ჩალის ქული ახურავს, მე — არა. ჩალის ქული რომ მჭონდეს, მხოლოდ მზეში დავიხურავდი, იმას კი დამითაც ახურავს. არა, არ მიყვარს ჩალის ქული, არც მზეში, არც ჩრდილში არ დავიხურავ...

— წამოდი — დათომ მკლავში გამოსდო ხელი, — დედა გელოდება, ქალი გაგიყებულია...

— აჰ! გაგიყებულია... იქნებ შენცა ხარ გაგიყებული?

— სად იყავი, ბიჭო, სად დათვერი?!

— შეკითხვებს ვერ ვიტანი.. არც დაკითხვები მიყვარს მაინცდამაინც...

— კარგი, გეყოფა ახლა, წავიდეთ!

— თუ ძმა ხარ, ხელი გამიშვი... შე თვითონ წავალ...

— ჭიშკრამდე მიგაცილებ.

— აქამდე ხომ მოვედი მარტო? ჭიშკრამდე, მით უმეტეს, აღარ მჭირდება მიცილება, — მირიანმა ორიოდ ნაბიჯი გადადგა და ისევ ძმას მიუბრუნდა, — აღარ მინდა, გესმის?.. მინდა ჩემი ფეხით ვიარო...

— ვინ გიშლის, იარე, ოღონდ ახლა...

— არავითარი ოღონდი — ხელი აიქნია მირიანმა და ბარბაკით შეუყვავა აღმართს.

დათო ადგილიდან არ დაძრულა, თვალი გააყოლა მიმავალ ძმას. ასე იღვა მანამდე, სანამ მირიანი ჭიშკარში არ გაუჩინარდა. მერმე პატარა ქუჩები გადასჭრა და რუსთაველის მოედანზე გავიდა. დაბნეული იყო. გზადაგზა მირიანზე ფიქრობდა, მაგრამ ფიქრი ეფანტებოდა და ვერაფრით უყრიდა თავს.

თითქოს სხვა კაცი შეხვდა... ხდება ხოლმე, კაცი დათვრება და ისე შეიცვლება, ვეღარც კი იცნობ. ახლა დათოს მირიანის შეცვლა, ამეჭყველება, თუ სიტყვაუხვობა იმდენად არ აოცებდა, რამდენადაც მისი დათობა. ვინ შეხვდა ისეთი, სუფრასთან დაჯდომა და ჭიქის აწვევა რომ გააბედვინა? იქნებ არავინ შეხვედრია, შევიდა სადმე და დალია?.. ამას ფული უნდოდა. ის ჯიბის ფული კი, რომელსაც ხან დედა, ხან პლატონი, ხან დათო აძლევდა, საამისოდ არ ეყოფოდა. უსათუოდ ვილაც შეხვდა.

მაგრამ დათო ახლა ძმის გაღიზიანებულმა და ერთგვარად აგდებულმა კილომ შეაწუხა. თითქოს ამ წუთს მიხვდა, რომ მირიანი მღუმარებით და განმარტოებით დიდ ბოლმას ნიღბავდა. თითქოს ამ წუთს შენიშნა, რომ მირიანი გამწარებული და გაბოროტებული იყო. ის უსიტყვო მორჩილებაც, რომელსაც უფროსი ძმა ოჯახში იჩენდა, ახლა სხვაგვარ ელფერს იღებდა.

დათო სადღაც ღრმად, სხეულის შიგნით სინდისის ქენჯნამ გაკენწლა. იქვე უნდოდა დაეხშო აზრი, რომელიც ასე მოულოდნელად, მისდაუნებურად დაეებადა... მოეჩვენა რომ მირიანის გაბოროტების მიზეზი თვითონ იყო. ეს შემაწუხებლად მტკივნეული აზრი ვეღარ მოიშორა. ალბათ ამიტომაც ინანა, ძმას ლაპარაკში რომ მხარი არ აუბა. ისეთ გუნებაზე

იყო მირიანი, ყველაფერს იტყოდა, ბოლომდე იტყოდა ყველაფერს...

კიროვის პარკთან ციცილო ელოდა. დათომ სული მოიტყვა, ეგონა ციცილო აღარ დახვდებოდა.

უსაზღვრო სიმშვიდე და მყუდროება იგრძნო, თითქოს მზესა და ხვატში მიმავალმა დიდი ჩრდილი დაინახა.

— ვიფიქრე აღარ მოვა-მეთქი... სად ხარ ამდენ ხანს, წასვლას ვაპირებდი.

— გეტყვი... წამო, გავიაროთ...

— საით წავიდეთ?

— რუსთაველზე ხომ არ გაგვევლო?

— არა! ბევრი ხალხია...

— მაშინ ბაღში შევიდეთ ანდა კინოში.

— ჯდომა აღარ შემიძლია... მთელი დღე ვზივარ ლექციებზე.

— ქუჩებში ვიხეტიალოთ?

— ვიხეტიალოთ.

ლურჯ მონასტერს ჩაუარეს და მარჯვნივ გაუხვიეს. დათომ გზადაგზა უამბო, თუ რატომ დააგვიანდა. მერმე ერთხანს უხმოდ მიდიოდნენ, ვიდრე ვერის დაღმართზე არ ჩაუხვიეს.

— იცი რა, დათო, მირიანის გაცნობა მინდა.

— ეგ ადვილია, მოდი ჩვენთან და გაიცნობ.

— თქვენთან ჯერ ვერ მოვალ, მერიდებია...

— რა სისულელეა!

— ოდესმე, ალბათ მოვალ... ისე ვერ გავიცნობ, თუ არ მოვედი?

— როგორ ვითხრა, ხომ იცი, შინიდან არ გამოდის.

— დღეს ხომ გამოვიდა?

— დღეს კი... მე მგონი, დღეს რაღაც მნიშვნელოვანი მოხდა, ნამდვილად რაღაც მოხდა, ხვალ ალბათ ყველაფერს შეტყვის.

— გარეგნობით გაცხარო ერთმანეთს?

— არა! მირიანი ჩემზე მაღალია, მხრებში ოდნავ მოხრილი.

— შენსავით ქერაა?

— არა. შავი, მოუხეშავი თმა აქვს, მოკლედ შეკრეპილი. ბოლო ხანებში ჭაღარა გამოერია.

— სახეზე როგორია?

— თხელი სახე აქვს, ფერმკრთალი. მარჯვენა ლოყა უთრთის. ომამდე ეს არ შემიმჩნევია.

— წლები გადის... კარგ თვისებებს გკარგავთ და ცუდს ვიძენთ.

— შენ თვითონ მიხვედი მაგ დასკვნამდე, თუ სხვის აზრს იმეორებ? — გაიცინა დათომ.

დაღმართის ბოლოს გაჩირადნებული ხიდი გამოჩნდა.

ციცინომ და დათომ ხიდი უხმოდ გაიარეს და ისე გაუხვიეს მარცხნივ, თითქოს შეთანხმებულები ყოფილიყვნენ.

— მე სულ შეგონა, შენ და მირიანი ჰგავდით ერთმანეთს, რა თქმა უნდა, გარეგნობით.

— შენ კიდევ მირიანზე ფიქრობ? — დათომ მხარზე მოხვია ხელი ციცინოს და თავისკენ მიიზიდა. გადაუწია ყელზე ჩამოშლილი თმა და აკოცა, — აღარ შემიძლია სულ ქუჩაში ხეტიალი. როგორ მინდა, სადმე მარტო დავრჩეთ... ჩვენს მეტი არავინ იყოს...

— ამ ჩიხის ბოლოს უზარმაზარი ლოდი გდია. გინდა ვნახოთ?.. ძალიან მომწონს. მე რომ ბიჭი ვიყო, უსათუოდ მოვიპარავდი, წავიღებდი და ჩვენს ეზოში, ცაცხვის ქვეშ დავავლებდი.

— ლოდი ლოდია... რა სანახავი ეგ არის!

— იცი, რა ფერისაა? მოლურჯო-მონაცრისფრო... წამოდი, ვნახოთ. ცოტა ხანს დავსხდეთ კიდევ. არავინ არ იქნება. ხის ჰიშკართან მოგჩქო ლოდი ეგდო, ჩვეულებრივი რიყის ლოდი, ოღონდ საკმაოდ მოზრდილი.

— ღამით ისეთი არ არის, კარვად არც კი ჩანს. დღისით უნდა ნახო.

— ჩემთვის ყოველგვარი ლოდი თუ ქვა სამშენებლო მასალაა.

— შენ ყველაფერს გამოყენების თვალსაზრისით უყურებ.

— ყოველ შემთხვევაში, ამ ლოდს წინათაც ასე უყურებდნენ და ახლაც ასე უყურებენ... ხალხს დასაჯდომად გამოუყენებია.

— საუკუნეზე მეტია, ალბათ, რაც იქ გდია.

— შესაძლოა.

— ხედავ, როგორ არის ჩაღრმავებული? — ციციონომ ხელი გადაუსვა ლოდს, — ჯდომისაგან გაცვეთილა.

— თუკი ასე მოგწონს, დავსხდეთ, ჩვენი წილი გავცვი-ოთ.

— დავსხდეთ.

ჩიხი ბნელი და მყუდრო იყო. ოციოდე ნაბიჯზე აკაციების იქით დაბალი სახლის შესასვლელთან ერთადერთი ნათურა ბეჭუტავდა. ორიოდე წუთი ხმისამოუღებლად ისხდნენ.

— რაზე ფიქრობ? — ჰკითხა ციციონომ ხის მესერზე ზურ-გით მიწოლილ დათოს.

— არაფერზე. ახლა არც მინდა რამეზე ვიფიქრო.

— მე ისევ შენს ძმაზე ვფიქრობ.

— კარგი, როგორმე გავაცნობ. მაგრამ არა მგონია, კმა-ყოფილი დარჩე.

— რატომ?

— რა ვიცი. სხვანაირი კაცია.

— დათო, რატომღაც მეჩვენება, თითქოს მირიანი არ გიყვარს.

— რაა?

— არა, შეიძლება, ზუსტად არ ვთქვი... მე მეჩვენება, თითქოს მირიანს ისე არ ეპყრობი, როგორც საჭიროა.

— შენ ხომ არ იცი, როგორ ეპყრობი მირიანს?

— გითხარი, მეჩვენება-მეუბნის?

ისევ დუმილი ჩამოვარდა.

— გეწყინა?

დათომ თავი გააქნია უარის ნიშნად. ციციონოს ნათქვამი ნამდვილად არ სწყენია დათოს. ნათქვამისათვის არავითარი მნიშვნელობა არ მიუნიჭებია. უბრალოდ, ჩათვალა, რომ ციციონომ არ იცოდა და ვერც ერკვეოდა ძმების ურთიერთობაში.

— მე მინდა, ყველაფერი ვუთხრათ ერთმანეთს, გინდაც სისულელე იყოს, — ციციონო მიეკრო დათოს და თითქმის ჩურჩულით უთხრა: — მომეფერე რა, არ შემიძლია, როცა ახლოსა ხარ და არ მეფერები...

პატარა ჩიხის მყუდროება არავის დაურღვევია. თითქოს ეს იყო მიტოვებული და მივიწყებული ქვეყანა. აღარავის ახსოვდა მისი არსებობა. მხოლოდ შემთხვევით თუ შეივლიდნენ

შეყვარებულები, ვეებერთელა ლოდზე ჩამომსხდართ თავიანთი წილი ქვა რომ გაეცვითათ...

დათო გვიან დაბრუნდა შინ. ყველას ეძინა.

მირიანის საწოლთან მივიდა, მძინარე ძმას დახედა.

შუშაბანდიდან სუსტი შუქი შემოდის და სახეზე ეცემოდა მირიანს. დათოს მოეჩვენა, ძმა ჩვეულებრივზე უფრო მეტად იყო გაფითრებული. მძიმედ სუნთქავდა, ალბათ ღვინო აწუნებდა.

მარჯვენა ლოყა ძილშიც უთრთოდა.

დათოს გაეღიმა, მერე მძინარე მირიანს, როგორც პატარა ბავშვს, თავზე გადაუსვა ხელი და შუშაბანდში გავიდა შუქის ჩასაქრობად.

დილით, გაიღვიძა თუ არა, მირიანის საწოლს გახედა (ძმები ერთ ოთახში იძინებდნენ), უფროსი ძმა უკვე პურისა და რძის მოსატანად წასულიყო.

დათომ ხელ-პირი დაიბანა და სამუშაო ტანსაცმელი ჩაიცვა. მერმე სამზარეულოში შეიხედა, ფეხზე მდგარმა წაიხემსა და მშენებლობაზე წავიდა. დრო აღარ რჩებოდა; თორემ მირიანს დაუცდიდა. საშინლად უნდოდა გაეგო, სად იყო გუშინ და ვისთან ერთად დალია ღვინო.

სამუშაოდან დაბრუნებულს ძმა შინ დაუხვდა, შუშაბანდში, გულადმა იწვა ტახტზე და ოქროს თევზს მიჩერებოდა.

დათოს შემოსვლა თითქოს არ გაუგია, არ განძრეულა, თავი არც კი მოუბრუნებია.

— როგორა ხარ, მირიან? — დათო მიუახლოვდა და ძმას თავზე დაადგა.

მირიანმა ახედა და არაფერი უპასუხა. დათომ სკამი მიიჩოჩა. წინ დაუჯდა.

— თავი ხომ არ გტკივა?

— არა.

— სად იყავი გუშინ?

— არსად.

— ეგ რა პასუხია, მირიან?

მირიანმა ცალი ხელი თავქვეშ ამოიღო და თვალი დახუჭა... დათომ შეატყო, ძმა პასუხს არ აპირებდა, მაინც ჰკითხა

— სად იყავი?

დუმბილი:

— გუშინ ხომ მითხარი, ყველაფერს გეტყვიო.

დუმილი.

— მირიანი

ისევ დუმილი.

— კარგი, როგორც გინდა, — დათო აღარ ჩააცივდა უფროს ძმას.

მირიანი წამოდგა. ჯიბეებში ხელგაჩაწყო ბილმა იქვე იტრიალა ერთხანს, მერე თავის ოთახში გავიდა.

ოქროს თევზი დროდადრო მოადგებოდა გამკვირვალე კედელს და გაყინულ, არაფრისმთქმელ თვალებს აცეცებდა. მერმე ისევ ნებივრად დასრიალებდა აქვარიუმში.

— გინდა, წავიდეთ, ლუდი დავლიოთ, ნამთვრალეებზე კარგია.

წუხელიც, დღესაც ბევრი იფიქრა და რატომღაც დარწმუნებული იყო, ძმები მყუდროდ დასხდებოდნენ და ისაუბრებდნენ. ეგონა, ბოლოს და ბოლოს, ძმას ნახავდა ისეთს, როგორიც ოდესღაც უნახავს, ყოველ შემთხვევაში, დაახლოებით მაინც დაემსგავსებოდა მირიანი ომამდელ მირიანს.

დათოს გულით უნდოდა ეთქვა, თუ როგორ იღელვა გუშინ, მაგრამ ძმამ არ მისცა საშუალება, არ მოისურვა. ჩვეულებრივად თავი აარიდა ყოველგვარ საუბარს.

„შეკითხვებს ვერ ვიტანი..“

იქნებ საუბარი შეკითხვებით არ უნდა დაეწყო?

დათო მაინც დამშვიდებული ჩანდა.

სრულიად მოულოდნელად აღმოაჩინა ეს სიმშვიდე. როცა დაინახა და დარწმუნდა, რომ მირიანი ისეთივეა, როგორც გუშინდელ სიმთვრალემდე იყო, მოისვენა.

ახალადა მიხვდა: ის, რაც ორიოდ წუთის წინ ჰკითხა ძმას, გუშინდელი ღელვის ინერცია იყო. ჩვეულებრივი მირიანი რომ დაინახა, უკვე აღარ აწუხებდა და არც აინტერესებდა, სად იყო გუშინ საღამომდე, ვისთან სვამდა.

შუშაბანდში დათოს ესმოდა ზომიერი ნაბიჯების ხმა.

ოქროს თევზი ბედნიერი იყო...

დედა და მირიანი დილაადრიან წავიდნენ ბაზარში.

კვირა განსაკუთრებული დღე იყო. კვირაობით საგანგებო

სადილი მზადდებოდა და სანოვაგის საყიდლად ყოველთვის ორნი მიდიოდნენ.

დათო ჯერ კიდევ ლოგინში იწვა და ნებევრობდა. ფანჯარა გამოედო, ხარბად ისუნთქავდა მთაწმინდის ჰაერს.

შუა ოთახში თეონა შემოვიდა — ფეხის ხმაზე იცნო. როიალს მიუჯდა, დაკვრა დაიწყო, თეონა დღეში ოთხ-ხუთ საათს ვარჯიშობდა. დათოს ანცვიფრებდა დის შეუპოვარი სიბეჯითე.

თეონას მეცადინეობას ოჯახი დიდ მნიშვნელობას ანიჭებდა. „თეონა უკრავს“ — ეს სიტყვები ოჯახში წყვეტდა ყოველგვარ ხმაურიან ფუსფუსს და მოძრაობას.

ოთახებში „მთვარის სონატის“ წყნარი ხმები დაიღვარა. დათო მოსასმენად მოემზადა, მაგრამ ამ დროს კაკუნი გაიგონა. ალბათ მეზობელი აკაკუნებდა. ოჯახის წევრები, დათოს გარდა, ყოველთვის სადარბაზოდან დადიოდნენ. ასევე დადროდნენ გარეშე სტუმრებიც. მხოლოდ მეზობლები თუ მოადგებოდნენ იმ კარს, რომელზეც ახლა დააკაკუნეს.

თეონამ დაკვრა შეწყვიტა და კარის გასაღებად წავიდა.

ცოტა ხნის შემდეგ დათოსთან შემოიყვანა წაბლისფერთმიანი ბიჭი.

— შენ გკითხულობს, როგორც ჩანს, შენი სტუმარია, — თეონამ დამცინავად გაიღიმა, მერმე ბიჭს ხელი გადაუსვა და გატრიალდა. რამდენიმე წამში უკან მობრუნდა და შუა ოთახის კარი მიხურა.

პატარა ბიჭი ერთხანს ხმას არ იღებდა. ბოჩოლას დიდი და ნაღვლიანი თვალებით მისჩერებოდა დათოს. დათომ ვერ იცნო, ვერაფრით გაიხსენა, ვინ იყო ეს ბავშვი, მით უმეტეს, არ იცოდა, რისთვის მოაკითხა.

პატარა ბიჭს ლურჯი, მოკლე შარვალი და ჩითის ვარდისფერზოლიანი ხალათი ეცვა.

ეტყობა, დუმილს ვერ გაუძლო, ანდა მიხვდა, რომ დათომ ვერ იცნო და თავი შეახსენა:

— მე ზურიკო ვარ, ძია დათო!

— ზურიკო?

— კი, ზურიკო.

— აჰ, ზურიკო! მამატიე, ზურიკო, ვერ ვიცანი, გამარჯობა! მოდი, ხელი ჩამომართვი!



ზურიკომ ათიოდე მოკლე ნაბიჯი გადადგა და ხელი გაუწო-  
და. მერმე ოთახი მოათვალიერა და ისევ დათოს შეხედა.

— შენ რაღაც გაბრაზებული ჩანხარ!

პატარა ბიჭმა არაფერი უპასუხა.

დათოს გაეღიმა. წამოიწია და ბალიშს იდაყვით დაეყრდნო.

— ვინმემ გაწყენინა?

ბიჭი დაიხარა და კოჭი მოიფხანა. თან თვალი არ მოუშო-  
რებია დათოსთვის.

— თუკი ვემდღური, რას მოდიოდი, — უთხრა ვითომ ნა-  
წყენმა დათომ. მერმე დასძინა: — ეგ რა გამოვიდა, ხმას ალა  
მცემ!

— რატომ მომატყუეთ?!

— მე მოგატყუე? — გაიღიმა დათომ.

პატარა ბიჭმა თავი დაუქნია.

— როდის მოგატყუე? ჩვენ ხომ პირველად ვხვდებით ერთ-  
მანეთს?

— არა!

— როგორ არა!.. ერთხელ აივნიდან მომესალმე და თავი  
გამაცანი — ეგ იყო და ეგ!.. ძმობას გეფიცები, სალაპარაკოდ  
არ შეგხვედრივართ.

— არა, მომატყუეთ!

დათოს ღიმილი შეაცივდა სახეზე, ჩაფიქრდა. მეხსიერე-  
ბაში აღადგინა ის საღამო, ეზოში ძია ვანოსთან ერთად მიმა-  
ვალს აივნიდან უცნობი ბიჭი რომ მიესალმა, რამდენადაც ახ-  
სოვს, არაფერი უთქვამს ისეთი, ბავშვს რომ სწყენოდა.

— შენ რაღაც გეშლება, ზურიკო.

— არ მეშლება! — ჭიუტად უპასუხა ბავშვმა.

— მაშ, მითხარი, რა მოგატყუე?

— გლანდები რომ ამოვიჭერი, მეტკინა.

— მერმე მე რა შუაში ვარ?

— ხომ მითხარით, არ გეტკინებაო.

— კი, ეგრე გითხარი.

— რატომ მომატყუეთ? ყველამ მომატყუა, დედამაც, ბე-  
ბიამაც, ექიმმაც, ყველამ.

— ძალიან გეტკინა?

— ძალიან!

ბავშვს თვალეზი მოუწყლიანდა. ძლივს იკაეებდა ცრემლს,  
ერთი წუთიც და ატირდებოდა.

იცოცხლე რა, ზურიკო, ეგეთი მოტყუება არ არის საწყენი, წინდაწინ რომ ეთქვათ — გეტყინებო, ხომ არ ამოიჭრის?

— ამოვიჭრიდი

— მერმე ექიმზეც არის დამოკიდებული, — დუმლის შემდეგ დაუმატა დათომ, — ზოგი ისე აჭრის, ოდნავ თუ ატკენს ხოლმე.

პატარა ბიჭმა უნდობლად შეხედა დათოს. მერმე ფანჯარასთან მივიდა და ქუჩაში გადაიხედა.

— ჩვენს ოთახს ფანჯარა არა აქვს.

დათოს კიდევ უნდოდა რაღაც ეთქვა. აშკარა იყო, ბავშვი ვერ დაარწმუნა, რომ ზოგჯერ სიმართლის თქმას ტყუილის თქმა სჯობია. ეს სიბრძნე ბავშვს არ ესმოდა. მერმე ტკივილი ექიმს გადააბრალა, მაგრამ არაფერი გამოუვიდა. პატარა ბიჭმა, ნებით თუ უნებლიეთ, თავი აარიდა მისთვის უსიამოვნო ლაპარაკს.

ბავშვი ისევ ფანჯარაში იხედებოდა. დათო გამომცდელის თვალით მისჩერებოდა და რატომღაც უნდოდა გამოეცნო, რას ფიქრობდა, მაგრამ ბავშვის გამომეტყუელება არაფერს ამჟღავნებდა. ზურიკო ბალღური ცნობისმოყვარეობით უმზერდა ყველაფერს, რაც ფანჯრიდან მოჩანდა.

დათომ სწრაფად გადაიძრო საბანი და წამოდგა, გაიხმო-რა, მერმე სკამზე გადაკიდებულ შარვალს მისწვდა.

— ჩვენს ოთახს ფანჯარა არა აქვს...

რა უთხრას ახლა ბავშვს ისეთი, რომ ასიამოვნოს?

ამ სურვილის მიღმა დათომ უეცრად დაინახა საკუთარი თავის გამართლების ცდა და უსიამოვნოდ შეიმშუშნა, იგრძნო ისიც, რომ ცოტათი დაძაბული იყო, არ იცოდა, რა მოეხერხებინა ამ პატარა არსებისათვის, რომელსაც უბრალო ქეშმარიტება ვერ შეაგნებინა: ზოგჯერ აუცილებელია ტყუილის თქმა.

— ხანდახან მოვალ რა, ძია დათო, ძალიან მიყვარს ფანჯრიდან ყურება.

— მოდი, როცა გინდა, მოდი, — მაშინვე დაეთანხმა დათო, — თუნდაც შინ არ ვიყო, ჩვენებს უთხარი, დათომ დამართო-თქო ნება.

— კარგი, მოვალ.

— შეგიძლია, რამდენ ხანსაც მოისურვებ, დარჩე ამ ოთახში.

— ძია მირიანის მეშინია.

— რატომ? შენ ხომ არ იცნობ ძია მირიანს?

ბავშვმა მხრები აიჩეჩა.

— ძია მირიანი კეთილი კაცია.

ბავშვმა ისევ აიჩეჩა მხრები.

— მე წავალ, ძია დათო, — ზურიკო შუა ოთახის კარისკენ წავიდა.

— მოიცადე, — დათო ერთ წუთს ჩაფიქრდა, — რითი გაგმასპინძლდე?

— არაფერი არ მინდა.

— პირველად მოხვედი ჩემთან და ასე ხომ არ გაგიშვებ?!

— არ მინდა, ძია დათო, ჯერ არ მისაუზმია.

დათო მართლაც ტკბილეულით აპირებდა გამასპინძლებას, მაგრამ გადაიფიქრა. საწერი მაგიდის უჯრა გამოაღო. ფანქრებს, საშლელებსა და ათასგვარ სახაზავებს შორის დიდ, ორფერ ფანქარს მოჰკრა თვალი.

— ერთი მხრიდან ლურჯია, მეორე მხრიდან წითელი.

— ვიცი.

— გქონია ასეთი ფანქარი?

— არა.

— თუ გინდა, წაიღე.

— მაღლობთ.

ბავშვმა ფანქარი გამოართვა და კარისკენ წავიდა.

— აქედან ნუ გავალთ, თეონა უკრავს და ხელს შევეუშლით.

დათომ შუშაბანდიდან გაიყვანა ზურიკო და გასასვლელ კარამდე მიაცილა.

— კიდეც ხარ ჩემზე ნაწყენი?

ბავშვმა მცირე ყოყმანის შემდეგ თავი დააქნია:

— კი.

ღია კარში მდგარმა თვალი გააყოლა აივანზე მიმავალ ბიქსს, რომლის გული ვერაფრით მოიგო, ვერაფრით მოინადირა. მხერაში ერთგვარი რიდიც კი გამოკრთოდა ამ პატარა არსებისადმი. ამავე დროს სწყინდა კიდეც, რომ ბავშვის წარმოდგენა მის მიმართ ხელუხლებელი და უცვლელი დარჩა.

შინ შებრუნებას აპირებდა, მაგრამ აივანზე მიმავალი ბავშვი უცებ შეჩერდა. დათოს მოეჩვენა, ზურიკო შეკრთა კიდეც.

ბავშვი მკვეთრი მოძრაობით მიიჭრა მოაჯირთან, თითის წვერებზე აიწია და გაფაციცებით დაიწყო ეზოსკენ ყურება.

დათომ ქალების ხმამალალი ლაპარაკი და ყვირილი გაიგონა. აივანზე გავიდა, ეზოში გადაიხედა.

მარჯვნივ, მეორე სართულზე, ქალები ჩხუბობდნენ. ხმა კი აღწევდა დათომდე, მაგრამ ლაპარაკი გარკვევით არ ესმოდა. ქალები გამწარებით იქნევდნენ ხელებს და ერთმანეთის საცემად მიიწევდნენ. დათო მოჩხუბართაგან პირველად ხედავდა წაბლისფერთმიან ახალგაზრდა ქალსა და დედაბერს, რომელიც ამ ქალს აკავებდა. მაშინვე მიხვდა, ახალგაზრდა ქალი ზურიკოს დედა იყო, ხოლო დედაბერი — ბებია.

„Эстрадная певица“...

უეცრად ზურიკო გაახსენდა და აივანს გახედა. ბავშვი აივანზე აღარ იდგა, ცოტა ხნის შემდეგ დაინახა: თავქუდმოგლეჯილი გარბოდა ეზოში. სწრაფად აირბინა რკინის ხრახნილი კიბე. მოჩხუბრებთან მიიჭრა, მაგრამ მისვლისთანავე განზე გადგა და შეშინებული ადევნებდა დედას თვალს.

მეზობელი კარიდან თმააბურღული მანანა გამოვიდა და დათოს მიუახლოვდა. ეტყობოდა, ახლახანს ამდგარიყო, დათომდე მოჰყვა ლოგინის სითბო და სურნელი.

მანანამ შიშველ მკლავზე ხელები ჯვარედინად აიფარა...

— გრილა... შენც ტიტველი გამოსულხარ.

დათოს თეთრი მაისური ეცვა, ჯიბეებში ხელებჩაწყობილი მეორე სართულისკენ იხედებოდა. დედაბერს კარში მიემწყვდით თავისი ქალიშვილი და მთელი ძალით აწვებოდა. თან ცდილობდა, როგორმე კარი მიეხურა. შეშინებული ბავშვი კედელთან ატუზულიყო, ბაწაწინა თითებით დათოს ნაჩუქარ ფანქარს აწვალებდა.

— უუ, რა კაპასი ქალია!

— რომელი?

— ნორა... ამ ბიჭის დედა.

— იცნობ?

— მაგას ვინ არ იცნობს?!

— არც ლოლაა ნაკლები.

დედაბერმა, როგორც იყო, ქალიშვილი ოთახში შეათრია და კარი მიხურა.

ასპარეზი ლოლას დარჩა. ეს იყო კაფანდარა, შვეგრემანი ქალი — შინაბერა. გასტრონომში მუშაობდა მოლარედ. ლოლა ილანძღებოდა, მეზობელს გასახლებით ემუქრებოდა.

— რა მშვიდი ძილი დაგირღვიეს?! — დათო მანანას მიუბრუნდა.

— აბა.. მაინც ვერ გავიგე, რაზე იჩხუბეს.

— ვერც გაიგებ.

დათომ შიშველ მხრებსა და ყელზე ააცურა მზერა. გარკვევით დაინახა, გლუვი, ელვარე სხეული როგორ აეხორკლა და გაუვარდისფრდა. ცოტა ხნის შემდეგ მანანას ისევ დაუმშვიდდა კანი და ძველი ელვარება დაუბრუნდა.

მანანა უხმოდ გაერიდა, თავისი ოთახის კარისკენ წავიდა.

— მანანა!

ქალიშვილი მობრუნდა. დათომ არ იცოდა, რისთვის დაუძახა, რა ეთქვა.

— მანანა... თუ ფიზიკაში ან ქიმიაში დაგჭირდე, ნუ მომერიდები... — შარშან მანანას რამდენჯერმე დაეხმარა დათო, ახლა სათქმელი რომ ველარ მოიგონა, ისევ შესთავაზა დახმარება.

— მაშინ მართლა დამჭირდი. ახლა ამხანაგებთან ვმეცადინებო, — მანანა ოთახში შევიდა.

დათომ თვალი მოავლო იქურობას, სადაც წელან ქალები ჩხუბობდნენ, მარტო ზურციკო იდგა. მოაჯირისათვის ნიკაპი დაეყრდნო და ეზოში იხედებოდა. შეიძლება, არც იხედებოდა ეზოში. თავისი დიდი, ნაღვლიანი თვალებით სივრცეს ეძებდა, მაგრამ ეზო ოთხივე მხრით აივნებით იყო შემოზღუდული, ხოლო აივანზე გადმომდგარი ცნობისმოყვარენი თავიანთ ოთახებს უბრუნდებოდნენ.

სეირი დასრულდა.

ჭიშკრის გვირაბიდან ძია ვანო ფაციფუცით შემოიჭრა. გამწარებული ათვალეირებდა აივნებს.

აღბათ აღლოთი გრძნობდა, უმისოდ რაღაც ღირსშესანიშნავი ამბავი მოხდა.

დაავიანდა.

როდესაც დათო შინ შებრუნდა, ოთახები სავსე იყო მთრთოლვარე, სევდიანი ხმებით. თეონა უკრავდა.

საღამო მეგობრებთან გაატარა დათომ და შემთვრალი შინ ბრუნდებოდა. მთელი პროსპექტი ისე გამოიარა, კაცი არ შეხვედრია.

საკმაოდ გვიან იყო.

დაცარიელებულ პროსპექტზე ნეონის რეკლამები უაზროდ ციმციმებდნენ.

მხოლოდ ქუჩაში იგრძნო — ღვინო მოჰკიდებოდა. გზაში ინანა სუფრა რომ მიატოვა და მეგობრებს დაშორდა. უკვე აღარ ახსოვდა, რისთვის იჩქარა. შეიძლება იმიტომ — ხვალ ადრე უნდა ამდგარიყო მშენებლობაზე წასასვლელად. თუმცა უფრო გვიანაც დაწოლილა. საერთოდ, დათოს არ უჭირდა დილით ადგომა. ნასვამსაც და ფხიხელსაც ადრე ეღვიძებოდა, ყოველთვის კარგ გუნებაზე იღვიძებდა ბავშვივით.

შესაძლოა, დაღლილობის გამოც აჩქარადა. თუმცა ახლა მსუბუქად მოდიოდა. სულ არ გრძნობდა დაღლას.

გასაოცარია, ცოტა დაღია თუ არა, სულ შინისაკენ იქაჩებოდა. მეგობრები ძლივს აკავებდნენ.

— არა ნამდვილად დაღლილი იყო. შფოთიანი ღღე გაიარა.

დილიდანვე ცემენტისათვის დაწანწალებდა. ცემენტი ეკუთვნოდათ, მაგრამ რა მნიშვნელობა აქვს, გეკუთვნის თუ არა? რამდენიმე ღღე მაინც უნდა იწანწალო, იჩხუბო, როგორმე კუთვნილი რომ მიიღო. ანდა ქრთამი უნდა მისცე, რა თქმა უნდა, თუ საქმე აღარ იცდის.

ღღის ბოლოს ცემენტი, როგორც იყო, მშენებლობაზე მიიტანა და დააბინა. შინ წასვლა დააპირა.

მშენებლობის წინ მსუბუქი ავტომანქანა გაჩერდა. მანქანიდან შავულვაშიანმა კაცმა გამოიხედა და დათოს დაუძახა:

— მეგობარი!

დათო მანქანასთან მივიდა. მანქანიდან იხედებოდა შუახნის მამაკაცი, რომელსაც კუპრივით შავი თმა და ბრინჯაოსფერი, ხმელი სახე ჰქონდა, დახვეწილი ნაკეთები, თითქოს ილიმე-

ბოდა კიდევ და არც იღიმებოდა. იღიმებოდა თვალებს ქვე-  
მოთ, თვალებში ღრმა, ნაღვლიანი ფიქრი გაწოლოდა. საფეთქ-  
ლებთან თმა შექალაქავებოდა.

უნებური მოკრძალებით განიმსჭვალა დათო.

— გამარჯობათი — მიესალმა უცნობი. პასუხს არ დაელო-  
და, თავი გააცნო. — მე ნიკო კორინთელი ვარ!

— რა გნებავთ?

— მე პირდაპირი კაცი ვარ, — თქვა ნიკო კორინთელმა. —  
საჩქაროდ მჭირდება ცემენტი.

— მეც პირდაპირ მიყვარს ლაპარაკი, — მიუგო დათომ, —  
ცემენტი არა მაქვს.

— არა გაქვთ?!

— არა!

— დღეს ხომ მოიტანეთ?

— დიახ, მოვიტანე!

— ოთხი ტონით მეტი!

— ეგ მომავალი თვისაა. წინასწარ მომცეს.

— თქვენ რალაცაში ვერ გარკვეულხართ, წინასწარ არა-  
ვინ არაფერს იძლევა.

— მე მოვახერხებ.

— ყმაწვილო, მე შესმის თქვენ ან გეშინიათ ჩემი, ანდა  
გგონიათ, ვერ გავუგებთ ერთმანეთს.

მანქანიდან შოფერი გადმოვიდა, ყურში ჩასჩურჩულა:

— ეგ კაცი შავი ნიკოა.

— ჩემთვის სულ ერთია, შავია თუ თეთრი, — ჩაიბურტყუ-  
ნა დათომ, — ცემენტი მე თვითონ მჭირდება.

— ყმაწვილო, მე უფრო თავაზიანი მეგონეთ.

— წარმოიდგინეთ, მეც შეეცდი.

— კეთილი... — ნიკო კორინთელი შოფერს მიუბრუნდა, —  
წავიდეთ.

მანქანა დაიძრა.

მანქანის წასვლისთანავე დაავიწყდა დათოს შავი ნიკოს  
არსებობა. მხოლოდ შინ, სადილობისას, გაახსენდა და დააპირა  
ამ ამბის მოყოლა. მაგრამ თეონამ არ აცალა.

— რა არის, დათო, ის ბიჭი რომ შემოიჩვიე?

— რომელი ბიჭი?

— რომელი და ზურიკო! ნამდვილი ზტერია, მოდის და მთელი დღე ფანჯარასთან დგას.

— კი, მე მივეცი უფლება.

— რატომ? — იკითხა დედამ.

— მოვიდეს, რას გიშლით?!

— რა უცნაური კაცი ხარ, დათო.

ზურიკო სულ მარტო იდგა მოაჯირთან, დარცხვენილი. გარშემო იხედებოდა დიდი, სევდიანი თვალებით. ბავშვმა იცოდა მესამე სართულიდან დათო რომ დასცქეროდა. იცოდა და მაინც არ ამოხედა. მისი ბალღური სიამაყე დათრგუნვილი იყო.

— რა უნდა ვუყოთ მაგ ბავშვს? — იკითხა თეონამ.

დათომ მირიანს გახედა. მირიანი მდუმარედ შეექცეოდა თავის ულუფას. ალბათ ძმის თვალი იგრძნო, ირიბი, ცივი მზერა გააპარა დათოსაქენ.

— მე აქ მოსვლის ნება მივეცი და ველარ დავუშლი.

— ჰო... იაროს, — თქვა პლატონმა.

— თქვენ რა გენაღვლებათ, — თქვა დედამ, — მთელი დღე გარეთ ხართ.

— მაშ, რა ვქნა?

— უთხარი, ნუღარ მოვა, — ურჩია თეონამ.

— როგორ ვუთხრა ბავშვს, ნუ მოხვალ-თქო?

— ჩვეულებრივად.

— თქვენ რატომ არ ეუბნებით?

— შენ დაგირთავს ნება და შენვე აუკრძალე, — მოუჭრა სიტყვა დამ.

— გეყოფათ... ჰო... — აღელდა პლატონი.

— პლატონ, თეონა მეცადინეობს, როგორ არ გესმის მეცადინეობს! როცა ის ბიჭი აქ არის, მირიანიც ვერ ისვენებს, თავის ოთახში ველარ შედის. არაფერს არ ვიტყვოდი, კვირაში ერთხელ რომ მოდიოდეს, გამიგია ყოველდღე მოსვლა?! ჯერ ფანჯარასთან დგას მთელი საათი. მერმე ამ თევზს მიაღებება და აღარ ეშვება.

— მე მგონი, არაფერს გიფუტებთ ეგ ბავშვი.

— ეგლა გვაკლია, გაგვიფუტოს! — თქვა თეონამ.

— კარგი, ვეტყვი...

ქრა დაემართათ... ყველანი გაღიზიანებულები ირიან...“

სადილზე მეტი არა თქმულა რა. ოჯახი ჩვეულებრივმა სიმ-



ყუდროვემ შოიცვა. ძლატონი წასაძინებლად გაეშურა. მირიანი შუშაბანდში წამოწვა ტახტზე, ხოლო დათო წასასვლელად მოემზადა: დღეს რვის ნახევარზე კოტე რამიშვილთან უნდა შეკრებილიყვნენ მეგობრები, მერმე გაისეირნებდნენ ქუჩაში და ათი საათისთვის დაბადების დღეზე ესტუმრებოდნენ გელას.

დათომ კრების შავი კოსტუმი ჩაიცვა, თეთრ პერანგზე თეთრზოლებიანი შავი ჰალსტუხი გაიკეთა. სარკესთან მივიდა და თმა დაივარცხნა. თვითონ ვერ შეატყობინა, მაგრამ დარწმუნებული იყო, ციცინოს ახსოვდა და ისიც მოვიდოდა დაბადების დღეზე.

ზურგიდან თონა მიეპარა, ფეხის წვერებზე აიწია და ძმას სარკეში გაუცინა.

— გეწყინა?

— ვერ გავიგე, რა დაგიშავათ იმ ბიჭმა?

— ასე სჯობია... ხომ იცი მირიანის ამბავი.. უცხოს ვერ იტანს.

— ყველაფერს მირიანს ნუ აბრალებთ!

თონა ახლა წინიდან დაუდგა ძმას და ლოყა მიუშვირა.

— მაკოცე!

— კარგი, რას მეპირფერები?!

— არა, მაკოცე!

დათო დაინხარა და დას ლოყაზე აკოცა.

— ასე გამოპრანჭული სად მიდინხარ?

ძმამ არაფერი უპასუხა. კარადის უჯრიდან სუფთა ცხვირსახოცი ამოიღო და აივანზე გავიდა.

აივნიდან უცებ თვალი მოჰკრა ზურიკოს. ბავშვმა ეზო გამოირბინა და მოვიდა იმ კიბესთან, რომელზეც დათო უნდა დაშვებულყო. იტყობოდა, დათოსთან მორბოდა.

როგორ შეხვდეს, რა უთხრას ახლა ამ პატარა ბიჭს?

შინ შებრუნება გადაწყვიტა: შეეძლო, სადარბაზოდან გასულიყო ქუჩაში. მაგრამ ოჯახის წევრებს ეს შეუძინეველი არ დარჩებოდათ. როცა ზურიკო კარზე დააკაკუნებდა, მაშინვე მიხვდებოდნენ, რომ დათომ გამიზნულად აარჩიდა თავი ზურიკოსთან შეხვედრას.

ოცდამედი წელი აქედან დადიოდა დათო და ახლა პირ-

ველად ინანა, რომ ასეთი შესანიშნავი წასასვლელით, როგორც სადარბაზოა, აქამდე არ უსარგებლოა.

ზურიკო კიბეზე ამოდიოდა. უკვე ნაბიჯების ხმაც ისმოდა.

სხვა გამოსავალი არ იყო ბავშვს უნდა შეეგებებოდა, რაღაც ეთქვა და უკან გაებრუნებინა. მოულოდნელად ნათელმა სხივმა გაურბინა: მის წინ ბენო ჩიჩუას ბინის კარი მოჩანდა.

არც დაფიქრებულა, ისე დააკაკუნა.

— მობრძანდით! — გაისმა შიგნიდან მანანას ხმა.

ახალ მიპატიებებს აღარ დაუცადა, ოთახში შევიდა და კარი მიხურა.

— მამა შინ არის?

— ამ წუთში წავიდა. ერთი ფეხით გაგასწრო.

მანანა მაგიდას უჯდა და წინ ხელნაწერები ეწყო. დათოს შესვლისთანავე წამოდგა. რაღაც ჰკითხა, მაგრამ დათომ ვერ გაიგონა: მთელი გულსყური აივნისკენ ჰქონდა მიპყრობილი. აივანი მოკლე ნაბიჯებით გაიარა ზურიკომ.

— საქმე გქონდა? — ჰკითხა მანანამ.

— კი.

კიდევ კარგი, ბენო შინ არ აღმოჩნდა, რას ეტყოდა, რისთვის შემოვედიო?

— იქნებ მე დაგეხმარო?! — არ ეშვებოდა მანანა.

— ისეთი არაფერია... — დათო ერთხანს ფიქრობდა, რა ეთქვა. მერე უნებურად წამოსცდა, — ასმანეთიანის დახურდავება მიწოდოდა.

— მაგდენი ფული არა მაქვს.

— მანანას ყვავილებიანი სარაფანი ეცვა. დათოს გაახსენდა, კვირას ამ სარაფანით გამოვიდა მანანა აივანზე.

— არა უშავს, ქუჩაში დავახურდავებ, — დათო ისევ კართან იდგა. ელოდა, რა მოხდებოდა გარეთ. „აღბათ ეტყვიან, შინ არ არისო და გაისტუმრებენ. ანდა, შეიძლება, არაფერი უთხრან“.

— რა კარში დგახარ? — ჰკითხა გაოცებულმა მანანამ.

— მეჩქარება... რას კითხულობდი? — დაძაბულობა რომ არ შეემჩნევიებინა, დათოს უნდოდა მანანა საუბრით გაერთო.

— ოო... საიდუმლოა!

დათომ ისევ გაიგონა ბავშვის ნაბიჯის ხმა... „არ შეუშვენს, არა, უნდა დავხვედროდი და მეთქვა. არ შეუშვენს...“

— მაინც რა არის ასეთი საიდუმლო? — იკითხა დათომ სხვათა შორის.

— გეტყვი, თუ არ გამცემ...

— შითხარი... „უნდა დავხვედროდი... ვეტყოდი: ახლა მივდივარ და კვირას გამოიარე-მეთქი... რატომ დავემალე?“

— არ გაინტერესებს და რა გითხრა?! — ისევ აღვივებდა ცნობისმოყვარეობას მანანა.

— როგორ არ მაინტერესებს!

— მირიანის მოთხრობაა, — გაანდო ბოლოს საიდუმლო.

— მირიანის?!

— ჰო!

— ვინ მოგცა?

— თვითონ მირიანმა... ოღონდ ძალიან მთხოვა, არავის უთხრაო.

დათომ დააპირა, წაძლადევი ღიმილით როგორმე დაეფარა გაოცება. „ალბათ ომამდელი მოთხრობაა...“ — ფიქრში იწეგეშა თავი. „თუნდაც ძველი მოთხრობა იყოს, რატომ მისცა მანანას წასაკითხად?..“

მაგიდასთან მივიდა და ხელნაწერს დახედა. ფურცლებიც და ხელნაწერიც ძველს არა ჰგავდა, ახალი იყო.

თავისი თვალით რომ არ ენახა, ვერაფრით დაიჯერებდა. მირიანი თურმე ისევ წერდა მოთხრობებს და დათოს არ უმხელდა, მაგიდიდან ფურცლები აიღო... შეურაცხყოფილად იგრძნო თავი. „მიმალავს... რატომ დამიმალა, რატომ არ წამაკითხა?..“

— შენ, ალბათ, წაკითხული გაქვს, — რატომღაც გაბზარული ხმით უთხრა მანანამ.

— რა თქმა უნდა, — იცრუა დათომ, — მოგწონს?

— კი... რაღაც სხვანაირია...

— მე მგონი, ომამდე უკეთესად წერდა.

— რა ვიცი...

— ძველი მოთხრობებიცა გაქვს წაკითხული?

— კი.

დათომ ხელნაწერი თავის ადგილზე დადო. სხვა დროს სიამოვნებით წაიკითხავდა, ახლა დანახვაც აღარ უნდოდა.

დათომ ბოროტად გახედა მანანას, თითქოს მისი ბრალი იყო, მირიანი რომ არ აკითხებდა მოთხრობებს. მოულოდნე-

ლად ქალიშვილის ნისლიან მზერას წააწყდა. მანანა თითქოს გაბრუებული, ანდა ბურანში იყო. თვალების ნისლში უცნაური ცეცხლი უღვავდა.

დუმბილი ჩამოვარდა.

— გეტყობა, ძალიან მოგწონს მირიანის მოთხრობა?

— ძალიან არა... ისე კი, სიამოვნებით წავიკითხე.

— როდის მოგცა?

— დღეს დილით.

— გესაუბრება ხოლმე?

— ხანდახან.

— რას გეუბნება.

მანანა თვალს არ აშორებდა დათოს. გაშეშებული იდგა და შემკრთალი უზნერდა ბურანიდან, მერმე თითქოს ხმაურისა ეშინოდა, ფრთხილად დაჯდა, როგორც მოსწავლემ მერხზე, ისე დააწყო ხელები მაგიდაზე. ერთხანს ასე იყო გაყუჩებული... უცებ სახე მკლავებში ჩამალა... შავი, მძიმე თმა ტალღასავით დაეფინა მაგიდას. ხელნაწერი ფურცლები, საფერფლე, ფანქარი თმამ გადაფარა, თითქოს წალეკა.

დათოს არასოდეს ენახა ამგვარი გაშლილი თმა — მბზინავი, მძიმე, თანაც ჰაეროვანი. მოულოდნელად უჩვეულო, ჯერ განუცდელმა გრძნობამ შეიპყრო: უნდოდა ხელით შეხებოდა, თმაში გაბურღულიყო, დაკარგულიყო, როგორც ბავშვობისას ბურბუშელაში...

თმაში მართლაც გაებურდა ხელი.

— მანანა...

მანანა თრთოდა.

დათომ სათქმელი აღარ დაამთავრა. იგრძნო, მანანას სხეული კი არ უთრთოდა, შინაგან მთრთოლვარებას მოეცვა მთელი მისი არსება.

ეს მთრთოლვარება დათოსაც მოეკიდა.

თმა გადაუწია და ხელი ყელზე შეუტყურა. თმის ქვეშ მონახა სახე... ტუჩები... ცხვირი... ლოყა... თვალები... თვალები სველი ჰქონდა.

მანანამ წამოიწია, თავი გადააქნია და თმა მხრებზე გადაიყარა. წამოდგა, საყვედურით და ცრემლით სავსე თვალები მიაპყრო დათოს ქალიშვილმა.

დათო ჰკოცნიდა ყელზე, სახეზე... ქალიშვილი მთელი ტა-

ნით აეკრა დათოს. მერმე სწრაფად გადაიხსნა გულისპირი: სარაფანის ვიწრო სამხრეები მკლავებზე ჩამოუცვივდა.

— მაკოცე, — ჩურჩულით ეუბნებოდა დათოს და საესე, მკვრივ მკერდს უშვერდა, — მაკოცე!..

ბოლოს, მანანა გონს მოეგო. სწრაფად გაშორდა და მეორე ოთახის კართან მივიდა. ზურგმუქცევით დადგა, გულისპირი შეიბნია და თმა გაისწორა.

— წადი, — უთხრა დათოს მტირალი ხმით.

— მანანა...

— წადი, ნულარ მოხვალ...

— მანანა...

— ღმერთო, რა დამემართა, — ჩურჩულებდა მანანა, — წადი, გეხვეწები, წადი!

— მობრუნდი, რალაცას გეტყვი და წავალ!

— ნუ მეტყვი, არ მინდა!

დათოს არაფერი ჰქონდა სათქმელი. უნდოდა კიდევ ერთხელ შეეხედა სახეზე, მაგრამ მანანა ზურგით იდგა და მობრუნებას არ აპირებდა.

— მანანა!..

— მაპატიე, დათო... თვითონ არ ვიცი, როგორ მომივიდა... გეხვეწები, წადი, წადი!.. აღარ მოხვიდე!

დათო გატრიალდა და წავიდა. სირბილით გაიარა აივანი და კიბეზე დაეშვა. სირბილითვე გადასჭრა ეზო... ქუჩაში აღმოჩნდა.

საკმაოდ დაღლილიყო. ღრმად სუნთქავდა.

ყველაფრის მიმართ გაურკვეველი გრძნობა დაუფლებოდა, თითქოს ყოველივე, რაც მის გარშემო ჩანდა, ნამდვილად კი არაა, გამოგონილი იყო, სალამოს ბინდიც, სახლებიც, ადამიანებიც.

სალამო ლურჯი კი არ არის, მოიგონეს, რომ ლურჯია. სილურჯე მოიგონეს. ასევე მოიგონეს სახლებიც, ოღონდ აგურისა კი არა — მუყაოსი. ადამიანებიც მოიგონეს.

მერმე დათო მეგობრებს შეხვდა.

გელასთან ღვინოს მიეძალა, მაგრამ რამდენიმე ჭიქა დალია თუ არა, შინ წასვლა აიჩემა. მეგობრები ძალით ასმევდნენ ღვინოს, ძლივს აკავებდნენ.

ბოლოს მაინც გამოიპარა.

ოპერის წინ ელექტროსაათი ორის ნახევარს უჩვენებდა. დათომ ჰავკავადის ქუჩა აიარა და თავისი სახლისკენ გაუხვია.

მტკიცედ ჰქონდა გადაწყვეტილი, ეზოდან აღარ ევლო. ეს გადაწყვეტა მაშინ, როცა მანანასაგან წამოვიდა. ახლა შინ შესვლას სადარბაზოდან აპირებდა, მაგრამ სადარბაზომდე ჯერ ჰიშვარი უნდა გაეელო. ჰიშვართან მივიდა, არც კი დაფიქრებულა. რკინის კარს ხელი ჰკრა და ეღრიალით გააღო. ეზოში შესვლისთანავე აივნები და ფანჯრები მოათვალიერა. ეზოს ეძინა. კიბეზე სვენებ-სვენებით აღიოდა, ყოველ მოსახვევში ჩერდებოდა დაფიქრებული. ამ მცირე შეყოვნებამ საკუთარ არსებაში აღმოაჩინა სხვა, მეორე დათო. პირველმა ჯერ გარკვევით არ იცოდა, რა უნდოდა და მაინც ებრძოდა. ბრძოლის მიზეზი მკაფიოდ მხოლოდ მესამე სართულის აივანზე გამოიკვეთა, მანანას ოთახის კართან.

— რატომ შეჩერდი?

— უნდა დავაკაუნო.

— ხომ არ გაგიჟდი, რა დროს დაკაუნებდა?

— ცოტა ხნით გამოვიყვან და დაველაპარაკები.

— რა ლაპარაკი აგიტყდა ამ შუალამით?

— ორ სიტყვას ვეტყვი.

— გეუბნები, გვიან არის-მეთქი.. გოგონს ძინავს.

— მე მიყვარს, როცა ნამძინარევი გამოდის, სხვანაირი სიტბო გამოჰყვება ხოლმე.

ამ ბოლო საბუთს პირველმა ველარ გაუძლო და დანებდა. დათომ კარზე ფრთხილად დააკაუნა.

— ვინ არის? — მოისმა შიგნიდან მამაკაცის ხმა.

ორივე დათოს მხედველობიდან გამორჩა ერთი გარემოება: ამ დროს, შესაძლებელია, შინ ყოფილიყო ბენო ჩიჩუა — მანანას მამა.

ორივე მოკამათე წამში აორთქლდა. ჩიჩუების კარის წინ ახლა უკვე შეშინებული დათო იდგა.

— რომელი ხარ? — ისევ გაისმა ბენოს ხმა.

ამ ხმასთან ერთად დათომ გაიგონა სხვა ხმაც — სკამის წაქცევისა.

შეშინებული გავარდა კიბისკენ და კედელს მოეფარა. კედელსმოფარებულმა ცალი თვალი გაუსწორა აივნის სიგრძეს, ცოტა ხნის შემდეგ დაინახა: გარეთ გამოსულიყო თეთრი

პერანგი თავის ამბანაგიანად. თეთრმა პერანგმა და მისმა ამბანაგმა მიიხედ-მოიხედა, მოაჯირსაც გადაეყუდა, მერმე წამოვიდა. დათოსკენ... სადაც დათო იმალებოდა და, იქვე იწყებოდა სხვენში ასასვლელი კიბე. დათო სწრაფად აპყვა კიბეს და სხვენის სიბნელეში კატასავით გაუჩინარდა.

საკმაო ხანი გამოხდა.

დათომ ჩამოიარა რამდენიმე საფეხური და იქვე ჩამოჯდა.

სხვენში ასასვლელ კიბეზე უკვე სხვა დათო იჯდა. ეს იყო მომლოდინე, რწმენით აღჭურვილი დათო.

— იგი იჯდა და ელოდა...

დარწმუნებული იყო, მანანამ გაიგო მისი მოსვლა. ახლა საწოლში წრიალებს და იცდის, როდის დაიძინებს მამა. მამის ფშვინვას გაიგონებს თუ არა, მაშინვე ფეხაკრებით გამოიპარება გარეთ.

სხვენში ასასვლელ კიბეზე მჯდარი დათო მოთმინებით ელოდა მანანას გამოსვლას...

ოქროს თევზი ბედნიერად გრძნობდა თავს...

დილით კარგ გუნებაზე გაელევიძა.

მაგრამ უეცრად გაახსენდა წუხანდელი ღამე და ბავშვით გაწითლდა. კედლისკენ გადაბრუნდა, ბალიშში შერგო თავი. ესეც არ იკმარა — საბანი წაიფარა, თითქოს უნდოდა საკუთარ სირცხვილს როგორმე დამალვოდა.

გაახსენდა, შუალამით როგორ დაუკაკუნა მანანას, როგორ ემალებოდა მერმე სხვენზე ბენოს. „კიდეც კარგი, არ დამინახა, კიდეც კარგი!.. რას იფიქრებს მანანა, ნამდვილად მიხვდებოდა, მე რომ ვიყავი...“

გუშინდელი დღე სიზმარივით იყო.

მაინც რა მოხდა გუშინ?

„რა ამბავი ატყდებოდა, ბენოს რომ დავენახე?! გადავრჩი... ნამდვილად გადავრჩი.“

მაინც რა მოხდა გუშინ?

რა დაემართა მანანას? ან თვითონ რატომ ველარ შეიკავა თავი?

მანანა ბავშვია...

მანანა არც ისე ბავშვია.

თეონაზე წლინახევრით უფროსია. შარშან დაამთავრა სკოლა. სამედიცინო ინსტიტუტში აბარებდა მისაღებ გამოცდებს და ვერ მოხვდა.

შინდამჯდარმა თვინიერმა გოგომ ძნელი ცხოვრება გადაიტანა, რვა წლისას დედა გაუთხოვდა — დემობილიზებულ მფრინავს გაჰყვა, ბენოს ომიდან დაბრუნებას აღარ დაუცადა.

ნათესაეები ინახავდნენ მანანას. მერმე, როგორც იქნა, ომი დამთავრდა და ბენო ჩიჩუა ჩამოვიდა. მაშინვე მოეწყო რომელიღაც ქარხანაში მთავარ ბულალტრად.

საუკეთესო წლები ომსა და მანანას შეაღია... ცოლი აღარ შეურთავს... შეილი უქალოდ გაზარდა, თვითონ იყო დედაც და მამაც...

მაინც რა მოხდა გუშინ?

აივანზე თეონასთან ერთად დატანტალებდა მსუქანი, ხუჭუქთმიანი ბავშვი. ყოველთვის პატარა, ფეხშიშველი გოგო...

თავზე საბანწაფარებული იგონებდა გუშინდელ დღეს. ღმერთმა იცის, მანანასთან შესვლამდე, წინასწარ არა ჰქონია რა განზრახული. იმიტომ შევიდა რომ ზურიკოს დამალვოდა. როგორ დაძაბა და დააბნია პატარა ბიჭმა დაქიმული ელოდა. რა მოხდებოდა გარეთ, შეუშვებდნენ თუ არა სახლში ზურიკოს... მერმე, როცა გაიგო, მირიანი თურმე ისევ წერს მოთხრობებს, არათუ წერს, მანანას აკითხებს, სულ მთლად დაიბნა და გარემოს გამოეთიშა. მანანას კი რაღაც მოეჩვენა, უთუოდ მოეჩვენა... სხვა რამ იფიქრა და აღელდა... დათოც აღელდა...

მა გი და ზე ეყარა მ ბ ზ ი ნ ა ვ ი, შ ა ვ ი თ მ ა...

ბნელ შესახვევში, ფიცრის მესერთან ვეებერთელა ლოდი გდია. ალბათ საუკუნეზე მეტია იქ დევს მოლურჯო-მონაცრისფერო ლოდი... „წავიდეთ, დავსხდეთ, ჩვენი წილი გავცვიოთო“. ციციინო კი იდგა, როგორც ხვატში დიდი და გრილი ჩრდილი. ჩრდილში კარგია დასვენება.

— მოდი, მშენებლობაზე წავიდეთ.

— ამ ღამეში? — გაოცდა ციციინო.

— ერთხელ ხომ უნდა ნახო, სად ვმუშაობ, რას ვაკეთებ.



— სიბნელეში მაინც ვერაფერს გავარჩევ, დღისით სჯობია.

— დღისით შენ არ გცალია, სულ ლექციებზე ხარ.

— კვირა დღეს იყოს.

— არ გაინტერესებს ჩემი ოთახის ნახვა?

— ძალიან.

— ჩემი კი არა — ჩვენი. მე უკვე მიყვარს ჩვენი ბინა. მე-ოთხე სართულზე.

— მე მაინც არ მესმის საიდან არის შენი?

— ჩვენი — გაუსწორა დათომ.

— კარგი, თუ გინდა ეგრე თქვი.

— შემპირდნენ... მითხრეს კიდევ, რომელს მაძლევენ.

— ჯერ არც ბინაზე, არც ოჯახზე არ ვფიქრობ. ალბათ სულელი ვარ და იმიტომ. მე მინდა... თვითონ არ ვიცი, რა მინდა.

— წინათ არც მე ვიცოდი, მაგრამ... ყველაფერს თავისი დრო აქვს.

— ალბათ ასეა. რა თქმა უნდა, ასეა.

— ჩვენი ოჯახი მყუდრო იქნება, წყნარი... ისე კი გამიჭირდება ჩვენების შიშოვება. ძნელია.

ციცინო და დათო ნიკოლაძის ქუჩით ლენინის ქუჩაზე გავიდნენ.

— გვიან არ არის? — იკითხა ციცინომ.

— ათის ნახევარია.

— შინ გაგიუღებინ, მამაჩემი ვერ იტანს გვიან რომ ვბრუნდები.

ავტობუსი თითქმის ცარიელი იყო.

უკან მოკალათდნენ. კონდუქტორმა თავი შეახსენა და დათომ ჭიბეები მოიქექა — მანეთიანი გაუწოდა კონდუქტორს. მერმე ციცინოს მიუბრუნდა:

— უკან ჯდომა მიყვარს. სტუდენტობის დროს შევეჩვიე და ვეღარ მოვიშალე.

ავტობუსი თითქმის მთელი დღის მუშაობით დაიღალა. სვენებ-სვენებით მიდიოდა. გმირთა მოედანი გაიარა და საბურთალოსკენ შეუყვავა აღმართს. დათომ ციცინოს ხელი მოხვია და კოცნა დაუპირა. ციცინომ კონდუქტორისკენ მიახვდა.

— მაგას ახლა „სძინავს“, — ჩასჩურჩულა დათომ, — ოღონდ ბილეთებს ნუ მოვთხოვთ და დილაშე იძინებს.

წინა რიგებში სამი მამაკაცის კეფა მოჩანდა. ერთს, ეტყობოდა, ნამდვილად ეძინა. ოღონაც გვერდზე გადახრილიყო და თავს აკანტურებდა, გეგონებოდა, წინ საკენკი იყარა და კენკავდა.

— მალე დავბრუნდეთ რა... თერთმეტზე მაინც მივიღე შინ. დედა ამდენჯერ მოვატყუე, უკვე მრცხვენია.

— დიდხანს რა გაგვაჩერებს?!

ციცინოს ნარისჯისფერი შალის კაბა ეცვა, სადად შეეკრილი. ყოველთვის ასე იცვამდა. მისი ტანსაცმელი არ ყვიროდა, უბრალო იყო, ტანზე კარგად მორგებული.

არიან ქალიშვილები, თუ გინდა ქალები, რომლებიც ერთი შეხედვით არ ტოვებენ არაფითარ შთაბეჭდილებას. მათ სწორი, მაგრამ მშვიდი ნაკეთები აქვთ. სახის არც ერთი ნაწილი — თვალები ან ტუჩები — ცალ-ცალკე არ იქცევენ კაცის ყურადღებას. ასეთი ქალიშვილები თუ ქალები ხშირად ძალიან ლამაზები არიან, ოღონდ ამ ფარულ სილამაზეს თანდათან უნდა აღმოჩენა.

დათო უხმოდ შესცქეროდა მკრთალად განათებულ ხორბლისფერ სახეს. ციცინოს ქერა თმა ჰქონდა, წარბები და წამწამები — მუქი, თვალები — მომწვანო. მაგრამ ამ სხვადასხვა ფერს სახის ხორბლისფერი კანი რაღაცნაირად უკარგავდა მკაფიობას.

ავტობუსში ოთხნი ამოვიდნენ: ორი ბავშვი, ქალი და კაცი. კაცი მთვრალი იყო. ქალი ხმამაღლა საყვედურობდა: ზომი არ იცი, სანამ არ გატყვრები და გათახსირდები, ღვინოს არ მოეშვებიო, ეს ბავშვები გამოუძინებელი დარჩნენ და ხვალ დილით როგორ ავყენო, სკოლაში როგორ გავუშვაო.

ქმარი გაბუსუნებული უსმენდა, უდრტვინველად იტანდა ცოლის საყვედურებს.

ორმა მგზავრმა ოჯახს ცნობისმოყვარეობით მოხედა. მესამე ისევ გვერდულად იჯდა და თავს აკანტურებდა.

ავტობუსმა განათებული ქუჩები უკან ჩამოიტოვა. ორლო-ჩოდრო ქუჩით კარგა ხანს მიჩაქჩაქებდა. ბოლოს დიდი წრე შემოხაზა და გაჩერდა. ისეთი ზმა გამოსცა, თითქოს ვეებერთელა ბურთი დაიჩუტა.

— ჩავიდეთ, — თქვა დათომ. — ბოლო გაჩერებაა.

ორი მგზავრი და ერთი ოჯახი წინა კარიდან ჩავიდნენ. მძინარესთან კონდუქტორი მივიდა და გააღვიძა. გაღვიძებული სწრაფად კი წამოხტა, მაგრამ ვერ გაერკვა, სად იყო.

ზედ გუბესთან გაჩერებულყო ავტობუსი. დათომ ისკუპა, გუბეს გადაახტა. მერე ცალი ხელი ციციუნოს გაუწოდა და ისიც გადაახტუნა.

ირველივე სიჩუმე და სიბნელე იყო. ალაგ-ალაგ მკრთალად ელავდა გუბეები. ისინი მიწაყრილებზე მიდიოდნენ, ქუჩა არსად ჩანდა.

— სად მივდივართ, დათო?

— შენ არ იცი, ხუთი-ათი წლის შემდეგ აქ რა იქნება.

— რა გვეჩქარებოდა, ჩვენც ათი წლის შემდეგ მოვსულიყავით.

— ათი წლის შემდეგ გვიან იქნება.

— ნეტა ვიცოდე, რა მეხუმრება, მეშინია.

— ჩემთან ნურაფრის გეშინია.

— დროის გრძნობა დაგკარგე, ასე მგონია, შუალამეა.

— ეგ იმიტომ, რომ ბნელა და სიჩუმეა.

— მე ყველაზე უფრო სიბნელისა და სიჩუმის მეშინია.

თვალი თანდათან შეეჩვია სიბნელეს. ღამის წყველიაღში ნელ-ნელა ამოიზარდა შენობის აჩონჩხილი კედლები და ამწეები.

— აგერ, ჩვენი სახლიც გამოჩნდა.

დათო მალიმალ გაჰკრავდა ხოლმე ასანთს. ფრთხილად ადიოდნენ სახელდახელო ხის კიბეზე. ციციუნოს, ეტყობოდა, მართლა ეშინოდა, მაგრამ ჩაეკიდა ხელი დათოსთვის.

როგორც იყო, ააღწიეს მეოთხე სართულს და „თავის ბინაში“ შევიდნენ. ოღონდ ბინას ჯერ არც კარი ჰქონდა, არც ფანჯრები და, რაც მთავარია, არ გააჩნდა ქერი. სამაგიეროდ საკარე და საფანჯრე ადგილები დატოვებული ჰქონდა.

ფანჯრიდან ღამეული სივრცე მოჩანდა. ვარსკვლავებით დაწინწკლული სივრცე ოთახზე უფრო ნათელი იყო. ქერზე მილიარდობით ვარსკვლავი დაბორილებდა. კარი, რომელიც რკინის აივანზე გასასვლელად დაეტოვებინათ, გაჩირადნებულ ქალაქს გასცქეროდა. ქალაქი ღამის რეიდზე მდგარ გაჩახჩახებულ ხომალდსა ჰგავდა.

— მოგწონს? — დათოს უნდოდა ციცინოს აქაურობა მოსწონებოდა.

— კარგია, — უპასუხა ციცინომ.

დათო ერთი წუთით გავიდა და მეზობელი „ბინიდან“ უამრავი ბურბუშელა შემოიტანა. მერმე კიდეც გავიდა, კიდეც შემოიტანა.

— საით გირჩევნია ყურება, თბილისისკენ თუ წყნეთისკენ?

— სულ ერთია... თუმცა, სჯობია, თბილისს ვუყუროთ... ლამაზია.

ისინი ბურბუშელაში ისხდნენ და ქალაქს გაჰყურებდნენ. დათომ პიჯაკი გაიხადა. პიჯაკი ორივემ მოიხურა. ბურბუშელასავით ეყარა მაგიდაზე თმა... დათოს გუნება შეეცვალა. ისიც კი გადაწყვიტა, ყველაფერი გულახდილად ეთქვა ციცინოსათვის. თავიდან მოეშორებინა მანანაზე უაზრო ფიქრი. მაგრამ ამ გულახდილობით შეიძლება, ზკივილი მიეყენებინა ციცინოსთვის.

გაჩუმება არჩია.

ციცინო მკლავზე გადაიწვინა, ყელსა და მკერდზე დაუწყო კოცნა. მერმე სიბნელეში ტუჩებს მიაგნო. დიდხანს კოცნიდა, მერმე წამოდგა და ციცინოც წამოაყენა. წელზე ღონივრად მოხვია ხელები, ტანზე მიიკრა.

მერმე დაილაღნენ და ისევ ბურბუშელაში ჩასხდნენ.

დათომ მიგდებული პიჯაკი მოძებნა, ციცინოს მხრებზე მოახურა. გუმანით იგრძნო, ახლა ლაპარაკი იყო საჭირო... მხიარული, უზრუნველი, მაგრამ სიტყვა არ მოეკიდა ენაზე, ვერაფერი გაიხსენა ისეთი, რითაც ორივენი გაერთობოდნენ. სულ უნდოდა მანანას ამბავი ეთქვა, ეთქვა ისიც, რომ ამ ამბავს დიდ მნიშვნელობას არ ანიჭებს და თუ ახლა ჰყვება, ჰყვება მხოლოდ იმიტომ, რომ ციცინოსთან არაფერი აქვს დასამალი.

ციცინო დუმდა. დუმილი დათოს საეჭვოდ მოეჩვენა.

გახსოვს, პირველად რომ შევხვდით ერთმანეთს? გელამ მომიყვანა შენთან... მართლა; რატომ არ იყავი წუხელ გელასთან?

— დამავიწყდა.

მე მეგონა, გახსოვდა. არც გამიფრთხილებიხარ, ისე კი, მალე წამოვედი. უმოკლესი გზით მივედი შინ.

დათოს გაახსენდა, როგორ ემალებოდა ბენო ჩიჩუას, მერმე სხვენზე როგორ ავიდა.

— იცი, რა? ჩვენს ეზოში ერთი ძალიან სასაცილო ბიჭი ცხოვრობს, ზურიკო ჰქვია. ახლახან გადმოვიდნენ საცხოვრებლად.

მერმე დაწვრილებით უამბო ზურიკოს დარბაზობა კვირა დილით. საყვედურები, ფანჯარაში ცქერა, უამბო, როგორ მიანიჭა ბავშვს მოსვლის უფლება, მერმე როგორ დაემალა ბენო ჩიჩუას ოთახში.

ციცინო მღუმარედ უსმენდა.

— სასაცილო ბავშვია, — თქვა დათომ.

— ბავშვს როგორ დაემალე?

— რა ვიცი. დავიბენი.

გულადმა გადაწვა ბურბუშელაში. ცალი ხელი თავქვეშ ამოიღო, მეორეთი ციცილოს ხელი მონახა. ჰერი სავსე იყო ვარსკვლავებით. ერთმანეთზე მიყრილი უამრავი ვარსკვლავი ციმციმებდა ჰერზე. „დღეს არ უნდა შევხვედროდი, ანდა რისთვის მოვიყვანე მინცდამინც აქ? ხომ შეიძლებოდა სადმე სხვაგან წავსულიყავით, სადაც ბევრი ხალხი იქნებოდა, თეატრში ან კინოში“.

დათო წუთი წუთზე ელოდა, ციცინო მეტყვის, უკვე ღროა და შინ წავიდეთო. იგი კი ისევ მისჩერებოდა მოციალე და მღუმარე სივრცეს, თითქოს მარტო იყო, თითქოს მის გვერდით არავინ იჯდა. !

— ციცინო!

ციცინომ თავი მოაბრუნა.

— რა კარგი ღამეა, არა?

ციცინომ თავი დააქნია. მერმე ღამეულ ქალაქს გახედა ისევ.

— დღეს რაღაც სხვანაირი ხარ, დათო...

— რას ჰქვია, სხვანაირი?

— არ ვიცი, რას ჰქვია.

— თუ ამბობ, უნდა იცოდე.

— ვგრძნობ, მაგრამ თქმა მიჭირს, არ შემიძლია. ხშირად გემართება ასე. ალბათ იმიტომ, რომ ეს გრძნობა მთლად ნა-

თელი არ არის ჩემთვის. არც მს ვიცი, როგორ: ან საიდან მებადვება ხოლმე ასეთი გრძობა.

დათო მიხვდა — ციცილო მართალი იყო. დღეს საღამოს შეხვდა თუ არა, იმ წუთიდან უჩვეულო ურთიერთობა დამყარდა მათ შორის. არაფერი არ უთქვამს ისეთი, რასაც სხვა დროს არ ეტყოდა, მაგრამ სულ ეჩვენებოდა, რომ ატყუებდა, სიმართლეს არ ეუბნებოდა ციცილოს... არადა, ისეთივე გულწრფელი იყო, როგორც მანამდე, წინა შეხვედრებისას.

ისეთი არაფერი არ გაუკეთებია, რასაც სხვა დროს არ გააკეთებდა, მაგრამ ყოველი თავის მოქმედება ყალბად და ნაძალადევად ეჩვენებოდა. თითქოს იმიჯომ კოცნიდა, რომ ვალდებული ანდა იძულებული იყო მოფერებოდა. სინამდვილეში კი წრფელად უნდოდა ციცილოს გვერდით ყოფნა, თანაც უნდოდა ეს სიახლოვე საუკუნოდ გაგრძელებულიყო.

იქნებ ამ გაურკვევლობის გამო მოუნდა, რაც შეიძლება მალე მიეცილებინა ციცილო სახლამდე და მარტო დარჩენილიყო.

— იცი, რად გითხარი? ჩვენ ერთხელ დავთქვით, მუდამ გულწრფელები ვყოფილიყავით, არაფერი დაგვემალა ერთმანეთისთვის, — თქვა ციცილომ.

დათომ გარკვევით გაიგონა მანქანის ხმა. კაცის ხმაც გაიგონა გარკვევით.

— ვიცი. შენ არ დამაცადე, თორემ გეტყოდი.

— რას მეტყოდი?

— იქ რომ შევედი, მარტო მანანა დამხვდა ოთახში.

— მაგას რა მნიშვნელობა აქვს, ვინ დაგხვდა! შენ ვერ გამიგე, დათო... მე სხვა მიგანიშნე და შენ სხვას მეუბნები.

— როგორ არა აქვს მნიშვნელობა?!.

დათოს ისევ შემოესმა გარედან ხმაური და მიაყურა. მერე წამოდგა და გადაიხედა. სიბნელეს თვალშეჩვეულმა ეზოს სიღრმეში საბარგო მანქანა და ორი კაცი დალანდა. კაცები რალაცას ფუსფუსებდნენ.

— რა მოხდა?

— ვილაცყები არიან... მანქანით მოსულან.

— ამ ღამეში რატომ მოსულან?

— მეც ეგ მიკვირს, წავალ და გავიგებ.

— დათო!

— ნუ გეშინია, ახლავე დავბრუნდები.

დათო სიფრთხილით დაჰყვა ხის კიბეს, თან ხელს კედელზე მიაფათურებდა. ეზოში რომ ჩავიდა, უცებ ვერაფერი გაარჩია. ასე იარა. ერთხანს. მერმე ოციოდე ნაბიჯზე საბარგომანქანა გამოიკვეთა. დათო მიხვდა, რაც ხდებოდა: ვილაყები ცემენტით ტვირთავდნენ მანქანას.

— ეი, მანდ ვინა ხართ?! — გასძახა დათომ და რამოდენიმე ნაბიჯი კიდევე წადგა.

ყოველგვარი ხმაური მიწყდა. ჩამიჩუმდი აღარ ისმოდა.

— მანდ ვინა ხართ-მეთქი?! რას აკეთებთ?!

ორი ლანდი გამოეშურა დათოსკენ. დათო მონუსხულივით იდგა, კიდევე რალაცის თქმას აპირებდა, მაგრამ ხმა აღარ ამოუვიდა ყელიდან.

ლანდები ნელ-ნელა მოიწევდნენ დათოსკენ, ჯიუტად უახლოვდებოდნენ...

სულ ახლოს მოვიდნენ. დათომ სახეებიც კი გაარჩია, მაგრამ ვერ იცნო. მერმე შეამჩნია, რომ ლანდებს ნიჩბები ეკავათ ხელში.

გაქცევა სცადა... კეფაში ყრუ ტკივილი იგრძნო, შეტორტმანდა, თავზე ორივე ხელი წაივლო. კიდევე დააპირა გაქცევა და მუხლებმა უმტყუნა...

უნებურად შეტრიალდა, ახლა უფრო ძლიერი ტკივილი იგრძნო. ვიდრე გონებას დაჰკარგავდა, მიხვდა, ამჯერად შუბლში დაჰკრეს ნიჩაბი...

როდესაც გონს მოვიდა, თენდებოდა. გულალმა ეგდო მიწაზე და ეძინა. ალბათ, ეძინა რადგან სიზმრები ნახა, საშინელი სიზმრები.

თავის ტკივილმა გამოალღვიძა. მალლა გაფითრებული ცა და აქა-იქ შერჩენილი ვარსკვლავი ცახცახებდა... წამოიწია, მაგრამ ვერ ადგა. მთელ სხეულში ტკივილმა დაუარა, მტვრევა დაუწყო. გულალმა დაგდებულმა წამში გაიაზრა, სად იყო და რა მოხდა. გაახსენდა: მეოთხე სართულზე ციციწო დატოვა. თავი წამოჰყო და მიდამოს. თვალი მოავლო. ირგვლივ არავინ ჩანდა, არც სიჩუმეს არღვევდა ვინმე.

— ციციწო! — დაიძახა ჩახლენილი ხმით, — ციციწო!

გვერდზე გადაბრუნდა, ახლა ასე სინჯა წამოდგომა, გა-

კირეებით დადგა ფეხზე. მთელი ღამე მიწაზე ნაგლებს შესცივროდა, კანკალებდა... პერანგზე სისხლი შეამჩნია, მერე სახეზე მოისვა ხელი — სისხლი შეხმობოდა. მერე შუბლი მოისინჯა, დარტყმისაგან კრილობა გასჩენოდა, თანაც ზედ თმა მიწებებოდა და ძალიან ტკიოდა.

ბანცალით გაემართა შენობისაკენ. კედელ-კედელ აჰყვა კიბეს.

— ციცინო!

ხმას არავინ სცემდა.

— ციცინო!

მეოთხე სართულზე ციცინო არ დახვდა.

მიყრილ-მოყრილი ბურბუშელა.

ბურბუშელაზე მიგდებული პიჯაკი.

ღათო ფანჯარასთან მივიდა. ორივე ხელით კედელს მიეზღინა და ეზოში გადაიხედა. ფარდულის კარი გაეტეხათ და ღიად დაეტოვებინათ. მთელი ეზო ცემენტით მოფენილიყო.

მერმე მთელი სართული დაიარა, ყველა ოთახი დაათვალიერა. ციცინო არსად იყო. უკან რომ დაბრუნდა, „თავისი ოთახი“ როგორღაც დარბეული მოეჩვენა. თითქოს ბურბუშელა მიმოეფანტათ, პიჯაკიც დაეკუმუჭნათ და ისე მიეგდოთ.

— ციცინო! — იღრიალა და ტკივილისაგან დაიმანჭა. კეფაზე ფრთხილად მოისვა ხელი. ახლალა გაიხსენა, რომ პირველად სწორედ აქ დაჰკრეს ნიჩაბი. თმას სისხლში აზელილი მიწა თუ ცემენტი მიჰკვროდა. იფიქრა მოვიშორებო, თმა ეწიწკნებოდა და საშინელ ტკივილს ჰკვრიდა.

პიჯაკს დასწვდა, გაჭირვებით გაუყარა ხელები.

ეზოში ჩამოვიდა და დიდხანს იბოდილა. ფარდულის კარი მიხურა. გატეხილი ბოჭლოში ხელში ატრიალა და იქვე მიაგდო. მერე ონკანი მოუშვა, პირი დაიბანა.

ერთთავად ციცინოზე ფიქრობდა. ჯერ შესაძლებლად ჩათვალა, რომ იმ ორ უცნობს შეეძლო ციცინოს მიგნება. ათასგვარი შემზარავი სურათი წარმოიდგინა... მერმე თავი დაიმშვიდა: რატომ ავიდოდნენ მაინცდამაინც მეოთხე სართულზე? გინდაც გაეგოთ, რომ იქ ვილაცაა, თავს საფრთხეში აღარ ჩივდებდნენ, დასწდებოდნენ მანქანაზე და მოუსვამდნენ.

არა, ციცინო ნამდვილად შინ წავიდა.



მაგრამ იმ ღამეში როგორ წავიდოდა?.. ანღა რატომ დატოვებდა პიჯაკს?

აღარ იცოდა, რა ექნა, ციციხო მოეძებნა, პოლიკლინიკაში წასულიყო, თუ სამშენებლო კანტორისათვის შეეტყობინებინა ეს ამბავი?

კანტორაში წასვლას არ ჰქონდა აზრი, გვიან გაახსენდა: დღეს კვირა იყო და არავინ დახვდებოდა... ციციხოსთან მტვერში ამოგანგლული და თავპირდაღეწილი ვერ გამოცხადდებოდა, უხერხული იყო, ხალხს დააფრთხობდა... არადა, ასე გულდამშვიდებაც არ შეიძლებოდა.

ასიოდე მეტრზე მშენებლობისაკენ მომავალი ავტომანქანა დაინახა, მტვერში რწევა-რწევით მოიკვლევედა გზას. დათო გზაზე გავიდა და დაელოდა თუ ტაქსი აღმოჩნდებოდა, უკან დაბრუნებისას გაჰყვებოდა.

ტაქსი დათოს წინ გაჩერდა. მოულოდნელად მანქანიდან გელა და ციციხო გადმოვიდნენ. ორივეს შეუფრთხებული სახე ჰქონდა. დათომ ციციხო რომ დაინახა, დამშვიდდა, სული მოითქვა.

— რა მოგივიდა, ბიჭო! — სასოწარკვეთილი ხმით იყვირა გელამ. — რას ჰგაფხარა?!

ციციხო შეწუხებული უმზერდა და ხმას არ იღებდა. გელამ ირგვლივ შემოუარა დაზარალებულს, საფუძვლიანად აათვალიერა-ჩაათვალიერა. კრილობებიც გაუსინჯა თავზე.

— ჩქარა ექიმთან — გასცა განკარგულება, — გზაში მიამბე, რა მოხდა.

უკან ციციხო და დათო მოთავსდნენ. გელამ შოფრის გვერდით დაიკავა ადგილი. მანქანამ იქვე მონახა მოსაბრუნებელი ადგილი და ქალაქისაკენ დაიძრა.

— ლამის გავგიჟდი, — დაიწყო გელამ, — დილაადრიან ციციხო რომ მომადგა. უნდა გენახა, რა სახე ჰქონდა!.. არა, მაინც როგორ დატოვე ეს გოგო? მერმე ქვევით ჩამოსულა, უძებნიხარ... ერთი მითხარი, რა გინდოდათ, ამ დასაქცევში რას მოდიოდით? საწყალ გოგოს რა არ უფიქრია... სხვა ადგილი ვერ ნახეთ? თუ სიყვარულისთვის მშენებლობის პეიზაჟია აუცილებელი? წარმოგიდგენია, ჩემს სახლამდე სულ ფეხით უვლია. კი არ უვლია, ურბენია... ტრანსპორტი უკვე

აღარ მუშაობდა... ტაქსი ვერ იშოვა... კერძო მანქანას არ ენდო...

დათო მოშვებულად იჯდა, სავარძლის ზურგზე მისვენებულიყო და ნახევრად მოხუჭული თვალებით გზას გასცქეროდა. წინ ჩიკორივით ტრიალებდა გელას თავი. წვრილი კისერი დიდ, ბურთივით მრგვალ თავს თითქოს იმაგრებდა კიდევ და ვერც იმაგრებდა. გეგონებოდა, ვილაცის უხილავი ხელი ზემოდან აწვეებოდა, ატრიალებდა, რომ თავი როგორმე კისრისთვის მოერგო, ზედ დაემაგრებინა.

— რას გაჩუმებულხარ, თქვი რა მოხდა?!

როდესაც დათო წუხანდელ ამბავს ყვებოდა, დაბინდულ მესხიერებაში შავი ნიკო ამოტივტივდა.

— ხომ არ იცი, ვინ არის შავი ნიკო? — ჰკითხა გელას, როცა ამბავი დაასრულა.

— არა, პირველად მესმის.

— შავი ნიკო? — იკითხა შოფერმა, — მაგას ვინ არ იცნობს!

გელაც და დათოც შოფერს მიაჩერდნენ.

— სოლოლაკში ცხოვრობს... მაგარი ვინმეა.

შოფრის ყოველგვარი ცნობები შავ ნიკოზე ამით ამოიწურა. ალბათ, ეგონა, ამ კაცის შესახებ ბევრი რამ ვიცო, მაგრამ საქმე საქმეზე რომ მიდგა, ვერაფერი თქვა. ეს უხერხულობა თვითონაც იგრძნო და ვილაცაზე თუ რალაცაზე გაბრაზებულმა წაიბურტყუნა:

— თუ გინდათ, სახლს გიჩვენებთ?

— რას ჰქვია, გვინდა?! ახლავე გვაჩვენე!.. — გელას წარმოდგენა არ ჰქონდა, ვინ იყო შავი ნიკო. მაგრამ, როგორც ჩანს, წუხანდელმა ამბებმა ისე დამუხტა, რომ ყველაფერს შეუმოწმებლად აკავშირებდა ერთმანეთთან და დამნაშავეს ამ წუთიდანვე ეძებდა.

ციცინო მანქანის კუთხეში მიწურულიყო, ფერგამკრთალი უსმენდა მამაკაცების საუბარს.

დათომ ნიკო კორინთელის ამბავი გაიხსენა. ლაპარაკი თავის ტკივილს უორკეცებდა, მაგრამ ამბავი მაინც ჩაათავა.

— ყველაფერი გასაგებია, — თქვა გელამ, — ყველაფერი დღესავით ნათელია. მე უკვე ვხედავ ნიკო კორინთელს, — მერე შოფერს მიუბრუნდა, — შენ იმის სახლი დამანახე!

— შავი ნიკო მაგარი ვინმეა.

— გელა, ჯერ დათო მივიყვანოთ ეჭიმთან.

— არა, ციციხო... იქ დიღხანს არ დავეყვინდებით.

დათოს თვლება მოერია. ოდნავ შებრუნდა ციციხოსკენ და უფრო მოხერხებულად მიწვა. ქუდების მაღაზიაში, მირიანის, ნიკო კორინთელი და დათო, რატომღაც ერთად შევიდნენ. დათოსთვის ქუდი უნდა ეყიდათ. უცებ მოესმა ქალის ხმა, რომელიც ძალიან ჰგავდა ციციხოს ხმას.

— აქ მხოლოდ ბავშვის ქუდები იყიდება... მხოლოდ ბავშვის ქუდები იყიდება... ბავშვის ქუდები იყიდება...

ნიკო კორინთელი მაინც შევიდა დახლში და ქუდების გადმოლაგება დაიწყო. მერმე ყველა მათგანის მორგებას ცდილობდა დათოს თავზე. ყველა ქუდი პატარა იყო, ნიკო კორინთელი მაინც ახურავდა; დათო წვალობდა, იტანჯებოდა, ბოლოს სულ პატარა ზომის ქუდი ამთარჩია მირიანმა. ნიკომ ძალით ჩამოაცვა ეს ქუდი დათოს. ქუდი შუბლსა და კეფაზე უჭერდა, სუნთქვა აღარ შეეძლო, თანაც ტკივილის გამხელა აკრძალული ჰქონდა.

მანქანა მოასფალტებულ ვიწრო ქუჩაზე იდგა. გელა აღარ ჩანდა მანქანაში.

— სად არის გელა? — იკითხა დათომ.

— შავი ნიკოს სახლი უნდა ნახოს, — უპასუხა შოფერმა.

— რომელია?

— აქედან არ ჩანს, ქვემოთ არის...

— რატომ იქვე არ დააყენე?

— გაგიჟდი? რამე რომ მოხდეს და ჩემი მანქანა დაიხსომოს? — შოფერი ზედმეტად ფრთხილი და წინდახედული აღმოჩნდა.

ცოტა ხნის შემდეგ გელა მოვიდა.

— ეგ სახლი შემჩნეული მქონდა, მაგრამ არ ვიცოდი, თუ ნიკო კორინთელის იყო.

— მთლიანად მაგისია, აი!

— ახლა მე ვიცი და ჩემმა ბიჭობამი ერთი, თუ ძმა ხარ, სადმე აქვე პოლიკლინიკაში მიგვიყვანე, მორიგე ექიმი იქნება.

გელას ფაციფუცი გულს უწყალებდა დათოს. არაფრის თავი არ ჰქონდა, არც ფიქრის, არც ამ უაზრო, გელას მიერ წამოწყებული გამოძიებისა. შუბლი დაუძძიმდა, სიმძიმე ქუთუთოებს ჩამოაწვა... ეძინებოდა. იმასაც მიაქცია ყურადღება, ციციხო ხმას არ იღებდა და თავისთვის იჭდა მიყუყულო. ხანდახან ეჩვენებოდა, ციციხო უცხო ადამიანი იყო და ამ მანქანაში შემთხვევით მოხვდა.

პოლიკლინიკიდან გამოსვლებმა მთაწმინდის უბნისაკენ აღეს გეზი. დათომ წარმოიდგინა მტვერში ამოსვრილი, თავშეხვეული რომ შეაღებდა კარს, ოჯახში რა ალიაქოთი ატყდებოდა. რა გაუძლებდა დედის შეცხადებას, წუხილს, თეონას შეშფოთებულ მზერას და ათასგვარ შეკითხვას. წინასწარ დაეუფლა გრძნობა განწირული კაცისა, რომელიც საშველს ვეღარა ხედავდა.

მანქანა სადარბაზოსთან გაჩერდა.

— ციციხო, შენც ამოდი, რა! — შესთავაზა გელამ.

— არა, მე წავალ.

— ცოტა ხნით ავიდეთ. მერმე მიგაცილებ.

— არა, არა, წავალ... დაღლილი ვარ.

გელამ ტაქსის შოფერს ფული გადაუხადა. გამოიანგარიშა, ციციხოს სახლამდე დაახლოებით რას დაწერდა მრიცხველი და ისიც მისცა.

— ჯიგარო, ეს გოგო მიიყვანე!

სადარბაზოდან მირიანი გამოვიდა, მარჯვნივ გაუხვია და სწრაფად გაჰყვა ქუჩას. ბაღურით რძის ბოთლები მიჰქონდა.

კარი დედამ გაუღო.

შვილმა შესვლისთანავე ანიშნა: ისეთი არაფერი მომხდარა და ნუ აღელდებით. დედას თვალები გაუფართოვდა.

— იჩხუბე?!

შვილი არ მოელოდა ასეთ შეკითხვას და ეწყინა. მით უმეტეს, რომ დედამ ეს სიტყვა ძალიან ნაცნობი კილოთი წარმოთქვა. ასეთი კილოთი ეკითხებოდა ბავშვობაში, როცა შინ სხვა უბნის ბიჭებთან ნაჩხუბარი მოვიდოდა ხოლმე.

დათო პირდაპირ თავის საწოლისაკენ გაეშურა, უკან მო-  
პყვებოდა დედა, რომელსაც გელა ამშვიდებდა:

— ყველაფერს ახლავე მოგახსენებთ, ქალბატონო. ნუ აღ-  
ელდებით.

ტანსაცმელი დათომ იქვე სკამზე მიყარა და ლოგინში შე-  
წვა. შუშაბანდში თვალი მოჰკრა პლატონს, რომელიც მაგი-  
დას უჯდა და საუზმობდა. დედა და გელა თავზე აღგნენ. და-  
თომ თვალეები დახუჭა, ამით ორივეს ანიშნა: მეძინება და მარ-  
ტო დამტოვეთო.

— ჰო, ექიმმა თქვა, სიმშვიდე და მოსვენება სჭირდებაო, —  
ჩურჩულით თქვა გელამ.

არაფერი ამის მსგავსი არ უთქვამს ექიმს, არავითარი რჩე-  
ვა-დარიგება არ მიუცია. კეთაზე, ჭრილობის ირგვლივ, თმა  
შეკრიჭა, მერმე შუბლიც და კეფაც სუფთად მობანა, ორივეგან  
მალამო დაადო და კარგად შეუხვია. უხმოდ მოქმედებდა.  
ისიც არ უკითხავს, რა შეემთხვა. თავისი პროფესიული ვალი  
კეთილსინდისიერად მოიხადა. ერთხელ გაეხუმრა:

— მაგარი თავი გქონია, ბიძიკო.

ხოლო წამოსვლისას უთხრა:

— თუ სამედიცინო დასკვნა გქირდებათ, პირველ საავად-  
მყოფოში მიაკითხეთ, ასეთ ცნობებს იქ იძლევიან...

დათომ თვალი გაახილა (იცოდა, დედა და გელა შუშა-  
ბანდში იყვნენ გასულეები), შუა ოთახის კართან თეონა იდგა  
და ეშმაკურად იღიმებოდა.

— გოგოს გულისთვის იჩხუბე? მე ყველაფერი ვიცი.

ისევ დახუჭა თვალეები.

შუშაბანდში გელა ქაქანებდა. დათოს გარკვევით ესმოდა  
ლაპარაკი და ბრაზობდა, მეგობარი აჰარბებდა, ყველაფერს  
გაზვიადებულად ხატავდა. როდესაც შავი ნიკოს ამბავს მიაღ-  
გა, პლატონმა გაოცებით წამოიძახა:

— ნიკო?!

— დიხ, ნიკო კორინთელი.

— ნიკო... ნიკო დიდი კაცია!..

მერმე პლატონი დიდხანს წვალობდა, ცდილობდა რაღაც  
ეთქვა, მაგრამ სიტყვას სიტყვაზე ველარ აბამდა, ეს იყო სი-  
ტყვების უაზრო გროვა. როგორც ჩანს, გელამაც ვერ გაიგო  
პლატონის ნათქვამი. საუბარში დედა ჩაერია.

— პლატონი ამბობს, — განმარტა დედამ, — მაგ ამბის გახმაურება არ ღირსო.

— როგორ თუ არ ღირსო! — ეს გელა იყო.

— არ ვიცი, ასე ამბობს პლატონი. კიდევ იმას ამბობს, რომ ოთხი ტონა ცემენტი არაფერიაო, მაგის დაფარვა ადვილად შეიძლებაო. ნიკოსთან კი საქმეს მე მოვაგვარებ, თქვენ ვერაფერს გახდებითო.

— დიდი კაცია, — თქვა პლატონმა.

— მე ვიცი, რა კაციც არის! — ცხარობდა გელა.

დათომ ნახევრად მოხუჭული თვალებით გახედა შუშაბანდს. პლატონს დამცინავად ეღიმებოდა. ასე ეღიმება ხოლმე კაცს, რომელმაც ორივე მოწინააღმდეგის შესაძლებლობები კარგად იცის და იმ ორთაგან სუსტის ტრაბახს ისმენს.

— ჩემი რჩევაც ეს იქნება, შვილო, — ამბობდა დედა, — პლატონს დაუჯერეთ, გამოცდილი და ჭკვიანი კაცია, ნუ გაახმაურებთ მაგ ამბავს, ოთხი ტონა ცემენტი არაფერია.

„საოცარი ხალხია, — გულს ველარ ერეოდა დათო, — ჯერ ერთი, კაცმა არ იცის, ოთხი წაიღეს, თუ ათი. ცემენტი იქით იყოს, კინალამ მომკლეს. ეგენი მარტო ქურდები კი არა, მკვლელები არიან. მოსაკლავად მომიქნიეს ნიჩაბი და შემთხვევით გადავრჩი“.

გელა კიდევ ერთხანს შემოვიდა დათოს. ოთახში, მეგობარს დახედა. დათომ თავი მოიმძინარა. მერმე ისევ შუშაბანდში დაბრუნდა და თქვა:

— ეძინოს. საღამოს შემოვივლი.

— თეონა! — მეგობრის წასვლისთანავე დაუძახა დათომ დას, — სარკე მომიტანე.

სარკე გულგატეხილმა შემოუტანა. ეტყობა, თეონას ერჩია, გოგოს გულისთვის ეცემათ ძმა, ვიდრე ოთხი ტონა ცემენტისათვის.

დათოს ორივე თვალში სისხლი ჩაქცეოდა, უბეები ჩალურჯებოდა. საკმაოდ გასიებოდა ცხვირიც და სახის იერს უცვლიდა. სულ სხვა კაცი იყურებოდა სარკიდან. „არ გინდა ასე ქუჩაში გასვლა?! ალბათ, იმიტომ ვერ მიზღერდა ციციწო სახეში“.

სარკე დას დაუბრუნა. თეონას იმედის შუქმა გადაურბინა.

— დედა მოატყუეთ, არა? თქვი, რას მიმაღავ? ცემენტის-  
თვის ვინ გცემდა.

— შენ წარმოიდგინე, მცემეს.

— ვიცი, ვიცი, — თეონამ სარკე წაიღო.

მერმე დედამ მოაკითხა დათოს.

— რად გააგებინე, შვილო, გელას? ეგ ახლა მთელ ქალაქს  
მოსდებს და საქვეყნოდ მოგვეჭრება თავი. შეიძლება, გაზეთ-  
შიც დაწეროს. მეტი კი არ უნდა.

- საღამოს შეპირებისამებრ მოვიდა გელა, თან ოთხი ბიჭი  
მოჰყვა. როცა ერთიმეორის მიყოლებით მეგობრები შემო-  
იბაწრნენ, დათოს კინაღამ გული წაუვიდა.

მეგობრების თანაგრძნობამ შინაგანად გაახარა და ააღელ-  
ვა კიდევ, მაგრამ მაინც ეწყინა, დედას დღევანდელი ნათქვა-  
ში რომ უმართლდებოდა. ოჯახის თვალში გელამ საბოლოოდ  
დაჰკარგა წონა და ველარაფერი უშველიდა.

ბიჭების მოსვლისთანავე მირიანი სამზარეულოში გავიდა.  
დედა და პლატონი შუშაბანდში ისხდნენ და ბიჭების წასე-  
ლამდე ადგილიდან არ დაძრულან. თეონა შინ არ იყო. და-  
თო რას არ მისცემდა, მართო თეონა კი არა, დედაც რომ საღ-  
მე წასული ყოფილიყო.

დათომ თავის ოთახში შეიყვანა მეგობრები და სკამები შე-  
უტანა. გელას ისეთი შეწუხებული და საქმიანი იერი ჰქონ-  
და, როგორც დილას, ეტყობა ბიჭებს მთელი დღე ტელეფონ-  
ით ურეკავდა, ატყობინებდა, ვითარებოდა.

— გაქოთაქეს, ბიჭო? — შეთანმებულებივით რამდენიმემ  
ერთად ჰკითხა დათოს.

დათომ მეგობრებს ნაძალადევად გაუცინა.

— ქუჩაში რომ შემხვედროდი, ვერც კი გიცნობდი, — უთხ-  
რა ნოდარმა. — შენ თავს აღარ ჰგაგხარ.

ნოდარ ნიჟარაძეს შავი რქის ახალი სათვალე ეკეთა.

ყველამ გულდასმით შეამოწმა ნაცემი მეგობარი, შემოწ-  
მებამ ხმაურსა და სიცილში ჩაიარა. გელა ცდილობდა, უფ-  
რო სერიოზული სახე მიეცა სტუმრობისათვის, მაგრამ არ გა-  
მოუვიდა. ბიჭები კარგ გუნებაზე იყვნენ და სულ ხუმრობა  
უნდოდათ.

— თუ ცნობა დაგვჭირდა, — გელა დათოსთან მივიდა და  
მხარზე ხელი დაადო, — ოთარი მოგვეცემს.

ოთარ სალაყაია, რომელიც ახლა ფეხიფეხგადადებული იჯდა და გვერდზე გადახრილი საწერ მაგიდას მიყრდნობოდა, ექიმი იყო, ქალაქის პირველ საავადმყოფოში მუშაობდა, ქირურგიულ განყოფილებაში.

ნოდარ ნიჟარაძე და ჯიმშერ ქალდანო ფანჯარასთან იდგნენ. ნოდარი, ალბათ, ჯერ არ იყო, შეჩვეული ახალ სათვალეს, წამდაუწუმ ისწორებდა, ანდა, შეიძლება, სათვალე დიდც პქონდა.

— არა, შენ ვერ გამიგე, ჯიმშერ, — როგორც ჩანს, ნოდარმა ქუჩაში დაწყებული საუბარი გააგრძელა, — მე გელაპარაკებოდი წონასწორობის მდგომარეობაში წარმოქმნილ რხევაზე. ეს შედარებით მარტივი რხევაა და წარმოიქმნება უკუქცევის ძალისაგან, რომელიც წონასწორობის მდგომარეობიდან წერტილის გადანაცვლების, თუ გინდა — გადაადგილების პირდაპირპროპორციულია, გამიგე?.. ამაზე მარტივად როგორღა გითხრა?.. — ნოდარი ცბიერად იღიმებოდა, მერე რატომღაც ხმას დაუწია, — ასეთი რხევები სინუსის კანონით წარმოიშვება და ამპლიტუდაზე არ არის დამოკიდებული.

— მე მესმის რასაც შენ ამბობ...

— ისე შენ რა გითხრა, — შეაწყვეტინა სიცილით ოთარ სალაყაიამ.

— ეს ხალხი გამაგიჟებს, რა დროს ამპლიტუდაა?! — აღშფოთდა გელა, თან პალტოს დილებივით დიდსა და მრგვალ თვალებს ახამხამებდა.

გელას აღშფოთებამ უფრო გაამხიარულა ბიჭები.

— ეგენი სახლში არ არიან შესაშვები, — თქვა ისევ ოთარმა.

— შენ ხუმრობ და მართლა ეგრეა.

— რატომ გგონია, რომ ვხუმრობ? მაგათ, ორივეს ერთად, სახლში არ ვუშვებ. სათითაოდ, თუ უნდათ, მობრძანდნენ.

ნოდარი ფიზიკოსი იყო, უნივერსიტეტში ასპირანტურას ამთავრებდა. ჯიმშერი, ეს მთასავით კაცი, ლექსებს წერდა, ლექსების პაწაწინა კრებულები კი გამოსცა. უცნაური გატაცება იცოდა ჯიმშერმა... ბოლო ხანებში ფიზიკამ გაიტაცა. მთელ დღეებს ნოდართან ატარებდა ლაბორატორიაში.

— საფერფლე არა გაქვთ ოჯახში? — იკითხა კოტემ.

— არც ერთი არ ვეწევი, — დათო უცებ ვერაფერს წა-



აწყდა ისეთს, რაც საფერფლედ გამოდგებოდა. მერე დიდი ნიჟარა გაახსენდა და შუა ოთახის კარი შეაღო. ნიჟარა, როგორც ყოველთვის, პიანინოს თავზე იდო და სულაც, მგონი, პიანინოსთან ერთად გაჩნდა ამ ოჯახში. ამ ნივთს მხოლოდ იმ შემთხვევაში დასძრავდნენ ადგილიდან, თუ სტუმარი საფერფლეს მოითხოვდა.

— იშვიათი ნიჟარაა! — თქვა კოტემ.

— პირველად ხომ არ ხედავ? — ჰკითხა დათომ.

— მეორედაც შეიძლება ნივთი მოგეწონოს, მეთაქვს...

— ეგ ნიჟარაძეს დააჭერინეთ ხელში, — ჩაიციხა ჯიმშერმა.

— სულ ეგრე უკბილოდ უნდა იხუმრო? — უთხრა კოტემ.

— ახლა ჩამოფქვი, რაც იცი, — მიუბრუნდა გელა მეგობარს, რომელსაც ხელში ნიჟარა ეჭირა.

— რა თქვა?

— რაც იცი ნიკოზე.

დათო უსიამოვნოდ დაიმანჭა. ნიკოს გაგონებაც კი არ უნდოდა. გახედა შუშაბანდს, სადაც დედა და პლატონი მღუმარედ უსხდნენ მაგიდას.

კოტე რამიშვილმა, ამ ბუნჩულა და უწყინარმა, მუდამ მთვლემარე ადამიანმა ზეპირად იცოდა ყველა, ასე თუ ისე, განთქმული რეციდივისტისა და საქმოსნის ბიოგრაფია. სკოლაშივე ჰყვებოდა საოცარ ამბებს. მერმე სასამართლოებშიც დაიწყო სიარული და მათი ბიოგრაფიის ცარიელი ფურცლები საინტერესო ცნობებით შეავსო. ეგონათ, სკოლის დამთავრების შემდეგ იურიდიულ ფაკულტეტზე შევიდოდა, მაგრამ ყველასთვის მოულოდნელად სულ სხვა დარგი აირჩია — ბიოლოგია.

ბ ა ვ შ ვ ო ბ ა და ყ რ მ ო ბ ა: მოძრავი, ცოცხალი ბიჭი ყოფილა, შეატუხა, რის გამოც უბნის ბიჭებს ბავშვობაშივე „შავი ნიკო“ შეურქმევიათ. მეშვიდე კლასამდე მხოლოდ ცელქობდა. მეშვიდე თუ მერვე კლასში, ჯერ მეზობლისათვის, მერე კი მასწავლებლისათვის, ოქროს საათები მოუპარავს და გაუყიდია. იმავე წელს, ზამთარში, მორიგეობისას, რამდენიმე თანაკლასელის პალტო ჩაუცვამს, ზემოდან თავისი მოუხუ-

რავს და კლასიდან შეუმჩნევლად გაპარულა. მერე ცხოვრება რამდენადმე უინტერესო ხდება. სამი წელი დაჰყო არასრულწლოვან დამნაშავეთა გამასწორებელ ბანაკში. იქიდან სკოლაში არ დაბრუნებულა, რადგან უკვე სწავლა აღარ სჭირდებოდა, ისედაც ბევრი იცოდა.

ს ი ჳ ა ბ უ კ ე : ცხრამეტი წლისამ ამხანაგებთან ერთად საიუველირო მაღაზია გატეხა და დიდძალი ოქრო გაიტაცა. მერმე უნივერსიტეტის გაქურდვისას, დახლის უკან დამალულმა ბელგიურმა დოგმა ისე დაფლითა, რომ გაქცევა ვეღარ შეძლო... მეგობრებმა დოგი კი მოჰკლეს, მაგრამ მაღაზიიდან ძმაკაცის გაყვანა დაავიანეს და გაიქცნენ. ნიკო დაიჭირეს და თურმე დღემდე ვერ იტანს ვერავითარი ჯიშის ძაღლს და აღარც მეგობრებისა სჯერა. მერმე ათი წლით გადაასახლეს კალიმაში. იქ ძმაკაცებს, რომლებმაც ძაღლისაგან დაფლეთილი მიატოვეს მაღაზიაში, სასტიკად გაუსწორდა და კიდევ რამდენიმე წელი დაუმატეს. გაქცევა უცდია, უცდია კი არა, გაქცეულა და ორი წლის შემდეგ გვარშეცვლილი ასტრახანში დაუჭერიათ. კიდევ გაქცეულა, ამჯერად მაგადანიდან. გზაშივე დაუკავებიათ. მერმე ომი დაიწყო. გარეთ ყოფნას იქ ყოფნა არჩია. მერმე სიჭაბუკეც გაქრა, ძველი ცეცხლი აღარ უღვივოდა გულში...

— როდის დაბრუნდა? — იკითხა ნოდარმა.

— მგონი ორმოცდაათოთხმეტში. — უპასუხა კოტემ.

— რამდენი წელი იჯდა?

— თითქმის ოცი.

— ახლა რას აკეთებს?

— არ ვიცი, აღარ დავინტერესებულვარ.

— საოცარია, როდისღა მოასწრო ასე გამდიდრება? — თავისთვის ჩაილაპარაკა გელამ.

— ამბობენ, ის ოქრო, რომელიც საიუველირო მაღაზიიდან გაიტაცა, დამალული ჰქონდაო.

— შეუძლებელია!

— არაფერი არ არის შეუძლებელი.

— მაინც რას აკეთებს ახლა, რას საქმიანობს? — ჩააცვივდა გელა.

— გითხარი, არ ვიცი-მეთქი.

— ეგეც შენი ნიკო — წამოიძახა ოთარ სალაყაიამ.

უცებ შუშაბანდიდან ბურღლუნი მოისმა. ეს პლატონი იყო. გამწარებული ბურღლუნებდა. დათომ შიშით გახედა. პლატონს სახე წამოწითლებოდა, მრისხანედ იყურებოდა ოთახისაკენ და რაღაცას იმუქრებოდა. წამოდგა, მთელი ხმით იყვირა. ბიჭებისაკენ იწვედა. დედა ძლივს აკავებდა. დათოს პლატონის ამგვარი გაცეცხლება ჭერ არ ენახა და შეეშინდა. შიშითვე გადახედა მეგობრებს. გაოცებული მეგობრები ერთმანეთს მიჩერებოდნენ. გელამ შუშაბანდში გასვლა დააპირა, ალბათ პლატონის დამშვიდება მოინდომა, მაგრამ ოთარ სალაყაიამ წაავლო ხელი და შეაჩერა, თან თვალით ანიშნა: ხომ არ გაგიყდიო?

დათო შუშაბანდში გავიდა.

— დედა, რა მოუვიდა პლატონს?

— არაფერი... არაფერი... შენს მეგობრებს უთხარი, წავიდნენ... ბოდიში მოიხადე.

მეგობრები წავიდნენ. უფრო სწორად — გაიძურწნენ.

პლატონი ისევ ბღღვინავდა. დათო თავის ოთახში იყო და იქიდან ადევნებდა თვალს. მერმე ქუჩიდან სიცილი მოესმა და ფანჯარაში გადაიხედა. ქუჩაში სიცილით კვდებოდნენ მისი მეგობრები, იჭაჭებოდნენ.

— არა, ეს რა ჰქნა, კაცო?! — ამბობდა ნოდარი, — რა ხმები ამოუშვა.

— ეტყობა, დიდი ტემპერამენტის კაცია, — მხარი აუბა კოტემ.

ბიჭებმა სიცილ-ხარხარით წაიღეს მთელი ქუჩა. ყველაზე უკან გელა მიდიოდა, ჩია, დაღეული. გაკვირვებული თავს აქეთ-იქით ატრიალებდა. სხეულის მოძრაობით, მთელი არსებით გაუგებრობას გამოხატავდა.

დათოს გული დაუმიძმდა „პლატონს იგდებდნენ მასხარად, აბიაბრუებდნენ. არ იცნობდნენ და იმიტომ. პლატონი არ არის. მასხარად ასაგდები კაცი: ჩუმია და უწყინარი. ახალგაზრდობაში ალბათ კოტე რამიშვილს ჰგავდა, ყოველ შემთხვევაში, დათო ასეთად წარმოადგენს ხოლმე. რა დაემართა, ასე რატომ აღელდა და გაცოფდა? ნეტავი რა მოეჩვენა? ფანჯარას ზურგი შეაქცია დათომ. დედას უკვე დაემშვიდებინა

პლატონი, შუბლზე ოფლს უწმენდა ცხვირსახოცით, რაღაცას ეჩურჩულებოდა. პლატონი გაყუჩებული იჯდა და მძიმედ სუნთქავდა. დედას ისეთი სახე ჰქონდა, მგონი საყვედურობდა.

ოჯახი ისევ სიჩუმემ მოიცვა.

ამ სიჩუმის ეშინოდა ყველაზე მეტად დათოს. ახლა გაირკვეოდა, რა მოხდა. გუშანით ხვდებოდა, რომ რაღაცაში მისი მეგობრები იყვნენ დამნაშავე. მაგრამ რა შუაში არიან მეგობრები? თუ ოჯახის ღირსებას უფრთხილდები, პლატონის საქციელი უფროა სამარცხვინო, ვიდრე ის, რომ დათო სცემეს და მშენებლობა გაქურდეს.

შუა ოთახის კარიდან მირიანმა გამოიხედა. გაფითრებული იყო, მარჯვენა ლოყა უთრთოდა.

— რა მოხდა?

დათომ ხელები გაშალა — არაფერი არ ვიციო.

კარი ისევ მიიხურა.

— თავი მოგვეჭრა, საქვეყნოდ მოგვეჭრა თავი... — ეს დედაა. დათომ დღე გამოიძინა და ტკივილებიც მიყუჩდა. ახლა კი შუბლის ჰრილობასთან ძარღვი უფეთქავდა და საშინელ ტკივილს ჰგვირდა. თითქოს იარაზე ვიღაც წკიპურტს ურტყამდა. ამ უსიამოვნო შეგრძნებისაგან გული ერეოდა.

— მაშ, ნიკო, ჰა?... ეგ ლაწირაკი!.. ქურდია!.. არა, არა... ჰო... ვინა, კაცო?. ლაწირაკი!.. — ეს პლატონია.

— როგორ შეიძლება, კაცს ასეთი ცილი დასწამო?! — ეს ისევ დედაა.

დათო მიხვდა, რომ ყველაფერი მის გასაგონად იყო თქმული. ხმა არ გაუღია, თავის საწოლზე მიწვა, შუშაბანდისკენ ზურგშექცეული.

— დიდი კაცია... ჰო... არა...

შპალერზე ყვითელი ვარდები ეხატა. ვარდის ფურცელს რატომღაც რუხი ზოლები ჰქონდა მოვლებული. პაწაწკინებულა ჭიამაია მიცოცავდა. ჭიამაიაც ყვითელი იყო, რუხი წერტილებით დაწინწკლული, ვერც კი შეამჩნევდა. ალბათ ღია ფანჯრიდან შემოფრინდა.

— ეგეთები არიან ახალგაზრდები... ოღონდ ვინმე გაჰკილონ, ცილი დასწამონ... ინიღბებიან, ვითომ პატიოსნები იყვნენ. ისე კი ქვეყანას აქცევენ. ნიკოს რომ არ ვიცნობდე, და-

ვიჯრებდი, — დედამ უცებ ხმას აუწია და უშუალოდ და-  
თოს მიმართა: — შენი ძმაც იყო გადასახლებული, მაგრამ  
ქურდი და ოხერი არ ყოფილა. წინასწარ არავინ იცის, ვის  
რა შეემთხვევა.

კარის გაღებისა და მირიანის ხმა დათომ თითქმის ერთ-  
დროულად გაიგონა:

— მეც ვიცნობ ნიკო კორინთელს.

— შენ საიდანღა იცნობ? — შეეკითხა გაკვირვებული დედა.

— მაგადანში შემხვდა.

— მერმე?

დათო საწოლზე წამოჯდა.

— რა მერმე? — მირიანს კაცის ფერი აღარ ედო და სწა-  
შინლად უცახცახებდა მარჯვენა ლოყა.

— არაფერი, მხოლოდ ეგ ვთქვი, რომ შენც გადასახლე-  
ბული იყავი, — შემკრთალი ხმით თქვა დედამ.

— იმას ნუ მაღარებ, მე სხვა ვარ!

დათოს მეხსიერებაში წამით გაიელვა პირშეკრულმა, ვარ-  
დისფერმა ნაპრილობევემა. ამ რამდენიმე წლის წინათ მირი-  
ანმა პერანგი ამოიჩაჩა და შინაურებს ფერდზე დამჩნეული  
ნაიარევი აჩვენა. სულ ორი დღის დაბრუნებული იყო მაშინ.  
დათოს ეგონა, მირიანს ეს პრილობა ომში ჰქონდა მიღებუ-  
ლი. მაგრამ მირიანმა თქვა: ეს ერთადერთი პრილობაა, რომე-  
ლიც ომში არ მიმიღიაო, მერმე ვილაც ახსენა, ახლაღა მოა-  
გონდა — ვინ ახსენა იმ დღეს უფროსმა ძმამ.

— რა ვიცი, შვილო, პლატონი ამბობს, ჩემს ოჯახში ნი-  
კოს აუგად ხსენების უფლებას არავის მივცემო.

მირიანმა დათოს გადახედა და უხმოდ დატოვა ოთახი. დე-  
დაც ასე გავიდა შუშაბანდში სიტყვა არ ამოუღია.

დათოს თავი უსკდებოდა ტკივილისაგან. ტკივილი ისევ  
ქუთუთოებზე ჩამოაწვა და დაუმძიმა, გაბრუებული მირი-  
ანზე ფიქრობდა. მირიანმა შეაკრთო, მირიანმა ბევრი რამ  
იცოდა. მირიანი ბევრ რამეს მალავდა, მირიანს ბევრი რამ  
აწუხებდა, ყველაზე მეტად საკუთარი ღუმელი აწუხებდა მი-  
რიანს.

ისევ საწოლზე გადაწვა, პირი კედლისაკენ იბრუნა. ყვი-  
თელი ვარდებით იყო მოფენილი კედელი. ბევრი ვარდი იყო  
კედელზე მიყრილი, ბევრი, ძალიან ბევრი. ვარდის ფურცლე-

ბისტვის რუხი არშიები შემოველოთ. ალბათ, იმიტომ, რომ ყვავილები უფრო მკაფიოდ გამოჩენილიყო. პაწაწკინებულა ჭიამაია ისევ მიცოცავდა თავის გზით. ჭიამაიაც ყვითელი იყო, ყვითელი, რუხი წერტილებით დაწინწკლული.

დათო ცუდ გუნებაზე მივიდა გელასთან რედაქციაში. გუშინდელი ამბის შეზღვევ მისვლა ერიდებოდა, მაგრამ სხვა გზა არ ჰქონდა.

წუხელ მთელი ღამე არ სძინებია. უძილობა ჯერ იმას დააბრალა, რომ დღისით კარგად გამოიძინა. მერმე ფიქრებმა შეაწუხა. ფიქრებიც იმ ძილღვიძილივით ბურანიანი და გაურკვეველი იყო. არც მირიანს ეძინა მშვიდად; მთელი ღამე შფოთავდა, წრიალებდა, ერთმანეთთან დაუკავშირებელ სიტყვებს ისროდა. ცოტა არ იყოს, უცნაურია, მაგრამ ასე მოხდა. იმ ღამეს დათო მოკრძალებით განიმსჯვალა ძმისადმი.

კაცი, რომელიც სხეულით ხუთ ჭრილობას ატარებს, შეუძლებელია ისეთივე დარჩეს, როგორც ჭრილობებამდე იყო. ყოველ ჭრილობას თავისი პატარა ცხოვრება აქვს, თავისი წარსული და მომავალი.

მირიანი ძილში ბორგავდა. მას ხუთი ჭრილობის ტკივილი კი არ აწვალებდა, აწვალებდა ხუთი წარსული ამ ჭრილობებისა. მირიანი ერთმანეთთან დაუკავშირებელ სიტყვებს ისროდა. ეს სიტყვები დათოსთვის იყო გაუგებარი და გაურკვეველი, თორემ ისინი იმავე ცხოვრებიდან, იმავე წარსულიდან იყვნენ ამოსროლილნი.

მერმე დათომ ნაცნობი ხმები გაიგონა. ის ხმები ძალიან ჰგავდა მეგობრების მიერ ქუჩაში ატეხილ სიცილს. სწრაფად წამოხტა და ფანჯარაში გადაიხედა. ქუჩა წყნარი და უკაცრიელი იყო. ისევ შეწვა ლოგინში, საბანი წაიფარა. როგორც ჩანს, წასთვლემია და ძილში გაუგონია მეგობრების სიცილი. მერმე კიდევ კარგა ხანს იცოდვილა, იტრიალა, მოხერხებულად მაინც ვერ დაწვა.

პლატონის უეცარი აღელვებაც გაუგებარი იყო. თუ შავი ნიკო მეგობარია და პლატონი ვერ იტანს მეგობრის აუგად ხსენებას... თუმცა რად უნდა იყვნენ მეგობრები? ვთქვათ ასეა. პლატონის ამგვარი თავგანწირვა მაინც მოულოდნელია.

ვინც პლატონის წყნარსა და აულელვებელ ბუნებას. კარგად იცნობს, მის ამგვარ მოქმედებას ნამდვილად თავგანწირვად ჩათვლის და გაუკვირდება.

კორინთელი გაცილებით ახალგაზრდა უნდა იყოს პლატონზე. გარდა ამისა, ერთი სხვა კაცია, მეორე — სხვა. ნეტავი რა აკავშირებთ, რა აქვთ საერთო? იქნებ საქმე? მაგრამ მარტო საქმით ადამიანების დამეგობრება ძნელია. დედასაც სცნობია. დედაც ამბობს, წესიერი კაცი არისო. დედა რომ ცდებოდეს, არცაა გასაკვირველი, ნიკო ერთი შეხედვით პათოსანი ადამიანის შთაბეჭდილებას ტოვებს.

დათოს ფიქრი აღარ შეეძლო. წამოდგა, საწერ მაგიდაზე მაჯის საათს მისწვდა: ისრები ოთხის ნახევარს უჩვენებდნენ. ოთახში ფეხაკრეფით გაიარ-გამოიარა. მერმე ფანჯარასთან მივიდა და რაფას იდაყვებით დაეყრდნო. ფანჯრიდან სუსტად განათებული ქუჩა ჩანდა, ვიწრო და წყნარი. ნათურის ახლოს დიდი ცაცხვის ხე იდგა. ახლოდან გაშუქებული ფოთლები თითქოს თვითონვე ასხივებდნენ მწვანედ, უფრო ფოსფორისფრად. ეს ფერი, ფოსფორისა; ლეკორატიულ იერს აძლევდა ხეს.

მხარზე რაღაც თბილი და ფაფუკი შეეხო. ხატაურა კრუტუნით ენახუნებოდა დათოს. კატის თბილმა ბეწვმა აგრძნობინა, რომ ფანჯარასთან გრილოდა.

— რა გინდა?

ხატაურამ საცოდავად დაიკნავლა.

— წყალი ხომ არ გწყურია? წამო, ვნახოთ, გისხია თუ არა წყალი.

სირბილით დაედევნა ხატაურა. კონსერვის კოლოფი ცარიელი იყო. დათომ წყლით გაუვსო და იქვე დაუდგა.

— შენ ხარ, დათო? — ხმადაბლა იკითხა დედამ.

— ჰო, მე ვარ.

— რატომ არ გძინავს?

— რა ვიცი, არ მეძინება.

დედა შუშაბანდში დახვდა დათოს, სინათლე აენთო და ხალათმოხურული ელოდა. ალბათ სათქმელი პქონდა რაღაც, თორემ რატომ იდგებოდა? დაფიქრებული იატაკს დასჩერებოდა, რამდენიმეჯერ დააპირა სიტყვის თქმა, მაგრამ გაღაი-

ფიქრა. დათო მღუმარედ უმზერდა, სურდა წინასწარ გამო-  
ეცნო, რას ეტყოდა დედა.

დედამ თვალეზში შეხედა შეილს.

— როგორ დაგამახინჯეს, შეილო.

— არა უშავს, მალე გამივლის.

— რა დაგემართა?!  
— ისეთი არაფერი.

— პლატონს ეგ არ უნდა დამართოდა. რას იფიქრებენ  
შენი ამხანაგები?

— მართლა, რა მოუვიდა პლატონს?

დედა შეყოყმანდა.

— რა პლატონის მეგობარია ნიკო კორინთელი?

— არ ვიცი.

— აქი ვთქვი, ვიცნობო?

— ის პლატონის გასაგონად ვთქვი, ნიკო მე მხოლოდ ორ-  
ჯერ ვნახე.

— მაინც რა აქვთ საერთო? ვერ გამიგია.

— გამიგონე, შეილო, — დედამ თითქმის ჩურჩულით გა-  
აგრძელა საუბარი, — პლატონს ეშინია ნიკოსი...

— როგორ თუ ეშინია?!

— ნამდვილად ეგრეა... ჯერ შევამჩნიე და მერმე გამოვ-  
ტყე. მეგობრობს, ამავე დროს ეშინია.

— რა აშინებს?

— ეგ ვერ გავიგე, ამხელა კაცს ვერ ვკითხე: რისი გეში-  
ნია-მეთქი?

— აქი თვითონ ამბობდა, ჩემი მეგობარიაო, დიდი კაციაო.

— ამბობდა და, მართლაც, რომ იცოდე, მეგობარია, ბევრ  
საქმეს უკეთებს, დიდ საქმეებს.

— მაინც რა საქმეებს?

— ეშინია, ძალიან ეშინია, ნიკომ თუ როგორმე გაიგო,  
რომ ჩვენს ოჯახში მასზე ასეთი რაღაც ითქვა, — დედამ აღარ  
დაამთავრა, ღრმად ამოისუნთქა, რითაც სათქმელის აზრი და-  
ასრულა.

— რა საქმეებს უკეთებს?..

დედამ არაფერი უპასუხა.

დათომ ხელი ჩაიქნია, შუშაბანდიდან ავღებულად, ამრე-  
ზილად გახედა ღამის სიბნელეს.



— წავალ, იქნებ დამეძინოს.

— მოიცა, შვილო, შენ, რა თქმა უნდა, არ გაამხელ, რა შეგემთხვა... არსად, არავისთან არ ახსენებ ნიკოს...

— მაგაზე ვიფიქრებ დედა.

— გონიერი კაცი ისე მოიქცევა, როგორც მე დაგარიგე.

— ვნახოთ...

დილით მაინც მივიდა მშენებლობის უფროსთან. საათნახე-  
ვარი უცადა ჭერ მის მოსვლას, მერე ამდენივე — მიღებას.

მაგიდას უჭდა წითური მამაკაცი. თავი განიერ მხრებში  
ჰქონდა ჩარგული. თმა წინ გასცვენოდა და მულოტის დასა-  
მალად კეფიდან საგანგებოდ გადმოვევარცხნა. ადგილზე ვერ  
ისვენებდა, სულ შფოთავდა, ხმამალა იძლეოდა განკარგუ-  
ლებებს. უფროსის მაგიდას გვერდიდან მისჯდომოდა გამხდა-  
რი, გრძელკისერა ბერიკაცი, რომელსაც ერთთავად ტყბილი  
ლიმილი დასათამაშებდა დამკვანარ სახეზე. იგი უდიდესი მოკ-  
რძალებით უღებდა წინ ხელმოსაწერ ქაღალდებს. დათო ამ  
კაცს არ იცნობდა.

— რისთვის გარჯილხარ? — ჰკითხა მშენებლობის უფროს-  
მა დათოს. დათომ უთხრა, რისთვისაც გაისარჯა.

— რა გვარი ხარ?

— ნათიშვილი.

— ამაშია საქმე!

დათო, რაში იყო საქმე, ვერ მიხვდა.

გრძელკისერამ უცებ მოიწყინა და თავი ჩაქინდრა, ბებერ  
ინდაურს დაემსგავსა.

დათო, ვიდრე თავისას იტყოდა, დაძაბული იყო, ახლა  
დამშვიდებული ელოდა უფროსის განაჩენს.

— იმ ღამეში რისთვის მიხვედით მშენებლობაზე?

შეკითხვა იმდენად ვერაგული და მოულოდნელი იყო, რომ  
დათო აიღეწა რა ეთქვა? რისთვის მივიდა იმ ღამით მშენებ-  
ლობაზე?.. უცებ ვერაფერი მოიფიქრა და სდუმდა.

— გეკითხები, იმ ღამით რა გინდოდა იქ?!

ბებერი ინდაური გამოცოცხლდა, თვალები აუციმციმდა.

ღუმელი დიდხანს არ გაგრძელებულა. მშენებლობის უფ-  
როსი, ეტყობა, ღუმელსა და სიწყნარეს მაინცდამაინც ვერ  
ეგუებოდა.

— მარტო იყავი?

— რა მნიშვნელობა აქვს...

— გასაგებია — შეაწყვეტინა მშენებლობის უფროსმა, — შენ არ ამბობ, რატომ მიხვედი, არც ის გინდა თქვა, ვისთან ერთად იყავი.

ღათომ გადაწყვიტა, სიმართლე ეთქვა, რადგან მისი ასეთი ქცევა მართლა საეჭვოდ მოეჩვენებოდა კაცს.

— საცოლესთან ერთად ვიყავი, ბაჯონო.

— ახლა არ მითხრა, მშენებლობას ვათვალიერებდითო.

— დიახ...

— ამაშია საქმე!

ღათო ვერც ახლა მიხვდა, რაში იყო საქმე.

მშენებლობის უფროსმა ბებერ ინდაურს გადახედა. ბებერმა ინდაურმა პირზე ხელი აიფარა და ჩაიჭირქილა.

— მაშ, ერთად დაათვალიერეთ, არა? ისე რა შთაბეჭდილება დატოვა მშენებლობამ?

ღათო შეეცადა აეხსნა მშენებლობის უფროსისათვის, რატომ მივიდა საცოლესთან ერთად და მერე რა მოხდა. ლაპარაკის დროს გრძნობდა, რომ უფროსი ყურს არ უგდებდა და არც აინტერესებდა მისი ნათქვამი, ხოლო ღათო, უფროსის ყურადღება რომ მიექცია, უფრო დაწვრილებით უყვებოდა, ცდილობდა დაერწმუნებინა თავის სიმართლეში.

— გესმის, პოლიკარპე, რა ამბები ხდება ქვეყანაზე? — მიუბრუნდა მშენებლობის უფროსი ბებერ ინდაურს. — მერმე კიდევ გისაყვედურებენ, რას ერჩით ამ ახალგაზრდებს, რატომ გზას არ აძლევთო. მისცემ გზას და ყველაფერს გაგითახსირებენ. ძალიან მაინტერესებს, ვინ არის ამ კაცის საცოლე...

— რა მნიშვნელობა აქვს...

— როგორ თუ არა აქვს?!

— მე სრული სიმართლე მოგახსენეთ.

— ამაშია საქმე!

ღათო ფიქრობდა, ეხსენებინა თუ არა შავი ნიკო. შეიძლება ამ სახელის ხსენებას უფრო მეტი დამაჯერებლობა მიეცა მისი ნათქვამისათვის. მაგრამ ვინ აცალა... მშენებლობის უფროსმა დიდხანს ილაპარაკა მშენებელთა ამოცანებზე, მათ ღირსებასა და პატიოსნებაზე. ბოლოს დასძინა:

— ხედავ, პოლიკარპე, რა დღეში ვართ?.. მშენებლობა საროსკიპოდ გადაუქცევიათ. ამ საქმეს სასამართლოს გადავცემ!

მერმე როგორ მოხდა, დათოს აღარ ახსოვს... ეტყობა, ველარ გაუძლო გაუგებრობას, აბუჩად აგდებას, დაცინვას, თავი ველარ შეიკავა... ვილაცეებმა მშენებლობის უფროსის ოთახიდან გაიყვანეს და ქუჩამდე მიაცილეს.

კარგა ხანს იქვე იბორიალა, იწრიალა, უკან შებრუნება დააპირა... მერმე გადაიფიქრა და გელასთან წასვლა არჩია.

დიდ, მზით განათებულ ოთახში შეაღო კარი. გელა კარის პირდაპირ უჯდა უზარმაზარ, დაძველებულ მაგიდას. წაწვეტილებული ცხვირი თითქმის ქალაღზე ედო და გამაღებული რაღდაცას წერდა. დათო დაინახა თუ არა, წამოდგა და მიეგება. სკამი მოუტანა და ახლოს დაისვა. ოთახში ორი საწერი მაგიდა, ორი, ძველი გაზეთებით გამოტენილი წიგნების კარაღა და ერთი მუშამბაგაკრული გაძვალტყავებული ტახტი იდგა. ფანჯარასთან მღვარ მაგიდაზე ჭადრაკს თამაშობდნენ, ისე იყვნენ გართულნი, დათოს შემოსვლა არც გაუგიათ.

გელამ, ცოტა ხანი დამაცადეო, წერა განაგრძო.

ყველაფერი დაკარგული იყო. დათო მშენებლობაზე აღარ მივიდოდა, სასამართლოთიც დაემუქრნენ. ყველაფერი გათავებული იყო. რას უშველიდა ახლა გელა? მაგრამ როგორ შეიძლება ასე უსამართლოდ დაისაჯოს ადამიანი? ალბათ, გაარკვევენ, ბოლოს და ბოლოს გაირკვევა, ვინ არის მტყუანი და ვინ — მართალი... ციცინოს სახელი არ უხსენებია... ალბათ, იძულებულს გახდინან, ახსენოს. ეს უკვე ცუდია. თუმცა რა შუაშია ციცინო? ასეა თუ რამე წამოგცდა, ბოლომდე უნდა თქვა. არადა რატომ მალავ? გეშინია ციცინოს სახელი არ გაუტყდეს. მაგრამ რა შუაშია ციცინო? შენ ხომ იცი და დარწმუნებული ხარ საკუთარ სიმართლეში, არაფერს არ ნიშნავს, მთავარია, ყველას გააგებინო და ყველა დაარწმუნო, რომ მართალი ხარ. სუფთა გულითა და სინდისით განმარტოება მცირე ნუგეშია, ანუ არც არის ნუგეში.

გელა წერას განაგრძობდა. გულისგამაწვრილებლად წრიბინებდა კალამი. ალბათ მთელ ქვეყანაზე მარტო გელას შეეძლო ამ კალმით წერა. ქალაღდს დღაბნიდა, ფხაქნიდა. დათოს ცუდად აერეოლებდა. სკოლის შემდეგ არც უნახავს ასეთი კალამი.

— არაფერი არ გამოდის — გელამ კალმისტარი მიაგდო მაგიდაზე, — ესეც საქმეა? გაიგე ახლა, რომელია მართალი.

ყველას ისეთი შთაბეჭდილება დარჩა, თითქოს ცოლის ბრალი იყოს, მოსამართლეს ცოლს დებდა ბრალს. მე ვერ გავიგე, ერთ ადამიანს აღარ უნდა მეორე ადამიანთან ცხოვრება, ოთხი წელი იცხოვრეს და აღარ უნდა. ალბათ აქვს ამის მიზეზი, ისე რად მოინდომებდა გაყრას?.. ორივე წესიერი ადამიანია, ყოველ შემთხვევაში, ასე ჩანს. ერთმანეთს ვერ ეგუებებიან, უფრო სწორად, ქალი ვერ ეგუება მამაკაცს, ოჯახი ინგრევა, კარგი ოჯახი. ახლა ეძიე მიზეზი, არკვიე, გაჰკიცხე.

დათო რატომღაც დარწმუნებული იყო, გელა თეონას მუსიკის მასწავლებელზე ლაპარაკობდა.

— ჯერ ვილაც ქურდბაცაცას საქმე გაარჩია, მერე ვილაც ლოთისა, რომელსაც სიმთვრალეში თავისი ცოლი მიუსიკვდილებია, ბოლოს ამ ცნობილი ოჯახის საქმე გამოიტანა, — ცინიზმი, მაშ, რა არისი — უცებ აღშფოთდა გელა, — მოსამართლეს ვიცნობ და ვკითხავ: რატომ ჰქენი მეთქი ასე? განგებო, — მიპასუხა. ეგეთი ცინიზმი, — ვუთხარი, — ამ ოცი საუკუნის წინათაც იყო ცნობილი: ქრისტეს გვერდით ორი ავაზაკი აცვეს ჯვარს-მეთქი.

— მოგიკლავს და ეგ არისი — გაიცინა დათომ.

— მე კი ჩემი ვუთხარი და გინდა მოკვდეს, გინდა იცოცხლოს.

— ის ქალი მუსიკას ხომ არ ასწავლის?

— კი. მართლა, დედაშენსაც მოვკარი სასამართლოზე თვალი და გამიკვირდა.

— დარწმუნებული ვარ, იქნებოდა.

— მესამე დღეა ვწერ და არაფერი გამომდის.

— რასა წერს?

— წერილს, რამდენიმე გაყრას დავესწარი. მშრალი რომ არ გამომივიდეს, ცოცხალი მაგალითები მჭირდება.

— მაგალითებთან ერთად იქნებ სიმართლეს იყოს საჭირო?

— რა თქმა უნდა.

— მეც ეგრე მგონია.

— რა ქალია!.. ღმერთო, რა ქალია!..

— ვინა?

— ბუბა ეშბა, მუსიკის მასწავლებელი.

— მოეშვი მაგ ბუბას და... საერთოდ, მაგ ოჯახს.

— კარგი ოჯახი არ უნდა დაინგრეს.

- რას ჰქვია კარგი ოჯახი?
- კარგი, წესიერი, რა ვიცი, რას ჰქვია.
- თუ კარგი ოჯახი არსებობს, ცუდიც იარსებებს!
- რასაკვირველია.
- თუ კარგი და ცუდი არის, საშუალოც იქნება?
- კი.
- თუ ეგრეა, კარგზე კარგი ოჯახიც იქნება, ცუდზე ცუ-  
დიც, მერე: კარგზე ცოტათი ცუდი, ცუდზე ცოტათი კარგი,  
საშუალოზე ცოტათი ცუდი ან ცოტათი კარგი...
- მოქადრაკეები ხმაურით აიშალნენ.
- რა გუნებაზე ხარ, დათო?
- მინტერესებს ოჯახების კლასიფიკაცია.
- ნეტავი შენი მაგას ვინ გაარკვევს?!  
დათო წამოდგა, წასასვლელად მოემზადა.
- მიდიხარ?
- წავალ.
- შენ საქმეს როგორ მოვეუაროთ?
- ბოლოს და ბოლოს გაჰყარეს ბუბა ეშბა და მისი ქმა-  
რი?
- არა.
- რატომ?
- იმიტომ, რომ კარგი ოჯახი არ უნდა დაინგრეს.
- ?..
- ქალი შეარცხვინეს, ერთი სიტყვით, ნამუსზე შეაგ-  
დეს. ღმერთო, რა ქალია!
- ნახვამდის!
- მართლა, თავი როგორა გაქვს, გაწუხებებს?..
- ცოტათი.

სექტემბრის ნათელი და მზიანი დღე იყო. დათო რუსთა-  
ველის პროსპექტით ბრუნდებოდა შინ. ისეთი გრძნობა ჰქონ-  
და, თითქოს პატარა ბავშვის ქუდი ეხურა, სწორედ ის, სიზ-  
მარში ძალით რომ ჩამოაცვებს თავზე.

დათო: ალბათ მორიგეობით მოგვიწევს მე და მირიანს დილდილობით რძესა და პურზე სიარული. როდემდე შეიძლება შინ უქმად ჯდომა, არაფრის კეთება? საუზმე, სადილი, ვახშამი... საუზმე, სადილი, ვახშამი... მერე ისევ: საუზმე, სადილი... ვახშამი... ასე თენდება და ასე ღამდება. ერთხანს საუზმესა და სადილს შორის დროს ჩემ საქმეებზე სირბილში ვკლავდი. დავდიოდი და თავს ვიმართლებდი, ვამტკიცებდი, რომ მართალი ვარ. თავდაპირველად არ ვაპირებდი კორინთელის ხსენებას, ოჯახში შემაშინეს და ვერიდებოდი, მაგრამ როცა გამიჭირდა, ვახსენე, ვიფიქრე: ბოლოს და ბოლოს, ამაზე მეტი რა უნდა მიქნას-მეთქი. დარწმუნებული ვიყავი, ამ საქმეში მისი ხელი ერია და ბოლომდე რომ ჩაეძიათ, ნამდვილ დამნაშავეს მიაგნებდნენ კიდევ. კორინთელის პიროვნებით არავინ დაინტერესებულა. ციცინოთი კი დაინტერესდნენ, რამდენჯერმე დაიბარეს კიდევ გამომძიებელთან. მერიდებოდა, მრცხვენოდა ციცინოსი, ამგვარ საქმეში რომ გავხვიე. ციცინოს კი ისე თავისუფლად და ღირსეულად ეჭირა თავი, გამიკვირდა. ერთი რამ მაინც ვერ ამიხსნია: რატომ მეჩვენებოდა ხანდახან ჩემი თავი დამნაშავედ? ხომ ვიცოდი, არავითარი ბრალი არ მიმიძლოდა, პირიქით, კინალამ მომკლეს. მიუხედავად ამისა, გულში მაინც გამკენწლავდა ხოლმე, თითქოს სადაც მეც ვიყავი დამნაშავე, შეიძლება, იმის გამოც რომ მთელი ორი კვირის განმავლობაში ცდილობდნენ ამის დამტკიცებას?.. ისინი დარწმუნებულნი იყვნენ ჩემს ბოროტმოქმედებაში და სასჯელიც დამადეს: შშენებლობიდან დამითხოვეს და ზარალის ანაზღაურებაც დამაკისრეს. გელა დავტანჯე. მთელი შესაძლებლობით ცდილობდა ჩემს დაცვას. ვერაფერს გახდა, დამამტკიცებელი საბუთები არ ეყო. უმეტეს დროს ახლა შინ ვატარებ. გელა შეეპირდა, სამსახურს გიშოვო. სადაც მივედი ან, სადაც მივდიოდი, ყველგან თან მომდევდა ოთხი ტონა ცემენტი, როგორც სოფლის შარაზე მანქანას მისდევს ხოლმე მტვერი. რატომ მაინცდამაინც ოთხი ტონა და არა სამი? ან ხუთი? ვინ არწყა და აწონა? მე მხოლოდ ვთქვი: ამა და ამ კაცმა ოთხი ტონა მთხოვა-მეთქი. მერე დაიძრა, დაიძრა და აღარ გაჩერდა, ფეხდაფეხ მომდევდა, აღარ მასვენებ-

და. ყველა საქმე გაიარა, ყველა ქალაქზე აღიბეჭდა. ნაცნობები თუ უცნობები აღმაცერად მიმზერდნენ, ეკვიანი ღიმილით მაცილებდნენ ხოლმე. ასე დავრჩი განზე. ჩემს ადგილზე უკვე სხვა მუშაობს, ახლა ბებერი ინდაური აშენებს სახლს. ძველი მშენებელია, გამოცდილი, ადვილად არ მოტყუვდება, ან არ მოატყუებინებს თავს. ბებერი ინდაური, ალბათ, გუნებაში იცინის, ანდა ისე, როგორც იცის, პირზე ხელს იფარებს, დამპალი კბილები რომ არ გამოაჩინოს, და ჭირჭილებს. ხანდახან იმ ზომამდე მივდივარ, ლამის გავგიჟდე. იქნებ მართლა უნდა დამეჭვრებინა პლატონისათვის? იქნებ ასე უნდა მოვქცეულიყავი, როგორც სახლში დამარიგვს? უფრო ის მაგიჟებს, შინ ამ საქმეზე ხმას რომ არ იღებენ, ვითომ არაფერი არ მომხდარა. პლატონი ბოლო ხანებში სულ კარგ გუნებაზეა, დედაც... პლატონი იმასაც კი შემპირდა, ცემენტს მე დაგაფარვინებო. ეს ყველაფერი კარგი, მაგრამ მირიანს რა ვუყრ? ჩემმა შინ ყოფნამ ნამდვილად ააფორიაქა და ააწრიალა, ეტყობა მარტოობას შეეჩვია და მის ახლოს რომ ვტრიალებ, მოსვენება ეკარგება, ნერვიულობს. იქნებ რალაცა აქვს დასაწერი და ხელს ვუშლი? ერთი ორჯერ წაეასწარი, გამალღებული წერდა. მაშინვე მიანება წერას თავი და ქალაქებში საწერი მაგიდის უჯრაში შეტენა. ვატყობ, მეც აღარ შემოიძლია მეტის გაძლება. როდემდე უნდა ვიყო ასე დაძაბული და დაჭიმული? რაც შემოიძლია, ვერიდები, ზოგჯერ მთელი საათობით მარტოდმარტო დავეხეტები ქუჩებში. მერმე დაქანცული და დაოსებული ვბრუნდები შინ. წინათ მირიანს უფრო თავისუფლად ვექცეოდი. ერთგვარ უპირატესობასაც კი ვგრძნობდი მის მიმართ. ვმფარველობდი კიდევ. მებრალეობოდა, ფულსაც ვაძლევდი ხოლმე. ახლა ეს დამოკიდებულება ძმისადმი ჩემდაუნებურად შემეცვალა. თავისი განუწყვეტელი ღუმილითა და განმარტოებით მალიზიანებს. თუკი შეიძლება მეზობლის გოგომ წაიკითხოს მისი მოთხრობა, რატომ მე არ მაკითხებს? მე ხომ უფრო ახლობელი ვარ, ღვიძლი ძმა ვარ! უჯრას კეტავს, მიმალავს. თავისი ნაწერების წაკითხვის ღირსად არ მთვლის. ციციანომ ერთხელ მითხრა: ისე მეჩვენება, თითქოს მირიანი არ გიყვარსო... სისულელეა, მაშინაც უარყვავი და ახლაც უარყვოფ. მიუხედავად ყველაფრისა, მირიანი მიყვარს, სწორედ იმიტომ ვფიქრობ მასზე ამ-

დენს, რომ მიყვარს. ციციანომ რა იცის, ციციანო გარედან უყურებს ჩვენს დამოკიდებულებას...

ახლაც ნახეტიალევი და დაღლილი დაბრუნდა დათო. მას შემდეგ, რაც შუალამისას დაუკაკუნა ბენო ჩიჩუას, ეზოდან აღარ დადიოდა ხოლმე, მანანასთან შეხვედრას გაურბოდა.

პიჯაკი შუშაბანდში დატოვა. შეიხედა იმ ოთახში, სადაც მირიანი ეგულებოდა. ოთახი ცარიელი იყო. საწერ მაგიდაზე გაფანტული ეყარა მირიანის ხელნაწერები. მირიანი სადღაც ახლომახლო უნდა ყოფილიყო, თავის ნაწერებს ასე მაგიდაზე გაშლილს არ მიატოვებდა. დათოს ერთი სული ჰქონდა, წაეკითხა, რას წერდა მისი ძმა, მაგრამ ვერ გაბედა, უფრო იმის შეეშინდა, კითხვისას არ წაესწრო მირიანს.

არც დედა იყო შინ, არც თეონა, ყველანი სადღაც გაკრეფილიყვნენ.

დათომ აივნიდან მანანას ხმამაღალი ლაპარაკი და სიცილი გაიგონა. ჯერ ყურადღება არ მიაქცია, მაგრამ მერე სიცილი რომ განმეორდა, დაინტერესდა, აივანზე გასასვლელ კარისკენ გაეშურა. კარის ფანჯრიდან, რომელსაც თხელი, გამჭვირვლე ფარდა ჰქონდა ჩამოფარებული, ნათლად დაინახა მანანა და მირიანი. მირიანი ხის ბოძს მხრით მიყრდნობოდა, და, ეტყობოდა, რაღაც ძალიან მხიარულ ამბავს უყვებოდა მანანას. ორივენი გულიანად იცინოდნენ, მანანა — ხმამაღლა, მირიანი — დაგუბულად, თითქოს სიცილს უკანვე აბრუნებდა და ახშობდა, იცინოდა უხმოდ, მკერდს შიგნით.

დათომ ჯერ იფიქრა, რომ მანანასთან დგას ვიღაც სხვა კაცი, რომელიც ძალიან ჰგავს გარეგნობით მირიანს. დათოსთვის დაუჭერებელი, ყოველად წარმოუდგენელი იყო ასეთი მხიარული და მოლაყბე მირიანის დანახვა. მერმე ვის ელაყბებდა? მეზობლის გოგოს, ვისთანაც არც ასაკით, არც ფიქრებით, არც ცხოვრებით არაფერს აქვს საერთო. იქნებ მირიანი ყოველთვის ამგვარი იყო ოჯახს გარეთ, ანდა მაშინ, როცა თავისიანი არ ეგულებოდა ახლომახლო და დათო ვერ ამჩნევდა?

ერთხელ კიდევ იფეთქა აივანზე სიცილმა. დათოს, სამწუხაროდ, სიტყვები არ ესმოდა, მირიანი ხმადაბლა ლაპარაკობ-



და. რა იქნებოდა, ვითომ შემთხვევით, რომ გასულიყო გარეთ და მათ ლაზღანდარობას ყოველგვარი დაძაბულობის გარეშე შეერთებოდა? ვითომ ყოველთვის ასე ხდებოდა, ვითომ მეზობლების სიცილსა და ხორხოცში არაფერი იყო დათოსთვის მოულოდნელი, უცნაური. დათოს არც გამბედაობა და არც გარდასახვის ნიჭი ეყოფოდა. მირიანის დღევანდელი მოქმედება შინაგანად ისე აბნევდა, რომ აივანზე გასვლისას ვერაფრით აღიდგენდა წონასწორობას, ვერანაირად მიიღებდა იერს დამშვიდებული და უზრუნველი კაცისა, რომელიც აივანზე მხოლოდ იმიტომ გამოვიდა, რომ სხვებივით იცინოს და გული მოიოხოს კორაობითა და ლაზღანდარობით.

მირიანი უცებ დაიხარა და მხრიდან რაღაც ააცალა მანანას. მანანა გაინაბა, სახიდან მხიარული იერი ნიღბივით მოეხსნა. თავი მოაბრუნა და მოაშტერდა იმ კარს, რომლის უკან დათო იდგა. დათომ უნებურად დაიხია, ეგონა, დამინახავსო, ჭაგრამ მანანა ვერა ხედავდა და არც შეეძლო დაენახა, რადგან იქ, სადაც დათო იდგა, თითქოს ბნელოდა.

მანანას მრგვალ, ბავშვურ სახეს თითქოს ნაღველის ჩრდილმა გადაუარა. შავად მბზინავი თმა აბურღული ჰქონდა და ისედაც ბავშვურ გამომეტყველებას გულუბრყვილო იერს მატებდა.

შეიძლება იმიტომ, რომ გამჭვირვალე ფარდის იქით ხედავდა, მანანა ძალიან ლამაზი ეჩვენებოდა, არასოდეს არ ენახა იგი ასე ლამაზი... მირიანიც უხმოდ მიჩერებოდა მანანას, თვალს არ აშორებდა.

რამდენიმე წამი იდგნენ ხმის ამოუღებლად. მერმე მანანა გატრიალდა და თავისი ოთახისაკენ გაემართა, სწორედ ისე, როგორც იმ კვირა დილით. მირიანმა მზერა გააყოლა. მანანა არ მობრუნებულა, ოთახში შევიდა და კარი მოიხურა. აივანი დაცარიელდა და თითქოს არც დაცარიელდა. აივანზე დარჩა შემოდგომის დღესავით ნათელი და გამჭვირვალე სევედა, რომლის დანახვა შეუძლებელი იყო. ამ სევედამ შთანთქა მირიანიც, თითქოს ნისლად აქცია და სივრცემ შეისრუტა...

დათო სწრაფად გაიჭრა შუშაბანდში და ტახტზე წამოწვა. გარკვევით ესმოდა მირიანის ნაბიჯების ხმა. უფროსმა ძმამ შუა ოთახი გამოიარა და შუშაბანდის კართან შეჩერდა. ეტყობოდა, ტახტზე მწოლიარე დათო დაინახა. დათოს, ვითომ არ

გაუგონია მირიანის შემოსვლა, გაუნძრევლად იწვა. დარწმუნებული იყო, უფროსი ძმა რაღაცას ეტყოდა, არ შეიძლებოდა, რამე არ ეთქვა.

მირიანმა ფეხაკრეფით გაიარა შუშაბანდი. მერმე დათომ გაიგონა ქალღმერთის შრიალი და საწერი მაგიდის უჯრების ხმაური, აშკარა იყო უფროსმა ძმამ თავისი ნაწერები დამალა.

ვითომ უჯრების ხმაურმა გამოაღვიძა, დათო ტახტზე წამოჯდა და თვალები მოისრისა.

— მე მეგონა, შინ არ იყავი...

მირიანმა არაფერი უპასუხა.

— ხომ არ იცი, სად წავიდნენ ჩვენები?

— არა.

— ისადილეთ?

არც ამ შეკითხვაზე გასცა პასუხი მირიანმა.

რად დასკირდა ახლა დათოს ეს თამაში? ხმაც და კილოც როგორი ყალბი ჰქონდა?! ან რა შეეკითხა? ვითომ მირიანი იმდენად მიაშიტი და გულუბრყვილო იყო, რომ ეს სიყალბე და ნაძალადეგობა ვერ შეემჩნია? რატომ ჰგონია, თითქოს მირიანის გაცურება ადვილია? საერთოდ, რა საჭიროა ამგვარად გამოგონილი ურთიერთდამოკიდებულება?

თვითონ მირიანი იძლევა ამის მიზეზს!

შესაძლოა, დათოს სულ სხვანაირი ურთიერთობა ჰქონოდა უფროს ძმასთან, თვითონ უფროსი ძმა რომ ყოფილიყო უფრო წრფელი და გულდია. მირიანმა აიძულა და დათოც ასე იქცევა.

მირიანი ახლა ეცოდებოდა. დათოსთვის ნათელი იყო, რომ მირიანს მანანა მოსწონდა. შესაძლებელია, უყვარდა კიდევ. მაგრამ უფროსი ძმა დუმს და ამის შესახებ არაფერს ამბობს. ასეთ საკითხებში ხომ უმცროსი ძმა უფრო მეტადაა გაცნობიერებული და გაანდოს საიდუმლო, ვიდრე გვიან არ არის. მირიანი თითქოს განგებ ირჩევს ისეთ გზას, რომელსაც ბოლომდე ვერ გაივლის. განგებ ისახავს ისეთ მიზანს, რომელსაც ვერაფრით მიაღწევს. მირიანს დაკარგული აქვს ადამიანებთან და მოვლენებთან სწორი, ზუსტი დამოკიდებულების მონახვის უნარი და, რაც მთავარია, არ შეუძლია ზუსტად შეათასოს გარემო, რომელშიც თვითონ უხდება ყოფნა.

„მე კი დაზღვეული ვარ ამისაგან? იქნებ მე თვითონ მჭირს

სენი, რომელსაც სხვას ვაბრალებ? ასე რომ არ ყოფილიყო, ახლა ნაცარქექიასავით შინ არ ვიჯდებოდი. ჩემ საქმეს გავაკეთებდი... თუმცა, არა ვარ მართალი. ჩემი საქმე სხვაა, მე შემთხვევისა და გაუგებრობის მსხვერპლი შევიქენი“...

სადარბაზო შესასვლელში ზარმა დარეკა.

დათო სწრაფად წავიდა. კარი გააღო. ღია კარებში უცნობი ქალი დაინახა.

— მაპატიეთ, თეონა შინ არის?

— არ გახლავთ, ქალბატონო. მობრძანდით... ალბათ, მალე მოვა.

— არც მშობლები არიან?

— არა, არ არიან. თქვენ ვინ ბრძანდებით?

— მე თეონას მუსიკის მასწავლებელი ვარ.

ეს იყო ბუბა ეშბა.

დათო უეცრად გაწითლდა, ძლივს მოახერხა, შემოიპატიჟა ოჯახში.

— თეონა ერთი კვირაა, ჩემთან აღარ დადის...

— მობრძანდით, ჩვენები საცაა, მოვლენ.

— ხუთი წელია, ვასწავლი და არ მახსოვს, გაკვეთილი გავეცდინოს, — ბუბა მასწავლებელი შუა ოთახში შემოჰყვა დათოს.

დათომ სკამი შესთავაზა და უკვე აღარ იცოდა, რა ექნა. იწინა კიდევ, შინ რომ შემოიყვანა. ვერ მიატოვებდა, უხერხული იყო, არადა, რითი შეექცია ან გაერთო სტუმარი...

— თქვენ, ალბათ, დათო ხართ...

— დიახ!

— მე და მირიანი ერთად ვსწავლობდით სკოლაში, ერთ კლასში ვიყავით. დიდი ხანია არ მინახავს, ალბათ, ველარც ვიცნობთ ერთმანეთს.

— მირიანი შინ გახლავთ, — დათომ მირიანს გასძახა.

მირიანმა კარი შემოაღო.

— გამარჯობა, მირიან!

დათოს გაუხარდა, სკოლის ამხანაგები ერთმანეთს რომ შეხვდნენ, ახლა შეეძლო, მირიანისთვის ძველი მეგობარი მიეჩეჩებინა ხელში, მაგრამ იმედი ნაადრევი გამოდგა.

მირიანი მიესალმა სტუმარს, თუმცა... მგონი ვერ იცნო.

— რა თქმა უნდა, ვერ მცნობ, — გაელიმა მუსიკის მასწავლებელს, — მე ბუბა ვარ...

— ბუბა?

— შეგხედე თუ არა, მაშინვე გიცანი, თუმცა საკმაოდ გამოცვლილხარ.

— ?..

— რუსიკო რატიანი მაინც გეხსოვება? მე და რუსიკო ყოველთვის ერთად ვისხედით ხოლმე.

— რუსიკო რატიანი?

— საოცარია, მეშიდღე კლასამდე ერთად ვიყავით... შემდეგ კი არა, მერვემდე... --

— ალბათ სხვაში გეშლებით. --

— განა პირველ სკოლაში არ სწავლობდით?

მირიანმა დათოს გადახედა, მერმე თავი გააქნია:

— არა.

ბუბა მასწავლებელი დაიბნა.

— შეიძლება, სხვა ვინმე სწავლობდა, ჩემი მოგვარე... --

მუსიკის მასწავლებელი დაეკვდა. იქნებ არც დაეკვდა, ამ დაეკვებით მხოლოდ თავი აარიდა უსიამოვნო ლაპარაკს. თუ შეხვედრას.

— შესაძლოა, მე შევცდი... ჩვენს კლასში მართლა. იყო თქვენი მოსახელე და მოგვარე, რომელიც ძალიან გგავდათ თქვენ.

— მაპატიეთ... --

— პირიქით, მე შეგაწუხეთ... --

მირიანი გავიდა. --

„რა ღმერთი გამიწყრა, მირიანს რომ დავუძახე?!. გაგონილა ასეთი სიცრუე? რა სირცხვილია... რა სირცხვილია...“

— მე წავალ, — თქვა მუსიკის მასწავლებელმა, — იქნებ როგორმე შემატყობინოთ, რატომ არ დადის თეონა.

— მოიცადეთ, — დათო მიხვდა: ქალს გუნება შეეცვალა და არ უნდოდა დედის დაბრუნებამდე გაეშვა სახლიდან... „რას იფიქრებს ეს ქალი, რა ხალხი ყოფილანო...“ — რატომ იგვიანებენ ჩვენები? უკვე მოსულები უნდა იყვნენ.

— არა უშავს, გავიგე, ავად არ ყოფილა და ერთგვარად დაემშვიდდი, ნახვამდის... --

დათომ კარებამდე მიაცილა. დაემშვიდობა. კარის გაღება

რომ დააპირა, იგრძნო, კარი თითქოს თავისთავად იღებოდა.

დედა ცივად შეხვდა მუსიკის მასწავლებელს, თავშეკავებულად მიესალმა.

— გამარჯობათ, ქალბატონო... — ღიმილი შეაცივდა სახეზე ბუბა ეშბას, — თეონას გამო მოგაკითხეთ.

— ბოდიში უნდა მოგიხადოთ, წინასწარ რომ არ შეგატყობინეთ... — დედა ცოტა ხნით ჩაფიქრდა, — თქვენთან რომ დადიოდა, იმ საათებში თეონა უკვე ველარ ივლის... ამიტომ ვარჩიეთ... რა თქმა უნდა, თქვენთან უნდა შეგვეთანხმებინა...

— მე არ მესმის, რა არჩიეთ?

— თეონამ... ასე ვამტობინეთ, ხვალიდან სხვა მასწავლებელთან უნდა იაროს... თქვენ, ალბათ, არ გეწყინებათ.

ეტყობა, იმდენად მოულოდნელი იყო ბუბა მასწავლებლისათვის ეს ამბავი, რომ ხმა ვერ ამოიღო. ოდნავ გაფითრდა და რატომღაც დათოს შეხვდა. დათომ თვალი ვერ გაუსწორა. ბუბა ეშბა წავიდა.

დედამ მოიხადა ლურჯი შლაპა, რომელსაც მარცხენა მხარეს სირაქლემას მომწვანო-მოლურჯოდ მოეღვარე ბუმბული ჰქონდა მოვლებული და იქვე სკამზე დადო. მერე ამ ათიოდე წლის წინ შეეკერილი, მალალმხრებიანი კოსტიუმში გაიხადა, შიფონერში დაჰკიდა.

— ბავშვებო, ვისადილოთ, პლატონს საქმეები აქვს და გვიან მოვა. თეონაც დაიგვიანებს — დაბადების დღეზე წავიდა.

„მე ახლა ვეტყვი მირიანს, რომ უსინდისოდ მოიქცა, ტყუილი უთხრა ქალს და უხერხულ მდგომარეობაში ჩააყენა. დედასაც ვეტყვი, რომ არც ის იყო მართალი, როცა თეონა სხვა მასწავლებელთან გადაიყვანა, არ იყო მართალი არც მაშინ, როცა ასე ცივად მიიღო ქალი, რომელიც ხუთი წელი ასწავლიდა მის ქალიშვილს, მირიანს ვეტყვი... დედასაც... მკაცრად... ორივეს ვეტყვი... ორივეს მკაცრად ვეტყვი...“

— ხელები დაიბანეთ?

— დედა, რატომ გადაიყვანე თეონა სხვა მასწავლებელთან?

— ასე იყო საჭირო.

— ვისთვის?

— როგორ თუ ვისთვის? თეონასთვის!

— არ მესმის, რისთვის დაგჭირდა? იმიტომ, რომ ქმარს გაეყარა?

— თუნდაც მაგიტომ, — დედას ტანსაცმელი გამოეცვალა და უკვე მაგიდას შლიდა, — მოლით, ვისადილოთ.

— იქნებ აღარ შეეძლო ქმართან ცხოვრება?

ეს შეკითხვა დედამ პასუხის ღირსად არ ჩათვალა. ყოველ შემთხვევაში, უპასუხოდ დატოვა.

— კი მაგრამ, თეონა რა შუაშია?

— იმ შუაშია, რომ არც ერთს ჰქვია არა გაქვთ. შენ რა იცი?.. ცხოვრების არაფერი გესმის... თავის დროზე ჩვენთვის უნდა დაგეგდო ყური, საქმე სხვანაირად წაგივიდოდა, ჩემი ბრალია, ყველაფერს მზამზარეულს მოგართმევთ ხოლმე.

„როდემდე შეიძლება იცხოვროს კაცმა მშობლის კალთა-გადაფარებულმა? ანდა რამდენჯერ შეიძლება მოისმინოს ერთი და იგივე საყვედური?.. თუ კაცი გქვია, სხვა თუ არა, საკუთარი აზრის თქმის უფლება მაინც უნდა გქონდეს, რა თქმა უნდა, თუკი გაგაჩნია საკუთარი აზრი“.

— აბა, დასხედით, სადილი გაცივდება.

— მე არა მშია, — უთხრა დათომ, პიჯაკს დააელო ხელი და გარეთ გავარდა.

დათო სწრაფად მიდიოდა, უნდოდა, როგორმე დასწოდა გზაში ბუბა ეშბას.

დაღმართი თითქმის ჩაირბინა, რუსთაველზე გავიდა, ბუბა ეშბას ვერ დაეწია და მაშინლა მიხვდა, რომ თვითონაც არ იცოდა, რისთვის მისდევდა. ეს კი იყო, რალაც ძალა ეზიდებოდა — უცნაური, ძლიერი, ამავე დროს გაუცნობიერებელი. მერე გზაშივე სცადა, ბუბას სახე აღედგინა მეხსიერებაში, მაგრამ ვერ მოახერხა. აღარ ახსოვდა, როგორი იყო. როდესაც გონება დაძაბა, ბუბას ნაცვლად ფერები წარმოესახა: მოლურჯო-ლაქვარდისფერი და წითელი... ეს ფერები ერთმანეთში იღვრებოდა, მაგრამ არ ზავდებოდა... წითელი ფერი მაინც ცალკე რჩებოდა. მერმე სულ გაჰქრა და მიხაკის სურნელი დატოვა. წითელი ფერი სურნელი იყო, მიხაკის ნაზი სურნელი..

რუსთაველის პროსპექტზე გავლა არ შეიძლებოდა, უამრავი ხალხი ირეოდა. ახლალა გაახსენდა, რომ დღეს მთელი დღე

დაეხეტებოდა, დაღლილი დაბრუნდა შინ და გარეთ გამოსვლას არ აპირებდა.

საწერ მაგიდაზე მირიანის მოთხრობები იყო გაშლილი, თეთრი, ქათქათა ფურცლები. დათოს ერთი სული ჰქონდა წაეკითხა, მაგრამ... ფიქრმა ფურცლებს შავად მბზინავი, ჰაეროვანი და ამავე დროს მძიმე თმა გადააყარა. მთელი მაგიდა გადაფარა აბურდულმა თმამ. დათო გულაღმა გადაწვა ბურბუშელაში. და ხელის ფათურით მონახა ციცინოს ხელი. ციცინოს ხელი ცივი იყო და გათბობა დაუპირა. მირიანი კი დაიხარა და მანანას მხრიდან რაღაცა ააცალა. მანანა გაირინდა, გაყუჩდა; დათოს მაინც უნდოდა მირიანის მოთხრობები წაეკითხა, მაგრამ მაგიდაზე შავი ბურბუშელა ეყარა. მერე მოვიდა უცნობი ქალბუბა ეშბა, ყველაფერი მოლურჯო-ლავარდისფრად დაინისლა. წითელი ფერი კი მიხაკის სურნელი იყო. დათოს შესცივდა და ეს სიცივე აგრძნობინა ხატაურას თბილმა და ფაფუკმა ბეწვმა. ყვითელ ვარდებით მოჩითულ კედელზე პაწაწინა, ყვითელი ჭიამაია მიდიოდა. „ღმერთო, რა ქალია!“ „ვინა?“ „ბუბა ეშბა...“

— დათო!

დათო ვიდრე თავს მოაბრუნებდა, ჯიმშერ ქალდანის ხმა იცნო.

— სად მიდიხარ, დათო? — წამოეწია სახეგაბრწყინებულ ჯიმშერი.

— არსად. ისე, დავეხეტები. რა გიხარია?!

— არაფერი. შენი დანახვა გამიხარდა.

— მეც გამიხარდა.

— კარგია, როცა ძველ მეგობრებს უხარიათ ერთმანეთთან შეხვედრა. უფრო უკეთესია, როცა ამის გამოხატვაც შეუძლიათ. ხალხს ერთმანეთის დანახვა აღარ უნდა.

— შენ სადღა მიდიოდი?

— მეც სახეტილოდ ვარ გამოსული. ცოტა გავებრუვდი და გავივლ-გამოვივლი-მეთქი. სულელები ვართ, თავიდანვე რომ არ ვსწავლობთ ფიზიკას, ახლა ხელმეორედ მიხდება შესწავლა.

— შენ არ სწავლობდი, თორემ...

— ეგეც მართალია, სხვებს რას ვერჩიი..

— ახლა რისთვის დაგჭირდა ფიზიკა?

— ისე, ელემენტარული რაღაცეები არ ვიცი... გინდა, ნოდართან წავიდეთ? ახლა შინ იქნება.

— არ მინდა, არ წამოვალ. ამ ბოლო დროს ნოდარს პედაგოგიური მისწრაფებები გაუჩნდა, შენ კი — მოწაფური. არ შემძლია ახლა მეთე კლასის ფიზიკის მოსმენა.

— უსინდისო ვიყო, თუ ფიზიკაზე ხმა ამოვიდო.

— ნოდარს რას უზამ, პირს ხომ ვერ აუკრავ?!

— ჭირის დღესავით ეზარება ფიზიკა. მე თუ არ შევეუჩიჩხინე, თვითონ არ გაახსენდება. წამოდი, მარტოა... თუ გინდა ერთი ბოთლი კონიაკი წავიღოთ.

ნოდარ ნიჟარაძე ვაკეში ცხოვრობდა, ფალიაშვილის ქუჩაზე. მამა — ცნობილი მეატომე-ფიზიკოსი შარშანწინ გარდაიცვალა და შვილს ფიზიკისადმი სიყვარულისა და მიდრეკილების გარდა უზარმაზარი ბიბლიოთეკა დაუტოვა. ნოდარს მამის ოთახში არაფერი შეუცვლია, მხოლოდ მაგნიტოფონი შეიტანა და თაროები შეავსო ახალი წიგნებით.

— რა კონიაკი მოიჭანეთ?

ჯიმშერმა ბოთლს ქალღიმილი შემოაცალა და აჩვენა:

— ეგ შენს ძმაკაცებს დააღვეინე, ახალგაზრდა პოეტებს... მე ცოტა უკეთესი მაქვს. დაჯექი, დათო, რა ფეხზე დგახარ?! — ნოდარი ოთახიდან გავიდა, „ვარციხე“ და პატარა, ვარდისფერი ჭიქები შემოიტანა. პირდაპირ საწერ მაგიდაზე დააღვა. — აბა დაჯექით ახლა.

— დაჯექით კი არა, დასხედით, რეგვენო! — უთხრა ჯიმშერმა, — ქართული ვერ გასწავლე.

ნოდარმა დამნაშავესავით გაიღიმა.

ჯიმშერმა სავარძელი მოაჩოჩა და რბილად ჩაჯდა. დათომ სკამი არჩია, ღია ფანჯარასთან მიიტანა და დადგა.

— ხომ არ გშიათ? — იკითხა ნოდარმა.

— მე მშია, — თქვა დათომ, — ისე ვერ დავლევ.



- კატლეტს გაგიცხელებ.
- ცოცხალ კარგად გეახლება.
- რა უშავს, იყოს ცივი... ყველიც გექნებათ.
- ენახოთ.

— ახლა ყველი მომთხოვე. — დაუმატა ჭიმშერმა.

— დედა! — ყველი არა გვაქვს?! — გასძახა ნოდარმა და თვითონვე გავიდა ყველის მოსატანად.

„ჩვენს ოთახს არა აქვს ფანჯარა“. წაბლისფერთმიანი ბიჭი ფანჯარასთან იდგა და გარეთ იხედებოდა. ხანდახან მოვალ, რა ძია დათო... მე ძალიან მიყვარს ფანჯარიდან ყურება“. მეორე სართულის აივანზე ქალები ჩხუბობდნენ, პატარა ბიჭი თავქუდმოგლეჯილი გარბოდა ეზოში. „აქ მხოლოდ ბავშვის ქუდები იყიდებოდა“. — ქალის ხმა ძალიან ჰგავდა ციცინოს ხმას.

— გეყოფა კამა, — უთხრა დათოს ჭიმშერმა, — ახლა დალიე.

დათომ პატარა, ვარდისფერი კიქა დაცალა. ჭიმშერმა ისევ შეუესო და ნოდარს მიუბრუნდა:

— ჩართე შენი არღანი.

ნოდარმა მაგნიტოფონი ჩართო.

დრო ნელა და სასიამოვნოდ გადიოდა. კონიაკის ბოთლიც ნელ-ნელა იცლებოდა. შორიდან, თითქოს ძალიან შორიდან ისმოდა რიტმული და ამგზნები მუსიკის ხმები. ნოდარი და ჭიმშერი ნეტარებით აბოლებდნენ სიგარეტებს, თან მუსიკას უსმენდნენ. დათო კონიაკს წრუპავდა მერმე სიგარეტს მისწვდა, კოლოფიდან ერთი ცალი ამოიღო და მოუკიდა... სიმწრის ოფლმა დაასხა...

ლანდებს ნიჩბები ეკავათ ხელში. გაქცევა სცადა... კეფაში ყრუ ტკივილი იგრძნო, შეტორტმანდა. ბანკალით წავიდა. კედელ-კედელ აჰყვა კიბეს. „ციცინო!“ ხმას ირავინ სცემდა. „ციცინო!“

! — პირველად მეც ვგრე მომივიდა, ოღონდ მაშინ მეთუ კლასში ვიყავი, — თქვა ჭიმშერმა, — გადააგდე ეგ სიგარეტი, აქამდე არ მოგიწევია და ახლა რატომ იკლავ თავს?!

ნოდარი უკვე შემთვრალიყო. სიმთვრალეში ლექსების  
თქმა უყვარდა:

შენს ლაქვარდოვან მანდილში ჰქროდა...  
აგვისტო. თბილი, სამხრეთის ქარი

თითქმის ჩურჩულით ამბობდა ლექსს... გეგონებოდა, თა-  
ვისთვის იხსენებდა მივიწყებულ სტრიქონებს.

— ჩვენმა პოეტებმა რატომ არ იციან ზეპირად სხვა პო-  
ეტების ლექსები? — ლექსის კითხვა გაათავა თუ არა, მაშინვე  
იკითხა ნოდარმა.

— ვინ გითხრა, არ იციანო?

— რა თქმა მინდა? აბა, მითხარი ვისიმე ლექსი... და, სა-  
ერთოდ, რატომ წერ სულ ბებიანზე და მამიდაზე? ამხელა  
კაცს არა გრცხვენია, სამყურაზე და ხბოზე რომ დაგიწერია  
ლექსები?.. რატომ უჩუყებ გულს სანტიმენტალურ პროვინ-  
ციელებს?.. თქვი, ჰო, სხვა რომელიმე პოეტის ლექსი.

ჯიმშერს გულწრფელად ეცინებოდა.

დათო კონიაკს სვამდა და მუსიკას უსმენდა.

ნოდარი:

Ночь, улица, фонарь, аптека,

Бессмысленный и тусклый свет.

Живи еще хоть четверть века—

Все будет так. Исхода нет. |

— კარგია, — თქვა ჯიმშერმა.

— აბა თქვი, ვისი ლექსია... — ჩააცივდა ნოდარი, — ამ  
ფიზიკას რომ გადააკვდი, არ გირჩევნია ლექსები იკითხო?  
თუმცა ისიც გპირდება... კარგი ბიჭი ხარ, ძალიან კარგი... დავ-  
ლიოთ?

— დავლიოთი — მაშინვე დაეთანხმა ჯიმშერი.

ნოდარმა მეორე ბოთლი შემოიტანა.

— შენ თუ გინდა, ეს ბოთლი გავხსნა, მითხარი მსოფ-  
ლიო მიზიდულობის კანონი.

— ეგ ხომ საშუალო სკოლაშიც ვიცოდი.

— შენ ჯერ მერვე კლასში ხარ. თუ გსურს მეცხრეში გა-  
დაგიყვანო, თქვი ფორმულა ისე ამ ბოთლს არ გავხსნი.

„ახლა დაიწყება კატა-თავგობანას თამაში. რა თქმა უნდა,

დარწმუნებული ვიყავი, აქამდე მივიდოდნენ. ნოდარს, უბრალოდ, სიამოვნებს ჯიმშერის წვალება».

— თქვი, თორემ არ გაეხსნი.

დათოს აღარ ახსოვდა, სად დაშორდა ჯიმშერ ქალდანს. როცა ცოტათი გონს მოვიდა, აღმოჩნდა, რომ მარჯანიშვილის მოედანზე იდგა, ხეს მიყრდნობილი. როგორ გაჩნდა მარჯანიშვილის მოედანზე? სულ საწინააღმდეგო მხრით უვლია, იქნებ მანქანაში ჩაჯდა ან ავტობუსმა მოიყვანა აქამდე? დათოს არაფერი ახსოვდა... მაინც რამდენი დალიეს?!

მარჯანიშვილის ქუჩა და ვერის ხიდი ბარბაცით გაიარა. გზადაგზა ჩერდებოდა და ცხენივით ფეხზე თვლემდა. ასე ძილღვიძილღვით აიარა აღმართი. რუსთაველის მოედნის კუთხეში, წყლის დასაღვევ შადრევანთან პირზე შეისხა ცივი წყალი, კეფაც დაისველა.

მანქანა მაინც შეხვედროდა, რამხელა გზა გამოიარა...

რა უბედურებაა ლექსების კითხვა! არა, მაგათთან ჯდომა აღარ შეიძლება... მერმე რას ჩააცივდა ამ ნიუტონის ფორმულას, რა მოხდა?! ყველა თავის ქიას კლავს, ყველა თავისებურად აფრენს.

აფთიაქს ჩაუარა. შეჩერდა და თავი მოაბრუნა. გაოცდა. აფთიაქი მკრთალად და უაზროდ იყო განათებული. მეოთხედი საუკუნეა, რაც ამ აფთიაქის წინ დადის და მხოლოდ ახლა შეამჩნია, რომ ყოველთვის ასე მკრთალად და უაზროდ არის განათებული.

დათომ ხელი ჩაიქნია და თავისი გზა განაგრძო. ვითომ მართლა უაზროდ არის განათებული ეს აფთიაქი?

ყველა კუნთი მოდუნებული და მოშვეებული ჰქონდა. სიარული აღარ შეეძლო, ძლივს მიათრევდა დამძიმებულ ფეხებს.

„ახლა არ მითხრა, მანანას კარზე დაუუკაუქნებ და ცოტას წავესაუბრებო“.

დათო ქიშკარს რომ ძეუახლოვდა, ნაცნობი ხმა გაიგონა. შეჩერდა და მიაყურა. ქიშკრის გვირაბიდან ქალ-ვაჟის ლაპარაკი ისმოდა.

— კარგი, რა გამიშვი, უკვე გვიანაა. — ემუდარებოდა ვიდაცას გოგო, რომელსაც ნაცნობი ხმა ჰქონდა.

— ცოტა ხანს კიდევ დარჩი, რა? — ვაჟიც ეხვეწებოდა...

— გეუბნები, გვიან არის... სახლში მომკლავენ! — ეს, რა თქმა უნდა, ძალიან ნაცნობი ხმაა...

დათო დარწმუნდა, გვირაბის სიბნელეში თეონა იდგა. სამიოდე ნაბიჯი გადადგა და ერთმანეთს ჩაკრული ბიჭი და გოგო დაინახა. ეზოს სიღრმეში სინათლე ენთო და გარკვევით ჩანდა მათი სილუეტები. ბიჭი თეონასთან შედარებით სუსტი და ტანმორჩილი იყო და ტკიპასავით მიჰკვროდა მას. გოგო და ბიჭი უცებ ელდანაკრავებივით დაშორდნენ ერთმანეთს. ეტყობა, შეამჩნიეს, ჭიშკართან რომ ვილაცა შეჩერდა. თეონამ დათო ვერ იცნო. ისე დადგა, ვითომც აქ არაფერი იყო და საუბარი გააგრძელა.

— თეონა! — დაუძახა დათომ.

— ვაიმე, ჩემი ძმა! — წაიჩურჩულა თეონამ და გაქცევა დააპირა.

— თეონა, მოდი აქ!

თეონა ადგილიდან არ დაძრულა.

დათომ რკინის ჭიშკარს გადააბიჯა და გვირაბში შევიდა. ბიჭს მხარში მოჰკიდა ხელი და სინათლისაკენ მიაბრუნა. მკრთალ შუქზე დაინახა ჯერ კიდევ უწვევრულვაშო, გაუწყველი და დარცხვენილი სახე.

— ახლავე წადი აქედან, ჩემმა თვალებმა აქ აღარ დაგიხახოს!

ბიჭი შურდულივით გავარდა გარეთ, დათო თეონას მიუბრუნდა:

— შენ კი მოგივლი, ქალბატონო!.. ტირილი არ გიშველს! — დათომ ხელი ხელში ჩასჭიდა თეონას და ეზოსკენ წაათრია. — ვინ არის ეგ ბიჭი?! უკვე დაიწყე, არა?!

— ნუ ყვირი, მთელი ეზო ნუ შემიყარე! — ტიროდა თეონა, — შენ მთვრალი ხარ, მთვრალი!

— მაშ მთვრალი ვარ, ხომ?! ძალიან კარგი! — დათო ხელს არ უშვებდა თეონას, კიბეზე ძალით აპყავდა. — ის კარგი იყო, ვილაც ლაწირაკი რომ გეხვეოდა?!

— მოგეჩვენა!.. მთვრალი ხარ და მოგეჩვენა!

მესამე სართულზე დათომ ხმას აუწია. კარი დედამ გაუღო და შემფოთებულმა იკითხა:

— რა მოხდა?

- თვითონვე გითხრას, რაც მოხდა!
- შემოდი ახლა, სახლში შემოდით!
- მაშ, მთერალი ვარ და მეჩვენება?!
- შემოდი, რა გაუვირებს?!

— მე ცოტა ხანს გარეთ დავრჩები, ჰაერი აღარ მყოფნის. დათო გარეთ დარჩა. „დავიჭერო ამ ხმაურმა მანანა არ გააღვიძა?..“

ბენო ჩიჩუას ოთახის კარი გაიღო და პერანგის თეთრმა ამხანაგმა გამოიხედა.

- შენ ხარ, დათო?! რა ხმაური იყო?
- ისეთი არაფერი, ბატონო ბენო.
- წადი, დაწეკი, გვიანაა.
- ახლავე წავალ.

თუ ბენო ჩიჩუამ გაიგონა ხმაური, რასაკვირველია, მანაც გაიგონებდა, დაინტერესდებოდა, გარეთ რა მოხდა. ქალების ცნობისმოყვარეობა დათოს ჰკითხვით. ეგეც არ იყოს, ხომ იცის, რომ დათო აივანზე დგას. საკმარისია... ახლა მანანა დაუცდის მამის დაძინებას და მაშინვე გამოვა, თან ლოგინის სითბო გამოჰყვება... ღრმად არის დარწმუნებული, ბენო ჩიჩუა დაიძინებს... არა, ღრმად არის დარწმუნებული, მანანა გამოვა... ბენო ჩიჩუა, რა თქმა უნდა, დაიძინებს.

მეორე სართულის აივანი ოდნავ აყირავდა და მარცხნივ აიწია, მას მოჰყვა სხვა აივნები, ფანჯრები... მეორე ზემოდან დაქანდა აივნები და ახლა მარჯვნივ აყირავდა.

დათო კედელს მიეხრჩინა და თვალებზე ხელები აიფარა. ეზოში აღარ იხედება. მთელი მისი არსება დიდი მოლოდინით არის გამსჭვალული... ბენო ჩიჩუა დაიძინებს... დაიძინებს... დაიძინებს...

- რა ამბავი ატეხე წუხელ?! მთელი ეზო გაგიღვიძებია! — ეს დედაა.
- ხო, რა ამბავი ატეხე? — ეს კი — თეონა.
- ზომავზე უნდა დალიო, როგორ შეიძლება ასე დათრობა?!
- დათვრება და აღარ იცის, რას აკეთებს!
- მოიცა, თეონა. როცა მე ველაპარაკები, შენ გაჩერდი!

— ამხანაგთან შემარცხვინა.

— მარტო ამხანაგთან? მთელ ეზოს გააგებინა, დღეს დილით ყველა ჩვენი აიენისკენ იყურებოდა?

— როგორღა შევხედო იმ ბიჭს თვალეში?

— ასეთი რა მოხდა, ამხანაგს დაბადების დღიდან გამოუცილებია.

— დამაცადე, თეონა.

— ხო, რა მოხდა?

— ვითომ სძინავს?

— წესიერი ბიჭი ყოფილა, კარგი ოჯახის შვილი.

„კარგი ოჯახი... ცუდი ოჯახი... საშუალო ოჯახი... კარგზე კარგი... საშუალოზე კარგი... ცუდზე ცუდი... კარგზე ცუდი... საშუალოზე ცუდი... ცუდზე ცუდი... რამდენნაირი ოჯახი არსებობს ამქვეყნად?“

— თეონასთან ერთად სწავლობს... არა, რა მოგივიდა, მიტხარი!

— შენ არ გაგიცილებია ქალიშვილი?

— ახლა ისეთი ღროა, ათასი რალაცა წდება ქუჩებში. თუ შენი და ვინმემ მოაცილა, მადლობა უნდა უთხრა.

— მადლობელი ვარ მადლობელი ვარ მადლობელი!

— რა გაყვირებს?

„ვაითუ, მართლა მომეჩვენა? ჭიშკრის გვირაბში იქნებ მართლაც წესიერად იდგნენ სკოლის ამხანაგები და მე ცუდად შევხედე?“

დათოსთან ძია ვანო მოვიდა.

— გამარჯობა, ბიჭო! სად დამეკარგე? ამბობენ, მარშრუტი შეიცვალა და ეზოდან აღარ დაიარებაო. მართალია? იმასაც ამბობენ, ეზოში მხოლოდ ლამამობით დადისო, თანაც ხმაურითა და ერთი ამბითო. ჭყუელია თუ მართალი?

— მართალი!

— მერმე? რატომ მიღალატე, ეზოდან რატომ აღარ დადინარ?

— რა ვიცი, ძია ვანო.

— შენ რომ ჩამოივლიდი, რალაც იმედი მქონდა. ახლა მარტო ვარ. მარტო ვიბრძვი, ვა, რა ხალხია ეზოში წესრიგია, ვასუფთავებ, ვხალიჩობ. რა ჯანდაბა უნდათ? ანტისანიტარია?

ძია ვანოს განსაკუთრებით სიამოვნებდა ამ ბოლო სიტყვის წარმოთქმა, მთელი ქვეყნის ბოროტებას ამ სიტყვაში დებდა.

— კაცო, რისთვის მოვედი... ის ბავშვი ავად არის და ელჩად გამომგზავნა.

— რომელი ბავშვი?

— ზურიკო, რამდენჯერაც მივედი, სულ შენა გკითხულობს...

„და მოვიდა ერთი შვილთა მათ ანგელოზთაგანი, რომელთა აქუნდა შვილი იგი ლანკნები, და ძუყოდა ჩემ თანა და თქუა: მოვედ, და გიჩუენო შენ სასჯელი იგი მეძვისა მის ღიღისა, რომელი-იგი ზის წყალთა ზედა მრავალთა...“

— როგორა ხარ, ზურიკო?

— კარგად. — გაიღიმა ზურიკომ.

ოთახი ნაცრისფერი ტილოს ფარდით იყო გადატიხრული და ფანჯარა არ ჰქონდა. ფარდის იქიდან ისმოდა დედაბრის ბუტბუტი. ნახევრად ბნელ ოთახში საკმევლის სუნთან შეზავებული დახუთული ჰაერი იდგა. ზურიკოს ლოგინი ტახტზე იყო გაშლილი. გაფითრებული ბალიშს ზურგით მისწოლოდა. პატარა სიფრიფანა ხელები წითელ საბანზე ეწყო.

„...რომელსა თანა ისიძვეს ყოველთა მეფეთა ქუეყანისათა, და დაითვნეს მკვიდრნი, ქუეყანისანი ღვინისა მისგან სიძვისა მისისა“.

— მე მეგონა ნაწყენი იყავი ჩემზე და იმიტომ არ მოდიოდი.

— არა, ძია დათო, ავად გავხდი. გავცივდი.

— სიცხე გაქვს?

— ახლა აღარა მაქვს... მე ისე მომენატრა თქვენი ფანჯარა. იქიდან ქუჩა მოჩანს, აგურის კედლები, ერთი კედელი გამოხვრეტილია და შინგ ბელურები ცხოვრობენ.

— როცა ადგები, მოდი და მეც მაჩვენე ბელურების ბუდე.

— მაგას რა ჩვენება უნდა, გაიხედავ თუ არა, დაინახავ.

— კარგი, დღესვე ვნახავ.

ზურიკომ ბალიშს ქვემოდან ასანთის კოლოფი გამოიღო, ოდნავ გამოხსნა და დათო ჩაახედა. კოლოფში დამწყვედელი იყო ღიღი, მწვანე კალია.

— ძია დათო, კალიას დედა ჰყავს?

— რა თქმა უნდა.

— კალიას დედა ბრაზიანია?

— საშინლად, სულ ცოფებს ყრის.

ზურიკოს გაეცინა. ასანთის კოლოფი ისევ ძველ ადგილას დებაბრუნა.

„და დედაკაცსა მას ემოსა პორფირი და ძოწეული, შემკული ოქრომთა და ქვითა პატიოსნითა და მარგალიტითა და აქუნდა ხელთ მისთა ბარძიმი ოქრომსა. საძაგელებითა და არაწმიდებითა სიძვისა ქვეყნისადათა, და შუბლსა მისსა ზედა სახელი დაწერილი: საიდუმლოჲ, ბაბილონი დიდი, დედა მეძავთა და საძაგელებათა ქუეყანისათა...“

დათოს დედაბრის ბუტბუტი უწყალებდა გულს. მაგრამ მაინც კმაყოფილი იყო, ზურიკო რომ ინახულა.

„და ვიხილე დედაკაცი იგი...“

— ბებია ლოცულობს? — ჰკითხა ჩურჩულით დათომ.

— არა. ჩურჩულითვე უპასუხა ზურიკომ. — წიგნს კითხულობს. როცა დედაზე ლოცულობს, მაშინ ბებიას ხმა არ ისმის.

— დედაზე?

— ბებია ეუბნება, ცოდვები გაქვსო.

— შენ იცი, რა არის ცოდვა?

— ისა... ეცოდება და იმიტომ ლოცულობს...

— ეპა, ეცოდება...

კარი გაიღო და ოთახში პატარა კოხტა ქალი შემოვიდა, მასაც ზურიკოსავეთ დიდი ნაღვლიანი თვალები ჰქონდა. დათომ მაშინვე იცნო ზურიკოს დედა. რატომღაც არ ეგონა, თუ ასეთი ლამაზი და ახალგაზრდა იქნებოდა. დათო ფეხზე წამოდგა და მიესალმა. ნორამ ხელი გაუწოდა. ხელი თბილი და ხავერდოვანი იყო. გაღიმებისას თვალები დაუვიწროვდა, თეთრი და სწორი კბილები გამოუჩნდა.

— ჩემს ბიჭს ძალიან შეუყვარდით, სულ თქვენ გახსენებთ.

— მე მხოლოდ დღეს გავიგე, რომ ავად იყო.

— დედა, ბავშვს აქამე?

— ძალიან ცოტა ჰამა. — მოისმა ფარდის იქიდან დედაბრის ხმა.



— ზურიკო, არა გრცხვენია? როგორც გატყობ, ძალიან მოგწონს ლოგინში წოლა. — ნორა ფარდის იქით გავიდა და მაშინვე შემობრუნდა. პლაშჩი გაეხადა და ნაქსოვ მწვანე კაბაში უფრო მოხდენილი ჩანდა. დადიოდა რბილად, თავისუფლად, ოდნავ გამომწვევად. შეიძლება დათოს მოეჩვენა, რომ გამომწვევად დადიოდა, რადგან შალის ნაქსოვი კაბა უფრო მკაფიოდ აჩენდა სხეულის ნაკვეთბს.

— დათო, რატომ დგახართ ფეხზე? დაბრძანდით.

— უნდა წავიდე, ქალბატონო.

ძნელი დასაჯერებელია, რომ ეს იგივე ქალი იყო, ვინც იმ კვირა დღეს ავაზას გაშმაგებით ებრძოდა ლოლას, გასტრონომის მოლარეს.

— ნუ წახვალთ, რა, ძია დათო.

— სხვა დროს შემოგივლი, ზურიკო. ახლა მაგვიანდება.— დათოს არსად აგვიანდებოდა, მაგრამ ჩათვალა, რომ უკვე საკმარისი ხანი დაჰყო აქ და წასვლის დრო დადგა.

— ნუ შეაწუხებ, შვილო, ძია დათოს, თორემ აღარ მოვა.

დათო დაემშვიდობა ყველას და აივანზე გამოვიდა. ეზოს გადახედა, მოეჩვენა, რომ მეზობელ აივნებზე საექვოდ ბევრი ხალხი გამოსულიყო. მესამე სართულზე მანანა და თეონა გადმომდგარიყვნენ; მანანა იდაყვებით დაყრდნობოდა მოაჯირს და დათოს უმზერდა, თეონას ცალი ხელი მოეველო ხის ბოძისათვის და ისე იხედებოდა.

— სამივე მხრიდან დათოს თავს წასდგომოდნენ მეზობლები. მდუმარე მოლოდინით დასცქეროდნენ, და, როცა დათომ ყველას თვალი გაუსწორა, მეზობლებმა ისეთი სახე მიიღეს, თითქოს შემთხვევით იყვნენ აივნებზე გამოსულნი. დათომ სამიოდე ნაბიჯი გადადგა და ისევ ახედა ცნობისმოყვარე მეზობლებს. რამდენიმე ცბიერი და დამცინავი ლიმილი დაიჭირა.

— გამარჯობათ, მეზობლებო! რამდენი ხანია ასე ერთად არ მინახავხართ! როგორ გიკითხოთ, როგორ ბრძანდებით? ღრმად ვარ დარწმუნებული, შესანიშნავად ხართ, კითხვაც არ გინდათ, მაგრამ რატომ დამცქერით ასე სევდიანად, ასე მოწყენით? იქნებ ცუდად მოვიქეცი და გული გატკინეთ? სალამი, ბატონო ალექსანდრე! თქვენზე ამბობენ, თითქოს ქალბატონმა კატუშამ საყვარელთან წაგასწროთ, იმ ქალს ქალბა-

ტონ კატუშასათვის უთქვამს თურმე: რას მეჩხუბები, შე ქალო, წაიყვანე შენი ქმარი, კაცად მაინც არ ვარგაო... ასე ამბობენ... ისე კი რა ჩემი საქმეა თქვენს მამაკაცურ ღირსებაზე მსჯელობა... უჰ, ბატონო ვარლამ! ბოლო ხანებში აღარ ისმის თქვენი წუწუნი. როგორც გავიგე, თქვენი საკუთარი ცოლი სამუდამოდ წაგირთმევიათ ამხანაგ მაიორისათვის... კარგია, სიბერეში მაინც იცხოვრეთ დამშვიდებულებმა...

დათო მდუმარედ ჩამოდიოდა ხრახნილი კიბით. ეზო ნელ-ნელა დაიძრა და დატრიალდა. დატრიალდა კარუსელივით. სულ ახლოს ჩაიჭროლეს ნაცნობმა სახეებმა. კარუსელი ტრიალებს და ტრიალებს... ტრიალებენ ადამიანები... მოწყენილი და სევდიანი, ცბიერი და დამცინავი სახეები... წყვილ-წყვილად ტრიალებენ: ბატონი ალექსანდრე და ქალბატონი კატუშა, ბატონი ვარლამი და მისი ძვირფასი მეუღლე... მარტო ეგენი კი არა, ყველანი, ყველა მეზობელი... დაჰქრიან, დაჰქრიან, დაჰქრიან... დედა და პლატონიც გაიეღვებენ... მირიანიც და... მანანაც... თეონაც და, ის გაპუწყული, დარცხვენილი ბიჭიც...

ხრახნილი კიბე ჩაათავა დათომ და მარჯვნივ გაუხვია. ქუჩაში გავიდა.

გელამ, ბოლოს და ბოლოს, დაბეჭდა თავისი წერილი. წერილში ინიციალებით იყო მოხსენებული ბუბა ეშბა და მისი მეუღლე.

შესანიშნავი ოჯახი დაინგრა.

— ვისი ბრალია?

— რა თქმა უნდა, ბუბა ეშბასი.

— მაინც რა ბრალი ედება?

— კაცმა არ იცის.

დათოს უკვირდა, რატომ ხდება ხოლმე ასე?.. თითქოს რაღაც ბედისწერის გარდუვალობა არსებობს. გელა ხომ გრძნობდა? მგონი, თქვა კიდევ, თითქოს ცოლ-ქმრის ურთიერთობაში ბუბა ეშბა არ იყო დამნაშავე. მაინც დაწერა. მერმე როგორ დაწერა, თითქოს მთელი ქვეყანა დალაგებულია და ეს ერთი ქალი ამღვრევს ცხოვრებას...

ზოგჯერ შენი ფიქრის, შენი რწმენის საწინააღმდეგოდ მი-

დიხარ ხოლმე, თანაც ამას გრძნობ, არ გინდა წახვიდე და მანც მიდიხარ.

გელა მოღუშული იჯდა თავის საწერ მაგიდასთან. დათოს ეგონა, ამ წერილის გამო იყო ასეთ გუნებაზე. ეგონა ნანობდა, რომ დაბეჭდა.

გელა: დღედაღამ შავ ნიკოზე ვფიქრობდი და ვერ ვისვენებდი. მე შინდოდა დღის სინათლეზე გამომეტანა მისი საქმეები და ყველასთვის მეჩვენებინა, ვინ არის იგი და რას წარმოადგენს. გადავწყვიტე, მასთან სახლში მივსულიყავი, გამეგო; თუ ასე ფუფუნებით როგორ და საიდან ცხოვრობს. რედაქციის სახელით ოჯახში მისვლის უფლება არ მქონდა. ამიტომ ჩემი ნება-სურვილით უნდა მივსულიყავი. შევეუთანხმდი კოტე რამიშვილს და გუშინ დილას მივადექით შავი ნიკოს სახლს (კოტე რამიშვილს იმიტომ შევეუთანხმდი, რომ მას, ასე თუ ისე, სხვაზე მეტად აინტერესებს რეციდივისტების ცხოვრება და მკვროდა, წამომყვებოდა).. ეს არის ორსართულიანი ძველებური სახლი, რომელსაც ქუჩის მხარეს ცხრა ფანჯარა და ერთი სადარბაზო შესასვლელი აქვს. ზარი დავრეკეთ. ცოტა ხნის შემდეგ კარი გააღო ოცდასამი-ოცდაოთხი წლის ვაჟმა, მე და კოტეზე საკმაოდ მაღალმა, თანაც ჯანიანმა. „ვინ გნებავთ?“ „ნიკო კორინთელი“. კარი ისევ მიიხურა: კი არ მიიხურა, დაიკეტა მე ვღელავდი. ვატყობდი არც კოტე ღელავდა ჩემზე ნაკლებად. უხმოდ ველოდით, როდის გაიღებოდა ხელმეორედ სადარბაზო შესასვლელი. ბოლოს და ბოლოს, გაიღო და მე დავინახე შავგვრემანი მაღალ-მაღალი და მეტად ლამაზი მამაკაცი. ამ მამაკაცის ზურგსუკან ორი ვაჟი შევნიშნე: ერთი ის იყო, რომელიც პირველად შემოგვეგება, მეორე — სხვა, უცხო, ოღონდ პირველ ვაჟივით მოსული და ჯანიანი. „რა გნებავთ?“ „ჩვენ რედაქციიდან ვართ და თქვენთან გვინდა საუბარი“. „გისმენთ“. „აქ უხერხულია საუბარი, ავიდეთ თქვენთან“. „მე სიამოვნებით მოგისმენთ აქაც“. „ჩემთან რომ მოსულიყავით, ასე კარებში არ დაგიწყებდით ლაპარაკს, შინ შეგიაპატიებდით“. „მითხარით, რა გნებავთ?“ „ავიდეთ და გეტყვით, არ დაგიმალავთ“. „მაგაში ეჭვი არ მეპარება. მიუხედავად ამისა, თქვენ ვერ ამოხვალთ ზევით“. „რატომ?“ „თქვით თუ რამე გნებავთ, მე ბევრი დრო არა მაქვს“. „ხომ არ გეშინიათ ჩვენი?“ „ძალიან“. „ნუ გე-

შინიათ, ჩვენ მხოლოდ წყნარად ვისაუბრებთ“. „ფლირტი ბავშვობის შემდეგ არ მითამაშია, რა სასიამოვნო ყოფილა!“ როდესაც შევატყვე, რომ სახლში ჩვენ შეშვებას არ აპირებდა, ძალით მოვიწოდებ შესვლა. ვაჟები, რომლებიც შავი ნიკოს უკან სიბნელეში იდგნენ, დაჭიმულები გამოეშურნენ ჩემკენ. აქ კოტემ მიმტყუნა, განზე გადგა. მარტო რას გავხდებოდი სამ ვაჟკაცთან. უკან დავიხიე. „თუ დამნაშავე არა ხართ, რისი გეშინიათ, ახლავე შეგვიშვით. იცოდეთ, უარესი იქნება! ახლავე შეგვიშვი!“ იცი, რა გითხრა, არ უნდა ავღელვებულოყავი და არ უნდა მეყვირა... ჩემი აზრით, ძალიან შევაშინე... გაზვით რომ ვუხსენე, გაფითრდა, მაგრამ რა გამოვიდა? კარი მოგვიხურეს. გარეთ დაგვტოვეს პირში ჩალაგამოვლებულები. რაღა უნდა გვექნა, წამოვედით... დამაცადონ, მაგ საქმეს ეგრე არ დავტოვებ.

— კი მაგრამ, რისთვის მიხვედით სახლში? — შეეკითხა დათო.

— ერთი შევეშვით და მერმე გაჩვენებლი, რისთვის მივედი.

— მაინც?

— საგაზეთო წერილში უბრალოდ აღვწერდი მის ბინას და ბოლოს დავსვამდი კითხვას: ვინ არის ეს კაცი და საიდან აქვს ამდენი ქონება.

— ჯერ ერთი, რა შენი საქმეა, ვის რა ქონება აქვს? მეორეც...

— როგორ თუ რა ჩემი საქმეა?

— ერთი სიტყვით, მიხვედით და თავი შეიკავებინეთ.

— მაგ საქმეს ეგრე არ დავტოვებ,

— გირჩევნია, თავი დაანებო...

— მე შენსაგეთ მშინაშარა არა ვარ.

— ეტყობა, მაგარი წელი აქვს, ვიდაცა მფარველობს.

— მართალია, იმიტომ არის ასე გათავებდებულნი.

კოტე რამიშვილი: კაცო, გადამეკიდა გელა, გინდა თუ არა, შავ ნიკოსთან მივიდეთო. ვუთხარი, ეგრე არაფერი

გამოვა-მეთქი. არ დამიჯერა. ამიტყდა: წამოდი და წამოდიო მეც, რას ვიზამდი, წავყევი. თანაც მაინტერესებდა კორინთელის ნახვა და გაცნობა. ნიკოს სახლს რომ მივუახლოვდით, გელამ ფერი დაკარგა, ცახცახმა აიტანა. თუ ასე ეშინოდა, რაღას მიეთრეოდა. მითხრა, მიდი და შენ დარეკე ზარიო. მე რატომ უნდა დავრეკო-მეთქი, ვუთხარი. კარგა ხანს ვიბრძოლეთ, ბოლოს, როგორც იქნა, ვაბედა და ზარს თითი დააჭირა. ვილაც ახმახი გამოვიდა და გვეითხა: რა გინდათო. ჩვენ მოვახსენეთ, ვინც გვინდოდა. შემდეგ თვითონ კორინთელი გამოვიდა მაღალი, ხმელ-ხმელი, შავგვერემანი. თუმცა, შენ ხომ გყავს ნანახი... სწორედ ასეთი მყავდა წარმოდგენილი... რა გნებავთო, იკითხა. გელამ აუხსნა მოსვლის მიზეზი, თქვენთან საუბარი გვინდაო. რომელი კომუნისტური შრომის ბრიგადის წევრი მნახე, ინტერვიუს რომ მთხოვო. გელა დაიბნა და აღულლულდა, დიდხანს უმტკიცებდა, ქართული თავაზიანობა და სტუმართმოყვარეობა მოითხოვს, შინ შეგვიპატიჟოთო. ნიკომ ბევრი იცინა და უთხრა: ბავშვობის შემდეგ არ მითამაშია ფლირტი და სასიამოვნო თამაში ყოფილაო. გელამ აღარ იცოდა, როგორ მოქცეულიყო, სულ წავიდა ხელიდან. ნიკო დამცინავი ღიმილით დასცქეროდა გელას ტანჯვასა და წვალებას: ბოლოს თქვა: მე საბავშვო ჟურნალ-გაზეთებს არ ვკითხულობო, და კარი ცხვირწინ მიუხურა. გელა დატუქსული და ყურაწეული ბავშვივით იღგა სადარბაზო კართან, თითქოს ესეს არის გარეთ გამოაგდესო. ჩემკენ არც იხედებოდა. მე სიცილი ამიტყდა. გელა, იმას რომ ვეღარ მოერიო, ჩემზე გაბრაზდა. ყველაფერი მე დამაბრალა. ასე გამოვებრუნდით უკან საზიზღრად გაბითურებულები. დავრწმუნდით, კორინთელი მაგარი კაცია, მაგასთან ბრძოლა არც ისეთი ადვილია, როგორც გელას ჰგონია. თავაზიანი ღიმილის უკან წარმოდგენლად ვერაგული მზერა იმალება. მართალი გითხრა, შემეშინდა, მიუხედავად იმისა, რომ ბევრი რამე მქონდა გაგებული და ერთგვარად შემზადებულიც ვიყავი მასთან შესახვედრად. მაინც შემეშინდა. საშიში კაცია. ყველაფერს იკისრებს.

— მართალია, საშიში კაცია, — თქვა დათომ.

— გელას დააჯერებ რამეს?

— მოეშვას ახლა. მაგისტვის არსებობს სპეციალური დაწესებულებები და ისინი მოუვლიან.

— მეც ეგ ვუთხარი.

— მერე რაო?

— თითქოს დამიჯერა, — უპასუხა კოტემ.

დათო მთელ დღეებს გარეთ ხეტიალში ატარებდა. ზურიკოსთან მისვლის შემდეგ პირისპირ არ შეხვედრია დედას. ერიდებოდა. გუმანით გრძნობდა რა ამბავი დაატყდებოდა თავს და გაუბრუნდა. თონამაც რამდენჯერმე გადაჰკრა გესლიანი სიტყვა ქალბატონ ნორაზე, ვითომ ბავშვი იმიტომ შემოიჩვიე, რომ დედამისს დაახლოებოდიო. მანანაც, ალბათ, ამ აზრისაა. რითი შეიძლება მათი გადარწმუნება? თუმცა რატომ უნდა გადაარწმუნოს?! ვისაც რა უნდა, ის იფიქროს... მაგრამ დათო არ ეკუთვნოდა რიცხვს იმ ადამიანებისა, რომლებიც სხვათა აზრს მნიშვნელობას არ ანიჭებენ. ბავშვობიდანვე შეაჩვიეს და ჩაუნერგეს: ყოველთვის ისე უნდა მოიქცე, რომ სხვებმა შენზე მხოლოდ კარგი თქვანო. ამიტომ ყოველთვის ისე იქცეოდა, რომ სხვები დათოზე მხოლოდ კარგს ამბობდნენ. საკუთარი თავმოყვარეობის საამებლად ზოგჯერ განგებ იმსახურებდა სხვათა ყურადღებას. მაგრამ ყოველთვის ვერ ახერხებს კაცი ასე მოქცევას, მით უმეტეს, როცა უკვე დიდია და ავზეც და კარგზეც საკუთარი აზრი გააჩნია. დათოს მერმე ხშირად უთქვამს, რა მნიშვნელობა აქვს. სხვა რას იტყვის შენზეო, მაგრამ მაინც მტკივნეულად განიცდიდა სხვების შეხედულებასა თუ აზრს.

დათოს ეგონა, რომ დაახლოებით იცოდა, მასზე რას ფიქრობდნენ. რა თქმა უნდა, შეფასებაში ცდებოდნენ, მაგრამ ოდესმე ხომ უნდა დაუმტკიცოს იმათ თავისი სიმართლე. ნუთუ ასე ძნელია საკუთარი სიმართლის დამტკიცება?!  
დათო გრძნობდა, მის თავისუფლად მოქმედებას ვიღაცები ბოჭავდნენ. ეს გარემოება მით უფრო აწუხებდა, რომ დარწმუნებული იყო, ცუდს არაფერს აკეთებდა, პირიქით, შეეძლო სხვებისთვის ბევრი რამ სასარგებლო გაეკეთებინა, მაგრამ ზოგიერთი მის მოქმედებას ეჭვით უმზერდა და სწორედ ეს ეჭვი ბოჭავდა და ბორკავდა დათოს.

მხდალი და მშიშარა არასოდეს ყრფილა, მაგრამ როდეს-

საც დაექვდნენ მის სიწმინდესა და სიმართლეში, არათუ დაექვდნენ, დაადანაშაულეს კიდევ, დათომ გამბედაობა დაპყარვა, ეშინოდა, კიდევ არ დაექვებულიყვნენ მის პატიოსნებაში, კიდევ ახალი ჩრდილი არ მიეყენებინათ მისი სახელისათვის.

ქუჩის გადასასვლელთან შეჩერდა. რამდენიმე მანქანა გაატარა და ქუჩაზე გადასვლა დააპირა, მაგრამ ერთ მანქანაში უცებ თვალი მოჰკრა ზურიკოს დედას.

მანქანაც თითქოს ნაცნობი იყო, სადღაც ენახა ეს მანქანა. ის მამაკაციც ეცნო, რომელიც საჭეს მართავდა და რომელსაც გვერდით ნორა უჯდა. არ დაიჯერა. შეუძლებელია, ნორა შავი ნიკოს გვერდით მჯდარიყო. რამდენადაც ახსოვს, მაშინ მანქანას ნიკო არ მართავდა. თუმცა ამას რა მნიშვნელობა აქვს?!

თავისუფალმა ტაქსმა გამოიარა. შეიძლება ამანაც აფიქრებინა, უკან დადევნებოდა კორინთელის მანქანას.

დათომ ტაქსი გააჩერა და ჩაჯდა. შოფერს უთხრა, საით უნდა წასულიყო, თანაც შეეხვეწა, ცოტა აჩქარებულიყო.

ტაქსი დაიძრა.

ოთხ-ხუთ მანქანას გადაუსწრო. წინ ვეებერთელა ავტობუსი აეფარა. საჭირო იყო ავტობუსისთვისაც გაესწროთ.

დათო ავტობოლის ქინმა შეიპყრო. ტაქსის შოფერს აჩქარებდა და ბავშვივით უხაროდა, როცა რომელიმე მანქანას გაუსწრებდნენ. ახლა ეს ავტობუსი გაიხირა და ტაქსის სწრაფად სვლის საშუალებას არ აძლევდა.

ტაქსიმ, როგორც იყო, გვერდი აუარა ავტობუსსაც და წინ გაიქრა. კიდევ გაუსწრეს ერთ მანქანას, მეორეს, მესამეს...

დათო მანქანის კუთხეში მიიყუთა. წუთიც და გამოჩნდებოდა ვინ იჯდა წინა მანქანაში...

მანქანა მანქანას გაუსწორდა. უკვე აღარ ინტერესებდა ვისთან იჯდა ზურიკოს დედა.

დათომ ტაქსი გააჩერებინა შოფერს. ფული გადაუხადა და გადმოვიდა.

აქ თავდებოდა ქალაქი და იწყებოდა საქართველოს სამხედრო გზა.

წინ ჩაუქროლა კორინთელის მანქანამ.

მანქანა ქალაქგარეთ გაიქრა.

დათო სულ მთლად დაიბნა. ერთმანეთს ვერაფრით უკავშირებდა იმ ადამიანებს, რომლებმაც ახლა მანქანით ჩაუქროლეს. ვთქვათ, პლატონსა და კორინთელს რაღაც საერთო საქმე ჰქონდათ... „ბევრ საქმეს უკეთებს... დიდ საქმეებს“. ნორა? არაფრით არ უნდოდა ნორა კორინთელთან დაეკავშირებინა, ჯერ ერთი, ზურიკოს დედა იყო და, მისდაუნებურად, უფრთხილდებოდა ამ ქალის სახელს. უფრო სწორად, არ უნდოდა, ზურიკოს დედას შავ ნიკოსთან რაიმე ურთიერთობა ჰქონოდა. მეორე: თუ ნორას კორინთელს დაუკავშირებდა, მაშინ პლატონი თავისთავად უკავშირდებოდა მანქანაში მჯდარ უცხო ქალს. ამის დაჯერება კი დათოსთვის ყოველად წარმოუდგენელი იყო. ნორა და ნიკო მაინც ახალგაზრდები არიან. ის უცხო ქალიც პლატონთან შედარებით ძალიან ახალგაზრდა ჩანდა. ნუთუ პლატონი, ეს ბუნჩულა და ღრუტუნა კაცი, სამოცდაორი წლისა..., „პლატონი ამბობს, მაგის განმეორება არ ღირსო...“ „პლატონს დაუჯერეთ, გამოცდილი დე კვიანი კაცია...“

პლატონი... პლატონი... პლატონი..

„რა უნდა ვუყოთ მაგ ბავშვს?“

„მე აქ მოსვლის ნება მივეცი და ველარ დაეუშლი...“

— პო... იაროს...“

— პო... იაროს...“

— პო... იაროს...“

ცოცხლა აუჯანყდა მაშინ ზურიკოს, პლატონის გარდა. ეტყობა ნორას იცნობდა, რომ არ სცნობოდა, ხმავე არ ამოვლდებდა, მისთვის სულ ერთი იქნებოდა, პატარა ბიჭი მოვიდოდა თუ არა ფანჯარაში გადასახედად...

— არ ვიცი, შვილო, ამ ბოლო დროს რა გემართება.

— არც მე ვიცი, დედა.

— რას მივაწერო შენი ასეთი საქციელი?

— ზურიკოს სიყვარულს. — მეორე ოთახში ხმამაღლა თქვა თეონამ.

— მაინც რამ მიგიყვანა იმ ქალთან.

— რამდენჯერ უნდა გითხრა, დედა, ზურიკოს სანახავად ვიყავი.

— ზურიკო მოენატრა ბიჭს.

— შენ გაჩუმდი, თეონა! ჩაიცივი, თორემ დაგვაგვიანდება.



— რა დაგვაგვიანებს, კონსერვატორიაში ერთ წუთში მივალთ.

— შეილო, მეზობლებს მეტი კი არ უნდათ, უკვე სალაპარაკო გაუჩნდათ, ერთმანეთთან დადიან, გვეკორავენ, დაგვიცინიან. კიდევ კარგი, არაფერი გაუგია პლატონს... თეონა, ჩაიცივი...

დათოს ახლა გაახსენდა, რომ ნორა მანქანაში პლატონისკენ იყო მიბრუნებული და რალაცაზე გაცხარებით ელაპარაკებოდა.

— ეს ოჯახი, შეილო, რასაკვირველია, თქვენიც არის, მაგრამ პლატონი მაინც ოჯახის უფროსია. პატივი უნდა სცეთ მის სახელს. პატიოსნებას, ღირსებას... პლატონი სხვანაირი კაცია... თეონა, დაგვაგვიანდება.

დღეს რიხტერის კონცერტი იყო. დათომ, კონსერვატორიის წინ რომ ამოიარა, აფიშა წაიკითხა. კარგი იქნებოდა დღეს რიხტერი მოესმინა... ნეტავი ისიც წაეკითხა, რას უკრავს, თუმცა, სულ ერთია, მაინც ვერ წავა.

— ჩაუფიქრდი, შეილო, შენს საქციელს... თეონა

დათო წინდაწინვე შეეჩვია აზრს, რომ ზურვიკოსთან მისვლისთვის შინ გაჰკიცხავდნენ. დედის ნალაპარაკევი გულთან არ მიუტანია, წესიერად არც კი უგდებდა ყურს. მით უმეტეს, რომ დედა უფრო რბილად ელაპარაკებოდა, ვიდრე მოელოდა.

დედა და თეონა, ბოლოს და ბოლოს, წავიდნენ.

დათომ იცოდა, პლატონი სადაც იყო: მეგობრები ქალაქგარეთ ქეიფობდნენ ქალებთან ერთად... მაგრამ სად არის მირიანი? მაგიდაზე ისევ მისი ნაწერი ქალღმერთი გაშლილი. შეიძლება აივანზეა გასული და მანანას ელაპარაკება?

აივანზე მხოლოდ მანანა იდგა. ხის ბოძზე დაეკიდა მამის კოსტიუმში და ჯაგრისით წმენდდა. დათო მაშინვე გამობრუნდა. მანანას დანახვა ბოლო დროს ცუდ გუნებაზე აყენებდა. აგონდებოდა ის სულელური ღამეები, მანანას გამოსვლას თითქმის განთიადამდე რომ უცდიდა. რა უაზრობა იყო ის ლოდინი. რისთვის ელოდა, ანდა რად სჭირდებოდა იმ შუა ღამით მანანასთან საუბარი?!

მაინც, საინტერესოა, რატომ არ გამოდიოდა მანანა? ვითომ მამის ეშინოდა? ვთქვათ, მამის ეშინოდა, ანდა მამამ არ დაიძინა და გამოსვლა ვერ მოახერხა. მერმე რატომ აღარ ცდი-

ლობდა დათოსთან შეხვედრას? ვითომ იმ საღამოს არაფერი მომხდარა? თვითონ აგრძნობინა, თორემ დათო ვერც გაბედავდა... გაბედვა იქით იყოს, ვერც იფიქრებდა ასეთ რამეს. იქნებ ნაწყენია? მერმე რა, რომ მანანამ უთხრა — წადიო. იქნებ მანანასთვის არ უნდა დაეჭვებინა? ადამიანი ხშირად ერთს ამბობს და მეორეს ფიქრობს. მაინც რა ცივად წამოვიდა... სხვა რა უნდა ექნა საბრალო გოგოს? არა, კარგად მოიქცა, ურთიერთობა რომ არ გაართულა... ერთი საბრალო გოგოა, თავის გზას მონახავს, ვისმე შეიყვარებს და ბედნიერი იქნება. ასეთი რამ ვის არ შემთხვევია. დრო გავა და ყველაფერი დავიწყებას მიეცემა.

დათო მაინც გაბრუნდა აივანზე გასასვლელი კარისკენ. აივანს გახედა: მანანა ოთახში შესულიყო და მამის კოსტიუმიც შეეტანა. დათოს რალაცნაირად მაინც დაწყდა გული, მანანა რომ აღარ დახვდა აივანზე.

საწერ მაგიდასთან მივიდა. ზემოდან დახედა ფურცელს, რომელზეც ნაცნობი გაკრული ხელით იყო დაწერილი:

„მე ვარ ის გისაც მამა არ ჰყოლია... მე მოწყვეტილი ვარ საკუთარ ფესვებს და მეჩვენება, თითქოს დავკარგე ის, რაც ჩემში, ჩემთვის იყო ყველაზე უფრო არსებითი“.

ეს ადგილი წიგნიდან ამოწერილ ფრაზას ჰგავდა.

„მე არა მაქვს წარსული: უარეყავი უფრო სწორად — იძულებული გავხდი, უარმეყო“.

ცოტა უფრო ქვემოთ ეწერა:

„მძიმე ტვირთივით მოვიშორე მოგონებები... აღარა მყავს ძველი ნაცნობები, ამხანაგები, მეგობრები... თუ ხანდახან ჩემს მენსიერებაში რაიმე მოგონება მაინც ამოტივტივდა, ზუტანელ ტკივილებს მაყენებს და ვცდილობ, მაშინვე მოვიშორო, სამუდამოდ დავკარგო“.

შემდეგ ხუთიოდე სტრიქონი წაშლილი იყო.

„ყველა თხილისგულივით თავის პატარა და უბადრუკ ნაქუჭში ცხოვრობს და ნაქუჭს თხილისგულივით მხოლოდ იმიტომ ტოვებს, რომ გაქრეს...“

დათო საწერ მაგიდას მოშორდა და შუშაბანდში გავიდა.

აქვარიუმში დასრიალებდა გრძელფარფლებიანი ოქროს თევზი. დათო დაინახა თუ არა, წყლის ზედაპირზე ამოცურდა. განუწყვეტლივ ამოძრავებდა პირსა და ლაყუჩებს, ზოგჯერ

უასროდ მიაჩერდებოდა დათოს. დათომ თუნუქის კოლოფი გახსნა და ოქროს თევზს პაწაწინა კოვზით ჩაუყარა საკმელი.

ნეტავი ახლა რა დროა? იქნებ ამ სახლში ჯდომას სჯობია, ციციწო ნახოს?

ციციწო! თითქოს დღეს აღმოაჩინა, რომ ქვეყანაზე ციციწო არსებობდა.

რატომ აქამდე არ გაახსენდა? არა, ციციწო კი ახსენდებოდა, მაგრამ მასთან შეხვედრის სურვილი არ დაბადებია. ესეც უცნაურია. რატომ აქამდე არ ებადებოდა ასეთი სურვილი?

მას შემდეგ, რაც მშენებლობაზე შეემთხვა, იმგვარი გრძობა ჰქონდა, თითქოს ციციწო სხვა ქალაქში ცხოვრობდა, შორს, სადღაც, მივიწყებულ, პატარა ქალაქში. და ერთხელაც არ მონდომებია ჩასულიყო და მოენახულებია.

ათის თხუთმეტი წუთი იყო. ფანჯრის მინებს უკვე ღამე მოსწოლოდა.

დათომ პლაშჩი ჩაიცვა და ქუჩაში გავიდა. შეეძლო ტელეფონით დაერეკა, მაგრამ მისვლა ამჯობინა. დარწმუნებული იყო, ციციწო შინ დახვდებოდა.

ავტობუსის გაჩერებასთან სკოლის ამხანაგი ავთანდილ ხარაბაძე შეხვდა. ავთანდილმა მაშინვე გაუბა საუბარი, მაგრამ დათო ყურს არ უგდებდა. მოუთმენლად ელოდა ავტობუსს, რომ ვაკეში გაჰყოლოდა.

— ხარაბაძე დათოს სულაც არ აყოვნებდა, რაზეც არ უნდა ეხაუბრა, ან ვისთანაც არ უნდა ესაუბრა, მხოლოდ ერთ რამეს არკვევდა, ჰქონდა თუ არა მოსაუბრეს ჯიბეში ფული, რომ ასი გრამი არაყი ან იაფფასიანი კონიაკი გადაეკრა. თუ გამოარკვევდა, ფული არა აქვსო, მოსაუბრისადმი ჰკარგავდა ყოველგვარ ინტერესს და საშინლად მოწყენილი იმწამსვე შორდებოდა, ნახევრად მოყოლილ ამბავს არც კი დაამთავრებდა.

— ჰო, რას ვყვებოდით?.. თუმცა, მანამდე, ხომ არ გადაგვეკრა ას-ასი?

— სიამოვნებით, მაგრამ ფული არა მაქვს.

— მართლა, აბა, მე წავედი... მგონი, შენი ავტობუსიც მოდის.

ავტობუსიდან რესთაველის მოედანზე ჩამოხტა და ფეხით

გამოჰყვა პროსპექტს. რატომღაც იფიქრა, ციციხო რიხტერის კონცერტზე იქნება წასულიო. საერთოდ, ასე იციან თბილისელებმა. თუ ვინმე ცნობილი ხელოვანი ჩამოვიდა, ყველა თავს ვალდებულად თვლის, დაესწროს მის გამოსვლებს, სულ ერთია, ესმის თუ არ ესმის, აინტერესებს თუ არ აინტერესებს. მთავარია, კონცერტს დაესწროს, რომ მეორე დღეს სალაპარაკო ჰქონდეს. ეს არც არის გასაკვირი, ალბათ ყველა ქალაქში ასე ხდება. გასაკვირი ის არის, როგორ იტევს ამდენ ხალხს პატარა საკონცერტო დარბაზები.

რუსთაველის პროსპექტზე მიმავალს ისევ შეხვდა ავთანდილ ხარაბაძე. ხარაბაძემ მაშინვე რალაცის მოყოლა დააპირა, მაგრამ ეტყობა გაახსენდა, რომ დათოსთან დღევანდელი ურთიერთობა უკვე გარკვეული ჰქონდა და მორცხვი ღიმილით გამოორდა.

დათო დაიმედებული იყო, ციციხო კონცერტს ესწრებოდა და იქიდან გამოსულს უთუოდ შეხვდებოდა. ამიტომ არ ჩქარობდა. წიგნების მალაზიის ვიტრინასთან თითქმის ნახევარი საათი შეჩერდა. ყოველი წიგნის სათაური გულდასმით წაიკითხა, სხვა წიგნებს შორის თავისი მეგობრის — ჯიმშერ ქალდანის ამ ერთი წლის გამოცემული ლექსების პაწაწინა კრებულს წააწყდა: „პირველი სიმღერა“. მწვანე მთების ფონზე სვანური კოშკები იყო აღმართული. კოშკებს თავზე ღრუბლები ეხვეოდა. ეს მთები, ღრუბლები და სვანური კოშკები პოეტის გვარის მიხედვით ეხატა წიგნის ყდაზე. თვითონ ქალდანი თბილისშია დაბადებული და, მგონი, ერთხელაც არ ყოფილა სვანეთში. ლექსებს მაინც სულ სოფელში გატარებულ ბავშვობაზე წერდა, სოფელი, როგორც მისივე ბავშვობა, ამ წიგნში აბსტრაქცია იყო, არ გულისხმობდა რომელიმე გარკვეულ კუთხეს. არც შეიძლებოდა ეგულისხმა, რადგან სოფლები ჯიმშერ ქალდანს მხოლოდ მატარებლიდან ჰქონდა და ნახული.

რუსთაველზე უკვე გამოჩნდა კონსერვატორიის საკონცერტო დარბაზიდან გამოსული ხალხის პირველი ნაკადი. დათოს გზაც იქით ჰქონდა და ხალხისკენ გაეშურა. ნელ-ნელა მიდიოდა. არც ერთი შემხვედრი მხედველობიდან არ გამოჩენია, ერთი ორჯერ ციციხო თითქოს დაინახა კიდევ, მაგრამ, როცა მიუახლოვდა, სხვა აღმოჩნდა.

„ლალიძის წყლების“ კუთხეში შეჩერდა და ახედა კონსერვატორიის შენობას. შესასვლელის წინ უამრავი ხალხი ირეოდა. ესენი თაყვანისმცემლები იყვნენ და რიხტერის გარეთ გამოსვლას ელოდებოდნენ, დიდი მუსიკოსი, რაც შეიძლება, ახლოდან რომ დაენახათ და სახელი კმაყოფილების ღიმილი შეეფრქვიათ.

ხალხს გამოეყო და ქუჩა გადმოსკრა ნაცნობმა სილუეტმა. დღის ნათურები პატარა ქუჩას იმდენად სუსტად ანათებდნენ, რომ დათომ კარგად ვერ დაინახა, ნამდვილად ბუბა ეშბა იყო, თუ სხვა... სწრაფად გატრიალდა და „ლალიძის“ მაღაზიაში შევიდა. ვითომ წყალი სწყუროდა.

დიდი ვიტრინიდან დაინახა, როგორ ჩამოიარა ქუჩა ბუბა ეშბამ და პროსპექტს მარცხნივ გაჰყვა.

ბუბა ეშბა მარტო იყო.

დათომ შენიშნა, ნღვლიანი და დაფიქრებული სახე ჰქონდა.

ქალმა როგორც კი გაიარა, დათო მაღაზიიდან გამოვიდა და თვალი გააყოლა მიმავალ ბუბას.

მისდაუნებურად აედევნა დათო, შორიახლო მისდევდა. ბუბა შეჩერდა წიგნების მაღაზიასთან და წიგნები დაათვალიერა. მერმე პროსპექტი გადასკრა და ოპერის თეატრისკენ გაუხვია. რატომ წამოვიდა აქეთკენ? მას შეეძლო უფრო მოკლე გზით მისულიყო ოპერასთან. დათომაც გადასკრა პროსპექტი.

ბუბა ტროლეიბუსების გაჩერებასთან მივიდა. დათოც მივიდა ტროლეიბუსების გაჩერებასთან, ბუბას გვერდით დადგა, სულ ახლოს, წითელი ფერიც კი იგრძნო. უფრო სწორად — მიხაკის სურნელი. დალაპარაკება ვერ გაბედა, დააპირა, მაგრამ ვერ გაბედა. ტროლეიბუსები ზედიზედ მიდიოდნენ, დათოს გული უსკდებოდა, რომელიმე მათგანს ბუბა უსათუოდ გაჰყვებოდა. ბევრი ხალხი იყო გამოსული თეატრებიდან და კონსერვატორიიდან. ვერაფრით ახერხებდა ასვლას. დათოს კი უნდოდა რაღაც ეთქვა, რაღაც აწუხებდა... მაინც რა უნდოდა, რა აწუხებდა?.. „გამარჯობათ, ბუბა... თქვენ ალბათ მიხვდით, რატომ მოვედი... იქნებ ფეხით წასვლა სჯობდეს, მე მიგაცილებთ... მე ვიცი, რას ფიქრობთ ჩვენს ოჯახზე... თუ ფეხით წამოხვალთ...“

ისევ მოვიდა № 3 ტროლეიბუსი და ამჯერადაც ვერ მოახერხა ბუბამ ასვლა.

— ბუბა!

ბუბამ გვერდზე მიიხედა.

დათომაც მიიხედა გვერდზე. დათოს ჯერ ეგონა, უნებურად ხომ არ წამომცდა ბუბას სახელიო და შეკრთა. მაგრამ მეორედაც გაიგონა იგივე ძახილი.

— ბუბა!

ბუბასთან მივიდა შუა ხნის ჭალარა მამაკაცი. ქალს აშკარად შეატყო, არ ესიაშოვნა ჭალარა მამაკაცის დანახვა.

— ბუბა, მე მინდა, მომისმინო.

ტროლეიბუსის შესასვლელთან ზედახორა იყო.

— მე აღარ შემიძლია, დავით, ყოველ წუთს ერთი და იგივეს მოსმენა...

— შენ ვალდებული ხარ მომისმინო.

დათო მიხედა, ჭალარა მამაკაცი ბუბას ქმარი იყო და გუნება შეეცვალა. ამ კოხტად გამოწყობილი კაცისადმი დაებადა წინააღმდეგობის გაწევის ფარული სურვილი. უნდოდა, ასეთივე წინააღმდეგობა ბუბასაც გაეწია.

— თუ ღმერთი გწამს, ნურაფერს ნუ დამავალდებულებ; მე ამქვეყნად არაფერი ვალი არა მაქვს... არც სხვისი, არც შენი, დავით. რა აზრი აქვს შენს წამოყოლას.

დათოს უდიდეს სიამოვნებას ანიჭებდა ბუბას პასუხები. მაგრამ მაინც ეჩვენებოდა, ეს პასუხები მკაცრი და მკვეთრი არ იყო.

დათომ ველარ გაიგონა ბოლომდე, რა თქვა ჭალარა მამაკაცმა, რადგან ბუბამ მოულოდნელად მოიხედა და დათოს თვალებს წააწყდა. ერთ ხანს დათომ არ იცოდა, რა ექნა, მისალმებოდა თუ არა, ბუბამ მწარედ გაიღიმა და თვალი აარიდა დათოს.

— კარგი წავიდეთ.

ბუბა და მისი ქმარყოფილი ნელი ნაბიჯით გაჰყვნენ რუსთაველის პროსპექტს.

დათო: როგორც ჩანს, ჩემზე ბევრი იმსჯელეს ოჯახში და ეს დაადგინეს: ჩემი უმუშევრად ყოფნა ყოველად შეუძლებელია.

ბელი იყო, რადგან სამსახური ვერსად ვიშოვე, პლატონმა შემომთავაზა: მე უნდა დამეწყო კაპიტალური რემონტი იმ შენობისა, რომელშიც პლატონის დაწესებულებაა მოთავსებული. უფრო სწორად, სამუშაოთა მწარმოებლად ვყოფილიყავი. მე არც მენახა და, როგორც მერმე დავრწმუნდი, წარმოდგენაც არ მქონია, სად მუშაობდა პლატონი. ისე, რა თქმა უნდა, ვიცოდი, რომ ეს იყო არტელი, სადაც ქალისა და ბავშვების ფესხაცმელები იკერებოდა. ვერცხლის ქუჩაზე, ერთ-ერთი შენობის სარდაფში ჩამიყვანა პლატონმა. ჯერ მეგონა, სარდაფი პატარა იქნებოდა. მაგრამ საკმაოდ დიდი აღმოჩნდა. მერმე გამოაცა იმ სიჩუმემ და წესრიგმა, რომელიც საამქროებში სუფევდა. სიჩუმე, რა თქმა უნდა, პირობითად ვსთქვი. ფესხაცმელებს პირველყოფილი წესით ამზადებდნენ და ისმოდა ჩაქუჩების განუწყვეტელი კაკუნი. მე მხოლოდ იმან გამოაცა, რომ ხალხის ლაპარაკი და ხმაური არ ისმოდა. თუმცა, დავაკვირდი თუ არა ხელოსნებს, მაშინვე მივხვდი. ეს იყო ყრუ-მუნჯთა არტელი., პლატონმა თავისი კაბინეტი დამათვალეირებინა. პატარა, ნახევრად ბნელ ოთახში იდგა საწერი მაგიდა, დივანი და რამდენიმე სკამი. მერე საამქროებიც მომატარა და ისევ თავის კაბინეტში დამაბრუნა. ერთმა გარემოებამ გამაკვირვა კიდევ. მე უკვე დანიშნული ვიყავი კაპიტალური რემონტის სამუშაოთა მწარმოებლად. სარემონტო კანტორაში არც კი გამოვცხადებულვარ. ამაზე ალბათ პლატონს ან ვიღაც სხვას უჩემოდ უზრუნვია. პლატონმა მაჩვენა სარდაფის გეგმა და დიდი გაჭირვებით განმიმარტა, სამუშაო ისე უნდა ჩაგვეტარებინა, რომ ხარაზების უმეტესობა მუშაობისათვის არ მოგვეწყვიტა. ეს არ იყო ძნელი. მე სხვა რამემ შემაწუხა და თავმოყვარეობა შემილახა. პლატონი თხუთმეტი წელი ამ არტელს ხელმძღვანელობდა, როგორც ყრუ-მუნჯი. ესე იგი, ყველას ეგონა, ყრუ-მუნჯი იყო. სარდაფში ჩასვლისთანავე მივხვდი, პლატონს ჩემი ლაპარაკი ცუდად ესმოდა, ანდა, არ უნდოდა გაეგონა და ხელების მოძრაობით მანიშნებდა, უფრო ხმამაღლა მეთქვა სათქმელი, თან ნიჟარასავით დიდი ყური ზედ ტუჩებთან მოჰქონდა. ეს კაცი თხუთმეტი წელი განგებ იყრუებდა და იმუნჯებდა თავს. რისთვის? შეიძლება ამიტომაც გადაეჩვია „ლაპარაკს და აზრის გადმოცემა უჭირდა“. მაგრამ სმენა ხომ ჩვეულებრივი ჰქონ-

და? თავს განგებ იყრუებდა. თხუთმეტი წელი იყრუებდა თავს. ასე არჩია. ეტყობა, ცხოვრებისთვის ეს უფრო ხელსაყრელი იყო. მე მეგონა პლატონს ვიცნობდი. პლატონი პირველად ამ ოცი წლის წინათ ვნახე. ჩვენს სახლში მოვიდა უცხო კაცი — მაღალი, ჩუმი და პირქუში. დედამ მე და მირიანი ერთად შეგვეყარა და გვითხრა: დღეიდან თქვენც გეყოლებათ მამა... ეს კაცი იქნება თქვენი მამა... მამა მე არ მახსოვს. მირიანი ხანდახან იგონებდა ხოლმე: მხრებზე ფეხებით შემაყენებდა და ოთახებში ასე დამატარებდაო. სხვას ვერაფერს იხსენებდა. თუმცა, მგონი, ერთხელ მითხრა, ხმამაღლა სიცილი იცოდა და იმ სიცილის სულ მეშინოდაო. ბავშვობაში სულ ვფიქრობდი, მამაჩემი მოვიდოდა. ერთს ისე გაიცინებდა, რომ შიშისაგან თავზარი დამეცემოდა, მერმე დასამშვიდებლად ხელში ამიყვანდა და, როგორც მირიანს, მხრებზე მეც შემაყენებდა ფეხებით... ბავშვი ვიყავი და მივხვდი, ჩვენს სახლში არ მოსულა ის კაცი, რომელსაც ველოდი. ამ კაცს ხმამაღლა არ გაუცინია და არც საკუთარ მხრებზე შეეუყენებია ფეხებით. მირიანმაც თქვა: ჩვენი მამა ეგ არ არისო, მაგრამ პლატონი მხოლოდ გარეგნულად აღმოჩნდა პირქუში, ის შიშში, პირველი მოსვლისთანავე რომ აღმიძრა, ნელ-ნელა გაქრა, თანდათან შევეჩვიე და ერთი წლის შემდეგ უკვე აღარ მეჩვენებოდა საშიშ ადამიანად. პლატონი კეთილი, ოჯახის მოყვარული კაცი გამოდგა. პლატონს განსაკუთრებით თეონა უყვარდა, ამას ვგრძნობდი მაშინ, როცა მამა ბედნიერი ღიმილით თვალს ადევნებდა თავისი ერთადერთი ქალიშვილის ყოველგვარ მოქმედებას. სხვა მხრივ არაფრით ამჟღავნებდა თეონასადმი განსაკუთრებულ სიყვარულს და ჩვენგან არაფრით ასხვავებდა. მერმე მეჩვენებოდა, პლატონი ზედმეტად რბილი და გულუბრყვილო იყო. ოჯახში დედა მბრძანებლობდა. ყოველ მის სურვილს პლატონი უხმოდ და მორჩილად ასრულებდა. ვერაფრით ვიფიქრებდი, თუ პლატონს შეეძლო ასეთი ეშმაკობა და თვალთმაქცობა. ძნელია, ქვეყანა დააჯერო, რომ შენ ყრუ და მუნჯი ხარ, მაგრამ თუ დააჯერებ, მერმე, როგორც ჩანს, შედარებით იოლია ცხოვრება...

მირიანმა ბოლო ხანებში მოუხშირა გარე-გარე სიარულს: ზოგჯერ ნასვამიც ბრუნდებოდა, მაგრამ დათოს ერთხელაც



არ უკითხავს, სად დადიოდა უფროსი ძმა და ვისთან სვამდა.

ამას წინათ გელა მოვარდა აქოშინებული.

— მირიანი შინ არის?! — იკითხა, პლატონს ღილებივით დიდსა და შავ თვალებში საიდუმლოებით მოცული ღიმილი უთამაშებდა.

— არა, რა იყო?

— ეეჰ, ეს არის საქმე?.. მალე მოვა?

— არ ვიცი, როდის მოვა...

— რედაქციაში შემოვიდა წერილი... ვილაც ბონდარევი იწერება სმოლენსკიდან.

— მერმე მირიანი რა უფაშია?

— დამაცადე. ეს ბონდარევი ომის ვეტერანია, ბრესტის ღაცვაში მიუღია მონაწილეობა. მასთან ერთად უბრძოლია ვილაც ქართველს, რომლის სახელსა და გვარს ველარ იხსენებს, გარეგნობა კარგად დაუმახსოვრებია და შესანიშნავად აღწერს კიდევ. ისიც იცის, რომ თბილისელია. ბონდარევის აღწერით, ის ქართველი გარეგნობით ძალიან ჰგავს მირიანს, საოცარია, პირდაპირ მირიანია დახატული, შენი ძმა ბრესტში არ ჩავარდა ტყვედ?

— კი.

— მერმე ტყვეობიდან გაიქცა და ფრანგ პარტიზანებთან იბრძოდა?

— კი, ეგრე იყო.

— ჰოდა მირიანია სხვა ქართველებსაც ასახელებს, მაგრამ იმათი გვარები და სახელები ახსოვს, რატომღაც მირიანისა დავიწყებია მაინცდამაინც.

— იმ ქართველებისთვის ეკითხა. იმათ ეცოდინებოდათ.

— მათგან არც ერთი არ გადაარჩენილა. ყველა დაღუპულა.

— ვთქვათ, მირიანია, მერმე?

— რას ჰქვია მერმე? თუ მართლა მირიანია... შენ იცი, რა საქმეები აქვს გაკეთებული: ფანტასტიური... დაუჯერებელი... ეგ ყოფილა, ძმარ კაცი!

გელამ კინკრიხო მოიფხანა ნეკით და ფანჯრიდან ნეტარებით გახედა სივრცეს. დათო იცნობდა ამ გამომეტყველებას; ბევრჯერ უნახავს იგი გელას სახეზე უეჭველი გამარჯვების მოლოდინში აღბეჭდილი.

/ მირიანი გვიან დაბრუნდა. ნასვამი იყო. დათო იწვა. მაგრამ არ ეძინა. გაიგონა როგორ გააღო უფროსმა ძმამ სამზარეულოში მაცივარი. მერმე ბოთლების ხმაურიც გაიგონა, ეტყობა, ბორჯომის წყალი დალია.

მირიანი ფრთხილად შემოვიდა ოთახში და ტანზე გაიხადა. დაწვა.

— მირიან.

ღუმილი...

— ხმა ამოიღე, მე ხომ ვიცი, არ გძინავს.

— რა გინდა?

— გაგიგონია, ასეთი გვარი, ბონდარევი?

— ბევრჯერ.

— მე არ გეხუმრები, მირიან.

— არც მე ვარ ხუმრობის გუნებაზე.

— მაშ, მითხარი.

— არ გაინტერესებს, სად ვიყავი, ან ვისთან დავლიე?

მირიანი გულაღმა იწვა. გაშეშებული იწვა და თვალები ქერისთვის მიეპყრო, თითქოს თვალებს არ ახამხამებდა, დათოს ისიც მოეჩვენა, უფროსი ძმა აღარ სუნთქავდა. საწოლზე წამოჯდა. დააკვირდა. ქუჩიდან შემოსულ მკრთალ შუქზე გარჩია: მირიანს მარჯვენა ლოყა უცახცახებდა.

— დამანებე თავი, — თქვა მშვიდად მირიანმა. — ხომ უნდა მიხვდე, რომ არარაობა ხარ!

დათოს ეგონა, მირიანი ხმამაღლა ფიქრობდა და ამ სიტყვებით ვილაცას სხვას მიმართავდა.

— მაგრამ შენ ამას ვერასოდეს მიხვდები...

— ვის ეუბნები?

— დამაცადე, გეტყვი.

— სხვა დროს მითხარი, ახლა...

— ნასვამი ვარ, არა? მთვრალი?.. შენ არ გინდა, ნამდვილად არ გინდა, დათო, რომ სიმართლე გითხრა, ყოველთვის ასე იყო: საკუთარი სიმართლე გქონდა, საკუთარი თარგი და ყველაფერს იმ თარგზე სჭრიდი; თუმცა ამას ყოველთვის შეუგნებლად, გაუცნობიერებლად აკეთებდი, შენ თვითონ ვერ გრძნობდი ისე... თუმცა, შეიძლება, ზოგჯერ გრძნობდი კიდევ...

— ეგ უსამართლობაა, მირიან.

— ეგრე იყოს... ხომ უნდა გაიგო ერთხელ, რას ფიქრობს შენზე შენი უფროსი ძმა — თუნდაც უსამართლოდ.

მირიანი გაჩუმდა. ისევ გაუნძრევლად იწვა, გაშეშებული, დიდრონი თვალები ჭერზე ჰქონდა მიბჯენილი. დათოს მართლაც არ უნდოდა არაფრის მოსმენა. განწყობილი იყო იმისათვის, რომ მირიანი გაეხარებინა, რაღაც მეტად სასიამოვნო ეთქვა, რატომ ხდება ასე, რატომ? თითქოს დასჯილია. სწორედ ისინი ჰკიცხავენ, ანდა ჰკიცხავს ის, ვისთვისაც გული შესტკივა. ჰკიცხავენ მაშინ, როცა მათთვისვე ზრუნავს, როცა ცდილობს რაღაც კარგი და სასარგებლო გაუქეთოს.

— შენ ზრუნავდი ჩემზე, ვიცი, წუხდი... — მირიანი თითქოს უმცროსი ძმის ფიქრებს კითხულობდა. — მაგრამ სინამდვილეში შენი თავისთვის ზრუნავდი და წუხდი. ჩემი გარეთ გასვლა და დაგვიანება გაღელვებდა, და გინდოდა სულ შინ ვჯმდარიყავი, რომ შენი სიმშვიდე არ შეგეშფოთებინა, დაწყნარებით რომ გეცხოვრა. ისედაც ბევრი გაღელვე და გაშფოთე. ჯერ ომში ვიყავი, მერმე დავიკარგე, მერმე მოვკვდი, მერმე ისევ აღვსდექი მკვდრეთით, მერმე... როგორც იქნა, დავბრუნდი... ხომ არ შეიძლება ერთმა კაცმა ამდენი წუხილი და მღელვარება განაცდევინოს მეორეს? ამიტომ გერჩია სულ შინ ვყოფილიყავი...

— მირიან?

— რა მირიანი ტყუილია?

— არა გრცხვენია, ბიჭო.

— ახლა კი ჩემმა ამგვარმა ყოფნამაც შეგაწუხა.

— თუ კიდევ მაგისთანა რამეს მეტყვი, აღარ მოგისმენ, ჩემს ლოგინს შუშაბანდში გავიჭან.

— არ გსიამოვნებს სიმართლის თქმა... ჩვენ ხომ ძმები ვართ, რა გვაქვს ერთმანეთთან დასამალი?.. ჩვენ კიდევ ბევრი უნდა ვუთხრათ ერთმანეთს.

— დღეს გელა გეძებდა... გაზეთში წერილი მოვიდა... — დათო ხმამაღლა და სხაპასხუპით უყვებოდა იმას, რაც გელასაგან შეიტყო. ამით უნდოდა დაეხშო უფროსი ძმის ხმა და სიტყვები, სულს რომ უფორიაქებდა და ურყევდა. ამ ლაპარაკში მირიანის საწოლთან მისულიყო და უფროს ძმას თავზე დასდგომოდა. — თუ ის ქართველი შენა ხარ, მაშინ ჩვენ ყველანი შენით ვიამაყებთ.

— სამწუხაროდ, არა ვარ და ვერასოდეს იამაყებ ჩემით. ოთახში ნამძინარევი დედა შემოვიდა. გაკვირვებული შეს-  
ცქეროდა შვილებს.

— მირიან, თქვი, რომ შენა ხარ! — არ ეშვებოდა დათო.  
— დამანებე თავი, რა გინდა ჩემგან, — მირიანი ლოგინ-  
ზე წამოჭდა. — არა ვარ, არა! არა! არა!

მირიანი პირქვე დაემხო საწოლზე და ატირდა, თან რაღა-  
ცას ეუბნებოდა უმცროს ძმას, მაგრამ ნათქვამი დათოს არ  
ესმოდა, რადგან ბალიში თითქოს ნთქავდა ამ სიტყვებს. გუ-  
ლი შეეკუმშა და დაეწურა. ამ გრძნობაში დათოსთვის მაინც  
იყო რაღაც სასიამოვნო. ალაბათ ის, რომ ძველი ღუმელის  
ყინული გატყდა და დაიძრა.

— მირიან... დათო... — დედამ დათოს ხელი მოჰკიდა და  
მირიანის საწოლს მოაშორა. — რა გემართებათ?! როდის იყო,  
თქვენ ჩხუბობდით?!

მირიანი მალე დაწყნარდა, კედლისკენ გადაბრუნდა და გა-  
ყუჩდა. დედამ აიძულა, დათოც დაწოლილიყო. შვილებს გაახ-  
სენა: არც ბავშვობაში, არც მერმე, არასოდეს არ გიჩხუბიათ  
და ახლა რა ღმერთი გიწყრებათო, ნუთუ ამისთვის გაგზარ-  
დეთ, რომ ერთმანეთი დაჰამოთო.

დათოს არ ასვენებდა ძმის მიერ წაყენებული ბრალდებე-  
ბი. მას ლაპარაკი უნდოდა. უნდოდა თავი ემართლებინა. ემ-  
ართლებინა კი არა, უბრალოდ ეთქვა, რომ მირიანი ცდებო-  
და. ასეთივე ბრალდება მასაც შეუძლია წაუყენოს უფროს ძმას.

თითქმის განთიადამდე იწვალა ლოგინში, არ ეძინებოდა,  
ერთი ორჯერ დააპირა მირიანთან გამოლაპარაკება. ხელი ჩა-  
იქნია, ახლა არ ღირსო... საშველი არ იყო — ვერაფრით იძი-  
ნებდა...

დათო მსუბუქად შეხტა ფანჯარაზე. ფანჯარა ღია იყო და  
პირდაპირ ქუჩაში გავიდა. თვითონვე უქვირდა, ისე თავი-  
სუფლად დადიოდა ჰაერში. ნამდვილად სიზმარში ვარო, ფიქ-  
რობდა. აგურის კედელს მიადგა. ერთგან აგური იყო გამო-  
ვარდნილი და ხელი თავისუფლად შეეტეოდა. ეს უნდა ყო-  
ფილიყო ბელურების ბუდე, რომელიც ზურვიკომ აღმოაჩინა.  
დათომ ღრმად შეჰყო ბუდეში ხელი, მკლავი მთლიანად შეე-  
ტია, მაგრამ ბოლომდე მაინც ვერ მიაწვდინა. არადა იცოდა,  
ბელურები შიგ იყვნენ. რა უნდა ექნა, ცოტა გაიარ-გამოიარ-

რა და სახურავზე დადგა. სახურავიდან ქუჩას გადმოხედა. ქუჩა ხალხით იყო გაჭედნილი, ცივი და არაფრისმთქმელი თვალებით უმზერდნენ დათოს, როგორ დადიოდა პარაპეტზე. დათომ ამ ხალხის შეშინება მოინდომა. ტელეფონის მავთულზე შეფრინდა და ზედ დაიწყო სირბილი და სრიალი, თამ ამას ისე აკეთებდა, ვითომ საცაა ფეხი დამიცვდება და დაბლა გადმოვვარდებიო. ხალხი არ შეშინებულა, პირიქით, თითქოს უფრო მეტს მოელოდა დათოსგან, იმედებიც კი გაუცრუვდათ. დათო ტელეფონის მავთულიდან ცას დაეკიდა კბილებით, როგორც აკრობატი ცირკის თაღს და თავბრუდამხვევი ტრიალი დაიწყო... გამწარებული ტრიალებდა, გასაოცარი სისწრაფით ტრიალებდა...

პლატონი და დათო ერთად გამოვიდნენ ბინიდან. დილის ათი საათი სრულდებოდა. ქუჩის კუთხეში ტაქსი დახვდათ. პლატონმა გაუფრთხილებლად გამოალო მანქანის კარი და ჩაჯდა, მერე დათოს ანიშნა, შენც ჩაჯექიო. ეს ტაქსი, როგორც შემდეგ გაიგო, ყოველ დილას ათი საათისთვის მოდიოდა აქ და პლატონს ელოდა. წინასწარ ყოფილან მორიგებულები.

მირიანს დღეს უკვე აღარ უზრუნვია რძისა და პურის მოსატანად. ადრინადად წავიდა. ეტყობა, გელას ნახვა და წერილის წაკითხვა უნდოდა. დათოს ეკვი არ ეპარებოდა, რომ უცნობი ქართველი, რომელიც ბრესტში იბრძოდა, მირიანი იყო, მაგრამ რატომ ცდილობდა იგი ასე თავგამოდებით თავისი წარსულის დამალვას და უარყოფას? როგორც გელას ნათქვამიდან ჩანდა, წარსული არ უნდა ჰქონოდა ლაჩრული და სამარცხვინო.

შეიძლება, არც წასულა გელასთან. რას გაიგებ მირიანისას?!

დათოს ახლა სხვა რამ უფრო აწუხებდა. მას არ ეგონა, თუ ასეთი ღვარძლიანი იქნებოდა მირიანი. თურმე ღუმელით რამდენ ღვარძლსა და ბოდმას მალავდა. სხვანაირად არც შეიძლებოდა. როდესაც კაცი ამდენ ხანს ღუმს და კარჩაკეტილია, ალბათ, სულში დიდი ბოდმა უგუბდება ხოლმე.

ვითომ მართლა არ ზრუნავდა მირიანისთვის? რამდენადაც შეიძლო, ზრუნავდა. თვითონ მირიანი არ აძლევდა მეტის სა-

შუალეხას, ყოველთვის გაუბრბოდა, არ იკარებდა, ხმას არ სცემდა, თითქოს დათო ყოფილიყო დამნაშავე, მირიანს ცხოვრებამ არ გაუმართლა.

მაინც სად წავიდა მირიანი?

მირიანის ქცევაში, უფრო ხშირად, გამობედვაში, დაუქვრია ისეთი რამ, რითაც აქამდე უნდა ეგრძნო უფროსი ძმის დამოკიდებულება მისდამი, მაგრამ დათო ყოველთვის ჩქმალავდა ამ გრძნობას, უფრო სწორად, ყურადღებას არ აქცევდა და არ აღვივებდა. ფიქრობდა, მირიანი იმიტომ დუმს, რომ შეეჩვია დუმილს, იმიტომ გაუბრბის ყველას, რომ მარტობას შეეჩვია და ამ ჩვეებიდან უჭირს თავის დაღწევა.

მაინც სად წავიდა მირიანი?

თუ მართლა გელასთან წავიდა, მაშინ... მაშინ, ცხადია, წარსულის ტკივილი დაუძლევია. მთელი ღამე იწვალა და, ბოლოს და ბოლოს, აღბათ, დასძლია, ვეღარ გაუძლო მარტობასა და დუმილს. საინტერესოა, შეიცვლის თუ არა აზრს დათოზე? უსათუოდ მიხვდება, რომ ცდებოდა და მწარედ ინანებს...

ტაქსი ვერცხლის ქუჩაზე, სარდაფის წინ გაჩერდა. პლატონი და დათო მანქანიდან გადმოვიდნენ. სარდაფიდან ნესტის, ტყავისა და საღებავების სუნი ობზივარივით ამოდიოდა.

თითქმის მთელი საათი იჯდა დათო პლატონის კაბინეტში უსაქმოდ. იჯდა და თვითონაც არ იცოდა, რას ელოდა. პლატონი არაფერს ეუბნებოდა და არც თვითონ ეკითხებოდა რასმე.

დღეს აუცილებლად უნდა ნახოს ციციხო. დიდი ხანი გავიდა მას შემდეგ, რაც არ შეხვედრია და უკვე სხვანაირად იფიქრებს გოგო... უცნაური კი იყო, წინათ, რაც უფრო ხშირად ხვდებოდა, უფრო მეტად უნდოდა მასთან შეხვედრა და ყოფნა. ახლა ციციხოზე ფიქრსაც კი გაუბრბოდა. და თუ ერთხელ ნახვა დააპირა, ისიც მხოლოდ იმიტომ, რომ დიდი ხანი არ ჰყავდა ნანახი.

დღის ბოლოს გელას გაუვლიდა. თან მირიანის ამბავს გაიგებდა, თანაც ციციხოს დაურეკავდა.

პლატონის კაბინეტში ყოფნისას რამდენჯერმე შემოვიდა გოგონა, რომელსაც ცოცხალი, შავი თვალები ჰქონდა, უცნაურად მეტყველი თვალები. გოგონას რაღაც ქალღმერთები შე-

მოჰქონდა. პლატონი ქალაღდებს არ კითხულობდა, ისევე ალაგებდა მაღიდის კუთხეში.

გოგონამ, შეიძლება იმიტომ, რომ ბევრჯერ მოუხდა შემოსვლა და უცხო ადამიანის ერიდებოდა, დათოს მორცხვად გაულიმა და გავიდა.

დათო დაიღალა ლოდინით.

გოგონა... ხავერდის წითელი კაბა და ადგილობრივი წარმოების მწვანე ჟაკეტი... წვრილ, გამხმარ ფეხებზე ბავშვის წინდები აცვია. გოგონა კი იქნება თვრამეტი წლის, ან ჩვიდმეტის. ძალიან ფერმკრთალი სახე აქვს...

პლატონის საწერი მაგიდა კაკლის ხისაა, შუაში უზარმაზარი მარმარილოს სამელნე ასვენია, ბრინჯაოს ირმის რქებიანი. სამელნის გვერდით თიხის ჭიქა დგას, ჭიქაში სხვადასხვა ფერის ფანქრები აწყვია. მაგიდის კარადებს შორის ვებერთელა ფეხები ისე ყრია, თითქოს პლატონისა არ არის...

ფანჯრიდან ტროტუარის ნაწილი მოჩანს, ქუჩაში ვინმე რომ გაივლის, ოთახს ჩრდილი გადაურბენს. რადგანაც ქუჩაში ბევრი გამვლეღია, კედლებზე სულ ჩრდილები დაბორილობენ.

ვენური სკამები...

ოთახში კორინთელი შემოვიდა.

პლატონი წამოდგა. დათომაც უნებურად წამოდგომა დააპირა, მაგრამ თავი შეიკავა.

— ოო... ნიკო... — თქვა პლატონმა და გაღიმა. მერმე ხელი გაუწოდა ჩამოსართმევად.

— როგორა ხარ, ბებერო? — ახლადშემოსულმა პლატონს ხელი ჩამოართვა, მერმე დათოს მიუბრუნდა, ვითომ ახლად შენიშნა, დააკვირდა — თქვენი სახე საიდანლაც მეცნობა.

— მეც. ოლონდ მე კარგად მახსოვს, საიდან მეცნობა თქვენი სახე.

— ეგ არის, რა... — თქვა პლატონმა.

— აჰა! — გაიხსენა კორინთელმა და დათოსაც ჩამოართვა ხელი.

დათოს მანამდე არასოდეს უფიქრია, რომ აქ შესაძლებელი იყო, კორინთელს შეხვედროდა. ეს რომ ეფიქრა, ალბათ არც დათანხმდებოდა პლატონს მუშაობაზე. დათო მიხვდა და გაბრაზდა, მთელი საათი ამ კაცს ელოდნენ.

ისევ შემოვიდა წითელკაბიანი გ.გონა და ქაღალდები შე-  
მოიტანა. გასვლისას კვლავ გაუღიმა გულუბრყვილო, დიდ-  
რონი თვალებით.

— ბებერო, თუ ღმერთი გწამს, ამ ხალხის წრიალს მოუ-  
ხერხე რამე.

პლატონი სახეგაბადრული შესციცინებდა ნიკოს. ხოლო,  
როცა ნიკომ ეს უთხრა, სახე დაეძაბა, ისეთი გამომეტყველე-  
ბა მიიღო, თითქოს ვერ გაიგო რას ეუბნებოდა. ნიკომ ხელი  
ჩაიქნია, ვითომ არაფერი გეშველებათ და უსიტყვოდ ანიშნა  
ის, რაც წელან სიტყვით უთხრა. პლატონი გავიდა და მალევე  
შემობრუნდა უკან.

ნუთუ თავის მეგობარსაც ატყუებდა, რომ ყრუ იყო? ნამ-  
დვილად ატყუებდა, მეგობარი ათასგვარ შეურაცხმყოფელ  
სიტყვებს ეუბნებოდა იმ იმედით, რომ პლატონს არ ესმოდა,  
ხოლო პლატონი ყველაფერს ამას უდრტვინველად იტანდა,  
არა მარტო იტანდა, ქლესურად შეჰღიმიოდა სახეში. რისთვის  
დაიყრუა და დაიმუნჯა ამ კაცმა თავი? იქნებ მართლა ყრუ  
იყო და დათომ არ იცოდა?

უკვე აღარ შეეძლო აქ ყოფნა, მაგრამ ერთი რამ აჩერებ-  
და, უნდოდა გაეგო, ამდენი ხანი რა საქმისთვის ელოდებოდ-  
ნენ კორინთელს.

— ჩვენ უნდა შევრიგდეთ, დავით. — ეს იყო პირველი  
კაცი, რომელმაც ჩვეულებრივ საუბარში დათოს დავითი უწო-  
და.

— მე მგონი, ჩვენ არ ვყოფილვართ დამდურებულები.

— ნურც თავს მოვიტყუებთ და ერთმანეთის მოტყუება-  
საც ნუ შევეცდებით. ჩვენ უკვე ბავშვები აღარა ვართ.

„აქ მხოლოდ ბავშვის ქუდები იყიდება...  
მხოლოდ ბავშვის ქუდები იყიდება... ბავშ-  
ვის ქუდები იყიდება...“

— ჩემი ბიჭები ვერაფრით წარმოიდგენდნენ, რომ იმ ლა-  
მით მშენებლობაზე თქვენ იქნებოდით, თორემ სხვანაირად  
მოიქცეოდნენ... ვერც მე წარმოვიდგენდი... სამწუხარო ამბა-  
ვი მოხდა და მე ძლიერ ვნანობ. შეიძლებოდა ამ საქმეს უფ-  
რო კეთილი ბოლო ჰქონოდა. მაგრამ რაც იყო, იყო! ახლა  
ჩვენ სხვა უფრო დიდ საქმეს ვიწყებთ და ერთმანეთის მეგობ-  
რობა და მხარდაჭერა გვმართებს.



დათო უხმოდ უსმენდა. იმდენად ღრმად იყო დარწმუნებული, იმდამინდელ ქურდობასა და ცემა-ტყეპაში შავი ნიკოს ხელი ვრია, რომ ეს გულახდილობა არც გაჰკვირვებია.

— თქვენ საქმე უნდა გააკეთოთ. მე, რაც საჭირო იქნება, დაგეხმარებით.

— არავითარ დახმარებას არ მივიღებ თქვენგან. — უპასუხა დათომ.

— ერთხელ უკვე მიიღეთ...

დათოს ეგონა, კორინთელი იმ ღამეს გულისხმობდა, მწინებლობაზე ნიჩბებით რომ გალახეს და გაბრაზდა. ასეთ თავხედურ დაცინვას აღარ მოელოდა.

— თქვენგან დიდად ვართ დავალებულები მეც და ჩემი ძმაც.

— თქვენი ძმისა რა მოგახსენოთ, თქვენ კი ხართ. ამ ცხრა თუ ათი თვის წინ მე მოგაწყვეთ მშენებლობაზე სამუშაოდ. ამ გადაყრუებულისთვის არასოდეს გიკითხავთ? — კორინთელი მერმე პლატონს მიუბრუნდა, — პლატონ, შე იდიოტო, ამ კაცისთვის არაფერი გითქვამს?!

პლატონი იღიმებოდა. ოთახში დადიოდა, ხელებს იფშენებდა და იღიმებოდა. ვითომ არაფერი ესმოდა, ვითომ საქმე უკვე ისე აეწყო, როგორც ჩაფიქრებული ჰქონდა. არადა, დათო გრძნობდა, რომ ჩიხში იყო მომწყვდეული და გასაქცევ გზას ვეღარ პოულობდა...

— ახლა წავიდეთ.

— სად?

— ცოტა უკეთესი ადგილი ვიცი მოსალაპარაკებლად.

დათოს შინაგანად წინააღმდეგობის გაწევა ჰქონდა განზრახული, მაგრამ მორჩილად წამოდგა, უცხო ნებას დაჰყვა.

გასასვლელთან თავდახრილი იდგა წითელკაბიანი ქალიშვილი.

უხმოდ აიარეს კიბე.

დათო ვიდრე ქუჩაში ავიდოდა, სარდაფს ჩახედა. გოგონა მობრუნებულიყო და გულუბრყვილო აღტაცებული მზერით აცილებდა დათოს. ალბათ არ ეგონა, დათო თუ მოხედავდა, დარცხვენილი მაშინვე გაუჩინარდა სარდაფის სიბნელეში...

ფანჯრიდან მოჩანდა მტკვარი და მტკვრის გაღმა ნაპირი, ფერდობზე შეფენილი ქალაქის ძველი უბანი. ერთმანეთზე მიწყობილი, დაბრეცილაივნიაანი, კრამიტით დახურული სახლები. მათ შორის, როგორც დედოფალი, იდგა გოდოლისებური შენობა, რომელსაც ქამარივით ჰქონდა შემორტყმული ხის ლურჯი აივანი.

მდინარის მიმართულებას აქ ვერ გაიგებდი. წყალი ყოველი მხრით მოძრაობდა, ბღვინავდა, ფუთფუთებდა, უზარმაზარი ქვაბივით დულდა, ძაბრულებს აჩენდა. დინება სწრათად და მზაკვრულად იცვლიდა გეზს, აგურის კედელს ეხეთქებოდა და უკან დაბრუნებული უფრო მოულოდნელი მიმართულებით მიდიოდა. მომწვანო ფერი დაჰკრავდა მიარევეს, ცივსა და ღრმას.

პატარა და ნათელ ოთახში მხოლოდ ერთი მაგიდა და ოთხი სკამი იდგა. ორმა ოფიციანტმა თვალის დახამხამებაში გააწყო სუფრა. მარდად და რბილად მოქმედებდნენ, თითქოს რეზინისაგან იყვნენ დამზადებულები.

ოთახში დარბაზიდან მოქეიფეთა ღრიანცელი შემოდინდა. ხალხი დილიდანვე შესდგომოდა საქმეს.

დათო მოთმინებით ელოდა, როდის დაიწყებოდა საქმიანი საუბარი. ნელ-ნელა შეჰყვნენ სმას. მაგიდაზე უხვად ელაგა საუზმე: წითელი ხიზილალა და ცივად მოხარშული ზუთხი, თუშური ყველი და ხასხასა მწვანილი... მაგრამ დათო საქმელს არ გაჰკარებია, არ შიოდა. კორინთელმა თავისი ხელით გადაუღო თევზი და ნაშარაბიც მიაწოდა.

ჩაის ჭიქები იცლებოდა და ისევ ივსებოდა ჭიბაანით. საუზმეს ჯერ საქონლის სუკი მოაყოლეს, მერმე — შემწვარი წიწილები.

პლატონი მყუდროდ იჯდა და თავის წილს უხმოდ შეექცეოდა. საუბარსა და სადღეგრძელოში გამოირკვა, თურმე შესაძლებელი იყო სარდაფის სიღრმეში ახალი საამქრო გამოთხრილიყო. ოღონდ ეს საამქრო სარდაფის გეგმაში არ ფხდა შეეტანათ.

წუხანდელი უძილობისა და მღვლვარების შემდეგ დათოს ადვილად მოეკიდა ღვინო. გაუჟრებული იჯდა და ნათლად არ ფხმოდა, რისთვის სჭირდებოდათ პლატონსა და მის მეგობარს უგეგმო საამქრო...

სარდაფის გასასვლელთან თავდახრილი იდგა წითელკაბიანი გოგონა. გოგონა ფერმკრთალი იყო და ჰქონდა შავი, მეტყველი თვალები... დათომ ვეღარ გაიგონა ქალარამამაკაცის ნათქვამი, რადგან ბუბამ მოიხედა და დათოს მზერას წააწყდა. ბუბამ გაიღიმა, დათოს თვალი აარიდა. დათო კბილით დაეკიდა ცას, დატრიალდა. მირიანი კართან იდგა. მერმე პერანგი აიწია, ძველი პირმოკუმული ნაჭრილობევი გამოაჩინა.

— მე ყველაფერზე თანახმა ვარ,— თქვა დათომ, — ოღონდ...

კორინთელმა კმაყოფილებით გაიღიმა.

— ოღონდ, რა?

— მომიყვებით, რატომ დაარტყით დანა მირიანს.

კორინთელი მოიღუშა.

— რა საჭიროა ცუდი წარსულის გახსენება?

— თუ არ მომიყვებით, მე არ ვიმუშავებ თქვენთან.

იმის გამო, რომ ზედამხედველს გაარტყა, შავი ნიკო ორი კვირით „ბურში“ გადაიყვანეს. ვიდრე „ბურიდან“ დაბრუნდებოდა, მირიანი იმავე ბარაკში შეუსახლებიათ. ბარაკში ასზე მეტი კაცი ცხოვრობდა. ყველაზე კარგი ადგილი შავ ნიკოს ჰქონდა დაკავებული, ფანჯარასთან. მირიანი ბარაკის ბინადრებს გაუფრთხილებიათ, რომ ეს ადგილი ეკუთვნოდა ამა და ამ კაცს, მაგრამ მირიანს ნათქვამისათვის ყურადღება არ მიუქცევია. როცა შავი ნიკო დაბრუნდა, დიდად გააოცა ახალმოსულის თავხედობამ. თუ არა თავისი ჯანით დაიმედებული არიფი, მისი საწოლის დაკავებას ვინ გაბედავდა?! თუმცა ახალმოსული თხელი ბიჭი ჩანდა და არ უნდა ყოფილიყო მაინცდამაინც ღონიერი. ეს ყველაფერი სხვათა შორის ითქვა, შავი ნიკოსთვის არ ჰქონდა მნიშვნელობა, ვინ დაიკავა მისი ყოფილი საწოლი, ღონიერმა თუ უღონომ. იგი ნელი ნაბიჯით უახლოვდებოდა მირიანს. მთელი ბარაკი გაისუსა, დაიძაბა. ყველა დარწმუნებული იყო, საშინელი ამბავი დატრიალდებოდა. შავი ნიკოს ბიჭებმა ნარები დატოვეს და ისინიც მირიანისკენ წავიდნენ. ამ დროს მირიანს ეძინა. ვერავინ გა-

ბედა გალვიძება. მძინარე კაცს თავზე დაადგა ოთხი კაცი. ბიჭებმა გალვიძება დაუბირეს, მაგრამ შავმა ნიკომ ბიჭებს უბრძანა გაუფრთხილებლად გადმოეთრიათ ძირს. ასეც მოიქცნენ, წააულეს ფეხებში ხელი და ძირს გადმოათრირეს. აქ მოულოდნელი და გაუთვალისწინებელი რამ მოხდა: გამოღვიძებული მირიანი, ეტყობა, იმწუთსვე გაერკვა საქმის ვითარებაში და... სამი მოწინააღმდეგე იატაკზე აღმოჩნდა გაშხლართული. სამივე უგონოდ ეყარა. „რა გინდა“, მიუბრუნდა მირიანი შავ ნიკოს. „არაფერი... შემთხვევით ჩემს ადგილზე დაწოლილხარ“. „რატომ შემთხვევით? საცა მითხრეს, იქ დავწექი“. „ისიც გითხრეს, რომ ეს ჩემი ადგილია“. „ეგვეც მითხრეს“. შავი ნიკო ასე რომ არ მოქცეულიყო, მირიანი გაბრაზდა, მოჰკიდა მეტოქეს ხელი და დაბლა გადმოაგდო. მერმე უკვე შავ ნიკოს აღარ ახსოვს, რა მოხდა, მეტი არაფერი უთქვამს, გადმოუყარა მირიანს ბარგი და ნარზე თვითონ დაწვა. ალბათ, უფრო მშვიდობიანად წარიმართებოდა საქმე, შავ ნიკოს რომ არ ამოეღო დანა. მირიანი დაბარბაცდა, ფერდში წაველო ხელები და ჩაიკეცა. ამასობაში მირიანის გალახული ბიჭებიც მოვიდნენ გონს და ჩაჩოქილ მირიანს წიხლებით დაუწყეს ცემა... შავი ნიკო ისევ „ბურში“ გაგზავნეს, დაჭრილი მირიანი კი სასწრაფოდ წაიყვანეს საავადმყოფოში... თითქმის ორი თვის შემდეგ დაბრუნდა შავი ნიკო ბარაკში. გაცეცხიდან მუხლები მოეკვეთა მირიანი ისევ მის საწოლზე იწვა. ამჯერად დანა აღარ ჰქონდა და მირიანთან მისვლა ვერ გაბედა.

გელამ მეტად სასიამოვნო ამბავი უთხრა დათოს. ეს უცნობი ქართველი, რა თქმა უნდა, მირიანი აღმოჩნდა.

მირიანი რედაქტორთან შეუყვანია და გაუცვანია. რედაქტორს უთხოვია საპასუხო წერილის დაწერა. იქვე ფოტოკორესპენდენტს მირიანისთვის გადაუღია სურათი გაზეთში მოსათავსებლად.

ერთი სიტყვით, მირიანის საქმე წალმა შეტრიალებულა. გახარებული დამშვიდობებია რედაქტორსა და გელას და წასულა.

— რამ მოგიყვანა ასე მთვრალი? — ჰკითხა გელამ, ამბის მოყოლა რომ დაასრულა.

— რომ იცოდე, ვისთან დავლიე, გაგიქდები.

— აბა, ჭკუას დავკარგავ!

— რომ დამიჩოქო, მაინც არ გეტყვი... შეიძლება დავრე-  
ცო?

— დარეკე, ბატონო, ვინ გიშლის?!

დათომ ტელეფონის ნომრები აკრიფა.

— ალო, თუ შეიძლება, ციცინოს თხოვეთ.

„ციცინო ვარ“.

— გამარჯობა, ციცინო!

„გამარჯობა, რომელი ხარ?“

— მე ვარ, დათო.

„რა სხვანაირი ხმა გაქვს, ვერ გიცანი“.

— ციცინო, ძალიან მინდა შენი ნახვა.

„ახლა ვერ გამოვალ, დათო“.

— რატომ?

„არ ვიცი, არ შემიძლია“.

— თუ გინდა, მე მოვალ?

დუმილი.

— იცი რა, ამასწინათ ვიყავი შენთან და სახლში არ დამ-  
ხვდი.

„ვიცი, მითხრეს“.

— სად იყავი?

„სად? არც კი მახსოვს“.

— გამოდი, რა, გეხვეწები.

„არა მცალია, გინდაც მეცალოს, მაინც ვერ გამოვალ,  
წვიმს“.

— წვიმს?

„თუ არა გჯერა, ფანჯარაში გაიხედე“.

— ვერა ხედავ, წვიმს: — თქვა გელამ.

— ციცინო... ციცინო... რაღაც მინდოდა მეთქვა და და-

მავიწყდა.

„მთვრალი ხარ?“

— არა, ცოტა დავლიე.

„მაპატიე, დათო...“

— ციცინო... ციცინო...

„რა გინდა?“

— მარტო ვარ... სულ მარტო... მარტო...

— კარგი, ახლა, ნუ აუტირებ მაგ გოგოს. — თქვა გელამ.

— ციციწო, გესმის?

„კი“.

— ლამის ცას კბილით დავეკიდო...

„დათო, წადი, დაიძინე. გეტყობა დაღლილი ხარ“.

— უშენოდ მიჭირს, ციციწო... მისმენ?

„გისმენ“.

— უშენოდ ბევრი სისულელე ჩავიდინე.

„დამიჯერე, დათო, სახლში წადი“.

— შინ წასვლა არ მინდა...

„საიდან მელაპარაკები?“

— გელასთან ვარ, რედაქციაში.

„გელას ჩემ მაგივრად თხოვე, სახლში წაგიყვანოს“.

— არა, მე ყველაფერი კარგად მესმის... მესმის...

„რა გესმის?“

— შენ ნაწყენი ხარ, აქამდე რომ არ დაგირეკე და არ შეგხვდი.

დუმილი.

— ყველა მე მემღურის, ყველა ჩემზეა ნაწყენი

დუმილი.

— ყველას მე უნდა გაუუგო ვალდებული ვარ ყველასი მესმოდეს

დუმილი.

— ციციწო... რამდენი ხანია არ შევხვედრივართ ერთმანეთს?

„არ მახსოვს“.

— რა ტყუილად ვლაცობ... მოგენატრე?

„ახლა მაგის დრო არ არის“.

— საშინლად ცივი ხმა გაქვს, ციციწო. რატომ გაქვს ასეთი ცივი ხმა?

— „არ ვიცი... ალბათ გეჩვენება“.

— გინდა ვითხრა, რა სისულელე ჩავიდინე?

„სხვა დროს მითხარი“.

— არა, ახლა გეტყვი. დღეს კორინთელთან ერთად ვიქციე-ფე.

— ვისთან? — იღრიალა გელამ.

— ციციწო, გელა გაგიყდა. გაიგონე ღრიალი?

„გავიგონე“.

— მართლა იმასთან იქეიფე? — ვერ ისვენებდა გელა.

— ღმერთო, რა მეშველება... ციციხო, ძალიან მთვრალი ვარ, არა?

— „ძალიან“.

— ვცდილობ, სულ ვცდილობ და მაინც ვერ გამოყდივარ... ვერ გამოვდივარ.

— „საიდან?“

— სიბნელიდან.

„საიდან?!“

— სიბნელიდან.

„საიდან?!“

— იცი რა, ციციხო, ტვინი მაქვს დაბნელებული. მე არ მეგონა, თუ სიბნელე ასე მტკივნეული იქნებოდა. ეს უფრო მტკივნეულია, ვიდრე ის, უცებ რომ იგრძნობ, თურმე მთელ ქვეყანაზე მარტო ხარ დარჩენილი. რალაცნაირად დავიბენი, არც ჩემი თავისა მჭერა და არც სხვისი. გესმის, როგორ ვწუწუნებ?

— რამ გამოგაშტერა, ბიჭო, ახლავე დაკიდე მილი — შეუტია გელამ მეგობარს. — რა დალიე ასეთი?!

— ციციხო, გელა მეჩხუბება რამ გამოგაშტერაო... არც შენ, არც გელამ, არც სხვებმა... არავინ არ იცის, რა დღეში ვარ... იცი, მირიანმა რა მიქნა, რა დღე დამაყარა?... ალბათ შენც მართალი იყავი, გახსოვს, ერთხელ რომ მითხარი... თუმცა ახლა არ ღირს მაგაზე ლაპარაკი. სხვა დროს გეტყვი, როცა შევხვდებით... როგორ მინდოდა შენი წახვა.

— დაანებე ახლა მაგ გოგოს თავი.

— ნახვამდის, ციციხო... გელა აღარ მამღლებს ლაპარაკის საშუალებას.

„ნახვამდის“.

დათომ ყურმილი დაჰკიდა.

— არა გრცხვენია, რაიბს. ეუბნებოდო ციციხო?!

— დამანებეთ თავი!.. თვითონ როგორ მელაპარაკებოდა? თითქოს უცხო ვყოფილიყავი არა, დღეს უნდა გამოსულიყო, უსათუოდ უნდა გამოსულიყო... მერმე რა, რომ წვიმს და უკვე დაბნელდა. წვიმაშიც გამოსულა და ქარშიც, თოვლშიც... უფრო გვიანაც გამოსულა... მაგრამ დღეს არ მოინდომა. განა

ხმაზე ვერ შევატყვე, რომ ნაწყენია? რატომ არ მითხრა, ნაწყენი ვარო, რატომ? ვერ მივედი, ვერ მივაკითხე, ვერ დაგურეკე... თვითონ რატომ არ მოვიდა? რატომ ყველა მე მადანაშაულებს, რა დავაშავე ასეთი?!

— კარგი, დამშვიდდი... — გელამ პლაშჩი მოუტანა დათოს. — ჩაიცვი და წავიდეთ, რედაქციაში ჩვენს მეტი არაგინაა.

— წავიდეთ. — დათომ პლაშჩში ხელები გაუყარა. — კიდევ წვიმს?

— საზიზღრად.

დათოს შინ მისვლა არ უნდოდა. მაგრამ ასეთ ამინდში ეარკთ ხეტიალი და ბოდიალი წარმოუდგენელი იყო.

მართლაც საზიზღრად წვიმდა. ასეთი წვიმა თბილისში მხოლოდ შემოდგომაზე იცის. გაუთავებლად, ჯიუტად წვიმს და არავითარი იმედი არა გაქვს, რომ გადაიკარებს.

შენობის ვერანდას შეფარებულები მოედანს გასცქეროდნენ. მანქანის ფარების შუქზე ხშირი და ირიბი წვიმის ფრთა გაიფრებდა ხოლმე. ვერანდის ქვეშ უამრავი ხალხი იდგა. ყველანი შეთანხმებულებივით მოწყენილნი გაპყურებდნენ მოედანს. ავტობუსი გაჩერდებოდა თუ არა, ხალხი აჩოჩქოლდებოდა. თავქუდმოგლეჯილნი გარბოდნენ ავტობუსისკენ.

— გელა, შენ იცი, რისთვის ცხოვრობ ან არსებობ?

— ასეთ წვიმაში შეიძლება მაგის კითხვა?

— სერიოზულად გეკითხები, გელა.

— მე მგონია, ვიცი.

— მეც ეგრე მეგონა. მაინც რა გგონია, რისთვის ცხოვრობ?

— ახლავე გაგცე პასუხი? ...

— ახლავე.

— ახლა რა აზრი აქვს თქმას?! სხვა დროს ვილაპარაკოთ,

— სხვა დროს... სხვა დროს... აღარ დაილია ეს სხვა დრო.

— მე ვიცი, რაც გაწუხებს, დათო... მართალი გითხრა, უფრო სხვანაირი მეგონე. პირველივე მარცხმა როგორ კაკაფუჭა, ბიჭო? კაცი არა ხარ, რა მოგივიდა?! მაგისთანას შექედები ცხოვრებაში?

— შენ გგონია, მარცხი მომივიდა? არავითარი... მე ეგეთი მარცხის არ მეშინია... დღეს დავკარგე სამუშაო, ხვალ ვიშო-



ვი... ბოლოს და ბოლოს თბილისიდან წავალ, ქვეყანა დიდა. სამუშაოს ყველგან ვიშოვი... ბოლოს და ბოლოს, ჩემ სიმართლეს გავიტან, დავამტკიცებ... მე სხვა რამ მაშინებს. მე მეშინია შენი...

— ჩემი?

— დაძაყადე! მე მეშინია შენი, მე მეშინია მირიანის, თეონასი, პლატონის, ნოდარის, ჯიმშერის... ყველა მახლობელი ადამიანის მეშინია... ყური დამიგდე, შენ არ იფიქრო დვინო მალაპარაკებდეს... ყველანი ერთმანეთს ვატყუებთ, საკუთარ თავსაც და ერთმანეთსაც... დღეს რა გავიხარდა? ის, რომ მირიანს საშველი დაადგა? ის, რომ კაცმა თავი დაადწია პარტიის, აბათიას, კარჩაქეტილობას?

-- რასაკვირველია!

-- თუ ის, რომ წერილის გამოქვეყნებამდე სწორედ შენ მიგაგენი მირიანს და უფროსების ქება დაიმსახურე?

— რა თქმა უნდა, ეგეც იყო.

— ჯერ ეს იყო და მერმე ის! ხომ მართალია, გელა?

— მაგაში ცუდს ვერაფერს ვხედავ.

— წავედი. შენც უნდა გეშინოდეს ჩემი, მეც ეგეთი ვარ.

— ამ თავსხმაში სად წახვალ?!

— დიდი-დიდი, დავსველდე.

— მანქანა დავიჭიროთ. მოიცა, გაგაცილებ.

— ნახვამდის, შეიძლება ამ დღეებში გამოვიარო. მოგიყვები, როგორ შევხვდი კორინთელს.

— ხუმრობ, თუ მართალს ამბობ? ;

— შენ როგორ გგონია, ვხუმრობ?

— მოიცადე, წვიმს.

— მერმე ცუდია, რომ წვიმს?! — დათომ პლაშჩის საყელო აიწია და წვიმაში ჯიბეებში ხელებჩაწყობილი წავიდა. ქუჩა გადასჭრა და საბურთალოდან მომავალ ავტობუსს დაელოდა. ვიდრე ავტობუსი მოვიდოდა, მაგრად დასველდა.

ავტობუსი რუსთაველის პროსპექტზე გაჩერდა, მინერალური წყლების მაღაზიასთან...

დათომ ერთი ჭიქა ბორჯომი დალია და ისევ ქუჩაში გამოვიდა. პროსპექტი დაცლილი იყო. წვიმდა. დათოს არ უნ-

დოდა შინ მისვლა, შინაურთაგან არავის დანახვა არ შეეძლო, განსაკუთრებით პლატონის. მის ბუნჩულა და კეთილად მოღობარ სახეს ველარ იტანდა. აი, კაცი, რომელიც მთელ ქვეყანას ატყუებს!

საკონდიტროს ვიტრინა გაჩახახახებული იყო. ვიტრინაში უხვად ელაგა ათასგვარი ტკბილეული, ნამცხვარი. „შოკოლადს ვიყიდი და ზურიკოს ავუტან. შინ მისვლა მაინც არ მინდა და ცოტათი გულს გადავაყოლებ. რომელი საათია? ჯერ გვიან არ ყოფილა, ზურიკოს არ ეძინება“.

ქიშკარში შევიდა. გვირაბი გაიარა. „ასე გაწუწული როგორ ვესტუმრო?“ — შარვლის ჯიბიდან ცხვირსახოცი ამოიღო და სველი თმა შეიმშრალა.

ეზოში ბნელოდა. აივანზე არავეინ ჩანდა.

ხრახნილ კიბეს აპყვა. ტრიალ-ტრიალით ასვლამ თავბრუ დაახვია. მეორე სართულის აივანზე გაჩერდა, თვალეზი დახუჭა და ჰაერი რამდენჯერმე ღრმად ჩაისუნთქა. შერპე აივანი გაიარა, ნაცნობ კარზე ფრთხილად დააკაკუნა.

— ვინ არის? — მოესმა კარს იქიდან ნორას ხმა.

— დათო ვარ. — თითქმის ჩურჩულით უპასუხა. — ზურიკოს ხომ არ სძინავს?

კარი გაიღო. ოთახის სითბო და ნორას ღიმილი ერთდროულად შეეფრქვია სახეში.

— როგორ დასველებულხარო?! შემოდით...

დათომ კარის წინ დაგდებულ ჩვარზე ფეხები გაიწმინდა და ოთახში შევიდა. შესვლისთანავე შეამჩნია კედლიდან კედლამდე გაბმული კანაფი. ოთახი ნაცრისფერი ფარდით არ იყო გადატიხრული და საკმაო დიდი ჩანდა, ნორას კედლის ერთ მხარეს მიეკეცა ფარდა.

— ზურიკო სად არის?

— ზურიკო და ბებიამისი სოფელში გავგზავნე. ივადმყოფობამ, ცოტა არ იყოს, დაასუსტა და ჰაერს გამოიცივლის. ხომ იცით, სოფელი მაინც სოფელია, მით უმეტეს, ანლა ბევრი ხილია. — ნორა ისე ეუბნებოდა ამას, თითქოს ბოდიშს უხდიდა, რომ ზურიკო შინ ვერ დაახვედრა.

დათოს გული დაწყდა და თავი სინანულით გააქნია.

— როდის წავიდა?

— დღეს დილით.

დათომ ჭიბიდან საბავშვო შოკოლადის ორი ფილა ამოიღო და ნორას გაუწოდა.

— ზურიკოს შეუნახეთ... ავადმყოფი ხელცარიელმა ვინახულე და ვიფიქრე, ახლა მაინც გამოვისყიდი-მეთქი დანაშაულს.

— რატომ წუხდებოდით.

— რა შეწუხებაა?!

— დაჯექით, რა ფეხზე დგახართ!

— არა, წავალ.

— განა ასე მაგრად წვიმს?

— კი, საშინლად.

— პლაშჩი გაიხადეთ... ჩაის დაგაღვევინებთ... შეცივებულ იქნებით და ცხელი ჩაი მოგიხდებთ.

— ნუ წუხდებით, ნორა.

— პირიქით... თქვენ არ იცით, როგორ ჩაის ვამზადებ. უაზრად.

— კარგი ჩაი მართლა დიდი ხანია არ დამიღვევია. — დათომ პლაშჩი გაიხადა და იქვე მდგარ საკიღზე ჩამოკიდა.

ათაბში მაგიდისა და სკამების გარდა ორი ტახტა და ერთი საწოლი იდგა. საწოლზე, ალბათ, ნორა იძინებდა, ტახტებზე — ზურიკო და დედაბერი.

ნორამ ელექტროქურაზე ჩაიდან შემოდგა და მაგიდის გაწყობას შეუდგა. კედელში დატანებულ კარადიდან გამოაღა ჩაის ჭიქები, თეფშები, კოვზები, საშაქრე... მერმე გადმოიღო შინდამზადებული ტკბილი ნამცხვარი...

— ასეთ ღარიბულ სუფრაზე არც ღირდა თქვენი დაპატრება.

— მთავარია ცხელი ჩაი. — დათო უკვე მოშინაურდა.

— ჩაის იმდენს მოგართმევთ, რამდენსაც ინებებთ.

ნორა ძალდაუტანებლად ლაპარაკობდა და ასევე უშუალოდ მოქმედებდა — შლიდა სუფრას. კოხტა ქალი იყო, პირმრგვალი, ეშხიანი. ღიმილი თვალებს უვიწროებდა და უფრო ეშხიანს ხდიდა, ალბათ ეს თვითონაც შენიშნული ჰქონდა, სულ იღიმებოდა.

ყველაზე ბოლოს ნორამ კონიაკი მოიტანა.

— მაგას ვერ დავლევ... დღეს მეყოფა; — თქვა დათომ.

— მეც შეგატყვეთ, ცოტა ნასვამი ხართ.

— ჩაი, მხოლოდ ჩაი!

ნორამ კონიაკით შეუღესო ჭიქა და თვითონაც დაისხა.

ჯერ ზურიკო აღდგრაძელეს, მერმე — ერთმანეთი. ამასობაში ჩაიც ადულდა. ნორამ დათოს წინ დაუდგა სურნელოვანი, მაგარი ჩაი.

— ღმერთო, სულ აღარ ვუფრთხილდები ხმას, — თქვა ნორამ. — ჩემთვის სმა არ შეიძლება... სულ აღარ ვუფრთხილდები.

— ნუ დალევთ.

ნორა წამოდგა და სიგარეტი მოიჭანა.

— თქვენ, მგონი, პაპიროსს არ ეწევით?

— არა.

— რა ბედნიერებაა. — ნორამ კიდევ გამოსცალა ჭიქა და სიგარეტს მოუკიდა.

დათომ ნახევრად მოწრუპა კონიაკი და ჩაი დააყოლა.

— გენიალურია.

— მართლა კარგია?

— საოცარია, რატომ ვსვამთ ღვინოს ან კონიაკს, როდესაც ქვეყანაზე არსებობს ჩაი.

ნორა ხარბად ქაჩავდა სიგარეტს. მის თვალეზში თამბაქოს ბოლივით გაწვა ნალველი. თავი დახარა, დაფიქრებული დასცქეროდა მაგიდას.

დათო კმაყოფილი იყო ოთახის სითბოთი, კონიაკის ცეცხლით, ცხელი ჩაით. ნორასთან საუბრით... ქვეყანაზე არაფერი არ აწუხებდა, არავინ ახსოვდა. ნეტარებით სვამდა ჩაის. ოღონდ ნორას თვალეზში გაწოლილმა თამბაქოს ბოლმა დათოც სევდიან გუნებაზე დააყენა. მაგრამ ეს არ უნდა იყოს საკუთარი სევდა, წუხილის ან ტკივილისმიერი. მსუბუქი ნალველი გადმოედო ნორასაგან და სასმელივით აბრუებდა და ათრობდა.

— თუ გიყვართ ძველებური რუსული რომანსები? — ჰკითხა ნორამ.

— ძალიან.

— მღერით?

— ცოტას.

— ხომ არ ვიმღეროთ? — ნორამ პასუხს აღარ დაუცადა, წამოდგა და წავიდა. კედელთან მიკრეფილი ნაცრისფერი ფარდა გადასწია.

დათომ კედელზე დაკიდული გიტარა დაინახა. ჭიქაში ჩარჩენილი კონიაკი ნელ-ნელა მოწრუტა...

დაბალი სასიამოვნო ხმით მღეროდა ნორა ძველებურ რომანსს. დათოს ჯერ ეგონა, ქალმა იმისთვის მოიტანა გიტარა, რომ სტუმარი სიმღერით გაერთო. მერმე მიხვდა, ამ სიმღერით ნორა დათოსთვის უცხო იღუმალებით მოცულ წუხილსა და ტკივილს იკლავდა.

Отвоя потихоньку калитку  
И войди в темный сад ты как тень...

ნორა სიმღერამ შთანთქა, თითქოს დაავიწყდა, იქვე ანლოს რომ დათო იჯდა.

ეს რომანსი ათასჯერ ჰქონდა მოსმენილი რადიოში. ტელევიზორში, ესტრადის სცენიდანაც არაერთხელ მოუსმენია... მაგრამ ნორა მაინც სხვა გრძნობით, სხვანაირად მღეროდა.

მომწვანო წყალში ნებივრად დასრიალებდა გრძელფარფლიანი ოქროს თევზი, მოადგებოდა აქვარიუმს და უაზროდ იყურებოდა. ოქროს თევზი მარტოდმარტოდ აცურავდა მომწვანო წყალში. ხოლო ყრუ კედლიდან ერთი აგური იყო გამოვარდნილი, დათომ თითქმის მთლიანად შეჰყო მკლავი, ბოლომდე მაინც ვერ მიუწვდინა. არადა, იცოდა, ბედურები ბუდეში ისხდნენ. ყრუ კედელი თითქოს თვითონ იყო, მკერდიდან აგური გამოვარდნოდა და ვიდაც სხვა ცდილობდა ბედურების გამოყვანას.

— რა მეშველება. სულ დამეკარგა ხმა.

— მშენივრად მღერით.

ნორამ გიტარა მიაყულა მაგიდაზე და ჭიქებში კონიაკი ჩაასხა.

ვაჟმა გაუბედავად დაათარა ქალის ხელს თავისი დიდი ხელი. ქალმა გაიღიმა და თვალების ჭრილი დაუვიწროვდა.

— დღეს წვიმა დაიწყო თუ არა, საშინელი მარტოობა ვიგრძენი. ქვეყანაზე არავის ნახვა არ მინდოდა და ამავე დროს სიმარტოვე მკლავდა. თქვენ, ალბათ, არ იცით, დათო, ქალისთვის რა არის მარტო ყოფნა. კიდევ კარგი, მოხვედით... სულ ასე მიდის ჩემი ცხოვრება. დავდავარ ქალაქიდან ქალაქში, ვმღერო, სახეგაბრწყინებული თავს ვუკრავ ალტაცებულ მსმენელებს. მერმე სასტუმროში მარტო ვბრუნდები და ჩემს ნომერში ვიკეტები... სასტუმროები... სასტუმროები... ძნელია, მთელი ცხოვრება ხეტიალში და სასტუმროებში ატარო...

მ ა ნ ქ ა ნ ა მ მ ა ნ ქ ა ნ ა ს გ ა დ ა უ ს წ რ ო ... მ ა ნ ქ ა ნ ა შ ი კ ო რ ი ნ თ ე ლ ს ა დ ა ნ ო რ ა ს გ ა რ დ ა პ ლ ა ტ ო ნ ი დ ა ვ ი დ ა ც ქ ა ლ ი ი ს ხ დ ნ ე ნ .

— უმამაკაცოდ ცხოვრება მიჭირს, დათო... მამატიეთ, ასე გულახდილად რომ ვამბობ... მაგრამ ასეა, და რას იზამ? თვალთმაქცობა არ შემიძლია... ვიცი, რასაც ამბობენ ჩემზე... შეიძლება თქვენც გითხრეს... ცუდი ხალხი ცხოვრობს ჩვენს ეზოში. არ დაუჭეროთ, არავის არ დაუჭეროთ არაფერი... მას შემდეგ, რაც ვიგრძენი, რომ ქალი ვარ, სულ მარტო მიხდება ყოფნა... არ გჯერა?

ქალმა ნაღვლიანად გალიმა.

დათო გულაღმა იწვა.

ნორას ვაჟის მხარზე მოხერხებულად დაედო თავი და იძინა. დათომ ეს-ესაა გაიღვიძა.

გარეთ ისევ ბნელოდა. ისევ მოისმა წვიმის უხაბუნი.

ვაჟმა მეორე ხელი საბანში შეაცურა და ქალი თავისკენ მოზიდა. შებრუნდა, ყელზე და მკერდზე დაუწყო კოცნა. ქალმა თვალები გაახილა.

— თქვენებო გაგიუდებიან, ასე რომ დაიგვიანე... თუმცა შეჩვეულები იქნებიან, ალბათ, ხშირად ბრუნდები გვიან.

— იშვიათად.

— არა მგონია.

— დამიჯერე, ეგერეა.

— გესმის? ისევ წვიმს.

— რა უსაშველო წვიმაა!

— იმან იკითხოს, ვინც გარეთ დარჩა. — ქალი უფრო მი-

ებუტა ვაჟს.

— ნორა, რა კაცია პლატონი? — ჰკითხა დათომ ღუმელის შემდეგ.

— რატომ მეკითხები? ।

— ისე.

— ჯერ ის გეკითხა, ვიცნობ, თუ არა პლატონს?

— ეგ არ არის საკითხავი, ვიცი, რომ იცნობ.

— საიდან იცი?

— მაგას რა მნიშვნელობა აქვს... მითხარი, რა კაცია?

— არ ვიცი.

— მაინც... ის შავგვრემანი ქალი ვინ არის?

— მარგო? — ნორამ გაიცინა. — სასაცილო კაცია პლატონი, არაფერი შეუძლია და საყვარლებს მაინც არ ეშვება. პლატონი მხოლოდ იმიტომ დადის მარგოსთან, რომ უზარმაზარ მკერდში თავი ჩარგოს და დაიძინოს. არა მგონია ქვეყანაზე ვინმეს კიდევ ჰქონდეს იმხელა მკერდი... საშინელებაა... რატომ მაყოლებ, დათო, ასეთ საზიზღრობას.

— მაინტერესებს.

— მარგოსაც რა ენაღვლება, ბედნიერად აცხოვრებს. პლატონი მდიდარი კაცია.

— მართლა?

— ვითომ არ იცი... რატომ არ მეფერები? მე მარგო კი არა ვარ... — ნორამ უცებ გადაიხადა საბანი და შიშველმა სხეულმა გაიელვა.

ნორა ერთგვარი სიამაყით დასცქეროდა თავის ტანს. დათო მიხვდა, იმიტომ გადაიძრო საბანი, რომ ქალმა იცოდა თავისი სხეულის ფასი და უნდოდა ეს დაფარული სილამაზე სხვასაც სცოდნოდა. ქალი ამაყობდა თავისი ლამაზი ტანით. ასევე ამაყობს ქალი, როცა რაიმე მნიშვნელოვანი საიდუმლო იცის და ასეთივე სიამაყით უმჯღავნებს იგი ამ საიდუმლოს მეორე ადამიანს.

ეს იყო პირველი ქალი, რომელსაც მთლად გაშიშვლებულს ხედავდა. ჯერ გაუკვირდა, არ ეგონა, თუ ქალები თავიანთი სხეულით ამაყობდნენ. არ ეგონა ასეთი სიამაყითა და კმაყოფილებით კი არა, საერთოდ რომელიმე ქალს თუ აღეძვრებოდა სხვის წინაშე გაშიშვლების სურვილი. ქალები სიშიშველეს ყოველთვის მალავდნენ და ამაში ხედავდა იგი სხეულის სილამაზის, სხეულისაქენ ლტოლვის საიდუმლოებას. სა-

ოცარია, ეს შიშველი, ლამაზი ტანი აღელვებდა, იზიდავდა და ამავე დროს ამშვიდებდა კიდევ.

ნორამ საბანი გადაიფარა.

მიუხედავად ნორას სიწრფელისა და გულახდილობისა, დათოს მაინც ეჭვი ეპარებოდა, მთელი ღამე ფიქრობდა, რომ ქალი ცდილობდა, უკეთესად მოეჩვენებინა თავი, მაგრამ სხეულის სილამაზის მოულოდნელმა ძალამ თითქმის მთლიანად გაუქარწყლა ეჭვები.

ერთი რამ აწუხებდა მხოლოდ რა ურთიერთობა ჰქონდა ნორას შავ ნიკოსთან? ერთი ორჯერ დააპირა თქმა და მოერიდა. კი არ მოერიდა, შეეშინდა, შეიძლება კორინთელის ხსენებას სულაც გაეფუჭებინა ტბილად დაწყებული ღამე.

ახლა უკვე შეიძლებოდა და თავისი საწუხარი უთხრა კიდევ ქალს.

ნორა: ნიკოს ექვსი წელია ვიცნობ. ამ ექვსი წლის წინათ (მაშინ ოცის გავხდი), ფეთხანის უბანში დედაჩემს პატარა ოთახი მიაქირავა მოსე მამისთვალთვალმა, რომელსაც ძალიან ლამაზი ცოლი ჰყავდა. მოსე მშრომელი კაცი იყო. ჩემი, კეთილი... ნამდვილად კეთილი... დედა სამკერვალო ფაბრიკაში მუშაობდა. და ორს როგორღაც გაგვექონდა თავი. სიმართლე რომ ვთქვა, არც მოსეს ოჯახს გადასდიოდა თავზე, მაგრამ გაჭირვებაში ბევრჯერ გაუმართავს ჩვენთვის ხელი. ერთ დღეს მოსემ ოჯახში მოიყვანა ნიკო და ცოლს თავის მეგობრად გააცნო. მე მომეწონა ეს შავგვრემანი, ლამაზი კაცი. საერთოდ, ჩემი ტოლი არასოდეს მომწონებია, ჩემზე გაცილებით უფროსი მიზიდავდა ყოველთვის. ნიკომ უცნაური ამბების მოყოლა იცოდა ხოლმე. მისი თავგადასავალი წიგნში წაკითხულს ჰგავდა. მოხიბლული და გაბრუებული მთელ ღამეებს ვათენებდი ხოლმე ნიკოზე ფიქრში. მე არ ვიცოდი, რა აკავშირებდა მას მამისთვალთვლების ოჯახთან. ერთი რამ შევამჩნიე მხოლოდ: რაც ნიკომ მათთან დაიწყო სიარული, ესთერი გამოიკვალა. უფრო გალამაზდა და გამშვენებდა. ბოლოს და ბოლოს, ამ ლამაზმა ქალმა თავის თავს მიაქცია ყურადღება და მიხედა. ზოგჯერ ნიკო იმ დროს მოდიოდა, როცა მოსე შინ არ იყო. მერმე მიჩვენებოდა, რომ ესთერი ყოველ წუთს ნი-



კოს ელოდა... მეც ველოდი... შინიდან თითქმის აღარ გავდი-  
ოდი, ერთთავად ველოდი... ერთ დღეს მოვიდა... არც დედა-  
ჩემი, არც ესთერი, არც მოსე შინ არ იყვნენ, ნიკომ ლაპარა-  
კით გამაბრუა და ბოლოს მითხრა: აქ იმიტომ დავდივარ, რომ  
შენ მეგულუბიო. მერმე მივხვდი: მე შინაგანად ესთერს ვეტო-  
ქებოდი და რახან ნიკომ ასეთი რამ მითხრა, სულელმა გო-  
გომ თავი გამარჯვებულად ჩავთვალე... ზურვიკომ არც იცის  
და არც მინდა გაიგოს... ნიკოსთვის სულ ერთია, ჰყავს თუ არა  
შვილი. ასეთი შვილი ბევრგან მიუტოვებია და აღარ გახსე-  
ნებია... არც ზურვიკო ახსოვს. ასე უკეთესია! ასეთი მამის ყო-  
ლას სჯობია, სულ არ ჰყავდეს... ნიკო ხშირად დადიოდა. უფ-  
რო ხშირად ფარულად ვხვდებოდით ერთმანეთს... მაგრამ მერ-  
მე უცებ დაიკარგა, გაქრა. მამისთვალთვით სიარული შე-  
წყვიტა, აღარც მე მაკითხავდა. თანდათან მენგრეოდა მისი და-  
პირებებისა და ჩემი ნაოცნებარის ზღაპრული კოშკები. ვა-  
ტყობდი, ესთერსაც რაღაც ემართებოდა. მე ჩემი გაჭირვება  
მქონდა და მაინც ვატყობდი, ქალი სამ-ოთხ თვეში დაილია,  
დადნა. ათასგვარი ეჭვი შლრლნიდა, თუმცა იმედს არ ვკარ-  
გავდი. დარწმუნებული ვიყავი, ნიკო მოვიდოდა და წამიყ-  
ვანდა... ესთერმა, ეტყობა, ფარულ ტანჯვასა და წვალებას  
ვეღარ გაუძლო, შემოვიდა ჩემთან და დიდი საიდუმლო გა-  
მანდო. მამისთვალთვებს ჰქონიათ მარგალიტი, რომელიც თა-  
ობიდან თაობას გადაეცემოდა ხოლმე. ეს იშვიათი მარგალი-  
ტი ძველი ჟილეტის სარჩულში ყოფილა ჩაკერებული. მოსე  
ხშირად სინჯავდა, იყო თუ არა ქვა თავის ადგილზე, გარე-  
დან შეავლებდა ხელს. პატიოსანი თვლის გამოყენება მხო-  
ლოდ უკიდურესი გაჭირვებისა და უბედურების დროს შეეძ-  
ლოთ. მე არ ვიცი, ესთერს არ უთქვამს, საიდან გაიგო ნიკომ  
ეს საიდუმლო. შესაძლოა, თვითონ ესთერს წამოსცდენოდა...  
ერთხელ რამდენიმე დღით თბილისიდან გაემგზავრა მოსე.  
ნიკომ დრო იხელთა და ესთერს სთხოვა, ქმრის ჩამოსვლამდე  
ეთხოვებინა მარგალიტი. ქალი დაურწმუნებია, პატიოსანი  
თვალი თითქოს რაღაც დიდი საქმისთვის სჭირდებოდა. ერთ  
კაცს მხოლოდ უჩვენებდა და მაშინვე უკან დააბრუნებდა...  
თითქოს ამ დიდ საქმეს სხვა არაფერი ეშველებოდა, თითქოს  
ნიკო იღუპებოდა... ტირილით, ხვეწნა-მუდარით ესთერი და-  
უყოლებია. მოსე შეიძლება მოულოდნელად ჩამოსულიყო,

ამიტომ, ყოველგვარი უსიამოვნების თავიდან ასაცილებლად, ჟილეტის სარჩულში იმ მარგალიტისოდენა კენჭი ჩაუყერებიათ. ამის შემდეგ დაიკარგა ნიკო. ესთერმა ვერ გაბედა, ქმრისთვის გაემხილა, რომ ოჯახს აღარ ჰქონდა შთამომავლობით მიღებული სიმდიდრე. მოსე მამისთვალთვით კი ყოველ კვირას ხელს ავლებდა კრეპსა და სატინას შორის მომწყვდულ ქვას და დამშვიდებული ებრძოდა ცხოვრებას. მაგრამ ქვა ჩვეულებრივი კენჭი იყო, ის ქვა აღარ იყო პატიოსანი თვალი, რომლის იმედით რამდენიმე თაობას უცხოვრია. ნიკოს წასვლასთან ერთად მოსეს საქმეები უკუღმა დატრიალდა. კაცი ყელამდე ჩაეფლო ვალებში. ორ-ნახევარი წელი გაუძლო ესთერმა ფარულ წუხილსა და დარდს, გაჰირვებდა... ესთერი გარდაიცვალა. ვალებში ჩაფლულ კაცს საყვარელი ცოლი მოუკვდა. რა უნდა ექნა? უკანასკნელ იმედს მიაკითხა... ღამე იყო, ბავშვს ვაძინებდი, მინდოდა მალე დაეძინა, რომ უბედურ კაცს რალაცაში მივხმარებოდი. უცებ არაადამიანური, თავზარდამცემი ღრიალი გავიგონე. მოსეს ხმა ვიცანი. მაშინვე გარეთ გამოვედი, მივაყურე. ახლა ჩურჩული და ქვითინი მომესმა. კარი შევადგე... გაპარტახებული, დარბეული მოსე მიცვალებულის წინ დაჩოქილიყო და გულსაკლავად ტიროდა, ხელში დაკმუჭნული, ძველი ჟილეტი ეჭირა „ესთერი! ესთერი, შენ დაგენაცვლე! რა იქნა მარგალიტი?! თქვი, ხომ იყო, ჰა? ხომ იყო?! ესთერი.. ესთერი.. მქონდა თუ არ მქონდა?! მითხარი, რა იქნა ჩემი მარგალიტი?!“

თენდებოდა. ცას ფერი შეეცვალა, გაბაცებულიყო. შემოდგომის დაქნძილი ღრუბელი თითქმის სახურავებზე ეყარა.

დათო ხრახნილი კიბით ჩადიოდა. გაუკვირდა, აივნებზე რომ არავინ ჩანდა... მეზობლებს ჯერ კიდევ ეძინათ და კარგა ხანს არ გაიღვიძებდნენ.

ჩამოდითდა დაღლილი, ცარიელი, თითქოს გაძარცვული... „ესთერი.. ესთერი.. მითხარი, რა იქნა ჩემი მარგალიტი?!“

ოქროს თევზი დილიდანვე შემფოთებული იყო. ნერვიულად დასრიალებდა და კედლიდან კედელს აწყდებოდა.

შესაძლოა, დღეს პირველად იგრძნო, რომ აქვარიუმი, რომელშიც ამდენი ხანია ცხოვრობს, ძალზე პატარაა, რომ ამ პატარა ქილაში ძნელია ამდენი ხანი ცხოვრება.

აღარც ახსოვს, როდის გამოუცვალეს წყალი. მინის კედელს ხავსი მოედო და გარეთ გახედვა ჭირს. ოქროს თევზს კი გამჭვირვალე კედლიდან ყურება უყვარდა, აკვირდებოდა, რა ხდებოდა კედლის მიღმა. ვერ იტყვის, თითქოს არასოდეს ყოფილა ბედნიერი. როდესაც ყველა წავიდოდა და ოჯახში მარტო მირიანი დარჩებოდა, მოაკითხავდა ხოლმე. ოქროს თევზს ყოველთვის ეგონა, უფრო მეტიც, სჯეროდა, რომ მირიანს იგი ნამდვილად უყვარდა.

მირიანი სკამს ახლოს დაიდგამდა და მიუჯდებოდა. სახეს ზედ აქვარიუმთან მიიტანდა და თვალებში უმზერდა. ოქროს თევზი ერთს გაინავარდებდა, გასრიალდებოდა, მერმე სწრაფად მობრუნდებოდა და თვითონაც მიაჩერდებოდა მირიანს. ასე უმზერდნენ ხოლმე ერთმანეთს დიდხანს.

— როგორა ხარ? — ეკითხებოდა მირიანი, — როგორა ხარ?

— კარგად! — უპასუხებდა ოქროს თევზი.

— მხოლოდ მე მესმის შენი, მხოლოდ მე მესმის... ჩემს გარდა არავის ესმის, არავის ესმის, იმიტომ, რომ მეც შენსავით ვცხოვრობ, შენსავით ვცხოვრობ, შენსავით ვცხოვრობ...

მერმე სიტყვები აღარ ესმოდა, რადგან ოქროს თევზი ცეკვას იწყებდა. თავდავიწყებამდე დასრიალებდა წყალში — ხან აღმა, ხან დაღმა ტრიალებდა, ბრუნავდა, ათასნაირ კამარას ჰკრავდა, მოცეკვავე თევზი ხანდახან გახედავდა მირიანს, რომლის დაფიქრებულ სახეს თანდათან ღიმილი ეუფლებოდა...

მერმე ისევ დაწყნარდებოდა, დაცხრებოდა... ისევ ესმოდა მირიანის ხმა:

— იყო დიდი მხატვარი... დიდი მხატვარი, რომელმაც ოთხი ოქროს თევზი დახატა... ოთხი ოქროს თევზი... მაგრამ ოთხი ოქროს თევზი არ არსებობს ქვეყნად. არსებობს ერთი,

არსებობს ერთი, არსებობს ერთი... და ის ერთი ოქროს თევზი შენა ხარ!.. შენა ხარ!..

საშინლად უკვირდა, რომ ქვეყანაზე ერთადერთი ოქროს თევზი არსებობდა, მაგრამ ამავე დროს უხაროდა, რომ ის ერთადერთი ოქროს თევზი თვითონ იყო.

ბუნდოვნად ახსოვდა, ოდესღაც, ალბათ, დიდი ხნის წინათ, ვიღრე მირიანი აქ მოიყვანდა, სხვა თევზებთან ერთად ცხოვრობდა. ოღონდ კარგად ვერ იხსენებდა, ნამდვილად ბევრნი ცხოვრობდნენ თუ არა, ვერც ის გაიხსენა ვერაფრით, ბედნიერი თუ იყო მაშინ...

დღეს დილიდანვე შეშფოთდა.

რამ შეაშფოთა?

სხეული უთრთოდა და გული ეკუმშებოდა, ისედაც პაწაწინა გული.

რატომ ეკუმშებოდა გული?

დაძაბული დასრიალებდა და კედლიდან კედელს აწყდებოდა, შეიძლება იმიტომ, რომ კარგად ვერ ხედავდა, რა ხდებოდა ხავსით დაფარულ მიწის კედლის მიღმა.

შუშაბანდში თეონამ გაიარა. ტანის რხევით იცნო, ხმითაც იცნო... თეონა თავისთვის ღიღინებდა, ეტყობა კარგ გუნებაზე იყო. მირიანიც დალანდა ერთი ორჯერ... მირიანი დადიოდა ოთახიდან ოთახში, რალაცები შეჰქონდა და გამოჰქონდა. მირიანს არ ეცალა. ეგეც არ იყოს, მირიანი მაინც არ მიაკითხავდა, სანამ ყველანი შინიდან არ წავიდოდნენ.

ახლა შორიდან ისმოდა თეონას სიმღერა. თეონა იმდენად იყო გახარებული, რომ ამ სიხარულს ველარც მალავდა. მღეროდა, შესანიშნავად მღეროდა თეონა.

დედა საქმიანად იდგა მაგიდასთან და აუთოვებდა...

თითქოს არაფერი ხდებოდა ისეთი, რასაც შეეძლო აელღეღეებინა, თითქოს არაფერი შეცვლილა. თეონას ბევრჯერ უმღერია ასე მხიარულად, დედაც ხშირად მდგარა მაგიდასთან თავისი პრილა უთოთი. მირიანიც არაერთხელ უნახავს ოთახებში მოფუსფუსე.

სამზარეულოდან ხატაურა გამოვიდა, კუდი აპრიხა და დაიკნავლა. მერმე მაგიდაზე შეხტა და თავით დედას გაეხახუნა. დედამ ხელი გაიქნია და კატა იატაკზე გადმოავლო.

ოთახში ისევ გამოჩნდა თეონა.

ოქროს თევზს გული უწუხდა. აქვარიუმში ველარ ეტეო-  
და, სუნთქვა უჭირდა. ფსკერისკენ დაეშვა, მერმე ფარფლები  
ლონივრად დაიქნია და ისარივით აიჭრა ზევით. წყლის ზედა-  
პირს რომ მიუახლოვდა, კიდევ ერთხელ დაიქნია გრძელი ფარ-  
ფლები და წყლიდან ამოხტა. ერთი წამით ამოხტა მხოლოდ,  
ისევ წყალში ჩაეშვა თავდაყირა.

იმ ერთ წამში ნათელი ქვეყანა იხილა, ნაცნობი, ათასჯერ  
ნანახი და განცდილი, მაგრამ მაინც სხვანაირი. ქვეყანა უფრო  
მზიარული და გაბრწყინებული ეჩვენა, ვიდრე აქამდე ეგონა.

იმ ერთ წამში სამი გაღიმებული სახე დაინახა — მირიან-  
ნის, დედასი და თეონასი. ყველას რალაც უხაროდა, თუმცა  
ეს სიხარული არ იყო ერთნაირი, ანდა ერთიანი. ყველას თა-  
ვისთვის უხაროდა რალაც, ცალ-ცალკე უხაროდა.

უცებ ზარი დაირეკა.

ოქროს თევზს გული კინალამ გაუსკდა. ასე ემართებოდა  
ყოველთვის, ზარის ხმა გულს უხეტოდა...

ოქროს თევზმა პლატონის დიდი თავი დაინახა, წრე შე-  
მოხაზა და ფსკერისკენ გაეშურა. ნიჟარას ამოეფარა, გაყუჩ-  
და, გაინაბა და მოლოდინით აღიჭურვა.

— ჰა... მიღიხარ... ჰო... მიღიხარ... — თქვა პლატონმა.

პასუხი არავის გაუცია და ოქროს თევზმა ვერ გაიგო ვისი  
მისამართით იყო ნათქვამი ეს სიტყვები.

მაგიდიდან სასწრაფოდ აკრიფეს თეთრეული. სამზარეუ-  
ლოდან ხმაურით გამოიტანეს ჭურჭელი და სუფრა გააწყვეს.  
პლატონი მაგიდას მიუჯდა.

ნიჟარას მოფარებული დაძაბული ადევნებდა თვალს მოძ-  
რავ ლანდებს, „რა შემართება, — ფიქრობდა, — რატომ ვლე-  
ლავე, რატომ მიცემს ასე საშინლად გული?“

პლატონმა რალაც გაურკვეველად წაიბურტყუნა. ოქროს  
თევზმა ვერ გაიგო, რა თქვა პლატონმა.

— მირიან, მამა ამბობს... ამბობს... როდის დაელოცოთო  
შენი ბინა?.. შენი ბინა?.. — გაიმეორა მამის ნათქვამი თეო-  
ნამ.

— როცა გენებოთ... როცა გენებოთ... — უპასუხა მირი-  
ანმა.

ოქროს თევზი ისევ ზევით ამოცურდა და ხავსიან კედელს  
მიადგა, ცდილობდა მირიანის სახე დაენახა. უცებ მისდაუნე-  
ბურად საზარელი ხმა აღმოხდა.

— მირიანი!

როგორც ჩანს, ოქროს თევზის ხმა არავის გაუგონია. ამ ხმას არც ერთი მათგანი არ შეუძრწუნებია, მხოლოდ თვითონვე დაეცა თავზარი. საკუთარმა ხმამ შეაშინა და ათრთოლებული კვლავ ნიქარას ამოეფარა.

ოქროს თევზი ცახცახებდა. იგი მიხვდა, რომ მირიანი მიდიოდა, სამუდამოდ ტოვებდა სახლს. ფარფლები მოუდუნდა, სასოწარკვეთილი დაესვენა ფსკერზე... მაგრამ იმედის სხივმა გაუელვა უეცრად გონებაში და ისევ ზევით ამოტივტივდა.

თუ მირიანი ნამდვილად მიდის, მაშინ, რა თქმა უნდა, მასაც თან წაიყვანს... რა თქმა უნდა, წაიყვანს, მაშ, აქ ვის დაუტოვებს?

მოულოდნელად კარგ გუნებაზეც კი დადგა. ერთი ორჯერ ნეტარებით გასრიალდა წყალში. მისთვის სულ ერთი იყო, სად იქნებოდა, ამ შუშაბანდში, თუ სხვაგან, მთავარია, მირიანთან ახლოს ყოფილიყო. ბოლოს და ბოლოს, მოწყინდა სულ ერთთავად შუშაბანდში ყოფნა. სხვა ქვეყნების ნახვა მოენატრა.

— წავედი, — გაიგონა მირიანის ხმა, — წავედი.

— მოიცადე, — გადაეღობა დედა, — ერთად ვისადილოთ... მოიცადე.

— არ მინდა... არ მშია... არა მშია.

ოქროს თევზი გაილურსა, სულგანაბული ელოდებოდა ნაცნობი ნაბიჯების მოახლოებას.

— ჰა... მიდიხარ... მიდიხარ... ჰა... — ბურტყუნებდა პლატონი.

ნაბიჯების მოახლოებას ელოდებოდა მოუთმენლად.

პლატონი წამოდგა. მირიანი კარებთან იდგა და ილიმებოდა:

ოქროს თევზს ეგონა, რომ მას უღიმოდა და ჟრუანტელმა დაუარა. თავბრუდამხვევი სისწრაფით დატრიალდა, კამარა შეჰკრა და ისევ შეჩერდა. ნელა მისრიალდა მინის კედელთან, შეძრწუნებული იხედებოდა გარეთ. შუშაბანდში უკვე იღარავინ იყო... არც მირიანი, არც სხვა...

— მირიანი — დაიყვირა, — მირიანი — მერმე ფარფლები დაჰკრა მთელი ძალით და წყლიდან ამოხტა.

ირგვლივ სიცარიელე იყო.

— მირიან!

გამწარებული ასკდებოდა კედელს, მაგრამ საშველი არ იყო.

მერმე მოეშვა, მოდუნდა. გული ტკიოდა, საშინლად ტკიოდა პაწაწინა გული. ისე წავიდა მირიანი, არც კი მოუხედავს. მოხედვა იქით იყოს, არც კი გახსენებია ოქროს თევზი.

არეული ნაბიჯების ხმა ახლოვდებოდა. მიხვდა, შინაურებმა მირიანი გააცილეს და უკან ბრუნდებიან. ახლა მიუხედებიან მაგიდას და ისადილებენ. კარგად დანაყრდებიან.

— მაინც გული დამწყდა, რომ წავიდა... გული დამწყდა... — თქვა დედამ ნამტირალევი, გაბზარული ხმით.

თეონამ გაიცინა:

— მადლობა ღმერთს, წავიდა. სულ მეშინოდა მირიანის... სულ მეშინოდა...

— რა ცუდი გოგო ხარ, თეონა, ცუდი ხარ, — ეს ისევ დედაა, — რას გიშლიდა?... ყოველთვის თავისთვის იყო, არაგის აწუხებდა... თავისთვის იყო.

ხოლო პლატონმა თქვა:

— დიდი გახდება, პო... კაცი... დიდი კაცი... წავიდა... პო... არ უნდა წასულიყო... არა... გამოგვადგებოდა... ალბათ, პო... გამოგვადგებოდა... გამოგვადგებოდა.

ოქროს თევზი ნიჟარის უკან მიყუჩულიყო. ერთი წამით მოეჩვენა, თითქოს ოჯახიდან მირიანს კი არა, უცხო ვიღაც წავიდა.

ნიჟარის უკან მიყუჩული ტიროდა; თან იმედი ჰქონდა, რომ მირიანი დღეს თუ ზვალ, უსათუოდ გამოივლიდა და წაიყვანდა... აქ არ დატოვებდა.

ყველა სულდგმული იმედით ცოცხლობს.

ნახევრად ბნელ სალუდეში დათომ თვალი მოჰკრა უფროს ძმას. ჯერ მარტო ეგონა, მაგრამ როდესაც მეორედ ჩაუარა სალუდეს, დაინახა: ვიღაც სამ მამაკაცთან ერთად ნიკელის ფეხებზე შეყენებულ: მალალ მაგიდასთან იდგა მირიანი.

ორ კვირაზე მეტია უფროსი ძმა არ უნახავს; ამასწინათ მირიანს საბურთალოში ერთოთახიანი ბინა მისცეს და გადასახლდა.

შინიდან არაფერი წაუღია. დათოს ეგონა, ოქროს თევზს მაინც წაიყვანდა, მაგრამ მირიანმა არც ოქროს თევზს მიაკითხა. საერთოდ, აღარ გამოუვლია ძველ სახლში.

დათო სალუდესთან წრიალებდა. ძმის ნახვა უნდოდა და შესვლა ერიდებოდა. კი არ ერიდებოდა, აინტერესებდა, უცუბ მირიანს რომ დაენახა, დაუძახებდა თუ არა?

ქარიანი დღე იყო და ციოდა, კოლმეურნეობის მოედანზე მაინც უამრავი ხალხი ფუსფუსებდა.

ავტობუსები, ტროლეიბუსები, ტრამვაები, ყველა ჯურის ავტომანქანები, ხალხი... ყველაფერი ერთმანეთში ირეოდა... პატარა მოედანი გამაყრუებლად გუგუნებდა.

დათომ გაიარ-გამოიარა სალუდეს წინ და მერმე ჩქარა, საქმიანი ნაბიჯით შევიდა დარბაზში. ისეთი სახით გადახედა ხალხს, თითქოს მათ შორის ნაცნობი ეგულებოდა და რატომღაც ვერ პოულობდა. ბოლოს მზერა მირიანზე შეაჩერა.

მირიანი მკლავებით დაყრდნობოდა მაგიდას, დაფიქრებულ ლუდის ტოლჩას ჩაშტერებოდა. ორივე მამაკაცს მირიანისთვის მიეპყრო თვალები. დათოს ისეთი შთაბეჭდილება დარჩა, თითქოს უფროსი ძმა რაღაც საინტერესო ამბავს ჰყვებოდა და ერთი წამით დადუმდა, ხოლო ამხანაგები მოუთმენლად ელოდნენ, როდის ამოიღებდა ხმას, როდის გააგრძელებდა დაწყებულ საუბარს.

დათო უცუბ გამობრუნდა. სანამ დარბაზიდან გავიდოდა, ირიბად მიხედა მირიანს. უფროსი ძმა უკვე ლაპარაკობდა. მხოლოდ ახლა დაებადა ექვი. შესაძლებელია, მირიანმა დაინახა და თვალი აარიდა. არ მოისურვა უმცროსი ძმის დაძახება.

გარეთ გამოსული უფრო თავის თავზე ბრაზობდა, ვიდრე მირიანზე. მაინც რა საჭირო იყო ეს თამაში? თუ ძმის ნახვა უნდოდა, პირდაპირ მისულიყო, თუმცა მირიანმა ხომ არ იცოდა, რისთვის შევიდა?.. იმანაც ხომ ისე მოაჩვენა თავი, თითქოს უმცროსი ძმა ვერ დაინახა...

ქუჩაში გამოსვლისთანავე ავთანდილ ხარაბაძეს მოჰკრა თვალი. სკოლის ამხანაგს პალტოს საყულო აეწია და ჭიბეებში ხელებჩაწყობილი სალუდეს წინ დაბორილობდა. ალბათ ნაცნობს ეძებდა, ერთი არაყი ან იაფფასიანი კონიაკი რომ გადაეკრა.



— ავთანდილ?

ავთანდილმა დათოსთან მიიღბინა. მისალმებამდე გამომცდელად მიაჩერდა დათოს თვალებში, ალბათ უნდოდა გამოეცნო, რისთვის დაუძახა, დასაპატიჟებლად თუ სალაზღანდაროდ.

— როგორა ხარ, აეთო? ।

— ვარ რა.

— ხომ არ დაგველია?

ავთანდილ ხარაბაძემ მორცხვად გაიღიმა.

— ფული არა მაქვს, ბიჭო...

— რახან შეგთავაზე...

— კი, კაცო... მაგაზე გაწყენინებ?!

ასეთი გარდასახვა პირველად ნახა დათომ. სკოლის ამხანაგს სალუდეში მოქმედების სრული თავისუფლება მიანიჭა და ისიც დატრიალდა. ეს იყო სულ სხვა კაცი, ან უფრო სწორად, ეს იყო კაცი, რომელიც დიდი ხნის განშორების შემდეგ თავის ქვეყანას დაუბრუნდა.

დათომ ისეთი შაგიდა ამოირჩია და ისე დადგა, რომ მირიანს მისი დანახვა შეძლებოდა. თავიც იმგვარად ეჭირა, ვითომ უფროსი ძმა ვერ დაინახა, ვითომ, წელან რომ შემოვიდა, სწორედ ამ კაცს ეძებდა.

ავთანდილ ხარაბაძემ, მიუხედავად იმისა, რომ დახლს უამრავი ხალხი აწყდებოდა; ხინკალი, არაყი და ლუდი მაშინვე მოარბენინა.

— ამ უბანში საიდან გაჩნდი, ბიჭო? — ჰკითხა დათოს,

— აქვე ვმუშაობ, ვერცხლის ქუჩაზე.

— აჰა!

დათო შინაგანად კმაყოფილი იყო, მოულოდნელად სკოლის მეგობარს რომ გადააწყდა. ცოტა ხნის შემდეგ უკვე თვითონაც სჯეროდა, სალუდეში რომ შემოიხედა წელან, თქოს ავთანდილ ხარაბაძეს ეძებდა.

ავთანდილ ხარაბაძე დიდხანს წრუპავდა არაყს და თვალეზი ნეტარებით ელულებოდა, დათომ უცებ გადაჰკრა და უსიამოვნოდ დაიქყანა, მაშინვე დააყოლა ლუდი.

არც ისეა საქმე, როგორც დათო ფიქრობდა, თურმე მირიანს მეგობრები ჰყოლია... ალბათ, მეგობრები არიან. სალუდეში უცხო ხალხთან რატომ შემოვიდოდა? რა თქმა უნ-

და, ჰყოლია მეგობრები, ანდა შეიძლება, ახლა შეიძინა...

მომწევანო წყალში თავისთვის დასრიალებდა მიტოვებულ ოქროს თევზი.

— ჰამე, თორემ გაცივდება. — სკოლის ამხანაგმა ხინკლანის თეფში მიუჩოჩა დათოს.

დედა და თეონა ერთხელ იყვნენ მირიანთან და კმაყოფილნი დაბრუნდნენ: მშვენიერი ბინა არისო. მარტოხელა კაცს მეტიც არ უნდოდაო.

— დათო, ის კაცი შენი ძმა ხომ არ არის?

— კი, მირიანია. — გვერდზე არც მიუხედავს, ისე უპასუხა დათომ.

— უბრად ზომ არა ხართ?

— არა, რატომ უნდა ვიყოთ უბრად?

— დიდად არ გამოცვლილა...

— მოიჭანე არაყო... ოღონდ შენთვის... მე ველარ დავლევ.

— მეც ვერ დავლევ, — თქვა ავთანდილ ხარაბაძემ. — ას გრამზე მეტი ჯერ არ დამილევია...

დათომ ეჭვით გადახედა სკოლის მეგობარს და გაიღიმა.

— რას იღიმები? არა გჯერა?

— რომ არ გიცნობდე, დავიჯერებდი.

— ჩემ სიცოცხლეში არ დამილევია ას გრამზე მეტი.

საწერ მაგიდაზე ხელნაწერი ფურცლები გაშლილი. დათო მივიდა და დახედა... მირიანის გაკრული ხელი იცნო: „მძიმე ტვირთივით მოვიშორე მოგონებები... აღარა მყავს ძველი ნაცნობები, ამხანაგები, მეგობრები... თუ ხანდახან ჩემს მეხსიერებაში რაიმე მოგონება ამოტივტივდება, აუტანელ ტკივილებს მაყენებს დავცდილობ, მაშინვე მოვიშორო, სამუდამოდ დავკარგო“...

— ძალიან გაითქვა შენმა ძმამ სახელი... ეტყობა, მაგარი გინმეა, მთავარი მანც ის არის, რომ ნიჭიერი კაცი ყოფილა... ამ ოთხი დღის წინ წავიკითხე მაგის მოთხრობები. მომეწონა. — თქვა ავთანდილ ხარაბაძემ და ხინკალი დაითრია.

სად შეიძლებოდა მირიანის მოთხრობები წაეკითხა ავთან-

დილ ხარაბაძეს? როგორც ჩანს, რომელიღაც გაზეთში ან ყურნალში დაიბეჭდა, სხვანაირად როგორ წაიკითხავდა...

— კი, საინტერესო მოთხრობებია. — დაუდასტურა მერმე სკოლის ამხანაგს.

— შენ, ალბათ, ხელნაწერი წაგიკითხა.

— რა თქმა უნდა... ისიც და ესეც...

— მახსოვს, სკოლის კედლის გაზეთშიც წერდა რაღაცებს...

მირიანი მიესალმა სტუმარს, თუმცა...  
მგონი ვერ იცნო.

რა თქმა უნდა, ვერა მცნობ, — გაედიშა მუსიკის მასწავლებელს, — მე ბუბა ვარ.

— ბუბა?

— შეგხედე თუ არა, მაშინვე გიცანი...

ავთანდილ ხარაბაძემ „პრიმის“ წითელი კოლოფი ამოაძვრინა ჯიბიდან და დათოს გაუწოდა. დათომ უარი უთხრა.

განა პირველ სკოლაში არ სწავლობდი?

მირიანმა დათოს გადახედა, მერმე თავი გააქნია.

— არა.

ბუბაეშბა დაიბნა...

ავთანდილ ხარაბაძე კმაყოფილებით ქაჩავდა სიგარეტს. თავისი წილი ლუდი უკვე დაელია და ახლა თამბაქოს ბოლში გახვეული გვერდზე იხედებოდა, ალბათ მირიანს უყურებდა. წყნარი, დამშვიდებული სახე ჰქონდა.

— გამაცანი რა, შენი ძმა, — თხოვა ბოლოს დათოს.

— ახლა?

— სხვა დროს სადა განახოთ ერთად.

— ახლა არ ღირს.

— შენს ძმას ბევრჯერ შევხვედრივარ აქ... პირველად სულ მარტო დადიოდა... ბოლო დროს სამნი დადიან ერთად. ეგ მაგიდა აქვთ ამოჩემებული. საოცარი კია, სულ შენი ძმა ლაპარაკობს... ისინი გაშტერებულებივით უსმენენ საინტერესოა, რა აქვს ამდენი სალაპარაკო, მეც სიამოვნებით მოვუსმენდი.

— ლუდი მოიტანე, ლუდი მაინც დავლიოთ.

ავთანდილ ხარაბაძე ლუდის მოსატანად წავიდა.

დათო ბუბა ეშბაზე ფიქრობდა. დიდი ხანია ამ ქალზე აღარ უფიქრობ. ახლახან გაახსენდა მხოლოდ და გუნება გაუფუჭდა, მოულოდნელი სევდით აივსო. სულ ეჩვენებოდა, რომ ეს ქალი შეურაცხყოფილი და დამცირებული იყო. ცხოვრებამ კუთხეში მიამწყვდია და მერმე ზურგი შეაქცია.

ამასვე ფიქრობდა საკუთარ თავზეც...

ერთხელ უცნაური სიზმარი ნახა: ვითომ უზარმაზარ მინის ჭურჭლად იქცა და მზით განათებულ შუშაბანდის კუთხეში იდგა. პირამდე იყო სავსე მომწვანო წყლით. მომწვანო წყალში დასრიალებდა დიდი, გრძელფარფლიანი ოქროს თევზი. მარტოდმარტო დაცურავდა. დათო ტკივილივით გრძნობდა: მის სხეულში წრიალებდა უცხო არსება. ამავ დროს იმასაც გრძნობდა, რომ თევზისთვის თვითონაც უცხო სხეული იყო. ოქროს თევზი წუხდა, თავის დაღწევა უნდოდა, მაგრამ ამოდ აღყდებოდა მინის გამჭვირვალე კედელს.

— ნახე, რა ლუდია, — ბქვა ავთანდილ ხარაბაძემ მოსვლისთანავე, — ახალი კასრი გახსნეს.

— კიდევ ხომ არ დაგველია არაყი?

— არა, დღეს საღამოს უნდა ვიმუშაო... ახლა წავალ დავიძინებ და მერმე საქმეს შევეუდგები.

— რას აკეთებ?

— ვთარგმნი.

— რას?

— დანტეს.

— დანტეს?

— ჰო, „ჯოჯოხეთს“.

— ენა იცი?

— კი.

— როდის ისწავლე?

— ექვსი წელი სხვა არაფერი მიკეთებია. მთელი სიჭაბუკე მაგას შევალე.

— „ჯოჯოხეთი“ ხომ არის თარგმნილი.

— კი. წავიკითხავს?

— არა. დავიწყე და ველარ დავამთავრე.

— ეტყობა ორი რომ თარგმნიდა... შიგადაშიგ კარგია... მაგრამ საქმე რა არის, იცი? — ისე უნდა თარგმნო, შენისთანა კაცი რომ დაიწყებს კითხვას; ბოლომდე წაიკითხოს.

— არსად არ მუშაობ?

— როგორ არა, საღამოს სკოლაში ვასწავლი ქართულს... პურის ფულად გეყოფნის მე და დედას, მეტი არც მინდა, ხანდახან შენსავით ვინმე თუ დამპატიებებს...

— როდის მორჩები თარგმნას?

— ალბათ სამ-ოთხ წელიწადში.

— თუ გჭირდება, ფულს გასესხებ... მე სამყოფზე მეტი ფული მაქვს...

— მერმე როდის გადაგიხადო? — გაიცინა ავთანდილ ხარაბაძემ. — არა, არ მინდა... ვიცხოვრებ ისე, როგორც აქამდე მიცხოვრია, ტყუილად რატომ დავიდო ვალი?!

— როგორღაც შეუტრაცხმყოფელია, ავთანდილ, სალუდესთან წრიალი და ლოდინი, ვინ შეგიყვანს, ვინ დაგალეწინებს ას გრამ კონიაკს? ეგეც რომ არ იყოს, დროს ხომ გაკარგვინებს შინიდან გამოსვლა და ხეტიალი?

— რა თქმა უნდა.

— ფულს მოგცემ, რამდენიმე ბოთლი ერთად იყიდე, მონიშარაგე.

— მაგისტანა ფუფუნების უფლება, მართალი გითხრა, არა მაქვს.

— მაშინ, აქედან რომ გავალთ, მე გიყიდი... მთელი თვე რომ გეყოს...

— გმადლობთ, დათო, კარგი ბიჭი ხარ. შენ ყოველთვის კარგი ბიჭი იყავი, კეთილი.

დათოს ესიამოვნა მეგობრის ნათქვამი და დამშვიდდა. ამ სიმშვიდემ მერმე ჩააფიქრა: „იქნებ იმიტომ შევეთავაზე ფული, რომ ასეთი რამ ეთქვა ჩემთვის. მის ნიჭსა და შრომისუნარიანობას ჩემი სიკეთე დაეუპირისპირე. რადგან... რაღაც ხომ უნდა ჰქონდეს ადამიანს, ან ტალანტი, ან სხვა რამ? მე არაფერი გამაჩნია და ეს „სიკეთე“ — მეგობრისადმი ზრუნვა მოვიგონე“...

სკოლის მეგობრებმა მალე დატოვეს სალუდე. მირიანი თავის ამხანაგებიანად იქვე დარჩა.

ავთანდილ ხარაბაძემ არც ფული გამოართვა და არც კონიაკი აყიდვინა. მადლობა გადაუხადა, დაემშვიდობა და წავიდა. დათო მარტო დარჩა სმაურთან მოედანზე. ცოტა გაიარა,

მერმე ნატო ვაჩნაძის ქუჩას აპყვა რუსთაველის პროსპექტი-  
საკენ.

აღმართზე მიმავალი ისევ სკოლის მეგობარზე ფიქრობ-  
და. ავთანდილ ხარაბაძე რატომ ეგონა ყოველთვის ლოთი და  
არაფრის მაქნისი? ნუთუ მუდამ ასე ცდებოდა, ანდა ცდება  
ადამიანის შეფასებისას?

მერმე მოეჩვენა, რომ თვითონაა არაფრის მაქნისი. შემ-  
ძვრალია სადღაც ჯურღმულში და უღირსი ადამიანები თავის  
ნება-სურვილზე ათამაშებენ...

მერმე უცებ გადაწყვიტა, ახლავე ენახა ის სახლი, რომელ-  
საც აშენებდა ოდესღაც. ასეთი სურვილი რომ დაებადა, თვი-  
თონვე გაუკვირდა, რადგან დღემდე საბურთალოსკენ გახედ-  
ვაც კი ეზიზღებოდა.

სახლი ისევე იდგა, როგორც მიატოვა. მეოთხე სართუ-  
ლისთვის ზემოდან აგურიც კი არ დაუდვიათ.

სამუშაოთა მწარმოებლად მაშინ დათოს მაგივრად გამოგ-  
ზავნეს ბებერი ინდაური — გამოცდილი მშენებელი:

სულ ორი სართული იყო ასაყვანი, სულ ორი სართული,  
ირგვლივ ყველაფერი დაერბიათ, გაეპარტახებინათ.

დათო სინანულით და გულისტკივილით შესცქეროდა მი-  
ტოვებულ შენობას, უფრო სწორად, შენობის ჩონჩხს. რა-  
ტომ ეგონა, თითქოს ის ერთი ოთახი მეოთხე სართულზე მი-  
სი იყო? დაპირდნენ... ამ დაპირებაზე ახლა ეცინება, მაგრამ  
მაშინ სჯეროდა. ნამდვილად სჯეროდა, რომ ის ერთი ოთახი  
მეოთხე სართულზე მისი იყო.

მსუსხავმა ქარმა დაუბერა და სახეში შეაყარა მტვერი, და-  
თომ სახე მოარიდა, დიდხანს ისრესდა თვალებს ხელისგულე-  
ბით.

ფანჯრიდან მოჩანდა დამეული სივრცე.  
ვარსკვლავებიანი სივრცე ოთახზე უფრო  
ნათელი იყო. ჭერიც უფრო ნათელი იყო,  
ჭერზე დაბორილობდა მირილობით ვარ-  
სკვლავი. რკინის აივანზე გასასვლელ  
ქარიდან გაჩირადდნებულ ქალაქს გას-  
ცქეროდა. ქალაქი დამის რეიდზე მდგარ  
გაჩიხჩახებულ ხომალდს ჰგავდა.

— მოგწონს? — დათოს გულით უნდოდა აქ-  
ა ურობა ციცინოს მოსწონებოდა.

— კარგია! — უპასუხა ციცინომ.

დათომ ირგვლივ შემოუარა სახლს, მერმე ნელ-ნელა აპყვა  
დროებით დაგებულ ხის კიბეს... მეოთხე სართულზე ავიდა.  
ზევით ქარი უფრო მეტად მძვინვარებდა. გულის წამლებად  
ზუზუნებდა. დათომ პალტოს საყელო აიწია და ყური ჩამალა.

— საით გირჩევნია ყურება, თბილისისა-  
კენ თუ წყნეთისაკენ?

— სულ ერთია... თუმცა, სჯობია თბილისს  
ვუყუროთ, ლამაზია, — უპასუხა ციცინომ.  
ისინი ბურბუშელაში ისხდნენ და ქა-  
ლაქს გასცქეროდნენ.

დათომ პიჯაკი გაიხადა. პიჯაკი ორ-  
ვემ მოიხურა.

ბურბუშელა ისევ ეყარა ოთახში, ოდ-  
ნოდ ქარს აქეთ-იქით მიმოეფანტა. დათო  
მარტო იდგა და უმიზნოდ იხედებოდა ფან-  
ჯრიდან, საიდანაც წყნეთის ფერდობები  
მოჩანდა.

მერმე გამობრუნდა და ისევ დაეშვა  
ხის კიბეებზე.

— სად მივდივართ, დათო?

— შენ არ იცი, ხუთი-ათი წლის შემდეგ  
აქ რა იქნება.

— რა გვეჩქარებოდა, ჩვენც ათი წლის  
შემდეგ მოვსულიყავით.

დათო დაფიქრებული მიდიოდა მიწაყრილზე, ვიღრე შე-  
ნობა თვალს მიეფარებოდა, ერთხელ კიდევ მოხედა.

სხვა ნაგებობათა და ამწეებს შორის ოთხსართულიანი შე-  
ნობის ჩონჩხი იდგა.

საშინლად ციოდა.

დათო აიბუზა. თავი მთლიანად ჩარგო პალტოს საყელოში  
და თავისი გზით წავიდა.

ცხოვრება რალაცას უმაღავდა — დიდსა და მნიშვნელო-  
ვანს, თითქოს არ ენდობოდა.

„რა მოხდება ხვალდან სამუშაოზე რომ არ გამოვცხადდე? უკვე აღარ შემიძლია იმ ჭურღმულში ჩასვლა. რა უნდა მოხდეს, არ წავალ... არ წავალ... არ წავალ... პლატონი და ნიკო გაგიჟდებიან. ჯანდაბამდისაც გზა ჰქონიათ, ერთსაც და მეორესაც! ეგ კი არა, ამ სახლიდანაც უნდა წავიდე... რაც შეიძლება, მალე უნდა წავიდე!“

დათო უკვე კარგა ხანია ფიქრობდა ოჯახიდან წასვლაზე. პლატონის სიახლოვეს ველარ იტანდა. ველარ უძლებდა მოგონილ სიყრუესა და ენაბლუობას.

ყოველდღიურად სარდაფში ჩასვლაც გულს ურევდა. გულს ურევდა ყოველდღიური შეხვედრა შავ ნიკოსთან, დამპალი ტყავეულისა და საღებავების სუნი...

იმ ბნელ სარდაფში ერთადერთი ნათელი ყრუ-მუნჯი გოგონა იყო, რომელსაც ადგილობრივი წარმოების მწვანე ეაკეტი ეცვა მუდამ. დიდი, წყლიანი თვალები ჰქონდა, კუპრით შავი თვალები, მეტყველი...

გოგონა საათობით იდგა ხოლმე და აღტაცებული შესცქეროდა დათოს. სულ იმას ელოდა, რას დაავალებდა, რომ დავალემა გასაოცარი მორჩილებითა და სიყვარულით მაშინვე შეესრულებინა.

— რა გინდა, ლაურა? გინდა რამე? — ეკითხებოდა დათო. — რაც გინდა, მთხოვე.

მაგრამ ლაურას არ ესმოდა დათოს ნათქვამი. სახე დაეძაბებოდა და ხელების მოძრაობით თხოვდა, გამაგებინე, რა მითხარიო.

ერთ დღეს დათოსთვის მოულოდნელი ამბავი დატრიალდა. როდესაც ლაურას ელაპარაკებოდა, საამქროდან გამოვარდა შავგვრემანი, ტანმორჩილი ვაჟი. ხელში ჩაბღუჯული ჰქონდა ტყავის საჭრელი ალესილი დანა. ასე გაცოფებული კაცი ჯერ არ ენახა.

შავგვრემანი ვაჟი დათოსთან მიიჭრა. გამწარებული რაღაცას ეუბნებოდა ხელების ქნევით. დათო მიხვდა: ემუქრებოდა, მერმე ვაჟმა ლაურას მოჰკიდა ხელი და ღონივრად მოიქნია საცოდავი, სუსტი გოგონა იატაკზე დაეცა.

დათომ წაქცეულისაკენ გაიწია, მაგრამ შავგვრემანი ვაჟი გადაეღობა. დათოსაც ჰკრა ხელი და დანა მოუღერა. საამქროებიდან ხარაზები გამოცვივდნენ დანებითა და ჩაქუჩებით შე-



იარაღებულები. შავგვრემანი ვაჟი იქაურობას მოაცილეს, ლა-  
ურა წამოაყენეს და წაიყვანეს.

მერმე ყველა ერთად მიაღვა დათოს, ყველა ერთად იქ-  
ნევდა ხელებს, ყველა ერთად ცდილობდა ეთქვა დათოსთვის,  
თუ რატომ მოხდა ეს ამბავი. მერმე ყველანი ერთბაშად მო-  
შორდნენ და საამქროებში შეიმაღნენ. დათოს რისხვა და მუ-  
ქარა დაუტოვეს.

მაგრამ დათო არც რისხვას, არც მუქარას არ შეუძრწუნე-  
ბია. შეაძრწუნა მოულოდნელმა ზიზღმა, რომელიც მათ თვა-  
ლებში დაინახა.

მუშებს დავალება მისცა და მაშინვე ამოვიდა სარდაფიდან.

მერმე დიდხანს ფიქრობდა იმ ზიზღზე, ასე დაუფარავად  
რომ მიაფრქვიეს სახეში. ეს დაუმსახურებელი და უსაფუძვლო  
ზიზღი აწუხებდა, გულს ტკენდა. ამ პატარა, სუსტი გოგონა-  
სადმი თავიდანვე სიბრაღულით განიშპვალა და ეგონა, ერთ-  
გვარ მფარველობას გაუწევდა სათუთი და ნაზი დამოკიდე-  
ბულებით. მართლაც, ერთხელ საკუთარ თავში აღმოაჩინა ლა-  
ურასადმი წრფელი, უანგარო, უფრო სწორად, დაძმური სი-  
ყვარული.

მერმე უნდობლობამ მაინც თავისი გაიტანა. არავინ დაი-  
ჯერა, რომ ეს იყო უანგარო ურთიერთობა და დათოსაც სა-  
კუთარი თავისადმი ექვი აღეძრა, რწმენა გაეზზარა, მოეჩვენა,  
რომ ისინი მართალნი იყვნენ, რომ ამ წრფელსა და უზა-  
დო დამოკიდებულების მიღმა ქვეცნობიერად ანგარება იმა-  
ლებოდა.

დათოს აღარ შეეძლო ამ ამბებზე ფიქრი. იგი თავის ფან-  
ჯარასთან იდგა და ქუჩას დასცქეროდა.

გარეთ თოვდა.

ირიზად ბარდნიდა.

დედა და თონა სამზარეულოში ხმამაღლა ლაპარაკობდ-  
ნენ.

ყრუ კედელზე, იქ, სადაც ერთი აგური იყო გამოვარდ-  
ნილი, აბუხული ბედურა იჯდა. მოწყენილი უმზერდა თოვას.

„ესთერ, ესთერ, მითხარი, რა იქნა ჩემი მარგალიტი?!“

ფანჯარას მოშორდა. ოთახში აღარ იდგა მირიანის საწოლი.  
დაშალეს და სადღაც გაიტანეს.

სამზარეულოში ისევ ხმამაღლა ლაპარაკობდნენ დედა და

თონა. დათო ყურს არ უგდებდა და მხოლოდ ხმაური ესმოდა.

დათომ არ იცოდა, რა გაეკეთებინა. ეს უქმად ყოფნა ტანჯავდა.

შუშაბანდში გავიდა. უცებ გაახსენდა, რომ დღეს ოცი დეკემბერი იყო.

— თონა, — გასძახა დას, — დღეს რა რიცხვია?

— ოცია. ისიც გითხრა, რა თვეა?

ოც დეკემბერს, დღის პირველ საათზე, უნივერსიტეტში დისერტაციას იცავდა ნოდარ ნიქარაძე.

დმერთო, როგორ დაავიწყდა.

საათზე დაიხედა, ხუთი სრულდებოდა. ექვსზე რესტორან „თბილისში“ ბანკეტი ექნება. უხერხული არ არის, დისერტაციაზე არ ყოფილა და ბანკეტზე მივიდეს?

— სულ შენი ბრალია, — თქვა თონამ.

— რა არის ჩემი ბრალი? — გაოცდა დედა.

— შენი ბრალი ის არის, რომ სანახავად ვეღარ მივდივარ, ყველანი მივიდნენ, ჩემს გარდა.

დათომ სმენა დაძაბა.

— უსათუოდ უნდა მიხვიდე, თონა...

— როგორღა მივიდე დედა... მრცხვენია, მეუხერხულე-ბა. არაფერიც არ მოხდებოდა ბუბა მასწავლებლის კლასში რომ დავრჩენილიყავი.

— რა ვიცი. მაშინ რატომღაც ავღელდი.

— ამბობენ, ძალიან ცუდად არისო.

— უსათუოდ მიდი, შვილო, ინახულე...

დათომ სწრაფად გზიარა შუშაბანდი და სამზარეულოს კარი შეაღო.

— სად უნდა წავიდეს? — ჰკითხა დედას.

... — ბუბა მასწავლებელთან. — დედის ნაცვლად თონამ უპასუხა.

— შენ არა გაქვს იქ მისვლის უფლება და არც წახვალ! დედამ და შვილმა კარტოფილის ფცქვენას თავი მიანებეს და გაოცებულებმა შეხედეს დათოს.

— ვინ გითხრა, რომ უფლება არა მაქვს?

— მე გეუბნები. — დათო ახლა დედას მიუბრუნდა. — აკი სხვა კლასში გადაიყვანე?! შენ არ აუქრძალე ბუბასთან სიარული!

— ბაშინ სხვა იყო...

— მას შემდეგ არაფერი შეცვლილა.

დედა სახეზე წამოწითლდა. სიბრაზემ თვალებში გამოჟონა.

— მართალია, მე ავუტკბალე, რომ იცოდე, სწორადაც მოვიქეცი.

— თუ ეგრება, ნურც ახლა მისცემ იქ მისვლის ნებას.

— ეგ არ არის შენი საქმე!

— ძალიან ცუდად მოვიქეცი იმ ქალს. მაინც რა ჩაიძინა ასეთი? ქმარს გაეყარა იქნებ აღარ შეეძლო იმ ქმართან ცხოვრება. — დათო ერთი წამით შეყოვნდა. მერმე ხმადაბლა, თითქოს ჩურჩულით თქვა: — იცი რა... მართალი გითხრა... ზოგიერთმა ქალმაც ვერ უერთგულა ბოლომდე თავის ქმარს, ვერ შეინახა ქმრის სიყვარული...

— ვის გულისხმობ?

— რა ვიცი... ისე ვთქვი... სხვათა შორის.

დედა რაღაცას ამბობდა. მაგრამ დათო ყურს აღარ უგდებდა. თავის დას მიშტერებოდა. თეონა სახეშეცვლილი ეჩვენა. ცხვირი და ტუჩები ცოტათი წამოსიებოდა და საშინლად დამსგავსებოდა პლატონს. დის სახეზე აქამდე ამგვარი ცვლილება არ შეუშინებია და უკვირდა, განსაკუთრებით გაუკვირდა ის, რომ თეონასა და პლატონს შორის მოულოდნელად დიდი მსგავსება აღმოაჩინა.

დათო როდესაც შინიდან გამოვიდა, დარწმუნებული იყო. ნოღარ ნიჟარაძის ბანკეტზე მიდიოდა. რა თქმა უნდა, დააშავა, დისერტაციის დაცვას რომ არ დაესწრო, მაგრამ თუ ბანკეტზეც არ მივიდოდა, ეს უკვე მეორე დანაშაული იქნებოდა.

ეზოში ბავშვები თამაშობდნენ. თოვლის დიდ ბაბუას აკეთებდნენ.

ხრახნილი კიბით ზურციკო ჩამოდიოდა. ცალი ხელი რკინის მოაჯირისათვის ჩაეწყო, მეორე ხელით თოვლის გუნდა მიეხუტებინა მკერდზე.

— ოჰ... გამარჯობა ზურციკო!

— გაგიმარჯოს, ძია დათო!

— სად დამეკარგე, ბიჭო? შეიძლება მეგობრის ასე დავიწყება?!  
— სოფელში ვიყავი.

— ამდენი ხანი?

— კი, ბებია მომიკვდა. — ზურიკომ ჩამოათავა კიბე და პირდაპირ ბავშვებისაკენ გაეშურა.

დათო მობრუნდა და თვალი გააყოლა პატარა ბიჭს. არაფრით არ ეგონა, თუ ამდენი ხნის უნახაობის შემდეგ ასე ცივად შეხვდებოდა ზურიკო.

— ზურიკო! — დაუძახა დათომ.

პატარა ბიჭი მოტრიალდა.

— მოდი აქ, ზურიკო.

ზურიკო ადგილიდან არ დაძრულა, თოვლის გუნდა ახლა ორივე ხელით ეჭირა. ხელებზე მწვანე თათმანები ეცვა.

— ხვალ სალამოს ამოდი ჩემთან, კარგი?

ბავშვმა გაიღიმა. დათომ ვერ გაიგო, რას ნიშნავდა ეს ღიმილი. ბავშვის ღიმილით ვერ განსაზღვრავდა, ზურიკო ავიდოდა თუ არა ხვალ სალამოს დათოსთან.

ტროტუარებზე თოვლი დატკეპნილი და მოლიპული იყო და სიარული ჭირდა, მით უმეტეს, დაღმართზე. გარეთ ყოფნა მაინც სასიამოვნო იყო. სასიამოვნო იყო ამ კრიალა და სუსხიანი ჰაერით სუნთქვა.

„რა ეშველება ამ ბიჭს?.. რა ეშველება?.. თუ ბებია აღარაჰყავს, ვილა მოუვლის?..“

ნორა ცხოვრების ნახევარს გასტროლებზე ატარებს. სად უნდა ათრიოს ეს ბავშვი?..“

დათო ფრთხილად მიდიოდა მოსრიალებულ თოვლზე. ეშინოდა დაღმართზე არ დაცემულიყო. „მაინც რატომ შემხვდა ასე გულგრილად ზურიკო?.. ეგებ თოვლში თამაში უფრო უხაროდა, ვიდრე ჩემთან შეხვედრა... ნორა მაინც მენახა სადმე, გავიგებდი, რას უპირებს ამ ბავშვს?!“

ნორამ უცებ გადაიხადა საბანი და შიშველმა სხეულმა გაიეღვა.

ლალიძის წყლებთან ჩავიდა დათო და რუსთაველის პროსპექტს მარჯვნივ გახედა. დათომ ახლალა აღმოაჩინა, რომ არავითარი სურვილი არ ჰქონდა ნოდარ ნიჟარაძის ბანკეტზე მისვლისა. „რა მოხდება ახლა ბუბასთან რომ მივიდე? არადა, რა

საბაბით მივაკითხო?“ დათო ისევ აჰყვება ქუჩას და კონსერვატორიის წინ დაიწყო წრიალი. მეორე სართულიდან მომღერალი ქალის გამყვივანი ხმა მოისმოდა. კონსერვატორიის კარი შეაღო და შევიდა. სკამზე მთვლემარე დარაჯის გარდა ვერავინ ნახა.

— კანცელარიაში თუ არის ვინმე? — ჰკითხა ბერიკაცს.

— ყველა წასულია, ვინ გინდოდათ?

— მინდოდა გამეგო ბუბა ეშბას მისამართი.

— ბუბა ავად არის. მარჯანიშვილის მოედანზე ცხოვრობს, ნომერი არ მახსოვს. ერთხელ ვიყავი, ღირექტორმა გამაგზავნა, აი, დიდი სახლი რომაა, აფთიაქის თავზე...

— გკოდნიათ და ეგ არის!.. მადლობელი ვარ.

დათოს მოეჩვენა, თითქოს იცოდა ბუბა რომ მარჯანიშვილის მოედანზე ცხოვრობდა. იცოდა და მერმე დაავიწყდა. ხოლო ახლა ისევ გაახსენდა, როცა ბერიკაცმა უთხრა.

თოვლი მხოლოდ პროსპექტის ტროტუარებზე იდო. მანქანები ბორბლებს ქვემოდან ტალახიან თოვლ-ჰყაპს აშხეფებდნენ. თოვლ-ჰყაპი სიცივის შეგრძნებას ამძაფრებდა. ახლა თითქოს სიცივე ნოტიო იყო და ძვალსა და რბილში ატანდა.

რატომ მოეჩვენა, თითქოს იცოდა ბუბა ეშბა რომ მარჯანიშვილის მოედანზე ცხოვრობდა? ანდა ერთხელ, ნოდარ ნიჟარაძისაგან წამოსული, შუალამით, მთვრალი, რატომ დაბოდიხობდა იმ სახლთან? დათოს აღარ ახსოვდა, სად დაშორდა მაშინ ჯიმშერ ქალდანს. როცა ცოტათი გონს მოვიდა, აღმოჩნდა, რომ მარჯანიშვილის მოედანზე იდგა ხეს მიყრდნობილი.

დათომ რუსთაველის პროსპექტი გადასჭრა და ოპერის თეატრისაკენ წავიდა ჩქარი ნაბიჯით.

ტროლეიბუსის გაჩერებასთან ბევრი ხალხი ირეოდა.

ისევ მოვიდა № 3 ტროლეიბუსი და ამჯერა დაც ვერ მოახერხა ბუბამ ასვლა.

— ბუბა!

ბუბამ გვერდზე მოიხედა.

დათომაც გვერდზე მოიხედა. ჯერ ეგონა, უნებურად ხომ არ წამომცდა ბუბას

სახელი და შეკრთა. მაგრამ მეორედაც  
გაიგონა იგივე ძახილი:

— ბუბა!

ბუბასთან მივიდა შუა ხნის, ჭაღარა მამაკაცი. ჭალს აშკარად შეატყო, არ ესიმოვნა ჭაღარა მამაკაცის დანახვა...

ტროლეიბუსში გაჭირვებით ავიდა დათო. უკან მონახა დასადგომი ადგილი და კონდუქტორს ფული გადააწოდა. ისევ ზურჯო და ნორა გაახსენდა და უსიამოვნოდ შეიშმუშნა. ნორას გახსენება სევდას გვრიდა, ეჩვენებოდა, რომ იმ ღამეს მოტყუებული და გაძარცული გამოვიდა ნორას სახლიდან...

ტროლეიბუსმა ნახევარწრე შემოხაზა მოედანზე და გაჩერდა.

როდესაც დათო სადარბაზო შესასვლელში შევიდა, აღელდა, მუხლებმა უმტყუნა და კინალამ ჩაიკეცა. „კაცმა რომ თქვას, რატომ მივდივარ ახლა ბუბასთან“. დათოს ისეთი შთაბეჭდილება შეექმნა, თითქოს მთელმა ქალაქმა იცოდა, რომ ბუბა ავად იყო.

პირველი სართული აიარა, მეორე... მესამე...

მეოთხე სართულზეც სამი კარი იყო. მხოლოდ ერთ კარს არ ეწერა გვარი და სახელი. დათომ გადაწყვიტა, ნამდვილად აქ ცხოვრობს ბუბა ეშბაო... უფრო ახლოს მივიდა კართან, წარწერა შეამჩნია. კარზე ფანქრით მიეწერა ვიღაც ანიკოს: „ბუბა, ვიყავი შენთან და არ დამხვდი. 10.6“. ზოგჯერ რა სასაცილოები არიან ადამიანები... „არ დამხვდი“... თითქოს უამისოდ ვერ მიხვდებოდა ბუბა, რომ ანიკოს მისვლისას შინ არ იყო.

უკან გამობრუნება უკვე აღარ შეეძლო. ზარის ღილაკს თითი დააჭირა... ნეტავი გამოცვლილია თუ არა ბუბა?..

კარი ჭაღარა მამაკაცმა გაუღო.

— ვინ გნებავთ?

დათომ ჭაღარა მამაკაცი იცნო და დაიბნა. ვერაფრის თქმა ვერ მოახერხა.

— ვინ გნებავთ ყმაწვილო?

— ბუბა ეშბა.

— ბუბა აქ აღარ ცხოვრობს.

დათომ შეკითხვისათვის ძალა მოიკრიბა.

— ხომ ვერ მეტყვიტ, ახლა სად ცხოვრობს?

— ეგ არ ვიცი... მაგრამ იმას კი ვეტყვიტ, ახლა სად არის... ბუბა ავადაა, საავადმყოფოში წევს...

დათო ისე დაეშვა კიბეებზე, როგორც სიზიფე, რომელსაც მწვერვალამდე ატანილი ლოდი პირველად დაუგორდა...

საბანკეტო დარბაზი გაჩირალდნებული იყო. დათოს გამოჩენას ყოყინით შეეგებნენ მეგობრები. მათ უზარმაზარი სუფრის ერთი კუთხე ეკავათ. დანარჩენ სუფრას დათოსთვის უცხო ადამიანები უსხდნენ.

დათო ნოდარს გადაეხვია და გადაკოცნა, მერმე მოუბოდიშა, დისერტაციის დაცვაზე რომ ვერ მოახერხა მისვლა.

ნოდარმა მხიარულად გადახვია ხელი და სუფრას წარუდგინა:

— ჩემი სკოლის მეგობარი — მშენებელი ინჟინერი დათო ნათიშვილი!

ოთარ სალაყაიასა და გელას შორის ჩასვეს, მაგიდის გარშემო ისხდნენ ყველა ასაკის მამაკაცები და ქალები. მამაკაცების უმრავლესობა უკვე შეზარხოშებული იყო და სიმღერას მოითხოვდა. სამი ვაჟი ერთმანეთს ხმას უწყობდა. ეტყობა, მობანკეტეთა სიმღერის იმედი ამ სამ ვაჟს უნდა გაემართლებინა. გალაყაყებულმა, პირმსუქანმა თამადამ ჩანგალი შემოჰკრა ბოთლს, საზოგადოებას წესრიგისაკენ მოუწოდა. მერმე წამოდგა, შემოსწრებული ექსტრად აღდგერძელა, უსურვა პირად ცხოვრებასა და საქმეში წარმატება. ყველამ ერთხმად შესვა დათოს სადღეგრძელო. მერმე თამადამ დიდი ყანწი მოითხოვა, პირამდე გაავსო ღვინით და დაგვიანებისათვის დათო დააჯარიმა.

ყანწი გადმოაწოდეს. „რა დაღევს ახლა ამხელა ყანწს?! სისულელე არ იყო ახლა აქ მოსვლა?!“ დათო ღვინის დასალევად მოემზადა, ყანწს ჩახედა და ღრმად ამოისუნთქა... „ბარბაროსობაა, აბა რა არის?!“ ნელ-ნელა შეუდგა სმას...

...თოვლითა და მზით განათებულ პალატაში ბუბა მარტო იწვა. პალატა თეთრი და სუფთაა ქალღღვივით. დათომ შესვლისთანავე შენიშნა წითელი მიხაკები, რომლებიც სასთუმალთან მდგარ მაგიდაზე ეწყო. მაშინვე ინანა ხელცარიელი რომ მოვიდა.

ბუბამ გაიცებით შეხედა შემოსულს.

— გამარჯობათ, ბუბა.

— ოჰ, დათო... კინალამ ვერ გიცანით.

— როგორა ხართ?

— აქ საიდან გაჩნდით, დათო...

— გავიგე, ავად ყოფილხართ და სანახავად მოვედი.

— რატომ წუხდებოდით?!

— რა შეწუხებაა. მე ისე მინდოდა თქვენი ნახვა... სახლშიაც კი მოგაკითხეთ... მაგრამ იქ თურმე აღარ ცხოვრობთ.

— კი... კარგა ხანია იქიდან გადავსახლდი.

— როგორა ხართ, ბუბა, თავს როგორ გრძნობთ.

— ვერც მე, ვერც ექიმებმა, ვერაფერი გაუუგეთ ჩემს ავადმყოფობას... მგონი, კარგად არ უნდა ვიყო... ფეხზე რატომ დგახართ, დათო, სკამი მოიდგით და დაჯექით.

დათომ საწოლთან მიიდგა სკამი და დაჯდა, ბუბას ისეთი სახე ჰქონდა, თითქოს დათო ამ სახეს უშუალოდ კი არა, წყალში არეკლილს ხედავდა. ბუბა მკრთალად იღიმებოდა.

— თქვენ ალბათ ჩვენს ოჯახზე ნაწყენი ხართ.

— არა... არა... უფრო სწორად, ვიყავი და წყენამ უკვე გადამიარა. მირიანი კიდევ უარს ამბობს, პირველ სკოლაში არ მისწავლიაო?

— დღემდე ვერ მივხვდი, ბუბა, მირიანმა რატომ უარყო...

— მე ვიცი... — შეაწყვეტინა ბუბამ, — სხვა დროს გეტყვი... ახლა არ მსიამოვნებს გახსენება.

— ძალიან ბევრს ვფიქრობდი თქვენზე.

— მართლა?

— იცით რა, როდესაც თქვენზე ვფიქრობ, რაღაცნაირად ვიცვლები ხოლმე, ასე მგონია, უფრო კეთილი ვხდები, გულახდილი, რასაც მანამდე ვმალავდი, მინდა მთელ ქვეყანას გავანდო.

დათო ცოტახანს შეჩერდა და ჩაფიქრდა. იგრძნო, მთელი პალატა მიხაკების სურნელით იყო გაჟღენთილი და ეს სურ-



ნელი იქაურობას იერს უცვლიდა. პალატას ნათელი ფერი ეღვრებოდა...

დათო აღტაცებულმა შეძახილებმა და ტაშისცემამ გამოარკვია, დაკლილი ყანწი ტუჩებიდან მოიშორა და ისევ თამადას დაუბრუნა.

— საკმელი მთავრით! — ბრძანა თამადამ.

— დაჯექი და რამე შეჭამე, შე უღმერთო, — უთხრა გელამ. — რამ დაგაღვივინა ამხელა ყანწი.

დათო დაჯდა. შექების შეძახილებითა და ღვინით გაბრუნებულმა სუფრას გადახედა.

— რომ იცოდე, უკვე მთვრალი ვარ.

— აბა რა იქნები. აქ ვერც ერთმა ვერ დალია ეგ ყანწი და შენ გამოგიპირეს... — გელამ მოხარული ბეჭის მოზრდილი ნაჭერი გადმოუღო დათოს. მერმე ტყემალი მიაწოდა.

— უნივერსიტეტში რატომ არ მოხვედი? — ჰკითხა ოთარ სალაყაიამ.

— გვიან გამახსენდა, დღეს რომ ოცი იყო.

— პირდაპირ სუფრაზე მოსვლა, რასაკვირველია, სჯობია.

— აცალე ახლა ჰამა, — შეუტია გელამ. — მოკვდება ეს საწყალი, თუ რამე არ დააყოლა.

— როგორ დაიცვა დისერტაცია?

— ბრწყინვალედ! — ერთგვარი ღირსებითა და სიამაყით უპასუხა გელამ. — თუ იმის ნახევარი მაინც მართალია, რაც იქ თქვეს, გენიოსი ყოფილა, ძმაო.

— თავიანი ბიჭი რომაა, მაგას არ უნდა ლაპარაკი. — დაუდასტურა ოთარ სალაყაიამ.

დათოს ოთარ სალაყაია და გელა ამარაგებდნენ საკმელებით. გამწარებული ჰამდა, თან გრძნობდა, ღვინო მოერია და საკმელი ვერაფერს უშველიდა.

სუფრის ერთ კუთხეში სიმღერა წამოიწყეს.

გელამ მხარი გაჰკრა დათოს და გადასჩურჩულა.

— ეგ არის, შენს წინ რომ ზის.

— ვინა?

— ციცინოს საქმრო.

- რომელია?
- შენს წინ რომ ზის, ცოტა მარჯვნივ.
- მელოტის გვერდით.
- არა, თვითონ მელოტი. ამას წინათ ნიშნობა ჰქონიათ, ახალ წელს დაქორწინდებიან.
- ეგ ხომ უკვე მითხარი.
- მაყრად არ წაპყვები?
- ჩვენს დროში ნიშნობა ცოტა სასაცილოა.
- მაგათ ძველი ყაიდის ოჯახი აქვთ... ტრადიციების მუზეუმი. ვერა ხელავ რა სერიოზულობით ეკიდება ყოველ სადღეგრძელოს... დიდ მნიშვნელობას ანიჭებს.
- ალბათ იდიოტია!
- რა თქმა უნდა.
- ისე, რა კაცია?
- კანდიდატია, ფილოლოგიურ მეცნიერებათა... მე მაინც ვერ გავიგე, რატომ დაშორდით?
- რალა დროს ეგ არის.
- გული არ გწყდება?
- რა მნიშვნელობა აქვს მწყდება თუ არა... მეცოდება ციციანო მაგ იდიოტის ხელში... თუმცა რა, გათხოვება უნდა და გათხოვდა.
- არა, ბიჭო, შენ გადაგყვებოდა.
- აქ საიდან მოხვდა ეგ ბითური?
- მართალი გითხრა, არ ვიცი...
- უცებ ჯიმშერ ქალღანი წამოდგა და თამადას ერთი სადღეგრძელოს თქმის უფლება სთხოვა. თამადამ უარი უთხრა. ჯიმშერი გაწითლდა, გასივდა და ბურღულუნით დაჭდა თავის ადგილზე.
- ეს ვილაა? — ჰკითხა დათომ გელას და მიუთითა პირდაპირ მჯდარ მთვრალ კაცზე, რომელიც უკვე მთელი საათი განუწყვეტლივ ელაპარაკებოდა ქერა ქალიშვილს.
- ეგ მწერალია... ს-ი.
- მე უფრო ახალგაზრდა მეგონა.
- ამ ბოლო ხანებში გაქალარავდა, ისე ახალგაზრდაა...
- მერმე თმას ვერ შეიკრეჭს და დაივარცხნის, ბუს რომ დამსგავსებია? ეგ საიდანღა მოხვდა აქ?
- ჯიმშერმა მოიყვანა.

— მეტს აღარ დავლევ, საშინლად დავთვერი, — დათომ თავი მიაბრუნა და ავთანდილ ხარაბაძის მოწყენილ სიფათს წააწყდა. — ავთანდილიც აქ ყოფილა.

— კი, აქ არის.

დათო ოთარ სალაყაიას მიუბრუნდა:

— ოთარ, თუ ძმა ხარ, მითხარი, შენს განყოფილებაში ხომ არ წევს ვინმე ბუბა ეშბა.

— არა!

— როგორ გავიგო, სად წევს ეგ ქალი?

— ძალიან გინდა?

— ძალიან.

1 — ხვალ 12 საათზე დამირეკე და გეტყვი.

— მართლა დაგირეკო?

— თუ არ დაგეზარება, გამოიარე.

7 — კარგი, გამოგივლი, ახლა ავდგები და წავალ... დავთვერი... მშიერ გულზე არ უნდა დამელია... წავალ, თორემ შემომელახება ეგ იდიოტი... რა გაბლენძილი ზის.

— სად უნდა წახვიდე, — უთხრა ოთარ სალაყაიამ, — ვერა ხედავ, ის გოგონები როგორ გიყურებენ, თვალებით შეგკამეს... მაინც რა ღამაში ხარ, შე ოხერო!

— მე ვარ ღამაში? — გაეცინა დათოს და გახედა გოგონებს, რომლებიც მისგან ხელმარცხნივ ისხდნენ. გოგონები მართლაც გულუბრყვილო ალტაცებით მიჩერებოდნენ დათოს.

— თუ გული გეუბნება, წადი, — გადაულაპარაკა გელამ, — მართლა არ ატეხო ერთი ამბავი, სირცხვილი არ აჭამო ნოდარს!

თამადა სადღეგრძელოს წარმოსათქმელად წამოდგა, ხელში ღვინით სავსე დიდი ბროლის ჭიქა ეჭირა.

სიმღერა შეწყდა.

ნოდარ ნიქარაძე რატომღაც ოფიციალტებს გაჰყვა.

— ნოდარის დედა არ ყოფილა? — იკითხა დათომ.

— კი, იქაც იყო და აქაც... შენს მოსვლამდე წავიდა... ალბათ დაიღალა.

თამადა გაშეშებული იდგა. მოთმინებით ელოდა ხალხის დაწყნარებას.

ბუბა გულადმა იწვა. თვალები დახუჭული ჰქონდა. ფრთხილად სუნთქავდა. ავადმყოფს ალბათ ჩაეძინა, დათო სკამზე გაქვავებული იჯდა და არ ინძრეოდა. ემინოდა ძილი არ დაეფრთხო ბუბასათვის. საბანზე ხორბლისფერი მკლავები მოწყვეტილად ეყარა. ბავშვივით ძილში გაელიმა ბუბას და ტურები შეერხა. მერმე თვალები გაახილა და იკითხა:

— შეძინა?

— მე მგონი, გეძინათ.

— დიდი ხანია მძინავს?

— არა... სულ ოთხი-ხუთი წუთი იქნება.

— კარგი სიზმრები ვნახე.

— ალბათ, ძილში იღიმებოდით.

— მართლა?

დათომ თავი დაუქნია და თვითონაც გაიღიმა.

— მგონი სიცხემ დამიკლო... უკეთესად ვგრძნობ თავს.

დათო გადაიწია და მაჯაზე შეავლო ხელი. სკამი უფრო ახლოს მისწია საწოლთან. მერმე დაიხარა, შუბლზე ლოყა დაადო ბუბას, ხელიც და შუბლიც ცხელი ჰქონდა. უფრო მეტად— შუბლი, საშინლად უხურდა.

— დედაჩემი ასე მატყობდა ხოლმე ბავშვობაში, მქონდა თუ არა სიცხე, — უთხრა დათომ.

— თქვენ როგორ ატყობთ, მაქვს სიცხე?

— ცოტათი, — იცრუა დათომ. ბუბას ხელისგული ტურებთან მიიტანა და აკოცა...

— რამ გამოგაშტერა, — უთხრა დათოს ოთარ სალაყაიამ, — მიაქციე იმ გოგოებს ყურადღება... დაწყდნენ შენი ცქერით, თვალები ამოჟღამდათ.

ციცინოს საქმრომ ცარიელი ბროლის ჭიქა მიაწოდა დათოს და სადღეგრძელოს შესმა სთხოვა.

დათომ ჭიქა გამოართვა და სანამ მელოტი სასიძო სკამზე დაჭდებოდა, ჰკითხა:

— იცით თუ არა თქვენ, ვერის წილის მახლობლად, ერთ ჩიხში, გდია უზარმაზარი ლოდი, ზედ, ტრადიციის მიხედვით, მიჯნურები სხდებიან რამდენიმე საათით. ქვა ჯდომისაგან გაუცვეთიათ, რაც იმას ამტკიცებს, რომ დიდი ხნის უნდა იყოს...

— რამე წარწერა თუ აქვს? — იკითხა ფილოლოგიის მეცნიერებათა კანდიდატმა.

— სამწუხაროდ, მგონი, არ უნდა ჰქონდეს.

— აბა, უბრალო ლოდი ყოფილა.

— მეც ასე ვფიქრობდი, როგორც ჩანს, შეიძლება საამშენებლო მასალად გამოვიყენოთ.

— შეუმოწმებლად ნუ გამოიყენებთ... ეგების მართლაც ჰქონდეს ისტორიული მნიშვნელობა.

— კი, ბატონო, ეგრე მოვიქცევით. — დათომ ცარიელი ჭიქა ღვინით შეავსო და გელას ჩურჩულით ჰკითხა, — ვისი სადღეგრძელო დალიეს?

— დაჯექით, რა ფეხზე დგახართ! ბრძანა თამადამ.

— დაჯექით კი არა, დასხედით, რეგვენო! — ჩაიბურღლუნა ჯიმშერ ქალდანმა.

დათო: ხომ კარგი ვქენით, რომ წამოვედით?

გელა: აღარ მოეშვი იმ კაცს და რა მექნა?!

დათო: ძალიან გავუჭირე, არა, საქმე?

გელა: ისიც კაი ვინმე ყოფილა, ყველაფერზე სერიოზულად გპასუხობდა. მაინც რას ერჩოდი, რა მაგის ბრალია?

დათო: ციციხოზე ვარ ნაწყენი და გაბრაზებული... თუმცა არც ისე... იცი რა, გელა, მე უკვე შევეჩვიე, რომ არავის ვუყვარვარ.

გელა: კარგი ახლა, ნუ ამატირებ. იქნებ შენ შეაჩვიე სხვები, რომ არავინ გიყვარს.

დათო: ვითომ არ მიყვარდა ციციხო?

გელა: მაგას ახლა ვერ გამოარკვევ... ალბათ არ გიყვარდა. ისე რატომ დაშორდებოდი?!

დათო: მეც ეგ მიკვირს. იმ ღამის შემდეგ, ნიჩბებით რომ გამლახეს, რალაც მოხდა ვერ გამიგია.

გელა: თუ ძმა ხარ, ყველაფერს ნუ ართულებ... მოვლენებს უფრო მარტივად უნდა შეხედო.

დათო: გელა... იცი რა, გელა, ხანდახან მეჩვენება, საკუთარი თავი დავკარგე და ველარ ვბოულობ.

გელა: რას დაკარგავდი, რაც არ გქონია.

დათო: შენ ხუმრობ და მართლა ეგარეა. მართლა ვეძებ

ჩემს თავს... ხანდახან ვამჩნევ, რომ ჩემში რაღაც არის ჩემზე უფრო ძლიერი და არ მემორჩილება...

გ ე ლ ა: მაგალითად, ახლა შენში შენზე უფრო ძლიერია დღენო... რას იცინი... ეგრე არ არის?

დ ა თ ო: დაახლოებით ეგრეა.

გ ე ლ ა: აუხვიე ახლა და წადი... გინდა, სახლამდე მიგაცილო?

დ ა თ ო: არა, მე თვითონ წავალ... გელა, გიყვარს უკაცრიელი ქუჩა, ქუჩაში შენს მეტი რომ არავეინაა?

გ ე ლ ა: გაგიყვებით მიყვარს!

დ ა თ ო: ესეც შენი თბილისური თოვლი! გაქრა, აღარ არის! უკეთეს შემთხვევაში რამდენიმე საათით მოდის ხოლმე... წავედი ახლა... წავალ და დავიძინებ... შენ რას იზამ?

გ ე ლ ა: მეც წავალ და დავიძინებ, დავილაღე.

დ ა თ ო: მოიცადე, რა გეჩქარება, ერთხელაც არ გაუცივია... ალბათ ჰგონია, თუ გაიცინა, სამეცნიერო ხარისხს დაჰკარგავს.

გ ე ლ ა: წაიკითხე დღევანდელი გაზეთები?

დ ა თ ო: არა.

გ ე ლ ა: ომის ვეტერანთა თათბირზე მიდის შენი ძმა მოსკოვში, დელეგაციის ხელმძღვანელია.

დ ა თ ო: ეგვეც ვერ გამიგია.

გ ე ლ ა: რა?

დ ა თ ო: რატომ ვეჭავრები მირიანს.

გ ე ლ ა: ეჭავრები კი არა, ის არ გინდა...

დ ა თ ო: რაღაც ვერ მაპატია... მე ვიცი რა... მაგრამ თქმა მიჭირს, არა, არ მიჭირს, უბრალოდ ვერ ვახერხებ იმის გამოთქმას... ვგრძნობ, ჰო, ვგრძნობ...

გ ე ლ ა: შენ გეჩვენება, დათო.

დ ა თ ო: ამ ორი დღის წინათ სალუდეში ვნახეთ მე და ავთანდილმა, ზედაც არ შემომხედდა... როდის მიდის მოსკოვში?

გ ე ლ ა: თუ არ ვცდები, ხვალ მიდიან.

დ ა თ ო: ან გაზეთი, ანდა სხვა მატყობინებს მირიანის ამბებს... ბავშვობაში ძალიან გვიყვარდა ერთმანეთი, სულ ერთად ვიყავით... ხვალთან სამუშაოს ძებნას ვიწყებ, გელა... შემეცოდა ჩემი დაწყებული მშენებლობა... ისევე ისე დგას

სახლი, როგორც დავტოვე, ერთი აგურიც კი არ მიუმატებიათ... აღარ მისმენ, გელა? მოგწყინდა უკვე ჩემი წუწუნი?

გ ე ლ ა: არა, დავიღალე, მეძინება.

და თ ო: ყოველთვის ეგრეა... როცა რაიმე ტკივილის გამხელას იწყებ, მეგობრებს ეძინებათ ხოლმე... მაგრამ... მეც ერთს გეუბნები და მეორეზე ვფიქრობ. გახსოვს ბუბა?

გ ე ლ ა: კი, როგორ არ მახსოვს... ძალიან ცივა, ფეხები გამეყინა.

და თ ო: წავედი... ნახვამდის, გელა...

გ ე ლ ა: ნახვამდის.

ისინი ლალიძის წყლებთან დაშორდნენ ერთმანეთს და თავთავიანთი გზებით წავიდნენ.

დათო აღმართს შეუღდა.

„ასე გვიან რომ არ იყოს, ნორასთან ავიდოდი. გავიგებდი, რა დაემართათ, რას აპირებენ. ალბათ ზურიკოს საბავშვო ბაღში მიაბარებს?.. საბავშვო ბაღი რას უშველის? ნორა სწორედ საღამოობით არის დაკავებული... რა ეშველება ამ ხალხს?!“

ეზოში შესვლისთანავე შეამჩნია, ნორას არ ეძინა: შუქი ენთო. ხრახნილი კიბით გაეშურა მეორე სართულისაკენ.

ყვავილების მაღაზიაში მიხაკები იყიდა და ბუბასთან წავიდა. ბუბა ახალგაღვიძებული დახვდა, კარგ გუნებაზე იყო, დამშვიდებული სახე ჰქონდა.

ყვავილები მაგიდაზე დააწყო დათომ და სკამი საწოლთან დაიდგა.

— გუშინ რომ წახვედი, — უთხრა ბუბამ — საშინელი სიმარტოვე ვიგრძენი. კიდე კარგი, ცოტა ხნის შემდეგ შენი მეგობარი ექიმო შემოვიდა, ბევრი მაციანა თქვენი ბავშვობის ოინები მიაძბო. როცა ვუთხარი, მეც პირველ სკოლაში ვსწავლობდითქო, გაგიჟდა. ოღონდ ვერაფრით გამიხსენა.

— მეც ბერს ვფიქრობ და ვერ ვახერხებ გახსენებას, სკოლაში არ მახსოვხარ, ბუბა.

— ოთხი კლასით წინ ვიყავი. ცოტა კი არ არის ოთხი წელი.

— სიცხე გაიზომე?

— კი, თითქმის არა მაქვს... შენ წარმოიდგინე, დღეს ძალიან

კარგად ვგრძნობ თავს. თუ ასე გაგრძელდა, ალბათ მალე გამოვეწერები.

— მთაყარია, მორჩე. რა მნიშვნელობა აქვს, როდის გამოვეწერება, მე სულ შენთან ვიქნები, აღარ მოგაწყენ. დღეიდან მაინც თავისუფალი ვარ, სამუშაოდ აღარ წავედი.

— რატომ?

— აღარ შემიძლია, ბუბა... ყოველ დღით, შინიდან ისე გავდიოდი, თითქოს წინასწარგანზრახული დანაშაულის ჩასადენად მივეშურებოდი.

— წუხელ სწორედ მაგაზე ვფიქრობდი, დათო... შენი თავი უნდა მონახო, ბნელმა ადამიანებმა ჩაგიგდეს ხელში და თავის ნება-სურვილზე გათამაშებენ. ოღონდ იცოდე, თუ დანაშაულზე წაასწრეს, შენც იმათ გვერდით აღმოჩნდები. კარგი გიქნია, დღეს რომ არ წასულხარ.

ერთი რამ ვერ გამიგია, ბუბა, საიდან ტრიალებს იმ სარდაფში ამდენი ფული. მე ჯერ არ მინახავს კაცი, მანდ შეკერილი ფეხსაცმელი რომ ეცვას... საიდან ტრიალებს ამდენი ფული?!

— არა, ნამდვილად კარგად მოიქეცი.

— ბუბა... შენ რომ არ მენახე, შეიძლება არც კი დამენებებინა თავი მაგ სამუშაოსათვის.

ოთახში ორჯერ შემოვიდა დედა. დათოს თვალები არ გაუხელია, ვითომ ეძინა, დედა მესამედაც შემოვიდა და მხარზე ფრთხილად შეახო ხელი.

— დათო, გაიღვიძე... უკვე თერთმეტის ნახევარია.

დათომ თვალები გაახილა.

— იყოს რა, მე არსად მეჩქარება.

— პლატონმა წასვლისას დაგიბარა, არ დაიგვიანო.

— ძალიან ვწუხვარ, მაგრამ პლატონის დანაბარებს ვერ შევასრულებ.

— რას ჰქვია, ვერ შეასრულებ?!

— იმას, რომ აღარ მინდა, დედა, იქ მუშაობა.

— ნუ ზარმაცობ ახლა, ადექი და ჩაიცვი. კაცი იქ გელოდება და შენ აქ ნებივრობ ლოგინში.



— ადგომით ავდგები, აბა რას ვიზამ?! ოღონდ იმ სარდაფში აღარ ჩავალ.

— შენი დაწყებული საქმე შენვე უნდა დაამთავრო. ხალხს შენი იმედი აქვს.

— უფრო დიდი საქმე მქონდა დაწყებული და აღარ დამამთავრებინეს. — დათო წამოდგა საწოლიდან და ფლოსტებში წაჰყარ ფეხები, — ახლა ისეთი საქმე უნდა დავიწყო, რომელსაც დავამთავრებ.

— რა დროს ხუმრობაა. დაგაგვიანდა. აღარ დაწვე. მე ბაზარში მივდივარ.

დედა პასუხს აღარ დაელოდა, წავიდა. გინდაც დალოდებოდა, დათო არ აპირებდა პასუხის გაცემას. ნეტარებით გაიზმორა და პირის დასაბანად გაეშურა. ოთახებში თბილოდა, ეტყობოდა, კაფელის ღუმელში ცეცხლი დილაადრიან დაენტოთ. აქამდე მირიანი აპობდა ეზოში შეშას, მერმე ამოჰქონდა და ცეცხლს ანთებდა.

დათო არასოდეს ყოფილა ისე კმაყოფილი, როგორც დღეს. შვევით ამოისუნთქა, თითქოს დიდი ხნის უიმედო ტყვეობას დააღწია თავი. სიამოვნებას გვრიდა ისიც, ზოგჯერ რომ წარმოიდგენდა, რა ამბავი ატყდებოდა, როცა გაიგებდნენ დათოს მოუსვლელობის მიზეზს.

პირი დაიბანა და ტანსაცმელი ჩაიცვა. მერმე სამზარეულოში გავიდა, დედას საუზმე მაგიდაზე დაეტოვებინა. წაიხემსა. წუხანდელი ღამითაც კმაყოფილი იყო. დიდხანს ილაპარაკეს დათომ და ნორამ ზურიკოზე, რომელსაც ფარდის იქით უზრუნველად ეძინა. საბრალო ქალს სხვა გზა არა აქვს, პატარა ბავშვი თან უნდა წაიყვანოს, ქალაქიდან ქალაქში უნდა ათრიოს, სასტუმროდან სასტუმროში... მერმე ნორამ თქვა: ზურიკო ამ ბოლო ხანებში ძალიან გამოიცვალა, აღარ მელაპარაკება, გულჩათხრობილი გახდაო.

როცა დათომ წამოსვლა დააპირა, ნორამ ხელზე ხელი შეავლო და უთხრა:

— თუ გინდა დარჩი, ერთი-ორი საათით დარჩი, მაინც გრძელი ღამეა.

დათო კმაყოფილი იყო წუხანდელი ღამითაც. არ დარჩა. თავისთვის ძალაც კი არ დაუტანებია, ისე წამოვიდა, არავითარი სურვილი არ ჰქონდა ნორასთან დარჩენისა.

აივნის მხრიდან კარზე დააკაკუნეს.

დათო? ძია ვანოს გაულო კარი. ძია ვანო საქმიანად შემოვიდა ოთახში.

— გამარჯობა, დათოჯან. ამ განცხადებაზე ხელი უნდა მომიწერო! — ძია ვანომ უბიდან დააძრო ოთხად დაკეცილი ფურცლები და გაშალა.

— რა განცხადებაა?

ბერიკაცმა პირდაპირ დაიწყო განცხადების კითხვა, ათითხუთმეტი წუთი მაინც კითხულობდა. ამხელა „არზა“ იმიტომ იყო შედგენილი, რომ ძია ვანო ძველი სახლის კაპიტალურ რემონტს მოითხოვდა. განცხადების წაკითხვის შემდეგ დათოს ისეთი შთაბეჭდილება დარჩა, ამ წუთშივე თუ არ გაასწრებდა, ჭერი ჩამოენგრეოდა თავზე.

— როგორია? — იკითხა ბოლოს ბერიკაცმა, — მე დავწერე, აი! ყველამ მოაწერა ხელი, მარტო თქვენ დამრჩით. მაინც ყველას თანამდებობა და პროფესია მივაწერე, უნდა იცოდნენ, კაცო, რა ხალხი ცხოვრობს ამ დასაქვევ ეზოში. მე კი ვიცი, რა ხალხიც არის, მე რომ მკითხო, ერთსაც არ გავაჩერებდი...

ძია ვანომ კითხვა განაგრძო:

1. ვარლამ ხუნდაძე — ინჟინერი.

ძია ვანომ თვალებში შეხედა დათოს და თქვა: — ესეც ინჟინერია და შენც! ამის აშენებული სახლი ორ წელიწადში ინგრევა — აფერისტია! ორჯერ წაართვეს ცოლი და სიბერეში დაიბრუნა.

2. კონსტანტინე დავითაშვილი — პედაგოგი.

— ჰო! პედაგოგი... ამისმა მოწაფემ გოგოს გულისათვის დანა დაარტყა ამხანაგს... ერთი ამის პედაგოგობაც!.. ნამდვილი ჩანჩურაა...

3. ბენო ჩიჩუა — ქარხნის მთავარი ბუღალტერი.

— აი, ეს არის, რაც არის, ქვეყანა შეჭამა. სისხლის სამართლის დამნაშავე!

4. ალექსანდრე ჭიმშელეიშვილი — დამსახურებული ექიმი.

— ჩვარის ყოფილი მუსუსი. ბოლო ხანებში საყვარლებმაც გამოაპანლურეს. უფულოდ არ აკეთებს ოპერაციას.

5. ოლიფანტე ბასარია — გადამღგარი პოლკოვნიკი, ბენსიონერი.

ძია ვანომ საჩვენებელი თითი წინ გაიშვირა და პირით ისეთი ხმა გამოსცა, თითქოს იარაღი ისროლა. მრავალმნიშვნელოვნად გაიღიმა და თქვა:

— შენც იცი, რა კაცია, სროლა უყვარდა...

6. ლოლა დორეული — გასტრონომის მოლარე.

— გასტრონომის ვირთხა. ფულის ანგარიში არ იცის, ყოველთვის გაკლებს.

7. ნორა ზანდუკელი — ესტრადის მომღერალი (Эстрадная певица).

— ჩემზე უკეთ შენ იცნობ, ბოლო ხანებში მოუხშირე, აი, სიარულს.

8. თინათინ სამხარაძე — ფარმაცევტი.

— ესეც კახაა!

დათოს გული შეუწუხდა და კითხვა შეაწყვეტინა.

— ნულარ წაიკითხავ, ძია ვანო, ყველას ვიცნობ. ძია ვანო, ამიტომ არ უყვარხარ მეზობლებს, საინტერესოა, მე რომ მოვაწერ ხელს და სხვა მეზობელთან შეხვალ, იქ რას იტყვი ჩემზე?

— შენ მოაწერე, მე ვიცი, რასაც ვიტყვი! — ბერიკაცმა გაიციინა და ხელის მოსაწერად გაუწოდა ქალაღდი.

დათომ პირველივე ავტომატიდან დაუბრუნა ოთარ სალაყაიას. რატომღაც დარწმუნებული იყო, ბუბა პირველ საავადმყოფოში იწვა. მაგრამ ოთარმა უთხრა: ყველა განყოფილებაში დავრეკე და ასეთი ავადმყოფი ჩვენთან არ წევსო.

მთელი დღის გეგმა ჩაეფუშა, არა მარტო გეგმა...

სულ სჯეროდა, დღეს უსათუოდ ნახავდა ბუბას.

რამდენი საავადმყოფოა თბილისში, სად უნდა ეძებოს ახლა? არადა ბუბასთან შეხვედრის მოლოდინით ცხოვრობდა. ფიქრებით ისე შეეთვისა, ახლა ბუბაზე მახლობელი ადამიანი ქვეყნად არა ჰყავდა, მაგრამ საკვირველი კი იყო, რაც უფრო მეტს ფიქრობდა ბუბაზე და ეთვისებოდა, მით უფრო ბურანში ეხვეოდა ბუბას სახე. ცდილობდა, მეხსიერებაში აღედგინა ნაკვთები, გამომეტყველება... ვერ ახერხებდა. ეჩვენებოდა, რომ უფრო სხვანაირი იყო, ვიდრე მას ჰყავდა წარმოდგენი-

ლი. წარმოსახვა მენსიერებაში ჩარჩენილ სახეს იერს უცვლიდა.

— ღმერთო, რა ქალია!

— ვინა?

— ბუბა ეშბა!

ავტომატიდან საავადმყოფოებში რეკვა და ძებნა უაზრობაა, უკეთესი იქნება, თუ გელასთან მივა რედაქციაში. იქ ტელეფონია და ადვილად გაიგებს, სად წევს ბუბა.

გელა საქმიანად მოეკიდა ბუბას ძებნას. ჯერ, რა თქმა უნდა, გაუკვირდა, როცა შეიტყო დათოს დამოკიდებულება ბუბასადმი. ისიც კი უთხრა, ნამდვილი გოგი ხარო, მაგრამ მეგობარს მაინც უნდა დახმარება, გინდაც ის ნამდვილად იყოს გოგი.

— მაშ პირველ საავადმყოფოში არ აღმოჩნდა?..

— არა.

— მოდი, ჩვენ დავრეკოთ... — გელა ცოტა ხნით ჩაფიქრდა. — დავრეკოთ... ალადაშვილის საავადმყოფოში. — ტელეფონების წიგნი გაშალა, მონახა საჭირო ნომერი და დარეკა. — ისე, რომ იცოდე, კარგი ხელი მაქვს, ალო ალო! ხომ ვერ მეტყვი, თქვენთან წევს თუ არა ასეთი ავადმყოფი — ბუბა ეშბა? აჰა, გმადლობთ.

გელამ ყურმილი დადო და გაიღიმა.

— რა გითხრეს?

— რას მეტყოდნენ... აკი ვთქვი, კარგი ხელი მაქვს-მეთქი, რად გინდოდა ოთარ სალაყაია, პირდაპირ ჩემთან უნდა მოსულიყავი.

— რომელია ეგ ალადაშვილის საავადმყოფო?

— როგორ არ იცი. კამოს ქუჩაზეა.

— აჰა, ვიცი.

— ისე, შავი ნიკო როგორა გყავს.

— ერთი მაგისი.

— რომ იცოდე, ცუდი ახალი წელი გაუთენდება, ამ უჯრაში მიდევს მიაგისთვის დამზადებული ატომური ყუმბარა... ისე დავარბიო, შენი პლატონი არისტოტელედ მოეჩვენოს.

გელა თავისსავე ხუმრობაზე სიცილით მოკვდა.

— ძალიან მეექვება. შენ სულ ეგრე ტრაბახობ.

— აღდგომა და ხვალეო.

— თუკი ეგრეა, კაცი შენ ყოფილხარ...

გელა კმაყოფილი იჯდა თავის მაგიდასთან, სიგარეტს აბო-  
ლებდა.

— წუხელ ძალიან შევუბერეთ, არა? — გელა სკამზე გას-  
წორდა და სალაპარაკოდ მოემზადა, მაგრამ დათოს ლაპარა-  
კის თავი არ ჰქონდა, მაშინვე წამოდგა.

— მე წავალ, გელა, ბუბა უნდა ვნახო. არ შემიძლია.

დათომ ზოოპარკთან ტაქსი დაიჭირა... ჯერ ყვავილების მა-  
ლაზიაში შეიარა, მერე საავადმყოფოს მიადგა.

დარაჯმა არ შეუშვა.

— არ შეიძლება, ჩაჩავამ აკრძალა.

— რატომ?

— იმიტომ, რომა ბევრნი მოდიოდნენ. ახლა აღარავის  
უშვებენ.

— ეგ ჩაჩავა ვინ არის?

— ვა, ჩაჩავა არ იცი, კაცო?! პროფესორი

— აჰა... პროფესორს რომ ვთხოვო?

— თხოვე.

— სად შეიძლება ნახვა!

— დღეს ველარ ნახავ... წავიდა... ხვალ გამოიარე.

დათომ მიხაკები დარაჯს გადააწოდა და უთხრა — აუტა-  
ნეო... როდესაც კარებში გადიოდა, დარაჯის ხმა დაეწია:

— ჩვენი ძმა, რა ვუთხრა, ვისგან არისო?!

დათოს პასუხი არ გაუცია.

სუსხიანი დღე იყო. ქარი სახურავების თავზე მიერეკე-  
ბოდა თეთრ ღრუბლებს.

პატარა ბიჭი ყვავილებით მოჩითულ, მწვანე მინდორზე  
მიდიოდა. მინდორს ყოველი მხრიდან ლურჯი, უსაზღვროდ  
ლურჯი ცა დამხობოდა. ბიჭი უზრუნველად მიაბიჯებდა. მო-  
ულოდნელად შეაშფოთა ცხენის ფლოქვების ყრუ ხმაურმა. შე-  
შინებულმა მოიხედა, მისკენ მირბოდა გაგიჟებული, გახელებუ-  
ლი შავი ცხენის რემა. შავი, მაღალი ცხენები გასაოცარი  
სისწრაფით ბავშვისაკენ პირზე ქაფმორეულები გრიგალივით  
მიჰქროდნენ. განწირულმა ბავშვმა იყვირა და თვალეზე  
აიფარა ხელები. მაღალი, შავი ცხენები შემზარავი ჭიხვინით

უახლოვდებოდნენ, ფლოქვების თქარათქური მიდამოს აყრუებდა. რემამ ბავშვს გადაუარა, არც ერთი ცხენი არ შეხებია, მხოლოდ ქარმა წააქცია ბავშვი... თავზარდაცემულმა თავლები დაჰყიტა... ცხენების ოფლიან მუცლებს და პრიალა ნალებს ხედავდა. რემამ გადაიგრიალა და წავიდა. ბავშვმა წელი აითრია. თვალუწვდენელ მინდორზე გარბოდა რემა, შავი, მაღალი, გაოფლიანებული ცხენები გრიგალივით მიჰქროდნენ... უკან რჩებოდა ფლოქვებით გადათელილი მწვანე ბალახი, მიწაზე დაწვენილი გადაჯეგილი ყვავილები...

ოქროს თევზი უმირიანოდ ცხოვრებას შეეჩვია. ჯერ გაუჭირდა, მაგრამ მერმე თანდათანობით შეეგუა მარტო ყოფნას.

გადიოდა დღეები და მირიანი არ აკითხავდა. იმედი ჰქონდა, მოვიდოდა და წაიყვანდა, მაგრამ აღარ მოვიდა. აღარ მოაკითხა და ოქროს თევზი მარტო დარჩა. იმედი გადაიწყვიტა...

ბოლოს და ბოლოს, შეეჩვია უმირიანოდ ცხოვრებას. თუმცა ეს ცხოვრება ძველს არა ჰგავდა. მოლოდინი და მირიანთან შეხვედრა აღარ აღელვებდა. დღეები მოწყენილი და ერთფეროვანი იყო. მინის გამჟვირვალე კედლები მთლიანად დაიბურა მწვანე ხავსით. გარეთ გახედვა უკვე აღარ შეიძლებოდა. ოქროს თევზი ვერ იხედებოდა და არც აინტერესებდა, რა ხდებოდა მინის კედლებს მიღმა. თავისთვის ცხოვრობდა, გარე სამყაროს მოწყვეტილი.

მოგონებები ასულდგმულებდნენ, კარგი, კეთილი მოგონებები. მირიანთან შეხვედრის მთრთოლვარე წუთები, ტკბილი საუბრები, სიყვარული...

ოქროს თევზი ფიქრიანი და გულჩათხრობილი გახდა.

სულ ეჩვენებოდა, მირიანი შინიდან გააძევეს და მოიშორეს. ადამიანებზე შეეცვალა წარმოდგენა.

მაგრამ დღეს, როცა ყველა წასული ეგონა, მოულოდნელად დათო დაადგა თავზე და ჰკითხა:

— როგორა ხარ?

ოქროს თევზმა არაფერი უპასუხა, რადგან სჯეროდა, რომ დათო უგულოდ ეკითხებოდა, ისე — სხვათა შორის.

— მიგატოვა მირიანმა? მიგატოვა?

— ჰო, მიმატოვა... — ჩაილაპარაკა თავისთვის ოქროს თევზმა.

— სულ მარტო დარჩი, შე საწყალო!.. მარტო დარჩი.

— ჰო, მარტო ვარ.

— შენი მარტობა მაწუხებს ხოლმე. მარტობა... ერთხელ დამესიზმრა, თითქოს მე ვიყავი მინის ეს ჭურჭელი... თითქოს მე ვიყავი, და შენ ჩემში ცხოვრობდი. ჩემში ცხოვრობდი... მე ვწუხდი, რომ ჩემს სხეულში უცხო არსება მოხვდა, ვწუხდი... თან მომეჩვენა, რომ შენც შეწუხებული იყავი, რადგან სხვა ჭურჭელში აღმოჩნდი... მომეჩვენა...

ოქროს თევზი სიხარულის თრთოლვამ აიტანა.

— მაგრამ ის სიზმარი იყო... სიზმარი...

— სიზმარი?

— მერე ხანდახან მეგონა, მართლა ცხოვრობდი ჩემში... ხანდიხან... იქნებ მართლა ჩემში ცხოვრობ?.. იქნებ?

— მე მინდა ვიცხოვრო, მინდა შენში ვიცხოვრო.

— ახლაც ასე მგონია, თითქოს ეს ჭურჭელი მე ვარ და შენ ჩემში ცხოვრობ... ახლაც ასე მგონია.

— ვცხოვრობ! — სიხარულით იყვირა ოქროს თევზმა, — მე ყოველთვის ვიცხოვრებ!

ამაყად გასრიალდა წყალში. ოქროს თევზს ბევრჯერ განეცადა სიხარული, სიამაყე კი — არასოდეს. ღირსეულად ეჭირა თავი, ფარფლებს ნელა, დინჯად ამოძრავებდა, ისე, როგორც ეს შეჭფერის დარბაისელ თევზს, რომელმაც სიცოცხლეშივე მოიპოვა დიდი დიდება, ეზიარა უკვდავებას.

— მე ახლა დაგაპურებ, ოქროს თევზო, დაგაპურებ...

დათო მატარებლის გასვლამდე ნახევარი საათით აღრე მივიდა სადგურზე, მატარებელი პირველ ლიანდაგზე იდგა. ვაგონების წინ ხალხი ფუსფუსებდა. გულმა ვერ გაუძლო, მაინც გადაწყვიტა, მირიანი გაეცილებინა. რალაც გაუგებრობა მოხდა ძმებს შორის, უფროსი ძმა ნაწყენია. უმცროსი ძმა, იმიტომ რომ უმცროსია, ვალდებულია მოვიდეს და გაარკვიოს ეს გაუგებრობა. თუ დამნაშავეა, ბოდიშიც უნდა მოუხადოს...

დათომ არ იცოდა, რომელი ვაგონით მიემგზავრებოდა მირიანი, ბოლოდან დაპყვა, ბაქანზე გულდასმით ათვალეირებდა მოსაუბრე ხალხს, არც ფანჯრებზე მიმდგარი მგზავრები გამორჩენია...

ყველა ვაგონის წინ გაიარა.

ახლა თავიდან გამოჰყვება მატარებელს. ისე მოდიოდა, თითქოს ნაბიჯებს ითვლიდა, მირიანს, ალბათ, გაუხარდება. რა თქმა უნდა, გაუხარდება... განა არ იცის დათომ, როგორ უყვარს უფროს ძმას. მაშინ აღელდა და რალაც სისულელე უთხრა. სად ვაგონილა, ძმას ძმა ეჭავრებოდეს. გელა მართალი იყო... უბრალოდ მივა, გადაეხვევა და გადაკოცნის. გულით მიულოცავს გამარჯვებას...

— დათო! — მოესმა ქალის ხმა.

დათომ გვერდზე მიიხედა. შემოსასვლელში მორბოდა სახეგაბადრული მანანა, ხელში პატარა ჩემოდანი ეჭირა.

მანანამ დათოსთან მიიღბინა, მოეხვია და აკოცა. დათო დაიბნა, ვერაფრით მიხვდა, რაში იყო საქმე. იმ ღამის შემდეგ მანანა ყოველთვის გაურბოდა, თავს არიდებდა...

— ჩვენს გასაცილებლად მოხვედი, არა? — ჰკითხა მანანამ, პასუხს აღარ დაელოდა და ლაპარაკი განაგრძო, რატომღაც მეგონა, დღეს შენც იქნებოდი... თუმცა არც ჩვენები ყოფილან... ეს ისე, საიდუმლოდ მოხდა, მხოლოდ მირიანის ამხანაგები იყვნენ.

— არაფერი არ ვიცი, მანანა.

— დღეს მე და მირიანმა ხელი მოვაწერეთ დათოს მუხლებმა უმტყუნა, კინალამ ჩაიკეცა.

— არ ვიხარია?!

— როგორ არა... მაგრამ ეს ჩემთვის ისე მოულოდნელი ამბავია...

— ყველასთვის მოულოდნელი იქნება... მამაჩემი გაგიჟდება,

— არც ბენომ იცის?!

— არა, როცა გაიგებს, ჩვენ უკვე წასულები ვიქნებით... დიდი წერილი დავტოვე... მამაჩემი კეთილი კაცია, მაპატიებს, მაგრამ ჯერ მეშინია. ამიტომ გადავწყვიტეთ, სადგურზე ცალ-ცალკე მოვსულიყავით.

ქალიშვილი მთელი ტანით აეკრო... მერმე სწრაფად გადაიხსნა გულისპირი, სარაფნის ვიწრო სამხრეები მკლავებზე ჩამოუცვივდა... დათო თავს ძალას ატანდა, უხდოდა როგორმე ჩაეხშოთ თუ ჩაეკლახსოვნაში გადვიძებულ ვიწარსული.



— წამოდი, დათო... მირიანი უკვე მოვიდოდა და ალბათ  
ღელავს. შენ არ იცი, რა ბედნიერი ვარ, დათო... წამოდი.

— მოიცადე, თუმცა, არა....

— ჯობია ერთად მივიდეთ.

— რა თქმა უნდა, ჯობია, მაგრამ მე ასე მირჩევნია.

— ხომ მოხვალ, დათო.

— შენ წადი, მანანა.

— მე მეგონა, ჩვენს გასაცილებლად მოხვედი.

— აკი გითხარი, არ ვიცოდი, თუ დაქორწინდით. შენ წა-  
დი, მანანა. მირიანი ნამდვილად იღელვებს.

— დათო, მირიანს ეწყინება. — მანანა გაიქცა.

— მანანა, — დაუძახა დათომ, — გეხვეწები, მირიანს არ  
უთხრა, თუ მნახე.

— რა სისულელეა, რატომ არ უნდა ვუთხრა?!

— რომელი ვაგონია?

მანანამ უთხრა, ამა და ამ ვაგონში ვართო და ნახევრად  
ბნელ ბაქანზე გაიქცა.

„სულ ერთი არ არის, რომელია? მე მაინც არ მოვალ... არ  
მოვალ... ნამდვილად არ მოვალ... თუმცა, რატომ არ უნდა  
მოვიდე? კაცმა რომ თქვას, რა მოხდა ისეთი?“

ცოტა ხნის შემდეგ გარეთ გამოვიდა თე-  
თრი პერანგი თავის ამხანაგიანად. თეორმა  
პერანგმა და მისმა თეორმა ამხანაგმა მი-  
იხედ-მოიხედეს... მერმე დათოსკენ წამო-  
ვიდა... დათო სხვენის სიბნელეში კატასა-  
ვით გაუჩინარდა... უცებ სახე მკლავებში  
ჩამალა მანანამ. შავი მძიმე თმა ტალღასა-  
ვით გადაეფარა ნახევარ მაგიდას. ხელნა-  
წერი ფურცლები, საფერფლე, ფანქარი თმის  
ქვეშ მოექცა. შავი მბზინავი თმა ზღვის  
ტალღებივით იზრდებოდა, მთელი მაგიდა  
წალეკა... მერმე აზვირთდა, გადაევლო ქუ-  
ჩებს, ხეებს, მანქანებს, ადამიანებს, გადა-  
ევლო მატარებლებს, ხიდებს, სახლებს...  
მთელი ქალაქი მოექცა თმის ქვეშ...

დათო რესტორანში შევიდა. ორი ბოთლი შამპანური და  
შოკოლადის ფილები იყიდა.

ბაქანზე გამოსულმა ნაბიჯს მოუჩქარა, რადგან ვაგონების წინ ხალხი იწრიალდა, ელმავლის საყვირის ხმაც გაიგონა დათომ. გაიქცა. გულზე მიხუტებული შამპანურის ბოთლები მიჰქონდა. მატარებელი დაიძრა, დათო მთელი ძალით გაეკიდა მატარებელს. წინ კიბეზე მდგარ შირიანს მოჰკრა თვალი, იღიმებოდა, ვილაცას უქნევდა ხელს.

— შირიან! — დაიყვირა დათომ.

შირიანმა მოხედა, მაგრამ, ეტყობოდა, სიბნელეში ვერ გააჩნია, ვინ ეძახდა.

— შირიან — უყვიროდა დათო, თან მატარებელს მისდევდა. — შირიან — მე ვარ, მი-რი-ან!

მატარებელი წავიდა. თურმე კარგა ხანს სდია მატარებელს, როცა გამობრუნდა, ბაქანზე კანტიკუნტად დაბორიალობდნენ გამცილებლები.

ერთხანს მოსაცდელ დარბაზში იწრიალა. შამპანურის ბოთლები ისევ გულზე ჰქონდა ახუტებული. გრძელ მერხზე დაინახა მძინარე გლეხი, რომელსაც გვერდზე მიედგა ცარიელი კალათა და ხელი მთვრალი ძმაკაცივით გადაეხვია. დათო მიუახლოვდა. შამპანურის ბოთლები და შოკოლადის ფილები ფრთხილად ჩაუწყო კალათაში...

ქუჩაში გამოვიდა.

ქალაქზე დაცემული ცა გაუბედავად იწყებდა თოვას. პატარ-პატარა ფანტელები თითქოს მიწამდე არ აღწევდა, მუშლივით ირეოდა ჰაერში.

დათომ მოედანი გადასჰკრა...

— ბუბა, მე მეშინია, არ გადაიღალო.

— პირიქით, — უპასუხა ბუბამ, — ეგ დასვენება იქნება ჩემთვის... ასე კარგად არასოდეს ვყოფილვარ.

— ავთანდილს გარდა მოვა ვინმე?

— გელა, ნოდარი, ჯიმშერი... თუ დრო ექნა, შეიძლება ოთარ სალაყაიაც მოვიდეს. ვერ წარმოიდგენ, რა კარგი ბიჭები არიან. დარწმუნებული ვარ, ყველას შეუყვარდები.

ფრთხილი კაკუნი გაისმა. კარი გელამ შემოაღო, შემოვიდა შავ კოსტუმში გამოწყობილი, გაპარსული, თმადავარცხნილი... ბუბასკენ გაღიმებული გაემართა, ბუბამ ხელი გაუწოდა, გელა დაიხარა და უდიდესი მოკრძალებით ეამბორა ხელზე:

— ჯერ არ მოსულან ბიჭები?

— პირველი მერცხალი შენა ხარ.

— რასაკვირველია... მაგათ თუ არ დაიგვიანებს, ისე არ შეუძლიათ. — გელა არაბუნებრივად ლაპარაკობდა და მოძრაობდა, ეტყობოდა, თავს ძალას ატანდა.

— მშვენივრად გამოიყურებით, ქალბატონო ბუბა. დათო ისე წუხდა, მე მეგონა, დავრდომილი იყავით.

— დათო ყოველთვის აჭარბებს. — ბუბა ბრწყინავდა, იღუმალი, შინაგანი შუქით იყო ანთებული.

ცოტა ხნის შემდეგ ნოდარ ნიჟარაძე და ჯიმშერ ქალდანი მოვიდნენ. მათ რაღაც კოლოფი მოუტანეს ბუბას, ვარდისფერ ქალღმერთში შეხვეული.

დათომ მეგობრები წარუდგინა, ორივემ ხელზე აკოცა მწოლიარე ქალს. „დღეს რა ზრდილობიანები არიან!“ — გაიფიქრა დათომ.

გელას აშკარად შეეტყო ეწყინა, თვითონ რომ ვერ მოიფიქრა საჩუქრის მოტანა.

— აუთანდილი არ მოსულა? — იკითხა ჯიმშერმა.

— საცაა ისიც მოვა.

— ძალიან უხერხულად ვგრძნობ თავს... ვერაფრით გიმასპინძლდებით, — თქვა ბუბამ, — დათო, შენ უნდა გეზრუნა ამისთვის.

— ნუ წუხდებით, ქალბატონო ბუბა, — დამშვიდა გელამ, — ჩვენ არაფერი არ გვინდა. ჯიმშერი და ნოდარი ფანჯარასთან დასხდნენ.

— თქვენი ერთად დასხდომა არ შეიძლება, — გელა თანდათან ემსგავსებოდა თავის თავს, — ფიზიკა არ გამაგონოთ!

— ფიზიკას უღალატა, — დაუმატა ნოდარ ნიჟარაძემ, — ისევ კოტე რამიშვილისა და გენების საკითხს დაუბრუნდა.

— ალბათ, ეგ უფრო იოლია, — ვერ ისვენებდა გელა. — ჯიმშერ, მე მაინც ვერ გავიგე, რატომ არ გათქმევიანა სადღეგრძელო თამადამ.

ჯიმშერ ქალდანი გაწითლდა.

— აქ ყველანი მეგობრები ვართ. ის მაინც გვითხარი, რის თქმა გინდოდა. დათო ამბობს, რაღაც ახალი სადღეგრძელო უსწავლია და ჩვენ არ გვიმხელსო.

ამ დროს ავთანდილ ხარაბაძე შემოვიდა. გაუპარსავი, გაბურძნული, მორცხვად აიწურა კარებთან, შორიდან მიესალმა ყველას და უხერხულად აიჩეჩა მხრები.

— ავთანდილ ხარაბაძე, — გააცნო დათომ ბუბას, მერე სკამი მიაწოდა, სხვების წინაშე ბოდის ვიხდი, მხოლოდ ავთანდილისთვის რომ ვიზრუნე, — უბის ჯიბიდან პაწაწინა ბოთლით „ენისელი“ ამოიღო და მეგობარს მიართვა.

ავთანდილმა მადლობა გადაუხადა.

ცოტა ხნით სიჩუმე ჩამოვარდა.

— რაღას ვუცდით, — თქვა გელამ, — ოღონდ სანამ კითხვას დაიწყებდეს, პირობა უნდა მომცეს, რომ ყველაზე პირველად თარგმანის ნაწყვეტს ჩვენს გაზეთში გამოაქვეყნებს.

ავთანდილი დაეთანხმა და ჯიბიდან ორად გაკეცილი ფურცლები ამოიღო. დათო თვალს არ აშორებდა ბუბას. ბუბა ბედნიერი იყო.

დათო კინოსტუდიასთან ავიდა ტროლეიბუსში. მან მოულოდნელად მეორე ცხოვრება აღმოაჩინა და ასეთი კმაყოფილება არასოდეს უგრძენია. იქ არავინ ერეოდა მის საქმეში, არავინ უშლიდა ხელს. ცხოვრებას აწყობდა ისე, როგორც თვითონ მოესურვებოდა.

დანჯღრეული ტროლეიბუსი ჩაქჩაქით მიდიოდა. ირყეოდა, ბანცალებდა, თახთახებდა, ათასგვარ ხმებს გამოსცემდა.

დათო ისევ ბუბაზე ფიქრობდა... ასე ეგონა, თითქოს აღარ შეეძლო ამ ფიქრის გარეშე არსებობა. ეგონა, ეს ფიქრები ბუბამდე აღწევდა. სიმარტოვის გრძნობას უხშობდა და ტკივილებს უქარვებდა. ღრმად სჯეროდა, რომ ეს ფიქრები ცხოვრებას უმსუბუქებდა ბუბას.

დათომ ჭიშკარში შესვლისთანავე იგრძნო, ეზოში უჩვეულო ამბავი ხდებოდა, ასე გვიან, ასეთი სუსხიანი ღამით მეზობლები უმიზეზოდ არ იქნებოდნენ აივნებზე გამოფენილები.

როგორც კი ეზოში შევიდა და თავის აივანს ახედა, მაშინვე მიხვდა, მთელი ეზო გარეთ რატომ გამოსულიყო, ხალხს თბილი ოთახები და საწოლები რატომ მიეტოვებია.

მესამე სართულის აივანზე ბენო ჩიჩუა იდგა. საცოდავი კაცი თავში იცემდა ხელებს და ღრიალებდა.

— დავიღუპე, ხალხო, დავიღუპე! ჩემი მანანა მოატყუეს. წაიყვანეს! ხომ იცით რა ტანჯვით გამიზრდია მომტაცეს! მართო დამტოვეს! სკანი გოლუაფირო, ნანა! სო რექ, ნანა, სო

რექ, სკუა გაჭირვებაში ნარდ, ჩქიმი სკუა უსკანეთი მუ ღაეა-  
შე თეფერე, ნანა..

ღათოსთან ძია ვანო საქმიანად მოცუხცუხდა.

— გაიგე, ღათოჯან, რა უქნია მირიანს?

— გავიგე.

— ხედავ რა ღღეშია!

— ეხედავ, ძია ვანო.

— ბენო ამ ამბავს ეგრე არ ღატოვებს. ჭკვათამყოფელი  
კაცი იყო, განათლებული, როგორ მოიტაცა, კაცო.

— თვითონ წაყვა, ძია ვანო... ახლა მოვღივარ საღგურღ-  
ღან.

მესამე სართულზე ისეე ყვიროდა ბენო ჩიჩუა. იმუქრე-  
ბოდა, ილანღღებოდა. ხალხი მღუმარე თანაგრძნობით მისჩერე-  
ბოდა გამწარებულ კაცს.

— აქეღან ნუ ახვალ, — ურჩია ძია ვანომ ღათოს. — შე-  
იძღება უბეღურება ღატრიაღღეს. ხომ ნახე, თქვენები არღ  
კი გამოსულან, გაგიყებულ კაცს უნღა მოერიღო. როღა ღამ-  
შეიღღება, მერმე გაასწორებთ ანგარიშს.

ღათო აივნისკენ გაეშურა. თითქმის სირბიღით აიარა კი-  
ბეები. მესამე სართუღის აივანს რომ გაუსწორღა, ბენომ იღ-  
ნო ღა ღრიაღით წამოვიღა ღათოსკენ.

— ღამღუბეთ ხომ, ბიჭო. აწი მე მიყურეთ, რას ვიზამი

— ბატონო ბენო, ასეთი ყვირიღი თქვენ არ შეგფერით.

— რა ღროს შეფერებაა!.. ღამექღა ოჯახი!

— მომისმინეთ, ბატონო ბენო... მომისმინეთ, ახლა მოვ-  
ღივარ საღგურიღან, მანანა ვნახე.

— ნახე?!

— კი!

— რა გითხრა?

— რას მეტყოღა? გამიკვირღა, როღა გავიგე მირიანს წა-  
ჭყოღია ცოღად... მე მირიანის გასაციღებღად გავეღი... ეჭ-  
ვიღ კი არ მეპარებოღა... უღებ მანანას წავაწყდი საღგურზე...  
ღამიჭერეთ, ბატონო ბენო, ასე გახარებუღი ღა ბეღნიერი მა-  
ნანა პირვეღად ვნახე.

— ბავშვია, ბიჭო, სუღელია! მოატყუა იმ ოხერმა.

— ბოღოს მითხრა, ვიცი, მამაჩემი კეთიღი კაცია ღა ყვე-  
ღაფერს მაპატებღსო.

ბენო ჩიჩუას, როგორც ჩანს, გული აუჩუყდა, თვალები-  
დან ლაპალუპით წამოუფიდა ცრემლი. ოთახში შევარდა და  
კარი მოიჯახუნა.

დათო ერთხანს აივანზე იდგა. ველარ გაუძლო ბენო ჩიჩუ-  
ას ქვითინს და შინ შევიდა.

— დათო ხარ? — შინ შესვლისთანავე გაიგონა დედის ხმა.

— კი, დათო ვარ.

დედა ოთახში შეეგება, შეშფოთებული და შეწუხებული  
ჩანდა.

— ცოტათი დავამშვიდე. — თქვა დათომ.

— ვინა?

— ბენო ჩიჩუა.

— ბენო ჩიჩუას არაფერი უჭირს. მადლობა თქვას, მაგის  
ცხვირმოუხოცელი გოგო მირიანმა თუ წაიყვანა.

— რატომ არის მანანა ცხვირმოუხოცელი? მშვენიერი გო-  
გოა.

— ქვეშ-ქვეშა კია, ძალიან დაგაგიჟათ ძმები.

დათო აიღეწა, სახე წამოენთო.

— მე რა შემატყვე...

— დედამ ყველაფერი იცის, შვილო, — შეაწყვეტინა სიტ-  
ყვა, მაგრამ ახლა ამის დრო არ არის. წამოდი, თითქმის სამი  
საათია ბატონი ნიკო გელოდება. — დედა შუშაბანდისკენ წა-  
უძღვა.

დათო უნებურად შეკრთა. არაფრით არ მოელოდა, თუ  
შავი ნიკო დახედებოდა შინ. მოულოდნელად შიშიც კი იგ-  
რძნო. შეეშინდა, ნამდვილად შეეშინდა.

პლატონი და ნიკო კორინთელი მაგიდას უსხდნენ. ორივე  
დაფიქრებული იყო, ხელები ორივეს მაგიდაზე ეწყო. თეონა  
ტახტზე იჯდა. მუხლებზე ხატაურა დაესვა და ეფერებოდა.  
ისეთი სახე ჰქონდა, ვითომ კატის მოფერებით იყო გართული  
და არ აინტერესებდა, რა ხდებოდა ოჯახში.

— თეონა, წადი, დაიძინე... გვიან არის, — უთხრა დედამ.  
თეონამ კატა გადმოაგდო მუხლებიდან და უკმაყოფილო სა-  
ხით წავიდა დასაძინებლად. დათო არავის მისალმებია, იქვე  
მიეყუდა კედელს. იცოდა, ადრე თუ გვიან მოუწევდა შავ ნი-  
კოსთან შეხვედრა და ლაპარაკი, მაგრამ არ ეგონა, თუ ეს  
დღე ასე მალე დადგებოდა. შინაგანად მოუმზადებელი იყო

ამ შეხვედრისათვის. ალბათ, ამიტომ დელავდა. ანდა, შესაძ-  
ლოა, ამიტომ შეკრთა და შეშინდა წელან.

— ხედავ, პლატონ, მისალმებაც აღარ უნდა დავითს.

პლატონმა ვითომ ვერ გაიგონა, რა თქვა შავმა ნიკომ, სა-  
ხეზე გაუგებრობა გამოეხატა. ჯერ დათოს გადახედა, მერმე  
ნიკო კორინთელს.

— მე მეგონა, დავითი სიტყვის კაცი იყო, — განაგრძო  
კორინთელმა... — ძალიან კარგად მახსოვს პირობა მოგვცა—  
საქმეს დაიწყებდა და დაამთავრებდა. ხომ ასე იყო, დავით.

— აღარ მინდა იქ მუშაობა! — დათო დაცხრა, უკვე წე-  
ლანდელივით აღარ დელავდა. მთავარი იყო პირველი სიტყვის  
თქმა.

— ეგ ვიცი, მაგრამ ხომ შემძლია, გკითხო: რატომ აღარ  
გინდა!

— მთავარი მიზეზი ჩემი სურვილია. თუ მინდა ვიმუშა-  
ვებ, თუ არ მინდა, არ ვიმუშაებ.

— კარგი იქნებოდა, ეს დალოცვილი წუთისოფელი ჩვენს  
ნება-სურვილზე რომ ტრიალებდეს.

— ერთი სიტყვით, არ მინდა მუშაობა... გინდათ, მიჩივ-  
ლეთ.

— ნუ აღელდები, დავით. აქ საჩხუბრად კი არ მოვსულ-  
ვარ, მოვედი, როგორც მეგობარი მეგობართან. მე მგონია,  
ყოველ შემთხვევაში, აქამდე მეგონა, ჩვენ დავმეგობრდით,  
ბევრ საკითხში გავუგეთ ერთმანეთს, ხომ მართალია.

დათო უცებ მიხვდა, შავი ნიკო მარტო ამისთვის არ იყო  
მოსული, რომ გამოერკვია, სამუშაოთა მწარმოებელმა მუშა-  
ობაზე რატომ თქვა უარი. ნიკო კორინთელს ფარული შემ-  
ფოთება შეამჩნია. ამ შემფოთების დამადგას გამოცდილი,  
ცხოვრების უკულმართობაში გამობრძანებული მამაკაცი საუბ-  
რის მშვიდი კილოთი და დამცინავი, მსუბუქი ღიმილით ცდი-  
ლობდა. შემპარავი ღიმილით გამოხატავდა მუდამ სხვისადმი  
თავისი კაცური ღირსების უპირატესობას.

— შენ ჰქვიანი და განათლებული კაცი ხარ, დავით, კარ-  
გი მეგობრები გყავს, კარგი ამხანაგები. ზოგიერთ მათგანს  
შეუძლია ადამიანის ბედიც კი გადაწყვიტოს... წელან მართა-  
ლი იყავი, თუ მოისურვებ, მოხვალ სამუშაოდ, თუ არადა არ  
მოხვალ. ჩვენ შეგვიძლია გიჩივლოთ, რადგან ჩვენს შორის

ოფიციალური ხელშეკრულებაა დადებული. შენ ეს იცი, მაგრამ მაინც უარს ამბობ სამუშაოზე, რადგან იქ მუშაობას შეგნებულად გირჩევნია დასჯა... თუმცა, რასაკვირველია, ჩვენ არ გირჩევდით. მე სულ სხვა რამ მინდა გითხრა. შენ უფლება გაქვს საკუთარ თავს სურვილისამებრ მოექცე. მაგრამ შენი მეგობრის, შენი აღმზრდელის განსაცდელში მიტოვების უფლება არა გაქვს. დარწმუნებული ვარ, გესმის, დავით, რასაც ვამბობ.

— არა მარტო მესმის, უკვე ვიცი, რაც უნდა მითხრა.

— მით უკეთესი, შენმა მეგობარმა...

— ჩემმა მეგობარმა წერილი მოამზადა შენს წინააღმდეგ.

— არა მარტო ჩემს წინააღმდეგ, ესე იგი, გაიგე თუ არა ამ წერილის არსებობა, მაშინვე უარი თქვი ჩვენთან მუშაობაზე. ეგ რა ვაჩქაცობაა, დავით?!

— ჯერ უარის თქმა გადავწყვიტე, შემდეგ შემთხვევით გავიგე, ისიც გაკვირით. არ წამიკითხავს ის წერილი.

— მე ვიცნობ იმ ვაჟს, ერთხელ იყო ჩემთან და ცუდად მოვექეცი. რა თქმა უნდა, დავაშავე. დავით, შენ უნდა შეგვარიგო.

— არ შემიძლია.

— შენ ყველაფერი შეგიძლია, დავით. შენ არა გაქვს უფლება დაღუპო პლატონი, კაცი, რომელმაც გაგზარდა.

— გითხარით, არ შემიძლია თქვენი შერიგება. ის სხვა კაცია.

— მე ვიცი, როგორ ცხოვრობენ გაზეთის მუშაკები... ფუფუნებას ვერ დაიტრაბახებენ...

საუბარში დედა ჩაერთა:

— როგორ, დათო, პლატონს უჭირს, შენ დახმარება შეგიძლია და არ ეხმარები?!

— მე არ ვიცი, ვის უჭირს!..

— დედა! — გაისმა თეონას ხმა.

— რა იყო, თეონა?!

— დედა, მოდი რა, მეშინია!

— რისი გეშინია, შვილო?.

— რა ვიცი, მეშინია!

დედა გავიდა. პლატონს მსუქანი სახე მაგიდაზე დაყრდნობილ ხელებში ჩაემალა და გაუნძრევლად იჯდა.



— ის კაცი არც ესწრაფვის ფუფუნებას, ცოტა უცნაური  
კაცია — ყველაფერს პატიოსნება ურჩევნია, — თქვა დათომ.

ნიკო კორინთელი წამოდგა. ბოროტად გახედა დათოს. მე-  
რმე უცებ გამომეტყველება შეეცვალა, სახეზე შემპარავმა ღი-  
მილმა გადაურბინა.

— ასე გაუთავებლად შეიძლება ლაყბობა... წავედი.

ნიკო კორინთელი გამოუმშვიდობებლად წავიდა. კარებამ-  
დე დათომ მიაცილა. როცა გამობრუნდა, დედამ შეაჩერა.

— უმადურო! ყველანი გეჭაგრებით, მეც, თონაც, პლა-  
ტონიც... მირიანიც გეჭაგრებოდა... იმ დღეს განა ვერ მივხვ-  
დი, რა მითხარი. მაშ, ვერ ვუერთგულე, არა?! ვინ ეუბნება  
ეგეთ სიტყვებს დედას?!

— პლატონი მაშინ დაისჯებოდა, გეგმით გაუთვალისწი-  
ნებელი საამქრო რომ დაემთავრებინა. შემოსავალი პლატონს  
და კორინთელს უნდა გაენაწილებინა... მაგრამ მე ეს არ ვქე-  
ნი... ამიტომ მივანებე სამუშაოს თავი... თუ სხვა რამ დანა-  
შაული ჩაუდენია, ეგ უკვე მე არ შემეხება, დედა...

დათოს დილიდანვე უნდოდა საავადმყოფოში წასულიყო.  
ეშინოდა, დღესაც არ გაესწრო პროფესორს, თორემ ბუბას  
ნახვას ველარ მოახერხებდა. სადარბაზოდან გამოსვლისთანა-  
ვე დაიჭირა ტაქსი. დათოს ამგვარად არასოდეს უღელვია. უც-  
ნაური წინათგრძნობა დაეუფლა — დღეს უსათუოდ ნახავდა  
ბუბას. ნეტავი როგორი იქნებოდა ბუბა? ისეთი, როგორიც  
ბოლო დროს ჰყავდა წარმოდგენილი, თუ სხვანაირი?

საავადმყოფოსთან იმდენად აღელდა, უკან გამობრუნება  
გადაწყვიტა. მაგრამ დათოს რაღაც უცნობი, ძლიერი გრძნობა  
ეწეოდა ბუბასაკენ.

პროფესორმა, როგორც იქნა, ნება დართო.

თეთრი ხალათი გადააცვეს... მეორე სართულზე აგზავ-  
ნეს...

დათომ საკმაოდ გრძელი და ბნელი დერეფანი გაიარა.  
პალატის ნომერს ახედა, ამ პალატაშია ბუბა!

კარი ოდნავ ღია იყო.

— შეიხედა.

ნიკელის საწოლზე ვილაც იწვა ზურგშექცევით. ქალის კა-

ღარა თმით მიხვდა, ავადმყოფი ბუბა არ უნდა ყოფილიყო.  
ისევ დააპირა გამობრუნება.

მაგრამ კარზე დააკაკუნა და იკითხა:

— შეიძლება!

პალატიდან არავინ უპასუხა.

ხელმეორედ დააკაკუნა და მორიდებით შეაღო კარი:

ბუბამ თვალი გაახილა და შემოსულს შეხვდა. ერთხანს უყურა და მერე ისევ დახუჭა.

აღბათ ვერ იცნო.

აღბათ იფიქრა: სხვა ავადმყოფს ეძებს და შემთხვევით შემოვიდა.

ღათომ თვალი მოავლო იქაურობას. პალატაში სამნი იწვნენ: ორი დედაბერი და ბუბა.

სასთუმალთან, ტუმბოზე გუშინდელი მიხაკები ეყარა.

სუსტი, გამხდარი მკლავები საბანზე ეწყო... ღათოს მოეჩვენა, თითქოს სახე დაპატარავებოდა ბუბას, დალეოდა. კანს სიყვითლე თითქოს შიგნიდან შეჰპარვოდა.

— გამარჯობათ, ბუბა.

ბუბამ ისევ გაახილა თვალები.

— მე თქვენთან მოვედი.

ბუბას გამომეტყველება არ შეეცვლია, ცივად მიჩერებოდა ღათოს.

— აღბათ ვერ მიცანით.

— მე არ მინდა ვიცრუო ისე, როგორც თქვენმა ძმამ.

— იცით, რა... მე ახლაც არ მესმის, რატომ მოგატყუათ მირიანმა.

— მირიანმა კი არ მომატყუა... ჭყუილი თქვა.

— მართალია, რა თქმა უნდა, ეგ ერთი და იგივე არ არის.

— ეს მიხაკები თქვენ გამომიგზავნეთ?

— დიახ!

— როგორც კი დაგინახეთ, მაშინვე მივხვდი.

— პირველად რომ გნახეთ, წითელი ფერი ჩამრჩა ხსოვნაში... მერმე ვიგრძენი, რომ ეს ფერი მიხაკის სურნელი იყო.

ბუბამ მიხაკებს გადახედა.

— ძალიან მინდოდა თქვენი ნახვა, ბუბა. ასე მეგონა, რალაცას დაგეხმარებოდით, ტკივილს შეგიმსუბუქებდით.

— ჩემი ნახვა აღარ შეიძლება... დღესაც არ უნდა მოსულიყავით...

— მაპატიეთ... მშვიდობით.

დათო ბალატიდან გამოვიდა. ბალატაში სული ეხუთებოდა, იხრჩობოდა. ჩქარი ნაბიჯით გაიარა დერეფანი.

ხშირად იხედებოდა უკან, თითქოს ვიღაცა მოსდევდა და გაუბრბოდა.

სწრაფად ჩაირბინა კიბეები.

ღარაჯს თეთრი ხალათი მიუგდო და პალტო გამოართვა. არც კი ჩაუცვამს, ისე გავარდა გარეთ. კარებთან ღარაჯის ხმა გაიგონა:

— ვა, სულ ეგ იყო?!

ქუჩაშიც თითქმის გარბოდა.

მერმე შეჩერდა.

პალტო ჩაიცვა და საავადმყოფოს მოხედა.

„ვა, სულ ეგ იყო?! სულ ეგ იყო?! სულ ეგ იყო?!“

დათომ სცადა აღედგინა მის ფიქრებსა და წარმოდგენაში არსებული ბუბა, მაგრამ ვეღარ მოახერხა. ის ბუბა უკვე აღარ არსებობდა. არსებობდა მხოლოდ ლოგინში მწოლიარე ქალი, რომლისთვისაც სულ ერთი იყო, მივიდოდა მასთან თუ არ მივიდოდა დათო... სულ ერთი იყო, წუხდა თუ არ წუხდა დათო... სულ ერთი იყო, ანუგეშებდა თუ არ ანუგეშებდა დათო.

როგორც ჩანს, ორივე ბუბას ერთად არსებობა შეუძლებელია. ან ფიქრებში უნდა არსებობდეს, შენივე მოგონილი, ანდა...

„ესთერ, ესთერ, მითხარი, რა იქნა ჩემი მარგალიტი?!“

დათომ თითქმის სირბილით აიარა აღმართი. ეზოში შევიდა. ახლა უკვე სულ ერთი იყო, საიდან შევიდოდა, ეზოდან თუ სადარბაზოდან.

— გამარჯობა, ზურიკო!

— გაგიმარჯოს, ძია დათო!

— ჩემთან ხომ არ ამოხვიდოდი ცოტა ხნით?

— არა, ძია დათო, მე ეზოში მირჩევნია ყოფნა.

— შენი ბელურები აღარ მოგენატრა? ამას წინათ ვნახე, მობუზულეები ისხდნენ თოვლში.

— სციოდათ?

— ალბათ, წამო, ვნახოთ.

ზურიკო შეყოყმანდა.

— წამო, ძველი მეგობრობა გავიხსენოთ. თანაც რალაც უნდა გაჩუქო.

— რა?

— ჯერ ნახე, იქნებ არ მოგეწონოს.

დათომ ხელი ხელში ჩაჰკიდა და კიბისკენ წაიყვანა ბავშვი.

— ძია დათო, იცი რა, ორჯერ ორი არის ოთხი.

— სხვამ გასწავლა, თუ შენ თვითონ მიხვდი?

— ვის უნდა ესწავლებინა.

— ცოტაა, ვინც ეგ იცის?

— არავეინაც არ იცის... მე მივხვდი.

— შენ თვითონ მიხვდი, რომ ორჯერ ორი ოთხია?

— კი, ძია დათო.

— შენხელა ბავშვი ვერ უნდა მიხვდეს.

— მე მივხვდი, ძია დათო.

დათომ ხელში აოტაცა ბავშვი და აკოცა. უკანასკნელი საფეხურები ასე აათავა, ზურიკო აყვანილი მიჰყავდა.

— ჩამომსვი, რა, ძია დათო, ისე მირჩევენია.

დათომ აივანზე ჩამოსვა ზურიკო. თვითონ კარი გაუღო.

— მობრძანდით, ბატონო.

შინ არავინ იყო.

— ზურიკო, ხვალიდან მე მივდივარ.

— სად?

— სადმე, მშენებლობაზე.

— დიდხანს დარჩები?

— დიდხანს.

— ჩვენი მივდივართ. დედა ამბობს, მალე წავალთ...

— ასეა, ზურიკო, ყველა მიდის, ყველას თავისი გზა აქვს. აბა, ახლა ვნახოთ, იქ არიან თუ არა შენი ბელურები.

ზურიკომ: ფანჯარასთან მიირბინა და მაშინვე იმედგაცრუებული მობრუნდა:

— არ არიან, ძია დათო.

— სად წავლენ, მოფრინდებიან.

— ძია დათო, რა უნდა მაჩუქო

— ოო... თუმცა ჯერ შენ მითხარი, რატომ არ მოდიოდი ჩემთან? განა ვერ შეგატყვე, ნაწყენი რომ იყავი.

— ბიჭები მამრახებდნენ.

— რას გეუბნებოდნენ? ।

— მე ვუთხარი, ძია დათო ჩემი მეგობარია-მეთქი.

— იმათ რა გითხრეს?

— მეგობარი კი არა, მამობილიაო.

დათო მოულოდნელად გაწითლდა და შუშაბანდში გავიდა, რომ ბავშვს სიწითლე არ შეემჩნია.

— ძია დათო, ერთხელ აქ ამოვდიოდი და მითხრეს: მამობილთან მიდინხარო!

— სულელები არიან. ზურიკო, შენ ჭკვიანი ბიჭი ხარ, ისინი კი სულელები არიან.

— რა არის, ძია დათო, მამობილი?

— ზურიკო, ეს ოქროს თევზი მოგწონს?.. ।

— ზურიკო, ეს ოქროს თევზი მოგწონს? ეს ოქროს თევზი...

სისხლისფერი, გრძელფარფლიანი თევზი მშვიდად რომ დასრიალებდა მომწვანო წყალში, უცებ დაიძაბა.

შუშაბანდში შემოვიდა პატარა ბიჭი. ეს ბიჭი წინათაც უნახავს, რამდენჯერმე იყო აქ, კარგად ახსოვს მისი ცნობისმოყვარე, ხარბი თვალები, მაგრამ წინათ არასოდეს არ შეშინებია ამ ბიჭისა, ახლა კი დაინახა თუ არა, გული გადაუქანდა.

პატარა ბიჭი მივიდა, ისეთივე ცნობისმოყვარეობით უმზერდა ოქროს თევზს, როგორც მაშინ, ოღონდ ახლა თვალებში სხვა ცეცხლი უღვიადა პატარა ბიჭს. საშიში ცეცხლი. თევზი დაბლა დაეშვა და თავი ნიჟარაში დამალა.

— ძალიან მომწონს! ძია დათო!.. ძალიან მომწონს.

— ეგ არის, რაც უნდა მეჩუქებინა... მეჩუქებინა.

ოქროს თევზი მიხვდა, ამიერიდან მისი პატრონი იქნებოდა ეს პატარა ბიჭი. უსიამოვნო თრთოლვამ აიტანა. გულის გამაგრება მოიწადინა. ვერ შეძლო. მერმე მოეჩვენა, რომ დაღამდა. მერმე მოეჩვენა, რომ მარტო არ იყო, სხვა თევზებთან ერთად ცხოვრობდა. ოღონდ წყალში კი არა, არამედ ღამეულ სივრცეში. ისე, როგორც ოქროს ვარსკვლავები ცხოვრობენ.

— ძია დათო, წავეყვან, ძია დათო...

— წარყვანე, ზურიკო... ზურიკო.

ზურიკომ ქილას ორივე ხელი მოხვია.

— მოიცადე, ზურიკო... მოიცადე... წყალი მოვაკლოთ...  
ისე ვერ მოერევი... ვერ მოერევი...

აქვარიუმიდან წყალი გადაღვარეს, სულ ცოტა დატოვეს, სულ ცოტა. ოქროს თევზს ცურვა აღარ შეეძლო... აღარც პა-ერი ყოფნიდა. შეშინებული ცდილობდა ნიჟარის უკან დამა-ლულიყო, მაგრამ ნიჟარა ქანაობდა, ფერდებში ხვდებოდა და აუტანელ ტკივილს აყენებდა.

პატარა ბიჭმა ისევ მოავლო ორივე ხელი აქვარიუმს და წაიღო. აქვარიუმში წყალი ტორტმანებდა, ოქროს თევზს მი-ნის კედლებს ახეთქებდა.

„მე უნდა გავუძლო ყველაფერს, — ფიქრობდა ოქროს თევზი, — მე უნდა გავუძლო...“

მერმე ლურჯი ცა და თეთრი ღრუბლები დაინახა. სახლე-ბი, სახურავები, მერე კიბის რიკულებიან მოაჯირსაც მოჰკრა თვალი.

პატარა ბიჭი ხის კიბეზე ჩადიოდა.

ეზოში პატარა ბიჭი გაიქცა.

— ნუ მირბიხარ, ზურიკო! ნუ მირბიხარ!.. — გაიგონა ოქ-როს თევზმა დათოს ხმა.

პატარა ბიჭი მაინც გარბოდა.

უცებ ყვირილი შემოესმა... წყლის ტორტმანით იგრძნო, პატარა ბიჭმა რაღაცას წამოჰკრა ფეხი. ისიც იგრძნო, რომ აქ-ვარიუმს შეუშვა ხელები.

მერმე იგრძნო, როგორ დაიმსხვრა მინა.

ოქროს თევზი ცივ ასფალტზე ფართხალებდა. ხტოდა, საშ-ველს ეძებდა. სუნთქვა აღარ შეეძლო...

„ღირსეულად უნდა მოგკვდე, — გაიფიქრა ოქროს თევზ-მა. — მე უკვდავი ვარ, ჩემი სული ადამიანში იცოცხლებს...“  
ოქროს თევზი აღარ სუნთქავდა.

## ს ს რ ჩ ე ვ ი

ლუკა	3
თეთრი ცხენი	168
ოპროს თევზი	377

რედაქტორი ზ. კილაძე  
მხატვარი ჯ. ყავლაშვილი  
მხატვრული რედაქტორი დ. დუნდუა  
ტექნიკური რედაქტორი ნ. აფხაზავა  
კორექტორები: ნ. ებრაღიძე, ნ. კირთაძე  
გამომშვები ა. სააკაძე

ს. ბ. № 6333

გადაეცა წარმოებას 18.03.88. ხელმოწერილია დასაბეჭდად 29.11.88.  
საბეჭდი ქალაქი № 1. 60X84<sup>1</sup>/<sub>16</sub> გარნიტური ეენა. ბეჭდვა მა-  
ლალი. პირობითი ნაბეჭდი თაბახი 28,98. პირ. საღ.-გატ. 28,98. სა-  
აღრ.-საგამომც. თაბახი 26,89. ტირაჟი 20 000. შეკვ. 14 12,13  
ფასი 2 მან.

გამომცემლობა „საბჭოთა საქართველო“  
თბილისი, მარჯანიშვილის 5.

საქართველოს სსრ გამომცემლობათა, პოლიგრაფიკა და წიგნის  
ვაჭრობის საქმეთა სახელმწიფო კომიტეტის თბილისის ო. ქვეკავშირის  
სახ. წიგნის ფაბრიკა, მეგობრობის გამზირი № 7.

Тбилисская книжная фабрика им. И. Чавчавадзе Государст-  
венного комитета Грузинской ССР по делам издательств, по-  
лиграфии и книжной торговли, пр. Дружбы № 7.

**Сулакаури Арчил Самсонович**

**ТРИ РОМАНА**

**(На грузинском языке)**

**Издательство «Сабчота Сакартвело»  
Тбилиси, Марджанишвили 5  
1988**